


e
a 2





VI 72

28

10. - 2 e. 28.







TRACTATUS DE VITA, MYSTERIIS ET ANNIS JESU CHRISTI Servatoris nostri,

CONTRA INFIDELIS, JUDÆOS, ET HÆRETICOS,
DISSERTATIONIBUS

DOGMATICIS ET CHRONOLOGICIS,
Necnon Observationibus Historicis, & Criticis,

Juxta germanam Divi THOMÆ mentem illustratus,

Et ad usum Scholæ accommodatus,

*Ad cujus calcem, in rem Chronologiæ sacrae studiosorum, attexuntur
Apparatus, & Canon Chronologicus per sex Mundi ætates, &
præcipuas Periodos, ac nobiliores Epœchas à Creatione
Mundi usque ad Ascensionem Christi
Domini digestus.*

AUCTORE
R. P. F. IGNATIO HYACINTHO
AMAT DE GRAVESON
Ordinis Fratrum Prædicatorum,

Sacrae Facultatis Parisiensis Doctore, & Collegii Casanatensis Theologo.


*Editio altera ab Auctore recognita, tribus novis Dissertationibus,
multisque Observationibus Historicis, Criticis, necnon Tabulis
Chronologicis auctior, locupletior & emendatior,
atque in duos Tomos nunc distributa.*

TOMUS PRIMUS.

ROMÆ, Typis, & sumptibus Hieronymi Mainardi
in Platea Montis Citatorii 1724.

SUPERIORUM FACULTATE.

Ad usum Fr. Josephi Ignatii Amelitz



Reverendissimo Patri

AUGUSTINO

P I P I A

SACRÆ THEOLOGIÆ PROFESSORI,

*Et totius Ordinis FF. Prædicatorum
Generali Magistro.*



Uòd te præ cæteris Patronum am-
biám, Reverendissime Pater, cau-
sæ sunt, & plures, & magnæ.
In primis, ejusmodi est istius Li-
bri, qui secundis curis adornatus
Tibi se sistit, Argumentum,
quod Te præsertim Patronum
postulare, & in te unum perbel-
lè quadrare videatur. Complectitur quippè hic Liber,
quem tibi, Reverendissime Pater, in præsentia offero,



EPISTOLA

Vitam , & Myſteria Jeſu Chriſti , Servatoris noſtri , in quorum aſſidua meditatione ſic à teneris annis te exercuiſti , ut nihil prius & antiquius habere unquam viſus ſis , quàm ut Jeſum Chriſtum , à quo , ceu fonte , bonorum omnium Summa proficiſcitur , cognoscere ſtudies , cognitum laudares , laudatum amares , amatum candidiſſimis moribus tuis exprimeres , omniſque ſermo tuus illum unicè ſaperet , illum referret , illum ſpiraret , qui & Verbum eſt Patris , & verba Vitæ ſolus habet . Felicem itaque aditum omni procul dubio habebit ad te , Reverendiſſime Pater , Liber iſte , qui , totus quantus eſt , dilucidè explanat Myſteria , ſeu totam deſcribit Œconomiam Vitæ Jeſu Chriſti , Servatoris noſtri , qui ultrò ſemetipſum è Regno Patris in hoc noſtrum exilium demiſit , ut nos Paradifo dejectos , Cœli cives redderet ; noſtram humanam carnem induit , ut nos immortalī gloriæ veſtiret ; noſtrā tectus formā , nobiſcum in hoc calamitoſo Mundo complures annos agere , & pro nobis vagire , ſitire , eſurire , algère , æſtuare , laborare , egère , vigilare , jejunare , aliisque id genus malis noſtris obnoxius eſſe dignatus eſt , ut nos ab omnibus exemptos malis in ſui raperet amorem , & in ſummi boni communionem adſereret . Nec his contentus Jeſus , Salvator noſter , voluit etiam per omnem Sanctiſſimæ Vitæ ſuæ ſeriem efficaciſ ſ exemplis animos noſtros inflammare , ſalutaribus præceptis erudire , ſtupendis miraculis expergeſcere , cœleſti doctrinā imbuere , blandis monitiſ trahere , certis promiſſis in-

N U N C U P A T O R I A .

invitare, viamque Cæli aperire, dum pro nobis vinciri, trahi, damnari, rideri, cædi, conspui, vapulare, probris affici, & in ara Crucis Agnus sine macula immolari voluit, ut nos suis vinculis solveret, suis sanaret vulneribus, suo lavaret sanguine, suâ morte ad immortalitatem proveheret. In summa, totum se se nobis impendit Jesus Christus. Resurrexit propter justificationem nostram. Suis intuentibus Discipulis Patrem repetiit, ut membra confiderent, cò se perventura, quò caput jam præcessisse conspicerent, & tandem, ut suorum Discipulorum magis confirmaret animos, egregium illud perpetui amoris sui pignus ad eos misit, Sacrum videlicet illum Spiritum, quò mortui Mundo, longè veriùs ac faciliùs viveremus in eo, quàm spiritu nostro vivimus. Hæc sunt, Reverendissime Pater, augustissima Jesu Christi Mysteria, & immensa, quibus nos locupletavit, beneficia, de quibus arduam licèt, meisque viribus imparem differendi provinciam cùm susceperim, in eam facilè erigor spem, fore ut hoc qualecumque Opus, à me lucubratum, Reverendissimæ Paternitati Tuæ, quæ in Mysteriorum Jesu Christi meditationem jugitèr incumbit, probetur, illudque serenâ fronte excipiat, ac suo dignetur patrocinio.

Præterea, Beatiss. Patriarchæ nostri DOMINICI locus; quem in toto Prædicatorum Ordine tenes, & in quo sola illa virtus, quæ te ipsum ab incunabulis susceptum comitata est, suis ipsa manibus collocavit; hic, inquam, sublimis ille locus, quem in Familia

Do-



E P I S T O L A

Dominicana tenes , admonuit , ut Te ; Reverendissime Pater , mihi Patronum præ cæteris adsciscerem , tibi que hunc Librum *De Mysteriis Jesu Christi* nuncuparem . Legimus siquidem in Annalibus nostris , Beatissimum Patriarcham *Dominicum* , ut facilius Albigensum Hæresim , longè latè que in Galliis grassantem , profligare posset , instituisse , maximo Ecclesiæ Catholicæ emolumento, Sanctissimum ROSARIUM , quod Sapientissimus *Martinus Navarrus* jure optimo appellat *Patrimonium Ordinis Dominicani* , verè que etiam dici potest *Manuale Evangelicum* , in quo quindecim præcipua redemptionis humanæ Mysteria piis meditationibus percensentur . Cui igitur potiori jure istud *De Mysteriis Jesu Christi , Redemptoris nostri* ; Opus dicare ac consecrare debebam , quàm Tibi , Reverendissime Pater , qui Sancti Patris *Dominici* locum occupas , illum nobis repræsentas , ejus vestigiis insistis ; totumque Prædicatorum Ordinem , cujus ipse fundamenta jecit , eâ sapientiâ , prudentiâ ac felicitate regis ; ut ad summam rerum administrationem non tam factus , quàm natus esse videaris . Possem hoc loco nominatim commendare miram , quâ polles , in tractandis negotiis , & administrandâ publicâ re solertiam ; sinceram ac fuci expertem affabilitatem , quâ illos omnes excipis , quos tuæ curæ concredidit Deus Optimus Maximus ; ardentissimum zelum fartam tectam custodiendi Disciplinam Regularem , quam perpetuâ , sibi que semper constanti vitæ ratione in te exprimis , & ad unguem observas ; maximam in occupatio-

N U N C U P A T O R I A

pationibus summis orandi assiduitatem , tamque singularem dissimilium alioquì virtutum conspirationem , ut nec de candore prudentia , nec de comitate gravitas , nec doctrinæ studium de pietatis amore quidpiam decerpat . Hæc , inquam , & alia benè multa , quæ de tuo felicissimo regimine veniunt in mentem , magnificè & verâ cum laude commendare possem , Reverendissime Pater , quibus tamen referendis consultò superfedebam , tum quia probè scio , Te rarissimâ quâdam moderatione bonum esse , quàm bonum prædicari malle : tum quia etiam tam excelsò atque illustri loco sita est virtus tua , & ad omnes pervulgata , ut vana præconiorum respuat ornamenta , nec laudibus crescere possit , nec delectari . Hoc unum dumtaxat , æterni præconii instar , celebrabo , quòd in postremis totius Prædicatorum Ordinis Generalibus Comitibus , Romæ anno MDCCXXI. habitis , in tanta , quæ aderat , præstantium virorum turba , qui præesses omnibus , ex omnibus potissimum electus fueris , & quæ cæteros ornare solet dignitas , Tu hanc præclarissimis virtutibus ornes , & in splendoris cumulum attollas .

Sed & tertia accedit ratio , Reverendissime Pater , quæ me , ut candidè fatear , maximè impulit , ut hoc Opus , quod *de Vita , & Mysteriis Jesu Christi* concinnavi , cum tui clarissimi nominis inscriptione luce publicâ donarem , tuoque cohonestarem ac nobilitarem patrocinio . At enim , in hoc conscribendo Opere unum , instar omnium , ducem ac Magistrum se-

EPISTOLA

sequutus sum Sanctum *Thomam Aquinatem* ; Doctorem Angelicum , & Theologorum facilè Principem , qui de Myſteriis Jeſu Chriſti à Quæſtione vigefima ſeptima tertiæ Partis ſuæ Summæ uſque ad Quæſtionem ſexageſimam eruditè , copioſè ac luculentè diſſerit . Porro , quem in doctrina *S. Thomæ* magis verſatum poteram adoptare Patronum ac judicem , quàm Te , Reverendiſſime Pater , qui non ſolùm doctrinam Sancti *Thomæ* apprime calles , eamque in purum putumque , quod dici ſolet , ſuccum converteris , ſed etiam pulcherrimos ex eà flores , copioſiſſimoſque fructus retuliſti ? Illa tibi ſuos omnes fontes , intimosque theſauros aperuit ; teque ſic omnibus Diſciplinis imbuir , atque expolivit , ut in omni Theologicæ eruditionis genere vix quiſquam te uno callidior ſit æſtimator , Judexque ſagacior . Huic Doctrinæ *S. Thomæ* debes , quòd , dùm in Collegio Minervitano Regentis Officium obires , de rebus difficillimis explicatè , de intricatiſſimis abundè , nervoſè & ſubtilitè loquentem , Fratrumque tuorum ànimos doctiſſimis tuis prælectionibus alentem , exceperit admiratio tanta , tanti plauſus fuerint conſequuti . Huic etiam Doctrinæ *S. Thomæ* debes , quòd Collegium Caſanatenſe , ab Eminentiſſimo Cardinali *Hieronymo Caſanate* , cujus memoria ſemper apud nos in benedictione erit , ad publicum Eccleſiæ Catholicæ , totiuſque Rei-publicæ Literariæ commodum ſapientiſſimè inſtitutum , ampliſſimiſque redditibus dotatum , exquisitâ eruditione cum eximia morum probitate conjunctâ per

N U N C U P A T O R I A .

per plures annos illustrasti, eique novum splendorem, qui semper apud posteros nunquam intermoriturâ memoriâ vigebit, conciliaſti. Memini utique ipſe, & meminisse juvabit diu, quantam mihi jure ac meritò sæpiùs moverint admirationem hæc tua, non minùs eruditione, quàm pietate condita, quibus, dum adhuc eſſes in noſtro Collegio Caſanatenſi, perfruebar, colloquia. Sed altiorem gradum tua promerebatur virtus, quæ Te reddidit cariffimum Eminentiſſimo Cardinali *Thomæ Mariæ Ferrari*, Ordinis Prædicatorum, qui non tam Purpurâ, quàm Virtutum & omnigenæ doctrinæ fulgore conſpicuus, paucis abhinc annis moriens, incredibile fui deſiderium toti Eccleſiæ, & Ordini Prædicatorum in primis, reliquit. Per hunc doctum, juxta ac pium Cardinalem; tua virtus, quæ, ſub religioſæ ſolitudinis umbraculis latens, ſe ſe prodere nolebat, innotuit tandem CLEMENTI XI. piæ memoriæ Pontifici Maximo, & veræ eruditionis cultorum Patrono munificentiffimo, qui actutum curæ ac fidei tuæ credidit atque commiſit perilluſtre Secretarii Congregationis Indicis Officium, quò tantâ cum laude perfunctus es, Reverendiſſime Pater, ut de univerſa Eccleſia optimè meritus ſis, eique egregiam navaveris operam, ſive in tutanda contra Hæreticos Fidei Catholicæ integritate, ſive in conſigendis cenſorio ſtigmatæ Libris, qui temerè in vulgus ſparſi noxiam incautis Lectoribus doctrinam inſtillare ac propinare poterant, ſive in promovenda Sanctitate Moralis Chriſtianæ, quam ex

E P I S T O L A

puro Doctrinæ Sancti *Thomæ* fonte hausisti . Hæc omnia , Reverendissime Pater , honoris . & gloriæ ornamenta , quæ hactenùs consecutus es , accepta referre debes Scholæ Thomisticæ , quæ Te Sancti *Thomæ* doctrinæ lacte aluit , fovit , instituit ; educavit , & ad hanc nominis famam , celebritatemque provexit . Hinc non mirum , si tibi , vix ad supremam totius Ordinis Prædicatorum Præfecturam evecto , in mentem venerit grati animi in *S. Thomam* cura & cogitatio , authorque fueris Sapientissimis Patribus , in ultimis Comitiis Generalibus Romæ congregatis , ut concederent ac publicarent Decretum , quo omnes tuo Regimini subditi , explosâ omni novitate doctrinæ , avitam Sancti *Thomæ* Doctrinam , Christi . & Ecclesiæ auctoritate probatam , adamussim. sequerentur , ab ea ne latum quidè. unguem desciscerent , sicque Regiâ viâ. incedentes , Sacrum istud de puritate Ethices Christianæ , & de Gratia se ipsâ efficaci Depositum , quod Sanctus ille Doctor custodiendum Scholæ suæ reliquit , conservarent illibatum , pro aris ac focus defenderent , & ad seram usque posteritatem omni studio ac sollicitudine transmittere totis viribus adlaborarent . Cùm igitur , Reverendissime Pater , comper- tum atque exploratum haberem , te erga Sancti *Thomæ* Doctrinam optimè affectum esse , & in ejus studio pares habere paucos , superiorem fortasse neminem , nonne æquissimum erat , ut hoc Opus *De Vita & Mysteriis Jesu Christi* , quod puram exhibet *S. Thomæ* Doctrinam , tuis sub auspiciis , tuoque inscriptum no-
mini

N U N C U P A T O R I A .

mini publicam prodiret in lucem , in tuo sinu fove-
retur, & in tua humanitate conquiesceret .

Denique, cùm sæpiùs expertus sim , Reveren-
dissime Pater, tuam ergà me, licèt immeritum, pa-
ternam benevolentiam, facere non potui, quin tan-
dem aliquandò prodire coràm, & erumpere quodam-
modò gestiret meus erga te gratus animus, & ob-
servantia, ad cujus perenne monumentum offero ti-
bi istud Munusculum Litterarium; quod licèt splen-
dori tuo, & meo desiderio parùm oppidò respondere
facili negotio intelligam, si tamen illud ex dignitate
Argumenti, vel ex voluntate dantis æstimes; non
exiguum, me hercle, Tibi videbitur, &, ut spero,
pro tua singulari humanitate non repudiabis. Erit
autem labori meo merces magna nimis, & cumula-
tissimum operæ præmium; si benevolè susceperis non
rem, sed pronam in Te voluntatem, quâ apud omnes
testatum relinquere vehemèntè cupio, quanto pe-
ctoris ardore, quantisve nominibus, quamdiù quid-
quam spiritus calebit in corpore meo; futurus sim

REVERENDISS. PATERNITATIS TUÆ

Obsequentissimus Servus, & addictissimus Filius
F. Ignatius Hyacinthus Amat de Gravelon, Ord. Præd.

PRÆFATIO

IN NOVAM EDITIONEM

Tractatus de Vita, Myſteriis & annis
Jeſu Chriſti, Servatoris
noſtri.



*Ecimus quartus, ſi benè memini, jam
hic vertitur annus, ex quo, qui tùm
maxima cum nominis ſui commen-
datione præerat Ordini noſtro, Pre-
poſitus Generalis, Reverendiſſimus
Pater Antoninus Cloche, mihi, li-
cèt immerito, Textum S. Thomæ,
omnium Theologorum facile Principis, juxtà ſupre-
mam Eminentiffimi Cardinalis Hieronymi Caſanate,
de Schola Thomiſtica optimè meriti, publicè Romæ
in Conventu Minervitano explanandi provinciam de-
mandaverat. Optimi illius Parentis, à quo jam in
Collegium Theologorum Caſanatenſium cooptatus fue-
ram, mandato, ut par erat, cùm morem geſſiſ-
ſem, in id me totum contuli, ut hanc Spartam,
quam naſtus eram, in publicis Prælectionibus, quas
ſingulis diebus per horam integram continuo orationis
filo habebam, pro virili parte exornarem, & ani-
mos eorum, qui me audiebant, ad puram putamque
doctrinam S. Thomæ addiſcendam, eamque non ex
lacunis, ſed ex puris & illibatis fontibus hauriendam,
accenderem & inflammarem ſtudia. Auspicatò autem*

con-

AD LECTOREM.

contigit, ut tertiam Summæ Theologicæ Sancti Thomæ Partem, in qua Doctor ille Angelicus, venerandam Patrum canitiem sequutus, de augustissimo Incarnationis Mystério perdoctè diffèrit, exponendam aggrederer, indeque latissimus se se mihi aperiret campus ad Historiam Evangelicam, seu totius Vitæ Iesu Christi in terris perlustrandam æconomiam, & ad referenda sacratissima illius Mystèria, in quibus omnes Christiani, qui salvi esse volunt, totius spei ac fiduciæ suæ anchoram figere & collocare debent. Gustum tamen Auditorum, quorum mihi benevolentiam & attentionem conciliare summoperè studebam, in prima, quam habui, Prælectione explorare volui, & periculum facere, an, post dilucidatum, ut moris est, Textum Sancti Thomæ, eorum palato sapere possent nonnullæ Quæstiones, quas sive ad pleniorè Historiæ Evangelicæ notitiàm assequendam, sive ad Dogmatum Fidei contra Hæreticos defensionem, sive ad illustrandam Chronologiæ, Criticesque Disciplinam spectantes, in aliis Prælectionibus proponere, ac dirimere animus erat. Subverebar siquidem, ne Auditores, spinosis Scholarum difficultatibus ventilandis & enodandis assueti, hisque, tanquàm deliciis, plus æquo oblectati, alias & insolitas à me appositas dapes fastidirent, meque Prælectionibus eas de Incarnationis Dominicæ Mystério inferentem quæstiones, in quibus potissimum versatur Theologia Positiva, agrè sustinerent, oleumque & operam perdere dictarent. Verùm, mea me fefellit opinio, & in prima, quam habui, Prælectione

P R Æ F A T I O

lectione confestim animadverti, Auditores, qui me sua presentia dignabantur; singula, quæ sive ex Historia Evangelica, sive è Theologia Dogmatica, sive ex Chronologia, & Critices Disciplinis excerpta, ad genuinum S. Thomæ Textum, non tam Scholastico, quam Academico more, exponendum, in medium appositè proferebam, pronis ac suspensis auribus auscultare, & versa vice, somnum eis obrepere, quoties in subtilioribus excutiendis Scholasticis difficultatibus eos detinere volebam. Quò factum est, ut, post perspectum semel ac satis superque exploratum meorum Auditorum gustum, eandem methodum, quam illis arridere ac probari intelligebam, in sequentibus Prælectionibus semper retinuerim, & Theologiam Scholasticam arctissimo vinculo cum Theologia Positiva, seu Dogmatica, cum Historia Evangelica, & Chronologia, Criticesque Disciplinis copularim, ut inde literariis collectis opibus mei ditescerent Auditores, his Luminibus clarescerent, his alios locupletarent, his illuminare, his Ecclesiam ornare, atque munire prædiis possent. Porro, cum tanta sit Voluminum, & Commentariorum, quæ moderni Theologi de Mystério Incarnationis Dominicæ scripserunt, multitudo, ut non vacaret legere omnia, his magnam partem consultò prætermisissis, ad lectionem Sanctorum Patrum & antiquorum Theologorum, qui in Hereticos, Mysteriorum Incarnationis Dominicæ ofores, calamus acuerunt, animum appuli, Lucubrationes itidem Viro-
rum eruditorum, qui hac nostra tempestate vel in
stu-

AD LECTOREM.

studio Historiæ Evangelicæ , vel in Chronologiæ , Criticesque Disciplinis primas tenent , nocturna versari manu , versari diurna , ac denique duos insignes hujus temporis Theologos , in Sacris Litteris , in Conciliis , Patrumque monumentis versatissimos , qui de Mystério Incarnationis Dominicæ longo latoque calamo scripserunt , præ cæteris aliis selegi , videlicet Dionysium Petavium , & Ludovicum Thomassinum , in quorum Operibus , ut candidè fatear , ea inveniuntur , quibus potiora in recentiorum Theologorum Libris (pace illorum dixerim) nulla occurrunt , siue eruditionem Theologicam , siue sublimiorem rerum divinarum cognitionem , siue in refellendis Hæresibus , quæ circa ineffabile Incarnationis Mystèrium olim emergerunt , argumentorum vim & copiam ; siue denique styli elegantiam & amœnitatem cum rationum & Sententiarum pondere conjunctam , spectes .

Ex his fontibus ; aut limpidioribus , ut autumabam , rivis , saniozem Theologiam haurire jugi intentoque studio satégi , quæ ut meos Auditores imbuerè possem , plures Prælectiones de Mystèrio Incarnationis à prima Quæstione Tertiæ Partis Summæ Theologicæ S. Thomæ , usque ad Quæstionem sexagesimam , ubi Sanctus ille Doctor ejusdem Mystèrii Incarnationis Tractationi coronidem imponit , concinnavi ; easque in Schola Casanatensi per annum fermè integrum habui . Ejusmodi Prælectiones , quas ipse postea schedis meis premere , & intra domesticos parietes còhibere decreveram , rogarunt amici , ut nequaquam infoderem

P R Æ F A T I O

derem, sed potiùs omnibus, qui jis uti vellent, communes, ac publici juris facere vellem. Amicorum tandem votis annui, ea tamen lege, ut ille dumtaxat in publicam lucem prodirent Praelectiones, quas ad explicanda Mystèria Jesu Christi habueram à Quæstione xxvii. Tertiæ Partis Summæ S. Thomæ usque ad Quæstionem sexagesimam, suppressis aliis Praelectionibus, quas à prima Quæstione Tertiæ Partis Summæ S. Thomæ usque ad vigesimam septimam Quæstionem ejusdem Partis paraveram. Sciebam quippè, eorum omnium, quæ S. Thomas in Tertia suæ Summæ Theologicæ Parte de Mystèrio Incarnationis à prima Quæstione usque ad vigesimam septimam docet, uberrimam explanationem facile peti posse ex tot doctissimis & acutissimis Commentariis, quos tam domestici, quàm extranei S. Thomæ Interpretes publica luce donarunt, adeò ut novas Praelectiones, ad illas priores viginti septem Quæstiones Scholasticas explanandas, publicare velle, nihil aliud esset, quàm lucernam in meridie accendere, & ligna in sylvam deferre. Quocircà, consultius esse duxi, eas tantùm prælo subicere Praelectiones, quas à Quæstione vigesima septima Tertiæ Partis Summæ S. Thomæ institui usque ad Quæstionem ejusdem Partis sexagesimam, tum quia triginta tres illas intermedias Quæstiones, in centum & septuaginta Articulos divisas, S. Thomæ Interpretes vel intactas penitus reliquerunt, vel levi brachio attigerunt; tum quia S. Thomas in his Quæstionibus plurima circa Mystèria Jesu Christi Salvatoris

AD LECTOREM.

noſtri ex Hiſtoria Evangelica, & ex doctrina Sanctorum Patrum luculentiffimè dubia ſolvit, quorum enucleata expoſitio neceſſarium poteſt ſuppeditare ſubſidium cùm pietati, tùm doctrinæ eorum, quibus volupe eſt Myſteriorum Jeſu Chriſti & Hiſtoriæ Evangelicæ cumulatiſſimam habere notiſiam.

Id probè intellexerat meus perilluſtris in Officio Theologi Caſanatenſis Deceſſor, pietate, multiſque doctiſſimis editis Operibus toti Orbi literario conſpicuus, R. P. Antonius Maſſoulié, qui in publica Oratione Latina, quam habuit Romæ, cùm in Conventu Minervitano Ordinis Prædicatorum, aperta eſt Schola, ad explanandam Summam Theologicam S. Thomæ, ab Eminentiffimo Cardinali Hieronymo Caſanate, cujus memoria ſemper in benedictione erit, inſtituta; hunc in modum effatur: Sed, quod me magis movet, & à Theologis verè Theodidactis majori in pretio habendum eſt: quid validius his, quæ meus Aquinas ſcripſit ad excitandos teneros amoris affectus in meditando Chriſti, Servatoris, Nativitate, pueritiâ, & totius Vitæ ſerie? Quid in recolendâ amaritudine Animæ, & meditanda Chriſti Paſſione, ad inſigendos cordi aculeos opportunius? Ibi perpeſſa omnium Paſſionum genera, & ut ex Divo Hieronymo refert, cùm inclinato capite emiſit Spiritum, omnè genus Paſſionum conſummariſſe demonſtrat. Ibi doloris acerbitem, & magnitudinem non ex cauſis dumtaxat extrinſecis, Flagellis, Spinis, Clavis, ipſâque Cruce, quamvis crudeliſſimis tormentis, metiendam eſſe

P R Æ F A T I O

pari pietate & doctrinâ observat ; sed quòd ipsum Verbum Divinum tantam dolôris vim humanitati impresserit , tantum ipse Christus dolorem assumpserit , quantum eluendis omnium hominum sceleribus , multitudine & gravitate infinitis , ultrix Divina iustitia exigebat . Hæc sanè prætermittunt alii , inani-
bus quæstionibus & ad solam ostentationem ingenii repertis , immorati , acutis quidem , sed de quibus dixerim : **DESINUNT IN ARISTAM , ET QUID EST ACUTIUS ARISTA , SED IN QUO UTILIS EST ?** Et hæc quidè̃m licet temperatè exulta ad exercenda ingenia interdum valere possint : sed oportet unum facere & aliud non omittere . At non prætermisit Divus Thomas , cùm probè intelligeret , Sanctissimam Christi Vitam debere perpetuò Christianis , ac potissimum Theologis , versari ab oculis , quibus ab Apostolo dictum censendum est ad Galatas cap. 3. *Ante quorum oculos Christus præscriptus est ;* aut , ut habet Syriaca Versio : *Ante quorum oculos Christus depictus est .* Huc usque Summus ille Vir , non minus ea , qua pollebat , profunda eruditione , quàm eximia vitæ sanctimonia , omni præconio major , cuius Vitam eruditus noster Carolus Raïsson Gallico idiomate à se concinnatam publicavit anno 1715. eamque Tomo secundo mensis Octobris Anni Dominicani Gallici inseruit .

Ea præsertim ratione ; quæ publicam utilitatem spectat , illectus ipse , *Tractatum de Mysteriis & An-
nis Jesu Christi , Servatoris nostri , ad usum Scholæ*
accom-

AD LECTOREM.

accommodatum, & tribus supra viginti Dissertationibus Dogmaticis & Chronologicis, necnon Observationibus Criticis & Historicis illustratum, tredecim circiter abhinc annis Romæ Typis excusum vulgavi; non ut Theologos excellenti ingenio præditos docerem, à quibus ipse potius doceri vehementer percipio, sed ut Theologiæ Candidatis, venæque inferioris ingeniis, mea qualicumque industria, subvenirem, eorumque commoditati consulere possem. Res mihi, bene fortunante Deo, tam faustè; feliciter ac prosperè evenit, ut priori hujusce Operis Editione nunc omnino exhaurita, necesse fuerit hanc novam Editionem secundis curis adornare, eamque emendatiorem, auctiorem ac locupletiolem reddere, ut facilè intelliget Lector ex his, quæ in hanc novam Editionem inserui, quæque hîc breviter ejus oculis subicere non abs re erit.

In primis, in hac nova Editione fronti totius Operis præfixi duas prolusorias & apprimè necessarias Dissertationes, in quarum prima contra Infideles, Virosque incredulos evinco, Oracula, quæ adducunt Christiani ad probandum, Iesum Christum esse verum Messiam, non fuisse de industria à Christianis excogitata, sed esse antiquissima Prophetarum Vaticinia. Quod quidem argumentum tam arctam connexionem & affinitatem habet cum Verbi Divini Incarnationis Mystério, ut si illud intactum reliquisssem, aliquid Operi, quod lucubravi De Mysteriis & Annis Christi, deesse jure optimo videretur. At enim, licet in hoc Opere, quod jam vulgavi, demonstraverim ex Libris

P R Æ F A T I O

bris Veteris Testamenti , quos , ceù antiquos , sacros
 & à Deo revelatos , excipiunt & venerantur Iudæi ,
 Iesum Christum esse verum Messiam , Prophetarum
 Oraculis prædictum , hæc tamen argumenta , ex Libris
 Veteris Testamenti deprompta , quæ ad convincendos
 Iudæos peremptoria sunt , nullam vim habent , si in-
 torqueantur contra Infideles , Virosque incredulos , qui
 Libris Veteris Testamenti fidem omnem & authorita-
 tem abrogant , asseruntque , hæc Vaticinia , quæ proferunt
 Christiani ad probandum , Iesum Christum esse Mes-
 siam , non ab antiquis Prophetis edita , sed à Chri-
 stianis data opera fuisse conficta ac procusa , ut sim-
 plicibus fucum facerent , eosque falsæ & ementitæ an-
 tiquitatis specie delusos in errorem faciliùs pertrahere
 possent . Ad istam igitur Infidelium , & Virorum in-
 credulorum , qui negant , Iesum Christum esse Messiam ,
 & Veteris Testamenti Librorum antiquitatem infician-
 tur , sacrilegam retundendam impietatem , hanc neces-
 sariò præmittendam esse duxi Dissertationem proluso-
 riam , in qua multis , jisque invictis momentis tum
 ex constanti omnium Iudæorum consensu , tum etiam
 ex Scriptorum Gentilium testimoniis , Historiis , Mo-
 numentis & Annalibus , commonstro , antiquissimos
 esse Libros , ex quibus Christiani testimonia , vel va-
 ticia decerpunt ad probandum , Iesum Christum esse
 verum Messiam , Prophetarum Oraculis prædictum .
 Deinde , in eadem Dissertatione omni argumentorum
 genere assero ac vindico fidem , candorem , & inge-
 nuitatem Evangelistarum , qui Iesu Christi Historiam
 lit-

AD LECTOREM.

litteris mandarunt, & quorum sinceritatem in narratione multorum Factorum Historicorum, quæ Vitam Iesu Christi spectant, ultrò agnoverunt ipsimet Scriptores Gentiles, eorumque veritati testimonium perhibere non dubitarunt. Postremò, omnibus objectionibus, quas Infideles, virique increduli sive ad negandum, Iesum Christum esse verum Messiam, sive ad elevandam Sacrorum Veteris Testamenti Librorum antiquitatem proponere solent, plenissimè faciò satis. Inveniet etiam Lector in eadem Dissertatione Prolusoria compendiosiore atque efficaciore, mea quidem sententia, viam ad confutandos Atheos, aliosque viros incredulos, qui negant Dei, supremi rerum omnium Conditoris, existentiam, animæ immortalitatem, & supplicia, quæ malos, præmia verò, quæ bonos post hanc vitam manere docet Christiana Religio. Quamvis enim ad hanc Atheorum refellendam insaniam innumera suppetant argumenta, desumpta præsertim ex ipsa naturæ voce; quæ Deum esse prædicat, quamque audire nolunt Athei, quos sola corpora, seu objecta sensibilia, commovent, & quorum interior sensus sic obscuruit, ut non percipiant ingenitas notiones, quibus Sole meridiano clariùs probatur, Deum existere, & animas cum corpore non interire; ipse tamen, relictis illis telis, quæ Philosophia abundè subministrat, quæque sæpiùs multi Scriptores Christiani in Atheos, virosque incredulos intorserunt, compendiaria via ad profligandum Atheismum in hac Dissertatione prolusoria usus sum. Nam primò stabilivi, sicut mox dicebam,

P R Æ F A T I O

bam , Veteris Testamenti Librorum antiquitatem & authoritatem , qua semel stabilita , fateri debent Athei , Deum esse , & animam non interire cum corpore , cùm Veteris Testamenti Libri omnem amoveant dubitationem , quæ suboriri posset circa illa duo morum capita .
Secundò , certis & captui vel tenuiorum ingeniorum idoneis argumentis demonstravi , Evangelistarum in describenda Historia Iesu Cbristi sinceritatem , quæ ad dogma de existentia Dei , & animæ immortalitate adstruendum sat superque sufficere potest , quia Evangelistæ narrant cæcorum apertos fuisse oculos , claudos ambulasse , mundatos leprosos , mortuos ad vitam revocatos , ex quibus clarè sequitur , Deum existere .
Neque enim alius , quàm qui ipse oculos primùm aperuit , & vitam hominibus infudit , cecos & claudos sanare potest , leprosos mundare , & mortuis restituere vitam . Solus , inquam , hæc operari potest summus rerum omnium opifex , quem dicimus Deum ; adeò ut , si vera illa sint , necessariò existat eorum Auctor Deus .
Hæc pariter ostendunt , non eundem esse interitum animarum ac corporum , quia Iesus Christus , quem in Cruce mortuum scribunt Evangelistæ , è tumulo resurrexit vivus , & postquàm per quadraginta dies suis Discipulis apparuisset , ascendit in Cœlum .
Probatà itaque semel à nobis in hac prolusoria Dissertatione Veteris Testamenti Librorum antiquitate , & Evangelistarum in describenda Historia Iesu Cbristi sinceritate , nihil omninò superest Atheis , aliisque viris incredulis , quod contra Dei existentiam , animæ immortalita-

AD LECTOREM.

talitatem, & Christianæ Religionis veritatem hîscere, ac muſſitare poſſint.

In altera Diſſertatione Proluſoria adſtruo in primis fidem & auctoriſtatem Evangeliſtarum, qui Hiſtoriam, Geſtaque Jeſu Chriſti litteris mandarunt, & oſtendo, quatuor Evangelia, videlicet Matthæi, Marci, Lucæ, & Joannis non eſſe ſuppoſititia, ſed genuina & divina auctoritate prædita, atque ab illis Scriptoribus exarata, quorum nomina præferunt. Dein, diluo omnes objectiones, quibus viri increduli fidem & auctoriſtatem quatuor Evangeliorum impetere ſolent. Poſtremò, ad calcem ejusdem Diſſertationis annecto brevem, ſed accuratam DESCRIPTIONEM HISTORICO-CHRONOLOGICAM, quæ non ſolum complectitur ea, quæ de Vita, Geſtis, Miraculis JESU CHRISTI in quatuor Evangeliiis referuntur, ſed etiam Peregrinationem, quam, juxtà rationem temporum, Apoſtoli Petrus & Paulus, poſt Aſcenſionem JESU CHRISTI in Cælum, ad prædicandam doctrinam Evangelicam ſuſceperunt.

Præter has duas proluforias Diſſertationes, adjeci paſſim in Opere multas obſervationes novas cùm Hiſtoricas, tum Criticas, Tabulas Chronologicas, & ad calcem plurium Diſſertationum Sacros Hymnos, qui, ſi rem quæras, nihil niſi Chriſtum ſonant, ſine quo nec ſuave, nec ſplendidum eſt quidquam, nec utile, nec bonèſtum, nec elegans, nec facundum; nec eruditum; Si quæras judicium, nihil à Criticis Viris, vel moroſis Cenſoribus ungue ſignandum, vel Cenſura no-
tan-

P R Æ F A T I O

*tandum relinquunt ; si desideres Artis Poeticæ figuras ,
nervum , numeros , nitorem , leporem ac venustatem ,
nulli veterum Vatum cedunt , multis antecellunt ; Si
denique Latinam dictionem spectes , eam puram , casti-
gatam , & elegantem reperiēs , nec ullum vel minimum
verbum offendes , quod è medio cultioris Latinitatis
fonte non sit haustum . Horumce Hymnorum (si ta-
men excipias carmen de Casa Natalitia Jesu Christi)
Auctor est toti Orbi literario notissimus Joannes Bapti-
sta Santolius , Canonicus Regularis in Cœnobio Pari-
siensi Sancti Victoris , qui ex antiqua & nobili fami-
lia die 12. mensis Maii anni 1631. Parisiis natus ;
Poeticæ laude in Galliis Sæculo proximè elapso floruit :
Sed ea præsertim felicitate Musas suas certatim divi-
na carmina modulantes consecravit in Hymnis , quos
in laudem Mysteriorum Jesu Christi composuit , ut in
Sacris tractandis argumentis palmam omnibus Poetis
præripuisse videatur , quorum aliqui ante ipsum frag-
menti Homericonum aut Virgilianorum versuum un-
dique decerptis , & in centonem consarcinatis , Christi
Vitam quidem descripserunt ; sed nemini unquam la-
chrymulam excusserunt , nec quemquam ad pietatem
commoverunt , aut ab impura vita revocarunt . Hunc
insignem Poetam Santolium , qui paucis abhinc annis
è vivis abiit , sæpius ipse vidi , dùm essem Parisiis ,
præsensque aderam , quandò in nostro Parisiensi Col-
legio S. Jacobi rogatus , ut Distichon conderet inscri-
bendum Tabula , in qua Sanctum Thomam , in Cathe-
dra docentem , eximius Pictor eleganti penicillo ad
vivum*

AD LECTOREM.

virum expreſſerat , hoc Diſtichon è feliciffima ſua
vena in laudem S. Thomæ ex tempore profudit :

Audi pendentem Divinæ Oracula Legis ,

Nec dubites puris fontibus hauſta Dei .

Rem igitur Lectori gratiſſimam facturum me eſſe
duxi , ſi , miſcendo utile dulci , ad finem Diſſertatio-
num Sacros in honorem Myſteriorum Ieſu Chriſti ad-
jungerem Hymnos , à celeberrimo Poeta Santolio edi-
tos , qui non ſolùm ob oculos ponent ſingula Ieſu Chri-
ſti Myſteria , eaque nativis expreſſa coloribus repræ-
ſentabunt , ſed etiam Lectorem ſumma voluptate per-
fundent , & ad ciendos ergà Ieſum Chriſtum , Redem-
ptorem noſtrum , pietatis & charitatis affectus per-
quàm idonei erunt . Et ſanè , ſi tres Chriſtianos Poe-
tas , videlicèt Juvenum , Presbyterum , natione Hiſ-
panum , Sedulium ; Presbyterum , genere Scotum , &
Aratorem , Eccleſiæ Romanæ Diaconum , antiqui Pa-
tres , & Scriptores Eccleſiaſtici tot præconiis eo ſolo
nomine extulerunt , quòd Poetæ illi Chriſtiani vel Sa-
cros Hymnos fecerint , vel quatuor Evangelia , Acta-
que Apoſtolorum verſibus hexametris ad verbum penè
tranſtulerint ; Quidni & ipſe celebrare poterò Sacros
Hymnos , in honorem Myſteriorum Ieſu Chriſti à San-
tolio editos , qui nunc in pluribus Galliarum Eccleſiis
publicè in Sacro Officio canuntur , & in Breviariis
Pariſienſi , & Cluniacenſi ſunt inſerti ? Certè de San-
tolio , Chriſtiano Poeta , idem planè iudicium ferre
poſſum , quod de Juvenco , Chriſtiano itidem Poetâ ;
Baptiſta Mantuanus , olim Sanctiſſimi Carmelitarum

P R Æ F A T I O

Ordinis Præpositus Generalis , & sui ævi Poeta clarissimus , pronunciat his verbis : Volo ante istorum oculos Juvenum , Hispanum , statuere , quem inter illustres viros , & in doctissimorum Christianorum Catalogo Hieronymus enumerat Proditæ ô Zoili nostri . Videte virum Sacris initiatum Mysteriis , lauro coronatum , musis undique cinctum , lyram tenentem , currite ad rarum hoc & grande spectaculum : sed cavete , ne repenti culpetis , laudatur à Hieronymo : hic igitur immensam Evangelicæ Legis majestatem versibus includit heroicis .

Denique , sub finem hujusce Tractatus attexo novam Dissertationem de missione Spiritus Sancti in Christi Domini Discipulos , & in ea , præter quasdam Observationes historicas , multa dissolvo Dubia , quæ haud levem difficultatem habent , videlicet an Spiritus Sanctus sicut à Patre , ita à Filio fuerit missus ? Quo tempore Spiritus Sancti missio facta sit ? Quo loco ? Ad quos ? Quo externo signo se se prodiderit Spiritus Sanctus ? An Donum omnium linguarum acceperint omnes Discipuli Christi , & in quo situm esset illud Donum linguarum ? An habituale , vel transitorium fuerit ? Quos effectus , præter Donum linguarum , produxerit in Christi Domini Discipulis missio Spiritus Sancti ? Demum , facio satis objectionibus , quas vulgò proponunt Iudæi contra Legem Novam , seu Evangelicam , quàm Christus Dominus , abrogata Lege Mosaica , instituit , in Sacro Pentecostes die Spiritus Sanctus confirmavit , & Apostoli

A D L E C T O R E M .

stoli potenti miraculorum virtute per totum Orbem propagarunt .

Hæc erant , quæ de hac Editione , te , LECTOR , scire intererat ; & de quibus te præmonere volui in hac Præfatione , cui , instar coronidis , addam Catalogum , quem S. Leo , Pontifex Maximus , in Sermone octavo de Nativitate Domini texit Hæreticorum , qui contra Verbi Incarnationem vexillum erexerunt ; Fides igitur Catholica , inquit Sanctus ille Pontifex , oblatrantium Hæreticorum spernat errores , qui mundanæ sapientiæ vanitate decepti , à veritatis Evangelio recesserunt , & Incarnationem Verbi intelligere non valentes , de causa illuminationis fecerunt sibi materiam cæcitatæ . Nam omnium ferè falsa credentium opinionibus ; quæ etiam in Sancti Spiritus negationem pròruunt ; retractatis , neminem penè deviasse cognoscimus , nisi qui duarum in Christo naturarum veritatem sub unius personæ confessione non credidit . Alii enim Domino solam humanitatem , alii solam adscripsêre Deitatem . Alii veram quidem in ipso Divinitatem , sed carnem dixerunt fuisse simulatam . Alii professi sunt veram eum suscepisse carnem ; sed Dei Patris non habuisse naturam ; & Deitati ejus , quæ erant humanæ substantiæ , deputantes , majorem sibi Deum minoremque fecerunt , cùm gradus in vera Divinitate esse non possit , quoniam quidquid Deo minus est , Deus non est . Alii cognoscetes Patris , & Filii nullam esse distantiam , quia non poterant unitatem Deitatis intelligere nisi

P R A E F A T I O

in veritate personæ, eundem asseruerunt esse Patrem, quem Filium; ut nasci, & nutrirī, pati, & mori, sepeliri, & resurgere, ad eundem pertineret; qui per omnia & hominis personam impletet & Verbi. Quidam putaverunt, Dominum Jesum Christum non nostræ substantiæ corpus habuisse, sed ab elementis superioribus, ac subtilioribus sumptum. Quidam autem æstimaverunt in carne Christi humanam animam non fuisse, sed partes animæ ipsam Verbi impleisse Deitatem. Quorum imprudentia in hoc transiit, ut animam quidem fuisse in Domino faterentur, sed eandem dicerent mente caruisse, quia sufficeret homini sola Deitas ad omnia rationis officia. Postremò, iidem asserere præsumserunt, partem quamdam Verbi in carnem fuisse conversam, ut in unius dogmatis varietate multiplici, non carnis tantum, animæque naturam; sed etiam ipsius Verbi salvarent essentiam. Multa sunt & alia prodigia falsitatum, quibus enumerandis Charitatis vestræ non est fatigandus auditus. Sed post diversas impietates; quæ sibi invicem sunt multiformium blasphemiarum cognatione connexæ, de his potissimum erroribus declinandis observantiam vestræ devotionis admoneo, quorum unus dudum, Nestorio autore, consurgere non impunè tentavit, alius nuper pari execratione damnandus, Eutyche assertore, prorupit. Nam ille (*seu Nestorius*) Beatam Mariam Virginem hominis tantum ausus est prædicare Genitricem, ut in conceptu ejus & partu nulla Verbi & Carnis facta unio

tio

A D L E C T O R E M .

rio crederetur, quia Dei Filius non ipse factus sit hominis Filius, sed creato homini solâ se dignatione sociaverit. Quod Catholicæ aures nequaquam tolerare poterunt, quæ sic Evangelio veritatis imbutæ sunt, ut firmissimè noverint, nullam esse humano generi spem salutis, nisi ipse esset Filius Virginis, qui Creator est Matris. Hic autem (*sæu Eutyches*) recentioris sacrilegii prophanus assertor, *unionem* quidem in Christo duarum confessus est naturarum, sed ipsâ unionem id dixit effectum, ut ex duabus una remaneret, nullatenus alterius existente substantiâ, quæ utique finiri, nisi aut consumptione aut separatione non posset. Hæc verò tam inimica sunt Fidei, ut nequeant recipi sine excidio nominis Christiani..... Hæc, dilectissimi, pio corde meditantes, Apostoli semper memores estote præcepti, qui universos admonet dicens: Videte ne quis vos seducat per Philosophiam & inanem fallaciam, secundum traditionem hominum, & non secundum Christum, quia in ipso habitat omnis plenitudo divinitatis corporaliter, & estis repleti in illo &c.

Ex his Sancti Leonis, Pontificis Maximi, verbis liquet, benè multas circa Verbi Divini Incarnationem erupisse Hæreses, quarum authores, vel instauratores, majoris claritatis ergò, hîc breviter indicabo, ut non tantum Hæresum, quæ contra Incarnationis Mystrium pullularunt, sed etiam Authorum, qui eas vel invexerunt, vel jam sepultas ex orco revocarunt, accuratum possis habere catalogum. Ad septem

P R Æ F A T I O

septem autem Classes reducam Authores ; qui , virulentis sparsis erroribus , Verbi Divini Incarnationis Mysterium vel olim impugnarunt , vel etiamnum se se illius apertos profitentur hostes .

In prima Classe repono Iudeos ; qui præfractè negant , Iesum Christum esse verum Messiam , Prophetarum Oraculis prædictum ; & deploranda cecitate venturum adhuc Messiam præstolantur . Sed hunc Iudeorum errorem in pluribus hujusce Tractatus de Mysteriis & annis Jesu Christi Dissertationibus refellam , & invictè ostendam , omnia Prophetarum Oracula fuisse in Iesu Christo , vero Messia , omninò adimpleta , futesque esse , & vanas interpretationes ; quas nunc pervicaces Iudæi obtrudere solent , ut clarissimis Prophetarum Vaticiniis tenebras offundere possint .

In altera Classe constituo Infideles , & Viros incredulos , qui , ne fateri cogantur , Iesum Christum esse verum Messiam , Prophetarum Oraculis prædictum , omnem Veteris Testamenti libris auctoritatem & antiquitatem adimunt , dictitantque , hæc Vaticinia , quæ proferunt Christiani ad probandum Iesum Christum esse verum Messiam , non esse antiqua Prophetarum Oracula , sed ab ipsismet Christianis fuisse excogitata . Hanc sacrilegam Infidelium , Virorumque incredulorum impietatem fuso calamo à me confutatam inveniet Lector in Dissertatione prima Prolusoria ad Tractatum de Mysteriis & annis Christi .

In tertia Classe colloco Hereticos , qui negarunt
Iesu

A D L E C T O R E M.

Jesu Christi Divinitatem , ejusque cum aeterno Patre consubstantialitatem , quos inter censentur Cerinthus , Simon Magus , Ebion , Carpocrates , Elxai , à quo Helcesæi ; Theodotus Coriarius , Symmachus , Græcæ Bibliorum Editionis author , Artemon , Theodotus alter , dictus Trapezita , & Theodoti Coriarii discipulus ; ac parens hæresis Melchisedecianorum , qui Melchisedeco Jesum Christum inferiorem esse effutiebant . Divinitatem quoque Jesu Christi negarunt Arius , cujus impia hæresis longè latèque in Ecclesia grassata est ; Paulus , patria Samosatenus , & Antiochenæ Urbis Episcopus ; Photinus , Sirmii Episcopus , quorum pestiferam Hæresim postremis hisce temporibus renovarunt ex Lutheri & Calvinii discipulis Michael Servetus , natione Hispanus , & Valentinus Gentilis , natione Italus , qui Sacro-sanctæ Triadis Fidem in Gallia , & Germania , sed maximè in Polonia oppugnarunt , quorum ex semine prodierunt Georgius Blandrada , Paulus Alciatus , Franciscus David , Lælius Socinus , ejusque nepos Faustus Socinus , ambo Patria Senenses , à quibus hæc hæresis nunc dicta est Sociniana , & sub hoc nomine , prob dolor ! adhuc latè serpit . Ad eandem Classsem Hæreticorum , qui negarunt Divinitatem Christi , ablegandum esse censeo Sabelium , qui tres unius Deitatis hypostases in unam conflans personam , vel unam potius Patris personam admittens , alias duas personas , videlicet Filii & Spiritus Sancti , inficias ivit , ex quo consequebatur , ut Pater ipse & incarnatus , & carne passus crederetur ,
in-

P R Æ F A T I O

indeque Patripassiani dicti sunt ejus nefarii Sectarii. In ejusdem Sabellii Hæresis luto baserunt Noëtus, Praxeas & Hermogenes.

Ad quartam Classẽ eos Hereticos refero, qui in Christo Domino duas admiserunt Personas, & quorum Antesignanus fuit Nestorius, Antistes Constantinopolitanus, & Theodori, Mopsuestiæ Episcopi, discipulus, qui duas in Christo personas secrevit, alteram hominis, alteram Dei; negavitque Mariam, Virginem, esse Dei-param, seu Matrem Dei, tametsi eam Christiparam, seu Matrem Christi, nuncupari posse confiteretur. Unionem illam Dei atque hominis in Christo non substantivam & hypostaticam esse dicebat Nestorius, sed extrinseca efficacia quadam, atque amoris ac benevolentie nexu coalitam dumtaxat esse interpretatus est, eo penè modo, quo justì omnes, & unum cum Deo, & filii Dei, & Dii dicuntur. Hanc Nestorianam Hæresim, jam extinctam, Felix, Urgelitanus Episcopus, & Elipandus, Toletanus Antistes, octavo Ecclesiæ Sæculo renovarunt, asserentes, Iesum Christum non esse proprium & naturalem Dei filium, sed adoptivum & servum. At, hæc Nestoriana Hæresis, à duobus illis Episcopis postliminiò revocata, confestim oppressa ac profligata est in Concilio Francofordiensi, quod anno septingentesimo nonagesimo quarto fuit celebratum.

In quinta Classe illos percenseo Hereticos, qui duas in Christo naturas, Divinam scilicet & humanam, vel geminam voluntatem & operationem agnoscerent

AD LECTOREM.

scere detrectarunt, quorum agmen ducit Eutychès, Archimandrita Constantinopolitanus, qui à Flaviano, Patriarcha Constantinopolitano, in Synodo damnatus, in Latrociniali Ephesina Synodo à Dioscoro, Patriarcha Alexandrino, absolutus est, ac postremò in Chalcedonenſi Oecumenica Synodo proscriptus, & in exilium amandatus fuit. Hec Eutychiana Hæresis in plures Sectas propagata est. Petrus Cnapheus, Patriarcha Antiochenus, postquàm Chalcedonenſi Concilio anathema dixisset, ac Trisagio illam Clausulam addidisset: Qui passus es pro nobis, miserere nobis, Theopaschitarum errori ac Sectæ ortum dedit. Petrus Moggus Alexandrinam Sedem cùm invasisset, & Chalcedonenſem Synodum proscribere cunctaretur, secessionem ab eo fecerunt Alexandrinæ Urbis Eutychiani, & ex eo Acephali, idest, sine capite, dicti sunt, Secta tamen puri putique Eutychiani. Horumce Eutychianorum, qui Acephali dicebantur, duplex fuit Secta. Prioris Sectæ Coripheus fuit Severus, Monachus, qui corruptibilem esse Christi carnem ajebat, ideòque ejus Sectarii Corrupticolæ dicti sunt. Alterius Sectæ Acephalorum Dux ac Primipilus fuit Julianus, Archiepiscopus Halicarnassensis, qui carnem Christi incorruptibilem esse pertendebat, ac subindè ejus Sectarii fuerunt Incorrupticolæ nuncupati. Themistius, Diaconus, Dux in Ægypto fuit Hæreticorum Eutychianorum, qui Agnoetæ appellati sunt, eò quòd Jesu Christo ignorantiam affingerent. Joannes, Grammaticus, dictus Philoponus, eodem Eutychianorum implicatus errore, hæreticis Tritheitis

P R Æ F A T I O

theitis initium dedit , affirmans , persone ac natura nullum esse discrimen , ex quo , sicut unam in Jesu Christo naturam ex unitate Divinæ Personæ admittebat , ita ex Trinitate Personarum tres in Deo naturas esse docebat . Denique , Eutychniani appellati sunt Monophysitæ ab unitate naturæ Divinæ , quam in Jesu Christo dumtaxat admittebant , itèm & Jacobitæ vocati sunt , à quodam Jacobo , illius Eutychnianæ Hæresis propagatore ; cognominati sunt etiam Armeni , à gente , seu à loco , in quo sedem fixerant . Hi tamen omnes Hæretici nihil aliud erant quàm Eutychniani . Ex virulenta Eutychnianorum stirpe prodierunt Hæretici Monothelitæ , qui unicam in Jesu Christo voluntatem & operationem (seu Divinam) agnoscebant , & humanam voluntatem atque operationem Christo prorsus detruncabant , qui in sexta Synodo Generali fuerunt damnati .

In sexta Classe eos repono Hæreticos , qui Jesu Christo verum Corpus humanum ex Maria Virgine assumptum ademerunt , quique ideò Phantasiastæ sunt appellati , quòd specie & ludibrio , non re & substantia Deum carnem humanam induisse jactitarent . Horum Hæreticorum agmen duxit Simon Magus , cujus errori adhæserunt gemella illius proles Saturninus , & Basilides , tùm Cerdo , Marcion , Manes , seu Manichæus , itemque Apelles , Apollinaris , & Priscillianus ; qui omnes non veram Christi carnem fuisse , sed simulatam commenti sunt . Apelles siquidem , Marcionis discipulus , etsi veram Christo carnem tribuerit ,
puta-

putavit tamen, eam non ex materno utero; vel substantia genitam; sed ex quatuor elementis, ab ipso Dei Verbo coagmentatam. Apollinaris verò existimavit, Carnem ipsam Jesu Christi non de Virgine Maria assumptam fuisse, sed è Cælo delapsam, Verbumque Divinum supplere mentem Animæ Christi. Prætermitto Hæresim Ophitarum, qui Christum in Serpente, à quo decepta est Heva, colebant; & Hæresim Valentini, qui ex Hesiodi Theogonia triginta Æonum, quasi totidem Deorum colluviem induxit, quorum unus, quem appellabat, Unigenitum, esset Jesu Christi, & Spiritus Sancti Procreator; ipsum verò Jesum ab omnibus simul Æonibus, quasi defloratione quadam, constructum fuisse somniabat hic Hæresiarcha mentem habens pastam chimeris, indeque inferebat, Iesum Christum nihil ex Virginis Mariæ substantia decerpisse, sed è Cælo sibi corpus advexisse, & Virgineo utero, tantquam canali, usum fuisse.

In postrema Classe locum habent Lutherus, Calvinus, Janfenius, & alii, qui negarunt, Iesum Christum esse Redemptorem omnium hominum, seu mortuum esse, aut sanguinem fudisse pro singulis omnino hominibus. Constans autem est ac perpetua Ecclesiæ Catholicæ doctrina, totum Incarnationis opus in usus nostros fuisse peractum, & Iesum Christum mortem oppetiisse ad redimendum genus humanum.

Hec sunt errorum portenta non solum in Verbi Dei Incarnationem, sed in totius Christiani nominis excidium conjurata, quæ in ipsa bujusce Operis fronte

P R Æ F A T I O

summatim perstringi necesse fuit, singillatim postea & suis quæque locis prolixius confutanda. Supereſt nunc, ut adhorter omnes, qui piè volunt vivere in Chriſto, ad legendum hunc Tractatum, in quo præter Myſteria Jeſu Chriſti, divina ejus deſcribuntur opera, quorum vis & potentia valebat quidem in præſens, ſed aliquid ad morum noſtrorum informationem declarabat in futurum. At enim, ut elegantibus Lactantii verbis lib. 4. Inſt. Divin. cap. 26. utar, aperuit cæcorum lumina cæleſtis virtus, & lucem non videntibus reddidit. Et hoc facto ſignificabat, fore ut converſus ad gentes, quæ Deum nesciebant, inſipientium pectora illuminaret luce ſapientiæ, & ad veritatem contemplandam oculos cordis aperiret. Verè enim cæci ſunt, qui cæleſtia non videntes, & tenebris ignorantie circumfuſi, terrena & fragilia venerantur. Patefecit aures ſurdorum. Non utique hætenùs vis illa cæleſtis operata eſt: ſed declarabat, brevi fore ut, qui erant veritatis expertes, & audirent, & intelligerent divinas Dei voces. Verè enim ſurdos dixeris, qui cæleſtia, & vera, & facienda non audiunt. Mutorum linguas in eloquium ſolvit: admirabilis etiam, eùm fieret, potentia: ſed inerat huic virtuti alia ſignificatio, quæ oſtenderet, mox futurum, ut rerum cæleſtium nupèr ignari, perceptâ ſapientiæ diſciplinâ, de Deo & veritate diſſerent. Nam qui rationem divinitatis ignorat, is verè elinguis, & mutus eſt; licèt ſit omnium diſertiffimus. Lingua enim cùm verum loqui cæperit, ideſt, virtutem, majeſtatemque Dei

A D L E C T O R E M .

Dei singularis interpretari, tùm demùm officio naturæ suæ fungitur ; quandiù autem falsa loquitur , in usu suo non est , & idèò infans sit necesse est , qui divina proloqui non pòtest . Pedes quoque claudorum ad officium gradiendi reformavit . Laudabilis divini operis fortitudo : Sed figura id continebat , quòd cohibitis erroribus vitæ sæcularis ac devixæ , iter veritatis aperiretur , per quod graderentur homines ad Dei gratiam consequendam . Is enim verè claudus existimandus est , qui caligine ac tenebris insipientiæ implicatus , & quò tendat ignarus , offensibilibus & caducis gressibus per viam mortis incedit . Item labe & maculas inquinatum corporum repurgavit , non exigua immortalis potentix opera : verùm id portendebat hæc vis , quòd peccatorum cladibus , ac vitiorum maculis inquinatos ; doctrina ejus purificatura esset , eruditione justitiæ . Leprosi enim verè , atque elephantici debent haberi , quos vel infinitæ cupiditates ad scelera , vel insatiabiles voluptates ad flagitia compellunt , & dedecorum maculis inustos , labe afficiunt sempiternâ . Jacentia mortuorum corpora crexit , eosque nominibus suis inclamatos à morte revocavit . Quid congruentius Deo ? Quid miraculo dignius omnium Sæculorum , quàm decursam vitam resignasse , completisque hominum temporibus tempora adjecisse , arcana mortis revelasse ? Sed hæc inenarrabilis potestas , imago virtutis majoris fuit , quæ demonstrabat , tantam vim habituram esse doctrinam suam , ut gentes in Orbe toto , quæ alienæ à Deo , subje-

P R Æ F A T I O

subjectæque morti fuerunt , cognitione veri luminis
 animatæ , ad immortalitatis præmia pervenirent. Eos
 enim rectè mortuos existimaveris , qui datorem Vi-
 tæ Deum nescientes , atque animas suas à Cælo in
 terram deprimentes , in laqueos æternæ mortis in-
 currunt . Quæ igitur tum faciebat in præsens (*Iesus*
Christus) imagines erant futurorum . Quæ illæsis
 affectisque corporibus adhibebat , ea spiritualium figu-
 ram gerebant , ut & in præsentī , virtutis nobis ter-
 renæ opera monstraret , & in futurum , potestatem
 cælestis suæ majestatis ostenderet . *Hactenus longius-*
culum istud Lactantii testimonium exscripsi , ut inde
Lector facile intelligat , præclara , quæ Iesus Christus
in terris edidit opera , ad nostram morum instructio-
nem ordinari , nosque per figuram admonere , ut ad
Divinum illud exemplar vitam , moresque nostros ita
componamus , ut nihil prorsus sit , quod nos à chari-
tate Iesu Christi separare possit : Nam (ut inquit
Apostolus Paulus in Epist. ad Rom.) cap. 8. quos
præscivit , & prædestinavit conformes fieri imaginis
Filiū sui , ut sit ipse primogenitus in multis fratribus .
Quos autem prædestinavit , hos & vocavit , & quos
vocavit , hos & justificavit : quos autem justificavit ,
illos & glorificavit . Hinc in eadem Epistola infert
Apostolus , nos à charitate Christi nulla re divelli ac
separari debere . Sic enim subdit : Quis ergo nos se-
parabit à charitate Christi ? tribulatio ? an angustia ?
an fames ? an nuditas ? an periculum ? an persecu-
tio ? an gladius ? Certus sum enim , quia ne-
 que

A D L E C T O R E M.

que mors, neque vita, neque Angeli, neque Principatus, neque Virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare à charitate Dei, quæ est in Christo Jesu Domino nostro. *Faxit igitur Deus, Optimus Maximus, ut hi omnes, qui ad hunc Tractatum De Mysteriis Jesu Christi legendum accedent, omne studium & omnes curas ad hoc conferant, ut quemadmodum Christus nec sibi natus est, nec sibi vixit, nec sibi mortuus est, sed totum se donavit usibus nostris, ita & illi non se sibi natos esse putent, neque sibi vivere velint, sed quidquid habent, aut sunt, id omne non sibi, sed Deo auctori ferant acceptum, eum, sicut par est, ex toto corde diligant, & Christianæ Charitatis ardore succensi omnia bona sua omnibus existiment esse communia. Hoc pacto adimplebunt præceptum, quod omnibus Christianis dat Apostolus Paulus Epist. ad Ephesios cap. 5. dicens: Estote ergo imitatores Dei, sicut filii charissimi, & ambulate in dilectione sicut & Christus dilexit nos, & tradidit semetipsum pro nobis oblationem & hostiam Deo in odorem suavitatis.*

NOS

NOS FR. AUGUSTINUS

P I P I A

SACRÆ THEOLOGIÆ PROFESSOR,

*Ac totius Ordinis Fratrum Prædicatorum humilis
Magister Generalis, & Servus
salutem.*

TEnore præsentium nostrique auctoritate Officii licentiam facimus Rev. Adm. Patri Fr. Ignatio Hyacintho Amat de Graveson, in Sac. Facultate Parisiensi Doctori, ac in Collegio Casanatensi Conventus S. Mariæ super Minervam de Urbe Theologo, Provinciæ nostræ Provinciæ Alumno, Typis denuò edendi Librum, nunc duos in Tomos distributum, cui titulus est: *Tractatus de Vita, Mysteriis, & Annis Christi Servatoris nostri, Dissertationibus Dogmaticis, & Chronologicis, necnon Observationibus Criticis, & Historicis, juxta germanam Doctores Angelici mentem illustratus; & ad usum Scholæ accommodatus*, quem Auctor tribus novis Dissertationibus Historicis, Criticis, necnon Tabulis Chronologicis auxit & illustravit; Dummodò priùs approbatus fuerit à duobus Ordinis nostri in Theologia Magistris, & aliis servatis de jure servandis. In quorum fidem &c. Dat. Romæ in Conventu nostro S. Mariæ super Minervam die 2. Julii 1723.

Fr. Augustinus Pipia

Magister Ordinis.

*Fr. Bernardus d' Arcet Magister,
& Socius.*

Loco † Sigilli.

Registr. fol. 86.

Totam

Totam Christi Domini Servatoris nostri Oeconomiam revocat Doctor Angelicus ad quadripartitam considerationem. In prima contemplatur ea, quæ pertinent ad ingressum ejus in Mundum. In altera differit de his, quæ spectant ad progressum vitæ ipsius in hoc Mundo. In tertia, disputat de exitu ipsius ab hoc Mundo. In quarta sermonem habet de his, quæ pertinent ad exaltationem ipsius post hunc Mundum, seu post hujus Mundi vitam. Ab hoc præclaro Sancti Doctoris ordine, ejusque illibata doctrina ne latum quidem unguem desciscit Auctor aurei, & omnibus numeris absoluti Tractatus de Mysteriis, & Annis Christi, quem ex mandato Reverendissimi Patris Fr. Augustini Pipia, Sacri Ordinis Prædicatorum Generalis Magistri, non vulgari trutina, sed ad aurificis stateram expendi, summaque animi voluptate perlegi, necdum publici juris factum, nihilque inter legendum nactus sum, quod Fidei adversetur, & à bonis moribus abhorreat; immò potius omnia offendi ad normam Fidei Catholicæ, & probitatis morum exacta, eaque vel solo nomine ab omni suspicione, & erroris nevo aliena, quod è Sacris Paginis, SS. Patribus, Conciliis, potissimum Angelico Præceptore omni ex parte sint fermè derivata. Demiratus sum claritatem cum subtilitate conjunctam, & cum utraque solidum rationum pondus, atque historiæ tum exoticæ, tum Sacræ haud levem notitiam, insimul stylum purum, tersum, facilem, ad Scholæ tamen formam accomodatum. Suspexi ardens, quo flagrat Auctor, desiderium sartam testam conservandi doctrinam Catholicam, aniles Rabbiorum fabulas, & deliramenta, ubi se dat occasio nervosè confutando tum veterum, tum recentium Heterodoxorum errores pro re nata strenuè refellendo, denique obscurorum Theologorum opiniatiunculas pro ratione argumenti perbellè configendo. Huic quidem testimonio, quod solius veritatis conscientia ductus perhibeo, non ut amicum palpem, non refragabitur, opinor, quisquis hoc eximium Opus sedulò evolverit. Quocirca, in rem Ecclesiæ esse censeo, ut hic Liber in uberiores Studioforum Christianæ Religionis instructionem edatur. Hanc approbationem, quam huicce Libro dedi anno 1711. cum primum Romæ publicam in lucem prodire capit, iterò nunc & confirmo in hac secunda Editione, quæ tribus novis Dissertationibus, multisque Observationibus Historicis, & Criticis, nec non Tabulis Chronologicis auctior est, atque correctior. Datum Romæ kalendis Augusti anni Æræ Christianæ 1723.

Fr. Antonius Bardoni, Sacræ Facultatis Parisiensis Doctor Theologus, necnon Cathedralicus Casanatensis, Ordinis Fratrum Prædicatorum.

Iubente Reverendissimo totius Ordinis nostri Generali Magistro Fr. Antonio Cloche, Tractatum de Myſteriis, & Annis Chriſti Servatoris noſtri Diſertationibus Dogmaticis, & Chronologicis, necnon Obſervationibus Criticis, Hiſtoricis, juxta germanam Doctōis Anglici mentem illuſtratum, & ad uſum Scholæ accommodatum, &c. Auſtore Fr. Ignatio, Hyacintho Amat de Graveſon, Facultatis Pariſienſis Doctore, ac Theologo Collegii Caſanatenſis, Ordinis Prædicatorum, legi, ac ſepoſito prorsus eo affectu, quo Auſtorem, mihi ſimpridem, & etiamnum multis titulis amicitie vinculo conjunctum, proſequor, ad ſanctuarii pondus, quam continet doctrinam libravi. Obſtupui & opus miratus ſum, quod totum doctrina eſt, eoque irreprehenſibilis, quoddam verè Thomiſtica, atque tota ex puriſſimis Scripturæ Sacræ, Sanctorum Patrum, probatorumque Scriptorum fontibus hauſta. Auſtorem ſuſpexi in Criticis moderatum, & prudentem, neminem deſpicientem, neminem ex libidine, ſed ex ſolo veritatis amore carpentem, in Chronologicis ſobrium, ſtultas quaſtiones, necnon vanas, ac inutiles Genealogias devitantes, atque eas tantum inquirentem, quæ ad Scripturæ, Myſteriorumque Chriſti intelligentiam neceſſariæ ſunt & utiles, in Hiſtoricis accuratum, non fabulas pro veritatibus venditantem, ſed probata ſolum antiquitatis monumenta proferentem. Uno verbo, Opus probavi, ac luce dignum exiſtimavi, quippè nihil in eo deprehendi, quod vel doctrinæ Fidei, vel bonis moribus ſit contrarium, quin etiam Auſtoris inſtitutum laude dignum reputo, quoddam eam ſibi materiæ tractandam aſſumpſerit, cujus conſideratione ſicut mens non illuminari, ita cordis noſtri affectus erga eum moveri non poſſit, qui pro nobis & tanta feciſſe, & tanta pertuliſſe dignoſcitur. Datum Romæ in conventu Sanctæ Mariæ ſuper Minervam die 14. Januarii anni 1711.

Fr. Henricus Thiriari, Sacræ Theologiæ Doctore,
ac Collegii Caſanatenſis Theologus, Ordinis
Prædicatorum.

APPROBATIO ALTERA.

Inſcriptus juſſu Reverendiſſimi Patris Magiſtri noſtri Generalis Auguſtini Pipia attentâ mente, & ſumma animi volupate evolvi Tractatum De Vita, Myſteriis, & Annis Jeſu Chriſti Servatoris noſtri, &c. Authore Admodum Rev. & eximio Patre Fr. Ignatio Hyacintho Amat de Graveſon, Sacræ facultatis Pariſienſis Doctore, & Theologo Caſanatenſi. Sanè non poſſum non ſuſpicere Authoris inſignem in tot perſcrutandis reconditarum Hiſtoriarum penetralibus, adyſis, reſeſſibus, diligentiam, ſolertiam in enodandis argumentis ſingularem, ita ut felicior Alexandro Magno Nodos Gordios ſubtilis acinace ingenii facillimè diſſolvat, judicium in ſeligendis Sacrarum paginarum, & Sanctorum Patrum teſtimoniis in rem ſuam maturiſſimum, ſtylum in ſcribendo gravem, elegantem, & qui antiquam redoleat Majeſtatem Latiam. Proinde Librum, cum in eo nihil etiam Fidei, aut moribus refrageretur, publicâ luce digniſſimum cenſeo. Voſitet hæc iterata, ut præcedens quaquâ verſum editio, & omnium manibus evolvetur, teratur, exhauriatur, ut denuo ad alios ſternatur aditus, & immortalitati Authoris nomen conſecretur. Dabam. Romæ, è Muſæo noſtro 14. Auguſti 1723.

Fr. Franciſcus Van Ranſt. S.Ord. FF. Prædic. in alimâ Univerſitate Lovaniënſi S.Th. Licentiatus, olim Studiî Generalis Antuerpienſis Regens, modò in Urbe Theologus Caſanatenſis.

REIM.

REIMPRIMATUR,

Si videbitur Reverendissimo Patri Magistro Sacri Palatii Apostolici .

N. Baccarius Episcopus Bojanen.
Vicesgerens .

Approbatio Reverendiss. Patris BERTRANDI MONSINAT.
Ordinis Minimorum Præpositi Generalis .

Apostolicos Viros nihil antiquius habuisse, quam constanti, germanaque veritatis Evangelicæ dilucidatione gentium cæcitatem, Judæorum perfidiam, ac Hæreticorum assultus retundere, testatur Divus Hilarius. Horum vestigia premens, & eodem, quo illi, percitus zelo, Rever. Admod. P. Ignatius Hyacinthus Amat de Graveson Ordinis Inclty Prædicatorum, Facultatis Parisiensis Doctor, necnon Casanatensis Theologus, cunctos prostravit, dum cunctos aggressus est in Tractatu de Mysteriis, & Annis Christi Domini Servatoris nostri &c. quem subcivis horis elucbravit, dum textum Angelici Doctoris anno proximè elapso in Schola Casanatensi exponeret: auspiciata sanè occasio, quæ sapienti præbuit ansam, non ut ipse sapientior, sed ut alii per ipsum sapientiores fierent. Utinam pro totius Reipublicæ litteraria proventu sæpe sæpius ipsi similes offerantur. Tractatum hunc variis jisque selectis Dissertationibus illustratum ex commissione Reverendissimi Patris Magistri Sacri Palatii Apostolici non tam vidi, quàm demiratus sum, potius admirator, quàm censor; etenim compendium est totius antiquitatis creditæ, non inventæ, acceptæ non excogitata, publicæ traditionis, non usurpationis privatae. Dolebant & ipsi eruditi viri cum illo, quòd tertia Pars Angelicæ summæ præsertim d. Quæstione 27. usque ad Quæstionem sexagesimam, ubi sermo habetur, de Incarnationis Verbi Divini Mysteriis, quæ caput sunt, ac basis Religionis Christianæ, tam levi calamo hætenus pertractata fuisset, subsidium, quod irrequietè multis ab hinc annis expectabatur, cumulatissimè suppeditat Auctor Tractatus de Mysteriis, & Annis Christi &c. Alter Angelicæ Doctrinæ fidus interpres: materias siquidem omnes sic artificiosè coaptat Discipulus, ut ubique splendeat egregius Ordo constitutus d. Magistro: innumeras Ecclesiasticæ historiæ ambages, ita exagitat, ut asperiora in vias planas commutet: Sic veterrima quæque ventilat, ut noviter tractata, videantur, & ad umbilicum perducta. Sic nitidè discurret, ut quæ erant aut dissita, aut nodis implicata, uno deinceps contuitu ab ipsis etiam tyronibus conjungi possint, & extricari. Sic rectè sentit, ut non alia, quam Angelica passim instilletur doctrina: cum igitur Tractatus de Mysteriis, & Annis Christi Domini Servatoris nostri &c. nihil contineat Acatolicum; nihil quod probis moribus dissonum sit: immò purus, atque perennis doctrinæ sit fons, & ad venerandæ declarationem antiquitatis indeflexe

f 2

ten-

tendat. Deopto, ut quam primum publici juris fiat, dicurna nocturnaque manu volvatur, ac revolvatur. In eo Gentiles, necnon & Judæi, qui magnum pietatis Sacramentum &c. omnino non credunt, discunt, unde convincantur, Heterodoxi, qui non sicut est credunt, legunt, unde edoceantur. Catholici, qui non operantur, sicuti credunt, comperient, unde confundantur, juxta & inflammantur. Omnes reconditiorem sapientiæ aquam nullo negotio haurire poterunt. Hoc Censorium suffragium, quod anno 1711. tuleram de hoc Libro, libentissimè confirmo in hac secunda Editione, quæ tribus novis Dissertationibus, ac pluribus Observationibus Historicis, & Criticis, atque Tabulis Chronologicis fuit ab Authore aucta & illustrata. Dat. Romæ in Conventu Sanctiss. Trinitatis de Urbe in Monte Pincio hac die 27. Julii anni 1723.

Fr. P. Bertrandus Monfinat
Ordinis Minimorum Præpositus Generalis :

Ad Coloss.
cap. 2. v. 3.

Ad Roman.
cap. 16. v. 25.

Proverb. c. 8.
v. 22.

Ad Ephe.
cap. 2. v. 20.
Ad Cor. 1.
cap. 3. v. 11.

Cælestis doctrinæ desiderabiles thesauros, in Christo abditos, aperuit ; & reservavit Admod. Rever. Pater Magister Fr. Ignatius Hyacinthus Amat de Graveson, Ordinis Prædicatorum, Doctor Sorbonicus, & Theologus Collegii Casanatensis, in Libro, cui titulus: *Tractatus de Mysteriis, & Annis Christi, Servatoris nostri, &c. totam Incarnationis Oeconomiam, dissolutis ambagibus Mysterii, temporibus æternis taciti, dilucidè explicans; difficultatum quoque profundum præeunte Fidei lumine; perscrutatus. Nodos enim illos, qui Scholasticorum, Chronologorum, & Dogmaticorum saugant ingenia, mira felicitate expedivit, & dissecuit. Primum Collegii Casanatensis ad typos iter, optimo jure à Christo ceptum, qui est initium viarum Domini; hujusque ædificii altitudo, votis piissimi Institutoris responsura; dum superædificatur, & attollitur, in ipso angulari lapide Christo Jesu. Huic firmissimo fundamento consonant, & apprimè congruunt, quæ Auctor toto in Opere sapienter, & eruditè disponit: ita censet, & judicat; postquam præcipiente Reverendissimo Patre Magistro Paulino Bernardino, Sacri Apostolici Palatii Magistro, Librum hunc jucundissimè perlegit: Romæ in Conventu S. Mariæ in Via, 25. Martii 1711.*

Fr. Antonius Mariæ Castelli Ord. Servorum B. Mariæ Virginis,
Sac. Theologiæ Magister, & S. Inquisitionis Qualificator.
Fuit postea ejusdem Ordinis Præpositus Generalis.

REIMPRIMATUR,
Fr. Gregorius Selleri, Ordinis Prædicatorum, Apostolici
Palatii Magister.

INDEX

I N D E X DISSERTATIONUM,

ET QUÆSTIONUM,

Quæ in hoc primo Tomo continentur..

DISSERTATIO I. PROLUSORIA Ad Tractatum de VITA, MYSTERIIS, ET ANNIS JESU CHRISTI, in qua contra Infideles, viroque incredulos evincitur, Vaticinia, quibus Christiani probant, Jesum Christum esse verum Messiam, non à Christianis fuisse conficta, sed esse antiquissima & genuina Prophetarum Oracula. pag. I.

Paragraphus primus, in quo adversus Infideles, & Incredulos homines, probatur, Vaticinia, quibus Christiani demonstrant, Jesum Christum esse verum Messiam, indubitata esse antiquorum Prophetarum Oracula. III.

Paragraphus secundus, in quo diluuntur Objectiones Infidelium, virorumque incredulorum, negantium, Jesum Christum esse verum Messiam, Prophetarum Oraculis prædictum. XXX.

DISSERTATIO II. PROLUSORIA DE FIDE, & auctoritate EVANGELISTARUM, qui Historiam ac Gesta Jesu Christi literis mandarunt. LIX.

Paragraphus primus, in quo ostenditur, quatuor Evangelia non esse supposititia, sed genuina, ac divinâ auctoritate prædicta, atque ab illis Scriptoribus exarata, quorum nomina præse ferunt. LX.

CONCLUSIO I. Quatuor Evangelia, Matthæi, Marci, Lucæ, & Joannis, non sunt supposititia, sed genuina, & verè conscripta ab illis Authoribus, quorum nomina præferunt. LXXII.

CONCLUSIO II. Historia JESU CHRISTI, ab Evangelistis concinnata, omnibus veritatis Notis & characteribus insignitur, quibus vera Historia discernitur à falsâ aut suspectâ. LXXII.

Paragraphus secundus, in quo diluuntur Objectiones, quibus viri increduli fidem & auctoritatem quatuor Evangeliorum, imperere solent. LXXXVI.

Objectiones, quas proponunt viri increduli contra Evangelium S. Matthæi, dissolvuntur. LXXXVII.

Objectionibus virorum incredulorum contra Evangelium S. Marci satisfit. LXXXII.

Objectiones, quas proponunt viri increduli contra Evangelium Sancti Lucæ, solvuntur. LXXXV.

Objectiones, quibus viri increduli fidem & auctoritatem Evangelii S. Joannis labefactare moliantur, jejunas ac frigiditas esse, demonstratur. LXXXVII.

DESCRIPTIO HISTORICO-CHRONOLOGICA, quinque in Partes distributa, complectens ea, quæ de Vita, Gestis, Miraculis, Morte, Resurrectione Jesu Christi in quatuor Evangeliiis referuntur. XCI.

Prima Pars hujus Descriptionis Historico-Chronologica, exhibens ea, quæ ad JESU CHRISTI nativitatem, infantiam, & pueritiam attinent. XCI.

Secunda Pars Vitæ JESU CHRISTI, continens ejus Baptismum, & ea, quæ gessit in primo suæ Predicationis anno. XCVI.

Tertia Pars Vitæ JESU CHRISTI, complectens ea, quæ gessit anno secundo Predicationis suæ. XCIX.

Quarta Pars Vitæ JESU CHRISTI, continens ea, quæ egit in tertio anno Predicationis suæ. CIV.

Quinta Pars Vitæ JESU CHRISTI, comprehendens ea, quæ gessit anno ineunte, quarto Predicationis suæ usque ad illud Spiritus Sancti in Apostolos in Sacro die Pentecostes. CVII.

Peregrinatio, juxta rationem temporum, quam Apostoli Petrus, & Paulus, post Ascensionem Jesu Christi in Cælos, ad propagandum Evangelium susceperunt. pag. CXIII.

TRACTATUS de Vita, Mysteriis, & Annis JESU CHRISTI Proludium, pag. I. DISSERT. I. De Matrimonio Mariæ cum Josepho, perpetuâ cum virginitate federato. 2.

Paragraphus primus, Vtrum Maria inserit Matrimonium cum Josepho ante Legationem Gabrielis? ibid.

CONCLUSIO VNICA. Vtrum, & ratum intercessit Matrimonium Mariam inter & Josephum ante Legationem Gabrielis, seu ante Conceptionem Verbi Divini? 6.

Di-

Diluuntur contrariæ sententiæ argumenta .
 pag. 11.
 Hymni duo in laudem S. Iosephi. Beatissimæ
 Virginis Mariæ castissimi Sponsæ. 20. & 21.
 Paragraphus secundus . An Matrimonium
 Mariæ cum Iosepho fuerit aliquando con-
 summatum ? Seu utrum Maria perpetuò
 permanferit Virgo ? 22.
CONCLUSIO I. Matrimonium Mariæ cum
 Iosepho non fuit consummatum, ac subin-
 de Christus Dominus ex carnali Iosephi
 cum Maria consortio non fuit procreatus.
 pag. 23.
CONCLUSIO II. Maria tam in partu ,
 quàm post partum Virgo permanfit . 26.
 Diluuntur Hæreticorum, & Iudæorum ob-
 jectiones . 28.
DISSERT. II. De Circumstantiis , & Pro-
 digiis Conceptionis Christi Domini , qui-
 bus probatur , eam fuisse planè miraculo-
 sam, & supernaturalem . 36.
CONCLUSIO VNICA . Conceptio Chri-
 sti est planè miraculosa, & supernaturalis.
 pag. 38.
 Diluuntur objectiones . 46.
 Hymnus de Incarnatione Christi , seu de
 Annunciatione Dominicâ . 52.
 Profa de Incarnatione Christi , seu de An-
 nunciatione Dominicâ . 59.
 Hymni duo in laudem B. M. V. 60. 61. & 62.
DISSERT. III. De Stemmate, & de Origine
 Christi Domini , seu utrum Christus ex
 stirpe Abraham, & Davidis Regis, ac subin-
 de ex Tribu Iudâ, ex qua proditurus erat
 Messias, suum genus duxerit ? 64.
 Diluuntur objectiones . 66.
DISSERT. IV. In qua conciliatur antilogia,
 seu apparet contradictio , quæ viderur
 esse Matthæum inter & Lucam , in eâ,
 quam describunt, Genealogia Christi. 78.
CONCLUSIO VNICA . Ad conciliandum
 utrumque Evangelistam, Matthæum vide-
 licet , & Lucam in origine Iosephi, nulla
 ratio efficacior, expeditiorque est eâ, quam
 tradit Julius Africanus, antiquissimus Au-
 thor, in Epistola ad Aristidem apud Euse-
 bium lib. I. Histor. Eccles. cap. 7. 79.
 Diluuntur objectiones . 85.
 Ordo Genealogiæ IESV CHRISTI secun-
 dum Matthæum . 98.
 Ordo Genealogiæ IESV CHRISTI secun-
 dum Lucam . 98. & 99.
DISSERT. V. In qua evincitur, in putatio-
 ne annorum , qui à Mundi primordio ad
 Natale usque Christi Domini interfluxe-
 runt, standum esse Sacri Textus Hebræi,
 & editionis nostræ vulgæ Chronologiæ,
 non autem calculo versionis LXX. Inter-
 pretem . 100.
CONCLUSIO VNICA . In putatione an-
 norum , qui interfluxerunt à Creatione
 Mundi usque ad Natale Christi Domini ,

præferenda est Sacri Textus Hebræici
 Chronologia calculo LXX. Interpretum ;
 ac subinde Christus Servator noster natu-
 s est ex plero quarto Mundi Millennium, iuxta
 Sacri Textus Hebræi calculum, non verò
 in sexto Mundi millenario, sicut habent
 mendosi, & interpolati Codices Græci. 101.
 Diluuntur oppositæ sententiæ argumenta .
 pag. 106.
DISSERT. VI. De anno Natalis proprii
 Christi , seu quoto Imperii Augusti anno
 natus sit Christus Dominus ? 122.
CONCLUSIO VNICA . Verum & pro-
 prium Natale Christi consignari debet an-
 no quadragesimo Imperii Augusti , anno
 quadragesimo primo Iuliano , anno quar-
 to Olympiadis cæcæliæ nonagesimæ ter-
 tiæ, à pugna Actiæ anno vigesimo septi-
 mo . Regni Herodis trigesimo sexto , à
 morte Antigoni trigesimo tertio , Verbis
 Romæ conditæ septingentesimo quadra-
 gesimo nono, Periodi Iulianæ quater mil-
 lesimo septingentesimo nono, quadriennio
 integro ante Æram vulgarem, Consulibus
 Augusto Cæsare XII. & Lucio Cornelio
 Syllâ . 126.
 Diluuntur objectiones . 131.
 Series Consulium Romanorum, ab anno Ur-
 bis Romæ conditæ 709. usque ad annum
 Verbis conditæ 754. idest, usque ad annum
 usque quadragesimum quintum Imperii
 Augusti , quo anno capit annus primus
 Æræ Christianæ . 149.
DISSERT. VII. De Vaticinio Jacob , Ge-
 nesis cap. 49. Non auferetur sceptrum de Iu-
 da, &c. & de Circumstantiis Nativitatis
 Christi Domini . 156.
 Paragraphus Primus . Utrum hoc Jacobi
 vaticinium: Non auferetur sceptrum de Iu-
 da, &c. fuerit impletum in Nativitate Chri-
 sti ? 162.
CONCLUSIO VNICA . Vaticinium Jaco-
 bi morientis : Non auferetur sceptrum de Iu-
 da, &c. Dux de semore ejus, donec veniat, qui
 mittendus est, & ipse eris expectatio gentium,
 &c. fuit impletum in Nativitate Christi
 Domini . 157.
 Diluuntur Iudæorum objectiones . 160.
 Paragraphus Secundus . In quo ex circum-
 stantiis Nativitatis Christi probatur, ipsum
 esse verum Messiam Prophetarum Oracu-
 lis prædictum . 173.
CONCLUSIO VNICA . Ex circumstantiis
 Nativitatis Christi Domini invictè adver-
 sus Iudæos probari potest , Christum esse
 verum Messiam , Prophetarum oraculis
 prædictum . 179.
 Diluuntur objectiones tam Criticorum, quàm
 Iudæorum . 182.
 Ode de Casa Natalitæ pueri Iesu , deque
 paupere puerperio Virginis Dei, paræ Ma-
 riæ ; 188.
 DIS.

DISSERTATIONUM.

DISSERT. VIII. De Manifestatione, seu signis Nativitatis Christi, de Magis, qui ad ipsius cunas accesserunt, de strage Infantum ab Herode edita. 197.

CONCLUSIO I. Magi nec ex Chaldaea, nec ex Perside venerunt, ac subinde nec Chaldaei, nec Persidi suos natales debent. 196.

CONCLUSIO II. Probabilius est Magos venisse ex Arabia Felice. 200.

CONCLUSIO III. Herodes biennium post Natalem Christi non expectavit ad Infantes trucidandos. 202.

CONCLUSIO IV. Herodes in ea, quam edidit, strage Infantum, non occidit filium suum bimum. 205.

CONCLUSIO V. Perantiqua est, semperque in Ecclesia fuit celeberrima Epiphaniae festivitas, quae peragitur die sexta Januarii. 210.

Prosa in die Epiphaniae. 211.

DISSERT. IX. De Circumcisione, & aliis Legalibus circa puerum Iesum observatis. 212.

CONCLUSIO VNICA. Conveniens fuit Christum circumcidi, & offerri in Templo. 213.

Diluuntur objectiones. 215.

Quaest. 1. Vtrum etiamnum extet Praepitium, quod in Circumcisione à Sanctissimo Christi Corpore fuit praecisum? 222.

Quaest. 2. Num antiqua sit in Ecclesia festivitas Circumcisionis Christi Domini, quae Kalendis mensis Januarii celebratur? 222.

Quaest. 3. An Simeon, Sanctus ille senex, qui puerum IESVM oblatum in Templo suis in ulnis excepit, fuerit Sacerdotio insignitus, & luminibus orbat? 223.

Quaest. 4. A quo tempore coepit in Ecclesia celebrari Purificationis B.M.V. festivitas, & quibus de causis fuerit instituta? 224.

Hymnus IESV CHRISTO nato, & circumciso patienti. 227.

Prosa in die Purificationis B. Mariz Virginis. 227.

Hymnus de Oblatione IESV CHRISTI in Templo, seu de Purificatione B. M. Virginis. 228. & 229.

DISSERT. X. Quoto anno aetatis suae Christus Dominus fuerit baptizatus? 230.

CONCLUSIO VNICA. Christus fuit baptizatus anno aetatis suae inuente trigesimo, anno decimo sexto Imperii Proconsularis Tiberii, anno vigesimo sexto Aerae vulgaris, anno Iuliano septuagesimo primo, anno Urbis Romae conditae septingentesimo septuagesimo nono, anno secundo Olympiadis ducentessimae primae, anno Periodi Iulianae quater millesimo septingentesimo trigesimo nono, Consulibus Cn. Lentulo Gerulico, & C. Calvisio Sabino. 233.

Diluuntur objectiones. 234.

Quaest. 1. Quantum temporis effluxerit à Ioannis Baptista ministerio, usque ad Baptismum Christi? 244.

Quaest. 2. An reverà Christus fuerit baptizatus die sexta Ianuarii? 245.

Series Imperatorum & Consulum Romanorum, ab anno primo Aerae Christianae usque ad annum eiusdem Aerae Christianae vigesimum sextum, quo IESVS Christus, anno inuente aetatis suae trigesimo, die 6. mensis Ianuarii fuit in Iordane à Iohanne baptizatus. 246.

DISSERT. XI. De circumstantiis Baptismi Christi, & de illius vita ante Baptismum. 248.

CONCLUSIO I. Conveniens fuit, ut Christo baptizato, & orante, aperirentur Caeli. 250.

CONCLUSIO II. Conveniens fuit, ut Spiritus Sanctus in Christum baptismum illaberetur in specie columbae. 257.

CONCLUSIO III. Convenienter, Christo Domino baptizato, audita est vox Patris dicentis: Tu es Filius meus dilectus, in te complacui mihi. 262.

Quaest. 1. Vtrum Anna, & Caiphas simul Pontificatum gesserint anno, quo Ioannes suum coepit obire ministerium? 267.

Quaest. 2. Vtrum Baptismus Ioannis conferret gratiam sanctificantem? 268.

Quaest. 3. Cur parvuli recens nati in Ecclesia baptizentur, cum tamen Christus Dominus anno dumtaxat inuente aetatis trigesimo fuerit baptizatus? 269.

Quaest. 4. Vtrum omnes Apostoli baptizati fuerint Baptismo Christi? 270.

Hymnus de Vita IESV Christi ante Baptismum. 271.

Hymnus in laudem S. Ioannis Baptista, qui, postquam IESVM Christum baptizasset, ab impio Rege Herode iustus est decollatus. 271.

DISSERT. XII. De Tentatione Christi in deserto, & de illius vita post Baptismum. 271.

CONCLUSIO I. Christus convenienter fuit à diabolo tentatus in deserto post ieiunium quadraginta dierum, & totidem noctium. 276.

CONCLUSIO II. Christus trius tentatione convenienti ordine fuit à diabolo tentatus. 276.

CONCLUSIO III. Christus post susceptum Baptisma conversatus est cum hominibus vitam non austeram, sed communem, pauperem tamen, ducendo, & omnia veteris Legis praecepta adamussim observando. 280.

DISSERT. XIII. De Doctrina Christi Domini. 287.

CONCLUSIO I. Doctrina Christi excellentior est quacunque alia doctrina. 288.

CON-

I N D E X

CONCLUSIO II. Conveniens fuit, ut Christus per se ipsum doceret Judæos, & apud illos prædicaret, non obitante offensione Scribarum, & Phariseorum. 291.

CONCLUSIO III. Christus non debuit doctrinam suam, scripto tradere, seu literis consignare. 294.

CONCLUSIO IV. Epistola Abgari, Regis Edessenorum, ad Christum, & Epistola Christi ad eundem Abgarum, sunt Epistola supposititæ, & apocryphæ. 299.

Hymnus in laudem doctrinæ Iesu Christi, ab Apostolis per totum Orbem propagatæ, & à Sanctis Doctoribus contra Hereticos propugnatæ. 306.

Alter Hymnus in laudem Ecclesiæ Doctorum. 307.

Alter Hymnus in laudem Evangelistarum, qui doctrinam & Historiam Iesu Christi literis mandarunt. 308.

DISSERT. XIV. De Miraculis à Christo Domino editis. 310.

Parag. 1. De Miraculis Christi in genere, ibid.

CONCLUSIO I. Nulla ratione negari potest, Christum Dominum vera edidisse miracula. ibid.

CONCLUSIO II. Christus divinâ virtute miracula edidit. 314.

CONCLUSIO III. Christus per miracula, quæ edidit, sufficienter suam divinitatem comprobavit. 316.

Diluuntur objectiones. 318.

Quæst. unica: Vtrum in Ecclesia Catholica ad hanc usque ætatem conservatum fuerit donum miraculorum? 325.

Paragraphus secundus. De Transfiguratione Christi, & de variis speciebus miraculorum, quæ ab ipso edita sunt. 326.

Hymnus De Transfiguratione Christi. 334.

DISSERT. XV. De anno, die, horâ, & loco Passionis, seu mortis Christi Domini. 336.

Paragraphus primus. De initio, & fine LXX. Danielis hebdomadam. ibid.

CONCLUSIO I. Exordium LXX. Danielis hebdomadam ætendendum est anno septimo Artaxerxis Longimani, Persarum, Regis. 338.

Diluuntur objectiones. 344.

Paragraphus secundus. Quoto anno ætatis sue Christus mortuus sit? & de die, horâ, & loco ipsius mortis. 351.

CONCLUSIO VNICA: Christus mor-

tuus est anno ætatis suæ trigesimo tertio incunte, anno decimo nono Imperii Proconsularis Tiberii, anno septuagesimo quarto Juliano, anno primo Olympiadis ducentesimæ secundæ hebdomadam Danielis quadringentesimo octogesimo sexto, periodi Julianæ quater millesimo septingentesimo quadragesimo secundo æræ vulgaris vigesimo nono, Consulibus Cajo Rubellio Gemino, & Cajo Elio Gemino. pag. 353.

Diluuntur objectiones. 358.

Quæst. 1. Quâ horâ crucifixus sit Christus Dominus, & quo pacto conciliari possint Evangelistæ Marcus, & Joannes, quorum primus cap. 15. ait: Christus fuisse crucifixum hora tertia, alter vero cap. 19. hora quasi sexta? 364.

Quæst. 2. Cur Christus non sit mortuus in Nazareth, ubi fuit conceptus? neque in Bethleem, ubi natus? neque in Hebron, ubi mortuus, & sepultus est Adamus, cujus peccatum novum fuit incarnationis, & mortis Christi? neque intrâ muros Hierusalem, ubi sacrificia veteris Legis sacrificium Crucis adumbrantia offerebantur? sed in Calvariæ loco extrâ mœnia Hierusalem crucifigi, & mori voluerit? 366.

Series annorum Imperii Tiberii, & Consulatum Romanorum ab anno vigesimo sexto æræ Christianæ, seu Dionysianæ, quo Christus Dominus baptizatus est, usque ad annum ejusdem æræ Christianæ vigesimum nonum, seu ad annum usque decimum nonum Imperii Proconsularis Tiberii, quo Christus Dominus Cruci suffixus, mortem pro salute omnium oppetit. 367.

DISSERT. XVI. De Morte Christi, seu utrum Christus Dominus mortuus sit pro omnibus omnino hominibus? 369.

CONCLUSIO VNICA: Dogma Fidei est Christum pro omnibus & singulis hominibus mortuum esse, ac sanguinem suum fudisse. 373.

Diluuntur objectiones. 384.

Quæstio 1. Vtrum quinto Ecclesiæ Sæculo fuerit aliqua Prædestinatio nonum Sæculi? pag. 403.

Quæstio 2. Vtrum Gotteschalcus nono Ecclesiæ Sæculo Prædestinationum Hæresim instauraverit? 405.

DISSERTATIO PRIMA PROLUSORIA

AD TRACTATUM DE MYSTERIIS ET ANNIS CHRISTI;

*In qua contra Infideles, Virosque incredulos evincitur,
Vaticinia, quibus Christiani probant, Jesum Christum
esse verum Messiam, non à Christianis fuisse
conficta, sed esse antiquissima
& genuina*

PROPHETARUM ORACULA.



EX Libris Veteris Testamenti, in quibus promissiones Dei de adventu Messiae & Oracula Prophetarum passim continentur, quosque, ceu Sacros, antiquos, à Deo revelatos & inspiratos, summâ veneratione recipiunt, exosculantur, & tantum non adorant Judæi, quibus, ut inquit Scriptura Sacra, *credita sunt Eloquentia Dei*, probaturus sum in pluribus, quas in *Tractatu de Mysteriis & annis Christi, Servatoris nostri*, concinnabo, Dissertationibus, Jesum Christum esse verum Messiam, Prophetarum Oraculis

prædictum, tamque luculenter, ni meus me fallat animus, sinistras, ficulneas & detortas interpretationes, quibus deplorandâ cæcitate perfidi Judæi, tortuosos & inexplicabiles quærentes anfractus, hæc Prophetarum Oracula obscure moliantur, confutabo, ac dissipabo, ut nullus, nisi planè obduratus & occæcatus Judæus, in tanta luce, & in hoc Vaticiniorum eventu, nunc omnium oculis perspicuo, atque coruscante sole meridiano clariori, cæcutire aut caligare possit. Verum, cum, præter obstinatos Judæos, multi etiamnum reperiuntur, vel in tenebris Idololatriæ immersi, vel increduli & projectæ conscientiæ homines, qui negant, Jesum Christum esse verum Messiam, atque perfrictæ frontis audaciâ asserunt, Vaticinia, quæ proferunt Christiani, perperam Prophetis esse attributa, eaque ut supposititia, & pura putaque Christianorum commenta, explodi, sugillari, ac penitus repudiari debere;

A

rem

(II.)

rem lectori gratissimam facturum me esse existavi, si, ad probandum adversus infideles, virosque incredulos, Jesum Christum esse verum Messiam, & ad illorum sacrilegam retundendam impietatem, hanc Dissertationem prolusoriam ad *Tractatum de Mysteriis & annis Christi* præmitterem, in qua primò ostensurus sum, Varietate, quæ à Christianis adduci solent ad probandum, Jesum Christum esse verum Messiam, vera esse, sincera & genuina Prophetarum Oracula, non verò, sicut calumniantur Infideles, virique increduli, ab ipsis Christianis proprio Marte fuisse excogitata. Secundò, invictis momentis evincam, fidem Apostolorum & Evangelistarum, qui Historiam Jesu Christi litteris mandarunt, & Varietate Prophetarum de venturo Messia fuisse in Jesu Christo impleta testantur, in dubium vocari haud posse, cum evidentissimis munita sit veritatis characteribus, quibus nemo sanæ mentis refragari potest. Postremò, argumenta, quibus nituntur Infideles, virique increduli, proponam, quàmque jejuna, sublesta, ac frigida sint, demonstrabo. Amplum, fateor, & penè immensum suscipio argumentum, quod, si pro eo ac meretur, tractare, atque plenissimè exequi vellem, tanta mihi rerum exuberaret copia, ut nec ista Dissertatio modum, nec finem reperiret oratio. Quocirca, ne in immensum diffundar, nimiamque prolixitate lectori tædium fastidiumque ingeram, in duos tantum Paragraphos hanc Dissertationem partiar, in quorum primo demonstrabo, Varietate, quæ ex libris Veteris Testamenti deprompta proferunt Christiani ad probandum, Jesum Christum esse verum Messiam, antiquissima esse, à Prophetis, divino afflatis numine, conscripta, ac subinde divinâ pollere auctoritate. In altero Paragrapho diluam omnes obiectiones, quas Infideles, virique increduli adversus Jesum Christum, & ad negandam antiquitatem, vel ad elevandam veritatem Varietatorum, quibus Christiani probant, Jesum Christum esse verum Messiam, obtrudere solent.



PARAGRAPHUS PRIMUS,

In quo, adversus Infideles, & incredulos homines, probatur, Vaticinia, quibus Christiani demonstrant, Jesum Christum esse verum Messiam, non à Christianis fuisse excogitata, sed antiquissima esse, & ab omnibus, ut genuina & indubitata Prophetarum Oracula, semotà omni dubitatione, esse recipienda.

P Rimum momentum, quod Infidelibus, virisque incredulis convincendis aptissimum esse videtur, illosque sensim sine sensu disponere ac præparare potest, ut tandem aliquando perspectæ veritati fasces submittent, ultro fateantur, Vaticinia, quibus Christiani probant, Jesum Christum esse verum Messiam, non à Christianis, sed à Prophetis originem habuisse; petitur ex evidentissimo totius Nationis Judaicæ testimonio, quod Infidelibus, Virisque incredulis suspectum esse non potest, cum certum sit, Judæos esse insensissimos Christianorum hostes, quos, teste *Sancto Justino* in Dialogo cum *Tryphone*, Judæo, in suis Synagogis diris devotent, & ut ait *Sanctus Hieronymus* in Commentario in *Cap. V. Isaie*, *Ter per singulos dies, sub nomine Nazæorum, anathematizant vocabulum Christianum*; Atqui tamen omnes ad unum Judæi, licet odio plusquam Vatiniano prosequantur Christianos, constantè profitentur, ea Prophetarum vaticinia, quæ Christiani proferunt ad probandum, Jesum Christum esse Messiam, sincera & genuina esse, verèque excerpta è suis Sacris Codicibus, quos in omnes Orbis partes dispersi circumferunt, & pro quorum antiquitate, divinâ auctoritate, revelatione & inspiratione mortem oppetere paratos se se exhibent. Non inficior quidem, Judæos, ne fateri cogantur, Jesum Christum, quem in Crucem egerunt, verum esse Messiam, in lege à Deo promissum, nullum non movere lapidem, ut ipsæ Prophetarum Oraculis, quæ ipsimet antiquissima & divina esse agnoscunt, tenebras offundant, & violentis a. hibitis interpretationibus eludant, eosque malle tanquam noctuas ad lumen solis caligare, vel potius velut cæcos in meridie palpare, quàm veritatis luci, quæ sese eorum oculis ultro ingerit, aperire oculos, & confessas præbere manus. At, contendo, hanc Judæorum obstinationem patrocinari Christianorum Causæ contra Ethnicos, nedum obesse, quia dum Judæi, capitales Christianorum hostes, palam confitemur, ea Prophetarum Oracula, quibus fulciuntur Christiani ad probandum Jesum Christum esse

(IV.)

esse Messiam, antiquissima esse, ac divinâ prœdita auctoritate, eadem operâ falsi redargunt Infideles, aliosque viros incredulos, quos non pudet asserere, ea Vaticinia, quæ Christiani proferunt ad probandum, Jesum Christum esse Messiam, fuisse ad fucum faciendum & simplices Illudendos, de industria à Christianis conficta atque procusa. Tam manifestum itaque totius Nationis Judaicæ testimonium, ut nemo non videt, omnium Infidelium, ac viro- rum incredulorum jugulum petit, & ad illos convincendos sat superque sufficere potest, sicut perdoctè ait S. *Augustinus* Concione I. in Psalmum 58. *Dispersi sunt*, inquit Aquilinus ille Doctor, *Judæi, testes iniquitatis suæ, & veritatis nostræ Si aliquandò Paganus dubitaverit, cum eis dixerimus Prophetias de Christo, quarum evidentiam obstupescit, & admirans putaverit à nobis esse conscriptas, de Codicibus Hebræorum probamus, quia hoc totum antè prædictum est. Videte quomodò de inimicis nostris alios confundimus inimicos.* Porro, In Controversia de Vaticiniis Prophetarum magnum apud Infideles, viroque incredulos autoritatis pondus habere debet concors universæ Nationis Judaicæ sententia, tum quia nunquàm permisit Deus Optimus Maximus, ut libri, qui primæva Religionis Judaicæ complectuntur monumenta, perierint, sed eos in tam longa sæculorum serie, singulari divinæ suæ providentiæ beneficio, ad hæc usque tempora conservavit, cum tamen alii libri, qui olim ab Ægyptiis, à Romanis, & aliis Nationibus, quæ verum Deum ignorabant, tanquàm divini habiti sunt, temporis, rerum omnium edacis, diuturnitate interciderint; tum quia etiam omnium Judæorum animis maxima semper insedit religio custodiendi suos sacros libros, ac sedulò cavendi, ne vel minimus error in eos temporis injuriâ irreperet, sicut testes sunt Judæi omni exceptione majores, *Trypho* in Dialogo cum Sancto *Iustino*. *Josephus* Lib. 1. contra *Appionem*, cujus testimonium refert *Eusebius* Lib. 3. *Historiæ Ecclesiasticæ* cap. 10. & *Philo* lib. 1. *De Hippoteticis*, laudatus ab eodem *Eusebio* lib. 8. *Præparationis Evangelicæ* Capp. 6. & 8. Quod etiam liquidò patet ex Sacra illâ apud Judæos Criticâ, dictâ *Massora*, quam herculeo & indefesso planè labore Rabbini Scholæ Triberiadis adornarunt, & ex libro *Sopherim*, seu *Scribarum*, ubi, teste doctissimo *Joanne Morino*, Cap. 3. *Exercitationis* decimæ quartæ Libri 2. *De Hebræi, Græcique Textus sinceritate*, tantam Judæi in describendis Libris Sacris diligentiam præscribunt, ut à superstitione non multum abhorrrere videantur. Hinc est, quòd Jesus Christus, licet plurima in Legis Doctoribus, & temporis sui Pharisæis reprehenderit, nunquàm tamen eos accusavit, quòd Libros Moysis, aut Prophetarum adulterassent, aut supposititiis, interpolatisque libris uterentur. Ad Judæos igitur, Christianæ Religionis hostes, debemus remittere Infideles, aliosque viros incredulos, qui tanquàm nova & commentitia exfufflant ea Vaticinia, quibus Christiani probant, Jesum Christum esse verum Messiam. Permanet quippè adhuc, &, juxta Prophetarum

Ora.

(V.)

Oracula, usque ad finem mundi permanebit Judæa Gens, sic in nationibus dispersa, ut maneat tamen inconfusa, nec aliarum nationum, cum quibus permixta est, mores ritusque induat, sicque ab aliis Nationibus omnino distincta proferat, in obsequium Christianæ Religionis, & in ejus veritatis evidentissimum testimonium, Prophetarum libros Gentilibus minimè suspectos. Sunt enim Judæi, ut iterum loquar cum S. *Augustino* cap. 46. lib. 18. *De Civitate Dei*, Casarii nostri, qui libros nostros circumferunt, *Ut cum Pagani non credunt, quæ nos de Christo prædictæ esse dicimus, mittamus eos ad inimicos fidei nostræ Judæos, qui libros nostros circumferunt, in quibus eadem habentur, quæ nos prædicamus.* Quod si Infideles ægrè ferant, se remitti ad Judæos & dicant, cum Gentilibus agendum esse testimoniis Gentilium, non Hebræorum, quorum testimonia apta esse non possunt Gentibus, ut credant in Christum, si, inquam, hæc regerant Infideles, Respondebo ipse cum eodem Sancto Doctore, hanc esse meram & ridiculam insaniam: *Dicere, ait Aquilinus Doctor* cap. 1. lib. 13. *contra Faustum, Manichæum, Non esse aptam Gentibus Hebræam Prophetiam, ut credant in Christum, quàm videamus omnes Gentes per Hebræam Prophetiam credere in Christum, ridicula insania est.* Ecquid, amabo, insulsius, quàm dicere, Vaticinia de adventu Messię, quæ in Libris Veteris Testamenti, seu in Libris Hebræorum continebantur, longè antequàm extaret Christiana Religio, quæque in Jesu Christo adamussim fuisse impleta eventus certissimè comprobavit, non esse apta Gentibus, ut credant in Christum? maxime, cum, ipsimet Judæi, qui sunt jurati Christianorum hostes, palam profiteantur, hæc Prophetarum Vaticinia antiquissima esse, nec unquàm à Christianis datà operâ fuisse excogitata.

Reponent, sat scio, Infideles, virique increduli, Libros Veteris Testamenti, quos nunc retinent Judæi, quique sunt prænuncii Jesu Christi, & viam ad Legem Evangelicam parant, non esse antiquos, quia, cum sint linguâ hebraicâ exarati, ignoti penitus fuerunt antiquis Gentilibus, qui linguam hebraicam non intelligebant, sed solum Linguam Græcam callebant; tum quia etiam nullus antiquorum Gentilium meminit horumce librorum veteris Testamenti, quibus nunc utuntur Judæi, & ex quibus Christiani probant, Jesum Christum esse verum Messiam, Prophetarum Oraculis prædictum; tum quia deniquè ex nullo probatæ vetustatis monumento adstrui potest antiquitas horumce Librorum Veteris Testamenti, quos maximâ veneratione suscipiunt hebræi, & quibus potissimum nituntur Christiani, ut probent Jesum Christum esse Messiam.

Verùm, hæc Infidelium, Virorumque incredulorum Responsio, quantum ad tria, quæ complectitur, Capita, facili negotio confutari potest. Et primò quidem falsum est, Libros Veteris Testamenti, Linguâ Hebræâ conscriptos, antiquis Gentilibus, qui linguæ hebraicæ rudes erant & linguæ dumtaxat Græcæ periti, fuisse prorsus ignotos; id, inquam,

(VI.)

quam, oppidò falsum esse, ex eo apertissimè evincitur, quòd Libri Veteris Testamenti fuerint apud Gentiles depositi trecentis termè annis antequàm Jesus Christus nasceretur, ab eo videlicèt tempore, quo missi Alexandriam Aegypti Septuaginta Interpretes Judæi Libros Veteris Testamenti è Textu hebræo, jussu & efflagitu *Ptolomæi Philadelphi*, Aegyptiorum Regis, in Linguam Græcam, Genilibus apprimè notiam, vertèrunt. Quam Græcam Librorum Veteris Testamenti versionem idem *Ptolomæus Philadelphus*, Aegypti Rex, asservendam in celeberrima Bibliotheca Alexandrina reposuit, eademque versione Græcâ, Judæi Hellenistæ per totam Aegyptium in suis Synagogis usi sunt. Sed de hac Scripturæ Sacræ Traductione Græcâ legesit *Eusebium* Cap. I. Lib. VIII. *De præparatione Evangelica*. Addo etiam, non deesse viros eruditos, quos inter jure optimo censerè debet illustrissimus *Daniel Huetius* in sua *Demonstratione Evangelica* Propositione IV. Cap. I. qui pertendunt, ante *Platonem*, & ante Expeditionem *Alexandri Magni* in Asiam, idest, ante Perfici Imperii excidium, jam Librorum Veteris Testamenti è textu Hebræo adornatam fuisse Versionem Græcam, ex qua Ethnicis Philosophis, aliisque Gentilibus proclive fuit Historiæ Sacræ, seu Librorum Veteris Testamenti habere notitiam, etiamsi linguam Hebræam penitus ignorarent.

Alterum Caput Responsionis Infidelium, virorumque incredulorum, asserentium, Veteris Testamenti libros non esse antiquos, quia de his libris antiqui Gentiles Scriptores nullam mentionem fecerunt, tam falsum est quàm quod maximè. Suppetunt quippè innumera penè atque locupletissima testimonia antiquorum Scriptorum Gentilium, qui de Libris Veteris Testamenti vel disertam mentionem habuerunt, vel ex illis plura delibarunt ac deflorarunt, vel ea scripserunt, quæ cum Historia Sacrà, Veteris Testamenti libris contentà, maximam affinitatem habent. In primis, *Moysem*, Judæorum Legislatorem, *Longinus*, *Palmyrenorum* Reginæ à consiliis & studiis, insigni commendat elogio in libro, quem edidit *De sublimi genere dicendi*, eo quòd *Moyse* in exordio Libri Geneseos sic Deum magnificè loquentem inducat: *Fiat lux, & facta est lux*. Inter antiquissimos Legumlatores *Moysem* constituit *Diodorus Siculus* Lib. I. Bibliothecæ cap. 59. *Juvenalis* Satyrâ XIV. ait, Volumen Legum Judaicarum fuisse à *Moyse* conscriptum:

*Judaicum ediscunt, & servant, & metunt Jus,
Tradidit arcano quodcumque volumine Moses.*

Cornelius Tacitus de Judæis loquens Libro V. *Historiarum*, hæc de *Moyse* scribit: *Moses, quo sibi in pæsternum gentem firmavit, novos ritus, contrariosque cæteris mortalibus indidit, prophana illic omnia quæ apud nos Sacra Hi ritus, quoquo modo inveni, antiquitate defenduntur.*

(VII.)

sunt. Dogmata sua à Mose sumplisse Platonem agnoscit Numenius, Pythagoricus, qui apud Eusebium Lib. XI. *Præparationis Evangelicæ* cap. 1. ait: Quid enim est Plato, nisi Moses atticissans? Prætermitto, ne longior sum, alios Scriptores Gentiles, qui Moyſis meminere, cujusmodi sunt Philocorus, qui florebat sub Ptolomæo Philopatore, Ægyptiorum Rege, Empolemus, qui vivebat regnante in Ægyptio Ptolomæo Philadelpho, Hecataeus, Berosus, Manetho, Alexander Polyſthor, Trogus Pompejus, Strabo, Nicolaus Damascenus, Plinius, Plutarchus, Porphyrius, & alii, quorum testimonia accuratè refert illustrissimus Abrincensis Episcopus Daniel Huetius in sua *Demonstratione Evangelica* Propositione IV. ubi etiam perdoctè juxtà ac eleganter probat ex variis prophana eruditionis monumentis, Moysem esse omnium Gentium, non solum Persarum & Græcorum, sed etiam Chaldæorum, Ægyptiorum, & Assyriorum primum Scriptorem, & Pentateuchum, ab eo scriptum, unicum esse fontem, ex quo totam suam Theologiam hauserunt Ægyptii, Persæ, Indi, Thraces, Germani, Galli, Britanni, Hispani, præcipuè verò Græci & Romani, qui ex Moyſis libris, velut è rivis suos hortos irrigarunt, indeque suas Leges, Ritus, Religionem, Fabulas aut Historias suas deprompserunt. Præterea, antiquitatem Historiæ Regum Juda, quæ describitur in libris quatuor Regum, & in duobus Libris Paralipomenon, commendant monumenta & Annales Gentilium. Tyriorum quippè Annales referunt, Templum Hierosolymitanum toto penè seculi Sæculo fuisse constructum, quàm Carthago conderetur. Meminerunt etiam iidem Tyriorum Annales Salomonis, filii Davidis, Regis Juda, & Hiromi, seu Hiram, Regis Tyriorum, qui, ut dicitur lib. 3. Regum cap. 5. concessit Salomoni, Regi Juda, Cæfores lignorum ad Templi Hierosolymitani ædificationem. Plures Epistolas à Salomone, Rege Juda, ad Hiramum, Regem Tyriorum, & vicissim ab Hiram ad Salomonem ultro citroque scriptas fuisse asserit Josephus, Hebræus, cap. 2. libri 7. *Antiquitatum Judaicarum*, additque, eum, qui vult habere exempla harumce Epistolarum, petere ea posse à publicis Tyriorum Archivorum Custodibus. Profert quoque idem Josephus, Hebræus, cap. 6. ejusdem libri plura de Davide, Rege Juda, Patre Salomonis, antiqua testimonia Gentilium Scriptorum, præsertim Nicolai Damasceni lib. 4. *Historiarum*, & Menandri Ephesii, qui Regum tam Barbarorum, quàm Græcorum descripsit Historiam. Docent nos insuper Gentiles Chaldæi in suo *Canone Mathematico Regum Babyloniorum*, tempus, quo vivebat Mardokempadus, seu Merodachus, Rex Babylonis, cujus fit mentio libri 4. Regum cap. 20. Aperit nobis idem Canon Mathematicus Regum Babyloniorum tempus Nabocolassari, seu Nabuchodonosori, Babyloniorum Regis, qui Judæos abduxit in captivitatem, sicut narratur lib. 4. Regum cap. ult. Denique, per eundem Mathematicum Babyloniorum Regum Canonem agnoscimus tempus Ilverodami, seu Elef-

merc-

merodachi, qui *Joachimum*, Regem Juda, exemit è vinculis, sicut legitur Lib. IV. Regum cap. ultimo. Negare igitur non possunt Infideles, Virique increduli antiquitatem quatuor Librorum Regum, & duorum Librorum Paralipomenon, in quibus textitur Historia Regum Juda, cum antiquitas illorum librorum aperte ex Libris, Historiis, Monumentis, & Annalibus Gentilium comprobetur. Vindicatà autem semel quatuor Librorum Regum, & duorum Librorum Paralipomenon, in quibus describitur Historia Regum Juda, antiquitate, proum est plurimum aliorum Librorum Veteris Testamenti adstruere antiquitatem. *David* quippè, Rex Juda, cujus meminerunt Annales Gentilium, Author est Libri Psalmorum. *Salomon*, filius *Davidis*, Regis Juda, de quo itidè in Annalibus Gentilium fit mentio, scripsit Librum *Ecclesiasticis*, Librum *Proverbiorum*, Librum *Cantici Canticorum*, & ex ejus Scriptis, ut plura persuadent momenta, excerptus est Liber *Sapientia*, item & Liber *Ecclesiastici*, quem *Iesus*, filius *Sirach*, digessit ac concinnauit. Quatuor Prophetæ Majores, & duodecim Prophetæ Minores scripserunt sub Regibus Juda, ac subinde Librorum, quos publicarunt, antiquitatem ostendit Historia Gentilium, sed præcipuè jam citatus Mathematicus Regum Babyloniorum Canon. Quæ cum ita sint, contemni nunc penitus ac flocci fieri debent Infideles, Virique increduli, qui, ut fidem & auctoritatem detrahant Libris Veteris Testamenti, ex quibus Christiani prolant *Iesum Christum* esse verum Messiam, Prophetarum oraculis prædictum, asserere audent, illos libros non esse antiquos, nec de illis Scriptores Gentiles, aut eorum Historias, Monumenta, & Annales ullam mentionem fecisse.

Sed non sufficit ex Gentilium Scriptorum Libris, Historiis, monumentis, & Annalibus ostendisse antiquitatem Librorum Moysis, quatuor Librorum Regum, duorum Librorum Paralipomenon, Librorum *Davidis* & *Salomonis*, & Librorum Prophetarum; oportet etiam, ut, contra Infideles, & incredulos hujus ætatis viros, antiquitatem aliorum Librorum Veteris Testamenti ex probatæ vetustatis monumentis stabilimus. Antiquitas libri *Iosue*, in regendo populo Israelitico Successoris Moysis, colligitur tum ex antiquitate illorum Regum Gentilium, qui citrà & ultrà Jordanem fuerunt à *Iosue* prostrati; tum etiam ex antiquitate Chananæ Regionis, quam armis occupavit idem *Iosue*; tum denique ex vetustissimis fabulis Gentilium, qui personam *Herculis* imposuerunt *Iosue*, sicut observat *S. Augustinus* cap. 19. lib. 18. *De Civitate Dei*, idemque, post Sanctum illum Doctorem, confirmant *Gerardus Vossius* Lib. 1. *de Idololatria* cap. 26. & illustrissimus Abrincensis Episcopus in sua *Demonstratione Evangelicâ*, Propositione IV. Vetustas *Libri Judicum*, cui annexus est liber *Ruth*, sese prodit tum ex servitutibus Israelitarum sub antiquis Gentilium Regibus Mesopotamiæ, Moabitarum, Chananæorum, Madianitarum, Ammonitarum, Philistæorum &c.

tum

(IX.)

tum etiam ex ritibus & fabulis, quas Græci, aliæque Gentes ex hoc Iudicum libro comminiscendi ansam & occasionem arripuerunt, sicut legere est apud eundem sæpè laudatum Episcopum Abrincensem Propositione IV. *Demonstrationis Evangelicæ*. Historia duorum priorum librorum *Esdræ* habet ex ipso Mathematico Regum Babyloniorum & Persarum Canone notam Antiquitatis, quam Infideles, virique increduli nullo pacto in dubium vocare possunt, cum in hac Historia referantur benè multa, quæ gesta sunt sub Persarum Regibus, præsertim sub *Cyro*, *Dario Histaspide*, & *Artaxerxe Longimano*, quorum Regum tempora præstituit prædictus Regum Babyloniorum & Persarum Mathematicus Canon. In libro *Tobiæ* describuntur Res sub Regibus Assyriorum *Salmanazare*, & *Sennacheribo* gestæ, quarum antiquitatem non solum declarant quatuor Libri Regum, & duo Libri Paralipomenon, sed etiam Historiæ Gentilium. *Salmanazaris* siquidem, Regis Assyriorum, nomen in Tyriorum Archivis ad sua usque tempora extitisse testatur *Iosephus* Lib. VII. *Antiq. Judaicarum* cap. 14. *Sennacheribi* verò, Regis etiam Assyriorum, qui Judæam propè omnem, exceptâ Hierosolymorum Urbe, subegit, non solum meminit *Herodotus*, lib. 2. cap. 141. sed & *Berosus*, Chaldaicarum Rerum Scriptor, ut testis est *Iosephus* lib. 10. *Antiquitatum Judaicarum* cap. 1. Historia, quæ narratur in Libro *Judithe*, contigit sub *Nabuchodonosore*, Assyriorum Rege, quem viri eruditi opinantur esse *Saoduschinum*, filium *Assaradon*, qui debellavit *Dejocem*, Regem Medorum, cujus antiquitatem nos docet *Herodotus*. Historia Libri *Estheris* incidit in tempora *Artaxerxis Longimani*, Persarum Regis, cujus antiquitas Scriptoribus Gentilibus Rerum Persicarum probè nota est. Testimonia, quæ Propheta *Ezechiel* cap. 14. suæ Prophetiæ, & Scriptor Libri *Tobiæ* cap. 2. perhibent Historiæ, quæ describitur in Libro *JOB*, argumento sunt, germanam esse antiquitatem Historiæ *JOB*. Porro, Historia Machabaica, duobus Machabæorum libris comprehensa, repræsentat Statum Judæorum sub Regibus Syro-Macedonibus, qui, post *Alexandrum Magnum*, regnarunt in Ægypto, & in Syria, quorum Regum antiquitatem notissimam facit Historia Gentilium. Patet itaque, quidquid contrà obstrepat modò infideles, virique increduli, Veteris Testamenti Libros, ex quibus Christiani multa decerpunt testimonia ad probandum Jesum Christum esse verum Messiam, antiquos esse, eosque innotuisse Gentilibus, qui in suis Scriptis, Historiis, Monumentis & Annalibus multa inseruerunt, quæ Librorum Veteris Testamenti Antiquitatem manifestò demonstrant.

Hæc sentis ex perpetuo, sibi que semper constanti omnium Judæorum consensu, ex Gentilium Scriptorum testimoniis, Monumentis, Historiis, & Annalibus, sat superque Librorum Veteris Testamenti, ex quibus Christiani probant, Jesum Christum esse verum Messiam, asserta ac vindicata manet antiquitas, quippe quæ, tot, non dicam hominum,

(X.)

sed populorum, inter se moribus, doctrinâ, & religione discrepantium, testimoniis confirmatur. Nunc alio non minus efficaci argumento adversus Infideles, virosque incredulos probandum suscipio, hæc vaticinia, quibus Christiani evincunt, Jesum Christum esse verum Messiam, non fuisse datâ operâ à Christianis, sicut blaterant Infideles, virique increduli, excogitata, sed nequidê à Christianis excogitari potuisse, etiamsi certatim omnes (quod prorsus incredibile est) in hanc execrabilem fraudem conspirare voluissent. Verum enim verò, si hæc vaticinia à Christianis fuissent conficta, hæc sacrilega fraus, seu fictio, alios haud potuisset habere Auctores, quàm primos Christianos, qui temporibus Christi vixerunt, seu Apostolos & Evangelistas, qui Jesu Christi Historiam scripserunt, & in eo, tanquàm vero Messia, omnia Prophetarum Oracula completa esse, ubique prædicarunt, litterisque consignarunt; Atqui hæc vaticinia non fuisse ab Apostolis, & Evangelistis ad decipiendos homines de compacto excogitata, duplici momento demonstrari potest. Primò, quia Apostoli & Evangelistæ Res, quas ipsi oculis viderant, manibus contrectaverant, & in maxima omnium luce gestas, tanquàm testes corâvi, sine fucò & fallaciis, sed sincerè ac fidelitèr narra-
rant. Erant enim viri boni, simplices, ingenui, candidi, probatissimæ fidei, qui à mendacio cum penitus abhorrerent, fraudes ad alios in errorem pertrahendos texere, & mendacia proferre nolebant. Illorum simplicitas tum in moribus & perpetuo vitæ tenore sese prodit, tum etiam palàm elucet in ipso scribendi stylo, seu in eorum elocutione, quæ non est exquisita, & affectata, non in verborum delectu, & aptâ illorum collocatione posita, sed potius rudis & impolita, in qua verba non ornant res, sed ipsa rerum sublimitas, & Mysteriorum, antehac omnibus sapientibus absconditorum, magnitudo & sublimitas mentem Scriptoris & verba supra humanum modulum rapiunt, ita ut vel ipso, quo utuntur, scribendi modo appareat, eos instrumenta quædam & organa impolita fuisse, à quodam superiori mente mota, & ita adhibita, ut eloquii simplicitas respondeat quidam instrumento, sed rerum magnitudo, & Mysteriorum revelatorum sublimitas tribui debeat superiori menti infirmo utenti instrumento. Quò fit, ut nullus sanæ mentis homo suum in animum inducere possit, Apostolos, & Evangelistas, viros, ut certissimè constat, magnâ ex parte rudes, & illiteratos, à pueritia aut artifices, aut piscatores, potuisse proprio Marte, & de cerebro suo hæc de venturo Messia confingere vaticinia, tamque sublimem & admirabilem excogitare doctrinam, ad quam comparata præstantissimorum superstitionis olim gentilitatis Philosophorum doctrina, puerilis apparet. Akerum momentum ad probandam bonam fidem Evangelistarum in describendâ Historiâ Jesu Christi suppeditant ipsimet Scriptores Gentiles, qui Historiæ *Jesu Christi*, ab Evangelistis descriptæ, veritatem agnoverunt, & ei testimonium præbuerunt, quod certè Infideles, virique hujus temporis increduli,

(XI.)

duli, qui Judæorum, & Christianorum Libris omnem fidem abrogant, rejicere non possunt. At enim, Evangelistæ referunt in primis, *Jesum Christum* natum esse in Bethleem. Id verum esse fatetur *Celsus*, Gentilis Scriptor, & acerrimus Christiani nominis insectator. Ex Tabulis etiam Censualibus Romanorum, ad quas Fidei Christianæ adversarios provocant *Iustinus*, *Origenes*, *Tertullianus*, & *Chrysostomus*, necnon ex Censu illo, quem, nascente Jesu Christo, indixit Imperator *Augustus*, apertissime constat, *Jesum Christum* natum esse in Bethleem. Præterea, narrant Evangelistæ, *Jesum Christum* vixisse in Judæa, imperante *Tiberio*, eumque sub *Pontio Pilato* mortis supplicio fuisse affectum. Id verum esse agnoscunt Gentiles Scriptores, *Suetonius* in Vita *Claudii* Imperatoris, *Cornelius Tacitus* libro xv. Histor. ubi ait: *Auctor nominis ejus* (id est, Christianæ Religionis) *Christus*, qui, *Tiberio* imperitante, per Procuratorem *Pontium Pilatum* supplicio affectus erat. Prætermitto *Acta Pilati*, ad quæ olim Christiani remittebant Fidei hostes, & in quibus multa de passione & morte Jesu Christi referuntur, quæ Historiæ Evangelicæ sunt omnino consentanea. Tertiò, scribunt Evangelistæ, Stellam in ortu Jesu Christi micantem apparuisse, Magos ex Oriente ad Cunas Jesu Christi accessisse, & *Herodem*, regnantem in Judæa, ut Jesu Christo, recens nato, necem inferret, satellites misisse & maximam infantium edidisse stragem. Hæc autem vera esse Gentiles Scriptores suis testimoniis approbarunt. *Julianus* siquidem, Imperator apostata, & Gentilismo addictissimus, fatetur, novum in Nativitate Jesu Christi sidus in Cælo præfulsisse, & ad eum Magos ex Oriente venisse. *Chalcidius*, Platonicus, & Scriptor Gentilis, in Commentario ad *Timæum*, ait: *Est quoque sanctior ac venerabilior historia, quæ perhibet, ortu Stellæ cujusdam, non morbos, mortesque denunciatas, sed descensum Dei Venerabilis ad humanæ conversationis, rerumque mortalium gratiam: quam Stellam, cum nocturno itinere inspexissent Chaldearum profecti Sapientes viri, & consideratione rerum cælestium satis exercitati, quævisse dicuntur ortum Dei, reperitque illâ Majestate pueri, veneratos esse, & vota Deo convenientia nuncupasse*. Crudelem verò Infantum Cædem, quam in nativitate Jesu Christi edidit *Herodes*, truculentissimus Judæorum Rex, his verbis *Macrobius*, Scriptor Gentilis, cap. 4. lib. 2. *Saturnalium* describit: *cum audisset Augustus, Imperator, inter pueros, quos in Syria Herodes, Rex Judæorum, intra biennium occidi jussit, filium quoque ejus occisum, ait: melius esse Herodis porcum esse, quam filium*. Quartò, Evangelistæ produunt miracula, quæ *Jesus Christus* potenti virtute patravit. Hanc autem Evangelistarum narrationem falsi non arguunt Gentiles Scriptores, sed potius *Julianus*, Imperator Apostata, ut videre est in libro sexto, quem *S. Cyrillus* contra illum scripsit, loquendo de operibus Jesu Christi, ait: *nisi quis existimet inter maxima esse opera claudos & cacos integritate restituere, & demonio correptos adjuvare in Vicis Betsaida aut Bethania*.

(XII.)

Alter Scriptor Gentilis, seu *Celsus* (teste *Origene*, in libro secundo, quem contra hunc Gentilem lucubrauit) sic alloquebatur Christianos: *Credidistis eum*, seu Jesum Christum, esse filium Dei, quod claudos & cecos sanavit. Tertius Scriptor Gentilis, seu *Porphyrius*, in libro, quem adversus Christianam Religionem vulgavit, & cujus testimonium refert *Eusebius* libri 5. *De preparatione Evangelica* cap. 1. confitetur, ex quo *Jesus coli captus est*, neminem sensisse publicam Deorum opem. Egregium etiam de Christo, & de Christianorum moribus testimonium dat *Plinius Junior* in Epistola, quæ est Libri 10. nonagesima septima, cujus meminere *Tertullianus* in Apologetico, & *Eusebius* in Chronico. Quin & ipse *Mahometes* miracula à Jesu Christo edita fuisse confitetur in Alcorano, ubi etiam ait, Jesum Christum esse verum Messiam, Prophetarum Vaticiniis prædictum, eumque nuncupat *Verbum Dei, Spiritum Dei, natum ex Maria Virgine absque virili semine: Prophetam eximium*. Consultò prætermisi locupletissimum testimonium, quod de Jesu Christo, ejusque Miraculis *Iosephus*, Hebræus, cap. 4. lib. 18. *Antiquitatum Judaicarum* profert, quia infideles, virique hujus temporis increduli, cum quibus hanc disputationem suscepi, rejeclis Judæorum perinde ac Christianorum testimoniis, uni dumtaxat Gentilium Scriptorum judicio stare volunt, ad illorum Tribunal appellant, nec aliis, quàm Gentilium Scriptorum testimoniis se convinci posse perpendunt. Misso itaque eo perillustri de Jesu Christo, ejusque miraculis testimonio *Iosephi*, Hebræi, unum hic tantummodò inferam testimonium *Phlegontis*, Scriptoris Ethnici, qui Eclipsis, seu defectiois Solis, quam, moriente Jesu Christo, contigisse memorant Evangelistæ, sicut & Terræ motus, meminit in Libro 13. *Olympicorum Chronicorum*, ubi hæc habet: *Quarto anno Olympiadis CCII. maxima & excellens inter omnes, quæ antea acciderant, defectio solis facta: dies horâ sextâ ita in tenebrosam noctem versus, ut Stellæ in Cælo visæ sint terræque motus in Bithynia urbe multas aedes subverterit*. Ex his, & aliis id genus, quæ faciliè adduci possent, Scriptorum Gentilium testimoniis liquet, eos de probitate, ac sinceritate Evangelistarum nihil addubitasse, & in multis factis Historicis, quæ de Jesu Christo memoriæ prodiderunt, litterisque consignarunt Evangelistæ, dictis suis, ipsâ rei veritate convictos, fidem conciliasse. Hoc tamen, proh dolor! densissimo imbre telorum ac testimoniorum, quæ petuntur à Gentilium Scriptorum Libris ad adstruendam bonam fidem Evangelistarum in describenda Historia Jesu Christi, non obruantur, non vincuntur, non ad meliorem frugem revocantur Infideles, virique hujus temporis increduli, sed potius nativis suis tenebris oblectari, & erroribus pervicacius adherentes, non solum Evangelistarum fidem in dubium revocant, sed eos tanquàm viros astutos, & perfidos impostores traducunt, à quibus ajunt, fuisse deditâ operâ ad illudendos simplices procusa vaticinia, quæ postea falsò antiquis Prophetis attributa, in Jesu Christo, tanquàm in vero Messia, Prophetarum

(XIII.)

phetarum Oraculis prædicto, completa esse ubique prædicant. Hoc est ultimum Infidelium & impiorum effugium, in quo totius incredulitatis suæ proram, ut ita loquar, puppimque constituunt, quod nunc illis omnino præcludere debemus, ut inde semel exturbati, nullum possint invenire locum, in quo valeant tutò figere pedem. Ne autem querantur Infideles, Virique hujus temporis increduli, me cum illis durioribus conditionibus agere velle, duobus dumtaxat peremptoriis argumentis eorum incredulitatem ita confutabo, ut tandè, velint nolint, fateri cogantur, sincera & antiqua esse Prophetarum Oracula, quæ in Jesu Christo, vero Messia, fuerunt completa, nisi malint in suis plusquam Cimneriis tenebris jacere confepulti, & fulgentissimæ, radiisque, ut ita dicam, solaribus descriptæ veritati perfidum pectus mentemque pertinaciter occludere, quàm doctrinæ Evangelicæ præbere assensum, qua in re se se omnium hominum dementissimos proderent, planèque indignos, qui ratione & argumentis vincantur. Ostendam itaque in primis, Apostolos & Evangelistas, etiamsi non fuissent viri probi, simplices & ingenui, sed potius viri astuti, callidi, & ad mendacia, falsaque ad decipiendos homines excogitanda vaticinia à natura & arte comparati, nihil secitis non potuisse, licèt voluissent, licèt occultis machinationibus id tentassent, tantaque fraudis nectendæ ac concinnandæ capaces extitissent, mendacia, falsaque Vaticinia pro veris ac sinceris venditare. Deindè, demonstrabo, eventum circa prædicationem Apostolorum, circa Historiam Jesu Christi, ab Evangelistis descriptam, ac denique circa Vaticinia, quæ in Jesu Christo exitum habuisse testantur Apostoli & Evangelistæ, manifestò probare, Apostolos non fallaces deceptores, sed sincere doctrinæ Evangelicæ fuisse præcones, Historiam Jesu Christi summo cum candore ab Evangelistis esse descriptam, postremò, Vaticinia, quæ in Christo Jesu completa esse asserunt Apostoli, & Evangelistæ, non fuisse ad deludendos homines, de industria ab illis consicta, atque fabricata, sicut per summam impietatem effutunt Infideles, Virique increduli, sed esse antiqua & genuina Prophetarum Oracula. Et primò, qui credibile est, Apostolos & Evangelistas conjurare potuisse, ut mendacia fingerent, falsaque confarcinarent Vaticinia, quibus totum orbem in errorem pertrahere possent? quæ enim, amabo, spes esse potuisset, neminem ab eo consilio, periculi alexque pleno, fore alieno animo? neminem intercessurum, neminem occultam illam fraudem proditurum? Quis tam bonus, ut credat, potuisse ab Apostolis & Evangelistis clam suscipi & executioni mandari tam nefandum consilium, quod si resciretur, nonne prævidebant, fore ut, cum nihil omnino assequerentur, parti suæ præjudicium afferrent, si se faterentur, eam fovere causam, quam sibi probè conscii essent, non alitèr posse se quàm fraudibus, confutis mendaciis, & adulterinis Vaticiniis defendere? Id profectò consilii Apostolos & Evangelistas suscipere potuisse, ab omni veri specie penitus abhorret.

Præ-

(XIV.)

Præterea, quæso, quâ fronte Apostoli & Evangelistæ hæc à seipsis conficta de venturo Messia Prophetarum Oracula obirudere, in apertam lucem producere, omnibus passim inculcare, luteris mandare, eaque ipsismet Judæis proponere potuissent ad probandum Jesum Christum esse verum Messiam, Prophetarum Oraculis prædictum? Numquid Judæi, qui Jesum Christum, velut Messiam, Prophetarum Oraculis prædictum, agnoscere obstinatis animis detrectabant, quique Apostolorum prædicationibus oblucebantur, & ad exterminandam nascentem Christianam Religionem Superos & Acheronta movebant, facile retexissent, ac semel retectam propalassent tam insignem Evangelistarum & Apostolorum fraudem, eosque omnibus Gentibus deridendos propinascent? Habebant siquidem Judæi penes se Libros Prophetarum tam in veteri Textu Hebræo, quam in Versione LXX. Interpretum, aliisque Versionibus, quæ tum temporis circumferebantur, & omnium Judæorum terebantur manibus. Hos Prophetarum Libros Judæi, potissimum Christianæ Religionis, quam cane pejus & angue odio habebant, propagatione excitati, diligentius lectitabant, pervolvebant, examinabant, ac subindè Apostolorum & Evangelistarum, in his excogitandis Vaticiniis fraudem confestim perspectâ habere potuissent, eam ob oculos omnium posuissent, Apostolis & Evangelistis, tanquam impostoribus fidem abrogassent, eisque jure optimo omnium Nationum invidiam, odium, & contemptum conciliassent. Nec suam fraudem ullis artibus celare potuissent Apostoli & Evangelistæ, quia Judæi palam ostendissent, ejusmodi Vaticiniorum de venturo Messia, quæ fuissent ab Apostolis & Evangelistis excogitata, ne volam quidem ac vestigium reperiri in Prophetarum Libris, quos omni ævo illibatos incredibili studio conservarent Judæi, & quorum auctoritatem, antiquitatem, revelationem & inspirationem nullo pacto inficias ire potuissent Apostoli & Evangelistæ. Porro, constat, nunquam Judæos Apostolis, Evangelistis, aliisque Christianis hanc fraudem vitio ac crimini vertisse, sed potiùs ex antiquis & probatæ fidei monumentis evincitur, innumeros Judæos ad prædicationem Apostolorum incunctanter Fidem, & doctrinam Jesu Christi, tanquam veri Messie, Prophetarum Vaticiniis prædicti, fuisse amplexos, adeò ut (æste Eusebio lib. 3. Historiæ Ecclesiasticæ cap. 31.) à temporibus Apostolorum usque ad *Hadrianum*, Imperatorem, qui Judæos simul & Christianos Hierosolymis expulit, universa Hierosolymitana Christianorum Ecclesia ex solis Judæis, qui Christianæ Religioni nomen dederant, coaluerit, & ab eis fuerit gubernata.

Eodem argumento evidentè firmatur & stabilitur veritas Historiæ Evangelicæ circa multa Facta Historica, quæ à Prophetis Veteris Testamenti longè antea prædicta, in Jesu Christo, vero Messia, completa fuisse ita referunt Evangelistæ, ut prorsus impossibile sit, ea potuisse ab illis fingi & excogitari, etiamsi ipsi in concinnanda Historia Jesu Christi homi-

(XV.)

homines mendacis decipiendi fixum, ratum ac deliberatum iniissent consilium. Ea quippè Historica de Jesu Christo Gesta, ab Evangelistis relata, non contigerunt in aliquo angulo terræ, nec à paucis, ignotis, & suspectis testibus visa, sed in ipsa Hierosolymorum urbe, in maxima, omnium luce peracta sunt, ab infinitis penè testibus perspecta, in tota Judæa exploratissima, & constanti famâ longè latèque celebrata, quæ ab Evangelistis narrantur cum singulis circumstantiis, indicatis etiam personis, temporibus & locis, in quibus acta sunt, & ubi recentissima adhuc erat eorum memoria. Aliquot hic exempla ex Historia Evangelica, sed pauca tamen, velut ex infinita sylva, producam, ut liquidiùs fiat, non potuisse Evangelistas, etiam si voluissent, ea fingere Gesta, quæ de Jesu Christo narrat in Historia Evangelica. At enim, narrat Evangelista, nato Jesu Christo in Bethleem, sicut de venturo Messia vaticinati fuerant Prophetæ, Magos, præcunte stellâ, ab Oriente venisse Hierosolymam, inquirentes, ubi natus esset Rex Iudæorum? addunt idem Evangelistæ, *Herodem*, Regem Iudæorum, ad Magorum adventum, de nuncio ortus novi Regis cum universa Hierosolymâ perterritum, percontatum fuisse à Principibus Sacerdotum, & Scribis, qui erant Hierosolymis, ubi Christus, seu Messias, nasci deberet? cumque ab illis Responsum accepisset, quoddam Christum, seu Messiam, juxta Prophetarum Oracula, in Bethleem, nasciturus esset, protinus crudelissimum illum Regem, ut Jesu Christo recens nato mortem inferret, suos misisse Satellites, qui omnes bimulos puerulos in Bethleem trucidarent, illudque tam immane *Herodis* Regis Edictum executioni mandatum esse, & atrocissimam Infantum editam stragem in Bethleem, & in finibus ejus. Hæc Facta Historica tam manifestis circumstantiis expressa, apertè produnt candorem & bonam fidem Evangelistarum. Quis enim sibi persuadeat, Evangelistas, & Apostolos, qui Hierosolymis cum Judæis, suis æmulis, convivebant, potuisse fingere ea Facta Historica, quæ in ortu Jesu Christi, in ipsa Hierosolymorum urbe, inspectantibus Judæis, & ad tantæ rei novitatem, a tonitis, accidisse narrant, nec illos timuisse, fore ut falsi statim convincerentur ab innumeris Judæis, qui tum temporis adhuc Hierosolymis superstites erant, & quibus subindè ea, quæ in ipsa Hierosolymorum urbe publicè gesta ac visa fuerant, apprimè nota esse debebant, præferim in re tam magni momenti, quæ illorum Judaicam Religionem spectabat, quâ, secundum Deum, nihil prius & antiquius habebant. Certè, qui norunt genium, indolem & Artes Impostorum, sciunt, ipsos, dum quædam Facta Historica, vel prodigia, quæ ad alios decipiendos, finxerunt, narrant, solere, ne eorum malè conclusæ fraudes detegantur, discutere, hæc Facta Historica, & prodigia, quæ memorant, & inani verborum, tinnitu, magnoque vanæ eloquentiæ apparatu exaggerant, non in locis vicinis ac notis, non in conspectu omnium edita fuisse, sed in remotissimis, planèque ignotis Regionibus contigisse, quorum testes, ut facili-

fu-

(XVI.)

fucum faciant, proferunt non homines adhuc superstites, à quibus falsitas dignosci posset, sed Viros nemini notos, vel personatos, vel jam vitam functos, à quibus de falsitate rerum, quas venditant, nihil omnino resciri possit. Sic pinguioris vulgi mentes suis præfigiis, anilibusque fabulis afficiunt callidi impostores, & pessimi nebulones, à quorum malis artibus Apostoli & Evangelistæ, cum penitus alieni fuerint, sicut ex eorum vitæ serie, & simplici rerum gestarum narratione constat, fides illorum vacillare ac laborare non potest. Præterea, Evangelistæ, dum innumera penè referunt miracula, quæ Jesus Christus ad probandum, se esse verum Messiam, Prophetarum Oraculis prædictum, patravit in Judæa, ajunt, Jesum Christum è quinque panibus & duobus piscibus satiassè quinque millia hominum, nominant eos, quos Jesus Christus è mortuis ad vitam revocavit, Ex. Gr. filium unicum Viduæ civitatis Naim; filium *Tairi*, Archisynagogi, & *Lazarum*, jam à triduo in Sepulchro fixientem, & à Jesu Christo in Bethania à mortuis suscitatum, & plurimis testibus visum, cum quibus etiam manducavit, & miscuit colloquia. Testantur insuper iidem Evangelistæ, Velum Templi Hierosolymitani in morte Jesu Christi duas in partes scissum esse, Terram insolito motu concussam, tamque insolentem accidisse Solis defectionem, ut à sexta hora usque ad nonam tenebræ factæ sint in universa Terra; tertio autem die ab obitu suo Jesum Christum propria virtute è Sepulchro, quod milites, ad petitionem Judæorum missi à *Pilato*, summâ sedulitate noctu diuque excubantes custodiebant, vivum emeruisse; cum Apostolis suis post resurrectionem per quadraginta dies comedisset, sermonem habuisset, à quingentis plusquam hominibus visum esse; *Thome*, Apostolo suo, dubitanti, an verè ad vitam rediisset? permisisse ut suum digitum in ejus laevis apertum inferret; ad Discipulos suos unâ Hierosolymis congregatos quinquagesimo die post Resurrectionem suam misisse, quem eis promiserat, Spiritum Sanctum, per cujus illapsum acceperunt donum omnium Linguarum, adeò ut in ipsa Hierosolymorum urbe ab omnibus peregrinis Nationibus, quæ huc confluerant, audirentur magnalia Dei variis Linguis loquentes. Denique, Sacri Evangelistæ profitentur, Jesum Christum quadagesimo die post Resurrectionem suam coram omnibus Discipulis suis Angelorum myriadibus seiparum ascendisse in Cælum. Hæc, & alla id genus facta Historica, quæ spectant vitam & miracula Jesu Christi confingere non potuerunt Apostoli & Evangelistæ, quia illa miracula, ut ipsimet testantur, Jesus Christus patravit non clanculum, non coram paucis fideisque testibus, sed in tota Judæa, in ipsa Hierosolymorum urbe, vel in ejus urbis vicinia, coram innumeris testibus Judæis, qui ei adversabantur. Facile itaque poterant Judæi, qui Hierosolymis erant, explorare veritatem, vel falsitatem eorum, quæ de Jesu Christo ab Apostolis & Evangelistis vulgabantur, magni etiam Judæorum, qui retinendæ suæ Religionis erant tenacissimi, intererat, ut, si falsa

(XVII)

fuisſent quæ de Jeſu Chriſto publicabantur miracula, manifeſtam omnibus Nationibus redderent Apoſtolorum & Evangeliſtarum fraudem, palamque oſtenderent, Jeſum Chriſtum in Judæa, & in ipſa Hieroſolymorum Urbe, nulla edidiſſe miracula, nec mortuis reſtituiſſe vitam, meraque ſomnia, & commenta eſſe, quæ de teſtibus miraculorum Jeſu Chriſti, de ſtupendis prodigiis viſis in morte Jeſu Chriſti, de militibus à Pilato ad cuſtodiendum Sepulchrum Chriſti miſſis, de teſtibus Reſurrectionis, & Aſcenſionis Jeſu Chriſti, & de dono Linguarum Apoſtolis per illapſum Spiritus Sancti, conceſſo narrant Evangeliſtæ. Hæc, inquam, omnia, quæ in deſcribenda Jeſu Chriſti Hiſtoria Hieroſolymis & in Judæa accidiſſe teſtantur Evangeliſtæ, an vera, vel falſa eſſent, nullo negotio ſcire poterant Judæi, qui Hieroſolymis erant, quæ ſi falſa comperiſſent, conſeſſim, ut erant in Chriſtum, ejuſque diſcipulos iræ & odio perciti, Apoſtolos & Evangeliſtas falſi redarguiſſent, eoſque, tanquam infames & publicos Impoſtores, totius nationis Judaicæ teſtimonio declaraiſſent, quod tamen cum nunquam fecerint Judæi, ad fabricandam contra Apoſtolos calumniam alioqui promptiſſimi, eorum hac in re alium ſilentium argumento eſt, eos nec miracula Jeſu Chriſti, nec alia ab eo geſta, quæ in Hiſtoria Evangelica deſcribuntur, occultare, aut negare potuiſſe, quia de eorum veritate ſibi conſcii erant. Quod quidem, adeo verum eſt, ut innumeri Judæi, ſicut antea dicebamus, qui Chriſtum Hieroſolymis docentem, & poſtea cruci ſuffixum viderant, Chriſtianam Fidem, tot rerum à Jeſu Chriſto geſtarum, totque illius miraculorum, veritate conviſti, amplexi fuerint, & Hieroſolymis Chriſtianorum conſtituerint Eccleſiam, quæ perduravit uſque ad Imperatorem *Hadrianum*, à quo Judæi, perinde ac Chriſtiani, Hieroſolymis expulſi ſunt. Incredible quippe eſt, illos Judæos, qui Chriſtum viventem noverant, & morientem conſpexerant, voluiſſe, relicto Judaïſmo, Chriſtianam Fidem ſuſcipere, niſi rerum, quas à Jeſu Chriſto geſtas referunt Evangeliſtæ, illiuſque tam in vita, quam in morte, miraculorum veritatem compertam ac exploratam habuiſſent. Alioqui, illi Judæi, qui vitæ & mortis Jeſu Chriſti erant teſtes oculati, ſi nulla miracula tam in Judæa, quam Hieroſolymis, ubi præſentes aderant, à Jeſu Chriſto patrata viſiſſent, tanquam mendaciorum architectos execrati fuiſſent Apoſtolos & Evangeliſtas, Chriſtianamque Religionem his mendacis ſuſtutam, aperto Marte oppugnaiſſent, nedum ejus cultores fieri voluiſſent.

At, ſi, præter hæc argumenta, quæ hætenus ad probandam fidem, candoremque Apoſtolorum & Evangeliſtarum, ſive in deſcribenda Hiſtoria JESU Chriſti, ſive in referendis Oraculis Prophetarum, adduximus, ſi, inquam, præter illa argumenta, Infideles, virique increduli animum ſerio advertere velint ad ſtatum, ſeu conditionem Apoſtolorum, ad modum, quo doctrinam Evangelicam, quæ docet, Jeſum Chriſtum Crucifixum verum eſſe Deum, verumque Meſſiam, à Prophetis prædictum, toti

(XVIII.)

Orbi inferere aggressi sunt, & ad illius tam arduū, tamque difficilis ab illis suscepti operis, quod, spectatis naturæ viribus, planè impossibile erat, felicem, faustumque eventum, quem nunc oculis nostris cernimus; hæc si seculò expendant infideles, ac viri increduli, nullus dubito, quin tandè intelligant, & fateantur, Apostolos & Evangelistas non solum fuisse viros probos, candidos ac sinceros, sed etiam à Deo esse electos, potentique virtute munitos, ut illorum ministerio opus istud longè difficilimum, seu doctrinæ Evangelicæ propagationem, ad optatum exitum perduceret, totusque Orbis, Fidei Christianæ fulgentissimâ luce collustratus, Jesum Christum, verum Messiam, Oraculis Prophetarum prædictum, coleret & adoraret. At enim, primò, Apostoli, ut norunt omnes, erant homines viles, idiotæ, pilcatores, crassi & tardi ingenii, quibus nec natalium splendor, nec patris divitiæ, nec potestas, nec Philosophia aut eloquentia auctoritatem conciliabant, &, quod caput est, erant naturâ adeò timidi & meticulosi, ut Jesum Christum, versantem in periculo, metu mortis turpiter deseruerint, & *Petrus*, qui cæteris Apostolis antestabat, ter eum abnegaverit; nihilo secius, pauci illi viles & timidi homines, omnique humano destituti præsidio (post probrosam Magistræ sui Jesu Christi Crucifixi mortem, quæ illos ab ejus doctrina alienare penitus debuisset, si tum temporis se ab eo delusos fuisse intellexissent) velut in alios homines immutati, excusso omni timore, lustrant totum Orbem, lumen Evangelii spargunt, Linguis loquuntur omnium, ab omnibus peregrinis nationibus audiuntur, Philosophorum supercilium, Oratorum eloquentiam, Principum sceptrâ Christo subjugant, errorum tenebras ubique expellunt, saxea corda emolliunt, & tandè (quod certè potentissimæ divinæ gratiæ miraculum est) superbos mortales ac voluptatibus deditos induxerunt ad recipiendam Fidem Mysteriorum, quæ rationi impervia sunt, videlicet ad credendum, Deum unum esse in tribus personis, Deum factum hominem & crucifixum &c. & ad amplectenda Dogmata, quæ perpetuum sensibus bellum indicunt, cujusmodi sunt abnegatio sui ipsius, jugis pœnitentia, contemptus divitiarum, dilectio inimicorum &c. Quis non videt, hic digirum Dei esse, hancque mirabilem, & quasi repentinam Evangelicæ doctrinæ propagationem Deo per ministerium Apostolorum, quos elegit, acceptam referri debere? Neque enim tam mirabile, tamque stupendum opus tentari, aut fieri poterat ab impostoribus, qui homines efficere bonos, pios, & continentēs nec volunt, nec possunt, sed potius præcipitare & deteriores reddere gestiunt. Non opus fuit civilis scientiæ & artis politicæ, à qua penitus alieni fuerunt Apostoli & Evangelistæ; non opus fuit naturæ, quæ sensuum voluptati indulget; non humanæ rationis, quam multis passionum tenebris offusam vanitas & superbia tam faciliè decipiunt; non humanæ potestatis, quæ solum vi armorum vincere potest; sed fuit præstantissimum opus Dei, qui infirma mundi elegit, ut fortia quæque confunderet, qui.

(XIX.)

quique per duodecim piscatores sapientiam mundi confutavit, per paucos subegit omnes mundi nationes, per imbecilles prostravit omnem munitionem attollentem sese adversus Deum, per ignotos & humiles obscuravit universam mundi gloriam, per Oves domuit Leones, per Columbas abegit Serpentes, verbo dicam, universum Orbem in doctrinam Evangelicam pertraxit.

Secundo, candorem & probitatem Apostolorum demonstrat ea, quæ illorum prædicationem subsequuta est, totius Orbis morum, qui antehac depravatissimi erant, immutatio. Gentiles, qui totum penè Orbem occupabant, & quorum supersticiosa Religio jam à pluribus sæculis altas radices egerat in animis sive insipientium, sive illorum, qui Sapientes videbantur, per inextricabiles Idololatriæ tenebras, ante prædicationem Apostolorum, oberrabant, & in sentina omnium vitiorum immerfi, plures Deos admittebant, Bestiis, rebusque vitæ expertibus cultum deferabant, ac pro Diis colebant. Eorum Sacra per totum Orbem terrarum, sicut fatetur ipsemet *Porphyrius*, Scriptor Gentilis, in Libro, quem edidit: *De abstinentia ab esu Animalium*, plena erant crudelitate, Deos suos humano sanguine ubique ferè placabant (quem barbarum morem, nec Græcorum, nec Romanorum mores sustulerunt) Nihil spirabant Gentiles nisi ultionem, vindictam, arma, bella, strages, incendia. Nullam apud illos latrocinia infamiam habebant, Gladiatorum mutæ dilanationes licitæ & honoris loco ducebantur, erantque publica populorum oblectamenta; exponere liberos suos, eosque Dæmoniis mactare, immolare, sacrificare, quotidianum; concubitus marium cum maribus exemplis Deorum suorum defendebant. His abominandis vitiis & turpissimis moribus, ante Apostolorum Prædicationem, conspurcati erant Gentiles, qui tamen, statim ac illis affulgere cepit Lux Evangelica, intellexerunt, inanem esse Deorum cultum, unumque Deum colendum esse in Fide, Spe, & Charitate, in Sanctitate, in Justitia, in Castitate, & in omni bonitate; Jesum Christum Crucifixum, tanquam verum Messiam, Prophetarum Oraculis prædictum, demissis animis non solum coluerunt, summisque honoribus prosecuti sunt, sed etiam Cælestis ejus doctrinæ sanctitatem in suis moribus, vivendique norma exprimere ceperunt, Deo digna sentientes, proprios affectus ad omnem virtutis regulam componententes, erga alios æquitatis exactæ, & perfectæ benignitatis documenta servantes, modestiæ, prudentiæ, continentiæ, cæterarumque id genus Christianarum virtutum præbentes exempla. Hæc certè morum in Gentilibus quasi subitanea immutatio fuit dexteræ Excelsi. Nec enim nisi divinâ virtute fieri poterat, ut tam citò ex Gentilium mentibus revelleretur quod à pueritia imbibierant, quod publico consensu traditum acceperant à Majoribus, eorumque Religio, tot annorum diuturnitate roborata, tot locis, Principum potentia, longè latèque diffusa, tam faciliè ad prædicationem Apostolorum, nullâ

vi armorum opposita, corrueret, & ita corrueret, ut nulla penè superstitione illius gentilitatis habetur impræsentiarum, nisi in Libris, memoria, & Dæmones, quibus serviebant Gentiles ad IESU CHRISTI nomen è corporibus, quæ cruciabant, excefferint, suam compresserint vocem, & interrogati de silentii causa, fateri cōacti sint, nihil se posse, ubi Jesus Christus invocaretur. Mirantur *Cicero*, & *Plutarchus*, suo tempore obtrivisse suorum Numinum Oracula, nimirum quia veritatis Præses, mendacii patrem oppugnaturus, jam jam imminerebat, vel nuper advenerat Leo de Tribu Juda Jesus Christus Salvator noster. Deorum etiam Gentilium vanitatem atque superstitionem, prædictiones & Oracula *Lucianus*, infensus licet Christianæ Religionis hostis, qui sub Imperio *Hadriani*, hoc est, secundo Ecclesiæ sæculo, vixit, falsè ridet, insectatur, & ludibrio habet; ut videre est in ejus Dialogis *De Deorum Concilio*: *De Jove Tragædo*: *De Jove Confutato*, ut jam de ejusdem Scriptoris cæteris *Deorum Dialogis* nihil dicam.

Tertiò, candorem ac sinceram Apostolorum fidem probat ipsa reprobatio Judæorum, qui Jesum Christum, quem Apostoli prædicarunt verum esse Messiam, Prophetarum Oraculis prædictum, agnoscere detrectantes, extorres, miseri, & omnibus nationibus exosi facti sunt, atque per totum Orbem hæc illac dispersi vagantur sine Templo, sine Duce, sine Sacerdote, sine Rege, sine Sacrificio, & ubique propter suam incredulitatem ac diffidentiam durissimæ servituti mancipantur. Hanc Nationis Judaicæ rejectionem, augustissimique Templi Hierosolymitani excidium sæpius Jesus Christus sub multis exemplis, figuris & parabolis Judæis insinuaverat, & tandem clarissimis verbis eis ob oculos posuerat, sicut testantur Evangelistæ, qui terribilem illam Jesu Christi prædictionem de reprobatione Judæorum, & de Templi Hierosolymitani excidio, antequàm accideret, referunt, *Mattheus* Cap. 14. vers. 1. *Marcus* Cap. 13. vers. 1. & *Lucas* Cap. 19. & tamen Judæi, saxa in corde gestantes, credere noluerunt, quamvis Jesus Christus ad eorum perviciaciam superandam nihil intentatum reliquerit, & ne ansam haberent exposulandi cum Deo, quòd, præter meritum, promissis essent frustrati, apud ipsos nasci voluit, quibus erat promissus, decantatus est ab Angelis, prædicatus à Pastoribus, indicatus à Magis, agnitus à Simeone & Anna, demonstratus à Joanne Baptista, æterni Patris Oraculo commendatus, tot miraculis inclaruit, tot beneficiis illos provocavit, apud eos & non apud Gentes, prædicare voluit, uno verbo ad insectenda Judæorum corda nihil non egit, quemadmodum ipse dicit: *Quid potui facere vineæ meæ, & non feci?* nihil tamen his rebus profectum est, quia Judæi invidia, superbiâ & avaritia excæcati, Prophetas occiderunt, Joanni non crediderunt, Jesum Christum dictis & factis persecuti sunt, ejus miracula calumniati sunt Beelzebub, Principis Dæmoniorum, præsidio fieri, Prophetarum de venturo Messia Oracula in Jesu Christo completa fuisse violentis adhibitis in-

(XXI.)

interpretationibus negarunt, & in Apostolos, omnesque Christi Discipulos omni suppliciorum genere sævierunt. Quò factum est, ut Judæi, suâ culpâ rejeçti, à Jesu Christo hanc justam Sententiam audire meruerint: *Relinquetur Domus vestra deserta.* Hanc proximè futuram Templi Hierosolymitani ruinam, & Gentis Judaicæ reprobationem, & imminentes calamitates non solum prædixit Jesus Christus, sed etiam ejus Apostoli *Petrus, & Paulus*, dùm ad supplicium ducerentur, Judæis prænuñciarunt, quippè quæ, teste *Lactantio Lib. 4. Divin. Institut. cap. 21. Futurum esse dixerunt, ut post breve tempus immitteret Deus Regem, qui expugnaret Judæos, & Civitates eorum solo adæquaret, ipsos autem, & fame, & siti confectos obsideret; tum fore ut corporibus suorum vescerentur, & consumerent se se invicem; postremò, ut capti venirent in manus hostium, & in conspectu suo vexari acerbissimè conjuges suas cernerent; violari ac prostitui virgines, diripi pueros, allidi parvulos, omnia denique igni ferroque vastari, captivos in perpetuum terris suis enterminari, ed quòd exultaverint super amantissimum & probatissimum Dei filium.* Itaque post illorum obitum, cum eos Nero [Imperator] interemisset, Judæorum nomen & gentem Vespasianus [Imperator] extinxit, fecitque omnià, quæ illi futura prædixerant. Jam verò, postulo ab Infidelibus, virisque incredulis, qui eventum hujus prædictionis suis oculis cernunt, an poterint Jesus Christus, & ab ipso edocti Apostoli, tam clarè prædicere, ruinam Templi Hierosolymitani, et miserrimum Judæorum statum, si Iesus Christus non fuisset verus Messias, Prophetarum vaticiniis prænuñciatus, vel si falsa fuissent, & ad decipiendos homines excogitata illa, quæ in Jesu Christo completa esse Prophetarum Oracula asserbant Apostoli? Certè, si Jesus Christus non fuit verus Messias, vel si Apostoli ad decipiendos homines falsa commenti essent Vaticinia, tam Iesus Christus, quàm ejus Apostoli fuissent impostores, futura autem non ab impostoribus, sed à solo Deo, vel ab hominibus à Deo inspiratis prædici posse, nemo est, qui non fateatur: *Consistentur Magi, consistentur Arioli, & omnis scientia Secularis Literatura, præscientiam futurorum non esse hominum, sed Dei, ex quo probatur, Prophetas Dei spiritu locutos, quia futura cecinerunt,* inquit Sanctus Hieronymus in caput 2. Danielis. Deindè, quæro ab Infidelibus Virisque incredulis, quorsum Deus Optimus Maximus, qui neminem punit nisi propter præcedentem culpam, in populum Judaicum, quem antea tot gratiis, tot beneficiis, tot prodigiis, specialique amore, ac protectione, dignatus erat, tam acerbis pœnis animadverterit ab illo ipso tempore, quo Judæi Jesum Christum, ejusque Apostolos persecuti sunt, mortique adjudicarunt? Si enim Jesus Christus non fuisset verus Messias, Prophetarum Oraculis prædictus, vel si Apostoli ad illudendos homines falsa de illo jactassent vaticinia, non pœnas Deus Judæis, illorum occisoribus, inflixisset, sed potius debita præmia ac beneficia illis largè manu-

rependisset, quòd tam strenuè contra impostores avitæ suæ Legis, & honoris Dei gloriosam defensionem suscepissent, nunc autem vident omnes, completas esse Jesu Christi, ejusque Apostolorum de excidio Templi Hierosolymitani, & de reprobatione Judæorum prædictiones, vident omnes totam Nationem Judaicam à tempore Passionis Jesu Christi à Deo derelictam, & ad has diuturnas redactam miseras, calamitates, angustias, durasque servitutes, quæ omni tubâ vocalius clamant, Judæos non ob aliud scelus puniri à Deo, nisi quia hæcenus plusquam adamantina perviciacià confiteri nolunt, Iesum Christum, quem occiderunt, esse verum Messiam, Prophetarum Oraculis prædictum.

Quartò, candorem ac bonam fidem Apostolorum & Evangelistarum probant generosus ille, quem semper exhibuerunt, bonorum temporalium contemptus, & heroica illorum in perferendis atrocissimis suppliciis patientia. Apostoli siquidem & Evangelistæ, abjectâ omni spe peritura hujus Mundi consequendi bona aut præmia, videlicet opes, honores & voluptates (nihil horum quippè illis promiserat Iesus Christus, eorum Magister, sed potiùs præmonuerat, illos odio futuros omnibus, flagellandos, morteque tandem afficiendos) Apostoli, inquam, & Evangelistæ, nullâ illecti spe præmiorum, quibus impostores lætari, inescari & deludi solent, per totum vitæ suæ curriculum ignominiam, exilia, carceres, immania tormenta, ac mortem incredibili patientiâ pertrulerunt pro defensione veritatis miraculorum, Resurrectionis & Ascensionis Jesu Christi, totiusque doctrinæ Evangelicæ, quæ omnes Christiani firmiter credunt, Iesum Christum esse verum Messiam, Prophetarum Oraculis prædictum. Dicendum itaque est, aut omnes Apostolos, & Evangelistas certa & evidenti miraculorum, Resurrectionis & Ascensionis Jesu Christi notitiâ præditos fuisse, atque pro veris & indubitatis Prophetarum Oraculis habuisse ea Vaticinia, quæ in Jesu Christo completa esse asseverabant, aut penitus insaniisse omnes Apostolos, & Evangelistas, qui nulla sperantes præmia procuderunt falsa miracula, falsa vaticinia, & pro illorum defensione dira tormenta tam obstinatis animis subire voluerunt, ut à nullo eorum nec famæ jactura, nec suppliciorum terror, nec mortis atrocitas, nec æterna animæ damnatio potuerint unquam hujus falsitatis confessionem extorquere; etiamsi certi essent, se faciliè à Judæis opes, honores, dignitates & gloriam impetraturos, si semel tassi essent, se à Jesu Christo fuisse delusos, & omnia, quæ de illo hæcenus publicaverant, miracula & vaticinia fabulosa esse, & à se ipsis excogitata. Hoc pacto, inquam, si Apostoli & Evangelistæ se gessissent, omni procul dubio dicendum esset, illos infanos & cæco furore fuisse abreptos, & tamen nemo, qui legerit Evangelistarum & Apostolorum Opera, sed præsertim Epistolas S. Pauli, in quibus planè cælestis ac sublimis doctrina relucet, & Lectores in admirationem rapit, eos insaniisse dicet. Sed singamus cum Infidelibus,

(XXIII.)

Virisque incredulis, Apostolos omnes & Evangelistas insaniſſe, eosque furore correptos, pro defensione falſorum miraculorum & Vaticiniorum, in ferrum, ignem, gladios, & in omnia vitæ discrimina proſilire, aſperri-
mamque mortem ſubire voluiſſe; nūquid credibile eſt, innumeros Ju-
dæos, & doctiſſimos Gentiles, Oratores & Philoſophos, qui in primis
Eccleſiæ temporibus Chriſtianæ Religioni nomen dederunt, voluiſſe,
etiā inſanire cum Apoſtoliſ, ſuæ famæ, opum & honorum jaſturam
facere, ſuumque ſanguinem, abſque ullâ vel minimâ præmii ſpe, profun-
dere pro defenſione miraculorum & Vaticiniorum, quæ falſa eſſe, &
ab Apoſtoli� de induſtria ad decipiendos homines excogitata intellexiſ-
ſent? Id ſanè ſuperat omnem fidem, & tamen certiſſimè conſtat, innu-
meros Judæos, & doctiſſimos Gentiles ad Fidem Chriſtianam converſos
in naſcētis Eccleſiæ exordio, dū crudeliſſimis perſecutionibus, ab Ethni-
cis Imperatoribus ubique Chriſtiana exagitaretur Religio, intrepidè pro
veritate miraculorum, & Vaticiniorum, quæ de Jeſu Chriſto profere-
bant Apoſtoli, inaudita pertuliſſe tormenta, omneſque Orbis partes ſuo
conſecraſſe ſanguine, ex quo, tanquàm è ſecundiffimo ſemine, per to-
tum, quâ ſatè patet, Orbem propagati ac multiplicati ſunt Chriſtiani, ne-
dū imminuti. Quin, & ipſi Imperatores Ethnici, qui, tanquàm Lupi,
diu in Chriſtianam Religionem ſavierunt, et Chriſtianorum ſanguine,
univerſum Orbem cruentarunt, poſtea agnis manſuetiores facti, Jeſu
Chriſto, vero Meſſiæ, Prophetarum Oraculiſ prædicto, ſe ſe totos devo-
verunt, ipſius Crucem, olim Gentibus ſtultitiam, in diademate, honoris
cauſâ, ſculptam deferre, eximie felicitariſ et gloriæ loco duxerunt, ni-
hilque tam cordi et curæ habuerunt, quàm ut ejus cultum ubique loco-
rum amplificarent, ut impleretur Iſaiæ Prophetia cap. 49. v. 7. *Reges vi-
debunt, & conſurgent Principes & adorabunt. Ambulabunt Gentes in
lumine tuo, & Reges in ſplendore ortus tui. Reges eorum miniſtrabunt
tibi. Et cap. 52. Super ipſum continebunt Reges os ſuum.*

Quintò, candorem, probitatem, ac fidem Apoſtolorum & Evan-
geliſtarum paſſim probavit Ipſe Deus, qui per Apoſtolos ſtupenda mira-
cula in confirmationem Doctrinæ, quam prædicabant de Jeſu Chriſto,
verò Meſſiæ, Prophetarum Oraculiſ prædicto, facere dignatus eſt. Quæ
miracula tanta tamque evidentia ſunt, ut nullâ tergiverſatione celari,
nullâve cavillatione eludi poſſint, cum non clanculum, ſed in propatulo
facta fuerint, adſpectantibus Judæis & Gentilibus, quorum innumeri,
qui ejusmodi prodigiorum teſtes erant oculati, intruſ à Deo illuminati,
Chriſtianam Fidem amplexi ſunt. Quod ſi hæc Vaticinia, quibus Apo-
ſtoli & Evangeliſtæ probabant, Jeſum Chriſtum eſſe verum Meſſiam,
Prophetarum Oraculiſ prædictum, non fuiſſent vera ac genuina Pro-
phetarum Oracula, ſed conſultò ab Apoſtoli� & Evangeliſtiſ ad homi-
nes in errorem pertrahendos excogitata, nunquàm Deus, qui cum ſit in-
ſinitè bonus & inſinitè ſapiens, vera miracula in confirmationem falſæ
do-

doctrinæ patrari non finit, permisisset, ut Apostoli & Evangelistæ miraculis comprobarent doctrinam, quam ubique prædicabant, videlicet Jesum Christum esse verum Messiam, Prophetarum Oraculis prædictum, quia hæc doctrina falsa fuisset, utpotè non veris, & antiquis Prophetarum Oraculis, sed falsis & recens excogitatis Vaticiniis subnixæ. Cum igitur Deus, qui nec fallitur, nec fallere potest, doctrinam, quam Apostoli de miraculis Jesu Christi, & de Vaticiniis Prophetarum in ipso, tantquam vero Messia, adimpletis, ubique gentium prædicarunt, multis miraculis, velut divinæ autoritatis sigillo, obsignaverit, in dubium revocari haud potest, Jesum Christum esse verum Messiam, Prophetarum Oraculis prædictum, sed potius omnes, qui credunt in Jesum Christum, fidenter in tanta signorum & prodigiorum ostensione cum *Richardo à S. Victore* Lib. I. de Trinitate cap. 2. jure optimo dicere possunt: *Quæ revelata sunt nobis cælis, tam multis, tam magnis, tam miris prodigiis confirmata sunt, ut genus videatur dementia in his vel aliquantulum dubitare. Utinam animadverterent Judei, utinam animadverterent Pagani, cum quanta conscientie securitate pro hac parte ad divinum judicium poterimus accedere. Nonne enim omni fiducia dicere poterimus: Domine, si error est, à te decepti sumus. Ista enim sunt nobis tam signis & prodigiis confirmata, & talibus, quæ non nisi per te fieri potuerint.* Nec causari possunt Infideles, Virique increduli, hæc miracula ab Apostolis edita, malis Dæmonis artibus fuisset patrata; Id, inquam, prætexere non possunt Infideles, Virique increduli, tum quia Apostoli mortuos suscitaverunt, resurrectio autem mortuorum non potest esse nisi à Deo; tum quia etiam per miracula, quæ Apostoli ediderunt, Regnum Satanæ subversum est, Idola contrita, Tempia Deorum solo æquata, falsa Oracula explosa & æterno silentio damnata, signorumque falsitas, quibus Dæmones Gentilibus illudebant, in apertam lucem producta fuit. Quæ de re plura dicemus in paragrapho sequenti, ubi Infidelium, ac Virorum incredulorum objectiones diluamus.

Sextò, candorem, & bonam Apostolorum fidem, nec non cælestem eorum doctrinam, ac potentiam in propagatione doctrinæ Evangelicæ plusquam humanam, manifestat longum latumque discrimen, quod Apostolos Jesu Christi inter & antiquos Ethnicos Philosophos reperitur. Enim verò, Ethnici Philosophi, licet ingenii & eloquentiæ, & eruditionis dotibus præditi, & Principum non rarò benevolentia fulti, & omnibus hominum essent communiter præditi, suam tamen Philosophiam, non dico in humanum genus, sed vel in unam gentem, in unam saltem urbem, vel in unum oppidulum invehere & approbare, & in mores inducere haud usquam potuerunt. Apostoli verò Jesu Christi, numero paucissimi vicerunt multos, infirmi validos, infacundi disertos, Piscatores Philosophos, abjecti Tyrannos & Imperatores, vicerunt inauditi novitate dogmatis consuetudinem toto Orbe receptissimam, & omnium

moribus roboratam. Vicerunt ultrò volentes & libentissimos, tamen contumeliæ, exilia, proscriptiones, Cruces statim illos exciperent. Vicerunt austerissimâ vitæ disciplinâ viros omni voluptatum genere à teneris unguiculis delibutos, & quod antiquis Philosophis Ethnicis ne in mentem quidem venerat, ut suaderent hominibus castitate se obligare, innatas cupidines extinguere, abdicare nuptias, vitæ mortalis pericula de-
scere, vitam sanguinemque veritati tutandæ avidius impendere; id Apostoli hominibus, id adolescentulis, id pueris & puellis persuaserunt. Exindè enim in Christiana Religione castra Virginum, examina Martyrum, de morte, de voluptate, de natura ipsâ triumpharunt. Tot difficultates, tantaque repagula infringere, summarum virium est; sed sine viribus, inopiâ virium, & infirmitate tantum pollere, divinæ planè, & inexplicabilis cujusdam omnipotentis ostentatio est, quæ Infideles, virosque incredulos, de candore, de sinceritate Apostolorum, & de potentia plusquàm humanâ, ipsis, ad propagandam ubique terrarum Evangelicam doctrinam, à Deo datâ, convincere omnino debet.

Septimò, candorem, bonamque Apostolorum & Evangelistarum fidem circâ Prophetarum de venturo Messia Vaticinia, eorumque in Jesu Christo complementum, clarissimè demonstrat mira illa concordia, seu consensio, quæ est inter Libros Prophetarum Veteris Testamenti, & Historiam Jesu Christi ab Evangelistis descriptam. Nam si Infideles, Virique Increduli velint conferre veteris Testamenti typos, & Prophetarum Oracula, quorum illi Jesum Christum delineant atque adumbrant, hæc eundem adventantem velut oculis fidei demonstrant, certissimè comperient, nihil gestum esse à Jesu Christo, quod longè antè non depinxerint Vates illi Divini, nihilque esse in illius doctrina, cui non respondeat aliquis Veteris Testamenti locus, indèque primò intelligent, talem harmoniam, seu concentum Librorum Prophetarum Veteris Testamenti cum Libris Novi Testamenti, seu cum Historia Jesu Christi ab Evangelistis descripta, figurarum Legis cum veritate Evangelii, & Vaticiniorum testatissimæ antiquitatis cum exploratissima rerum longè post gestarum historia, non posse esse solertem, ac subtilem mendaciorum, seu fictarum & commentitiarum fabularum in ordinem distributionem. Secundò fatebuntur, Historiam Evangelicam non fuisse concinnatam à versutis, fallacibus, vasis & malignis hominibus, sed descriptam esse à Viris simplicibus, apertis, candidis, & veritatis cultoribus, qui nihil ex occulto, nihil ex insidiis narraverunt, sed ea dumtaxat, quæ de venturo Messia Prophetæ Veteris Testamenti prædixerant, quæque ipsimet in Jesu Christo, vero Messia, completa viderant, & in conspectu totius Nationis Judicæ gesta erant, litteris mandarunt, adèò ut ex eorum narratione & Historia, quæ cum Libris Prophetarum Veteris Testamenti admirabili concordia quadrat, liquidò constet, eos nec animum habuisse alios decipiendi, nec potuisse, etiamsi voluissent, falsa comminisci Vaticinia

cinia, quin statim omnium Judæorum testimonio tanquam impostores detecti, convicti, ac declarati, in totius Vulgi, omniumque Nationum fabulam abirent. Hanc mirabilem Prophetarum Veteris Testamenti cum Historia Evangelica, in Libris Novi Testamenti exaratâ, concordiam latè ostendemus in nostris Dissertationibus *De Mysteriis & annis Jesu Christi*, quapropter, observare nunc sufficiet, Prophetas prædixisse adventum Messiae, qui ex stirpe Abraham & Jacob, ex Tribu Juda, & Familia Davidis, Regis, proditurus erat, eo tempore, quo à Tribu Juda, seu à Natione Judaica Regnum deficere debebat, post quatuor Monarchias, à Daniele in somnio Nabuchodonosoris explicatas; post Hebdomades septuaginta, ab eodem Daniele memoratas. Addunt insuper Prophetæ hujus adventus Messiae impleti temporis Notas toto Orbe conspicuas, nimirum, ruinam Regni Judaici, cessationem Sacrificiorum, Gentium vocationem &c. Describunt denique circumstantias loci nativitatis Messiae in Bethleem, educationis in Nazareth, prædicationis, doctrinæ, miraculorum, Mortis, Resurrectionis, Ascensionis in Cælum. Hæc sunt, quæ de venturo Messia Veteris Testamenti Prophetæ cecinerunt Oracula, cum quibus perfectissimè consentiunt Libri Novi Testamenti, in quibus Historiam Jesu Christi conscripserunt Evangelistæ, qui pèqui ita clarè ostendunt, hæc omnia Sacrorum Vatum de venturo Messia Oracula in Jesu Christo fuisse completa, ut eorum eventus, semotà omni obscuritate, nunc omnium oculis sit perspicuus. Hæc igitur concordia, quæ reperitur inter Libros Prophetarum Veteris Testamenti & Libros novi Fæderis, in quibus describitur ab Evangelistis Historia Jesu Christi, invictè adstruit sinceram Evangelistarum fidem. Nemo quippè, nisi mente captus, dixerit, hanc concordiam esse contionem, seu fæctionem clandestino impostorum scelere collatam.

Octavò, candorem & integram Apostolorum atque Evangelistarum fidem indubitatam reddit duratio, seu perpetuitas doctrinæ Evangelicæ, cujus factores ac propagatores fuerunt Apostoli, & Evangelistæ. Nam, si Vaticinia, quibus Apostoli & Evangelistæ probarunt, Jesum Christum esse Messiam, Prophetarum Oraculis prædictum, non fuissent vera, & germana Prophetarum Vaticinia, sed falsa, & ab Apostolis, Evangelistisque procusa, non potuisset Christiana Religio, his spuris & commentitiis superstructa Vaticiniis, diu permanere, sed progressu temporis cum non à Deo data & inspirata fuisset, sed ab hominibus inventa & excogitata esset, nullo extrinsecus impellente, dissipata & dissoluta fuisset, siquæ se citò obruisset in occasu, sicut apposuit aiebat *Gamaliel*, qui Judæis, in Generali Concilio congregatis, & ad extirpandam penitus nascentem Christianam Religionem prompta & opportuna media querentibus, respondit: *si est ex hominibus consilium hoc, aut opus, id est Christiana Religio, dissolvetur; si verò ex Deo est, non poteritis dissolvere illud*, sicut legitur in Actis Apostolorum cap. 5. v. 38. & 39. Hinc videmus, potentissima olim

Agy-

(XXVII.)

*Ægyptiorum, Assyriorum, Chaldæorum, Medorum, Persarum, Græcorum & Romanorum Imperia finem tandem aliquandò habuisse, & Gentilium Religionem, tot locis diffusam, suo proprio pondere non interitum fuisse, eandem itaque sortem omni procul dubio nacta esset doctrina Evangelica, seu Christiana Religio, si hæc Vaticinia, quæ in Jesu Christo completa esse affirmabant Apostoli, non fuissent vera & sincera. Prophetarum Oracula, sed supposititia, & ab Apostolis ad decipiendos homines conficta. Atqui tamen Doctrina Evangelica, seu Christiana Religio, à septemdecim & amplius sæculis perdurat, Judæorum artes & machinas fregit, inter multas, easque gravissimas, persecutiones non succubuit, sed crevit; suppliciis ac mortibus aucta, propagata & illustrata est; impiorum Philosophorum oblationes compescuit, Oratorum eloquentiam elinguem reddidit, Magorum præstigias patefecit, Schismaticorum seditiones coercuit, & Hæreticos, execranda disseminantes dogmata, præstravit ac gloriosè debellavit. Tot persecutiones, tot Hæreses, tot tempestates coortæ sunt adversus doctrinam Evangelicam, armatæ Philosophiâ, instructæ eloquentiâ, quædam etiam favore Principum formidabiles, à quibus tamen vinci ac superari non potuit doctrina Evangelica, sed potius quasi saxum, irati maris fluctibus verberatum, stetit hæc tenus immota, semper victrix, ut impleteretur Oraculum Jesu Christi, dicentis: *Et porta inferi non prævalebit adversus eam . . . Ecce vobiscum sum usque ad consummationem sæculi.**

Postremo, candorem Apostolorum & Evangelistarum commendat maximè sublimitas doctrinæ, & vitæ sanctimonia Legislatoris, seu Jesu Christi, qui, licet, secundum hominum existimationem, pauper, humilis, abjectus, creditus Fabri filius, à Principibus Nationis suæ Judaicæ damnatus ut impius, & tandem duos inter Latrones crucifixus, univærsam Orbem, varias in Religiones dissectum, non machinis bellicis, non Philosophorum syllogismis, non Rethorum eloquentiâ, non illecebris voluptatum, non pollicitatione opum, honorum, & divitiarum, sed operum admirabilitate, & perpetuo sanctissimæ & innocentissimæ vitæ tenore, in suam caelestem, & carni sensibusque invisam doctrinam pertraxit, totum genus hominum caelestia docuit, terrena dedocuit, à sensibus avulsit, ad amorem rerum caelestium revocavit, tumultuantes Stoicos repressit, Epicureos abegit, Philosophorum greges aut sibi addidit, aut dissipavit; reconditissimam Philosophiam imperitæ multitudinis animis iniecit, temporalium contemptum, æternorumque amorem Viris carnalibus & perditissimis inspiravit, eisque persuasit, ut omnes suos affectus studiaque sua in solum Deum conferrent, in quo uno & errorum medicina, & virtutum sanctimonia, & summa felicitas posita est. Quis tam cæcus, ut non videat, hæc omnia esse divinæ omnipotentis miracula, quibus toti Orbi innotuit, Jesum Christum esse verum Messiam, Prophetarum Oraculis prædictum, sicut reverà agnitus est, & nunc in uni-

(XXVIII.)

verso Orbe ut verus Deus, & Messias adoratur. Jam verò, si Infideles, Virique increduli totam Jesu Christi inter homines vitam observent, invenient, eam nihil aliud fuisse, quàm morum disciplinam, vitiorum censuram, virtutum normam, paupertatis, humilitatis, immò innocentiae totius exemplar, nihilque Jesum Christum docuisse aut præcepisse, ad quod ipse suo exemplo alios non provocaverit. Præcepit Jesus Christus innocentiam: ipse sic vixit, ut nec subornati testes, cum id variis modis conarentur, reperirent, quod probabiliter calumniari possent. Innocentiae Jesu Christi testimonium perhibuit *Pilatus*, Judæis dicens: *Innocens ego sum à sanguine justii hujus, vos videritis*. Confessus est etiam infelix proditor *Judas*, dicens: *Peccavi, tradens sanguinem justum*. Docuit Jesus Christus mansuetudinem: ipse, instar ovis, ad mastrationem ductus est, suisque pepercit inimicis & pro eis Deum rogavit. Docuit Jesus Christus paupertatem: ipse pro nobis adeò egenus factus est, ut non haberet, ubi reclinarer caput suum. Deterruit Jesus Christus ab ambitione & fastu: ipse discipulis suis lavit pedes, & omnibus omnia factus, accommodavit se se his, quos ad se trahere studebat. Ut homines salvaret, homo factus est, ut peccatores sanaret, cum peccatoribus familiariter versatus est, ut Judæos alliceret, circumcissus est, purificatus est, observavit Sabbata, baptizatus est, jejunavit, vicit mansuetudine, vicit beneficentiâ, vicit ipsâ veritate, vicit miraculis, quibus, coràm innumerâ Judæorum turbâ à se gestis, certissimam fidem adjunxit, nec quidquam ex omnibus suis beneficiis præmii captavit unquam, non gloriam, non opes, non voluptates, non Regnum, sed per Crucis ignominiam assecutus est nomen, quod est supra omne nomen, & dum nullum Regnum, ambiit in terris, meruit Cæli ac Terræ Principatum. Non me fugit, paupertatem, humilitatem, abjectionem, passionem & Crucem Jesu Christi ab Infidelibus, Virisque incredulis ceu stultitiam contemni & irrideri, cum potius ex illis indiciiis Jesum Christum esse verum Messiam agnoscere deberent, primò, quia Prophetæ prædixerunt, Messiam, pauperem, humilem, abjectum, plagis deformatum, & omnibus opprobriis saturatum iri, sicut ostendimus in Dissertatione de morte & passione Jesu Christi. Secundò, quia si Jesus Christus opibus, honoribus, potentiâ, aliisque præfidiis humanis Mundum subegisset, nihil nisi humanum in propagatione doctrinæ Evangelicæ mortalibus ostendisset; sed dum pauper, humilis, abjectus, ab omnibus contemptus & crucifixus universum Orbem in suam doctrinam adduxit; intellexerunt omnes mortales non humanis præfidiis adscribi posse doctrinæ Jesu Christi propagationem, sed soli Deo deberi, qui cordium inclinandorum, & ea quòcumque vult, & quomodocumque vult, vertendi, omnipotentissimam habet potestatem. Tertiò, postquam primus homo, seu Adamus, superbiam à Deo fecerat, voluit Jesus Christus, Verbum Dei incarnatum, exinanire semetipsum, & humilitatem proponere, quam imitaremur. Tam altas enim radi-

(XXIX.)

radices in hominum, præsertim Ethnicorum Philosophorum, animis radices egerat superbia, ut eam nulla alia, quam Dei humanâ carne induti possent compescere humilitas, cui reverâ cervices subdidit genus humanum, ubi vidit inanitam Jesu Christi Deitatem, obnubilatam Majestatem, & summam mortis & Crucis humilitatem, ita ut nullos amplius homines paupertas Jesu Christi offendat, nisi avaros, nec humilitas nisi superbos, nec patientia nisi iracundos, nec Crux nisi delicatos, nec mors nisi timidos. Hi soli, inquam, homines paupertate, humilitate, & Cruce Christi offenduntur, quia ægerrimè ferunt, tanto se pondere urgeri, tanto incitari divini exempli stimulo ad fugam à terrenis ad Cælestia, à temporalibus ad æterna capeffendam, maluntque, pravorum suorum affectuum tenebris occæcati, obtreffare tantæ auctoritati, eamque detreffare penitus, quam illi cedere, & in meliorem frugem retipiscere. Denique, dum Infideles, Virique increduli legunt in Historia Jesu Christi paupertatem, humilitatem, abjectionem, & ignominiosissimæ ejus Crucis supplicium, deberent agnoscere candorem ac bonam fidem Evangelistarum, qui in describenda Historia Jesu Christi cum facilè hæc omnia, quæ, juxta estimationem hominum, nihil ad gloriam Jesu Christi conferebant, portuissent silentio obvelare, vel saltem levi brachio attingere, ea tamen cum omnibus circumstantiis vulgarunt, nihilque celarunt eorum, quæ Jesum Christum pauperem, humilem, abjectum, contemptumque in terris reddiderunt, ut indè palàm omnibus facerent, se in describenda Jesu Christi Historiâ à palpandi assentandique vitio, quod omnibus impostoribus congenitum est, penitus alienos fuisse, seque non propriis affectibus indulgere, vel suis commodis inservire, vel vanam gloriam aucupari, vel fruendo mendacia homines in errorem inducere voluisse, sed soli veritati litasse, eaque dumtaxat, quæ oculis hausserant, omniumque testimoniis erant comprobata, scriptis consignasse. Verùm, hanc Infidelium, Virorumque incredulorum objectionem, è paupertate, humilitate, abiectione Jesu Christi, & ex doloribus, quos in Passione, & in Cruce sua pertulit, petitam, plenius in Paragrapho sequenti diluemus, ubi Objectis Infidelium, ac Virorum incredulorum faciemus satis. Abundè itaque sufficiant hæc, quæ hætenus adduximus momenta, ad probandum, illa Vaticinia, quæ in Jesu Christo fuisse completa affirmarunt Apostoli & Evangelistæ, non fuisse ab illis excogitata, sed esse genuina Prophetarum Oracula, quorum veritatem Cæleste Numen inspiravit, Sancti Prophetæ prodiderunt, Apostoli & Evangelistæ suo sanguine stabilierunt, repentina Religionis Gentilium abolitio, morum totius Orbis, qui corruptissimi erant, immutatio, doctrinæ Evangelicæ per universum Mundum propagatio manifestant, miracula testantur, sanguis Martyrum clamat, ruina & calamitates Judæorum, quas in pœnam illorum in crudelitatis, à tempore Passionis Jesu Christi, quem occiderunt, eis in-fluxit Deus, notissimam reddunt, doctrinæ, vitæque Jesu Christi sancti-tas

tas comprobat, & omnium penè gentium, per quas diffusa est Christiana Religio, consensus extra omnem dubitationis aleam ponit, adeò ut se se omnium hominum dementissimos exhibeant Infideles, Virique increduli, dùm malunt in suis plusquàm Cimmeriis tenebris jacere confepulti, quàm expergisci ad fulgentissimam doctrinæ Evangelicæ lucem, & agnoscere veritatem & antiquitatem Vaticiniorum, quæ in Jesu Christo completa fuisse invictis momentis demonstrant Christiani.

PARAGRAPHUS SECUNDUS,

In quo diluuntur objectiones Infidelium, Virorumque incredulorum, negantium, Jesum Christum esse verum Messiam, Prophetarum Oraculis prædictum.

Cum Infideles, Virique increduli ex humilitate, abjectione & Passione Jesu Christi occasionem sumant negandi Jesum Christum esse verum Messiam, Prophetarum Oraculis prædictum, ab hac objectione diluenda ducemus hujus Paragraphi exordium.

Obijciunt itaque, & dicunt, multa de Jesu Christo doceri à Christianis; quæ ex Historia ejusdem Jesu Christi ab Evangelistis descriptâ apertè falsi convincuntur. In primis, docent Christiani, Jesum Christum fuisse innocentissimum, ab omni peccato immunem, immò impeccabilem; Et tamen Evangelistæ fatentur, Jesum Christum à momento Conceptionis suæ usque ad ultimam vitæ suæ periodum miseriis, calamitatibus, & gravissimis pænis, quas justus Deus fontibus dumtaxat & peccatoribus insigere solet, obnoxium fuisse. Secundò, docent Christiani, Jesum Christum in rebus adversis æquè ac secundis sibi semper constantem fuisse, propositi tenacem, fortem, & imperturbatum; Et tamen Evangelistæ scribunt, Jesum Christum, instante supplicio Crucis, cæpisse tædere, pavere, toto corpore sanguinem sudasse, & ad mortem usque animo fuisse contristatum. Hic autem metus supplicii, vel impendentis mortis timor, non cadit in Virum fortem ac sibi benè conscium, quandoquidem ipsimet Ethnici, *Phocion*, Atheniensium Dux, jam moriturus, & *Socrates*, Philosophus, omnium Judicium calculo damnatus, nihil de vultu semper sui simili demutarunt, sed potius irretortis oculis, interrito vultu, & animis non solum impavidis atque intrepidis, verùm alacribus, quasque gestiientibus, mortem exceperunt. Tertiò, docent Christiani, Jesum Christum, seu Verbum Dei incarnatum, ex summa charitate, quâ dilexit homines, non in aliud carnem humanam induisse, & in hunc Mundum venisse, quàm ut illos, captivitate Diaboli obstrictos, in liber-

(XXXI.)

libertatem affereret, eosque indebita suâ morte Deo exosos reconciliaret; Et tamen Evangelistæ consentiunt, Jesum Christum non tantum mortem suam reformidasse, sed Crucis vel ignominiam, vel acerbissimam, per quam salutem Mundo afferre debebat, exhorruisse; quod sanè prorsus est à charitate alienum, cuius propria vis est, ac munus singulare formidinem omnem procul excludere, alacritatem adferre pro tristitia, nihil ad se spectare, totam ferret aliis profundere. Quo pacto igitur Christiani dicere possunt, Jesum Christum generis humani amatorem silentissimum fuisse, qui non constanter modo, verum etiam timidissimè mortem adierit, & de tuenda vitâ suâ tantoperè fuerit sollicitus? Certè, nihil minus quàm amat, qui seipsum amat. Denique, Christiani docent, Jesum Christum perfectam obedientiam Deo, qui ad redimendum genus humanum moriendi præceptum ei imposuerat, exhibuisse; Et nihilosecùs Evangelistæ narrant, Jesum Christum suam mortem conceptis verbis deprecatum fuisse, Deumque exorasse, ut calicem, quem ei propinabat, ab ipso transferret: *Pater mi, si possibile est; transseat à me calix iste*. Et: *Pater, si vis, transfe calicem istum à me*. Hæc autem oratio Christi, deprecantis mortem, non solum non exprimit absolutissimam obedientiam, sed etiam non solum non exprimit absolutissimam obedientiam, sed etiam non solum non exprimit absolutissimam obedientiam, sed etiam non solum non exprimit absolutissimam obedientiam. Si enim fuisse omnipotens, non orasset, ut à se transferretur calix, quem bibiturus erat, sed illum à se omnipotenti virtute sua amolitus fuisset. Secundo, hæc oratio Jesu Christi his verbis concepta: *Si possibile est; Si vis*, insinuat, Jesum Christum ignorasse voluntatem Dei, & de eius potestate dubitasse. Nam si Christus cognovisset voluntatem Dei, & de eius potestate non dubitasset, hæc verba inter orandum non usurpasset: *Si possibile est; Si vis*; non orasset, quod non volebat Deus, seu translationem Calicis; non orasset quod se novisset non exoraturum; non orasset, ut non occideretur, quia, stante irrevocabili Decreto Dei de ipsius morte, præscivisset occidendum sese. Ex his igitur pænis, & miseriis, quibus in terris obnoxius fuit Iesus Christus, ex illius povere, tædio & tristitia, instante mortis supplicio, atque ex verbis illius, ignominiam Crucis deprecantis, inferunt infideles, virique increduli, falsa esse, quæ de Innocentia, constantia & fortitudine Iesu Christi, de illius charitate, patientia, perfectissimâ obedientia, omnipotentia, & omnigenâ scientia jactare solent Christiani, ac subindè negant, Jesum Christum esse verum Messiam, Prophetarum Oraculis prædictum.

Respondeo ad singula hujus objectionis capita, & ad primum dico, Iesum Christum fuisse innocentissimum, & ab omni peccato immunem, licet miseris, pænisque, quibus, post lapsum Adami, omnes mortales subjacent, voluerit esse in terris obnoxius. Ad redimendum quippè genus humanum Iesus Christus, verus filius Dei, verusque Messias, à Patriarchis expectatus, & à Prophetis prænunciatus, perfectam hominis naturam assumpsit, Corpus sensibile & animam naturalibus passionibus ob-

ob-

noxiam, nec tantum dignatus est hominis accipere conditionem mortalem, verum etiam plurimis malis nostris conflictatam, quemadmodum ipse testatur in Psalmo, *repleta est malis anima mea*, & ad stipulatur Paulus inquiens: *Debit per omnia fratribus assimilari*. Nimium, ea mala naturæ humanæ in se recepit, quibus nobis remedium afferret. Neque tamen recepit omnia. Nam omne malum, aut culpa est, aut ex culpa profectum, quod pænæ malum appellant Theologi. De culpæ nostræ malo, & de virulentis fructibus, qui ex eo promanant, videlicet de ignorantia in intellectu, de malitia in voluntate, de pronitate ad malum in appetitu concupiscibili, & de difficultate ad operandum bonum in appetitu irascibili, de his, inquam, quæ culpæ nostræ malum spectant, nihil prorsus attingit Iesus Christus, verus agnus immaculatus, & solus per se à peccato liber. De nostris verò malis pænæ, tantum accepit, quantum nobis expediebat, & quatenus illius dignitati non derogabat, hoc est, naturæ nostræ mala pænæ in se recepit Iesus Christus, quæ dumtaxat communem hominis lapsi conditionem generaliter consequebantur, cujusmodi sunt infantia, imbecillitas ætatis, sitis, fames, lassitudo, tristitia, dolor, dormiturnitio, & mille nostræ hujus vitæ labores. Hæc mala pænæ, quæ adherent naturæ nostræ, quamquam à primigenia protoparentis nostri Adami labe originem habeant, tamen, quoniam peccata non sunt, & possunt cum summa virtute coherere, Christus cum nostra natura spontè in se recepit, uti pœnam, quâ nostram expiaret impletatem. Ea tamen mala pænæ, quæ communem hominis lapsi conditionem non consequuntur, sed nobis sigillatim accidunt, Iesus Christus, assumendo naturam nostram, in se non recepit, cujus generis sunt morbi, vitia membrorum, vitia mentis, vitia corporis, deformitas, monstrositas, atque his consimilia. Ab his omnibus fuit immunis Iesus Christus, tum quia dedecabant illius dignitatem, tum quia nihil habitura fuerant momenti ad nostram salutem. Nec solum Iesus Christus mala pænæ, quæ communem hominis lapsi conditionem generaliter consequuntur, cum nostra natura in se recepit, verum etiam, naturæ nostræ affectiones, seu passiones, metum, dolorem, spem, gaudium, iram, odium, & reliquas, quæ sint ejusmodi, ut citrà vitium queant consistere, assumpsit, cum hoc tamen discrimine, quod illæ affectiones, seu passiones in nobis propter naturæ nostræ, peccato Adami sauciata, depravationem, sæpius per ignorantiam ferantur in id quod esset repudiandum, refugiant ea, quæ essent expetenda, tenebras offundant menti, præcant rationi, cui parère deberent, quò sit, ut malis, qui illis passionibus non resistunt, vertantur in occasionem materiamque peccandi. At, Iesus Christus, quoniam naturam hominis induit, plurimis quidem incommodis, ex Adami culpa natis, obnoxiam, immunem tamen ab omni depravatione vitiorum, ne poterat quidem affectibus naturæ ad malum sollicitari, quippe qui, uti particeps non erat maculæ genitalis, ita ne reliquiis ejus fuit obnoxius, sed

sed horum naturæ nostræ affectuum quidquid fuit in illo, cessit in cumgulum virtutis, gloriæ ac meritum. Hinc apparet latissimum discrimen, quod intercedit Jesum Christum inter & omnes mortales. Doloribus liquidem, pœnis ac miseriis justo Dei judicio subduuntur necessariò omnes mortales propter peccatum Adami, quod per seminalem propagationem ad omnes ejus posteros viâ ordinariâ transfunditur. At, Jesus Christus, à peccato Adami in vim conceptionis suæ omninò liber, utpotè non pœc seminalem propagationem, sed solâ operatione Spiritus Sancti in utero Virginis conceptus, spontè, libere, nullâque necessitate adactus, naturam nostram unâ cum doloribus, miseriis, ac pœnis, ad redimendum genus humanum, in se recepit. Deindè, affectus, nostri, seu passiones, in omnibus pœsteris Adami ad turpia nituntur, obturbant rationi, & refugiunt ab honestis, non naturæ quidem vitio, sed culpæ, cujus reliquiæ sic penitèns inhæserunt, ut compesci frænarique possint, evelli radicitè nequeant. At, Jesus Christus, qui naturam nostram, nullâ peccati labe vitiatam, assumpsit, non potuit ab affectibus, seu passionibus, quas cum nostra natura suscepit, impelli ad peccatum, nec ejus innocentia vel minimum lædi, offendi aut perturbari. Sed dicunt Infideles, virique increduli: Deus pœnas non infligit nisi fontibus, sub Deo quippè justo nemo miser, quorùm igitur Deus sævissimis pœnis in Jesum Christum, quem Christiani innocentissimum, omnisque peccati expertem prædicant, animadvertit, eumque ignominiosissimæ mortis supplicio affici voluit? Huic Infidelium, Virorumque incredulorum objectioni abundè faciam satis in Dissertatione de satisfatione Jesu Christi, quaproptèr, hic breviter dicam, Deum tam acerbas pœnas à Jesu Christo, licet innocentissimo, exigisse, quia Jesus Christus, videns, nullum purum hominem posse satisfacere justitiæ divinæ offensæ per peccatum Adami, tum quia illud peccatum habebat malitiam infinitam, tum quia persona divina læsa superioris ordinis erat, voluit, inquam, Jesus Christus, Filius Dei, ex flagrantissima charitate, quâ dilexit homines, carnem humanam induere, nostras pœnas in se recipere, se vadem, sponforem, ac fidejussorem pro nobis apud Deum, Patrem suum, constituere, plenamque & exuberantem, profusione Sanguinis sui, qui erat valoris seu pretii infiniti, satisfactio-nem ei exhibere. Hanc fore causam dolorum, quos Jesus Christus, et si innocentissimus, pro reconciliatione generis humani cum Deo, perferre debebat, spiritu prophetico afflatus prædixit Isaias cap. 53. Ubi hæc habet: *Non est species ei neque decor, & vidimus eum, & non erat aspectus, & desideravimus eum, despectum & novissimum virorum, virum dolorum, & sicutem infirmitatem; quasi absconditus vultus ejus, & despectus, unde nec reputavimus eum. Verè languores nostros ipse tulit, & dolores nostros ipse portavit, & nos putamus eum quasi leprosum, & percussum à Deo & humiliatum. Ipse autem vulneratus est propter iniquitates nostras, attritus est propter scelera nostra, disciplina pacis*

nostra super eum, & livore ejus sanati sumus. Omnes nos quasi oves erravimus, unusquisque in viam suam declinavit, & perdidit Dominus in eo iniquitatem omnium nostrum. Oblatus est, quia ipse voluit, & non aperuit os suum, sicut ovis ad occisionem ducetur, & quasi agnus coram tondente se obmutescet, & non aperiet os suum. . . . Propter scelus populi mei percussit eum. . . . & ipse peccata multorum tulit &c. Sola igitur erga homines lapso ardentissima charitas Jesu Christi causa fuit, cur ipse naturam nostram assumpserit, & licet innocentissimus, tot dolores, tam graves pænas, & atrocissimæ mortis supplicium subjerit, alioqui de nobis omnibus miseris peccatoribus actum penitus & conclamaturus fuisset, nullaque resurgendi spes affuisset, nisi Jesus Christus, verus filius Dei, pretium redemptionis nostræ morte suâ Deo, Patri suo, in Ara Crucis pro nobis exolvisset.

Ad alterum Objectionis caput Respondeo, vehementer hallucinari Infideles, virosque incredulos, qui ex tædio, pavore, & tristitia Jesu Christi, instante Crucis supplicio, inferunt, Jesum Christum non fuisse fortem & constantem virum, sed timidum & ignavum, eò quòd mortem reformidaverit. Quid igitur? Infideles, virique increduli fortem & constantem virum negabunt, qui ad ingens malum jam irruens exanimetur? Numquid in eo sitam esse fortitudinem putant, ut homo non sentiat, quæ naturæ suæ sunt molesta insensaque? At istud tantum abest, ut viri fortis existimem esse, ut immanis potius aut stupidi, sui que sensu carentis esse dixerim, sicut constat exemplo vel deploratorum hominum, qui intrepidi sibi mortem consciscunt, vel maleficorum quorundam & miserandorum hominum, quos non raro ad supplicium cum risu ire videmus, joculari in obvios, maledicere Magistratibus, atque omnino quædam facere morituros, quæ solent ebrii. Num istos fortes viros appellabimus, quod nihil expavecant, nihil cruciatu commoveantur? An amentes potius, feroces, ac stupidos? Certè, natura nobis in ipsis vitæ principii nostri charitatem iniecit, ut appetamus ea, quæ incolumitati sunt amica, resiliamus verò ab his, quæ lædunt. Ergò non sentire res naturæ molestas, non est fortitudo, sed eas constanti pectore vincere ac perpeti, subindeque fortis ille jure optimo dici debet, qui periculum aditurus, exhorrescit animo, exalbescit vultu, cui palpitât pectus, cui refugit sanguis, cui gemitum exprimit dolor, immò hoc fortior judicari debet, quòd naturam refugientem vincit. Nam quòd duris rebus ultrò se objicit, virtutis est, quòd expavescit, quòd affligitur, naturæ est. Nemo militem fortiter in acie pugnantem appellabit ignavum, si colorem mutavit, si comæ riguerint, si gemitum ediderit; justè verò ei obijcietur ignavia, si terga verterit, si locum deserat, si clypeum abiciat. Itaque non commoveri periculo mali prementis & instantis, animi est, aut non intelligentis periculum, aut bruti stupidi que. Non sentire malum jam præsens, stipitis est, adeòque non hominis, ut de animantis quidem; neutrum certè viri sapientis. Nemo autem

(XXXV.)

autem fortis, qui stultus. Infantes, ebrii, furiosi, cum eis ferrum excipiunt. Cur ita? Nempè, quia non intelligunt periculum. Neque hoc nomine fortes, sed miseri à nobis indicantur. Jam vend, si nunc Passionis Jesu Christi circumstantias expendamus, invenimus quidè in Jesu Christo reformidationem mortis, trepidationem, in his relinquentibus, quæ erant naturæ amica, reluctantis animi sensum, & id genus alia pavescens animi signa, quæ tamen non impediunt, quominus Jesus Christus heroicæ fortitudinis munus constantè in sua Passione objerit. Enim verò, *Jude*, proditori suo, dixit: *Quod facis, fac citius*. Imminent impietatis Ministri. Adventat proditor cum infelicissima cohorte. Jesus Christus, volens tot Martyrum millia, qui ejus mortem erant imitaturi, exemplo suo instituere, quomodo sese deberent gerere, ubi carnifex dirus urget, ubi sævos intentaret cruciatus, secretum captavit locum, orantibus idoneum, cadere capit, ne sibi displicerent Martyres similia patientes; abiecit se humi, hoc facto docens, non expedire Martyri supplicium adituro, ullis suis inniti viribus aut meritis. Orat Patrem in media tristitia, ut mortem transferret, sed hunc naturæ nostræ, quam assumperat, affectum infirmitatis è vestigio vincit, & se totum paternæ voluntati permittit. Admonet dormitantes Apostolos, ut vigilent, orentque; mox obvium se præbet querentibus, attonitos confirmat, trepidos provocat, proditorem etiam osculo dignatur & amicum vocat, patienter ad occisionem ductus est, non se subduxit, non reluctatus est. Passus est à sceleratis criminibus accusari, passus damnari, obtulit. Blasphemantibus non retulit contumeliam, & oravit pro Crucifixoribus. Quia non videt, istas Passionis Jesu Christi circumstantias omnes nihil aliud demonstrare, quàm Jesum Christum ex assumptæ naturæ nostræ imbecillitate, mortem vicinam horruisse, sed ope divinâ & virtute obedientiæ eandem cum eximia patientiâ & summâ fortitudine subiisse. Non inficior quidè, in multis hoc animi fuisse robur, ut in adeundis periculis nulla malorum metus, ac mortis reformidationis signa ediderint. At, ex his rebus fortitudinis magnitudinem metiri haud debemus, quia expavescere, & non expavescere, est fortibus cum non fortibus, sapientibus cum stupidis & hebetibus commune. Volens autem Jesus Christus nobis in Passione sua relinquere modestiæ, mansuetudinis, patientiæ, & obedientiæ exempla, exhibere argumenta humanitatis suæ, non ostentamenta divinitatis, mortem reformidavit, naturæ nostræ, quam assumpserat, inimicam, quam tamen forti constantique animo oppetiit.

Ad tertium objectionis Caput Respondeo, tantùm abesse, ut hæc mortis reformidatio, quam Jesus Christus tempore Passionis suæ exhibuit, quidquam derogaverit infinitæ ejus charitati, quâ dilexit nos, ut potius illam magis commendaverit, atque illustriorem reddiderit. At enim, idè Jesus Christus mortem reformidavit, idè tædedit, idè sanguinem sudavit, quia homo erat, & quare homo factus est? Nempè,

april

quod ineffabiliter amans hominum genus, illorum naturam cum incommodis, malisque pœnis, quæ cum illa cohærent, non necessitate, sed liberâ voluntate, spontaneoque amore in se suscepit. Nonne igitur quod plura naturæ nostræ incommoda recipere dignatus est Jesus Christus, hoc magis amavit? An non ex omnibus naturæ nostræ malis vel maximum est mortis reformidatio, quam Jesus Christus amore nostri non recusavit? Quod itaque ad mortem instantem (tanquam homo) pavefcit ac tædet, hoc quantò infirmius, quantò dejectius est, quantò naturæ nostræ communi imbecillitati similis, tantò magis amplificat & illustrat amorem Jesu Christi, hæc omnia naturæ nostræ incommoda, malaque pœnæ spontè assumptis. Præterea, qui potuit Jesus Christus mortem amantiùs suscipere, quàm reipsa suscepit? Proditorem familiarem nec à convivio, nec à corporis sui communione seclussit, nec impium ferentem osculum repulit. Quid autem supremo illo sermone, quem cum suis habuit, amabilius? Quid aliud sapit, quàm singularem charitatem nostri? Pluribus autem de causis voluit Jesus Christus in subeunda morte non alacritatem, non animum intrepidum, sed potiùs tristitiam, mortisque ostendere reformidationem. Primò, ut demonstraret, se naturam humanam assumpsisse, ad cujus veritatem asserendam magis faciebat hæc patientia, quàm fortis illa, & animosa supplicii perpassio. Secundò, quia hæc tristitia, mortisque reformidatio, quam exhibuit in Passione sua, magis naturæ nostræ, quam assumpserat, conveniebat affectibus, quibus non tam admirabilis esse voluit, quàm amabilis. Tertiò, nulli gaudii & alacritatis, sed potiùs mæstitiæ & luctus, tam in Passione sua, quàm in toto vitæ suæ cursu dedit Jesus Christus, quia vitam absconditam, & mortem ignominiosissimam pro salute nostra elegit, corpus assumpsit, quo nullum unquàm fuit algoris, ætus, laboris, inedia, doloris impatientius. Animam assumpsit, secundum omnes suas vires, sensus acerrimi. Nihil, ad leniendas ærumnas, quas cum nostra natura suscepit, sibi opitulari voluit sua bona, quorum triplici genere, secundum tres hominis status, erat abundè locupletatus; non purissimam innocentiam, quæ quidè tam à pœnis debebat esse immunis, quàm erat aliena à culpa; non charitatem, quæ amantibus molestiam adimit; non invictum animi robur, quo plerique in perferendis tormentis alacritatem, lætitiæque exundantiam demonstrarunt; non redundantiam gaudii, quo ejus pars superior persundeatur, in partem ipsius inferiorem; non gratiæ plenitudinem, quæ naturæ tollit imbecillitatem; non denique visionem beatificam, seu divinitatis fruitionem, quæ à momento conceptionis suæ vi unionis Hypostaticæ personæ divinæ cum natura humana, potiebatur, quæque in nobis, dum erimus in Patria, arcebit facultatem molesta patiendi. Nihil horum, inquam, sibi passus est opitulari Jesus Christus, sed voluit, ut corpus suum & anima sua ad omnium dolorum sensum integra vigerent usque ad momentum emigrationis. O immensa charitatis Jesu Christi erga

Signa

(XXXVII.)

erga homines ineffabile argumentum ! Quartò, **Jesús Christus** in **Passione** sua non hilaris, non animosus esse voluit, sed tristis, quia, ut superius diximus, hæc tristitia magis quadrabat cum Prophetarum Oraculis, qui **Jesum Christum** sub hac persona maluerunt inducere, ut cum nunc **Agno mansueto** compararent, nunc multis plagis liventem, nunc abjectum, obmutescentem, & omni destitutum humano præsidio repræsentarent; nusquam hilarem, alacrem, erectum, animosum. Hæc Prophetarum Oracula implevit in **Passione** sua **Jesús Christus**, tristitiæ laxans habenas, & amarissimo calice potatus, cujus bibendi alacritatem suis dumtaxat **Martyribus** servavit, pro quibus infirmatum est caput, ut membra fortia evaderent, & in perferendis cruciatibus lætitiâ gessirent.

Ad ultimum Objectionis caput Respondeo, hanc orationem **Jesu Christi**: *Pater si possibile est, transeat à me calix iste*: Et *Pater, si vis, transfer calicem istum à me*, non esse contrariam obedientiæ **Jesu Christi**, ejusque omnipotentis, & scientis, quam habebat de voluntate **Patris** sui, ut moreretur, sed solum voluisse **Jesum Christum** eâ oratione ostendere, duas in seipso esse voluntates, humanam videlicet; quæ propter infirmitatem carnis recusabat passionem, & Divinam, quæ ad subeundam mortem promptissima erat. Quòd enim ait, *si vis*, & *si possibile est*; non est dubitantis, aut ignorantis voluntatem **Dei**, sed naturalem affectum, humanæ naturæ coherentem, submittentis voluntati divinæ, perinde ac si dicat: *Mi Pater, sentio quidam me naturæ humanæ, quam non de te, sed de Matre, assumpsi, natural in affectum, mortis acerbissimum calicem vehementer reformidantem refugientemque; verum, hæc mea, ex parte naturæ humanæ, quam liberè assumpsi, voluntas est, non tua. Hoc enim tibi mecum commune non est, quòd factus sum in similitudinem carnis peccati, & habitu tum animi, tum corporis inventus ut homo. At nihil me movet naturalis iste naturæ, quam assumpsi, affectus, quominus tibi perfectissimè obediam, & ad hauriendam calicem, quem scio à te mihi propinari, sim paratissimus. Carne quidem, quæ imbecillis est, exhorreo, at spiritum, qui promptus est, vehementer sumo. Non vult mori sensus, quia mors insensæ naturæ; sitit mortem spiritus, quippè qui generis humani sitit salutem. Tua ergo, Pater mi, voluntas fiat, non mea. Sed hæc satis hæcenus dicta sint ad diluendam primam objectionem Infidelium, Virorumque incredulorum, qui, si attentius considerare velint, **Jesum Christum**, non ex necessitate, sed liberè, nostrique amore, naturam nostram cum plerisque malis, miseriis & incommodis, quæ illi indivulsè adhærent, ad redimendum genus humanum, assumpsisse, desinent tandem **Jesu Christo** exprobrare paupertatem, humilitatem, abjectionem, mortis reformidationem, & ignominiosissimæ Crucis supplicium; sed potiùs **Jesu Christi** in perferendis tot malis, miseriis, calamitatibus, & dirissimæ mortis cruciatibus, summo peritæ laudabunt eximiam, & absolutissimam in nos charitatem, mansuetudinem, patientiam, ac perfectissimam obedientiam, quâ Patri suo plenissi-*

maia

nam & ad summos juris apices exactam satisfactionem pro reconciliatione generis humani exhibuit, eique factus est obediensque ad mortem, mortem autem Crucis. Hoc pacto Infideles, Virique increduli, si preconceptum, quo in Christianam Religionem flagrant, odium deponant, ejusdem nobiscum erunt sententiae; cum omnes, qui retrò oderant, (inquit Tertullianus Apologet. cap. 1.) qui ignorabant quale esset quod oderant, simul ut desinunt ignorare, cessent & odisse. Ex his simul Christiani utique de comperto, & incipiunt odisse quod fuerant, & profiteri quod oderant. De obstinatis verò subdit antiquus ille Scriptor: *Malunt nescire, quia jam oderunt, adeò quod nesciunt, præjudicant id esse, quod fisciunt, odisse non poterant.*

Obijciunt secundò: Gentilium Religio, inquiunt Infideles, Virique increduli, antiquior est Christiana Religione, suosque habet Vates & Oracula. Ut quid ergò Christiani, rejectis Oraculis Vatum Religionis Gentilium, recipiunt Vaticinia Prophetarum, qui fuerunt in Religione Hebræorum? Præterea, si quis legat Libros Prophetarum, quales nunc habent Christiani, statim comperiet, nullum prorsus in Vaticiniis servari ordinem, sed ea sine ullo delecta collecta, nullaque habitâ ratione temporum, sparsim, & confusè narrari, ac sùs deque omnia misceri. Non possunt itaque Christiani probare, Libros Prophetarum, quales nunc habent, fuisse ab antiquis Prophetis Religionis Iudæorum exaratos, eosque divinâ pollere auctoritate.

Respondeo ad singulas hujus Objectionis partes. Et primùm quidèd dico, falsò Infideles, Virosque incredulos supponere, Gentilium Religionem antiquiorem esse Christianâ Religione. Quamvis enim Christiana Religio, quantum ad nomen, recentior sit Gentilium, Hebræorumve Religione, nihilominus, quantum ad rei, seu doctrinæ veritatem, antiquissima est, & Mundo cœva; tum quia nullus, sive in Lege Naturæ, sive in Lege Mosaica, salutem æternam adipisci potuit absque Fide in mediatorem Jesum Christum venturum; tum quia etiam, tota, quanta est Sacra Veteris Testamenti Historia, sive spectetur Lex Mosaica, quam exhibet, sive considerentur figuræ & involuera, quibus obvelatur, sive expendantur Ritus, Cæremoniæ, Festa, Sacrificia, Patriarcharum, Judicum, & Regum Gesta, aliaque id genus, quæ à capite ad calcem complectitur Monumenta; tota, inquam, Sacra Veteris Testamenti Historia collimat in Jesum Christum, qui est finis & totius Legis plenitudo, in quem venturum Adamus, Patriarchæ, Prophetæ, aliiq; in Veteri Lege Iusti credentes, salvi facti sunt, indeque, non nomine quidem, sed re, jure optimo Christiani appellandi, quòd ex fide quâ vivimus, unâ eadèmq; vixerunt, Incarnationem, Passionem, Resurrectionem Christi credentes futuram, quam nos credimus esse factam, ut inquit S. Augustinus Lib. 3. ad Bonifacium contra duas Epistolas Pelagianorum. Legi potest super hac re Eusebius Lib. 1. Historiæ Ecclesiasticæ cap. 4. ubi ostendit,

die, omnes, qui in Veteri Lege fustitiz testimonio fuerunt probati, si non nomine, re tamen, Christianos nuncupari debere, & ad Christum, ejusque Ecclesiam pertinuisse, eò quòd per Fidei ei constanter adhæserunt. Cur autem Christiani Gentilium Vaticinia, quæ circumferuntur, rejiciant, & Prophetarum, qui fuerunt in Veteri Lege, Oracula suscipiant? multiplex ratio assignari potest. In primis, Christiani ea, quæ Gentiles jactant, Oracula rejiciunt, quia, sicut advertit *Cicero Lib. 2. de Divinatione*, vel erant falsò conficta, vel ambigua Sacerdotum, simplice & incautam gentem decipientium, vel obscura Responsa, quæ in utramque partem converti poterant, sicut patet ex illo Oraculo: *Mio te Eacida Romanos vincere posse*. Secundò, hæc Gentilium Oracula tendebant vel ad nefariam superstitionem in populorum animis magis ac magis confirmandam, vel ad lucrum, quo impii Sacerdotes eâ sacrilegâ arte locupletati & auri fame inescati, commodis suis inserviebant, populi ora obli- niebant, atque mariupia mille fraudulentis artibus emungebant, vel ad bella & negotia secularia feliciùs administranda, ut nimirum rebelles aliquandò & tumultuantes populos à gerendis bellis vel avocarent, vel specioso divinæ promissionis obtentu ad bella redderent alacriores; vel ad alios id genus pessimos fines, quos sibi præstitebant callidissimi illi Sacerdotes, qui populo plus æquò credulo ut fucum facerent omnem suam industriam conferebant. Demùm, Christiani Vaticinia Gentilium idèò explodunt ac detestantur, quia hæc Vaticinia nihil aliud erant, quàm illusiones & fallaciæ Dæmonum, qui, sicut eleganter ait *Lactantius cap. 17. Libri 2. Divinarum Institutionum*, in *Oraculis vel maximè fallunt, quorum præstigia prophani à veritate intelligere non possunt, idèòque ab illis attribui putant & Imperia, & Victorias, & opes, & eventus prosperos rerum, denique ipsam nutu sæpè Rempublicam periculis imminentibus liberatam, quæ pericula & responsis denunciaverunt, & sacrificiis placati averterunt. Sed omnia ista fallaciæ sunt &c.* Nec certè aliud, quàm fallaciæ esse possunt ista Dæmonum Vaticinia, quia Dæmones licèt præscire possint & prædicere futura, quæ ex naturali rerum ordine & dispositione necessariò consequuntur, ut Eclipses, anni tempestates &c. (quantùm & in jis facile decipiantur, cùm Deus aliquandò rerum naturalem ordinem immutet) non tamen ea, quæ sita sunt extra naturalem causarum, secundarum ordinem, vel ex liberis Dei decretis pendent, præscire ac prænunciare possunt. Propter istas, & alias ejusmodi rationes Christiani rejiciunt & execrantur Gentilium Vaticinia, & versâ vice Prophetarum, qui in Veteri Lege fuerunt, summo consensu recipiunt, & maximâ veneratione Oracula prosequuntur, tùm quia hæc Prophetarum Veteris Testamenti Oracula tendunt ad unius Dei cultum propagandum, ad excitandos homines ad amorem veræ virtutis, ad genuinam pietatem, ad eos à sensibilibus & caducis bonis ad spiritualia & æterna promovendos, ad expectationem, seu adventum Jesu Christi, veri Messiz, Redemptoris

nostri : Tùm quia etiam Prophetæ Veteris Testamenti Incarnationem ; & quæ spectant Jesu Christi Œconomiam, Nativitatem, Passionem , Resurrectionem, Ascensionem in Cælum , Spiritus Sancti Missionem , Religionis Christianæ institutionem, & per totum Orbem propagationem , Gentium conversionem, Judæorum rejectionem, & alia bene multa, quorum notitia ex naturali causarum secundarum dispositione oriri minimè potest, tam variè, dilucidè, & luculentè prædixerunt , ut non rerum futurarum Vaticinia , sed rerum jam gestarum historiarum videantur , indeque *Porphyrus* , Gentilis Philosophus , & infensus Religionis Christianæ hostis , occasionem sumpserit Librum Prophetiæ *Danielis* calumniandi , sicut testatur Sanctus *Hieronymus* in Proxio in *Danielem* his verbis : *Cujus, seu Porphyrii, impugnatio ; testimonium veritatis est : Tanta enim dictorum fides fuit , ut Prophetæ incredulis hominibus non videatur futura dixisse , sed narrasse præterita.* Quantum verò ad id, quod dicunt Infideles, Virique increduli, Libros, quales nunc habent Christiani, non fuisse ab antiquis Prophetis scriptos, eò quòd in illis disturbato ordine , nullaque habitâ ratione temporum Prophetiæ sint descriptæ ; Respondeo , tantùm abesse , ut ex illo Prophetiarum disturbato ordine, qui reperitur in Libris , quales habent Christiani , colligi possit , illos Libros ab antiquis Prophetis non esse exaratos, ut potiùs indè contrarium omninò elici debeat . Ex ea siquidem inordinata Prophetiarum dispositione apparet , illos Christianorum Libros non esse humanæ mentis opus, res concinnè , consertè ac contextè singulas cum delectu & ordine explicantis, & rationum cohærentiam sequentis ; sed potiùs Libros illos concinnatos esse ab hominibus, afflatu cælesti instinctis , & res futuras per intercisa & salebrosa promentibus Oracula . Norunt quippe omnes, solemne esse viris, divino motu impulsis, & sacro furore correptis , non rationis humanæ dictata sequi & seriem rerum, aut accuratam temporum rationem texere, sed potiùs, prout cælestis se dat spiritus, dissipato & perturbato ordine divina fundere Oracula . Præter quàm quòd, Christiani, sicut superiùs ostendimus, Prophetarum Libros, quales nunc habent, non è suis Scriniis protulerunt, sed ex Judæorum, qui Christianæ Religionis sunt insensissimi hostes , manibus acceperunt . Quod liquidò probat , Prophetarum Libros, quales nunc habent Christiani , à Prophetis Veteris Testamenti , longè antequàm Jesus Christus nasceretur, fuisse conscriptos .

Arguunt tertio Infideles, Virique increduli: Solent Christiani probare, Jesum Christum esse verum Messiam , Prophetarum Oraculis prædictum, ex Miraculis , quæ ipse, ejusque Discipuli ediderunt ; atqui argumentum ex his miraculis petitum nullius momenti ac roboris est, primò, quia hæc miracula artibus Dæmonis facta sunt . Secundò, quia hæc miracula, quæ à Jesu Christo, ejusque Discipulis patrata perhibentur , adscribi debent rationibus seminalibus , seu occultis naturæ causis , quæ
tamen

(XLI.)

tamen Viris simplicibus, quibus arcanæ illæ causæ exploratæ non erant, videbantur miracula, quamvis reverà non essent. Tertiò, quia miracula fecerunt etiam Gentiles, sicut referunt Scriptores de *Apollonio Thiano*, qui sub *Domitiano*, Imperatore, vixit, & de *Vespasiano*, Imperatore, qui ipso cæcum curavit. Denique, si Jesus Christus, ejusque Discipuli tam potentia miracula edidissent, nulla mens humana reluctari potuisset illorum miraculorum evidentie, atque tamen Iudæi, ac Gentiles his miraculis etiamnum reluctantur, nec adduci possunt, ut credant, Jesum Christum esse verum Messiam, Prophetarum Oraculis prædictum; elumbe itaque est illud argumentum, quod ex Jesu Christi, ejusque Discipulorum miraculis in infideles, intorquere solent Christiani.

Respondeo, sat superque in Dissertatione, quam in Tractatu *De Myseriis, & annis Jesu Christi*, de miraculis ab ipso editis habiturus sum, à me demonstratum iri, miracula, quæ Iesus Christus in maxima omnium luce patravit, non artibus Dæmonum, non pronunciationi nominis *Tetragrammaton*, non occultis naturæ causis, sed soli, quæ pollebat, virtuti divine accepta referri debere, & inter aniles fabulas reponenda esse ea miracula, quæ nonnulli Scriptores sive ab *Apollonio Thiano*, sive à *Vespasiano*, Imperatore, edita esse memoriæ prodiderunt. Quapropter plenius de his alibi dicturus, breviter hic ad singula hujus Obiectionis capita, respondebo. Ad primum dico, miracula Iesu Christi, ejusque Discipulorum non posse adscribi artibus Dæmonum, tum quia Iesus Christus, ejusque Discipuli plures mortuos ad vitam revocarunt, resurrectio autem mortuorum non potest esse nisi à Deo, sicut superius diximus: Tum quia etiam per miracula, quæ Iesus Christus, ejusque Discipuli ediderunt, extinctum est Diaboli Regnum, prostrata penitus Idololatria, & Christiana Religio stabilita, roborata, ac longè latèque diffusa: Tum quia denique ipsimet Iudæi inficiari non potuerunt veritatem miraculorum Christi & Apostolorum. De Christo enim Pharisei, & Sacerdotum Principes inquebant: *Quid facimus? quia hic homo multa signa facit*, Ioannis cap. 11. De Apostolis verò agebant: *Quid faciemus hominibus istis, quoniam iam quidem notum signum factum est per eos. . . manifestum est & non possumus negare?* Act. cap 3. Addi quoque potest, Iesum Christum se naturæ auctorem & Dominum apertè probasse, quando Apostolis suis contulit omnimodam potestatem operandi miracula, Matthæi cap. 10. dicens: *Infirmos curate, mortuos suscite, leprosos mundate, Dæmones ejicite*. Hæc dixit Iesus Christus, & facta sunt: Nam Apostoli post ejus mortem & resurrectionem universum Orbem miraculis impleverunt, quin & potestatem illam patrandi miracula à Iesu Christo acceptam successoribus suis transmiserunt, adeò ut ab ipso nascentis Christianæ Religionis exordio ad hanc usque ætatem nostram semper fuerint in Ecclesiis Viri, qui sanctitate insignes miraculis claruerunt. Fateor quidem, minus ætate nostra frequentia esse miracula, quàm fuerint in prioribus

Eccle.

(XLII.)

Ecclesiæ sæculis; sed hoc nemini mirum videri debet, quia Christiana Religio cum nunc altas jam radices egerit, & per totum Orbem sit propagata, non amplius eget illis adminiculis, seu novis miraculis, sive ad continendos Fideles, sive ad revincendos Hæreticos, sive ad subigendos gentes, quæ Iesu Christo necdum crediderunt. Quamquam nostrâ etiam tempestate in gratiam Religionis Christianæ fieri verè miracula, non solum testantur indubitata monumenta, & Historiæ virorum pietate insignium à Scriptoribus probatissimæ fidei concinnatæ, verum etiam rigidum eorum examen, cui subiecta sunt, priusquam eorum Auctores solemni Ecclesiæ ritu Sanctorum Fastis adscribantur.

Ad alterum Objectionis caput dico, insanire Infideles, virosque incredulos, qui putant, miracula à Iesu Christo & Apostolis edita rationibus seminalibus, & occultis naturæ causis esse adscribenda. Quis enim non videt, nisi mentis oculos clauferit, miracula, quibus Iesus Christus, ejusque Apostoli mortuos suscitaverunt, tribui non posse rationibus seminalibus & occultis naturæ inditis, cum de ratione miraculi sit, ut superet naturæ vires, & ab eo solo, qui supra naturam est, seu naturæ imperare potest, procedat. Alioqui, dicant nobis, si placet, Infideles, virique increduli, quid factum sit, ut, post adventum Iesu Christi, hi soli, qui Christianâ Religione erant initiati, miracula operari potuerint, Iudæi verò & Gentiles, ad similia edenda prodigia, seminales illas rationes commovere nequiverint, licet multi essent inter illos excellenti ingenio præditi Philosophi, ejusdem naturæ ac Apostoli & Discipuli Iesu Christi, eodem simul uterentur Sole, Cælo, & Aëre, in iisdemque prorsus versarentur circumstantiis loci & temporis?

Ad tertium Objectionis caput de miraculis, quæ à Gentilibus, præsertim ab Imperatore *Vespasiano*, & *Apollonio Thiano*, patrata circumferuntur, dico, hæc miracula tanquam commentitia rejici debere, vel quia nullâ idoneorum testium fide suffulta sunt, vel quia contigerunt in recessu, nocte, coram uno aut altero, quorum oculis falsâ rerum specie per astus Sacerdotum imponi facile potuit. *Cornelius Tacitus* Lib. 4. Hist. refert de cæco ab Imperatore *Vespasiano*, illuminato, consultos Medicos respondisse, vim luminis in eo non fuisse exesam, eumque potuisse sanari sublatis obstaculis. *Apollonium Thianæum* insignem Magum fuisse, qui præstigiis & fallaciis, hoc est, malis Dæmonum artibus incautos decipiebat, & intuentium oculos magicis illusionibus fascinabat, copiose satis ostendam in Dissertatione De Miraculis Christi, ad quam, ut brevitati consulam, Lectorem in præsentia remitto.

Ad ultimum Objectionis caput dico, idèd Iudæos & Gentiles evidentæ miraculorum, quæ Iesus Christus, ejusque Discipuli ediderunt, etiamnum reluctari, nihilque de sua pertinacia remittere, quia terrenâ sive Judaismi, sive Ethnicismi cupiditate excæcati, erubescunt præ superbia se vinci à Christianis, & confiteri, tam se, quam parentes esse deceptos.

(XLIII.)

ceptos . Hinc Iesus Christus dixit de Iudæis, qui, perspectis miraculis, quæ ipse patrauerat, increduli tamen permanebant : *Si opera non fecissem in eis, quæ nemo alius fecit, peccatum non haberent, nunc autem viderunt & oderunt me, & Patrem meum . Sed, ut adimpleretur sermo, qui in Lege eorum scriptus est : Quia odio habuerunt me gratis, Ioannis cap. 15. vers. 24. & 25. Quin & in Libris Veterum Hebræorum, maxime in Avo-da Zard Thalmudis Hierosolymitani, & in Midrasch Cobeletb, legitur, haustus veneni, & serpentum morsus nomine Jesu sanatos fuisse; nec tamen illi verpi ac recutiti credunt in Iesum . Ipsi quoque Mahometani miraculis à Iesu Christo patratis fidem habent, quamvis Christianam Religionem aspernentur . Optimo itaque jure de Iudæis, Gentilibus, Mahometanis, aliisque id genus viris incredulis dicere possum, quod Apostolus Paulus Epist. ad Romanos cap. 1. ait de Gentilibus Philosophis : *Quod notum est Dei, manifestum est in illis, Deus enim illis manifestavit . Invisibilia enim ipsius à creatura Mundi, per ea, quæ facta sunt, intellectu conspiciuntur, sempiterna quoque ejus virtus & divinitas, ita ut sint inexcusabiles, quia cum cognoverint Deum, non sicut Deum glorificaverunt, aut gratias egerunt, sed evanuerunt in cogitationibus suis, & obscuratum est insipiens cor eorum .* Addo etiam, innumeros Iudæos, & doctissimos Gentiles, qui miraculorum vel Iesu Christi, vel Apostolorum testes erant oculati, Christianæ Religionis nomen dedisse, eosque, ut superius observavimus, pro defensione veritatis miraculorum & doctrinæ Iesu Christi constantè martyrii palmam fuisse adeptos . Quod quidem argumento est, solam pertinaciam in causa fuisse, cur alii Iudæi, Gentiles, Virique increduli, quos Deus (ut Apostolus Paulus Epist. ad Romanos cap. 1. v. 24. ait) *tradidit in desideria cordis eorum, Christianam Religionem non fuerint amplexi .**

Obiiciunt quartò Infideles, virique increduli : Gentilium Historiam eo potissimum nomine repudiant Christiani, quòd ipsa, ut ajunt, scateat neniis, fabulis, vitiis, & turpissimis Deorum moribus, obscenisque amoribus conspurcetur, quibus ad flagitiosam vitam, & ad effrænem explendam carnis libidinem mortales provocantur . Atqui etiam Libri, ex quibus Christiani probant, Iesum Christum esse Messiam, neniis & fabulis referti sunt, & in his describuntur vitæ Patriarcharum & Prophetarum, qui passionibus & vitiis dediti fuerunt, igitur eodem jure, quo Christiani Historiam Gentilium damnant, poterunt & Gentiles reicere libros, ex quibus Christiani probant, Iesum Christum esse Messiam . Minorem Propositionem pluribus momentis probant Infideles, virique increduli, & primò dicunt, ab Authore Libri Geneseos referri Serpentis cum Heva colloquium, divinam prohibitionem factam Adamo de non edendo pomo, deceptionem Adami & Heva, qui, cum sapientissimi à Deo conditi dicantur, nihilosecius, velut pueri, persuasi sunt à Serpente, ut contra Dei præceptum de vetito illo pomo ederent .

(XLIV.)

Narrat quoque ejusdem Libri Geneseos Auctor enormem ac minimè commensuratam pœnam, à Deo impositam Adamo & Hevæ, pro tantula, tamque parvi momenti transgressione, immò illius pœnæ in omnes omnino Adami posteros derivationem ac propagationem. Addit insuper idem Auctor, Deum Serpenti deceptorì hanc pœnam intulisse, ut terram comederet, & super pectus suum gradiretur. Quasi verò Serpens, ante peccatum Adami, fuisset pedibus instructus, & postea ob pœnam, pedibus fuerit mutilatus! Quæ omnia nugæ, æznix & fabulæ sunt, vel experientiz, rectæque rationi penitus opposita. Præterea, in libris, ex quibus Christiani probant Iesum Christum esse Messiam, describuntur vitæ Patriarcharum & Prophetarum, quæ multis vitiis, & turpissimis amoribus fædantur, in his quippè narratur primò, quòd Moyses homicidium in Ægypto commiserit, bella crudeliter gesserit, & Hebræis, quorum Dux erat, author fuerit, ut vasa aurea & argentea, cæteramque Ægyptiorum suppellectilem suffurarentur, suumque in usum vendicarent. Secundò, in his Christianorum libris legitur, quòd Patriarcha *Noëmus*, bibens vinum, ebriatus sit. Tertio, quòd Patriarcha *Abrahamus* non contentus conjuge sua *Sara*, impudicè cum ancilla sua *Agar* volutatus sit. Quartò, quòd Patriarcha *Jacob*, ut impotenti libidini suæ indulgeret, non solum *Liam*, & *Rachelem*, duas germanas sorores, sibi Matrimonio copularit, sed etiam earum famulas in uxores duxerit. Quintò, quòd Patriarcha *Judas* cum *Nuru* sua *Thamar* incestum habuerit coitum. Sextò, quòd *Loth*, de Sodemæ incendio liberatus, cum duabus filiabus suis, vino inguigitatus, impudicè commixtus sit. Septimò, quòd Propheta *Osée* de fornicaria muliere filios procreaverit. Octavò, quòd *David*, Rex Iuda, adulterium & homicidium patraverit. Nonò, quòd *Salemon*, Rex itidè Iuda, libidini adeò fræna laxaverit, ut septingentas uxores, & trecentas concubinas habuerit. Cum igitur libri, ex quibus Christiani probant, Iesum Christum esse Messiam, tot nugis, fabulis, & propudiosis amoribus respersi sint, non major eis debet conciliari autoritas eâ, quæ tribui solet Historiæ Gentilium.

Respondeo primò, hæc, quæ ab Infidelibus, virisque incredulis pro fabulis habentur, si acrius ac penitiùs inspiciantur, rectæ rationi, & divinæ dispositioni omnino congruere. Quòd enim Deus jusserit Adamo, ut ab esu pomi abstineret, fuit officium subjectionis & obedientiæ, Deo debitz, injunctum Adamo, jure videlicet supremi dominii poscente, ut Deus subdito suo præceptum aliquod imponeret. Colloquium quod spectat *Hevæ* cum Diabolo, Serpentis organo utente, eique prævaricationem suadente, non est etiam creditu difficile, quia Diabolus per Serpentem allocutus est *Hevæ*, sicut olim per Pythonissam, & per Idola Gentilium sua olim fundebat oracula. *Hevæ* autem idè decepta fuit à Diabolo, per Serpentem loquente, quia sibi persuasit, virtute aliquâ supernaturali Serpentem loqui, & ad vocem Serpentis, eam spe divinitatis

tatis assequendæ lætantis, non satis attendens, æstu ambitionis abrepta, tentationi succubuit, & Adamum, maritum suum, in eamdem prævariationem, ita permittente Deo, pertraxit. Iussit quidem Deus, ut Serpens super pectus suum gradiretur, non quoddam antea pedibus esset instructus, & postea pedibus fuerit mutilatus; sed Deus, ad puniendum Serpentem, fecit, ut ea, quæ antehac erant Serpenti naturalia, scilicet comedere terram, & gradi supra pectus suum, verterentur ipsi post peccatum Adami in pœnam & infamiam; non secus ac *Iris* ante diluvium universale omnino naturalis erat, sed post diluvium evasit signum pacti Deum inter & homines initi. Quoddam denique Deus non solum Adamum, ob inobedientiæ peccatum, sed etiam omnes ejus posteros donis ac privilegiis concessis privaverit, eosque miseriis & calamitatibus obnoxios esse voluerit, pœna est à Dei justitia peccato Adami, primi omnium hominum parentis, irrogata. Ex qua pœna ad omnes Adami posteros transmissa nobis pleraque elucescunt, quæ alioquin nullo pacto à nobis comprehendendi possent. Indè enim primò intelligimus peccati originalis ad omnes Adami posteros transfusionem, & causam cur omnis homo nunc nascatur cum ignorantia in intellectu, cum malitia in voluntate, cum propensione ad malum, cum luctu passionum, totque miseriis, & pœnis subiaceat. Quæ difficultas plerosque cordatos ex Gentilibus viros vehementer olim torquebat, eorumque ingenia, quantumvis acutissima, penitus absorbit, ut ostendit Cl. *Blasius Paschalis* in suis *Cogitationibus* tit. 3. Præterea, ex ejusdem pœnæ ad omnes Adami posteros derivatione cognoscimus necessitatem adventus Messie, seu Redemptoris ad reparandum genus humanum, primigeniæ Protoparentis Adami labe perditum, & summam erga nos charitatem Dei, qui ab exordio Mundi se se obstrinxit ad mittendum illum Reparatorem, seu Messiam, quando videlicet imprecando Serpenti, qui Evam ad peccandum induxerat, dixit: *Ipsa conteret caput tuum*, idest, Reparator, seu Messias, quem aliquando, ad refarcienda damna generi humano per peccatum Adami illata missurus sum, quique ex muliere nasciturus est, conteret caput tuum. Tantum igitur abest, ut hæc, quæ Auctor libri Geneseos refert, pro fabulis haberi debeant, sicut effutiunt Infideles, virique increduli, ut potius maximè commendent veritatem & antiquitatem Sacræ veteris Testamenti Historiæ, quæ nos docet, quo pacto Deus huic condiderit Mundum, aperit nobis originem, naturam, statum & conditionem Adami, primi omnium hominum parentis, in felicissimo innocentie statu, ejusdemque Adami & omnium illius posterorum, post lapsum, miseriis, pœnas ac calamitates; ac denique certam facit promissionem à Deo datam ab exordio Mundi de mittendo Redemptore, seu Messia, ad reparandum genus humanum, peccato Adami collapsum, multisque plagis fauciatum, quorum omnium notitiæ ne vel minimum quidem in Historiis Gentilium apparet vestigium.

Respon-

Respondeo secundò, in libris, ex quibus Christiani probant, Iesum Christum esse verum Messiam, referri quidem, sed non laudari & approbati obscenos quorundam amores, seu *Loti* cum suis filiabus, & *Jude* cum nuru sua *Thamara* incestum; *Davidis* Regis adulterium & homicidium; *Salomonis* libidinem & Idololatriam; hi, inquam, turpissimi quorundam amores & vitia in Sacris Christianorum libris narrantur, sed non approbantur. At, in Historia Gentilium non solum referuntur, sed laudibus extolluntur impudici Deorum mores, stupra & adulteria. Porro, Patriarchæ veteris Testamenti *Abrahamus*, *Isaacus*, & *Jacobus*, quos lascivix insimulant Infideles virique increduli, facile ab hoc vitio vindicari possunt. Vivebant quippè illi Patriarchæ post diluvium, quando Deus Polygamiam, seu uxorum pluralitatem, permisit ad multiplicandum genus humanum, aquis diluvii extinctum. Quid igitur mirum, si illi Patriarchæ post diluviani, juxta dispensationem ipsis à Deo concessam, non lasciviendi, sed gignendi causâ, plures uxores duxerint? Non peccavit etiam Propheta *Osee*, dum nupsit fornicariæ, seu meretrici, quia, jubente Deo, illam meretricem, relicta fornicatione, ad meliorem frugem conversam, uxorem duxit, & ex ea filios procreavit. Quòd *Noemi* ebrietatem spectat, ea fuit ab omni culpa immunis, quia inopinata fuit, & non ab intemperantiâ profecta. *Noemus* siquidem vinum antea non gustaverat, neque sciebat, quâ mensurâ vino uti debebat. Quò factum est, ut per ignorantiam involuntariam & inculpabilem in ebrietatem inciderit. Denique, *Moyse*s non peccavit, bella cum variis populis gerendo, quia nullâ nocendi cupiditate, non libidine dominandi, non ulciscendi crudelitate hæc bella suscepit, sed Auctore Deo, qui etiam, tanquàm supremus rerum omnium Dominus, voluit, ut Hebræi, qui duris ac iniquis laboribus absque ulla mercede fuerant ab *Ægyptiis* tempore captivitatis oppressi, ditarentur terrenis bonis, quibus *Ægyptii*, verum Deum ignorantes, ad superstitiosum falsorum suorum Numinum cultum in injuriam Creatoris abutebantur. Excusent nunc Gentiles eadem facilitate, si possint, vitia & spurcissimos amores Deorum suorum, quos inter *Bacchus* temulentus fuit, *Mars* homicida, qui etiam cum *Veneri* adulterium commisit; *Mercurius* fur ac nebulo, qui nihil ad famam sui reliquit, nisi memoriam fraudum suarum. Quid omnium horum pater *Iupiter*, qui, ne parùm videretur, si in expugnanda fœminarum pudicitia maculosus esset, etiam sexui suo injuriam fecit? Prætermitto obscœnitates *Veneris*, omnium libidinibus prostituta non Deorum tantùm sed & hominum. Tentarunt quidem Poëtæ his horrendis vitiis, & flagitiosis Deorum amoribus, variis figuris & coloribus venustatem & leporem carminibus suis addere, & ea obtentu aliquo, specieque velare; sed oleum & operam perdiderunt. Quin ipsimet Gentiles, tantisper eruditi, ejusmodi splendidas, sed fictas, de Diis suis narrationes rejecerunt tanquàm inanes fabulas excogitatas à Poëtis, quibus quælibet fingendi semper fuit summa potestas.

Obii-

Obiiciunt quintò Infideles, virique increduli, multaque opponunt momenta contra antiquitatem & authoritatem Librorum , ex quibus Christiani probant , Jesum Christum esse Messiam . Et primò quidem , Libros veteris Testamenti periisse omninò in captivitate Babylonica, sicut legitur Lib.4. *Esdra* cap.14. vel combustos omninò fuisse in *Antiochi*, Regis Syriæ, persecutione, quam describens Auctor Libri primi Machabæorum, hæc habet : *Et Libros Legis Dei combusserunt igni, scindentes eos, & apud quem inveniebantur Libri Testamenti Domini secundum Edictum Regis, trucidabant eum.* Quo pacto igitur Christiani ex Libris veteris Testamenti , qui omninò perierunt , probare possunt , Jesum Christum esse verum Messiam à Deo in Lege promissum ? Secundò, non habent ampliùs Christiani Librorum veteris Testamenti Autographa, quæ primi Scriptores propriâ manu exararunt, sed eos dumtaxat Codices habent, quos ab *Esdra*, post solutam Captivitatem Babylonicam, aut dictatos, aut correctos fuisse affirmant . Quomodò igitur Christiani certò probare poterunt , Codices Scripturæ veteris Testamenti, quos nunc habent, conformes esse originariis veteris Testamenti Librorum, Exemplaribus, quæ ampliùs non extant , eosque Codices ab *Esdra* non fuisse immutatos & interpolatos ? Tertio, multa additamenta, quæ libris veteris Testamenti, præsertim Pentateucho Moysi, à posterioribus Scriptoribus facta esse, ultrò fatentur ipsimet Christiani, apertè probant , libros veteris Testamenti , quales nunc habent Christiani, aut fuisse vitiatos & adulteratos, aut à recentioribus Scriptoribus concinnatos . Denique, ex benè multis Antilogiis, seu Contradictionibus, quæ offenduntur in libris tam veteris, quam novi Testamenti, quales nunc habent Christiani, & in quibus eliquandis, vel conciliandis insudant Interpretes, facillè colligitur, libros veteris Testamenti , quibus utuntur Christiani, nec antiquos, nec Sacros & à Deo inspiratos Auctores habere, omniaque Scripta Novi Testamenti, quæ sub nominibus Apostolorum & Evangelistarum circumferuntur, esse supposititia, & à Christianis conscripta post Apostolorum & Evangelistarum tempora .

Respondeo ad singula illa momenta, & ad primum, dico, libros veteris Testamenti, ex quibus Christiani probant, Iesum Christum esse verum Messiam, nec in excidio Hierosolymitano, nec in Captivitate Babylonica, in quam Iudæos abduxit *Nabuchodonosorus*, Assyriorum Rex, periisse, nec in persecutione *Antiochi*, Regis Syriæ, fuisse omninò combustos . Tempore siquidem excidii Hierosolymitani, quod sub *Sedecia*, Rege Iudæ, contigit, Propheta *Hieremias*, iussu *Nabuzardan* (militis Regis Nabuchodonosori Magistri) tutus ab omni injuria Hierosolymis remansit, ac penès se conservavit Scripturæ Sacræ Codices. Quin & Iudæi, præsertim *Ezechiel*, *Mardocheus*, *Tobias*, & alii, qui undecim annis ante excidium Hierosolymitanum in Captivitatem Babylonicam, cum *Ioakino*, Rege Iudæ, fuerunt abducti, secum Sacros Scripturæ

(XLVIII.)

Codices asportarunt , & in ea captivitate asseverarunt . Iudei quippè , ut nemo nescit , præter Sacros illos Codices , qui in Templo Hierosolymitano , & in Synagoga maximâ curâ & religione custodiebantur , adhuc penès se multa Sacrorum Codicum Exemplaria conservabant , eaque sedulò legebant . Præterquàm quòd , fieri haud potuit , ut Pentateuchus Samaritanus , quo utebantur Samaritani , hanc funestam cladem , seu Hierosolymorum conflagrationem pateretur . Scio , Authorem libri quarti *Esdræ* asserere , omnes Scripturæ Sacræ libros , vel in excido Hierosolymitano crematos , vel in Captivitate Babylonica penitus abolitos esse , eosque post Captivitatem Babylonicam ab *Esdra* , Spiritu Sancto afflato , de verbo ad verbum fuisse denuò dictatos , sed ille auctor , quisquis ille sit , nullam meretur fidem , tum quia Ecclesia hunc quartum librum *Esdræ* ad Apocryphorum Classem ablegat ; tum quia hic liber multis scatet fabulis . Convenit tamen inter viros eruditos , Scripturæ Sacræ Codices , qui in Captivitate Babylonica , ob populi incuriam , neglecti , & in aliquot locis depravati fuerant , deinde , post laxatam eandem captivitatem , emendatos & in unum corpus redactos esse ab *Esdra* , qui etiam Scripturæ Sacræ Codicum characteres hebraicos immutavit , eisque characteres Chaldaicos , quæis Iudæi , ob diuturnam Captivitatem Babylonicam magis erant assueti , suffecit .

Sed neque in persecutione *Antiochi* , Syriæ Regis , perire potuerunt omnes Scripturæ Sacræ Codices , quia licet *Antiochus* , cæco furore abreptus , plurima Scripturæ Sacræ Volumina flammis voracibus addixerit , non potuit tamen grassari in omnes Scripturæ Sacræ Codices , quos Iudæi , per totum Orbem diffusi , summâ veneratione conservabant . Hæc siquidem *Antiochi* Regis persecutio particularis fuit , nec tæxit in universum Orbem , ac subindè innumeri Scripturæ Sacræ Codices sacrilegas flammæ facile evaserunt .

Ad alterum momentum respondeo , Archetypa , seu primigenia Sacrorum Librorum Exemplaria intercidisse , quia non erant amplius Ecclesiæ necessaria ; Christianos attamen certos esse , quòd veteris Testamenti Libri , quos nunc habent , ad Exemplaria originaria sint exacti , tum quia Deus permittere unquam haud potuit , ut hi Sacri Libri , ad instructionem Fidelium , ad veri cultus & Religionis incrementum conscripti , omnino interirent ; tum quia Christiani in iisdem Sacræ Scripturæ Codicibus , quos nunc habent , eandem vident Scripturæ Sacræ styli simplicitatem , antiquitatem , sublimitatem , cum veritate Evangelica consonem , cæteraque dotes , quibus Scriptura Sacra aliis libris longè antecellit ; tum quia etiam Christiani apprimè sciunt , *Esdræ* , divino lumine illustratum , correctioni Scripturæ Sacræ , post solutam captivitatem Babylonicam , incubuisse , eiusque correctionem publicè Synagoga auctoritate fuisse comprobata , sicut latè demonstrat Illustrissimus Abrincensis Episcopus *Daniel Huetius* in Libro de *Demonstratione Evangelica* ,

(XLIX.)

gelica , Propos. 4. pag. 161. Tum quia denique ex perpetua Sæculorum serie , & constanti Iudæorum consensione omnes Christiani compertum ac exploratum habent , illos veteris Testamenti Libros, quos nunc habent, ab his Sacris Scriptoribus, quorum nominibus sunt insigniti, conscriptos fuisse, sicut nemo dubitat, *Platonis*, *Aristotelis*, *Ciceronis*, *Varronis*, aliorumque Gentilium Scriptorum Libros, ab his fuisse compositos, quia continuâ temporum sibi succedentium serie hi Libri, qui sub eorum nominibus circumferuntur, semper laudatis illis Scriptoribus fuerunt asserti ac vindicati .

Ad tertium momentum dico, *Esdram*, post laxatam captiuitatem Babylonicam, vel alium Sacrum Scriptorem, divino afflatum numine, quædam Sacris Libris, sed præsertim Pentateucho Moysis addidisse verba, nonnulla etiam nomina immutasse, ut narratio Moysis facilius intelligeretur ab his, quibus vetera Urbium, Montium & locorum nomina erant ignota . At nemo, me hercle, eò desipiat, ut cum Aristarchis, & huius ætatis incredulis viris dicere audeat, aliquem, post obitum Moysis, novos ritus, novas cæremonias sub e mentito Moysis nomine venditasse, promulgasse, novamque & planè commentitiam scripsisse ac toti populo Iudaico obtrussisse Historiam . Nam si quis, post obitum Moysis, id tentare vel exequi ausus fuisset, omni procul dubio tam insignis impostura, quæ nullâ arte celari potuisset, tam à Iudæis, quàm à Gentilibus detecta, & confutata fuisset .

Ad ultimum momentum respondeo, non veras & reales, sed apparentes dumtaxat in Sacris Libris reperiri Antilogias, seu contradictiones, quæ à Sanctis Patribus & Scripturæ Sacræ Interpretibus fuerunt iam explanatæ, quæque tantùm abest, ut Sacrorum Librorum autoritatem deprimant, ut potius maiorem illis fidem concilient, quia per eiusmodi difficultates & apparentes Antilogias, quæ interdum in Sacris Libris occurrunt, bona & sincera fides Sacrorum Scriptorum omnibus innotescit, nullique ampliùs superest suspicandi locus, Sacros Scriptores quasi ex compacto & conspiratione inter se se facti animum ad scribendam Historiam tam Sacram, quàm Evangelicam appulisse . Præterquàm quòd summa protervia est; Autoritatem Sacrarum Scripturarum, tam irrefragabilibus aliundè momentis fultam, vel ex hoc uno difficultatum & apparentium Antilogiarum, quæ in his identidem occurrunt, capite, aut elevare, aut negare velle, ex quo nullus Grammaticus, aut Criticus prophanos Auctores *Homerum*, *Pindarum*, *Horatium*, *Ciceronem*, & alios Gentiles Scriptores calumniandi occasionem arripere vellet . Experientiâ quippè constat, in Libris Prophanorum, seu Gentilium Scriptorum, passim salebrosa & implexa offendi loca, quæ Lectoribus Crucem figunt, ac summum facessunt negotium, in quibus explanandis Delio, ut ajunt, natatore, & Cæippo opus est . Indè tot Commentaria in antiquos Poetas, Oratores, & Philosophos hæcenus edita sunt, & nova quotidie prodeunt .

deunt. Car autem in Sacris Libris quædam obscura loca, & nonnullæ apparentes reperiantur contradictiones? duæ possunt afferri rationes. Primò, quia ita Deus voluit ad exercenda hominum ingenia, vel ad domandam superbiam nostram, vel ad ostendendam sublimitatem arcanorum, seu altitudinem Mysteriorum, quibus gravis est Scriptura Sacra. Secundò, quia post multorum sæculorum myriades, quædam Scripturæ Sac. loca obscura, & quasi tenebrarum caligine involuta evaserunt, mutatis videlicet loquendi formulis, quæ omnibus erant notæ eâ ætate, quâ Sac. Scriptores libros publicaverunt, vel ignoratis rebus & factis unicuique his temporibus exploratis, deinceps verò oblivione deletis, ex quibus genuina Sac. Scripturæ intelligentia dependet, cujusmodi sunt situs Locorum, Provinciarum, Urbium, nomina & proprietates Plantarum, & Animalium; pondera & mensuræ, Artes, & Scientiæ prophanz; mores, seu consuetudines, quæ in variis Regionibus tum temporis obtinebant, Leges, Proverbia, Sæctæ, & opiniones, quæ tam apud Iudæos, quàm apud alias Nationes circumferebantur; ut nihil in præsentia dicam de figuris, metaphoris, allegoriis, Hebraïsmis, Græcismis, Geographicis, & Chronologicis difficultatibus, quibus obscurus nonnunquam redditur Scripturæ stylus. Quòd autem dicantur Infideles, virique increduli, Scripta Apostolorum atque Evangelistarum, quæ nunc habent Christiani, esse supposititia, eaque ab insinuet Christianis, post Apostolorum & Evangelistarum tempora fuisse exarata; putidum mendacium est, quod facile refellitur, primò, quia S. Petrus cap. 3. suæ secundæ Epistolæ laudat S. Pauli Epistolæ, atque tunc fuisse in manibus etiam indoctorum. Secundò, Discipuli Apostolorum, sicut S. Clemens, Papa, S. Ignatius, Martyr, & S. Polycarpus, superstitionibus Magistris, testimonia ex eorum Scriptis depromunt ad instruendos Fideles. Tertio, S. Irenæus, Auditor S. Polycarpi, & S. Justinus Hæreticos sui temporis ex Scriptis Apostolorum revincunt, idemque præstitere Sancti Patres, qui eos proximè exceperunt, quos inter censentur Origenes, & Tertullianus, qui ultimus cap. 1. libri primi contra Marcionem exprobat huic Hæretico, quòd *Evangelia corroserit*, id est, mutilaverit.

Obiiciunt sexto Infideles, virique increduli: non minùs stupendis miraculis præfulsit Mahometes, quàm ipse Christus, & doctrina Mahometis, sicut pertendunt ejus discipuli, his characteribus insignitur, quibus veram & à Deo profectam fuisse probatur; atqui tamen Christiani dicunt, Mahometem esse impostorem, ejusque Legem, seu doctrinam, cùm falsam, impiam & flagitiosam execrantur, quidni igitur idem de Christo, ejusque doctrina à Mahometanis, aliisque, qui Jesum Christum, ut verum Messiam agnoscere, ejusque doctrinam recipere nolunt, dici poterit? Majorem Propositionem probant Infideles virique increduli primò ex Mahometis historia, descriptâ ab ejus Discipulis, qui testantur, Mahometis doctrinam fuisse à Deo revelatam, illum fuisse virum divinitus afflatum, multis miraculis ac prodigiis conspicuum, & Re-

(LI.)

& Religionis ab eo institutæ gloriam, amplitudinem, propagationem, aliaque id genus maxima beneficia, ei à Deo concessa, & oculis omnium potentia ostentant. Non videtur autem potior ratio, cur credatur Historiæ Iesu Christi ab ipsius Discipulis descriptæ, quàm ut fides adhibeatur Historiæ *Mahometis*, quam illius Discipuli literis mandarunt. Præterea, inquiunt Infideles, virique increduli, Lex, seu doctrina *Mahometis*, non solum in brevi temporis spatio Orbis maximam partem occupavit, & à diversis Nationibus suscepta est, sed etiam ejus cultores, seu Mahometani, felicibus bellorum eventibus ac victoriis Christianos superarunt, omniaque Palestina loca, ubi jacta sunt Christianæ Religionis fundamenta, in suam potestatem redegerunt. Credibile autem non est, Deum permittere voluisse, ut *Mahometis* Religio ac doctrina, si falsa fuisset, tam latè propagaretur, ejusque Sectarii faustis bellorum eventibus ac victoriis Religionem ac doctrinam Iesu Christi, quam solam esse veram prædicant Christiani, in toto ferme Oriente exterminarent.

Respondeo, pluribus momentis demonstrari posse, *Mahometis* doctrinam falsam, impiam, & sacrilegam esse, nulloque pacto conferri posse cum doctrina Iesu Christi, quæ tota cælestis est. At enim, primò vana, ac superstitiosa Religio *Mahometis* nullis miraculis, sive ab ipso, sive à Mahometanis editis, fuit propagata, nec ullus unquam Mahometismi Doctor ulla graves ærumas, duraque mortium genera propter *Mahometis* doctrinæ professionem pertulit. Christiana verò Religio, ut superius ostendimus, per totum Orbem diffusa est miraculis non tantum Iesu Christi, sed & ejus Discipulorum, & aliorum, qui eis successerunt. Omnes etiam Apostoli, ac Discipuli Iesu Christi atroces persecutiones, carceres, exilia, diraque mortis supplicia pro tuenda doctrinâ Iesu Christi, quàm annunciabant, invictâ patientiâ sustinuerunt. Secundo, *Mahometis* doctrina nullam sive in credendis, sive in agendis d. s. s. ultatem habet, indulget multum sensibus & cupiditati, præcipit ultionem, dat conjugibus discedendi licentiam, permittit alias super alias habere mulieres, nova semper libidinum irritamenta, arque post hanc vitam pollicetur beatitudinem, quæ consistit in fœdis voluptatibus corporis, quibus assatim ejus Sectarii potentiuntur in Paradiso, omnibus deliciis carnalibus affluente. Sed Christiana Religio proponit Myſteria humanæ rationi impervia, & morum doctrinam, quæ Sanctissimis suis Legibus jure sensibus & carni bellum indicit, cujusmodi sunt contemptus carnalium, hujus Mundi deliciarum, abnegatio sui ipsius, inimicorum dilectio, perpetua Matrimonii fides, & mutua morum tolerantia &c. Tertio, *Mahometis* doctrina, seu Religio bellorum & armorum vi crevit, immò, impostor ille suos Sectatores hortatur, ut non rationibus disputando, sed armis, quasi compendiariâ viâ pugnando, alios ad suam Sectam invitos compellant, alios verò subesse detrectantes ferro flammâque coercerent. At Christiana-

na Religio, ut ait *S. Augustinus*, non armis induc̃ta fuit, sed Fide inchoata, Spe nutrita, Charitate aucta, Miraculis confirmata, & à duodecim Piscatoribus, sc̃h Apostolis, opibus, eloquentiâ, nobilitate, potestate, omnique humano pr̃sidio orbatis, per universum Orbem diffusa est. Quod verò Mahometani felicibus Bellorum eventibus victorias de Christianis aliquandò retulerint, & Sanctissima Palestinæ loca, quæ Jesus Christus vitâ, doctrinâ & morte suâ consecravit, armis invaserint, sibi-que subjecerint; id totum, permittente Deo, & plerumque nos ob peccata nostra castigante, evenisse persuasum habere debemus. Caterùm, fortunati bellorum exitus non demonstrant Religionis veritatem, alioquin Græcorum, & Romanorum, qui Idola colebant, & tamen multis toto Orbe victoriis inclyti erant, vera fuisset Religio. Quin & sæpius Mahometanos à Christianis cum exigua manu, Deo pro ipsis pugnante, Terrâ Marique cæsos, fusos, ac penè ad interuiccionem usque deletos fuisse & legimus in Historiis, & nostris temporibus vidimus. Quartò, nullus unquam Propheta *Mahometi*, ejusque Legi testimonium perhibuit. At, versâ vice, omnes Prophetæ Jesum Christum venturum Messiam cecinerunt, ejusque doctrinæ Sanctitatem commendarunt. Quintò, Mahometana Religio credi sibi vult nullâ inquirendi libertate, & librorum, quos Sanctos habet, lectionem interdicat, quod sanè evidens est indicium mercis, quæ hac Lege obtruditur, ut à nemine inspicì possit. At contra Jesus Christus suam apud Judæos prædicando doctrinam, illos ad Sacras Scripturas remisit, dicens: *Scrutamini Scripturas*, & *Matthæi* cap. 21. v. 29. *Erratis, nescientes Scripturas*. Sextò, *Mosè* à Deo missum, item & Jesum fuisse verum Messiam, in Lege & Prophetis promissum, fateatur Mahometes, & tamen scelestus ille impostor plura in suo Alcorano narrat, quæ planè contraria sunt his, quæ à *Mosè* in Pentateucho, & à Jesu Christo per suos Evangelistas & Apostolos prodita sunt. Scribit siquidem ille impostor, *Abrahamum* erexisse Templum *Mecchæ*, ibique cultum Dei, juxta Alcoranum, instituisse. Item *Ismaelem* adæquat *Isaaco*, penèque præfert, velut Prophetam, divini pacti ac promissionis hæredem, quo uno solo commento, ut nemo non videt, totam Veteris Testamenti Revelationem convellit, dissipat ac corrumpit *Mahometes*. Nec minus ille impostor adulterat Novi fœderis Revelationem, dùm, per putidissimum anachronismum, *Mariam*, quæ Jesum Christum peperit, eandem facit cum *Maria*, Sorore *Moyſis*, eamque fingit divinitus gravidam, per deviam, urgente partu, errasse, ac sub palma Jesum Christum enixam fuisse. Negat insuper ille Impostor, Jesum Christum esse Deum, eumque fuisse Cruci affixum, sed alium in Jesu Christi locum fuisse eum esse insulse pronunciat. Uno verbo, *Mahometes* doctrinam *Moyſis*, & Jesu Christi, quam tamen à Deo revelatam esse fateatur, totis viribus oppugnat, labefactat ac demolitur. Septimò, *Mahometes* in suo Alcorano, seu *Volamini Præceptorum*, inseruit Judæorum, seu Tal-

Talmudistarum, & Medrashitarum nugas, asserendo videlicet, cæremōnias Legis Mosaicæ, putà Circumcisionem, delectum ciborum, lotiones varias corporis, & alia id genus similia esse ad salutem prorsus necessariā. Collegit etiam in suo Alcorano errores Sabellianorum, Arianorum, Manichæorum, & aliorum hujus farinæ Hæreticorum. Undè perspicillè intelligitur, in hoc malè confarinato Alcorani Libro novam non exhiberi factam à Deo Revelationem, sed potiùs veteris ac novi Testamenti corruptelam, seu, ut meliùs dicam, congeri centonem & colluviem errorum. Denique, si conferatur Jesus Christus cum Mahomete, liquidè constabit, Jesum Christum esse verum Messiam, Mahometem verbò esse insignem Impostorem. Jesus quippè vocatur ab ipsomet Mahomete in Alcorano *Verbum Dei, Mens, Sapientia*: dicitur etiam conceptus absque hominis operatione in utero Mariæ Virginis. At Mahometes solito naturæ ordine genitus etiam à suis creditur. Jesus vitam egit semper immaculatam, cui nihil obici potest: Mahometes autem diu raptor fuit, mulerosus semper, & in cæno carnalium voluptatum, inlitar suis, volutatus, non solum plures ducens uxores, sed alienas invadens. Jesus, fatente ipsomet Mahomete, in Cælum evehctus est. Mahometes in sepulchro detinetur. Jesus visum cæcis, surdis auditum, claudis gressum, ægrotis salutem dedit, immò, fatente Mahomete, inortuos ad vitam revocavit: Mahometes se missum ait non cum miraculis, sed cum armis. Jesus elegit Discipulos, qui ex ipsiusmet Mahometis confessione fuerunt viri simplices ac Deum timentes: Mahometes sibi socios adscivit prædones, Saracenos videlicet, ab humanitate & pietate penitus alienos. Mitto alia plura, quæ legi possunt apud *Thyrsium Gonzalem de Santalla*, ollm Præpositum Generalem Societatis Jesu, in sua *Manuductione ad conversionem Mahometanorum*, & apud *Ludovicum Maraccium*, è Congregatione Clericorum Regularium Matris Dei, tam in suo *Predromo ad refutationem Alcorani*, quàm in sua *Refutatione Alcorani*. Hæc autem, quæ breviter hic diximus, abundè sufficiunt ad manifestandam pessimam fidem Mahometis discipulorum, qui, cùm essent sceleratissimi, & ad populos malis artibus, fraudibus ac mendaciis decipiendos à natura comparati, doctrinam Pseudo-Magistri sui, quæ tota de Auctoris sui genio libidinem spirat, & innumeris erroribus, fabulis, naniis, gerris & contradictionibus à capite ad calcem scatet, divinitus revelatam esse effutire non erubuerunt. Quod sanè dici haud potest de Sacris Evangelistis, qui Jesu Christi Historiam concinnarunt, & quorum Scripta, doctrinæ cælesti persusa, vita innocens, mors gloriosa, apertè produnt eorum sanctitatem, candorem, simplicitatem, & pro Magistri sui illibatæ doctrinæ defensione ac propagatione invictam constantiam, nullis tormentorum, suppliciorumve generibus cessuram.

Obiiciunt ultimò Infideles, virique Increduli: Iesus Christus natus est in quarto, vel, ut alii volunt Christiani, in sexto Mundi millennario,

rio, ergò non est verus Messias à Deo missus ad liberandum genus humanum, peccato Adami perditum, sicut supponunt Christiani. Prob. Ant. quia expediebat, ut Jesus Christus, si verus esset Messias, statim post peccatum Adami veniret in Mundum, & hominum saluti consuleret; nec permetteret ut perirent tot millia hominum, qui ante ejus adventum vixerunt. Præterea, inquit Infideles, virique increduli, si Christus fuisset verus Messias, debuisset per mortem suam, quâ genus humanum redempturus erat, suppeditare omnibus omnino hominibus auxilia ad salutem consequendam necessaria, eisque singulis infundere Fidem explicitam Mysterii suæ Incarnationis, citrà quam, ut docent Christiani, nemini, post sufficientem Legis Evangelicæ promulgationem potest ad salutem æternam patere aditus; atqui tamen post mortem Jesu Christi innumeri sunt peccatores, Schismatici, Hæretici, Turcæ, alique Infideles, qui, farentibus ipsimet Christianis, carent auxiliis ob obtinendam salutem æternam necessariis: Benè multi sunt etiam Infideles, *Negativi* dicti, qui Incarnationis Jesu Christi nullam planè notitiam habent, nedùm Fidem explicitam. Quæ igitur dici potest, Jesum Christum esse Messiam ad omnes redimendos homines missum à Deo, cum tamen paucos admodum salvaverit homines, & alios, qui propemodum infiniti sunt, reliquerit per inextricabiles tenebras oberrantes, in vitiis & erroribus jacentes, æternisque subinde addicendos suppliciiis?

Respondeo, tres potissimum afferri rationes, cur Jesus Christus, verus Messias ac Filius Dei, statim post peccatum Adami, carnem humanam non induerit ad genus humanum redimendum. Prima ratio traditur ab *Eusebio* in Proœmio lib. 8. *De Demonstratione Evangelica*, ubi hæc habet: Homines initio erant depravissimi & in summa impietate hæcque contemptu, ac scelerum omnium licentiâ & impunitate vitam agebant ferarum similiorem, quàm hominum; Cùm in latibulis & solitudinibus latronum more degerent, nullis Legibus, nullo civili usu atque cultu, neque doctrinarum aut artium, aut virtutis & sapientiæ consuetudinis studio ac perpolit. Cæterùm, veræ Religionis ac pietatis adeo expertes, nihil ut putarent extare præstantius corporibus, & iis, quæ sub sensu cadunt; quibus divinos adhibebant honores, velut bestiis, volucribus, serpentinibus, atque Tyrannis & immanissimis hominibus. Cùm igitur hujusmodi esset, & in his versaretur genus humanum, nondùm idoneum erat ad Dei Filium, seu Messiam, ejusque doctrinam ac remedium percipiendum, sed antè Legibus, Institutisque Moysi, ac Prophetarum aliorum, & Sanctorum aliquot virorum exemplis, monitisque formari ac veluti præparari debebat, ut barbarie illâ & ferocitate domitâ, paulatim ad Cælestis Magistri commercium aptaretur. Quo perfecto, in tempore adfuit Jesus Christus, & paululùm imbutis ac consuetis mortalium animis divinæ lumen veritatis intulit. Hæc ferè *Eusebius*, quibus similia disserit Lib. 1. *Historiæ Eccl.* cap. 2. juxta Editionem *Valesianam*. Altera ratio, cur Jesus Christus

stus statim post Adami peccatum non venerit ad redimendum genus humanum, in hoc sita est, quod conveniens erat, ut homo lapsus experiretur per multa secula imbecilles naturæ suæ vires ad operandum bonum, sicque, cognita suâ infirmitate pondere cupiditatis depreßa, ad Messiam venturum per Fidem confugeret, ejus medicinale auxilium imploraret, & in ejus meritis totius spei ac fiduciæ suæ Sacram anchoram collocaret. Tertiam denique rationem, cur Christus confestim post lapsum Adami, ad reparandum genus humanum non venerit, suppeditat S. Augustinus Tractatu 31. in Ioannem, ubi sic loquitur: *Multi dicunt, quare non antè venit Christus? Quibus respondendum est, quia nondùm venerat plenitudo temporis, moderante illo, per quem facta sunt tempora.* Sciebat enim, quandò venire deberet. Primò per multam seriem temporum & annorum prædicendus fuit: Non enim aliquid parvum venturum fuit. Diu fuerat prædicendus, semper tenendus. Quantò maior Iudex veniebat, tanto præconum longior series præcedebat. Errant autem gravissimè Infideles, virique increduli; dùm asserunt, Jesum Christum permisisse, ut omnes homines, qui ante ejus adventum vixere, perierint, æternamque damnationem incurrerint; id, inquam, oppidò falsum est, quia homines, qui ante Jesum Christum sive in Legè naturæ, sive in Legè Mosaica vixerunt, si in eum aliquandò venturum crediderint, per eam in Redemptorem Fidem, salutem æternam consecuti sunt. Ea quippè fuit virtus Christi Salvatoris nostri, ut etiam antequàm nasceretur, actu operaretur in eos, qui post peccatum Adami per Fidem ad corpus illius mysticum pertinebant, quique illius gratiæ medicinalis participes effecti salutem æternam sunt adepti: Itaque [ait S. Augustinus Epistola 49.] *Ab exordio generis humani, quicumque in eum [seu Jesum Christum verum Messiam] crediderunt, eumque utcumque intellexerunt, & secundum ejus præcepta piè & iustè vixerunt quandolibet, & ubilibet fuerint, per eum procul dubio salvi facti sunt. Sicut enim nos in eum credimus & apud Patrem manentem, & qui in carne jam venerit: Sic credebant in eum antiqui & apud Patrem manentem, & in carne venturum.* Sed hac de re uberius disseremus in Dissertatione de Fide in Jesum Christum Mediatorem.

Quod spectat fructum & beneficium mortis & passionis Jesu Christi, dogma Fidei est Jesum Christum mortuum esse, suumque pretiosum Sanguinem fudisse pro omnibus omninò hominibus, neminemque, nisi propriâ suâ culpâ, perire & damnari, sicut copiosè ostendimus in speciali Dissertatione de voluntate, quam Iesus Christus habuit, mortem subeundi pro salute omnium hominum, adeò ut jure optimo Redemptor omnium dici debeat, licet non omnes mortis ejus beneficium recipiã, sed hi tantum, quibus meritum passionis illius communicatur vel per Gratias ab intrinseco efficaces, quas Deus confert per voluntatem suam consequentem, vel per Gratias sufficientes, in sensu Thomistico intellectas, quas Deus

Deus per volūtatem antecedentem impertitur, vel omnibus offert ac præparat, ita ut nullus, nisi sua culpā, illis privetur. Fateor quidem, nonnullos etiānum extare Infideles, qui nihil de Iesu Christi Incarnatione, doctrinā, Morte & passione audierunt, ideoque dicuntur *Infideles negativi*, carentque Fide explicitā in Iesum Christum, quæ, nunc omnibus necessaria est, necessitate mediū & præcepti ad salutem æternam consequendam; nihilofecius dico, Iesum Christum etiam mortuum esse pro illis Infidelibus negativis, qui tamen æternis pœnis non addicuntur præcisè propter ignorantiam, quam habent de Iesu Christi Incarnatione, doctrinā Morte & passione, quia illa ignorantia in eis peccatum non est, nisi materiale, ut potequæ supponitur invincibilis & involuntaria; sed æternæ damnationi subiiciuntur propter peccata, quæ malā voluntate contraxerunt. Attamen ignorantia illa iusta est peccati Originalis pœna, quæ nisi misericordiā Dei solvatur, meritò arcet nondum iustificatos à Vita æterna. Cur autem Iesus Christus ad solvendam illam ignorantiam non mittat Prædicatores, qui istos Infideles negativos veram Iesu Christi Fidem edoceant? Inexplicabile Mysterium est, quod non penetrare, sed prono capite adorare debemus, dicendo cum Apostolo Paulo: *Quæ inscrutabilia iudicia Dei*. Et: *Homo tu quis es, qui respondeas Deo?* Docet attamen Sanctus Thomas quæstione 24 de veritate Art. 1. quòd si quis in Sylvis, vel Barbaris Nationibus enutritus, & auxiliis concursus Generalis Dei adjutus à peccatis abstineat, & adimpleat Legem Naturæ, Deus ipsum aut illuminabit interiùs, aut mittet ad illum, vel Prædicatores, vel certè Angelos de cælo, qui istum instruant in Fide. Quam S. Thomæ doctrinam probant exempla quorundam Gentilium, qui, antè adventum Iesu Christi, notitiam ipsius Incarnationis singulari Dei beneficio habuerunt, cuiusmodi sunt *Melchisedecus, Iobus, & Sybille*, ita dictæ, quasi divinorum Secretorum conscie, quæ in suis Libris Nativitatem Iesu Christi ex Virgine, Passionem & Resurrectionem tam clarè descripserunt, ut non futurorum prophetia, sed rerum gestarum historia videatur. Hinc est, quòd antiquissimi Patres, ut Sanctus Iustinus, *Athenagoras*, Sanctus Clemens *Alexandrinus*, & post eos *Lactantius, Eusebius, Cæsariensis Episcopus, S. Hieronymus, S. Augustinus*, & alii bene multi, Gentiles propriis eorum armis tam validè oppugnabant, ut Imperatores, sub pœna capitis, Sybillarum Librorum lectionem prohibuerint, sicut refert S. Iustinus in sua Apologia. Non clām me est, quosdam esse Criticos, qui asserunt, in tribus prioribus Ecclesiæ Sæculis, immò, superstitionibus adhuc Apostolis, multa Libris Sybillinis Libris addita & interpolata fuisse à quibusdam Christianis, motis quodam inordinato zelo, quo pro Christiana Religione fervebant; verum ipse, licèt negare omninò nolim, Libris Sybillinis, quales nunc habemus, factam esse quamdam additionem, contendo attamen, hanc additionem, seu interpolationem Libris Sybillinis nec temporibus Apostolorum, nec tri-

tribus prioribus Ecclesiæ sæculis factam fuisse . Incredibile quippè est , hanc additionem, seu potius fraudem, si ætate Apostolorum, vel in tribus prioribus Ecclesiæ Sæculis Sybillarum Libris facta esset , ita potuisse manere occultam , ut per quatuor Sæcula à nemine detegi potuerit , & antiqui Patres, quos mox laudavimus , tam Græci , quàm Latini , armis mendacii pro veritate contra Gentiles decertaverint . Has igitur Sybillarum de Jesu Christo prædictiones , quas olim Patres ad convincendos Gentiles adduxerunt, suisque Libris inferuerunt, pro veris, ac sinceris Sybillarum vaticiniis haberi debere censent sanioris Disciplinæ Critices viri, in quorum sententiam lubens ipse descendo. Sed satis hæcenus in ista prolusoria Dissertatione Infideles, virosque incredulos , negantes Jesum Christum esse verum Messiam , confutavimus , atque multis argumentis & motivis credibilitatis aduersus ipsos non solum demonstravimus, antiquos esse Libros , è quibus Christiani probant Iesum Christum esse verum Messiam in Lege promissum & à Prophetis prædictum, sed etiam vindicavimus cædorem & Fidem sive Evangelistarum, qui Historiam Iesu Christi litteris consignarunt, sive Apostolorum , qui omnia Prophetarum de Venturo Messia Oracula in Iesu Christo fuisse adamussim completa ubique prædicarunt , suoque profuso sanguine confirmarunt . Nunc Tractatum de Mysteriis & annis Iesu Christi Salvatoris nostri aggressuri, & totius illius vitæ Œconomiam descripturi, contra alios Incarnationis Dominicæ hostes, seu perfidos Iudæos , pugnandi Provinciam suscipimus . Non tamen iidem utemur armis, quibus in hacce Dissertatione prolusoria Infideles , virosque incredulos profligavimus, quia cum Iudæi non tantum recipiant, sed & acriter contra Infideles, virosque incredulos propugnent antiquitatem , revelationem , divinam inspirationem & auctoritatem Librorum, ex quibus Christiani probant , Iesum Christum esse Messiam , reiicere non possunt Prophetias veteris Testamenti , sed tamen, ne fateri cogantur , Iesum Christum esse verum Messiam Prophetarum Oraculis prædictum, in id toti incumbunt, ut Prophetias, quas adducunt Christiani, vanis & futilibus achibitis interpretationibus eludant, ostendantque , eas in Christo Iesu non fuisse adimpletas . Commotrabimus itaque in Tractatu nostro *De Mysteriis & annis Christi* frivolas , ineptas ac violentas esse illas interpretationes , quibus obstinati Iudæi Prophetarum Oracula à proprio & genuino sensu ad alienum & præposterum detorquere, iisque tenebras datâ opera offundere moliantur sepiarum more , quæ atramentum ante se evomunt , ut pisces effugiant, aut conspectum sui eripiant . Cæterum , quia perversiores Iudæi, Iesum Christum verum Messiam , Prophetarum Oraculis prædictum, agnoscere detrectantes , omnem omnino Fidem abrogant Scriptis Apostolorum & Evangelistarum , qui omnia Prophetarum de Venturo Messia Oracula in Iesu Christo completa fuisse testantur ; poterit facile lector ad hanc repellendam putidam Iudæorum calumniam iavicta in illo,

(LVIII.)

illos contorquere argumenta, quibus in hac Dissertatione prolusoria probavimus, Evangelistas, qui Historiam Iesu Christi descripserunt, nihil falsi circa ortum, Doctrinam, Miracula, Mortem, Resurrectionem, Ascensionem Iesu Christi, & illapsum Spiritus Sancti in Apostolos de industria scripsisse, quia erant viri simplices, candidi, ingenui, à mendacio proferendo penitus alieni, immò etiam illos, licet homines decipere voluissent, tantæque fraudis nesciendæ capaces fuissent, non potuisse tamen quidquam falsi in describenda Historia Iesu Christi excogitare, & Iudæis ac Gentilibus imponere, quia Gesta & Miracula Iesu Christi, quæ referunt Sacri Evangelistæ, non in aliquo angulo Terræ, non coram paucis & ignotis testibus, sed in tota Iudæa, in ipsa Hierosolymorum Urbe, & in maxima omnium luce contigerunt, inspectantibus infinitis propemodum Iudæis, quorum plurimi, ipsam rerum veritatem convicti, Fidem Iesu Christi amplexi sunt, & pro ipsius doctrinæ defensione, post dira tormentorum supplicia magnis animis tolerata, vitam cum morte commutarunt. Sed de auctoritate Evangelistarum plura dicemus in sequenti prolusoria Dissertatione.



(LIX.)

DISSERTATIO SECUNDA PROLUSORIA

DE FIDE ET AUCTORITATE EVANGELISTARUM,

Qui Historiam, ac Gesta Jesu Christi literis mandarunt;
ad cujus calcem attexitur brevis

DESCRIPTIO HISTORICO-CHRONOLOGICA;

*Comprehendens non solum ea, quae de Vita, Gestis, & Mi-
raculis Jesu Christi, in quatuor Evangeliiis referuntur,
sed etiam peregrinationem, quam, secundum ratio-
nem temporum, Apostoli Petrus & Paulus, post
Ascensum Jesu Christi in Coelum, ad præ-
dicandam Doctrinam Evangeli-
cam susceperunt.*



AMERI in præcedenti Dissertatione hæc pauca
dixerim, quæ ad Historiæ de Gestis & Sermoni-
bus Jesu Christi, Salvatoris nostri, ab Evangeli-
stis conscriptæ, adstruendam divinam authorita-
tem plurimum conducere possunt, nihilosecius
necessarium esse judicavi in veritatem Evange-
liorum plenius in hac secunda ad Tractatum *De
Mysteriis & annis Christi* prolusoriâ Dissertatio-
ne inquirere, & contra Iudæos, Infideler, viros-
que incredulos probare, nihil in Historia Jesu Christi, ab Evangelistis
descriptâ, narrari, quod possit in dubium, vel in controversiam revocari.
Ut autem id genus argumenti clariori, quoad ejus fieri poterit, methodo
pertractare valeam, Dissertationem istam in duos dividam Paragraphos.
In primo ostendam, Sacra Evangelia non esse supposititia, sed genuina,
quæ Authorem Deum habent, & ab his exarata sunt Scriptoribus, quo-
rum nomina præferunt. In altero Paragrapho diluam omnes objection-
es, quibus viri increduli, & Christianæ Religionis hostes fidem & au-
thoritatem quatuor Evangeliorum, in quibus describitur Historia Jesu
Christi, impetere ac labefactare moliantur.

PARAGRAPHUS PRIMUS,

*In quo ostenditur, quatuor Evangelia non esse supposititia,
sed genuina, ac divina auctoritate prædita, atque
ab illis Scriptoribus exarata, quorum
nomina præferunt.*

PRæmitto primò, Jesum Christum Dominum nostrum nec scripsisse Legem suam, nec expressis verbis scribendam præcepisse. Dixit quidem Christus Apostolis suis Cap. 28. v. 19. *Matthæi: Docete omnes Gentes; & Marci Cap. 16. v. 15. Euntes in Mundum universum prædicate Evangelium omni creatura;* sed non dixit: *Scribite Evangelium.* Constat etiam, Apostolos, Christi Domini mandato obtemperantes, & in diversas Orbis plagas dispersos, sine ullo scripto docuisse, saltem per aliquot annos. Hinc S. Irenæus lib. 3. adversus Hæreses cap. 4. ubi Traditionis utilitatem ac necessitatem commendat, hæc habet: *Quid autem, si neque Apostoli quidem scripturas reliquissent nobis, nonne oportebat ordinem sequi Traditionis, quam tradiderunt iis, quibus committebant Ecclesia, cui Ordinationi assentiunt multe Gentes Barbarorum, eorum, qui in Christum credunt, sine car. & re vel atramento scriptam habentes in cordibus suis salutem, & veterem Traditionem custodientes, in unum Deum credentes fabricatores Cæli & Terræ, & emulium quæ in eis sunt per Christum Iesum Dei Filium.* At, licet in Sacris Litteris non legamus, Jesum Christum expressis verbis præcepisse Discipulis suis, ut Historiam Evangelicam contingerent, crediderim tamen ipse, eò mandato, quo Iesus Christus injunxit Apostolis suis, ut docerent omnes Gentes, contineri Imperium scribendi Historiam, & Doctrinam Evangelicam, quia huicce Magistri sui mandato satis commodè morem gerere haud poterant Discipuli, nisi facta & dicta ejus litteris mandarent, idque tribus de causis. Prima est, quòd Discipuli Christi, quibus incumberebat onus prædicandi Evangelium per totum Orbem Terrarum, non poterant in singulis, quas perlustrabant, urbibus, sat temporis permanere, ut vivâ voce docerent omnia, quæ vel ad faciendam sibi Fidem, vel ad eam confirmandam necessaria erant, maximè, eùm Ethnici, ac Iudæi, multis præconceptis inanibus opinionibus, gravissimisque erroribus præpediti, non potuissent paucis verbis curari, sed multi eam in rem sæpiùsque repetiti sermones fuissent omninò necessarii, ut firma esset eorum Fides. Ne igitur in Prædicatione Doctrinæ Evangelicæ diuturniores moras necerent Apostoli & Discipuli Christi Domini, expediebat ut litteris consignaretur Historia Iesu Christi, necnon Doctrina Evangelica, quâ totus, quâ latè patet, Orbis ab illis imbui debebat. Altera causa

causa est, quòd Doctrina Evangelica, quæ ad ultimum usque rerum finem transmittenda erat, non potuisset satis tuto committi soli hominum memoriz, eaque ratione per tot sæcula servari incorrupta. Norunt quippè omnes, memoriam hominum non modò naturà non satis tenacem esse, sed etiam affectibus perturbari, sæpiùsque nos, velimus nolimus, experimur memoriam nostram labilem, vacillare, fluctuare, & in concinnandis narrationibus rerum, quas jamdudùm vidimus & audivimus, multis lapsibus obnoxiam esse, quo sit, ut multis erroribus & fraudibus pateat Historia, quæ memoriæ dumtaxat commissæ, nullis litterarum monumentis conservatur. Tertia denique causa est, quòd benè multi temporibus Apostolorum ad Christi Fidem conversi, cum avidissimè audissent narrari dicta & facta Iesu Christi, juberenturque ea latissimè spargere, optarunt sibi litteris consignata dari, ne è memoria suâ effluerent, & ut omnes lubentissimè Historiam Gestaque Iesu Christi legerent ac relegerent, & quidem multò jucundiùs quàm audiebant, quia ea, quæ leguntur & pensantur, altius memoriæ inhærent, nosque longè magis afficiunt. His igitur permotus rationibus facillè crediderim, eo mandato, quo Iesus Christus Apostolis suis jussit, ut docerent omnes Gentes, contineri præceptum Historiam Iesu Christi, & Doctrinam Evangelicam conscribendi.

Præmitto secundò, in primis Ecclesiæ Sæculis quatuor dumtaxat Evangelia *Matthæi, Marci, Lucæ & Ioannis* fuisse recepta. *S. Iræneus* caput integrum hanc in rem absumpsit, seu Libri tertii contra Hæreses caput undecimum, cui, in prisca versione, præfixus est hic titulus: *Ostensio quòd neque plura, nec minùs quàm quatuor possint esse Evangelia*. Eundem quatuor Evangeliorum numerum tutatur *Tertullianus*, sed præsertim lib. 4. contra *Marcionem* capp. 4. & 5. *Origines*, non modò Dogmatum sui ævi sed & antiquitatum Ecclesiasticarum callentissimus, ita de quatuor Evangelis loquitur apud *Eusebium* Cap. 25. Libri 6. Historiæ Ecclesiasticæ: *Sicut ex traditione accepi de quatuor Evangelis, quæ sola in universa Christi Ecclesia, quæ sub cælo est, citrà controversiam admittuntur; Primum scilicet Evangelium conscriptum esse à Matthæo, aliquandò quidem Publicano, postea verò Apostolo Iesu Christi, qui illud Hebraico sermone conscriptum edidit apud eos, qui è Iudaismo crediderunt. Secundum fuisse accepimus Evangelium Marci, qui, prout Petrus ipsi narraverat, id consecit. Quem idcirco Petrus in Epistola Canonica cum filium suum agnoscit his verbis: Salutat vos electa Dei Ecclesia, quæ est Babylone, & Marcus, filius meus. Tertium Evangelium Lucæ, quod à Paulo commendatur, in gratiam Gentilium. Postremum verò Evangelium Ioannis. Denique, Eusebium, Episcopus Cæsariensis, qui in recensendis antiquiorum Scriptorum Christianorum monumentis diligentissimè versatus est, quatuor tantum Evangelia fuisse omni ævo recepta in Ecclesia disertè asserit Lib. 3. Hist. Eccles. Cap. 24. Prætermitto, ne longior sim, antiquissimos trium priorum Ecclesiæ Sæculorum Patres, & Scriptores Ecclesiasticos, Apostolis*

foliis vel cœvos, vel proximos, qui hæc quatuor tantummodò Evangelia *Matthæi, Marci, Lucæ, & Ioannis*, tanquàm vera & genuina Apostolorum Opera laudant, quos inter sunt *Clemens*, Romanus Pontifex, *Polycarpus, Ignatius*, Martyr, *Papias, Iustinus, Athenagoras*, & alii, qui ex quatuor illis Evangeliiis multa proferunt loca, seu testimonia, prorsùs consentanea nostris Exemplaribus, quæ nos dubitare non sinunt, quin eadem Evangelia nunc habeamus, quæ illi à Majoribus acceperunt. Hanc perpetuam, sibi quæ semper constantem traditionem sequuta est Ecclesia Catholica, quæ his quatuor Evangeliiis *Matthæi, Marci, Lucæ, & Ioannis*, divinam asseruit ac vindicavit auctoritatem, cætera verò, quæ olim sub speciosis Apostolorum nominibus circumferebantur Evangelia, reprobavit ac proseripsit, videlicet *Evangelia secundum Petrum, secundum Paulum, secundum Andream, secundum Philippum, secundum Thomam, Matthiam, Bartholomæum, Barnabam, Nicodemum; Evangelium duodecimum Apostolorum, Evangelium Basilidis, Appellis, Tatiani, seu Encratitarum, Ebionitarum, Nazæarum, Egyptiorum; Proto-Evangelium Iacobi &c.* Hæc, inquam, Evangelia, tanquàm subdititia, & Apostolorum nominibus falsò inscripta, natalitiis tenebris damnavit Ecclesia, quòd multis annis ac fabulis scaterent. His præmissis duabus Observationibus.

Dico primò: *Quatuor hæc Evangelia Matthæi, Marci, Lucæ, & Ioannis, non esse supposititia, sed genuina & verè conscripta ab illis Authoribus, quorum nomina præferunt.*

Probatur hoc unico ratiocinio: Hi Libri sunt genuini, qui genuini habitus sunt ab omnibus proximè & continuatà serie sequentibus ætatibus: Atqui hæc quatuor Evangelia *Matthæi, Marci, Lucæ, & Ioannis*, habita sunt genuina ab omnibus proximè & continuatà serie sequentibus ætatibus, ergo genuina sunt & non supposititia. Major hujus syllogismi Propositio à nemine in dubium revocari potest. Minor verò Propositio probatur non solum ex illis locupletissimis testimoniis, mox à me laudatis, *S. Irenæi, Tertulliani, Origenis, Eusebii*, & aliorum vel Sanctorum Patrum, vel Scriptorum Ecclesiasticorum, *S. Polycarpi, S. Ignatii, Martyris, Papiæ, S. Iustini, & Athenagoræ*, qui omnes disertè asserunt, hæc quatuor Evangelia *Matthæi, Marci, Lucæ & Ioannis*, esse indubitata horumcè Evangelistarum Opera, & semper in Ecclesia summâ veneratione recepta, sed eadem minor Propositio probatur ex usu & consuetudine, quæ etiam obtinebat apud Christianos primi sæculi, quibus solenne erat hæc quatuor Evangelia in Ecclesiis legere. Cum enim Iudæi in Synagogis suis Scripta Moysis, cæterorumque Prophetarum lætarentur, dubitari non potest, quin primi sæculi Christiani, qui Iudæorum exemplum multis in rebus sectabantur, non modò Vetus Testamentum, sed & Evangelistarum Libros, quibus dicta & facta Iesu Christi continebantur, legere cæperint. Evangelia autem paulò post Passionem Iesu Christi, seu ante ultimam Imperatoris *Neronis* tempora, quibus *Petrus & Paulus* occisi sunt, fuisse

fuisse conscripta, ex eo maximè liquet, quòd *Matthæus* Cap. 24. *Marcus* Cap. 13. & *Lucas* Cap. 21. narrant Hierosolymorum Urbis excidii prædictionem, quasi rei etiam tunc futuræ, eo tempore, quo Evangelia ab eis scribebantur. Si enim eam prædictionem post eventum scripsissent Evangelistæ memorati, verbulo saltèm monuissent hanc prædictionem, fuisse eventu confirmatam. Quod tantùm abest ut fecerint, ut *Matthæus*, & *Marcus* hac monitione: *Qui legit intelligat*, quam subiiciunt præfagiis Hierosolymitanæ cladis, admonere videantur Christianos in Iudæa viventes, ut ad futura illa præfagia animum advertant, quòd possint vitæ suæ consulere. Cùm igitur hæc quatuor Evangelia statim ac conscripta fuerunt, Christiani primi Sæculi tanquàm genuina Evangelistarum Opera in Ecclesiis legere cæperint, & in sequentibus ætatibus ad nostra usque tempora Ecclesia Catholica, continuè Patrum traditioni inhærens, summâ semper veneratione ea itidèm exceperit, nullâ ratione dubitari potest, quin hæc quatuor Evangelia *Matthæi*, *Marci*, *Lucæ*, & *Ioannis*, genuina sint Opera eorum, quorum nomina præferunt. Hinc S. *Augustinus* Cap. 6. Lib. 33. contra *Faustum*, Hæreticum Manichæum, ait: *Platonis, Aristotelis, Ciceronis, Varronis, aliorumque eiusmodi Auctorum Libros, undè noverunt homines, quod ipsorum sint, nisi eâdem temporum sibi met succedentium contestatione continuâ? Quid ni pari jure dicere possumus, Evangelia, quæ præferunt nomina Matthæi, Marci, Lucæ, & Ioannis, verè ab illis fuisse conscripta, cùm ex proximè consequentium ætatum, aliarumque iis succedentium constanti testimonio fuerint semper quatuor illis Evangelistis adscripta.*

Respondebunt fortasse Infideles, virique increduli, hæc quatuor Evangelia fuisse quidem scripta à *Matthæo*, *Marco*, *Lucæ*, & *Joanne*, quorum nominibus sunt insignita, sed ea à Christianis vel statim, vel progressu temporis fuisse corrupta, eisque consultò inserta esse multa Gesta & miracula Iesu Christi, quorum nulla in primigeniis Evangeliiis mentio fiebat, ac subindè caducam esse quatuor, quæ nunc habent Christiani, Evangeliorum Fidem.

Sed facile refellitur hæc vana Infidelium, hominumque incredulorum Responsio, quia nullo pacto hæc quatuor Evangelia corrumpi poterant, quin hæc fraus omnibus statim innotuisset. Neque enim unus aut alter, sive numerò pauci, quatuor hæc Evangelia legebant, sed ubique Terrarum infiniti penè homines, cujusque sexus, cujusque ætatis, cujusque conditionis ea in summo pretio habebant, religiosè aservabant, parati mori potius, quàm ut sibi eripi sinerent. Summè etiam Christiani diligentia satagebant, ut vera Scripta Apostolica à falsis, spuris & supposititiis secernerent. In Canonem, hoc est in numerum librorum, qui pro Sacris haberentur, non alios referebant, quàm eos, quorum certa esset autoritas ex traditione celebriorum totius Orbis Ecclesiarum, quas Apostoli fundaverant & rexerant, necnon ex judicio

Con-

Conciliorum, quibus intererant Episcopi harum Ecclesiarum. Unde constat, non potuisse aliquid assui quatuor Evangelii extraneum, quod confestim facile non deprehenderetur. Denique, Ecclesia Catholica, per totum Orbem dispersa, semper docuit, & etiamnum docet, quatuor isthæc Evangelia *Matthæi, Marci, Lucæ & Joannis*, nunquàm fuisse adulterata, sed intacta prorsus ac illibata ad hæc usque nostra tempora pervenisse. Porro, in examine Librorum, qui vel Sacri, genuini & Canonici, vel spurii, supposititii, & corrupti haberi debent, standum est iudicio Ecclesiæ Catholicæ, juxta præceptum Christi Domini cap. 18. *Matthæi: Si quis Ecclesiam non audierit, sit tibi sicut Ethnicus & Publicanus.* Alioqui, si non ex publico Ecclesiæ iudicio, sed ex versatilibus privatorum hominum opinionibus iudicium ferendum esset de libris vel Sacris & genuinis, vel spuriiis & corruptis, pessimè fuisset Ecclesiæ consultum; nam quando variarent, ut sæpè contingere solet, privatorum hominum opiniones, & alius Librum ceu Sacrum & Canonicum reciperet, alius eundem librum tanquàm adulterinum, & corruptum exploderet ac repudiaret, quis, sodes, obortam litem dirimeret, & certum iudicium pronuntiaret, si id iuris Ecclesia à Deo non accepisset? Sic, ut nemo non videt, in re tanti momenti contentiones, quæ perpetuò emergerent, corpus Ecclesiæ varias in partes & factiones distraherent, eiulque auctoritatem, quæ Sacro-Sancta esse debet, humanæ opiniones penitus labefacerent. Cum igitur hæc quatuor Evangelia, *Matthæi, Marci, Lucæ & Joannis*, nunquàm fuisse interpolata, sed pura & integra ab Apostolis ad nostram usque ætatem conservata esse firmissimè teneat universa Ecclesia, eius indeficienti iudicio stare debemus, & dicere cum *S. Augustino* cap. 5. *Libri contra Epistolam Fundamenti: Evangelio non credem, nisi Ecclesiæ me commoveret auctoritas.* Ecquis, amabo, si micam, vel scintillam rationis habeat, non eligat potiùs universam auscultare Ecclesiam, quæ puritati Evangeliorum conservandæ iugiter invigilat, & ad retinendam doctrinam, his contentam, nihil, secundum Deum, prius & antiquius habet, quàm consecrari deliria ac præstigias quorundam iacredulorum, quos non pudet asserere, Evangelia *Matthæi, Marci, Lucæ & Joannis*, à Christianis de industria fuisse corrupta. Non clàm me est, in Evangelia, quæ toties & per tot annos, totque in locis exscripta sunt, diversas & variantes Lectiones fuisse inductas, sed tantùm abest, ut indè evinci possit, à Christianis dedita operâ fuisse corrupta Evangelia, ut potiùs variantes illæ Lectiones aptè probent divinam eorum auctoritatem. At enim, qui fieri potuisset ut tot variantes lectiones aliquam non afferrent labem dogmatibus, quæ docent Evangelistæ, nisi sciremus id factum Dei providentiâ, cum in tanta, quæ profertur, lectionum varietate, nullus reperiatur locus sic luxatus, ut alicui articulo Fidei sit fraudi futurus.

Hæc tamen sat superque probatum est, quatuor Evangelia, in quibus descripta est Historia Iesu Christi, non esse supposititia, sed genuina, &

ab illis exarata Scriptoribus, quorum nomina præferunt videlicet *Matthæi, Marci, Lucæ, & Joannis*. Nunc paucis ostendam, quâ lingua, seu quo idiomate, quoque stylo scripserint Sacri illi Evangelistæ.

S. *Matthæus*, primus omnium, scripsit Evangelium hebraicè, seu eo sermone, quo tum Iudæi utebantur, qui ex Hebræo, & Syriaco permixtus erat. Edidit quippè *Matthæus* Evangelium ad confirmandos & illustrandos Iudæos, qui recens ad Fidem Christi erant conversi, ac subinde non alio, quàm Iudæis tum temporis familiari & usitato, sermone scripsit. In hoc veteres Patres, & Scriptores Ecclesiastici *Papias, Tertullianus, Origenes* consentiunt. Testatur *Eusebius* lib. 5. Hist. Eccl. cap. 10. *Pantænus*, Philosophum Christianum, secundo exeunte Ecclesiæ sæculo reperisse Evangelium S. *Matthæi* hebraicè scriptum, à S. *Bartholomæo* in Indiis relictum. De Evangelio S. *Matthæi* hæc habet S. *Hieronymus* in Catalogo Scriptorum Ecclesiasticorum: *Matthæus, qui & Levi, ex Publicano Apostolus, primum in Iudæa propter eos, qui ex circumcisione crediderunt, Evangelium Christi litteris Hebraicis verbisque composuit. Quod quis postea in Græcum transfulerit, non satis certum est. Porro, ipsum Hebraicum habetur usque hodie in Casariensi Bibliotheca, quam Pamphilus Martyr studiosissimè confecit. Mihi quoque à Nazaræis, qui in Bersa, Urbe Syriæ, hoc volumine utuntur, describendi facultas fuit. Idem confirmat Sanctus ille Doctor in Præfatione in Evangelistas, ubi ait: De Novo nunc loquor Testamento, quod Græcum esse, non dubium est, excepto Apostolo Matthæo, qui primus in Iudæa Evangelium Christi Hebraicis litteris edidit. Ab hac Sanctorum Patrum sententia, in quam descendunt omnes Scripturæ Sacræ Interpretes, discessit *Desiderius Erasmus*, qui Tomo 6. recentis Editionis Lugdunæ Batavorum pag. 47. in Annotationibus in cap. 9. Matthæi, & Tomo 9. pag. 288. existimat, probabilius esse, Evangelium Matthæi eadem lingua Græcâ fuisse scriptum, quâ ceteri scripserunt Evangelistæ. *Cajetanus* etiam in Prologo ad Evangelium, Matthæi asserit, Matthæi Evangelium non Hebraicè, sed Græcè fuisse ab illo conscriptum, quia, inquit, nomina Hebraica Matthæus Græcè interpretatur, quod sanè, si Hebraicè ad Hebræos scripsisset *Matthæus*, prorsus inutile ac supervacaneum fuisset, cum facilè Hebræi vim & naturam Hebræorum vocabulorum significationem intellexissent, & ad ea explicanda interpretatione nullâ opus habuissent. Inter vocabula Hebraica, quæ in Evangelio interpretatur *Matthæus*, ista sunt: *Vocabunt nomen ejus Emmanuel, quod interpretatur nobiscum Deus*, cap. 1. vers. 23. *Clamavit Iesus dicens: Eli, Eli Lamma'sa'bathani, hoc est, Deus meus, Deus meus, ut quid dereliquisti me?* cap. 27. v. 46. Quæ vocabulorum Hebraicorum interpretationes, si *Matthæus* Hebraicè ad Hebræos scripsisset, nullius momenti & utilitatis fuissent, immò ipso Textu obscuriores evasisent. Hoc argumento convictus *Cardinalis Cajetanus*, autumavit, Evangelium non Hebraicè,*

sed Græcè à Matthæo fuisse scriptum . Sed in hoc hallucinatum esse doctissimum illum Cardinalem ex eo maxime evincitur, quòd Libros *Genesis*, & *Exodi* Hebraicè scriptos fuisse in confesso sit apud omnes, licèt in iisdem libris aliquæ reperiantur vocabulorum Hebraicorum interpretationes à vulgato Interprete insertæ, sicut, exempli gratiâ, *Genesis* cap. 39. vers. 49. *Galaad*, idest, *tumulus testis*. *Genesis* cap. 35. vers. 18. *Benoni*, idest, *filius doloris mei*, & vers. 19. *Benjamin*, idest, *filius dexteræ*. Denique, Libri *Exodi* cap. 12. vers. 11. *Phase*, idest, *transitus Domini*, & cap. 16. vers. 15. *Manhu*, quod significat, *quid est hoc?* Quemadmodum igitur nullus, propter illas vocabulorum Hebraicorum interpretationes, negavit unquàm libros *Genesis*, & *Exodi* esse Hebraicè scriptos, sic nemo inficias ire potest, Evangelium à S. Matthæo fuisse Hebraicè scriptum, tametsi in eo quædam vocabulorum & nominum Hebræorum, offendantur interpretationes, quas, ad faciliorem latentis mysterii intelligentiam, vulgatus Interpres, assilante Spiritu Sancto, addidit. Plura super hac re legi possunt apud Richardum Simonium in *Historia Critica Novi Testamenti* cap. 10. Obiter tamen Lector observare debet, nunc nonnisi Græcum extare S. Matthæi Evangelii Textum, qui tanquàm pro Textu primigenio habetur, eò quòd multis abhinc sæculis evanuerit Hebræo-Syriacum Matthæi Evangelium.

S. Marcus, alter Evangelista, & [ut inquit S. Hieronymus in Catalogo Scriptorum Ecclesiasticorum] *Discipulus & Interpres Petri*, juxta quod Petrum referentem audierat, Rogatus Romæ à fratribus, breve scripsit Evangelium. Quod cum Petrus audisset, probavit, & Ecclesiæ legendum suâ auctoritate dedit, sicut Clemens in Sexto Hypothyposeon Libro scribit. Et Papias, Hieropolitanus Episcopus, meminit hujus Marci, & Petrus in Epistola prima, sub nomine Babylonis, figuratè Romam significans: *Salutat vos electa Dei Ecclesia, quæ est Babylone, & Marcus filius meus. Assumpto itaque Evangelio, quod ipse consecerat, perrexit Egyptum, & primus Alexandria Christum annuncians, constituit Ecclesiam tantæ doctrinæ & vitæ continentie, ut omnes Sectatores Christi ad exemplum sui cogeret* &c. Marcus non Latine, sed Græcè scripsisse Evangelium fidem faciunt S. Hieronymus in Epistola ad Damasum, Romanum Pontificem, & S. Augustinus lib. 1. De consensu Evangelistarum cap. 2. ubi ait: *Horum sanè quatuor solus Matthæus Hebræo scripsisse perhibetur eloquio, ceteri Græco. Et sanè eâ linguâ Marcus Evangelium scripsit, quæ Ægyptiis & Alexandrinis, apud quos Evangelium prædicavit, vernacula erat; porro, Populi Alexandria, ubi Marcus fundavit Ecclesiam, illiusque primus Episcopus fuit; vernaculâ linguâ Græcâ utebantur, eisque peregrina & ignota omnino erat lingua Latina, probabilius itaque est, Græcè, & non Latine Evangelium à S. Marco fuisse conscriptum: Putavit quidè Baronius in Annalibus Ecclesiasticis ad annum Christi 45. nu. 39. Evangelium Marci Latine ab ipso esse scriptum, eo potissimum ductus argu-*

(LXVII.)

mento, quòd *Marcus*, rogatus Romæ à fratribus, scripserit *Evangelium*. Romanis autem non Græcus, sed Latinus sermo familiaris & usitatus erat, ac subindè *Marcus* non Græco idiomate, sed Latino, quòd Romanis erat in usu; *Evangelium* scribere debuit. Verùm, hoc Eminētissimi Annalium parentis argumentum elumbe ac jejunum est, tum quia Romæ plurimi erant Iudæi, qui sermonis Latini planè ignari, diuturnà per Asiam & Græciam habitatione Linguam Græcam callebant: Tum quia etiam tempore, quo *S. Marcus* scripsit *Evangelium*, adèò Romanis Lingua Græca familiaris & usitata erat, ut non solum viri nobiles, sed etiam infimæ sortis mulieres Græcè loquerentur, sicut testatur *Juvenalis Satyrà 6.* Quamvis ergò *Marcus* Romæ à fratribus rogatus scripserit *Evangelium*, indè tamen perperam infertur, illud Latine fuisse ab eo conscriptum.

Extat adhuc Venetiis manuscriptus Codex *Evangelii S. Marci*; quem doctissimus, testisque oculatus, *P. Bernardus de Monfaucon* in suo *Itinerario Italico*, pag. 55. asserit, esse antiquissimum. Sed quâ Linguâ scriptus sit ille Codex, Græcè, an Latine? Lis adhuc sub Iudice est. *Henricus Palladius* lib. 5. *Rerum Foro-Julienſium* pag. 81. & 82. eiusque nepos *Franciscus Palladius, Historiæ Foro-Julienſis* paginâ nonâ, affirmant, hunc manuscriptum Codicem Græcè esse scriptum. idem testatur *Corneilius à Lapide*, qui in Argumento in *Evangelium Marci* hæc habet: *Porrò, vir gravis Canonicus S. Marci Venetiis, qui ejus Reliquias in manu habuit, ideoque oculatus testis, meo rogatu hac de re inquirens, hisce de rebus rescripsit, Autographum hoc S. Marci Græcâ linguâ esse conscriptum, & ab Aquileja Venetias delatum fuisse anno Christi 1472.* Verùm, alii viri eruditi, videlicet, *Bernardus de Monfaucon*, loco mox à me laudato, *Abbas Iustus Fontaninus* in *Dissertatiuncula De Codice Veneto Evangelii S. Marci*, & *Bollandus* Tom. 3. Mensis Aprilis pag. 345. in contrariam abeunt sententiam, putantque, hunc manuscriptum Codicem *Evangelii S. Marci*, qui etiamnum Venetiis asservatur, Latine esse exaratum, eò quòd *Carolus IV. Germaniæ, & Bohemiæ Rex*, in Litteris, quas die 1. Novembris anni suorum Regnorum nono Feltris dedit ad *Ernestum Archiepiscopum*, & ad Capitulum Ecclesiæ Pragenſis, fidem faciat, se ad suam Italiæ procedentem invenisse in Ecclesiâ *Aquilejensi Librum Evangelii S. Marci* Latinis litteris in septem quaternis propriâ ejusdem Sancti Evangelistæ manu conscriptum, seque duos quaternos ultimos instantiâ magnarum precum obtinuisse, eosque per nobilem *Ludovicum de Hædalog missos Ecclesiæ Pragenſi dono dedisse.* Is certè ego nō sum, qui ejusmodi litteram componere, atque tot inter viros eruditos Arbitrari, aut ludeo sedere possum, aut velim, certissimè tamen, juxta constantem antiquorum Patrum & Scriptorum Ecclesiasticorum, quos superius laudavi, sententiam, pronunciare possum, *S. Marcum* non Latine, sed Græcè suum conscripsisse *Evangelium*.

(LXVIII.)

Tertius Evangelista *Lucas*, teste S. *Hieronymo* in Catalogo Scripto-
rum Ecclesiasticorum, Medicus Antiochenus, ut ejus Scripta indicant,
Seſſator Apostoli *Pauli*, & omnis peregrinationis ejus comes, scripsit
Evangelium, de quo idem *Paulus*: *Misimus*, inquit, cum illo fratrem,
cujus laus est in Evangelio per omnes Ecclesias. Et ad Colossenses: *Salu-*
tat vos Lucas, Medicus charissimus. Et ad Timotheum: *Lucas est mecum*
solus. Hunc Evangelistam audita magis, quàm visa descripsisse testatur
idem S. *Hieronymus* in Præfatione, quàm præxit Commentariis in
Matthæum: *Tertius*, inquit, *Lucas*, natione Syrus, Antiochenſis, cujus
laus in Evangelio, qui & ipse discipulus Apostoli *Pauli*, in *Achajæ* *Beco-*
*trie*que partibus volumen condidit, quædam altiùs repetens, & ut ipse in
Præmio confitetur, audita magis quàm visa describens. Græcè Evange-
lium scripsit S. *Lucas*, & causam, quæ ad illud scribendum impulerit, de-
clarat in Præmio sui Evangelii dicens: *Quando quidem multi conati sunt*
ordinare narrationem, quæ in nobis completæ sunt rerum, sicut tradiderunt
nobis, qui ab initio ipsi viderunt, & ministri fuerunt sermonis Visum est &
mibi assecuto omnia à principio diligenter ex ordine tibi scribere, optimè
Theophile, ut cognoscas eorum verborum, de quibus enatus es, verita-
tem. Fuerant quippè nonnulli Pseudo-Evangelistæ, qui vitam Iesu
Christi scribere aggressi, narrationes suas falsis rumoribus, & variis fa-
bulis asperserant, quibus S. *Lucas* suum opposuit Evangelium, in quo
totam Iesu Christi Historiam ab initio usque ad finem, sicut à *Paulo*,
aliisque Apostolis, qui ceu testes & spectatores rerum à Christo gesta-
rum fuerant, audierat, in Evangelio conscripsit. S. *Ambrosius* tribuit S. *Lu-*
cæ stylum Historicum. Cum enim sua singulis Evangelistis attribuis-
set, inquit: *At verò S. Lucas velut quemdam historicum ordinem tenuit,*
& plura nobis gestorum Domini miracula revelavit, ita tamen ut omnes
sapientiæ virtutes Evangelii istius completeretur historia. Idem aliquan-
tò post: *Historico enim stylo diximus hunc Evangelii Librum esse digestum.*
Denique describendis rebus, quàm exprimendis præceptis; studium ube-
rius, comparatione aliorum, videmus impensum. Et ipse Evangelista,
historico more de narratione sumpsit exordium: Fuit, inquit, in diebus He-
rodis, Regis Iudæ, Sacerdos quidam nomine *Zacharias*, eamque histo-
riam plenâ digestionem prosequitur. Multa Loca ex Evangelio S. *Lucæ*,
tànquàm partes insinceras & assutas temerario ausu expunxit olim ac
refecit Hæreticus *Marcion*, quem *Tertullianus* solidè confutavit, præ-
sertim Libro quarto, quem contra illum Hæreticum lucubravìt.

Quartus Evangelista est S. *Joannes*, cujus vitam in Catalogo Scri-
ptorum Ecclesiasticorum describens S. *Hieronymus*, hæc habet: *Joannes*
Apostolus, quem Iesus amavit plurimum, filius Zebedæi, frater Iacobi
Apostoli, quem Herodes post Passionem Domini decollaverat, novissimus
omnium scripsit Evangelium, rogatus ab Asiæ Episcopis adversus Ce-
rinthum, aliosque hæreticos, & maxime tunc Ebionitarum dogma con-
surgens,

surgens, qui asserunt, Christum ante Mariam non fuisse. Vnde & compulsum est divinam eius nativitatem edicere. Sed & aliam causam hujus scripturæ ferunt; quod cum legisset Matthæi, Marci, & Lucæ volumina probaverit quidem textum Historiæ, & veræ eos dixisse firmaverit, sed unius tantum anni, in quo & passus est, post carcerem Ioannis Historiam texuisse. Prætermisso itaque anno, cuius Acta à tribus exposita fuerant, superioris temporis antequam Ioannes clauderetur in carcere, gesta narravit, sicut manifestum esse poterit iis, qui diligenter quatuor Evangelistarum volumina legerint. Evangelium à Sancto Ioanne fuisse Græcè scriptum, extra omnem dubitationis aleam positum est. Si autem scire aveat lector causas, ob quas, Marcus, Lucas, & Ioannes Evangelium Græcè scripserint, duas hic breviter indicabo. Prima causa petitur ex communitate Linguae Græcæ. Nulla si quidem Lingua eo tempore, quo Christianæ Religionis pomæria per totum, quâ latè patet, Orbem dilatanda erant, & Evangelium in gratiam non modo Iudæorum, sed & multarum aliarum Nationum litteris consignari debebat; nulla, inquam, id ætatis Lingua magis nota, pervulgata & familiaris fuit, quàm Lingua Græca, utpotè quæ per Victorias Alexandri Magni, & Imperium Græcorum in plurimis locis plantata, apud omnes ferè Orientales in usu, & quasi vernacula fuit. Hinc & Græca ubique legi, Latinam autem linguam suis finibus exiguis contineri, ait Cicero in Oratione pro Archia. Quin, & ipsi Iudæi Linguam Græcam in usu fuisse asserunt viri eruditi, idque constat exemplo Iosephi, qui, etsi Iudæus esset, Græco tamen idiomate sua Opera conscripsit. Altera causa desumitur ex dignitate Linguae Græcæ, quâ tota Gentilium Philosophia erat scripta, quæque apud omnes in maximo pretio habebatur. Cum ergo Gentes cum Iudæis ad Fidem essent vocandæ, congruentissimè Linguâ Gentilitiâ, seu Græcâ, quæ inter Linguas Gentilitias nobilissima erat, Evangelium à Marco, Luca & Ioanne fuit exaratum.

Quod spectat stylum, seu modum scribendi Evangelistarum, constat illum non esse affectatum, limatum & excultum, sed facilem, simplicem, & ad captum populorum, in quorum gratiam scribebant, accommodatum. Hinc appositè Lactantius Firmianus lib. 5. Divinarum Institutionum cap. 1. ait: Hæc in primis causa est, cur apud sapientes, & doctos, Principes hujus Sæculi, Scriptura Sancta Fide careat, quod Prophetæ communi ac simplici sermone, ut ad populum, sunt locuti. Contemnunt itaque ab iis, qui nihil audire, vel legere nisi expolitum, ac disertum volunt, nec quidquam inherere animis eorum potest, nisi quod aures blandiori sono permulcet. Illa verò, quæ sordida videntur, anilia, inepta, vulgaria aestimantur. Adeo nihil verum putant, nisi quod auditu suave est, nihil credibile, nisi quod potest incutere voluptatem. Nemo rem veritate ponderat, sed ornatu. Non credunt ergo divinis, quia sùco carent. Hunc autem Scriptu-

rz Sacre impolitum stylum fastidiunt Grammaticuli, qui toto vitæ suæ
 tempore solos *Cicerones, Demosthenes, Homeros, Varrones, cæterosque*,
Poëtas mirantur, eorum voculas aucupantur, & in ornandis limandis-
 que periodis bonas horas malè collocant. Sed non advertunt isti Gram-
 maticuli, morosi munditiarum in stylo exactores, eam, quæ in Evan-
 gelistarum stylo, licet inculto, se se prodit, conspicuam sinceritatem,
 nativam, minimèque affectatam persuadendi vim, admirabilem deni-
 que, quam nulla artis lenocinia attingunt, facilitatem, quæ nec caret,
 nec superbit suis ornamentis, quamque Deus cum tanta dignitate & sa-
 pientia conjunxit, ut summa ingenii subtilitas, & maxima doctrinæ co-
 pia satis superque quod discat, quod expendat, quod miretur, hic inve-
 nire queat. Velint itaque nolint Grammaticuli, debent in simplici
 Evangelistarum stylo agnoscere eorum in scribendo sinceritatem, re-
 rum quas narrant, veritatem, & animum, à captanda vanâ gloriâ peni-
 tûs alienum. In hos Grammaticulos, qui in tractandis Mysteriis Iesu
 Christi, aliisque piis & Christianis argumentis omnem sermonis simpli-
 citatem elato supercilio contemnunt, & illecebroso gloriolæ gustu ti-
 tillati, antiquorum Oratorum & Poëtarum eloquentiam plenis buc-
 cis crepantes, ubique *Ciceroniani* audire gestiunt, jure opii. no *Desiderius*
Erasmus in suo *Dialogo*, cui titulus est *Ciceronianus*, invehitur his ver-
 bis: *Quale porro sit, materiam piam ob hoc ipsum putere nobis, quod piè*
tractata sit? At piè tractari qui potest, si numquam dimoveas oculos à
Virgiliis, Horatiis, ac Nasonibus? Nisi fortè quorundam studium appro-
bas, qui fragmentis Homericorum, aut Virgilianorum versuum, undique
decerptis, & in centonem consarcinatis, Christi vitam descripserunt. Ope-
rosum sanè scribendi genus, sed cui unquam ista lacrymulam extulerunt?
Quem ad pietatem commoverunt? Quem ab impura vita revocarunt? At qui
non ita multum dissimilis est istorum conatus, qui verbis, sententiis, figuris
ac numeris ex Cicerone congestis, convelliunt argumentum Christianum.
Quid cum laudis fert ille rhapsodus? Nempe quod accuratè versatus est in
Homero sive Virgilio. Quid fructus affert hic Ciceronianus? applauditur
diligenter in M. Tullii scriptis versato, sed tantum ab iis, qui & ipsi in
iisdem versati, quid unde decerptum sit agnoscunt. Habet ea res volupta-
tem quamdam, fateor, sed quàm apud perpaucos, tum eius generis, ut
facile vertatur in satietatem; postremò, quæ nihil aliud sit quàm voluptas.
Cæterum, illud, sine quo Fabius negat esse mirabilem eloquentiam, quod
in concitandis affectibus situm est, prorsus abest. Et tamen nobis interim
videmur Marones ac Cicerones Oportebat enim omnem Christia-
norum Orationem respicere Christum, sine quo nec suave, nec splendidum
est quidquam, nec utile, nec honestum, nec elegans, nec faciundum, nec
eruditum, liceat sanè præcludere ad seria pueris. In veris, in seriis, quodque
gravius est, in piis materiis, quis ferat ista paganica progymnasmata?
 Et sub finem ejusdem *Dialogi* ait idem, *Scriptor*: Proinde de rebus Sacris

pri-

primum ea combibenda est persuasio, quæ verè Christiano digna sit. Id si fiat, nihil videbitur ornatus celesti Philosophiâ, nihil suavius Iesu Christi nomine, nihil venustius vocabulis, quibus Ecclesiæ lumen res arcanas tractant. Nec videbitur ullius sermo venustus, qui non congruit personæ, nec rebus est accommodatus, monstrosus etiam, qui res pietatis tractat verbis impiorum, quique materiam Christianam Paganicis nugis contaminat. Hinc discuntur Disciplinæ, hinc Philosophia, hinc Eloquentia, ut Christum intelligamus, ut Christi gloriam celebremus. Hic est totius eruditionis & eloquentiæ scopus &c. Facessant igitur Grammaticuli illi, quibus displicet simplex Evangelistarum stylus, & discant ab Apostolo Paulo, Deum non elegisse ad prædicandum, vel scribendum Evangelium Oratores, eloquentes ac facundos viros, sed simplices, ignobiles & incultos homines, ut doctrinæ Evangelicæ per totum Orbem propagatio nullis humanis præsidiiis, sed soli omnipotentis Dei accepta referretur: scriptum est enim [verba sunt Apostoli primæ Epistolæ ad Corinth. cap. 1.] perdam sapientiam sapientium, & prudentiam prudentium reprobo. Ubi Sapiens? ubi Scriba? ubi Conquisitor hujus sæculi? Nonne stultam fecit Deus sapientiam hujus Mundi? Nam quia in Dei sapientia non cognovit Mundus per sapientiam Deum, placuit Deo per stultitiam prædicationis salvos facere credentes... sed quæ stulta sunt Mundi elegit Deus, ut confundat sapientes, & infirma Mundi elegit Deus, ut confundat fortia, & ignobilia Mundi & contempnibilia elegit Deus, & ea, quæ non sunt, ut ea, quæ sunt, destrueret, ut non gloriatur omnis caro in conspectu ejus.

Plura de Evangelistarum stylo in præsentiarum non dicam, sed præcipuam quæstionem, quæ spectat veritatem Historiæ Iesu Christi in Evangeliiis descriptæ, paucis verbis attingam. Quamvis enim pluribus, iisque invictis planè momentis in superiori Dissertatione contra Iudæos, Infideles, & viros incredulos ostenderim, Evangelistas, qui Historiam Iesu Christi litteris mandarunt, fuisse homines candidos, simplices, & ingenuos, qui nec alios decipere voluerunt, nec potuerunt, etiamsi voluissent, eosque veritatem Historiæ, quam descripserunt, manifestò comprobasse tam Oraculorum, quæ antiqui Iudæorum Prophetæ de venturo Messia cecinerunt, complemento; tum publicis miraculis, quæ ediderunt, tum stupendâ barbararum Gentium ad Fidem Christi conversione; tum evidenti ruina totius Nationis Iudaicæ, quæ ob summam perverciam, Evangelio credere noluit; tum denique atris suppliciis, carcere, exilio, ludibriis, & ignominiosa morte, quam pro defensione veritatis Evangelii, quod scripserant, constanter & impavidis animis subierunt; quamvis, inquam, his & aliis id genus argumentis Historiæ Iesu Christi ab Evangelistis descriptæ veritatem stabiliverim, nihilosecùs non abs re erit breviter hic ostendere, Historiam, ab Evangelistis descriptam, omnibus Notis & caracteribus præditam esse, quibus vera & indubitata Historia secerni solet à falsa vel suspectâ.

Dico itaque secundò, Historiam Iesu Christi ab Evangelistis concinnatam omnibus veritatis notis & characteribus præfugere, quibus vera Historia distinguitur à falsa aut suspecta.

Prima veritatis Nota, quam habet Historia Iesu Christi ab Evangelistis descripta, in eo potissimum sita est, quòd quatuor Evangelistæ in rerum, quas de Iesu Christo scripserunt, narratione, perfectissimè cohererent cum aliarum Nationum Historiis, cum quibus Vita Iesu Christi, ab illis exarata, maximam conjunctionem habet. Multa quidem Historiæ addere possunt Impostores, at si hæc Historia ab Impostoribus confarcinata cum aliis diversarum Nationum Historiis sit conjuncta, & ea cum illis conferatur, vix fieri potest, ut mendacium non deprehendatur, & impostores se se aptè prodant mendaces. Porro, omnia, quæ dicunt & referunt Evangelistæ, apprimè consentanea sunt Historiis Iudæorum, Samaritanorum, Romanorum & aliorum Gentilium. Et primò quidem, Evangelistæ non solum indicant Pontifices, qui præerant populo Iudaico, cum Iesus in Terris degeret, quosque etiam memorant Iudæi in Catalogo suorum Pontificum, sed insuper apertam mentionem faciunt Ioannis, cognomento Baptiste, Herodis, Regis, qui illum interfecit, Herodiadis, Pontii Pilati, Caiphe, & aliorum, quorum meminit Iosephus, Iudæus, in ea, quam edidit, Iudæorum Historia. Secundò, Evangelistæ testantur, Messiam jam venisse eo tempore, quo scribebant. Qua in re Evangelistæ consentientes habebant Iudæos, quos hæc pervalerat opinio, Messiam nasci debere eo tempore, quo Iesus Christus natus est, sicut ostendemus in Paragrapho secundo Dissertationis septimæ huiusce Tractatus. Quin, & veteres Samaritanos agnovisse Prophetias de Messia, quem expectabant, debuisse impleri eo tempore, quo Christiani docent in Iesu Christo fuisse impletas, luculenter probat exemplum *Dosithei*, genere Samaritani, qui [teste *Eulogio*, Patriarchâ Alexandrino, apud *Photii* Bibliothecam Codice 220.] coævus fuit Hæresiarchæ *Simoni Mago*, hoc est, floruit temporibus Apostolorum. Hic siquidem *Dositheus* voluit persuadere Samaritanis suis, quod ipse erat Christus prædictus à Moïse, & visus est induxisse nonnullos in suam sententiam, quemadmodum narrat *Origenes* lib. 1. contra *Celsum*, & confirmat laudatus *Eulgius*. Consentiebant itaque Iudæi, & Samaritani cum Evangelistis nasci debere Messiam eo tempore, quo Christus prodiiit in Mundum. Tertiò Iudæi non aliundè, quàm ex suorum Prophetarum vaticiniis scire poterant, Messiam eo tempore nasci debere, quo Iesus Christus in lucem editus est; atqui Evangelistæ clarissimè ostendunt, Iesum Christum natum & mortuum esse his temporibus, quibus eorundem Prophetarum vaticinia, ortum & mortem Messie assignarunt. Commonstrant etiam iidem Evangelistæ, nullum esse actum Vitæ Iesu Christi, qui non habuerit clara Prophetarum vaticinia, & mortem, quam pertulit in Cruce, non tam videri à Prophetis prænunciatam, quàm enarratam ab Historicis, qui hujus tes-

(LXXIII.)

res oculati fuissent. Concordat itaque Historia Jesu Christi ab Evangelistis descripta cum Sacra Iudæorum Historia, quæ continentur antiqua de venturo Messia, Prophetarum Oracula. Denique, nullâ in re ab Historia Romanorum, vel aliorum Gentilium discrepat Historia Jesu Christi ab Evangelistis tradita litteris. Nam Evangelistæ tempora, quibus natus, baptizatus, & mortuus est Jesus Christus, signant nominibus Imperatorum Romanorum *Augusti*, & *Tiberii*. Ajunt, Imperatorem *Augustum*, paulò antequàm nasceretur Jesus Christus, promulgasse Edictum, quo describeretur universus Orbis. Narrant, Magos ad cunas Christi, præeunte stellâ venisse. Referunt stragem, quam de infantibus edidit *Herodes*, crudelissimus Iudæorum Rex. Memorant prodigiosissimum illud solis deliquium, quod, moriente Jesu Christo, contigit. Quæ omnia verissima esse consentitur tùm Historici Romani *Cornelius Tacitus*, *Suetonius*, & *Phlegon Trallianus*, Hadriani Imperatoris Libertus, tum alii Scriptores Ethnici *Macrobius*, & *Chalcidius*, *Platonius*, nec ea unquàm *Porphyrius*, *Celsus*, & *Julianus*, Imperator Apostata, omnes Christianis infensissimi, ausi sunt negare. Patet igitur, Historiam Jesu Christi ab Evangelistis scriptam consentire cum Iudæorum, Samaritanorum, Romanorum, aliarumque Gentium Historiis, eamque subindè præcipuè veritatis caractere munitam esse, quo vera Historia discernitur à falsâ & spurâ.

Altera veritatis Nota, quâ Historia Jesu Christi facilè secerni potest ab Historia falsâ & spurâ, in eo præsertim posita est, quòd quatuor Evangelistæ in diversis ac distantibus locis Historiam Jesu Christi litteris consignarunt, & tamen ubique in sua narratione sibi semper constant, & nullibi veris, seu realibus antilogiis, seu contradictionibus, implicantur, quod sanè non solum evidens est maximum veritatis & sinceritatis testimonium, sed etiam luculentissimum argumentum specialis assistentiæ Spiritus Sancti, qui Evangelistarum menti impressit illustrationem & cognitionem rerum, quas litteris mandare debebant, eorum voluntatem movit inspirando, excitando, & singulari assiatu impellendo, ut fidelitèr & constantèr eas litteris consignare vellent; eorum manui continuè assistentiâ adfuit, ac denique sic eos scribentes direxit, ut nullam, vel minimam falsitatem sive his, quæ divinitus ipsis revelata erant; sive his, quæ viderant, vel audierant, immiscerent. Occurrunt quidem, fateor, in Sacris Evangeliiis nonnullæ difficultates, & apparentes antilogiæ, quæ tamen tantùm abest, ut Evangelistarum auctoritatem deprimant, ut potius majorem illis fidem concilient. Per eas siquidem apparentes antilogias palàm innotescit omnibus bona & sincera fides Evangelistarum, nullique ampliùs superest suspicandi locus, quatuor Evangelistas, quasi ex compacto & conspiratione inter se se factâ ad scribendam Historiam Jesu Christi animum appulisse, aut alium ex alio scripsisse: Si aliqui [Evangelistæ] De temporibus, ac locis, & numeris dixerunt variè,

nihil dictorum præjudicat veritati. Si enim ex toto, inque omnibus consonarent, & cum eximia diligentia, atque curâ ad tempora ac loca omnia usque ad singula equaliter concurrerent, nemo inimicus credidisset unquam, quin illi communi ad decipiendum consilio congregati, quasi ex humana quadam conspiratione Evangelium contulissent. Nunc verò, quæ videtur in rebus exiguis dissonantia, ab omni illos suspitione tuetur, satique clarè scribentium existimationem defendit, verba sunt S. Ioannis Chrysostomi Homilia 1. in Cap. 1. Matthæi. Cæterum, antilogias, quæ in Sacris Evangelii occurrunt, non esse veras & reales, sed dumtaxat apparentes, liquiddò constabit ex his, quæ in sequenti Paragrapho tum dicturus.

Tertia veritatis Nota, quâ Historia Jesu Christi ab Evangelistis descripta distinguitur ab Historia falsâ vel suspectâ, petitur ex infallibili iudicio Ecclesiæ Catholicæ, quæ, ut superius observavimus, secuta antiquam Traditionem Patrum, quibusdam pseudo-Evangelistis, procussis ab Hæreticis, omnem omnino fidem & auctoritatem abrogavit, quatuor vero Evangelia Matthæi, Marci, Lucæ, & Ioannis, tanquam divinâ auctoritate prædita, à temporibus Apostolorum ad nostram usque ætatem excepit, approbavit, consecravit, summâque diligentia omni ævo cavit, ne vel levissimus error temporum injuria in ea irreperet. Scripturarum autem vindex est Traditio, Traditionis verò index est antiquitas, & antiquitate fulta Catholica Ecclesia discernit indeficienti iudicio vera Evangelia à falsis. Repudiat falsa Evangelia, & se ab illorum deformitate pravitateque abstrahit. Vera Evangelia approbat, genuina declarat, eorumque incorruptâ nititur integritate. Hoc infallibile Ecclesiæ Catholicæ in discernendis Libris Sacris genuinis à spuris iudicium semper Sancti Patres opposuerunt his, qui sacrilegâ temeritate, Sacrorum Librorum veritatem, antiquitatem, & auctoritatem negarunt, aut impugnare moliti sunt. Hic in exemplum asseram *Fauslum*, Manichæum, qui Evangelicarum & Apostolicarum Scripturarum veritatem acriter oppugnans, hæc olim obiciebat Christianis: *Nec immeritò nos ad hujusmodi scripturas tam inconsonantes & varias, numquam sanè sine iudicio ac ratione aures asserimus; sed contemplantur omnia, & cum aliis alia conferentes, perpendimus utrum eorum quidque à Christo dici potuerit, necne. Multa enim à Majoribus vestris eloquiis Domini nostri inserta verba sunt, quæ nomine signata ipsius, cum ejus Fide non congruant: Præsertim, quia, ut jam sæpe probatum à nobis est, nec ab ipso hæc sunt, nec ab ejus Apostolis scripta, sed multa post eorum assumptionem à nescio quibus & ipsis inter se non concordantibus, semi-Judæis per famas opinionisque conperta sunt, qui tamen omnia eadem in Apostolorum Domini conferentes nomina, vel eorum, qui secuti Apostolos viderentur, errores ac mandacia sua secundum eos se scripisse mentiti sunt. Huic *Fausli*, Hæretici Manichæi, & Evangelicarum, Apostolicarumque Scripturarum veritatis acerrimi infectoris, Objectioni S. Augustinus lib. 33. contra eundem Hæreticum*

cap. 6. respondet his verbis : *Quæ unquam litteræ ullum habebunt pondus auctoritatis, si Evangelicæ, si Apostolicæ non habebunt ? De quo Libro certum erit cujus sit, si litteræ, quas Apostolorum dicit & tenet Ecclesia, ab ipsis Apostolis propagata, & per omnes Gentes tantâ eminentiâ declarata, utrum Apostolorum sint, incertum est : Et hoc erit certum scripsisse Apostolos, quod huic Ecclesiæ contrarii hæretici proferunt auctoritatis suorum nominibus appellati, longè post Apostolos existentium ? Quasi verò & in Litteris Secularibus non fuerint certissimi auctores, sub quorum nominibus postea multa prolata sunt, & ideò repudiata, quia vel iis, quæ ipsorum esse constaret, minimè congruerunt, vel eo tempore, quo illi scripserunt, nequaquàm innotescere, & per ipsos, vel familiarissimos eorum in posteros prodi, commendarique meruerunt. Nonne, ut alios omittam, sub Hippocratis, Medici nobilissimi, nomine quidam Libri prolati, in auctoritatem à Medicis non recepti sunt ? Nec eos adjuvabit nonnulla similitudo rerum atque verborum, quandò comparati eis, quos verè Hippocratis esse constaret, impares iudicati sunt, & quid ab eo tempore, quo & cetera scripta ejus non innotuerunt, quid verè ejus essent. Hos autem Libros, quibus illi, qui de transverso proferuntur, comparati respuuntur, undè constat esse Hippocratis, undè si quis hoc neget, nec saltem refellitur, sed videtur, nisi quia ab ipso Hippocratis tempore, usque ad hoc tempus, & deinceps successionis series commendavit, ut hinc dubitare dementis sit. Platonis, Aristotelis, Ciceronis, Varronis, aliorumque eiusmodi Auctorum Libros, undè noverunt homines quod ipsorum sint, nisi eadem temporum sibimet succedentium contestatione continua ? Multi multa de Litteris Ecclesiasticis conscripserunt, non quidem auctoritate canonicâ, sed aliquo adiuvandi studio sive discendi. Undè constat quid cujus sit, nisi quia his temporibus, quibus ea quisque scripsit, quibus potuit, insinnavit atque edidit, & inde in alios atque alios continuata notitia latinisque firmata ad posteros, etiam usque ad nostra tempora pervenerunt, ita ut interrogati cuius quisque liber sit, non hæsitemus, quid respondere debeamus ? Sed quid pergami in longè præterita ? Ecce istas litteras, quas habemus in manibus, si post aliquantum tempus vitæ huius nostræ, vel illas cuiusquam Fausi esse, vel has neget esse meas, unde convincitur, nisi quia illi, qui nunc ista noverunt, notitiam suam ad longè etiam post futuros continuatis posterorum successionibus trajiciunt ? Quæ cum ita sint, quis tam tanto furore cæcatur, nisi demoniorum, mendaciloquorum malitiâ atque fallaciâ consentiendo subversus sit, qui dicat, hoc mereri non potuisse Apostolorum Ecclesiam, tam Fidem, tam numerosam fratrum concordiam, ut eorum scripta fideliter ad posteros trajicerent, cum eorum Cathedras usque ad præsentem Episcopos certissimâ successionem servarint, cum hoc qualemcumque hominum scriptis, sive extra Ecclesiam, sive in ipsa Ecclesia, tantâ felicitate proveniat. Hoc, longiusculum licet, S. Augustini Testimonium hic excribere haud piguit, ut inde magis elucefceret veritas Historiæ*

Iesu Christi, descriptæ in quatuor Evangeliiis, quæ continuâ & ab ipsis Apostolis ad nostram usque ætatem nunquàm interruptâ sæculorum serie, tanquàm vera, genuina, & divina prædita auctoritate semper summâ veneratione prosecuta est, eaque facta custodivit Catholica Ecclesia. Sed de veritate & auctoritate quatuor Evangeliorum satis hæcenus dictum sit, passisque velis veniamus nunc ad objectiones, quæ nonnulli increduli, si levi eis derogare nituntur, ad quas diluendas sequentem Paragraphum instituemus.

PARAGRAPHUS SECUNDUS,

*In quo diluuntur objectiones, quibus increduli fidem
& auctoritatem quatuor Evangeliorum
impetere solent.*

Objectiones, quas ad labefactandam fidem & auctoritatem quatuor Evangeliorum proponunt viri increduli, sunt duplicis generis. Aliæ quippè eò tendunt, ut probent, quatuor Evangelia fuisse interpolata, seu à Christianis progressu temporis eis assuta esse quædam fragmenta, quæ non extant in antiquis Codicibus. Aliæ objectiones eò collimant, ut ostendant, multas in quatuor Evangeliiis offendi Antilogias, seu contradictiones, quæ illis omnem omnino fidem abrogant. Verùm, quia inter illas objectiones aliquæ sunt, quibus plenissimè faciemus satis in Dissertationibus hujus Tractatus *De Mysteriis & annis Iesu Christi*, idèò, ne Lectori iteratis repetitionibus fastidium ingeramus, ejusmodi objectiones hic dumtaxat obiter indicabimus, & Lectorem ad illa loca Tractatus nostri remitemus, in quibus illas objectiones abundè diluimus. Ceteras verò objectiones, quas ad oppugnandam fidem, veritatem & auctoritatem quatuor Evangeliorum viri increduli obrudere solent, quasque in Dissertationibus hujusce Tractatus nostri non attigimus, singillatim in hoc Paragrapho excutiemus, & quàm leves, quàmve futiles sint demonstrabimus.

*Objectiones, quas proponunt Viri increduli contra
Evangelium S. Matthæi.*

IN primis, *Faustus*, *Manichæus*, Genealogiam Iesu Christi, quæ legitur cap. 1. Evangelii *S. Matthæi*, expungendam, ac rejiciendam esse pertendebat, quia in ea Genealogia usque ad Baptismum Christi nunquàm dicitur, Iesum Christum esse Filium Dei, sed tantum esse

Fi-

(LXXVII.)

Filium hominis; quod Ebionitarum, Iesu Christi divinitatem negantium, Hæresim olet. Præterea, idem *Fauslus* aiebat, in aliis tribus Evangeliiis *Marci*, *Luce*, & *Ioannis* non legi Christum dixisse, se habere Patrem aut Matrem in terris, sed potius eum sæpè profiteri, quòd non esset de hoc Mundo, quòd ab æterno Patre processerit, quòd neque Mater, aut frater sibi sit, nisi ille, qui facit voluntatem Patris ejus, qui in Cœlis est. Undè inferebat ille Hæreticus, id totum, quod in Evangelio *Matthæi* legitur de Genealogia Christi, non pertinere ad Evangelium, nec Divina pollere auctoritate, sed *Genisidium* appellari debere: *Evangelium quidem cepit à prædicatione Christi, & esse cepit & nominari, in quo tamen ipse nusquam se natum ex hominibus dicit. At verò Genealogia adeò non est Evangelium, ut nec ipse eius Scriptor ausus fuerit eam Evangelium nominare. Quid enim scripsit? Liber Generationis Iesu Christi filii David. Non ergò Liber Evangelii Iesu Christi, sed Liber Generationis, quippè qui Stella inducitur, quæ confirmat Genesim, ut rectè Genisidium hoc magis nuncupari possit, quàm Evangelium. Verba sunt Fausli, Manichæi, apud S. Augustinum cap. 1. lib. 2. quem Aquilinus ille Doctor edidit adversus eundem Hæreticum. Addebatur insuper *Fauslus*, *Matthæum*, aliosque Evangelistas vidisse dumtaxat Christum in carne, & ea, quæ gessit in Terris, cùm Christus esset annorum triginta, ac subinde *Matthæum* certò narrare ac describere non potuisse Genealogiam Christi, peiusdè ac cæcus ea, quæ, non vidit, & surdus ea, quæ non audivit, certò narrare minimè possunt.*

Ad singula hujus objectionis capita respondet *S. Augustinus*, & primò ostendit, oppidò falsum esse, quod dicebat *Fauslus*, videlicet in ea, quam texuit *S. Matthæus*, Genealogià Christi usque ad ejus Baptismum, dici dumtaxat, Iesum Christum esse filium hominis, & nunquam filium Dei. Nam *S. Matthæus*, postquam texuit Genealogiam Iesu Christi, confestim subdit, eum, quem filium David nuncupat, de Spiritu Sancto esse conceptum, & in eo impletum esse Vaticinium, *Isaïæ cap. 7. Ecce Virgo concipiet, & pariet filium, & vocabitur nomen ejus Emmanuel, quod est interpretatum, nobiscum Deus.* Legesis *S. Augustinum* lib. 23. contra *Faulum* cap. 5. Ad alterum objectionis caput respondet idem Aquilinus Doctor, quòd, quando Christus ait, se non habere in Terris Patrem, aut Matrem, aut consanguineos, id intelligendum est eodem prorsus modo, quo suos edocens Discipulos dicebat: *Ne vobis dicatis Patrem in Terra, unus enim est Pater vester Deus.* Nimirum, Christus non Matrem aut consanguineos, quantum ad humanitatem, quam assumpsit, se habere unquam inficias ivit, sed eos etiam, qui nos genuerunt, omnemque generis necessitudinem, propter Regnum Cælorum contemnere nos debere suo exemplo docuit, & ut idem faciamus, adhortatur his verbis: *Et omnis, qui reliquerit domum, vel fratres, aut sorores, aut patrem, aut matrem, aut uxorem, aut filios,*

filios,

lios, aut agros, propter nomen meum, centuplum accipiet, & vitam æternam possidebit. Matth. cap. 19. v. 29. Videtis S. Augustinum cap. 2. lib. 7. contra *Fauslum*. Quod spectat tertium objectionis caput, respondet S. Augustinus cap. 6. lib. 2. contra *Fauslum*, quod licet *Matthæus* suum Evangelium non auspicatus fuerit his verbis: *Liber Evangelii*, sed istis: *Liber Generationis*, seu *Genesis*, indè tamen non sequitur, istud principium non pertinere ad Evangelium, dicique debere *Genesisidum*. Alioqui, quia S. *Ioannes* primum sui Evangelii caput non incepit his verbis: *Evangelium Iesu Christi*, sed istis: *In principio erat Verbum*, dicendum itidem esset, primum istud S. *Joannis* caput non pertinere ad Evangelium, & appellari debere non *Evangelium*, sed *Verbi-dum*, quod sanè tam absurdum est, quàm quod maximè. Addo etiam duplici momento evinci posse, Generationem Iesu Christi secundum Carnem ex semine David pertinere ad Evangelium. Primò, quia id apertè docet Apostolus *Paulus* Epist. 2. ad *Timoth.* cap. 2. dicens: *Memor esto, Christum resurrexisse à mortuis è semine David, secundum Evangelium meum*. Deindè, Generationem Iesu Christi secundum naturam humanam ab ipso assumptam pertinere ad Evangelium, clarè etiam demonstrat ipsamet notio *Evangelii*, quod *bonum nuntium* significat. Quis autem negare audeat, Generationem Iesu Christi secundum carnem, per quam declaratur ejus Incarnatio, seu naturæ humanæ assumptio, bonum, faustumque nuntium toti Orbi attulisse? Ultimum objectionis caput solvit S. *Augustinus* cap. 2. lib. 7. contra *Fauslum*, ubi ait, quod licet *Matthæus* Christum nascentem haud viderit, sed ei, jam annos triginta nato, adhærere dumtaxat cæperit, peculiari tamen Spiritus Sancti afflatu perspectas habuit omnes circumstantias ortus & generationis Christi, vel illas in tam recenti Natalis Christi memoriâ à testibus locupletissimis & probatissimæ Fidei accepit, in quibus postea describendis Spiritus Sanctus ei speciali assistentiâ adfuit, ne memoriæ lapsu, aut alio congenito defectu humano vel minimùm à vero exorbitaret.

Alias objectiones contra Genealogiam Iesu Christi à S. *Matthæo* descriptam proponebant olim Manichæi, quorum agmen ducebat *Fauslus*, easque recentiores Hæretici Anabaptistæ, instar crambis recoctæ, etiamnum decantare solent. Verùm, quia eiusmodi objectiones opportunius in nostris Dissertationibus Tractatus *De Mystæriis & annis Iesu Christi* elidemus, sat superque impræsentiarum sufficiet, eas quasi digito monstrare, & Lectorem ad ea Tractatus nostri remittere loca, in quibus eas cumulatissimè solvemus.

Primò quidè aiebant Manichæi, non posse ex Genealogia Iesu Christi, quam texit S. *Matthæus*, probari, Iesum Christum ex profapia Davidis Regis esse oriundum, quia hæc Christi Genealogia ad *Josephum*, ex Familia *Davidis* Regis ortum, tota devolvitur; ex quo tamen minimè sequitur, Iesum Christum ex *Davidis* Regis Stirpe prodisse, quia

dog-

(LXXIX.)

dogma Fidei est, Iesum Christum ex semine Iosephi non fuisse procreatum, sed Spiritus Sancti operatione in utero Virginis Mariæ esse conceptum. Nullo igitur pacto Genealogia *Iosephi* ad Iesum Christum poterat pertinere.

Hanc Manichæorum objectionem Lector plenè solutam inveniet in Dissertatione tertia, quam instituemus in Tractatu nostro *De Myleriis & amnis Christi*, ubi latè ostendemus, *Matthæum* texuisse Genealogiam Iesu Christi per *Iosephum*, quia *Iosephus* proximo agnationis gradu erat cum Maria conjunctus, & ex eadem Tribu Iudæ, & Stirpe Davidis Regis suum genus ducebat. Undè apertè colligitur, Iesum Christum, *Mariæ* Virginis filium, ex Tribu Iudæ, & ex stirpe *Davidis* Regis suam originem traxisse.

Secundò, pertendebant Manichæi, *Mariam*, Matrem Iesu Christi, non è Tribu Iudæ, & è Familia *Davidis* Regis descendisse, sed ex Stirpe Aaronis, seu è Tribu Levi, suum genus duxisse, quia *Lucæ* cap. i. *Maria Virgo* dicitur cognata *Elisabethæ* de filiabus Aaronis. Quo semel posito, consequitur, Iesum Christum, juxta ipsius Genealogiam, quam texit Evangelista *Matthæus*, non potuisse tam ex parte *Iosephi*, quàm ex parte Matris *Mariæ* Virginis, genus suum è Tribu Iudæ, & è prolapia *Davidis* Regis ducere.

Hanc Manichæorum objectionem dilutam reperiet Lector in eadem Dissertatione tertia, ubi latè exponemus, quid factum sit, ut *Mariæ*, Mater Christi, quæ è Tribu Iudæ, & ex Progenie *Davidis* Regis originem suam trahebat, fuerit attamen cognata *Elisabethæ*, quæ erat de filiabus Aaronis, seu de Tribu Levi, ibidemque falsi convincemus spuriam traditionem, quam olim jactabant Manichæi, & quæ se posse probare autumabant, *Joachimum*, Patrem *Mariæ* Virginis, è Tribu Levi suum genus duxisse.

Tertiò, asserbant Manichæi, Evangelistam *Matthæum* in texenda Genealogia Iesu Christi multis se se implicuisse Antilogiis, seu contradictionibus, quæ nullo pacto excusari, aut explicari possunt. Facit enim *Matthæus* in Genealogia Iesu Christi *Salathielem* filium *Jechoniæ*, & Patrem *Zorobabelis*, cum tamen Propheta *Hieremias* cap. 22. conceptis verbis dicat, *Jechoniam* fuisse sterilem, ac nullam suscepisse prolem. Discordat etiam *Matthæus* ab Evangelista *Lucæ* in texenda Genealogia Christi. *Lucas* enim, in ea, quam describit, Genealogia Christi, enumerat à Davide Rege usque ad Christum quadraginta tres Generationes; *Matthæus* verò viginti octo ad summum recenset Generationes. *Lucæ* Genealogiam Iesu Christi deducit ex Avis, Proavis, Atavisque diversis planè ab illis, quos Iesu Christo assignat Evangelista *Matthæus*, qui etiam *Iosephum*, Virum *Mariæ*, Matris Iesu Christi, ait esse filium *Iacobi*, nepotem *Mathan*, ex stirpe *Davidis* Regis per *Salomonem* propagatum. At *Lucas* Evangelista scribit, *Iosephum*, virum *Mariæ*, Matris Iesu Christi, esse

esse filium *Heli*, & nepotem *Matbat*, ex stirpe *Davidis* Regis per *Nathanem* deducta. Quæ omnia è diametro opposita esse, nec ullo pacto conciliari posse affirmabant Manichæi. Nec minori Antilogiâ, effutiebant illi Hæretici, se se in texenda Genealogia Iesu Christi involvit *Matthæus*, quippè qui, cum ab *Abrahamo* ad Iesum Christum tres generationum Tessaredecades esse dicat, & in unaquaque Tessaredecade quatuordecim generationes se percensuisse asseret, in ultima tamen Tessaredecade non quatuordecim, sed tredecim tantum collocat generationes, quodque gravius est, tres de industria refecat, seu omittit generationes, dicens: *Ioram* genuisse *Osiã*, cum tamen ex Libris Regum constet, *Ioram* genuisse *Ochoziam*, *Ochoziam* genuisse *Ioasum*, *Ioasum* genuisse *Amasiam*, & *Amasiam* genuisse *Osiã*, ac proinde *Osiã* quarto gradu distare à *Ioramo*.

Hæ sunt Antilogiæ, seu contradictiones, in quas Evangelistam *Matthæum* in texenda Genealogia Christi impегisse aiebant olim Manichæi, quasque nunc innovantes eidem *Matthæo* obiiiciunt Hæretici Anabaptistæ, sed has Antilogias, seu contradictiones, non esse veras & reales, sed dumtaxat apparentes, easque facili negotio dilucidari, ac conciliari posse, copiosè ostendemus in Dissertatione quarta hujus Tractatus *De Mysteriis & annis Christi*, ubi Evangelistas *Matthæum*, & *Lucam* in texenda Genealogia Iesu Christi sibi constare, & utrumque nulla contradictione implicari demonstrabimus.

Quartò, Manichæi, ut auctoritatem Evangelii Sancti *Matthæi* labefacerent, falsi arguebant Historiam, quam refert sacer ille Evangelista, Magorum, ad Christi cunas cum muneribus venientium, apparitionis Stellæ, & cædis Infantium ab *Herode*, Iudæorum Rege, perpetratæ. Hæc, inquam Facta Historica, ceu falsa, explodebant Manichæi, tum quia nullus Evangelistarum, præter *Matthæum*, illorum meminit; Tum quia *Iosephus*, Hebræus, qui in describendis Gestis sui temporis accuratissimus, & in referendis sævitiis *Herodis*, Regis, diligentissimus fuit, ne minimum quidem verbum de hac Stellæ apparitione, de celebri Magorum in Iudæam adventu, & de hac crudelissima Infantium cæde, ab *Herode*, Rege, editâ, ullibi in sua Historica Iudaica fecit.

Verum, hanc Manichæorum objectionem, quam nunc eorum vestigiis insistentes, plenis buccis celebrant Hæretici Anabaptistæ, Lector retusam, & à nobis abundè solutam inveniet in Dissertatione octava hujus Tractatus *De Mysteriis & annis Christi*, ubi datâ operâ agemus de apparitione Stellæ, de adventu Magorum, & de immani Infantium cæde, quam *Herodes*, Rex, in ortu Christi Domini perpetravit.

Supereſt argumentum, quod contra *Matthæi* Evangelium opponebant Manichæi, petitum ex testimoniis, quæ S. ille Evangelista profert tanquàm à Prophetis dicta, & quorum tamen in Prophetarum Libris ne vola quidem ac vel minimum vestigium apparet. Ait quippè

Mat-

(LXXXI.)

Matthæus cap. 2. vers. ultimo : Et veniens Iesus , habitavit in Civitate ; que vocatur Nazareth , ut impleretur , quod dictum est per Prophetas : Quoniam Nazareus vocabitur . Hæc verba , quoniam *Nazareus* vocabitur , in nullis Prophetarum Libris leguntur . Rursus idem Evangelista cap. 27. loquens de agro , triginta argenteis à *Iuda* proditore relatis empto , hæc habet : *Tunc impletum est quod dictum est per Hieremiam Prophetam dicentem , & acceperunt triginta argenteos , pretium appretiati , quem appretiaverunt à filiis Israel , & dederunt eos in agrum figuli , sicut constituit mihi Deus .* Porro , hæc Prophetia non extat in *Hieremia* , sed habetur apud *Zachariam* , Prophetam , capite undecimo , ubi etiam nec iisdem verbis legitur , nec dicitur , his triginta argenteis emptum esse agrum figuli , sed dicitur , eos delatos fuisse ad Statuarium .

Huic Manichæorum objectioni respondeo cum Sanctis Patribus & Scripturæ Sacræ Interpretibus , & ad primum testimonium citatum ab Evangelistâ *Matthæo* , dico cum *S. Hieronymo* , quod *S. Matthæus* nullum in eo proferendo testimonio speciatim Prophetam designavit , sed solum indicare voluit , prænunciatum fuisse à Prophetis , Messiam , seu Iesum Christum , fore Sanctum , & Nazaræorum more , Deo ab infantia sua consecratum iri . Addo etiam , non improbabilem esse conjecturam *Danielis Huetii* , Illustrissimi Abrincensis Episcopi , qui in sua *Demonstratione Evangelicæ* Propositione quartâ asserit , hæc verba : *Quia Nazareus vocabitur* , fuisse à *S. Matthæo* citata , ac deprompta ex capite decimo tertio , versu quinto Libri Iudicum , ubi legitur ; *Erit enim Nazareus Dei ab infantia sua* . Ad alterum quod spectat testimonium sub nomine Prophetæ *Hieremiæ* ab Evangelistâ *Matthæo* citatum , varias Sancti Patres & Scripturæ Sacræ Interpretes adhibent responsiones . Alii dicunt , libroriorum oscitantia *Hieremiam* pro *Zacharia* in Evangelium *Matthæi* fuisse intrusum . Alii putant , Evangelistam *Matthæum* scripsisse tantum per Prophetam , omisso omni Prophetæ nomine . Alii existimant , Prophetam *Zachariam* fuisse binominem , & etiam *Hieremiam* fuisse appellatum , non secus ac Pater alterius cuiusdam *Zachariæ* binominis fuit , utpote & *Barachias* dictus & *Ioadas* . Alii probabilius opinantur , hoc testimonium , ab Evangelistâ *Matthæo* sub nomine Prophetæ *Hieremiæ* citatum , verè esse *Hieremiæ* , licet in *Hieremiæ* Libro non reperiatur , quia , inquirunt , non omnes Prophetæ fuerunt scriptis mandata , sed quædam traditione tantum , & privatis Hebræorum Annotationibus servabantur . Hinc *S. Hieronymus* refert , sibi à quodam Nazarenæ Sectæ homine librum fuisse ostensum , in quo continebantur Annotationes quarundam Traditionum Iudæorum , & in quo hoc Vaticinium ab Evangelistâ *Matthæo* productum extat sub nomine Prophetæ *Hieremiæ* . Alii denique , quibus ipse assentior , autumant , Prophetam *Hieremiam* pro Propheta *Zacharia* divino consilio ab Evangelistâ *Matthæo* positum , ut inde innotesceret , omnes Prophetas uno eodemque spiritu ita inter scribendum fuisse afflatos ,

ut quæcumque per eos Spiritus Sanctus dixit, & singula sint omnium, & omnia singulorum.

Quod Evangelistæ *Matthæi*, & Prophetæ *Zachariæ* in hoc describendo Vaticinio objectam dissonantiam attinet, mox laudatus *Daniel Huetius*, Abrincensis Episcopus, in sua *Demonstratione Evangelica* Propositione 9. cap. 125. respondet, manifestum esse ad Prophetæ sententiam attendisse Evangelistam *Matthæum*, verba neglexisse, quemadmodum ab Interpretibus rectè observatum est. Tantùm abest ut in sententia inter illos disconveniat. Hunc autem morem in testimoniis è Scriptura Sacra recitandis tenuisse Evangelistas & Apostolos hoc loco observat *S. Hieronymus*, qui etiam in Libro *De optimo genere interpretandi* hunc nodum dâ operâ solvens ait: *Abstine hoc de pedissequo Christi dicere; [Matthæum significat] Cui curæ fuit non verba aut syllabas aucupari, sed sententias dogmatum ponere.* Queritur apud Prophetam *Zachariam* Deus, mercedem suam triginta argenteis esse pensam, atque tam exiguum vile sui pretium indignatus, jubet id Prophetam proicere ad figulum, quod & ab hoc factum est, projectis in Domum Domini ad figulum. Planè cum jis congruit *Matthæus*, si sententiam dumtaxat spectes; nec multum abluunt verba. Perspicuum est præterea, ejusmodi esse vaticinationem hanc, ut in Iesum Christum propriè conveniat, accuratè designatâ venditione, pretio venditionis, ac numero nummorum, projectione nummorum, loco etiam projectionis, ac nomine loci. Quæ si in Prophetæ *Zachariæ* tempora conferas, vix sanè ac ne vix congruent: Nam quid hoc esse dicas, Deum tempore Prophetæ *Zachariæ* pretio æstimari se voluisse ab Israelitis, ac illos, æstimatione Dei factâ, triginta argenteos Dei pretium appendisse? Sin hæc ad tempora *Zachariæ* Prophetæ in allegoriam trahere velis, nonnisi adhibitâ vi facies, nec ullum ex ea legitimum sensum extundes, cum verum & proprium sensum reperiās in Historia Iesu Christi, quem constat, triginta argenteis à Iuda proditore venditum fuisse. *Matthæus* itaque non verba quidem, sed Sententiam retulit *Zachariæ* Prophetæ, quæ in suo vero, nativo & historico sensu completa est in Iesu Christo Salvatore nostro.

Objectiones, quas proponunt Viri increduli contra Evangelium S. Marci.

Porphyrus, acerrimus Christianæ Religionis hostis, obiiciebat olim, quòd Evangelista *Marcus* Vaticinium quasi ab uno Prophetâ dictum referret, quòd à duobus fuerat scriptum. Ait quippè *Marcus* cap. 1. sui Evangelii: *Sicut scriptum est in Isaia: Ecce ego mitto Angelum meum ante faciem tuam, qui preparabit viam ante te: Vox clamantis in Deserto, parate viam Domini.* Constat autem, priorem huius Vaticinii, quod

quod citat Evangelista *Marcus*, partem non fuisse scriptam ab *Isaia*, sed à *Malachia*. Itè Evangelista *Marcus* cap. 2. narrat, hæc fuisse à Christo Domino dicta : *Numquid legistis, quomodo David introiit in Domum Dei sub Abiathare, Principe Sacerdotum, & Panes Propositionis manducavit?* Quod tamen à Sacrae Historiæ veritate penitus alienum est. Nam David Panes Propositionis non manducavit tempore *Abiatharis*, Principis Sacerdotum, sed sub *Achimelecho*, patre *Abiatharis*, sicut patet ex lib. 1. Regum cap. 21. In his igitur proferendis Scripturæ Sacrae testimoniis erravit Evangelista *Marcus*, ac subindè instinctu & afflatu Spiritus Sancti suum non conscripsit Evangelium.

Respondeo, Evangelistam *Marcum* idè sub nomine *Isaie* citasse hoc Vaticinium : *Ecce ego mitto Angelum meum ante faciem tuam, qui preparabit viam ante te: Vox Clamantis in Deserto, parate viam Domini*, quia priora hujus Vaticinii verba sunt quidem Prophetæ *Malachie*, hæc tamen posteriora verba : *Vox clamantis in Deserto parate viam Domini*, sunt Prophetæ *Isaie*. Porro, *Marcus* siluit *Malachiam*, & dumtaxat citavit *Isaiam*, tum quia contentus fuit citare Prophetam nominis celeberrimi; tum quia denique hæc *Malachie* Prophetia implicitè, & quantum ad sensum, in verbis *Isaie* continebatur. Eandem difficultatem à *Porphyrio* Christianis obiectam versans *S. Hieronymus*, sic eam in Comment. in cap. 3. *Matthæi* diluit : *Cum Testimonium de Malachia, Isaiaque contextum sit, querit, sive obiicit Porphyrius, quomodo velut ab uno Isaia exemplum putemus assumptum?* Cui Ecclesiastici viri plenissime responderunt : *Nos autem nomen Isaie putamus additum Scriptorum vitio, quod in aliis locis probare possumus, aut certè de diversis Testimoniis Scripturarum unum Corpus esse. Sunt nonnulli, qui se se ab hac difficultate, quam olim proponebat Porphyrius, facili negotio expediunt, dicendo, in Codicibus Græcis Evangelii S. Marci non legi : Sicut scriptum est in Isaia Propheta [uti legitur in Editione nostra Vulgata] sed legi : Sicut scriptum est in Prophetis.* At, cum standum sit nostræ Editioni Vulgatæ, hac responsione, licet expeditiori, uti minime possumus.

Ad alterum objectionis caput Respondeo, *Davidem*, comedisse Panes Propositionis sub *Achimelecho*, Pontifice Maximo, & Patre *Abiatharis*; sed Evangelistam *Marcum* nomen *Abiatharis* potuisse, sive quia notius erat in Historia Davidica; sive etiam quia *Abiathar*, filius *Achimelechi*, præfens erat, quandò *David*, stimulante fame, Panes Propositionis comedit, tametsi postea fuerit Summo Sacerdote inauguratus. Addo quoque, dici posse, *Achimelechum* fuisse binomium, & *Abiatharis* nomine donatum, quod non est insoleus in Sacris Litteris; immò apud Hebræos solenne olim ac pervulgatum fuisse norunt hi, qui in Iudæorum Historia sunt versati.

Anabaptistæ, Hæretici nostri temporis, duabus objectionibus Evangelium *Marci* impetunt, illudque vitiatum & adulteratum fuisse contendunt. Primò, quia *Marcus* cap. 14. vers. 25. conceptis verbis asserit, Iesum Christum fuisse crucifixum horâ tertiâ: *Erat autem horâ tertiâ, & crucifixerunt eum*. Id autem rectâ fronte pugnat cum *S. Ioanne*, Evangelistâ, qui cap. 19. vers. 14. ait: Iesum Christum crucifixum esse horâ quasi sextâ: *Erat autem Parasceve Pasche, horâ quasi sexta*. Præterea, inquit Anabaptistæ, *Marcus*, Evangelistâ in describenda Resurrectionis Iesu Christi Historia, asserit, Mulieres venisse ad Monumentum orto jam Sole, cum tamen alter Evangelistâ *Ioannes* cap. 20. affirmet, Mulieres accessisse ad Monumentum, cum adhuc tenebræ essent. Verum, in his duabus Anabaptistarum diluendis objectionibus in præsentia non immorabimur, quia priori objectioni faciemus satis in Paragrapho secundo Dissertationis decimæ quintæ hujus Tractatus De *Mysteriis & annis Christi*, ubi agemus de anno, die, horâ, & loco mortis & passionis Iesu Christi. Alteram objectionem solvemus in eiusdem Tractatus Dissertatione vigesima secunda, in qua de resurrectione Iesu Christi nobis sermo erit. Hic dumtaxat velim, ut obiter lector advertat, *S. Hieronymum*, in secundo Dialogo adversus *Pelagium* disputantem, testari, in fine Evangelii juxta *S. Marcum*, in nonnullis Exemplaribus, maxime Græcorum, coronidem fuisse adiectam hisce *Marci* verbis, quæ cap. 16. vers. 14. leguntur: *Novissimè recumbentibus illis undecim apparuit, & exprobravit incredulitatem eorum, & duritiam cordis; quia jis, qui viderant eum resurrexisse, non crediderunt*. Hic additum erat: *Et illi satisfaciebant dicentes: Sæculum istud iniquitatis & incredulitatis substantia est, quæ non finit per immundos Spiritus veram Dei apprehendi virtutem*. Idcirco iam nunc revela iustitiam tuam. Hoc autem asumentum, quoniam nihil habet Evangelicæ gravitatis, sed olet potius Manichæorum Hæresin, jure optimo resectum ac rejectum est tam à Græcis, quàm à Latinis. Quò fit, ut caput decimum sextum, seu ultimum Evangelii *S. Marci* ab hac lacinia, seu additamento, purum legatur in Editione nostra Vulgata, in Codicibus Græcis, & in Versionibus Arabica & Syriaca. Quâ de re plura Leges apud *Richardum Simonium* in *Historia Critica Novi Testamenti* cap. 11.

Objectiones Virorum incredulorum adversus Evangelium S. Lucæ.

Illustrissimus *Daniël Huëtius*, Abrincensis Episcopus, Cap. 9. Propos. 9. suæ *Demonstrationis Evangelicæ*, refert, *Joannem Bodinum* libro 5. pettiferi & exitialis Dialogi, nunquàm editi, & nunquàm edendi, in quo tractat de abditis rerum sublimium arcais, negare duo priora Evangelii
Lu-

(LXXXV.)

Lucæ capita, in quibus splendidissimum extat *Mariæ* virginatis testimonium, esse germana ac legitima, eò quòd, ut ait prædictus *Bodinus*, tertii capitis initium videatur esse totius Evangelii *S. Lucæ* exordium, ob præfixam ab eodem Evangelista huic capiti tertio hanc notationem temporis : *Anno autem quintodecimo Imperij Tiberii Cæsaris &c.* Ab hac autem temporis notatione, quæ legitur cap. 3. Historiam Evangelicam auspicatum fuisse *Lucam* probat *Bodinus* exemplo petito à plerisque Sacris Auctoribus, qui Scripta sua ab his temporum notationibus orsi sunt. Fuit ea, quidem Hæresiarchæ *Marcionis* sententia, multas inesse corruptelas & vitia Evangelio *Lucæ*, quod unum tamen, repudiatis cæteris Evangeliiis, admittebat. Depravatum quoque *Lucæ* Evangelium credidit Hæreticus *Helvidius*. Nec solum pleraque falsitatis suspecta in Evangelio *Lucæ* habebat *Marcion*, sed etiam duo ejusdem Evangelii priora capita, nullis subnixus rationibus, sed solâ suâ temeritate fretus, tanquàm insinceras partes, recidit, & expunxit. Hanc teterrimi Hæretici *Marcionis* sacrilegam temeritatem secutus *Johannes Bodinus*, duo itidem priora *S. Lucæ* Evangelii capita negavit esse genuina, ob eam dumtaxat, quàm môx insinuavimus, rationem, petitam ex notatione temporis, quàm *S. Lucas* Capiti tertio sui Evangelii præfixit. Hanc autem, quâ utitur *Bodinus*, rationem infirmam & ficulneam esse Illustrissimus Abrincensis Episcopus loco laudato demonstrat multis argumentis, quæ hic subnectere haud pigebit. Primò, hoc ipsum Sacrorum Auctorum exemplum, quo utitur *Bodinus*, ejus conjecturam falsi manifestè arguit, nedùm ei favet. Solent enim Sacri Auctores mediis quoque suis Scriptionibus temporum notationes inferere. Undè, si quis colligat antecedentia non esse genuina, omnibus se se deridendum propinabit. Nec aliter sanè constare possunt rerum præteritarum Historiæ, nisi descriptæ res temporibus commodè dividantur. Quid, quòd Regum & Paralipomenon Libri, nullis præmissis temporum notis, subindè tamen procedente narratione certis distinguuntur temporum cardinibus. Secundò, tertium caput Evangelii *S. Lucæ* ab his inchoatur verbis : *Anno autem quintodecimo Imperij Tiberii Cæsaris*. Quæ particula *Autem* apertè indicat, tertium Caput Evangelii *S. Lucæ* connexum esse cum duobus prioribus. Tertio, non aliâ de causa *Bodinus* duo priora Evangelii *S. Lucæ* Capita, ceu supposititia, rejicit & explodit, nisi quia in his luculentissimum legitur testimonium Virgininitatis *Mariæ*, quam ipse, Hæretici *Helvidii* errori adhærens, inficiatur. At non animadvertit impudens Scriptor, Evangelistam *Lucam* in sui Evangelii Capite tertio (quod ipsemet *Bodinus* genuinum agnoscit) apertè innuere, Virgine Matre natum esse Jesum Christum. Sic enim, Cap. 3. vers. 22. & 23. hæc habet Evangelista *Lucas* : *Descendit Spiritus Sanctus corporali specie, sicut columba, in ipsum, & vox de Cælo facta est : Tu es Filius meus dilectus, in te complacuit mihi. Et ipse Iesus erat incipiens quasi annorum triginta, ut putabatur, filius Ioseph.* Quæ verba declarant,

clarant, Virgine Matre natum esse Jesum, quippè qui *Iosepho* natus non sit, & alium Patrem non habuerit, quàm qui clarà voce de Cælo missà prolem suam ipsum esse fassus est. Denique, si duo priora Evangelii *Lucæ* Capita detraxeris, nihil de Jesu Christo, ad quem tamen unum totum hoc Evangelium pertinet, *Lucam* dixisse reperiēs, sed ejus mentionem velut obiter & aliud agentem injecisse, dùm Cap. 3. v. 21. ait: *Factum est autem, cùm baptizaretur omnis Populus, & Jesu baptizato & orante apertum est Cælum. Quæ* certè cùm de Evangelista *Luca*, Historiæ artis perito, sicut Evangelium hoc, & Apostolorum Acta, quæ scripsit, indicant, existimare non liceat, dicendum est, eum jam ante, in duobus nempe prioribus sui Evangelii capitibus, Jesu Christi meminisse, ac subinde duo illa priora Capita genuina esse, divinâ autoritate prædita, & ad Evangelium S. *Lucæ* pertinere, sicut ex perpetua & ab Apostolorum temporibus profectâ, atque jugiter conservatâ Traditione docet Catholica Ecclesia, fallere & falli nescia.

Alias adversus Evangelium S. *Lucæ* objectiones proponunt viri increduli. Et primò quidem, jam citatus *Joannes Bodinus*, apud Illustrissimum Abrincensem Episcopum Cap. 10. Propos. 10. *Demonstrationis Evangelicæ*, objicit, hunc Censum, quem *Lucas* Cap. 2. sui Evangelii ait, nascente Jesu Christo, indictum fuisse ab Imperatore Augusto & à *Cyrino*, Syriæ Præsidente, actum, cum Historia Jesu haud quaquam congruere, quippè auctorem esse *Dionem*, hunc Censum factum fuisse anno. qui mortem Imperatoris *Augusti* præcessit, atque eo anno Jesum Christum jam annum decimumquartum attigisse. Sed quia responderi posset, duplicem ab Imperatore *Augusto* factam descriptionem; postremam eam, quam commemorat *Dio*; priorem verò per *Cyrinum*, ab Evangelista *Luca* memorix proditam, quæ cum ageretur, natus est Christus: hanc, inquam, responsionem impugnat *Bodinus*, dicens, rem aliter se habere, ac priorem descriptionem, quæ contigit tempore, quo Christus natus est, peractam esse à *Quintilio Varo*, Syriæ Præsidente, & non à *Cyrino*, qui multò post Regis *Herodis* obitum *Juxta* Censum egit, quorum omnium testem *Bodinus* citat *Iosephum*, Hebræum. Sed in hac *Bodini* contra Evangelium *Lucæ* dissolvenda objectione moras hic trahere supervacaneum esse existimo, quia ei cumulatissimè faciam satis in hujusce Tractatus De *Mysteriis*, & annis Christi Dissertatione sextâ, in qua inquiram, quoto anno Imperii *Augusti* natus sit Christus Dominus? Ibidemque inter dirimendas objectiones ostendam, Censum, quem Imperator *Augustus*, nascente Jesu Christo, indixit, reverà fuisse inceptum à *Cyrino*, seu *Quirinio*, Syriæ Præsidente, ut ait S. *Lucas*, eumque postea fuisse continuatum à *Sentio Saturnino*, Syriæ Præsidente, ac tandem perfectum & absolutum à *Quintilio Varo*, Syriæ itidem Præsidente. Ut igitur brevitati consulam, Lectorem, ad hanc Dissertationem sextam remitto, in qua hanc *Bodini* objectionem omni ex parte solutam ac dissipatam inveniet. Consultò etiam hic præter-

(LXXXVII.)

termitto aliam adversus Evangelium *Lucæ* objectionem, petitam è Cainane juniore, quem *Arphaxad* inter & *Salem* in Genealogia Jesu Christi reponit Evangelista *Lucas*; de quo tamen juniore Cainane nulla prorsus in Textu Hebræo & Samaritano, atque in antiquis Scripturæ Sacræ Versionibus Chaldaica, Syriaca, Arabica, Vulgata &c. fit mentio; hanc, inquam, objectionem petitam è Cainane juniore lubens hic prætermitto, quia in Dissertatione quinta hujus Tractatus *De Mysteriis & annis Christi*, ubi agemus de Chronologia Textus Hebræi, & Versionis 70. Interpretum, hanc difficultatem dilucidabimus, & ostendemus, hunc Cainanem juniorem non esse Patriarcham insciticium, seu in Evangelium *Lucæ* nullâ interpolatrice manu fuisse intrusum, ejusque generationem non variare Chronologiam Textus Hebræi, quæ in putatione annorum, qui interfluxerunt à creatione Mundi usque ad Natile Jesu Christi, longè accuratior est Chronologiâ Versionis 70. Interpretum.

Denique, nonnulli obiciunt, Historiam, quæ de sudore Christi sanguineo, & de apparitione Angeli ipsum consolantis, legitur cap. 22. Evangelii *Lucæ*, non esse veram & genuinam, sed subditiâ & assutam, quia hanc Historiam in pluribus Codicibus tum Græcis, tum Latinis, suâ ætate desideratam testatur S. *Hilarius* lib. 10. de *Trinitate*, ubi hæc habet: *Nec sanè ignorandum nobis est & in Græcis & in Latinis Codicibus quàm plurimis, vel de adveniente Angelo, vel de sudore sanguineo nihil scriptum reperiri.* Verùm, hæc obiectio nullius momenti ac roboris est, quia licet hæc Historia de sudore Christi sanguineo, & de apparitione Angeli ipsum consolantis fuerit antiquitus in nonnullis Codicibus Græcis & Latinis expuncta, erasa, ac deleta à quibusdam privatæ superstitionis hominibus, qui tam insignia humanæ infirmitatis argumenta Jesu Christo tribuere metuebant, ne ipsius divinitati, quam id temporis inficiabantur Ariani, derogare viderentur, sicut observat S. *Hieronymus* Dialogo 2. contra Pelag. Nihilofecius hæc Historia in benè multis sinceris Evangelii *S. Lucæ* Codicibus Græcis, & in Versionibus Orientalibus legebatur, eamque, ut genuinam ejusdem Evangelii *S. Lucæ* partem, semper agnovit Catholica Ecclesia. Quâ de re plura legis apud Sacræ Scripturæ Interpretes, præsertim apud *Jansenium*, *Gandavensem* Episcopum, in *Concordia Evangelica* cap. 136. & *Richardum Simonium* in *Historia Critica Novi Testamenti* cap. 12.

*Obiecti ones, quas contra Evangelium S. Ioannis
proponunt Viri increduli.*

UT Evangelii *S. Joannis* Auctoritatem labefactare possint viri increduli, omnem omnino fidem abrogant Historiæ de Muliere adulterâ, quæ legitur cap. 8. *S. Ioannis*, eò quòd, fatentibus ipsimet Christianis Scri.

Scriptoribus, hæc Historia non extet in multis Codicibus Græcis. Testatur siquidem Maldonatus in caput 8. Evangelii Ioannis, se nec in antiquissimo Codice Vaticano, nec in viginti Patrum Græcorum Codicibus hanc Historiam scriptam offendisse: *Non habebat, inquit, antiquissimus ille Vaticanus Codex, quem sæpe nominavimus, non Græcorum catena, in qua cum tres & viginti Auctores sint, nemo ejus meminit. Habemus Græcos impressos multos, Origenem, Clementem Alexandrinum, Chrysostomum, Nonnum, Theophylactum, nemo eorum legit, cum Chrysostomus & Theophylactus scripserint in totum Ioannem Commentarios. Idem asserit Richardus Simonius, linguarum Orientalium peritissimus, qui capite 13. Historiæ Criticæ Novi Testamenti multos, quos vidit in Bibliotheca Regis Christianissimi & in Bibliotheca Colbertina, citat manuscriptos Codices, in quibus non extat hæc de adultera Muliere Historia.*

Verum, hæc obiectio faciliè solvitur. Quamvis enim viris incredulis ultrò demus, nonnullos fuisse Græcos Codices, immò & Latinos [teste S. Hieronymo Dialogo 2. contra Pelag.] qui hanc Historiam de Muliere adultera non habuerint; hanc tamen Historiam semper extitisse in Codicibus Græcis sincerioribus tam certum est, quam quod maximè: Tum quia ejus meminerunt antiqui Patres Græci, Ammonius in sua Harmonia, seu Concordia ex quatuor Evangeliiis contextà, Auctor Synopsi Scripturæ Sacræ, quæ vulgò attribuitur S. Athanasio, S. Ioannes Chrysostomus Homiliâ 60. in Evangelium Ioannis, ubi inter cætera, hæc habet: *ut quum rogarunt, an liceret censum dare Cæsari, & an lapidanda esset adultera?* S. Ioanni Chrysostomo adjungo Euthymium, qui in suo Commentario in Evangelium Ioannis disertam de Historia Mulieris adulteræ mentionem facit: Tum quia etiam suppetunt complures Codices Græci, jique antiquissimi, in quibus [teste jam citato Richardo Simonio] descripta reperitur hæc Historia de Muliere adultera. Quod quidem fateri cōactus est Theodorus Beza, Hæreticus Calvinista, qui in suis Annotationibus in Evangelium Ioannis, de Historia Mulieris adulteræ hæc scribit: *Ex vetustis nostris Codicibus septemdecim, unus dumtaxat illam non habet, in reliquis scripta quidem est. Cum igitur hæc Historia de Muliere adultera in Codicibus sincerioribus Græcis legatur, & antiquissimo Catholicæ Ecclesiæ usu, summoque consensu fuerit approbata, debet jure optimo recipi tanquam genuina pars Evangelii S. Ioannis.*

Non me latet, esse quosdam viros incredulos, qui magnis animis contendunt, Ioannem Evangelistam in præfigenda die, quâ Iesus Christus Supremum Pascha cum Discipulis suis peregit, & in statuenda die, quâ in Crucem actus est, nullo pacto conciliari posse cum tribus aliis Evangelistis Mattheo, Marco, & Luca, qui ab eo planè dissentiant. Sed quantum hæc in re fallantur viri increduli, patebit ex his, quæ dicturus sum in hujus Tractatus de Mysteriis & annis Christi Dissertatione decima nonâ, in qua lato calamo ostendam, Iesum Christum, anno quo mortuus est,

Pascha cum Discipulis suis peregrisse, juxta legis præscriptum, Lunâ decimâ quartâ in secundis Vesperis, & Cruci suffixum fuisse die sequenti, seu Lunâ decimâ quintâ, in quam incidebat solemnitas diei primæ Azymorum, atque nullam ea in re *Ioannem* inter & alios Evangelistas *Matthæum*, *Marcum*, & *Lucam* occurrere dissonantiam. Hanc itaque Dissertationem, si plura scire aveat Lector, consulere poterit.

Denique, quidam impii ac viri increduli negant, Evangelium, quod Sancti *Ioannis* nomine insignitur, fuisse ab eo scriptum, tum quia Auctor illius Evangelii numero plurali de se loquitur cap. 1. v. 24. dicens: *Et scimus quia verum est testimonium eius*. Id putant, non nisi à pluribus scripta esse de uno, non ergo à *Ioanne* solo de se ipso; quippè non simul, & plurali numero, & singulari de se potuisse loqui. Tum quia etiam Auctor illius Evangelii, loco mox laudato, ait sub aliena persona de se: *Hic est Discipulus ille, qui testimonium perhibet de his, & scripsit hæc*. Sub aliena autem persona non locutus esset *Ioannes*, si reverà illud Evangelium conscripsisset. Sed hæc levissimæ virorum incredulorum conjecturæ nullo negotio exsufflantur. Ad primam quippè dico, pervulgata esse generis huius exempla apud Scriptores, qui de se modò in numero plurali, modò in numero singulari loquuntur, & ne discedamus ab Evangelio *Ioannis*, legimus cap. 3. vers. 11. illius Evangelii, Iesum Christum locutum fuisse in numero plurali *Nicodemo*: *Amen, amen dico tibi, quia quod scimus, loquimur*. Præterea, hæc vox *scimus*, non ad *Ioannem* solum, sed ad reliquos etiam Christi Discipulos spectat, perinde ac si *Ioannes* Evangelista dixisset: *Ego, ac Discipuli reliqui, scimus ea vera esse, quæ de Iesu Christo testificatus sum*. Futilis autem ac vana prorsus est altera conjectura, quâ viri increduli nituntur Evangelium abjudicare *Ioanni*, eò quòd sub aliena persona in Evangelio loquatur. Nemo quippè negavit unquam *Iulium Cæsarem* scripsisse Commentarios, & *Iosephum*, Historicum Iudæum, auctorem esse Librorum *De Bello Iudaico*, quamvis ambo Scriptores sæpius sub persona aliena loquantur. Præterquàm quòd, ut antea dicebamus, hic liber genuinus est, quem proximæ & continuatæ serie sequentes ætates ab eo auctore scriptum esse crediderunt, à quo dicitur esse scriptus; atqui proximæ, & imperturbatæ Sæculorum serie sequentes ætates semper crediderunt, *S. Ioannem* scripsisse Evangelium, in dubium igitur revocari haud potest, *S. Ioannem* esse auctorem Evangelii, quod ejus nomen præfert.

Ex his, quæ hætenùs de authoritate quatuor Evangeliorum diximus, facilè poterit Lector hæc duo invicta contra Atheos, Infideles, virosque incredulos colligere argumenta ad probandum, veracem esse Historiam Iesu Christi, quæ in quatuor Evangeliiis describitur. Primum argumentum istud est: Ea verax est Historia, quæ à quatuor coætaneis Scriptoribus absque errore, fallacia, & contradictione, sed uno & eodem consensu, litteris mandata est, atqui Historia Iesu Christi à quatuor.

contaneis Scriptoribus, seu Evangelistis, citrà ullum errorem, fallaciam & contradictionem litteris mandata est, sicut in hacce Dissertatione ostendimus, igitur Historia Jesu Christi verax ab omnibus censerì debet. Alterum argumentum hoc est: Hæc Historia tanquàm verax haberi debet, quæ in omnibus factis, quæ narrat, consentanea est Historiis Iudzorum, Romanorum, & aliarum Nationum Gentilium, atqui Historia Jesu Christi, quam descriperunt quatuor Evangelistæ, consentanea est in omnibus Actis, quæ de Jesu Christo narrat, Historiis Iudzorum, Romanorum, & aliarum Nationum Gentilium, Historia igitur Jesu Christi à quatuor Evangelistis exarata, tanquàm vera, ab omnibus suscipienda est, hisque omnibus donata veritatis caracteribus, quibus vera & indubitata Historia à falsa, vel suspecta secernitur.

Stabilità semel in hac Dissertatione veritate & autoritate quatuor Evangeliorum, in quibus describitur Historia Jesu Christi, præstat nunc, ut ad ejusdem Dissertationis calcem attexam brevem Descriptionem Historico-Chronologicam, quæ comprehendet non solum ea, quæ de Vita, Gestis, Miraculis, Morte, Resurrectione, & in Cælum Ascensione Jesu Christi memoriæ prodiderunt quatuor Sacri Evangelistæ, sed etiam peregrinationem, quam Apostoli *Petrus & Paulus*, post Ascensum Christi in Cælum, ad prædicandum ubique Terrarum Evangelium, susceperunt. Sic Lector, antequàm nostrum aggrediamur Tractatum *De Mysteriis & annis Christi*, habebit non solum Historiam Jesu Christi compendiosè descriptam, sed etiam exordium Historiæ Ecclesiasticæ usque ad obitum Apostolorum *Petri & Pauli*. Quòd si deindè lector scire aveat integram Historiam Ecclesiasticam ab obitu Apostolorum *Petri & Pauli* ad hæc usque nostra tempora, adire & lectitare poterit Opus, quod de Historia Ecclesiastica à me lucubratum, & duodecim in Tomos in *Octavo* tributum, nuperrimè Romæ publicam in lucem emisì, in quo ad consulendum utilitati & comoditati juvenum, qui post emensum Theologiæ stadium, ad Historiæ Ecclesiasticæ studium animum appellere gestiunt, Res præcipuas, ab obitu Apostolorum *Petri & Pauli* ad hanc usque ætatem nostram, non solum ad Historiam, sed ad Dogmata, Criticam, Chronologiam, & Ecclesiæ Disciplinam pertinentes, per varia Colloquia digessi, perstrinxì, atque in præclaro lumine collocare summopere studui.



(XCI.)

BREVIS DESCRIPTIO HISTORICO-CHRONOLOGICA,

Comprehendens non solum ea, quae de Vita, Gestis, Miraculis, Morte, Resurrectione, & Ascensione Iesu Christi, in quatuor Evangeliiis referuntur, sed etiam Peregrinationem, quam, secundum rationem temporum, post Ascensum Iesu Christi in Caelum, Apostoli Petrus & Paulus ad praedicandam Doctrinam Evangelicam susceperunt.

HAnc brevem Historico-Chronologicam Vitae Iesu Christi descriptionem quinque in partes, majoris claritatis ergo, distribuam, quarum prima exhibebit ea, quae ad Iesu Christi Nativitatem, Infantiam, & Pueritiam pertinent. Altera pars continebit Iesu Christi Baptismum, & ea quae gessit anno primo Praedicationis suae. Tertia pars complectetur Acta, quae edidit Iesus Christus anno secundo Praedicationis suae. Quarta pars ea perstringet, quae Iesus Christus anno tertio Praedicationis suae pro salute Humani Generis operatus est. Postrema pars ea referet, quae Iesus Christus egit anno ineunte quarto Praedicationis suae, usque ad illapsum Spiritus Sancti, quem ad Apostolos ac Discipulos misit in die Pentecostes.

P R I M A P A R S

Exhibens ea, quae ad Iesu Christi Nativitatem, Infantiam, & Pueritiam pertinent.

Anno à creatione Mundi quater mil- lesimo centesimo trigesimo tertio, & anno trigesimo no- no Imperii Augusti.	Sexennio an- te Aera Vul- garem, Consu- libus D. La- lio Balbo, & C. Antistio Ve- tere.	R egnante in Iudaea Herode, cui Magno cognomen fuit, Ioannis Baptista conceptionem Archangelus Gabriel prae-nunciavit Sacerdoti, qui appellabatur Zacharias, & cuius Uxor Elisabetha haecenus sterilis fuerat, nec ulla
---	---	--

Anno à creatione
Mundi quater mil-
lesimo cêtesimo tri-
gesimo quarto , &
anno quadragesimo
Imperii *Augusti* .

Quinquen-
nio ante *Æ-*
ram *Vulga-*
rem, *Consuli-*
bus *Augusto*
Cæsare XII. &
L. Cornelio
Sulla .

ulla spes affulgebat ampliùs libero-
rum, quia uterque ad senectutem per-
venerat . Non multò post concepit
Elisabetha .

Sexto mense , postquàm *Elisabe-*
tha, uxor *Zacharia*, gravida esset, Deus
vigèsimâ quintâ die mensis Martii , si-
cut antiqua docet traditio , misit Ar-
changelum *Gabrielem* Nazareth , quæ
est urbs Galilææ, ad Virginem, cui *Ma-*
rie nomen erat, nuptam Iosepho, viro
pauperi quidem, sed tamen ex prosapia
Davidis Regis oriundo. *Maria*, Virgo,
Archangelo *Gabrieli* nuncianti con-
ceptionem verbi Divini in castissimo
ejus utero, respondit, paratam se esse
omnia Dei, cujus ancilla erat , exequi
imperia, nec dubitare, quin futurum
esset quidquid ille nomine Dei prædi-
xerat. Quo Responso edito, Archange-
lus *Gabriel* ab ejus conspectu abiit, &
actutum Verbum divinum carnem
humanam assumpsit in utero beatissimæ
Mariæ Virginis , hoc divinum opus
edente Spiritu Sancto. Paulò post *Ma-*
ria, Verbo Dei plena, è Civitate *Na-*
zareth profecta est, & magnâ festina-
tione ivit in Urbem tractus Montani
Iudææ, in qua habitabat *Elisabetha*, quò
eam inviseret gravidam , sicut ab Ar-
changelo *Gabriele* accèperat, mansit-
que cum ea per tres menses, quibus exa-
ctis , Domum reversa est. *Elisabetha*,
die 24. mensis Iunij ejusdem anni pe-
perit *Joannem Baptistam*, qui fuit Præ-
cursor Iesu Christi, veri Messiz. *Ma-*
riam Virginem , ab *Ædibus* *Elisabeth*
Domum reversam, *Iosephus*, ejus mari-
tus, gravidam deprehendit, eamque
clam repudiare volens , in somnis ad-
monitus est ab Angelo , ut eam non
dimitteret, quippè quæ non ex stupro,
sed inusitatâ divinz potentiz operâ
gra-

gravida esset, ac propediem enixura
 filium, cui foret nomen *Iesu* imponen-
 dum, quod Salvatorem sonat. Excita-
 tus è somno *Iosephus*, Mariam uxo-
 rem retinuit, & obtemperans Edicto,
 quo Imperator *Augustus* jubebat homi-
 num descriptionem institui, non modò
 in Provinciis Populi Romani, sed & in
 vicinis Regnis, in quibus erant Reges,
 beneficio Romanorum constituti, se
 contulit Bethleemum, priscam Davidis
 Regis familię Sedem, ut eo in Oppido,
 in quo, juxta Prophetarum Oracula,
 verus Messias nasci debebat, describe-
 retur vnà cum *Maria*, uxore sua gra-
 vidà. Contigit autem, ut Bethleemum
 cùm appulissent, & illic in diversorio
 essent, expletis à conceptione novem
 mensibus, *Maria* die vigesimà quintà
 mensis Decembris, sicut constans fert
 traditio, pepererit Filium suum, unige-
 nitum, quem pannis involutum, Ange-
 li & Pastores in cunis protinùs ado-
 rarunt.

Octavo à Natalibus die, seu Ka-
 lendis mensis Ianuarii, pro more Iu-
 dæorum, circumcisus est puer, eique
 nomen inditum IESU, sicut iusserat
 Angelus. Die verò sextà ejusdem men-
 sis Ianuarii Magi ex Arabia Felice, præ-
 eunte Stellà, Bethleemum venerunt, ubi
 invenerunt Puerulum cùm *Maria* Ma-
 tre, eumque procumbentes adorarunt,
 & munera, quæ attulerant, ei obtule-
 runt, Aurum videlicet, Thus, & Myr-
 rham. Expletis à partu Virginis *Marię*
 quadraginta diebus, quibus Puerpera,
 juxta Legem Mosaicam, à Templo ar-
 cebatur, *Iosephus*, & *Maria* Hieroso-
 lymam iverunt, ut puerum *Iesum* illic
 ex Legis Mosaicę instituto coram Deo
 sisterent in Templo, ubi cùm præsen-
 tes adessent, *Simeon*, & *Anna*, divino
 affla-

Anno à creatione
 Mundus ter millesi-
 mo centesimo tri-
 gesimo quinto, &
 anno quadragesimo
 primo Imperii Au-
 gusti.

Quadriennio
 ante Æram
 Vulgarem,
 Consulibus
C. Calvisio Sa-
bino, & Rufo.

afflatu intellexerunt, Puerum *Iesum* esse expectatum illum Israëlitarum liberatorem. Post hæc, Iosephus admonitus est in somnis, ut cum puerulo, ejusque Matre illicò fugeret in Ægyptum, & maneret illic donec divinitus in Iudæam revocaretur, quia Herodes Rex mox quæsiturus erat *Iesum*, ut eum occideret. Expergefactus itaque *Iosephus*, abiectâ omni cunctatione, cum Maria, ejusque filio, se contulit in Ægyptum, & post elapsos aliquot dies, *Herodes*, Rex, immisiss militibus, occidit omnes pueros Bethleemitas, qui à biennio jam nati erant, ne elaberetur puer *Iesu*, cui Magi Regnum Iudææ portendi nunciaverant his verbis: *Ubi natus est Rex Iudeorum? Vidimus Stellam ejus in Oriente, & venimus adorare eum*. Mortuus est non multò post Herodes, Rex post homines natos crudelissimus, & statim Angelus Iosephum monuit in somnis, tempus jam esse redeundi in Palæstinam, ubi, mortuo Rege Herode, qui vitæ Iesu antehac insidiabatur, tutò vivere posset. *Iosephus* itaque excitatus profectus est cum uxore *Maria*, ejusque Filio in Palæstinam. Ast, dùm *Iosephus* ex Ægypto in Palæstinam pergeret, audivit, *Herodem Archelaum*, filium *Herodis Magni*, regnare in Iudæa, quâ de causâ veritus est in eam redire, sed iterùm monitus ab Angelo ivit in Galilæam, & quidem in Civitatem Nazareth, ubi antea vixerat.

Anno à creatione
Mundi quater mil-
lesimo cêtesimo tri-
gesimo nono, &
anno quadragesimo
quinto Imperii Au-
gusti.

Annus pri-
mus Æræ Vul-
garis, Consu-
libus *C. Casar-*
re, & L. Emi-
lio Paulo.

Annus primus Æræ Vulgaris ini-
tium habet à prima die Januarii anni à
creatione Mundi quater millesimi cen-
tesimi trigesimali noni, anni Imperii Au-
gusti quadragesimi quinti, quo Consu-
les fuerunt *Cajus Casar, & L. Emilii*

Pau-

Anno à creatione
Mundi quater mil-
lesimo cētesimo qua-
dragesimo sexto, &
anno Imperii *Augu-
sti* quinquagesimo
secundo.

Anno octavo
Æræ Vulga-
ris, Cōsulibus
*M. Furio Ca-
millo, & Sexto
Nonio Quin-
tiliano.*

Paulus. Quò fit, ut Æra Vulgaris,
cuius Author est *Dionysius exiguus*, sit
quibuscunq; annis solido & octo diebus pos-
terior vero & proprio Natalitio Iesu
Christi, sicut in confesso est apud om-
nes Chronologix peritos.

adri.

Puer IESU in Civitate Naza-
reth, ad quam, monente Angelo, *Iosephus*, unà cum *Maria*, coniuge suà,
se se receperat, fuit educatus, cūque
iam adolevisset, & annum ætatis suæ
ageret duodecimum, Hierosolymam,
profectus est cum *Iosepho* & *Maria*,
quibus solenne erat quot annis ad ce-
lebrandum Pascha illuc ire. Sed, ex-
actis diebus Festi, *Iosephus* & *Maria* iter
unius diei confecerūt versùs Nazareth,
existimantes, *Iesum* esse in Comitatu,
quem tamen postquàm inter notos fru-
strà quæsisissent, reversi sunt Hieroso-
lymam, ut eum investigarent, illum-
que tandem in Templo invenerunt, in
Templo sedentem inter Doctores, eos-
que audientem, interrogantemque, &
eorum Quæsitis facientem satis. Qui-
cumque autem aderant, obstupefce-
bant ob Quæstiones & Responsta Pue-
ri, in quibus elucebat summa sapien-
tia, cuius insigne exemplum pro ludit
etiam in Responso, quod dedit Matri
suæ, cui querenti his verbis: *Fili, quid
fecisti nobis sic? Ecce Pater tuus & ego
dolentes quærebamus te; confestim
respondit: Quid est quod me quæreba-
tis? Nesciebatis, quia in his, quæ Patris
mei sunt, oportet me esse.* Hæc sunt, quæ
de Iesu Christi Infantia, Pueritia &
Adolescentia memoriæ prodiderunt
Sacri Evangelistæ, cætera verò, quæ in
juventute sua egit Iesus Christus, alto
& Sacro obtexerunt silentio, totamque
ejus vitam usque ad Baptismum San-
ctus *Lucas* cap. 2. sui Evangelii conclu-
dit

dit his verbis : Et descendit , IESUS , cum eis , idest , Iosepho , & Maria , & genuit Nazareth , & erat subditus illis ; & Mater ejus conservabat omnia verba hæc in corde suo . Et Iesus proficiebat sapientiâ , & ætate & gratiâ apud Deum , & homines .

SECUNDA PARS

VITÆ JESU CHRISTI,

Continens ejus Baptismum , & ea , quæ gessit in primo anno Prædicationis suæ .

Anno à creatione
Mundi quater mille
simo centesimo se-
xagesimo tertio, an-
no Imperii Augusti
Tiberii, seu ab obitu
Imp. Augusti, duode-
cimo, Imperii verò
Proconsularis Tibe-
rii decimo quinto.

Anno Æræ
Vulgaris vi-
gesimo quin-
to, ætatis Chri-
sti vigesimo
nono, Consu-
libus M. Asi-
nio Agrippa,
& Cossio Cor-
nelio Lentulo.

Ioannes Baptista, filius Zachariæ, an-
no decimoquinto Imperii Procon-
sularis Tiberii, in desertis locis ver-
sans, jussus est à Deo ire ad Judæos,
eosque ad sanctiorem vitam vocare,
eò quòd Regnum Cælestæ Messie im-
mineret. Eo autem munere defungi
cepit Ioannes Baptista circa Iordanem,
prædicans Baptismum Pæniten-
tiæ in remissionem Peccatorum. Vide
ea, quæ in Dissertatione decima hujus
Tractatus dicemus de duplici Epochæ
Imperii Tiberii, ex quibus facile in-
telliges, Ioannem Baptistam suum
exorsum esse Ministerium anno deci-
mo quinto Imperii Proconsularis Ti-
berii, non verò anno decimo quinto
Imperii Augusti Tiberii, seu illius
Imperii, quod Tiberius ab obitu Im-
peratoris Augusti auspicatus est.

Anno à creatione
Mundi quater mille
simo centesimo se-
xagesimo quarto, Im-
perii Augusti Tibe-
rii, seu ab obitu Im-
perat. Augusti, anno

Anno Æræ
Vulgaris vi-
gesimosexto,
ætatis Christi
ineunte trige-
simo, Consu-
libus Cn. Len-

Iesus Christus anno decimo se-
xto Imperii Proconsularis Tiberii ve-
nit ex Galilæa ad Ioannem Baptistam,
ut ab eo Baptismum susciperet, cum-
que die sextâ mensis Ianuarii, jux-
tâ avitam Ecclesiæ traditionem, baptiza-
tus fuisset & ex aqua egressus, aperti
sunt

(XCVII.)

decimo tertio; Imperii verò Procon-
sularis Tiberii anno
decimo sexto.

tulo Getulico,
& *C. Calvisio*
Sabino. Imperii Procon-
sularis Tiberii
anno decimo
sexto.

sunt Cæli, & apparuit Spiritus San-
ctus in forma Columbæ, quæ insedit
capiti ejus, auditaque est vox Dei Pa-
tris, dicentis: *Tu es Filius meus dile-*
ctus, in quo mihi benè complacui. A
Joanne baptizatus Iesus Christus, con-
tinuò Spiritus Sancti afflatu secessit in
solitudinem, Arabiæ vicinam, ubi ten-
tatus est à Diabolo, cujus trinam ten-
tationem cum superasset, Angeli ad
illum accesserunt, eique ministrarunt.
Relicto Deserto, venit Iesus ad ripas
Jordanis, tuncque Ioannes Baptista
Legatis, quos ad ipsum miserant pro-
ceres Iudæorum, respondit, se Chri-
sti, seu Messie Præcursores esse, non
ipsum Christum. Post hanc Legatio-
nem Iesus Christus venit ad Joanne m,
à quo declaratus est Agnus Dei, ve-
rusque Messias ab omnibus expecta-
tus. *Andrea & Petro*, pisca toribus
Bethsайдensis, Iesus primùm inno-
tescit, & vocat *Philippum* Bethsai-
densem, qui Nathanaeli eum patefa-
cit, cum quo Iesus colloquitur. Venit
Iesus in Galilæam, interest Nuptiis fa-
ctis in Cana Galilææ, ubi aquam mu-
tat in vinum. Posthæc, seipsum ma-
gis manifestaturus, ascendit Hieroso-
lymam ad celebrandum Pascha, quod
à suscepto Baptismate primum fuit,
ibique flagello de funiculis facto abi-
git è Templo ementes & vendentes,
castigatque eos, qui factum illud suum
improbabant. Prædicat Resurrectio-
nem suam. Credunt illi multi, sed
se ipse Iudæis non credit. Circà dies
festos Paschatis *Nicodemus*, Princeps
Iudæorum, noctu Iesum adit, & cum
eo colloquitur. Relicta Hierosolyma,
Iesus abit in alium Iudææ tractum, in
quo Baptismo penitentes excipit, dùm
Ioannes Baptista similia faceret in Sa-

N

maria

maria ad Iordanem; quâ occasione;
 cùm Discipuli *Ioannis* quereretur apud
 ipsum, quòd plures ad Iesum consue-
 rent, *Ioannes* rursùm testatus est, se ipso
 longè superiorem esse Iesum, ac su-
 bindè necesse esse eum crescere, se
 autem minui. Paulò post, *Ioannes Ba-*
pista ab *Herode*, Galilææ Tetrarchâ,
 ob repressum adulterium, in carce-
 rem conjicitur. Quò factum est, ut,
 postquàm compertum habuisset *Iesus*,
 Phariseos insidias ejus vitæ struere,
 & *Ioannem Baptistam* in carcerem fuisse
 detrusum, Iudæâ relictâ, Galilæam
 petierit per Samariam, quo in itinere,
 ad Sichem, Urbem, colloquitur cum
 Samaritana, & totam illam Urbem, ut
 sibi fidem haberet, adducit. Postea,
 Iesus ivit in Galilæam, ubi benignè ab
 incolis receptus, felicissimo exitu præ-
 dicat Evangelium, sed à Nazarenis,
 popularibus suis, malè habetur. Quo-
 circa recedit è Civitate Nazareth, &
 curat filium cujuspiam Ministri Hero-
 dis, Tetrarchæ, in Civitate Caphar-
 naum, nobili Galilææ emporio, de-
 cumbentem. Hanc Civitatem Caphar-
 naum, velut commodam suæ prædica-
 tionis sedem, pro mansione deligit Ie-
 sus. Docet illic Galilæos, jisque ple-
 niùs inculcat necessitatem Pœnitent-
 iæ, eò quòd appropinquaret Regnum
 Cœlorum. Quam prædicationem, cum
 per universam Galilæam longè latè-
 que spargeret, & morborum curatio-
 ne illustraret, per totam Syriam cele-
 bre factum est nomen ejus, adeò ut
 undique ad eum cum ægris plerique
 consuerent. Stans juxta Mare Galilææ
 Iesus, miraculo copiosæ capturæ
 piscium ad se vocat *Petrum* & *An-*
dream, fratres, *Iacobum* itidem & *Ioan-*
nem, fratres, *Zebedæi* filios, qui statim
 reli-

relictis retibus , & Navi , sequuti sunt Dominum : Cum his Capharnaum , ingressus , Sabbato Spiritum immundum pellit à Dæmoniaco ; dein , ad Ædes Petri accedens , ejus Socrum , febre laborantem , suo imperio sanat . Tum pergit per totam Galilæam prædicare Evangelium , curare ægros , & è corporibus obsessorum expellere Dæmones , quibus districtè vetat , ne dicant , ipsum esse Christum .

T E R T I A P A R S V I T Æ J E S U C H R I S T I ,

*Complectens ea , quæ gessit anno secundo
Prædicationis suæ .*

Anno à creatione
Mundi quater mil-
lesimo centesimo se-
xagesimo quarto .
Imperii *Augustei* Ti-
berii , seu ab obitu
Imperatoris *Augu-*
sti , anno decimo
quarto , Imperii ve-
rò Proconsularis Ti-
berii anno decimo
septimo .

Anno *Bræ-*
Vulgaris vi-
gesimo septi-
mo , & ætatis
Iesu Christi
trigesimo pri-
mo . Consuli-
bus *M. Licinio*
Crasso , & *L.*
Calpurnio Pi-
sone . Imperii
Proconsula-
ris Tiberii an-
no decimo se-
ptimo .

INstante Paschate Iudzorum , ascen-
dit Iesus Hierosolymam ad cele-
brandum Pascha , quod à suscepto Ba-
ptismate fuit secundum . Sanat Sabba-
to apud Probaticam Piscinam virum ,
qui triginta & octo annos languebat ,
jussitque ut tolleret grabbatum suum ;
indèque Iudæi occasionem arripiant
eum calumniandi , quos Christus re-
darguit tùm Sermonibus suis , tùm
Testimoniis , quæ Pater suus cælestis
& Ioannes Baptista de ejus veritate
doctrinæ perhibebant . *Matthæum* è
Telonio vocat , quem jussit discipulum
suum fieri , & se adsecrari , quod ille
è vestigio , rebus omnibus relictis ,
præstitit . Paralytico , per tegulas , ob-
turbam , ad se dimisso , peccata dimit-
tit , eumque sanat , ringentibus legis pe-
ritis , sed admirantibus aliis . Sabbato
curat hominem , manum aridam habentem ,
& defendit Discipulos suos vel-
lentes spicas , easque in die Sabbati

(C.)

comedentes . Curat etiam in die Sab-
bati Paralyticum , quod licitum esse
ostendit . Tum descendit in Lacum
Genesareticum , quò ad eum multi
confluunt cùm sani , tum cœri , qui ab
eo curantur . Ex multis Discipulis ,
quos sibi prædicationis socios adsci-
verat , duodecim Apostolos elegit ,
cùmque ingens multitudo eum seque-
retur , ascendit ad montem , ubi Ser-
monem habuit , qui complectitur sum-
mam perfectionis Christianæ Reli-
gionis , seu potissima capita Christianæ
Ethices , Iudaica multò præstantioris ,
præsertim in his , quæ spectant patien-
tiam malorum , & beneficentiam ergà
omnes . Multa etiam in eodem Ser-
mone edisseruit Iesus Christus de
eleemosynis , de precibus , de jejuniis ,
de vero thesauro , de vitanda anxietate
circa futura , de Iudiciis , de prudentia
in nuntiando Evangelio , de mutuo fa-
ciendo , de simulatoribus virtutis , de-
que iis , qui verè probi sunt . Hunc Ser-
monem Iesu Christi habitum in Mon-
te secuta est Leprosi mundatio , quem
mundatum Iesus Christus ad Sacerdo-
tem misit . Ingressus deindè Iesus Ca-
pharnaum , Centurionis servum curat ,
& ad Civitatem Naim profectus , uni-
genitum Viduæ ejusdem Civitatis fi-
lium , mox sepulturæ mandandum ,
ad vitam revocat . Hæc Iesu Christi
miracula statim ac ex Discipulorum
suorum narratione audisset Ioannes
Baptista , misit è carcere , in quo vin-
ctus erat , Discipulos ad Iesum , qui
quererent , quis Iesus esset ? sive nùm
esset expectatus Messias ? Quibus Ie-
sus non verbis , sed rebus ipsis se Mes-
siam esse ostendit . Tum incredulos Iu-
dæos castigat , & omnes ad suscipien-
dam doctrinam , quam prædicabat , in-
citatur .

(CI.)

citatur. Postea, convivatur Iesus Christus apud quemdam Phariseum, ubi pedes eius in convivio ungit mulier, quæ ante hæc vitam parum pudicam egerat, & cui Christus, divinæ gratiæ suæ beneficio ad meliorem frugem, conversæ, peccata dimisit. Oblatum sibi Dæmoniacum, cecum & mutum, protinus sanat Christus Dominus, eademque operâ convincit Phariseos ac Legis peritos, qui disceptabant, Iesum Christum, non potestate à Deo acceptâ, sed à Cacodæmonum Principe, Beelzebub, eiicere Dæmones, & contumaciam Phariseorum, aliorumque exprobrans, negat se ullum eis ostensurum miraculum, præter Resurrectionem suam, docetque, quos confanguineorum loco habeat. Multas Parabolas, videlicet de homine seminante semen suum, de zizaniis, semini bono permixtis; de grano sinapis; de Thesauo & Margaritâ inventis, & omnium bonorum distractione emptis; de Sagena bonos simul & malos pisces concludente; ad instruendum Populum proponit & explicat. In Gadarensium tractum Iesus Christus cum transiturus esset, multique eum sequi vellent, eorum dumtaxat duos alloquitur, & in Navi vehementem coortam tempestatem sedat, curatque appulsus duos viros à Cacodæmonibus vexatos, qui Cacodæmones, ipso permittente, in porcorum gregem irruunt. Porci in Mare præcipites aguntur, indeque ab incolis oratur Iesus illinc discedere, quod acutum facit, relictis his viris, ex quibus Cacodæmones expulerat. Ad Occidentalem ripam Lacus Genesarethici appulsus Iesus Christus, curat mulierem, profluvio sanguinis laborantem; filiam Jairi, Principis Synagogæ,

gogæ , ad vitam revocat ; & duobus cæcis visum restituit. In patriam suam Nazareth profectus , à Popularibus suis Propheta non creditur, eorumque subindè incredulitatem postquam , condemnasset, ab eis Civitate ejectus, subduxit se se de medio eorum , dùm conarentur è montis supercilio eum præcipitare. Vicina loca docendo circuit Iesus , sequentibus eum Apostolis, & aliquot mulieribus ei ministrantibus , quas inter *Maria Magdalena* . Duodecim Apostolos suos cum certis mandatis ac præscriptis ad prædicandum mittit, prædicando eis mala, quæ ob Evangelicam prædicationem eos manebant, illisque ad ea forti constanterque animo toleranda animos faciendo . Mandatis Iesu Christi absque mora obtemperantes Apostoli , se se ad prædicationem Evangelii accingunt , eoque sibi demandato officio ardenti zelo perfunguntur. Dùm hæc agerentur , contigit, ut *Herodes* , Tetrarcha , qui , ad petitionem saltantis puellæ Herodiadis, *Ioannem Baptistam* in carcere decollari jusserat, auditâ famâ Iesu Christi, sibi persuaserit, *Ioannem Baptistam* surrexisse à mortuis. Ex quo intellexit Iesus, quam de se suspicionem haberet *Herodes* , aliòque , ad declinandam huius Principis invidiam, sibi migrandum esse. Hinc Iesus, postquam duodecim Apostoli, quos , prædicandi Evangelii causâ , quaquaversus miserat, ad eum rediissent, narravissentque omnia facta & dicta sua , tùm etiam qui fuisset primæ suæ prædicationis felix faustusque exitus; his , inquam , auditis , Iesus eos jussit secum venire , & conscensâ naviculâ navigavit cum illis ad ripam Orientalem Lacus Genesarethici, in desertum tractum

(CIII.)

tractum agri Bethsaidensis, trans mare Galilææ, quò multitudo magna hominum ex vicinis urbibus pedestri itinere eum secuta est. Quam ingentem multitudinem cum inspexisset Iesus, è navicula egressus, benignè excepit, salutari doctrinà imbuit, ægros, qui ei oblati sunt, sanavit, & quinque millia virorum, quinque panibus ordeaceis, & duodus piscibus satiavit. Sed, cum animadverteret Iesus, se propter tam insigne patratum miraculum, à turba raptum iri in Regem, fugit solus in montem, eiusque Apostoli naviculam conscenderunt, quos ipse postea attigit, pedestri in Mari itinere veniens, eosque præsentia suâ confirmavit nocturno tempore consternatos, tum ob vehementem, quâ iactabantur, tempestatem, tum quòd crederent, Iesum Christum, siccis vestigiis in Mari ambulantiem, esse Phantasma. Tempestatem è vestigio sedavit Christus, & Petro facultatem dedit ambulandi super aquas. Posterâ die, cum occasione miraculi multiplicationis quinque panum, plerique ad Iesum certatim convenirent, inde occasionem sumpsit Iesus eos panis corporalis desiderio abducendi ad quærendum panem cælestem, prolixè differendo de eo pane, quem jam Pater misisset in Mundum, quem & ipse pro vita Mundi daturus erat, quem qui ederet, haberet vitam æternam, qui verò non ederet, vitæ æternæ pariceps esse haud posset.

Q U A R T A P A R S , V I T Æ J E S U C H R I S T I ,

*Continens ea , quæ gessit in tertio anno
Predicationis suæ .*

Anno à creatione
Mundi quater mille
fimo centesimo se-
xagesimo quinto .
Imperii *Augusti* Ti-
berii , seu ab obitu
Imp. *Augusti* , deci-
mo quinto , Imperii
verò Proconsularis
Tiberii anno deci-
mo octavo .

Anno *Æræ*
Vulgaris vi-
gesimo octa-
vo , ætatis Chri-
sti trigesimo
secundo . Con-
sulibus *Ap. Lu-
cio Silano* , &
*P. Silio Ner-
va* . Imperii
Proconsula-
ris *Tiberii* an-
no decimo o-
ctavo .

Iesus Christus , non multò post in-
signe , quod edidit , miraculum ,
multiplicationis quinque panum , Hie-
rosolymam se contulit ad celebran-
dum Pascha , quod à suscepto Baptis-
mate tertium fuit , & statim propter
odium , quo Judæi illum insectaban-
tur , rediit in Galilæam , & ecce Scri-
bæ & Pharisei , è Hierosolyma ve-
nientes , accesserunt ad eum , queren-
tes , quòd ejus Discipuli contra Se-
niorum Traditionem manducarent il-
lotis manibus . Quibus exposulanti-
bus vicissim objecit Christus negle-
ctum mandatorum Dei , indèque oc-
casionem sumpsit sermonem habendi
de ablutione manuum , docens , ea ,
quæ intrant in os , non polluere ho-
minem , sed quæ de ore ex corde pro-
deunt . E' Galilæa egressus Iesus , ve-
nit in partes Tyri & Sidonis , ubi fi-
liam mulieris Chananzæ , à Cacodæ-
mone vexatam , sanat , itemque sur-
dum mutum , aliosque ægros curat .
Misertus etiam multitudinis , quæ
ipsum per triduum secuta erat , eam-
in Deserto pavit septem panibus , ac
paucis pisciculis , sicque quatuor mil-
lia virorum , præter parvulos & mu-
lieres , satiavit , ut superessent septem
sportæ fragmentis plenæ , quo edito
miraculo , statim conscensâ Navi , ve-
nit in fines Maggedan . Pharisei &
Sadducæi signum è Cælo frustra pe-
tunt

tunt à Jeshu, qui, eis dimissis, rursùm, ascensà Navi Lacum trajicit, Apostolos monet, ut sibi caveant à fermento Phariseorum & Sadduceorum, eoque nimium sollicitos, quòd panes in Navim non asportassent, dissidentiz coarguit, in illorum memoriam reducens duo superiora, quæ patraverat, multiplicationis panum miracula. Bethsaidam navigavit Iesus, quòd cùm pervenisset, cæco ad se adducto visum restituit. Illinc digressus, in agrum Cæsareæ Philippi se contulit, & percontatur in via ab Apostolis, quem se putarent alii, cùm verò ipsi? Tunc *Petrus*, Apostolorum Princeps, post multorum opiniones ab aliis indicatas, ait: *Tues Christus Filius Dei vivi*. Quam Petri confessionem laudat Iesus Christus, eum *Beatum* pronunciat, & Primatui in Ecclesia suà donat. Octavo die post hanc *Petri* confessionem, Iesus Christus in monte, coram tribus Apostolis transfiguratus est, loquens cum *Moyse* & *Elia*, voxque è Cælo audita est, jubens eum audiri. Posterâ, die Iesus sanat puerum à Cacodæmone obsessum, quem, ob imperfectionem Fidei, ejus Discipuli ejicere non potuerant, eisque Mortem, & Resurrectionem suam prædixit. Capharnaum reversus Iesus Christus, didrachma pro se ac Petro solvi jussit, statere in os piscis recepto. Discipulorum suorum ambitionem castigat, qui de prima dignitate in Regno Cælorum inter se contendebant. Docet, nemini offensionis causam præbendam, neminem contemnendum, & peccantibus in nos sapiùs condonandum, efficaci ad hoc adhibitâ similitudine de Patrefamilias, qui servi sui, in conservum im-

(CVL.)

misericordis, debitum decem millium Talentorum, semel remissum, repetiit. His dictis, Iesus venit Hierosolymam ad Festum Tabernaculorum, sed clam. Mittit ante se septuaginta Discipulos binos in loca, per quæ transiturus erat, eosque mandatis instruit. Calamitates prænuntiat Chorozainensibus, Bethsaidensibus, & Capernaumensibus. Medio Tabernaculorum Festo pervenit Iesus Hierosolymam, ubi de se & de doctrina à Deo accepta orationem habet, sed Iudei disceptant inter se, an sit Messias? Mulierem in adulterio deprehensam absolvit, eique jubet, ut in posterum diligenter abstineat à peccato. Iudæos ad se postea confluentes de sua à Patre Cælesti Missione alloquitur, & eorum pravitatem ac incredulitatem vehementer redarguit. Curat Cæcum natum, variosque sermones habet cum de causa ejus cæcitatis, tum etiam de ejus curatione, quæ accendit invidiam Iudæorum, quod Sabbato eum sanasset. Docet Iudæos, se esse verum Pastorem, qui moriturus erat pro ovibus suis, à quibus agnoscendus erat. In varias de illo sententias abeunt Iudæi. Redeunt septuaginta Discipuli ad Iesum, quibuscum loquitur, & ostendit beatissimos esse. Respondet Legisperito, quærenti, quomodo pacto Vitam æternam consequi posset, deque eo, qui proximus diceretur est? Excipitur à *Martha & Maria*. A Dæmonio muto virum obsessum, curat, quod miraculum contra Phariseorum calumnias defendit, admonetque Iudæos, ut sibi caveant, & declarat, quinam sint verè beati. Damnat contumaciam Iudæorum, miraculum flagitantium. Vocatur ad prandium

(CVIL)

dium à Pharifæo, qui ex occasione graviter ſimulatores virtutis perſtringit, qui ei inſidiantur. Varia Ieſus Chriſtus dat præcepta de vitando fermento Phariſæorum, quod eſt Hypocriſis, de Evangelio prædicando & abſque metu, de contumelia in Spiritum Sanctum, de avaritia, & anxietate circa futura, de liberalitate in egenos, de vigilantia, de virtute eruditioni conſentanea, de diſcordia ex Evangelii prædicatione, nequitia hominum naſcitur; de ſignis ſecundi adventus ſui, deque reconciliando ſibi adverſario. Hydropicum Sabbatho ſanat Chriſtus, & decem Leproſos curat, quorum unus dumtaxat de percepto beneficio gratias agit. Verſans Ieſus Hieroſolymis, tempore Feſti Dedicationis Templi, orationem, habet in Porticu Salomonis de incredulitate Judæorum, propter quam Iudæi conantur eum lapidibus obruere, quorum furori ſe ſe eripit.

P A R S Q U I N T A

VITÆ IESU CHRISTI,

Comprehendens ea, quæ geſſit anno ineunte quarto Prædicationis ſuæ uſque ad illapſum in Spiritus Sancti in Apoſtolos in die Pentecoſtes.

Anno à creatione
Mundi quater mille
ſimo centeſimo ſe-
xageſimo ſexto. Im-
perii Auguſti Tibe-
rii, ſeu ab obitu Im-
peratoris Auguſti,
anno decimo ſe-
xto, Imperii verò
Proconſularis Ti-

Anno Brz
Vulgaris vi-
geſimo nono,
Conſulibus
Cajo Rubellio
Gemino, &
Cajo Fuſio Ge-
mino. Etatis
Jeſu Chriſti
anno trigefi-

POST Templi Hieroſolymitani De-
dicationis Feſtos dies peractos,
Ieſus è Iudæa profectus, redit in Ga-
lilæam, in qua tamen diu moratus
non eſt. Sed ivit verſus fines Iudææ,
iterque fecit per tractus ad ortum,
Iordanis ſitos, & conſtitit eo in loco,
in quo Ioannes Baptiſta penitentes
abluere cæperat. Ad hunc locum,
permulti undique ad Ieſum Chriſtum

berii anno decimo
nono .

mo tertio. Im-
perii Procon-
sularis Tibe-
rii anno de-
cimo nono .

confluxerunt, cum ejus audiendi gra-
tia, tum etiam ut ægros curaret. Dùm
autem his in locis versaretur Chri-
stus, docuit esse planè illicita in Ma-
trimoniis divortia ; divitias obstare
multorum saluti ; pueros ad se venire
jussit, eorumque simplicitatem ad
consequendam Vitam eternam esse
emulandam ac imitandam ostendit .
Cuidam Adolescenti, quærenti ab eo,
quid sibi factò opus esset, ut adipi-
scretur Regnum Celorum ? incun-
ctanter respondit : *Si vis perfectus*
esse, vade, & vende omnia, quæ habes,
& da pauperibus . Cùm *Jesus* adhuc
esset in sinibus illis Iudeæ, in quos,
Iudeorum persecutionem fugiens, se-
cesserat, contigit *Lazarum*, Betha-
niensem, egrotare, quem Iesus singu-
lari amicitia prosequeretur. Is autem
Lazarus frater erat *Marthæ*, & *Ma-
riæ*, apud quas diversatus erat *Jesus* .
Hæ Sorores Iesum certiolem fece-
runt de *Lazari* morbo. At Christus in
Iudeam pergere noluit, nisi postquam
scivit, *Lazarum* esse mortuum. Tunc
enim in Iudeam profectus, Bethaniam
venit, & *Lazaro*, quatrìduo mortuum,
è Sepulchro suscitavit, multis Iudeo-
rum, qui aderant, ad Fidem adduc-
tis . Hoc miraculum à Iesu Christo
editum statim ac pervenisset ad aures
Pontificum ac Phariseorum, collecto
Concilio, in eam sententiam iverunt
Pontifices & Pharisei, ut Iesum occi-
derent, cùmque appeteret tempus ce-
lebrandi Pascha, & Christus versùs
Hierosolimam iter suum prosequere-
tur, iamque proximus esset Urbi
Hierico, cæcum visu donavit, & in-
gressus Civitatem Hierico, *Zachæum*,
se videndi cupidum, ex arbore voca-
vit, in illius ædibus mansit, eumque
ad

(CIX.)

ad Fidem convertit. Ex Urbe Hierico egressus Iesus & pergens Hierosolymam, duobus cæcis visum restituit. Postea, venit Bethaniam ante sex dies Paschatis, ibique in Domo *Simonis* leprosi honorificâ exceptus est cenâ, in qua, Lazaro accumbente cum aliis, & *Martha* ministrante, *Maria* pretioso unguento perfudit caput & pedes Iesu recubentis. FERIA PRIMÂ, quam nos *Dominicam* vocamus, quæque anno vigesimo nono *Æræ* Vulgaris, quo passus est Iesus Christus, incidit in diem vigesimam mensis Martii, triumphans Iesus asino insidens ingressus est Hierusalem per viam ramis instratam, & cum faustis totius Populi acclamationibus, deplorans tamen ante ingressum non multò post eventurum eiusdem Civitatis excidium. Templum deinde ingressus cæcos & claudos, ringentibus Pontificibus, Scribis ac Phariseis, sanavit, & vespere eiusdem diei redit in Bethaniam. FERIÂ SECUNDÂ, seu die Lunæ, quæ anno *Æræ* Vulgaris vigesimo nono incurrit in diem vigesimam primam mensis Martii, Iesus reversus in Hierusalem, sicui, fructibus carenti, in via imprecatus est, & maledicendo è vestigio aridam fecit. Mox Templum ingressus, euentes & vendentes procul eiecit, & sub Vesperam è Civitate egressus est. FERIÂ TERTIÂ, seu die Martis, quæ anno *Æræ* Christianæ vigesimo nono incidit in diem vigesimam secundam mensis Martii, Discipuli redeuntes cum Christo Hierosolymam, viderunt admiratione defixi ficum arefactam esse, indeque Iesus occasionem sumpsit Fidei vim & orationis exponendi. Tum Iesus versans in Templo, multis à Phariseis,

riseis & Sadducæis subdole quæstio-
 nibus impetitus est, quos ipse, variis
 quæstionibus, & aliquot propositis
 parabolis, vicissim notavit ac perstrin-
 xit. Post hæc, Templo egressus, Disci-
 pulis, magnificam Templi structuram
 mirantibus, prædixit futuram illius
 ruinam, & Urbis Hierusalem ever-
 sionem. Perrexit ad montem Oliveti, ubi
 sedens cum Discipulis suis, de Tem-
 pli & Urbis Hierusalem destructione,
 de terrificis signis, quæ secundum ejus
 adventum, seu futurum universale lu-
 dicium, antevertere debent, differuit.
 Feriâ quartâ, seu die Mercurii, quæ
 anno vigesimo nono Æræ Christianæ
 incidit in diem vigesimam tertiam,
 mensis Martii, Proditor *Iudas* trigin-
 ta argenteis Jesum Christum Domi-
 num suum, de se tam benè meritum,
 vendidit Principibus Judæorum. Fe-
 riâ quintâ, seu die Jovis, quæ anno vi-
 gesimo nono Æræ Vulgaris incidit in
 diem vigesimam quartam mensis Mar-
 tii, Jesus Christus sub Vesperam, dum
 incipiebat prima dies Azymorum,
 Agnum Paschalem cum suis Discipu-
 lis manducavit, & hoc fuit quartum
 Pascha, quod à suscepto Baptismate
 celebra vit. In hoc postremo Paschate
 lavit Discipulorum pedes, instituit in
 Azymo Sacro Sanctam Eucharistiam,
 & inter cœnandum, *Iudam* proditorem
 indicavit. Cœnâ peractâ, ivit Jesus
 cum Discipulis suis ad Hortum oliva-
 rum, ubi, præeunte *Juda* proditore,
 à Satellitibus, missis à Principibus Sa-
 cerdotum, captus est. Auriculam *Mal-
 ci*, qui erat Summi Pontificis servus,
 gladio amputavit *Petrus*, quam con-
 festim Christus ei in integrum resti-
 tuit, Ductus est *Iesus* per noctem
 ad *Annam*, Socerum *Caipha*, Summi

Pontificis. Feriâ sextâ, seu die Veneris, quæ anno vigesimo nono Æræ Christianæ incidit in diem vigesimam quintam mensis Martii, Jesus Christus se stitit coram Sacerdotibus, qui, conculcatis divinis & humanis Legibus, dignum morte illum judicarunt. Hinc ductus est ad *Pilatum*, qui illum ad *Herodem* remisit, à quo iterùm transmissus est ad *Pilatum*, qui illum virgis cædi jussit. Interim proditor *Iudas*, culpâ agnoscens, fatetur coram Principibus Sacerdotum, se tradidisse sanguinem justum, & in desperationem actus, ad restim confugit. Ad *Calvarium* Jesus Christus, Crucem suis humeris gestans, perductus est, ibique inter duos Latrones crucifixus. Eius vestimenta sibi milites diviserunt. Sol obscuratus est. Christus, felle & aceto potatus, moritur in Cruce, postquam suis Crucifixoribus veniam concessisset. Mortuo Christo, velum Templi medium scissum est, Terra insolenti & stupendo motu concussa est, mortui è tumulis emerferunt, multique in Hierosolymorum Urbe apparuerunt. Centurio, qui Christum morientem viderat, eius divinitatem palàm confessus est. Miles lanceâ aperuit latus Jesu Christi, ex eo exivit sanguis & aqua. Vespere eiusdem diei, cum immineret festivitas Sabbati, Corpus *Jesu* è cruce depositum in Sepulchro novo conditum est, ad cuius custodiam appositi sunt à Judæis milites, qui noctu diuque excubias agebant. Die primâ post Sabbatum, quam nos *Dominicam* vocamus, JESUS vivus è Sepulchro, devictâ morte resurgit, & apparet primò Mariæ Magdalene. Secundò, piis mulieribus, quæ ad illius monumentum venerant.

Ter.

Tertiò, *Petro*, Apostolorum Principi. Quartò, Discipulis euntibus in Castellum Emmaus. Quintò, Apostolis; absente *Thoma* Apostolo. Sextò, post dies octo apparet Apostolis, præsente *Thoma*, qui digitum suum immisit in loca clavorum. Septimò, apparet in Monte Galilææ plusquam quingentis Fratribus. Octavò, visus est *Iacobo* Apostolo. Nonò visus est iterum Apostolis, ad Mare Tyberiadis piscantibus, ac sæpiùs per quadraginta dies convescens & loquens de Regno Dei, se se Discipulis suis conspicuum exhibuit. Die vero post Resurrectionem suam quadragesimo, qui anno *Æræ* Christianæ vigesimo nono incidit in feriam quintam, seu in diem Jovis, *Iesus Christus* ascendit in Cælum, & die decimâ post Ascensionem suam, seu Dominicâ, quæ erat Pentecostes Judæorum, misit ad Apostolos ac Discipulos promissum Spiritum Sanctum, qui illos doceret omnem veritatem, notitiâ exoticarum linguarum imbueret, & ad prædicandum ubique Terrarum Evangelium idoneos Ministros efficeret. *Petrus* eadem die, quâ in Apostolos illapsus est Spiritus Sanctus, in prima concione sua tria millia hominum ad Christum convertit. *Paulus* verò, post elapsum à Passione Christi annum, ex persecutore effectus est Vas Electionis, & anno *Æræ* Christianæ trigésimo Fidem *Jesu Christi* amplexus, per Terras, Mariæque volitavit, ut omnes Gentes, expulsis Idololatricæ tenebris, subiugum Christi redigeret. Horumce duorum Apostolorum *Petri*, & *Pauli*, qui inter alios eminent, peregrinationem in propagatione Evangelii subnectam, ut inde Lector intelligat, quam

quam eximiam promulgationi Doctrinę Christi, seu Evangelii propagationi operam navaverint duo illi Apostoli, de quibus canit Ecclesia: *Petrus Apostolus, & Paulus Doctor Gentium, ipsi nos docuerunt Legem tuam Domine.*

*Peregrinatio Apostolorum Petri & Pauli
in propagatione Evangelii.*

SANCTUS *Petrus*, post mortem *S. Stephani*, Martyris, qui à Judæis, fuit lapidatus, profectus est vnā cum *Ioanne* [sicut legitur in *Actis Apostolorum*] in *Samaritam* Civitatem, undē & tota Regio *Samaria* dicta est, ut comprobaret auctoritate suā, perficeretque, quod illic per *Philippum*, Diaconum, in Prædicatione Evangelii cęptum erat. Et autem *Samaria* media inter *Judæam* & *Galilæam*. Peragravit *S. Petrus* varias *Palæstinæ* Regiones, antequam veniret *Lyddam* & *Ioppen*, est autem *Lydda* in *Palæstina*, non procul à *Ioppe*, Civitate Littorali. Rursum à *Ioppe* legitur profectus in *Cæsaream* *Palæstinæ* maritimam, quæ prius dicebatur *Turris Stratonis*. Hic baptizavit *Cornelium* Centurionem. Hinc reversus est Hierosolymam. *Eusebius*, *Cæsariensis* Episcopus, asserit, *S. Petrum* prædicasse Evangelium apud Ponticos, Galatas, Capadoces, Asiaticos, Bithynos, quarum gentium meminit *S. Petrus* in exordio prioris suę epistolę dicens: *Petrus, Apostolus Iesu Christi, electis advenis dispersionis Ponti, Galatię, Cappadocię, Asię, & Bithynię*. Sedit *S. Petrus* Antiochię per septem annos, & anno duodecimo post Passionem Iesu Christi, seu anno *Brę* Christianę quadragesimo primo, sub initium Imperii *Claudii*, Romam venit, ibique suam sedem fixit, sicut affirmat *Appollonius* apud *Eusebium* in Libro de mortibus Persecutorum. A die autem, quo *S. Petrus* Romam appulit, per viginti quinque annos Pontificatum tenuit, sicut, post *Eusebium*, & *S. Hieronymum*, fidem faciunt multi Scriptores Ecclesiastici. Tandem Martyrio fuit Romę coronatus exevante anno duodecimo Imperii *Neronis*, seu anno *Brę* Christianę sexagesimo sexto, Consulibus *C. Luccio Telesino*, & *C. Suetonio Paulino*, sicut fusiùs commemoravi in Colloquio primo Tomi primi in Historiam Ecclesiasticam. *S. Petrum* inter omnes Apostolos Primatum à Christo obtinuisse patet, tūm quia apud Evangelistas omnes, atque etiam in *Actis Apostolorum*, semper *Petrus* in Catalogo duodecim Apostolorum primo loco recensetur: Tum quia etiam initio primus fuit ad dicendum. Nam & antè missum Spiritum Sanctum, congregatis in Cœnaculo Discipulis, proponit de subrogando quopiam in locum proditoris *Iudę*. Rursus uoi tumultus esset in Populo, ob linguarum miraculum, *Petrus* solus auspica-

(CXIV.)

tur Concionem Evangelicam. Primus omnium miraculum edit in nomine Jesu, pro Templi foribus sanato claudo, ac mox hac de causa concursu facto in Porticu Salomonis, *Petrus* concionatur ad Populum, denique, ne cætera alia commemorem, dum ageretur de electione septem Diaconorum, *Petrus* fecit verba solus, solus pronunciavit Sententiam in *Ananiam*. Quæ omnia probant, Apostolis compertum ac exploratum fuisse, *Petrum* in universa Ecclesia Primatu fuisse à Christo donatum, quando in præmium Confessionis suæ, quâ illum agnovit *Filium Dei vivi*, hoc Responsum ab eo accepit: *Beatus es Simon Bar-Iona, quia caro & sanguis non revelavit tibi, sed Pater meus, qui in Cælis est: Et ego dico tibi, quia tu es Petrus, & super hanc petram edificabo Ecclesiam meam, & portæ inferi non prævalebunt adversus eam; & tibi dabo claves Regni Cælorum, & quodcumque ligaveris super terram, erit ligatum & in cælis, & quodcumque solveris super terram, erit solutum & in Cælis*, Matth. cap. 16. v. 17. 18. & 19.

Veniamus nunc ad peregrinationes, quas suscepit Apostolus *Paulus*, qui instar Solis, universum Mundum Evangelii luce illustravit. Primum, Hierosolymis profectus est *Paulus* DAMASCUM. Ea est Civitas totius Syriæ caput inter Libanum & Antelibanum sita. Hic *Paulus*, qui antehac furore percitus in Christianos acriter sæviebat, ad Christum conversus est, baptizatus, & Evangelii Prædicationem auspicatus. E Damasco profugiens venit in Arabiam, & inde reversus est Damascum, ac post annos tres demum rediit Hierosolymam, ut videret *Petrum*, quemadmodum ipsemet refert in Epistola ad Galatas. Rursus Hierosolymis profugus, deductus est CÆSAREAM PHILIPPI, ea est Phœnices Civitas ad radicem Libani montis, ubi sunt fontes Jordanis. A Cæsarea dimissus est *Tharsum*, quæ Urbs est Metropolis Ciliciæ, & patria Apostoli *Pauli*, quam interfuit amnis Cydnus. A Tharso per *Barnabam* reductus est Antiochiam, Metropolim Phœnices. Hinc profectus est de novo Hierosolymam, ut exhiberet collectam pecuniam in subsidium pauperum. Quo facto, reversus est Antiochiam, undè venerat. Antiochiæ *Paulus* vñ cum *Barnaba* Apostolico nomine donatus est, & statim perrexit Seleuciam, quæ est in Promontorio Antiochiæ Syriæ, obvia volenti proficisci ab Antiochiæ Civitate in Cyprum. E Seleucia solvit in Cyprum, insulam oppositam Ciliciæ, quæ est Asiæ minoris. Appulit autem Salaminem, quæ Civitas Cypri primum occurrit ad Orientem, & pervenit ad Paphum, quæ est extrema ad Occidentem, ubi quidam putant illi pro *SAULO*, commutatum *PAULI* nomen à SERGIO PAULO, eius Insulæ Proconsule, A Papho solvens Apostolus *Paulus*, appulit Pergen, ea Civitas est Pamphyliz. Hinc Antiochiam Pisidiæ. Hinc Iconium, mox Lystra, quæ est Civitas Lycaoniæ. Hic autem tum lapidatus est *Paulus*. A Lystris profectus est Derben, quæ & ipsa Urbs est Lycaoniæ. Hinc remensus iter, quo venerat, reversus est Lystra, Iconium, &

Antiochiam Pisidia, ut quod captum erat confirmaret. Peragrata etiam reliqua *Pisidia*, rediit in *Pamphyliam* usque ad *Pergen*, ad quam primum appulerat à *Cypro*. Hinc venit *Attaliam*, quæ est Civitas *Maritima Pamphyliæ*. Attalia solvens *Paulus*, navigavit *Antiochiam Syriæ*, undè primum hoc iter fuerat auspicatus. Hinc rursus *Hierosolymam* se contulit, ut cæteris *Apostolis* probaret quæ gesserat in *Asia minore*, sed interim prædicans *Evangelium* in *Phœnice*, & *Samaria*, per quas iter conficiebat. Eo peracto, reversus est *Antiochiam*, undè venerat, & hic seiunctus à *Barnaba*, peragravit *Syriam*, ac mox *Ciliciam*. Inde iterum revisit *Derben*, ac *Lystra*, ubi circumcidit *Timotheum*. A *Lystris* fecit iter per *Phrygiam* & *Galatiam*. Hinc venit in *Mysiam*, mox *Troadem*. A *Troade*, quæ est Regia *Asiæ minoris*, solvens, pervenit recto cursu in Insulam *Samothracem*, oppositam *Thraciæ*, quam habet ad *Septentrionem*. Hinc venit *Neapolim*, quæ Civitas est in littore, in confinio *Macedoniæ* ac *Thraciæ*. Hinc accessit *Philippos*, quam *S. Lucas* in *Actis Apostolorum* admonet esse Civitatem *Coloniæ* in prima parte *Macedoniæ*. Ad *Philippenses* unam scripsit *Epistolam Paulus*. In hac *Philippos* Urbe virgis cæsus est *Paulus*, & in carcerem coniectus cum *Sila*, individuo itineris & laborum socio. Posthæc, per *Amphipolim*, quæ non longè abest à *Strymone* Flumine, & per *Apolloniam*, quæ *Thessalonicæ* proxima est, venit *Paulus Thessalonicam*, quæ Civitas est *Metropolis Macedoniæ*. Ad Cives hujus Urbis *Thessalonicæ* *Paulus* scripsit *Epistolam*. Orto in Civitate *Thessalonicæ* tumultu, *Paulus* clam dimissus est *Bertheam*, quam à *Thessalonica* dirimit *Pella*, quæ Patria est *Alexandri Magni*. Indè *Athenas* pervenit, ubi *Dionysium Areopagitam* ad *Fidem Christi* convertit. E Civitate *Athenarum* venit *Corinthum*, quæ est *Metropolis Achajæ*. Hinc pervenit *Ephesum*, quæ Urbs est in littore *Asiæ minoris*, in parte, quæ dicitur *Ionia*. Ab *Epheso* venit *Cæsaream*, deindè *Antiochiam*. Indè rediit in *Asiam*, & post peragratas *Regiones*, in quibus ante docuerat, venit in *Galatiam*, hinc rursus in *Phrygiam*, ubique confirmans *Discipulos*. Postea, profectus est *Ephesum*, quum jam *Apollos*, quem sibi socium adsciverat, profectus esset *Corinthum*. Ille *Paulus* proposuerat repetere *Hierosolymam*, sed prius peragrata *Macedoniâ* & *Achajâ*, per spiritum intelligens, sibi *Romam* esse eundem post aditam *Hierosolymam*. Itaque præmisit *Timotheum*, & *Erastum* in *Macedoniam*, & ipse commoratus est aliquandiu in *Asia minore*, ex qua post tumultum per *Argentarium* quemdam, nomine *Demetrium*, excitatum, exire coactus, secutus est eos, quos præmiserat. Peragratis autem superioribus partibus, venit in eam partem, quæ propriè *Græcia* dicitur, exindè repetiit *Macedoniam*, & à *Macedonia* pervenit *Philippos*, atque à *Philippis* *Troadem*, ubi adolescentulum ex ruina mortuum ad vitam revocavit. A *Troade* pervenit *Affon*. Est autem *Affon* Civitas *Littoralis*, non longè infra *Troadem*, dicta etiam *Apollonia*. Affo solvens

Paulus, appulit *Mytilenen*, quæ Civitas est *Lesbi* Insulæ, obvia ab *Ass*o
 navigantibus *Chium*. A' *Mytilene* legens littora *Asiæ*, eò pervenit, ut
Chium Insulam haberet ad dextram: *Chius* autem opposita est *Clazomenæ*
 in Littore *Asiæ*, media inter *Lesbium* & *Samum*, quò post adnavigavit
 • *Samus* autem opposita est *Trogyllio*, Promontorio *Asiæ*. A' *Samo* appu-
 lit Paulus *Trogyllium*, & à *Trogyllio* *Miletum*, quæ Civitas est *Cariæ*
 Littoralis. E' *Mileto* pervenit *Coom*, quæ Insula est inter *Samum* & *Gni-*
dum. A' *Coo* venit ad *Rhodum*, quæ Insula est opposita *Lyciæ*. A' *Rhodo*
 venit *Patara*, quæ Civitas est Littoralis *Lyciæ* Provincia. Hic nactus na-
 vim, quæ rectè peteret *Phanice* *Siriæ*, recto cursu cœpit eò tendere,
 & relicta ad lævam *Cypro* insula, appulit *Tyrum*. Ea est in Littore *Pheni-*
ces infra *Sidonem*, quæ est supra *Tyrum*. A' *Tyro* venit *Ptolomaidem*, &
 hæc est Littoralis inter *Tyrum* & Montem *Carmelum*. Hinc perve-
 nit *Cesaream* *Palæstinæ*, & deinde *Hierosolymam*, undè, jussu Tribuni *Lysie*,
 catenis vinctus, deductus est *Antipatridem*, quæ media occurrit inter
Hierosolymam & *Cesaream*. Hinc per Equites ductus est *Cesaream* *Pala-*
estina, undè jussu *Festi*, Præsidis *Syriæ*, qui *Felici* successerat, vinctus Ro-
 mam deductus est hoc quidem itinere. Primum impositus Navi, à *Cesa-*
rea pervenit *Sidonem*, quæ est supra *Tyrum*. Hinc, adigentibus ventis
 contrariis, advenit *Cyprum*, & præterlegens Littora *Ciliciæ*, & *Pamphylie*,
 venit *Myra*, quæ est in *Lycia* non procul à Littore. Hinc, agrè longâ-
 que navigatione eò progressi sunt Nautæ, ut *Gnidum* Promontorium,
 haberent ad dextram, sed restante vento, cursum flexerunt ad *Cretam*,
 quæ illis tam erat ad lævam, & venerunt ad portum, cui nomen *Sal-*
mon. Illic, quoniam videbatur portus commodus, Nautæ decreverunt
 hibernare; sed cùm adspirasset Austër ventus sat commodus, à portu
 solverunt ut appellerent *Phanice*, cùm ecce subito in diversum muta-
 to vento, & pro Austro, flante vento, qui dicitur *Typhonicus*, vel
 Euro-Aquilo, Nautis formidabili, vi tempestatis delata est Navis in In-
 sulam, quæ Aët. Ap. cap. 27. v. 16. *Cauda* appellatur, & tandem despera-
 tis rebus, nullique amplius affulgente spe salutis, Nautæ impererunt Na-
 vim in Insulam, quæ dicitur *Melitæ*, quæ est inter *æpirum*, & *Italiam*, spe-
 ctans *Siciliam* ad Septentrionem. Hic *Paulus* Viperam, quæ in ipsum in-
 silierat, excussit absque noxa. Hic etiam Nautæ aliam navem nacti, nam al-
 tera perierat, appulerunt *Syracusas*, Urbem *Siciliæ*. Deinde devenerunt
Rhegium, Oppidum in extremo agro *Brutiorum*. A' *Rhegio* recto cursu
 delati sunt *Puteolos*, idest, Promontorium in Campania, non procul à *Nea-*
poli. Hinc terrestri itinere pervenit usque ad *Forum appii* ad locum, qui
 dicitur: *Tres Tabernæ*, atque hic Christiani, qui erant Romæ, occurre-
 runt Apostolo *Paulo*, qui hinc tandem anno tertio Imperii *Neronis* Ro-
 mam adventavit, ibique totum biennium egit in vinculis, hoc est usque
 ad annum quintum *Neronis*, ibique *S. Lucas* in Actis Apostolorum si-
 nem imponit *Historiæ* Peregrinationum Apostoli *Pauli*. Cæterum,

Scri-

(CXVII.)

Scriptores Ecclesiastici traſunt, Apoſtolum *Paulum*, poſtquàm cauſam ſuam coram Imperatore *Nerone* peroraſſet, fuiſſe abſolutum, ac liberè ubi vellet, Evangelium prædicariſſe uſque ad annum exeuntem duodecimum Imperii *Neronis*, ſeu uſque ad annum *Æræ Chriſtianæ* ſexageſimum ſextum, quo anno, cùm *Neronis* ſævitia jam proceſſiſſet in rabiem, ad eius Tribunal *Petrus*, & *Paulus* ſe ſiſtentes, & mortis ſupplicio addiſti, palmam Martyrii adepti ſunt die vigefimâ nonâ menſis Iunii eiufdem anni, qui fuit trigefimus ſeptimus à Chriſti Domini Paſſione; nam, ut ſuperiùs diximus, Jeſus Chriſtus anno *Æræ Chriſtianæ* vigefimo nono paſſus eſt, à quo anno utique ad annum *Æræ Chriſtianæ* ſexageſimum ſextum interfluxere anni triginta ſeptem. Porro, *Petrum*, & *Paulum*, triginta ſeptem annis poſt Paſſionem Jeſu Chriſti elapſis, Martyrio fuiſſe coronatos, aſſerunt S. *Hieronymus* in Libro *De Scriptoribus Eccleſiaſticis* tam in Elogio S. *Petri*, quàm S. *Pauli*, Pontificale Romanum, *Chryſoſtomus*, *Honorius*, *Iſidorus*, *Beda*, *Rabanus*, *Nicephorus*, & alii. Ex quo facilè intelligitur, Apoſtolum *Paulum*, qui ad Fidem Chriſti converſus & baptizatus eſt anno poſt Paſſionem Chriſti elapſo, hoc eſt, anno *Æræ Chriſtianæ* trigefimo, in Evangelico negotio verſatum eſſe per triginta ſex annos, quia ab anno *Æræ Chriſtianæ* trigefimo, quo *Paulus* fuit baptizatus, uſque ad annum *Æræ Chriſtianæ* ſexageſimum ſextum, quo *Paulus* Martyrii coronam adeptus eſt, effluxere triginta ſex anni.



TRA-

Apparuit gratia Dei Salvatoris nostri omnibus hominibus , erudiens nos , ut abnegantes impietatem , & secularia desideria , sobriè , & jussè , & piè vivamus in hoc seculo , expectantes beatam spem , & adventum magni Dei , & Salvatoris nostri Jesu Christi : qui dedit semetipsum pro nobis , ut nos redimeret ab omni iniquitate , & mundaret sibi populum acceptabilem , Sectatorem bonorum operum .
Hæc loquere , & exhortare , &c.

Epistolæ ad Titum cap. 2.





**TRACTATUS
DE VITA, MYSTERIIS,
ET ANNIS JESU CHRISTI,**

Servatoris nostri,

**DISSERTATIONIBUS
DOGMATICIS ET CHRONOLOGICIS,**

Necnon Observationibus Criticis & Historicis,

JUXTA GERMANAM

DOCTORIS ANGELICI

MENTEM ILLUSTRATUS;

Et ad usum Scholæ accommodatus.



PROLUDIUM.



MYSTERIA ET VITAM JESU CHRISTI, Servatoris nostri, variis Dissertationibus in hoc Tractatu illustrandi suscepturus officium, operæ pretium me facturum esse duxi, si eas non solum difficultates, in quibus eligendis, tam doctissimi Theologi, quam periti hujus temporis Critici ac Chronologi, magno rei litterariæ emolumento, hætenus defudarunt, pro meo modulo ventilandas ac discutiendas susceperem: verum etiam, objectâ veritatis luce, omnes dissiparem tenebras, quas pervicaces Judæi, Infideles, & Hæretici, Mysteriis

Christi datâ operâ offundere moliantur; dum vel constantem illorum veritatem ac certitudinem, extra omnem dubitationis aleam positam, præfractè negant, vel ea sinistris interpretationibus perperam explanant,

Tom. I.

Q

& il-

& illotis, ut ajunt, manibus tractare præsumunt. Quamobrem, in his viginti quatuor, quas adornavi, Dissertationibus, in eum duntaxat scopum collimavi, ut omnia, quæ sacri Evangelistæ de Mysteriis Christi memoriam prodiderunt, litterisque consignarunt, procul ablegatis anilibus fabulis, quas nonnulli plus æquò creduli obtrudunt Auctores, in optimo lumine collocarem, telaque retunderem, jam licet rubigine exela, quæ sibi fidei hostes saniora Religionis Catholicæ dogmata impetere solent. Undè, quia Judæis effutire solenne est, Christum Dominum ex Iosepho cum Maria carnali consortio fuisse procreatum, ab hac præsertim confutanda blasphemiâ hunc Tractatum auspicator; Dein, de ingressu Christi in hunc mundum, de illius progressu in hoc mundo, de ejus exitu ex hoc mundo, de glorificatione Christi post ejus exitum ex hoc mundo, juxta ordinem, quem sibi præfixit S. Thomas, & juxta accuratam Scholæ methodum, differere pergam. Sit igitur.

DISSERTATIO PRIMA

De matrimonio Mariæ cum Iosepho, perpetua cum virginitate fœderato.

AD pleniorē hujusce quæstionis elucidationem, duos hac in Dissertatione institui Paragraphos. In primo ostendam: Mariam verum & ratum iniisse cum Iosepho matrimonium, ante legationem Gabrielis, seu ante conceptionem Verbi divini. In altero commo-
nstrabo, istud matrimonium nunquā virili congressu fuisse consummatum, ac subindè Mariam, quam Verbum divinum sibi matrem in tempore elegit, perpetuò illibatum virginitatis florem conservasse.

PARAGRAPHUS PRIMUS.

Utrum Maria inierit matrimonium cum Iosepho ante Legationem Gabrielis?

ANtequā de tempore, quo Maria inivit matrimonium cum Iosepho, sententiam meam promam, non pigebit paucis in antecessum referre, & eādem operā refellere antiquas quidem, sed apocryphas traditiones, quæ circumferuntur de matrimonio Mariæ cum Iosepho, quarum mentionem faciunt S. Gregorius Nissenus Oratione de die natali Christi, & S. Epiphanius hæresi 78, ut prudens Lector facili negotio dijudicet, quam fidem mereantur istæ traditiones, quibus tot sunt affusæ fabulæ.

Legitur quippè in Libro de ortu Virginis, qui, ut concors est omnium Criticorum sententia, falsò tribuitur S. Hieronymo, & in
Pro-

Proto-Evangelio, perperam S. Jacobo adscripto, quod inter monumenta orthodoxographa insertum est : Mariam, postquam in templo vndecim annis, instar columbæ, fuisset educata, ac cibo de manu Angeli accepto nutrita, tandem à Sacerdotibus, quorum curæ demandata fuerat, in uxorem traditam fuisse Iosepho, qui tum temporis senex erat, & liberos ex priori conjugē procreatos habebat : Idque, quod sanè lepidum ac festivum est, sorte divina contigisse dicitur. Nam, cū virgam accepisset Ioseph, & templum fuisset ingressus; Ecce illicò virga, quam præ manibus tenebat, effloruit, & ex virga exiit columba, quæ illius capiti insedit, quo signo admonitus Ioseph, Mariam, volens nolens, & à summo Sacerdote minis perterritus, in uxorem tandem accepit.

Sunt quidam hujus tempestatis Critici, qui ea non solum reiiciunt, quæ huic narratiunculæ inserta ad aniles fabulas ableganda esse mox ostendam, verum etiā in dubium revocant, immò & negant, B. Mariam Virginem in Templo fuisse præsentatam, & ad testimonia, quæ ex Sanctis Patribus Ioanne Damasceno, Germano, Patriarcha Constantinopolitano, Andrea, Cretensi, Georgio Episcopo Nicomediensi, Cedreno, & Nicephoro Callixto deprompta laudat Baronius in Annalibus Ecclesiasticis ad probandam Præsentationem Mariæ Virginis in Templo; respondent, illos Scriptores Græcos esse recentiores, quā ut illis certò fides habenda sit. Pertendunt etiā isti Critici, Festivitatē de Præsentatione B. Mariæ Virginis in Templo, quā Ecclesia cū Græca, tū Latina celebrare solet die 21. mensis Novembris, esse potiùs Festivitatē de Præsentatione Jesu Christi, à B. Maria Virgine oblata in Templo, quā Festivitatē de Præsentatione B. Mariæ Virginis in Templo. Ast, ne his Criticorum conjecturis calculum meum addam, vetat in primis ea, quæ Sanctis Patribus, ab Eminentissimo Annalium Parente citatis, debetur reverentia, & quorum testimoniis refragari minimè possum. Deindè, Festivitatē de Præsentatione B. Mariæ Virginis in Templo esse planè distinctam ab altera Festivitate de Præsentatione Jesu Christi à B. Maria Virgine oblata in Templo, ex duplici momento facilè contra illos Criticos evinci potest. Primò, quia Festivitas de Præsentatione Jesu Christi, à B. Maria Virgine oblata in Templo, peragitur die 2. mensis Februarii, seu die quadragesimo post Natale Christi Domini, & hanc Festivitatē, quæ antiquissima est, Ecclesia Latina appellat Purificationem B. Mariæ Virginis; Ecclesia verò Græca eam vocat Occursus Domini solemnitatē. Hinc, tot illi apud Ecclesiæ Græcæ Patres Sermones & Homiliæ in Occursu Domini. Festivitas verò de Præsentatione B. Mariæ Virginis in Templo, quæ die 21. mensis Novembris celebratur, multò recentior est, minusque sollemnis in Ecclesia tam Græca, quā Latina, nec jisdem titulis decoratur. Secundò, ipsamet Oratio, quæ die Festo de Præsentatione B. Mariæ Virginis in Templo, seu die 21. mensis Novembris, in Ecclesia Latina recitari solet, disertam tantum mentionē facit Præ-

sentationis B. *Mariæ Virginis* in Templo, non verò Præsentationis Iesu Christi, à B. *Maria Virgine* in Templo oblati. Hæc quippè Oratio, quæ Sæculo XVI. sub *Pauli III.* Pontificatu his verbis concepta erat: *Deus, qui Sanctam tuam Genitricem, Tabernaculum S. Spiritus post triennium in Templo præsentari voluisti &c.* Hæc, inquam, Oratio secutis inde temporibus à *Sixto V.* Pontifice Maximo, fuit in hanc formam reducta, quæ etiamnùm hodie in Sacro & publico Officio usurpatur: *Deus, qui B. Mariam semper Virginem, Spiritus Sancti habitaculum, hodiernâ die in Templo præsentari voluisti; præsta quesumus, ut ejus intercessione in Templo gloriæ tuæ præsentari mereamur.* Mariam itaque Virginem fuisse in Templo præsentatam adversùs quosdam modernos Scriptores Criticos constanter profiteor, candidè tamen dicam, huic quam superiùs adduxi, Narratiunculæ, ex quibusdam Libris Apocryphis hauste, addita esse nonnulla de educatione B. Virginis *Mariæ* in Templo, de cælesti cibo, quo fuit ab Angelo pascita, de Virga florida, de Columba Iosepho insidente, & de aliis ejusmodi, quæ puram putamque fabulam olere, facile ex his, quas subnectam, rationibus intelliget pius ac eruditus Lector. Et primò quidem, quis credat, *Mariam* fuisse per 11. annos, instar Columbæ, ab Angelis nutritam & educatam in Templo, in Sancto Sanctorum, quò nemini mortalium patuit unquam aditus, præterquàm Summo Pontifici, & quidem semel in anno, ut expressè notant *Apostolus* cap. 9. Epist. ad Hebræos, *Iosephus* lib. 2. contra Appionem, & lib. 8. Antiq. cap. 2. necnon etiam *Philo*, Iudæus, in Libro de Legatione ad *Cajum Imperatorem*. Præterea, S. Iosephum, antequàm nuberet *Mariæ*, priorè conjugem habuisse, & ex ea filios sustulisse, tam fallum est, quàm quod maximè, *Sanctus* quippè *Hieronymus* lib. adversùs *Helvidium*, & *Petrus Damiani* Opusc. 17. affirmant, Iosephum virginem jugiter permansisse, hancque piam Ecclesiæ Latinæ credulitatem esse, evincit *Bollandus* ad diem 19. mensis Martii. Tertiò, Sancti Patres, ut infra ostensurus sum, impensè laudant justitiam Iosephi, qui, cum esset proximo agnationis gradu cum *Maria* conjunctus, ei juxta legem & consuetudines patrias nupsit. Quorsùm igitur opus fuit tam ingenti prodigio ad feligendum præ cæteris Iosephum in Sponsum *Mariæ Virginis*? Hinc certè mirari non subit, si prædictum prodigium de virga S. Iosephi florescente, eique columbâ insidente, non magnum habeat apud viros eruditos auctoritatis pondus. Denique, ut cætera, quæ in hac narratione fabulam olent, brevitati consulendo, prætermittam, verosimile non est, Iosephum fuisse senem octogenarium, ut innuunt spuria illæ traditiones, quando matrimonium inivit cum *Maria*. In ea siquidem effœtate, non potuisset Iosephus, amaræ senectutis pondera ferens, suis laboribus alere familiam, Virginem defendere, & urgente periculo eas suscipere itinera, in quibus Beata Virginis individuus comes esse debebat, sed potiùs illi fastidio, tædio & oneri fuisset; nec aliud expediebat

bat ad conservandum honorem Virginis, ut seni ætate multà provecto nuberet, cujus matrimonio intempestiva canities, Virginis partum Iudzorum cavillationibus obnoxium reddidisset, nedùm à criminis suspitione defendisset. Longè itaque probabilius est, & litteris Evangelicis magis consentaneum, Iosephum, in matura & vigente adhuc ætate, fuisse cum Maria Matrimonio sociatum.

Explosis, itaque fabulosis & commentitiis illis traditionibus, & aliis id genus, quæ referuntur in Libris Apocryphis, videlicet in Libro quodam *Judaicarum Traditionum*, cujus meminit S. Epiphanius Hæresi 78. & 79. in Proto-Evangelio, quod falsò in Orthodoxographia S. Jacobi Apostolo adscribitur; in Libro *De Ortu Virginis*, quem nonnulli Iacobo, fratri Domini, alii S. Cyrillo, Patriarchæ Alexandrino, iniquè tribuunt; in Libro altero *De ortu Virginis*, quem Hæreticus Seleucus affixit Mattheo Evangelistæ; in Historia incerti Auctoris, quam S. Gregorius Nissenus in Oratione *De Christi Natali* indigitat; in Opusculo *De Nativitate S. Mariæ*, inter Apocrypha S. Hieronymi rejecto ad calcem Tomi 9. in spuria S. Ewaldi, Patriarchæ Antiocheni, Epistolâ; in Apocrypho S. Eustathii, Patriarchæ Antiocheni, Commentario in Hexameron; ac denique in *Tragædia de Christo pariente*, quam Hæresiarcha Apollinarius supponit S. Gregorio Nanzianzeno. His inquam, rejectis fabulosis Traditionibus, quæ in citatis Libris Apocryphis leguntur, nunc discutiendam aggredior difficultatem, de tempore, quo Maria matrimonium inivit cum Iosepho. Circà quam difficultatem, tres versantur Theologorum sententiæ. Prima est quorundam antiquorum, qui, ut videre est apud Gratianum Qu. 27. causa 2. cap. quod autem, & cap. institutum, specioso obtentu conservandæ virginitatis Mariæ, existimarunt, Mariam fuisse tantummodò Iosepho sponsione promissam, nunquàm tamen matrimonio junctam. Sed hanc sententiam omnes ad unum modò repudiant Theologi. Primò, quia è fronte opponitur Scripturæ Sacræ, quæ multis in locis Mariam uxorem Iosephi, ac vicissim Iosephum virum Mariæ, disertis verbis appellat. Secundò, quia Sponsalia nihil aliud sunt, quàm futurarum nuptiarum promissio: Si ergo Maria, & Ioseph post contracta sponsalia nunquàm nuptias iniissent, fidem datam in sponsalibus de contrahendis nuptiis violassent, immò nonnisi fictè & simulatè sponsalia contraxissent. Quid enim, amabo, aliud est pacifici & contrahere sine voluntate implendi id, quod promittitur, quàm æquivocationibus & mendaciis ludere illum, cui promittitur? Sibi ergo Maria & Iosephus, in contrahendis sponsalibus, mutuò verba tantùm dedissent, si promissas nuptias nunquàm adimplere, & executioni mandare voluissent, quod dictu nefas est. Tertiò, Ecclesia ducentis ab hinc annis festum Desponsationis, seu matrimonii Mariæ cum Iosepho, communi fidelium pietate celebrandum instituit. Denique, vetus illa sententia ca tuco & falso nititur fundamento; nam idè illi antiqui negabant, Mariam fuisse Iosepho conjugali vinculo sociatam, quia putabant,

bant, nuptialem concubitus esse partem essentiali matrimonii. Quia in re eos vehementer fuisse hallucinatos, in confesso est apud omnes Theologos, qui, post Sanctos Patres, quos sequitur S. Thomas, constanter docent, verum & ratum stare matrimonium, etiam secluso omni concubitu nuptiali, adeoque matrimonium, quod Maria inivit cum Iosepho, ne leve quidem ejus virginitati præjudicium intulisse. Quocirca, ne actum agere videar, in hac veterum confutanda sententia, quæ jam penitus antiquata est, & à scholis Theologorum exulat, diutius non immorabor.

Altera sententia eorum est, qui, licet non inficias eant, Mariam, fuisse cum Iosepho junctam matrimonio, docent attamen, Mariam ante legationem Gabrielis, necdum fuisse Iosepho, ceu viro, traditam, neque ab ipso adscitam in consortium domesticum. In hanc opinionem, cui olim suffragati sunt aliqui Patres, nimirum *Hilarius* in cap. 1. *Matth. Basilii* homilia de humana Christi generatione, & *Epiphanius* hæresi 78. plures, non minorum gentium eruditi, descenderunt, *Baronius* videlicet, *Tostatus*, *Cajetanus*, *Montacutius* in Apparatu ad Origines Eccles. *Samuel Basnagius* tom. 1. *Annal. Fridericus Spanhemius* in Dubiis Evang. eamque obviis ulnis amplexus est *Bernardus Lamy* Congregationis Oratorii Presbyter, qui capitibus 3. & 8. Harmoniæ, quam edidit in Evangelia, hanc opinionem non solum addito calculo approbat, sed etiam, totis defendit lacertis, & multis undequaque accitis argumentis ac ingeniosis proprio Marte excogitatis conjecturis adituere nititur, Mariam virginem matrimonium iniisse cum Iosepho, postquam ab ædibus Elisabeth cognatæ suæ ad parentes reversa est; hoc est tribus jam emensis mensibus à legatione Gabrielis, seu à conceptione Verbi divini. Huic denique sententiæ subscribit nuperus quidem, sed doctissimus Scriptor, *Augustinus Calmet*, Monachus Benedictinus, in eo, quem Gallicè edidit, *Commentario Litterali in Evangelium Matthæi*.

Postrema sententia, cui, post S. Thomam, assipulantur omnes ferme Theologi & Scripturæ Sacræ Interpretes, statuit, Mariam fuisse Iosepho nuptam, ante legationem Gabrielis, seu antequam in suo castissimo utero Verbum divinum concepisset. Quid de hac questione, de qua varias Scriptorum sententias hætenus in medium protuli, magis mihi probetur, paucis ut aperiam,

Dico: verum, & ratum intercessisse matrimonium, Mariam inter & Iosephum, ante legationem Gabrielis, seu ante conceptionem Verbi divini.

Ad hanc probandam assertionem possem benè multa, eaque locupletissima laudare Scripturæ Sacræ testimonia, ex quibus liquido constat, Mariam, ante legationem Gabrielis, nuptam fuisse Iosepho. Sed, ne longior sim, illis referendis superfedebō, duasque duntaxat proponam rationes, quarum prima, desumitur ex epistola S. Ignatii Martyris ad Ephe-

Epheſios [quam quidem epiſtolam, vnà cum ſex aliis, quas *Iſaac Voſſius* ex manuſcripto Græco Bibliothecæ Florentinæ Codice, & *Uſſerius* ex duobus Codicibus manu exaratis, in lucem ediderunt, germanum eſſe.] Sancti illius Martyris Opus, inuictis rationum momentis demonſtrant eruditiffimi Critici, *Natalis Alexander* tom. 1. Hiſtor. Eccl. *Nicolaus le Nourry* tom. 1. Apparatus ad Bibl. max. Patrum, *Pearſonius*, *Episc. Ceſtrienſis*, in ſuis Vindiciis Epiſt. S. Ignatii, & multi alii, contra Blondellum, Dallæum, alioſque plures Preſbyterianæ, Calvinianæque Sectæ homines. In hac autem epiſtola ad Epheſios aſſerit S. Ignatius, Chriſtum ideò à Virgine nuptà eſſe conceptum, quia volebat Deus, ut ortus Meſſiæ omninò lateret diabolus, dum eum putat non de virgine, ſed de conjugata, more aliorum hominum, fuiſſe generatum. Porro, hæc Sancti illius Martyris ratio nullus planè roboris eſſet, ſi Beata Virgo nuptias tantum celebraſſet cum Iosepho, quandò ab ædibus Eliſabeth ad parentes reuerſa eſt. Nam, ſemel factà illà hypotheſi, partus Virginis diabolo procul omni dubio innotuiſſet, viduiſſet quippè dæmon Mariam eſſe prægnantem poſt ipſius reditum à viſitatione Eliſabeth, noſſet aliundè caſtimonium Mariæ & Iosephi, & utriuſque animum à libidine prorfus alienum, conceptum ergo Mariæ, non Iosepho tribuiſſet, cui necdum Mariam nuptam eſſe apprime cognouiſſet, nec ei vel minimum dubium de ſtupro, ob exploratam Mariæ caſtitaſtem, ſubolere potuiſſet. Abiectà itaque omni hæſitatione conſeſſim intellexiſſet, Mariam operatione Spiritus Sancti concepiſſe, & ex ea ſubindè naſciturum Meſſiam tot ſæculis expectatum, cuius tamen partus, ut docet S. Ignatius, huius ſæculi Principi celari debebat.

Erunt, ſat ſcio, nonnulli, qui reponent, hanc rationem Sancti Ignatii perindè contra noſtram militare ſententiam. Nam cum dæmon ſubtilitate intellectus ſui, & acumine naturali, integrum & incorruptum corpus mulieris, licet nuptæ, videre poſſit; facillimè itidè, non obſtante matrimonio, quod Beata Virgo inuiſſet cum Iosepho ante legationem Gabriælis, diabolus dignoſcere potuiſſet Mariæ, eſſi nuptæ, virginitaſtem omninò illæſam permanſiſſe.

Verùm, hæc reſponſio nullo negotio elidi poteſt, nam licet non diſſitear, diabolus, intellectus ſui ſubtilitate, Mariæ virginitaſtem poſt conceptionem Verbi diuini, etiam non obſtante matrimonio, detegere ac cognoscere potuiſſe, ſi reuerà advertiſſet, contendo atamen, dæmonem, eam exploratam non habuiſſe, quia volente & permittente Deo, non advertit. Cernens enim dæmon Mariam eſſe conjugatam, cætera rinari & ſpeculari contenſit, matrimonio videlicet omnem illi impediens, ſuſpicionem. Quapropter, non difficultè ſibi perſuaſit, conceptum & partum eſſe ex viro, cui ſciebat Mariam eſſe nuptam, non, quod non poſſet dæmon virtute naturæ ſuæ agnoſcere Mariæ etiam nuptæ virginitaſtem, ſed quod ulterius, Deo ſic volente, in conjugata veſtigare non curaverit.

raverit. Hanc rationem insinuat S. Thomas 3. p. q. 29. art. 1. ad 3. *dia-*
lus, inquit, *multa potest viriute sue naturæ, à quibus tamen prohibetur*
virtute divina. Admissio itaque matrimonio Mariæ cum Iosepho ante le-
 gationem Gabrielis, ratio tradita à S. Ignatio, quæ primâ facie videtur
 subobscura, intelligi & explicari potest; at in opinione illorum, qui ma-
 trimonium Mariæ procrastinant uique ad ejus reditum à visitatione Eli-
 sabeth, nullo pacto intelligi & explicari potest, immò falsi apertè con-
 vincitur hæc Sancti Martyris ratio, quâ tamen usi sunt *Origines* hom. 16.
 in *Lucam*, *Easilius* homil. de *humana Christi generatione*, *Damascenus*
 lib. 4. de *fide orthodoxa* cap. 5. *Hieronymus* in cap. 1. *Matth. Bernardus*
 hom. 2. super *Missus est*, S. Thomas 3. p. q. 29. art. 1. & multi alii Patres, ac
 Sacræ Scripturæ Interpretes.

Altera ratio petitur ex S. *Thoma*, qui 3. p. q. 29. art. 1. docet, eâ
 potissimum de causa voluisse Christum Dominum nasci ex virgine nupta,
 ut per matrimonium, quod Beata Virgo contraxit cum Iosepho, & suo,
 & matris consuleret honori. Si enim Maria peperisset aut concepisset in-
 nupta, Judæi ex ipsius partu opportunam nacti fuissent occasionem, &
 matrem in stupri suspicionem adductam, juxta legem puniendi, & filium,
 eedè spurium, dehonestandi. *Maluit*, inquit S. *Ambrosius* lib. 2. in *Luc.*
Dominus aliquos de suo ortu, quæm de matris pudore dubitare: sciebat enim
teneram esse virginis verecundiam, & lubricam famam pudoris; nec puta-
vit ortus sui fidem matris iniuriis adstruendam. At, mehercle, non video,
 quid possit hæc ratio, quàm S. Thomas ex Patribus hausit, stare cum opi-
 nione illorum Theologorum, qui matrimonium Mariæ referunt ad ejus
 reditum à visitatione Elisabeth. Enimverò, si Maria nupta est Iosepho,
 postquam ab ædibus Elisabeth reversa est, sequitur ergo eam prægnantem
 fuisse jam abhinc tribus mensibus, quando Iosepho tradita est, seu ma-
 trimonio juncta, mansit siquidem Maria post conceptionem Verbi divini
 cum Elisabeth mensibus quasi tribus, ut perhibet S. *Lucas* cap. 1. Porro,
 quis non videt, periclitatum fuisse honorem Mariæ, si tribus abhinc
 mensibus uterum gestasset, quando nupta est Iosepho. Quid enim, fodes,
 suspicati non fuissent parentes, qui Mariæ tumentem uterum inspexissent
 nondùm celebratis nuptiis? Non eo quidem negatum, notam illis fuisse
 Mariæ morum probitatem, sed nunquid subdubitare potuissent: An ipsi
 vis fuisset illata, & furtivo concubitu deflorata atque compressa? Maxi-
 mè, cum id temporis planè ignorarent, Mariam, arcanâ Spiritus Sancti
 operatione concepisse, eamque Matrem Dei fuisse electam. Sed quas in-
 sidias Mariæ populares, quos sinistros rumores non sparsissent, ut ipsi
 infamiz notam inurere possent? Si enim semel compertum habuissent, si-
 cut erat necesse, Mariam tribus abhinc mensibus prægnantem fuisse, dum
 Iosepho nupta est, eamque post sex menses à celebratis nuptiis filium
 peperisse, absque dubio ex illo insolenti & intempestivo partu, in ani-
 mam induxissent, Mariam in ædibus parentum fuisse fornicatam, adeo-
 que

que iuxta legem ad tribunal eam rapuissent, mortisque supplicio ple-
tendam judicassent. Virgo namque, quæ in domo paterna fornicabatur,
lapidibus obrui debebat, si in puella non est inventa *Virginitas*, eicient
eam extra fores domus patris sui, & lapidibus obruent illam viri Civita-
tis illius, & morietur, quoniam fecit nefas in Israel, *Deuteron. cap. 22.*
& si Sacerdotis filia esset, flammis absumebatur, *Leviti cap. 21.* Quam
legem, teste *Maimonide* Præfatione in Seder Zeraim, Iudæi à Mosis te m-
poribus, perpetuò observarunt. Nec solum Mariæ honorem præmaturus
illius partus in discrimen adduxisset, sed etiam Herodem & Iudæos, Chri-
stum persequentes, excusabiles reddidisset. Quid enim, inquit *S. Am-
brosius lib. 2. in Lucam, Ind. cis*, quid Herodi posset adscribi: si natum vi-
derentur ex adulterio persequi? Denique, si Maria sex mensibus post ini-
tas nuptias Christum peperisset, ut innuit *Cl. Bernardus Lamy*, Iudæi, qui
in perniciem Christi incumbebant, & vel levissimos rumores ad ipsum
calumniis incensendam aucupabantur, non illum appellassent filium Iosephi,
sicut legimus *Matth. cap. 13. Lucæ cap. 4. Ioannis cap. 6.* sed eum
potius tanquam spurium & adulterinum filium ubique fugillissent.
Nam desponsata, si grævida fiat in domo patris sui, infans habetur pro
spurio, ut ait *Maimonides* in Tractatu de prohibitis congressibus cap. 15.
num. 17.

Respondet doctissimus *P. Lamy*, honori & famæ B Virginis hoc
pacto prospexisse Deum, ut confestim post legationem Gabrielis, Maria
impulsa Spiritu Sancto, perrexerit in montana Iudææ, ubi extra rumo-
res popularium suorum, versata est tribus mensibus in ædibus cognatæ
suz Elisabeth, eamque reversam ad parentes, jamque tribus abhinc
mensibus prægnantem in ædes suas deduxerit Ioseph, & cum ipsa matrimo-
nium inierit. Deinde ait: Posse per plures menses celari tumentem
uterum, eos maxime, quibuscum non intercedit familiaris consuetudo.
Subdit denique: Imperatorem Augustum iussisse his temporibus, ut de-
scriberetur universus orbis, & in Bethleem profectos fuisse Mariam &
Iosephum, ut morem gererent Imperatoris Edicto, Mariam ibi partu so-
lutam esse extra rumores popularium suorum, ex quorum animis,
omnem malam de Maria suspicionem amovebat nomen & fama Iosephi,
quem sciebant esse justum; fugam etiam in Ægyptum, ac moram in
longinqua illa regione effecisse, ut ad ea, quæ partum Mariæ spectabant,
non illi mentem adverterint.

Sed hæc Responsio, pace illius Auctoris dixerim, non elevat, sed
potius majorem vim conciliat argumento. Qui enim primò credibile
est, parentes Mariæ permisisse unquam, ut puella necdum nupta hanc
susciperet peregrinationem, & pergeret in montanam Iudææ regionem;
contra Iudæorum antiquam consuetudinem, qui, ut omnes probè norunt,
sedulo cavere solent, ne puellæ viris sponsione promissæ, & quæ in do-
mo paterna adhuc versantur, vel minimà infamiae labe aspergantur; Ma-

riz autem peregrinatio, & ab ædibus paternis diuturna absentia, rumoribus & suspicionibus ludzorum ansam & occasionem suppeditare potuissent. Quod autem ait doctissimus ille Auctor, *posse per plures menses celeri tumentem puellæ uterum*, Incertum omnino est & infirmum argumentum; spatium enim trimestre ad rem istiusmodi detegendam, vulgò assignant Hebræi: *femina*, inquit, *viduata non nubit, nisi post nonaginta dies, ut nempe dignoscatur inter sobolem primi mariti, & secundi*. Legitur etiam Genesis cap. 38. quòd post tres menses nunciaverunt Iudæ, *fornicata est Thamar nurus tua, & videtur uterus illius intumesce*. Deindè, ægrè adducentur viri docti, ut credant, voluisse Deum honorem Beatæ Virginis, jam à tribus mensibus prægnantis, sartum tectum conservare, celando illius tumentem uterum; illius quippè novi, & hætenus inauditi commenti ne apex quidem apud Sanctos Patres, & Scripturæ Sacræ Interpretes, vel minimum extat illius rei vestigium. Sed, ut dem, Mariam, quandò ab ædibus Elisabeth ad parentes reversa est, potuisse, celando tumentem uterum, declinare rumores popularium suorum; hos tamen rumores effugere haud quaquàm potuisset in suo partu, quem doctissimus P. Lamy contigisse putat sex mensibus à completis nuptiis. Insolitus namque, ut mox dixi, Mariæ partus popularium rumores facile admodum excitasset, quippè qui nunquam tale quidquam vel fando acceperant temporibus majorum suorum accidisse, unde statim in aliquam stupri suspicionem venissent, quam nec nomen, nec fama Iosephi, quantumvis iusti, ab eorum animis evellere potuisset. Equis sanè tam bonus, ut velit puellam à fornicationis suspitione eximere, quæ post sex menses à celebratis nuptiis peperit propter nomen & famam mariti? Certè narrat Dio lib. 48. Cæsar. Augustum, Imperatorem licèt optimum, à plebe fuisse derisum, eò quòd *Livia*, quam in uxorem duxerat, tertio mense post celebratas nuptias filium peperisset, ita ut per jocum id temporis hoc proverbiij loco haberetur: *fortunatis hominibus trimestres quoque nasci liberos*. Decimestres aliquandò contingere partus, observat quidem Hippocrates. Idem testantur Virgilius, dicens: *Matri longa decem tulerunt fastidia menses*, & Plautus in Cistellaria: *Tum illa, quam compresserat, decimo post mense exalto, sic peperit filiam*. Septimestres & Octimestres etiam quandòque contingere partus non ægrè concedam, sed semestres partus, eosque legitimos, nec vidi, nec legi unquàm. Malè ergo Beata Virgo audisset apud populares suos, nec se ab infamia liberare potuisset, nisi referendo Mysterium, quod in illa peractum esse prorsus ignorabant. Denique, à vero procul abest, quod ait idem Auctor: fugam scilicet in Ægyptum, & moram in longinqua illa regione in causa fuisset, cur populares Mariæ ad ipsius partum mentem non adverterint. Quasi verò, partus Mariæ tot signis & prodigiis conspicuus, adoratione Magorum ostensus, prædictione Simeonis & Annæ in Templo, atque strage infantium, quos inaudita crudelitate jugulari iussit Herodes, longè latè-

que

que in tota Iudæa notissimus; solis popularibus Mariæ non innotuerit, omnique sublato nunciorum commercio, ipsi soli peregrini & hospites fuerint in his, quæ Mariæ partum spectabant, id profectò ab omni veri specie abhorreere videtur. Rejectâ itaque responsione P. Lamy, multò probabilius est, ideò populares Mariæ nec animis fluctuasse, nec ullam de ea, quando prægnans ab ædibus Elisabeth ad parentes reversa est, sinistram suspicionem habuisse, quia compertum habebant, Mariam, antequàm se se ad iter accingeret, seu pergeret ad montana Iudææ, matrimonium iniisse cum Iosepho, ipsique tanquàm patri, conceptam prolem acceptam referri debere, minime dubitabant.

D I L U U N T U R

Contrariæ Sententiæ argumenta.

Arguitur primò, Maria, Lucæ cap. 1. dicitur desponsata viro, cui nomen erat Ioseph: *Missus est Angelus Gabriel à Deo in Civitatem Galilææ, cui nomen Nazareth, ad Virginem desponsatam viro, cui nomen erat Ioseph, de domo David, & nomen virginis Maria.* Ergo Maria ante legationem Gabrielis, necdum erat Iosepho nupta, sed tantùm desponsata, seu sponcione promissa.

Respondeo primò, neg. conseq. Creberrimè namque Scripturæ Sacrae *desponsatam* appellat non solum puellam, quæ sponcione promissa est, & quæ adhuc in domo paterna versatur, sed eam etiam puellam, quæ viro tradita est, & in illius domesticum consortium recepta, ut proclive mihi esset demonstrare ex benè multis, quæ suppetunt Scripturæ Sacrae locis, quæ laudat, ac dilucidè exponit Cl. Auctor *Gallicæ Analyseos R. P. Mauduit*, Congreg. Orat. Presbyter, Disertatione secundâ. Unicum duntaxat, quò major lux affulgeat, & adversariorum deregatur hallucinatio, hîc adducere satis superque sufficiet. Lucæ cap. 2. legimus: Iosephum venisse in Bethleem, *ut profiteretur cum Maria desponsata sibi uxore prægnante.* Maria ergo dicitur à S. Luca *desponsata* Iosepho etiam eo tempore, quò vnà cum ipso Bethleemum venit, ubi Christum Dominum peperit, & tamen, nemine refragante, Maria, quando cum Iosepho in Bethleem se contulit, ut obtemperaret Cæsaris Edicto, non solum erat Iosepho sponcione promissa, sed etiam illi reverà nupta erat, & tanquam viro tradita. Sic etiam Ecclesia, actu licet copulata Christo, vocatur *Sponsa*, cum tamen hæc conjunctio verè matrimonialis sit. Patet itaque, solenne esse Scripturæ Sacrae, *desponsatam* promiscuè appellare sive puellam sponcione promissam, sive puellam iam nuptam, & viro traditam, ac subinde adversarios ex his Sancti Lucæ verbis, nihil ad suæ sententiæ præsidium petere aut extundere posse.

Respondeo secundò, Evangelistam Lucam, dum Mariam *desponsa-*

tam Iosepho, & non nuptam esse dicit, innuere duntaxat velle: Nullum fuisse Mariam inter & Iosephum actum matrimonii consummati, nullum nuptialem concubitus, sed non excludere verum & ratum matrimonium, quod, sicut exponit Doctor Angelicus 3. p. q. 29. art. 2. ficit in indivisibili conjunctione animorum, per quam coniuges fidem sibi mutuò datam servare, & omnes amoris reciproci vices, convivio communi, bonorum & malorum communione, citra tamen commixtionem quoad thorum, inter se se alternare tenentur. Hoc enim ratum matrimonium, Mariæ cum Iosepho non obscure insinuare videtur S. Lucas, dum eodem in capite sic Mariam inducit Angelum alloquentem: *Quomodo fiet istud, quoniam virum (supple meum) non cognosco?* Non potuisset autem Maria vocitare tum temporis Iosephum *virum suum*, nisi fuisset cum ipso coniugali vinculo actu sociata. Ut igitur S. Lucas ostenderet, Mariæ virginitatem non fuisse per matrimonium ereptam, aut violatam, sed, seposito omni concubitu nuptiali, illibatam persituisse, Mariam Iosepho desponsatam dicere maluit, quàm nuptam. Eandem adhibet interpretationem S. Thomas quibusdam testimoniis SS. Patrum, videlicet Hieronymi in cap. 1. Matth. & Ambrosii lib. 2. in Lucam, qui primâ fronte docere videntur, Mariam inter & Iosephum intercessisse tantum sponsalia, & non nuptias. Dicit enim Angelicus Doctor: Ideò illos SS. Patres coniugium Mariæ cum Iosepho nuptias appellare noluisse, quia nuptiarum nomine intelligebant nuptialem concubitus, qui procul absuit à matrimonio Mariæ cum Iosepho. Quapropter, ut violatæ virginitatis & maritalis consortii suspicionem, longius à matrimonio Mariæ amolirentur hi Sancti Patres, Mariam Iosepho desponsatam, non nuptam, esse dicunt. Cæterum, S. Augustinus matrimonium Mariæ cum Iosepho, nuptias appellare non dubitat, ut videre est cap. 11. lib. de nuptiis & concupiscentia, ubi hæc habet: *Omne nuptiarum bonum completum est in illis parentibus Christi, proles, fides, & Sacramentum. Prolem cognoscimus ipsum Dominum Iesum: fidem, quia nullum adulterium: Sacramentum, quia nullum divortium. Solus ipi nuptialis concubitus non fuit.* His gemina habet S. Doctor lib. 5. contra Iulianum cap. 9. & lib. 22. adversus Faustum cap. 8. ubi ait: *Beatam Virginem inter & S. Iosephum extitisse coniugium non concubitu, sed affectu, non commixtione corporum, sed copulatione, quod est charius, animorum.*

Arguitur secundò, Matth. cap. 1. hæc verba leguntur: *Cùm esset desponsata Mater Iesu, Mariæ, Ioseph, antequàm convenirent, inventa est in utero habens de Spiritu Sancto.* Hæc autem verba, antequàm convenirent, non possunt commodius exponi, & ad probandam Mariæ virginitatem aptius intelligi, quàm de conventionem, seu congregationem ad cohabitandum, ita ut sensus sit: Mariam de Spiritu Sancto concepisse, priusquàm in eisdem ædibus cum Iosepho habitaret. Hac siquidem admittâ interpretatione, præcipitur omnis argutiarum materies Heleldio, aliisque heterodoxis, qui maritali commercio Iosephum usum esse contendebant, post-

postquam Maria peperisset Christum Dominum. Sequitur igitur, juxta hanc interpretationem: Mariam, quando de Spiritu Sancto, concepit, adhuc in ædibus paternis fuisse versatam, ac subindè necdum fuisse Iosepho nuptam, si enim Iosepho fuisset nupta, propriis jam relictis lari- bus, in ædes Iosephi convenisset.

Respondeo, hæc Matthei verba, *antequam convenirent*, de conven- tione ad habitandum non esse exponenda, jam enim Maria, ut docent SS. Patres *Corysostomus* homil. 4. in Matth. & *Ambrosius* lib. 2. in Lucam, inrūs erat, & in eisdem ædibus cum Iosepho habitabat. Ita etiam censet S. Thomas 3. p. q. 29. art. 2. ad 3. *Beata Virgo, inquit, sic fuit desponsata Ioseph, quod etiam esset domi habitata: nam sicut in ea, quæ in domo viri concipit, intelligitur conceptio maritalis: sic in ea, quæ extra domum concipit, est suspecta conceptio, & ita non esset sufficienter provisum famæ Beatæ Virgi- nis.* Hæc itaque verba, *antequam convenirent*, non sunt accipienda de conventionē ad cohabitandum, sed potius de concubitu coniugali, quem hoc modo honestè & verecundè significare voluit Matthæus, sunt intelligenda; sicut ea interpretatur S. Hieronymus in libro, quem lucu- bravit adversus Helvidium. Hæc autem interpretatio Mariæ virginitati nequaquam officit, quia, ut optimè ait S. Thomas, hinc non sequitur, postea inter se convenisse, seu copulam carnalem habuisse Iosephum & Mariam, quemadmodum eò loci impiè colligebat *Helvidius*, sed solum demonstratur, dum Ioseph & Maria videbantur conventuri, seu concu- bitum coniugalem habituri, prævenisse conceptionem factam operatio- ne Spiritus Sancti, quò factum est, ut ulterius non convenirent. Sicut ex. gr. si aliquis dicat: *antequam in portu pranderem navigavi*, non in- telligitur, quòd in portu prandeat postquam navigavit, sed quia cogita- bat in portu pransurus. Sic etiam dicimus, *Antiochum è vivis excessisse, antequam pœnitentiam ageret*, nec tamen sequitur, illum post mortem, pœnitentiam egisse. Huic ergo standum est interpretationi, quæ ver- bis Evangelicæ apprimè congruit.

Arguitur tertio, Matthæus eodem in capite subdit: *Ioseph autem cum esset iustus, & nollet eam traducere, voluit occultè dimittere illam.* Quorum verborum hic obviū & genuinū videtur esse sensus: Ioseph autem, cum esset iustus, & nollet Mariam traducere è domo paterna in domum propriam, (apud Hebræos quippè desponsatio præcedebat, tum sequebatur introductio sponsæ in ædes sponsi) statuit apud se eam deferere. Hinc Angelus incipit cogitationum æstu fluctuanti Iosepho, & quid facturū esset hærenti dubio, dixit: *Noli timere accipere Mariam, quasi diceret: Ioseph contrahere nuptias, quas vis dissolvere, & quod restat faciendum, Mariam conjugem deduc in domum.* Ergo, quando Ioseph intellexit Mariam esse gravidam, nondum Maria habitabat cum eo, nec proindè illi nupta erat: Dicit itaque non potest, Mariam fuisse nu- ptam Iosepho ante legationem Gabrielis.

Ref.

Respondeo, hanc interpretationem, quæ in obiectione adducitur, esse planè detortam, & à vero S. Matthæi sensu omninò alienam. Id apertè liquet ex serie Sacri Evangelistæ contextus, qui sic habet: *Ioseph autem vir eius cum esset iustus, & nollet eam traducere, voluit occultè dimittere illam*. Quomodò, quæso, Ioseph dimittere Mariam potuisset, si in ejus domum necdùm fuisset traducta? nam, ut inquit S. Ambrosius lib. 2. in Lucam, *quam non accepit, nemo dimittit, & ideo qui volebat dimittere, fatebatur acceptam*. Quomodò etiam Ioseph libello repudii Mariam dimittere potuisset, si ipsi nondum esset nupta? Desponsata namque libello repudii non dimittebatur, cum nec esset in potestate viri, nec in illius ædibus habitaret, nec fidem conjugalem ipsi oppignerasset. Denique, si Maria non fuit tum temporis Iosepho nupta, ut quid Matthæus Iosephum appellat virum Mariæ? *Ioseph autem vir ejus*. Ut quid etiam Angelus, qui Ioseph in somnis apparuit ut sedaret æstus, quos tacitus concoquebat, & omnem suspensionem, ac dubitationem ex ignoratione Myllerii nondùm ipsi revelati profectam dispelleret, Mariam vocat conjugem Iosephi? *Ioseph, fili David, noli timere accipere Mariam conjugem tuam*. Hæc siquidem appellationes viri & conjugis, in sponsalia de futuro, ex usitato hominum sermone convenire non possunt, alioquin, si ei usmodi appellationes ad sponsalia de futuro detorquere liceat, nullus profectò in tota Scriptura Sacra locus occurreret, ex quo evinci possit, Mariam fuisse aliquando matrimoniali vinculo sociatam Iosepho, quod tamen nemo impræsentiarum dicere audeat. Rejectà itaque adversariorum interpretatione, duplex ad istum Matthæi locum potest adhiberi expositio, quam Sanctorum Patrum fulcit auctoritas. Prima hæc est: *Ioseph autem cum esset iustus, & nollet eam traducere*, seu Mariam ignominiosè accusare, probro velut adulterii ream exponere, & criminalitèr in propriam uxorem agere, solemnes scilicet adhibendo formulas iuris, convocando senatum & parentes, ut moris erat apud Judæos, teste Iosepho lib. 4. Antiq. cap. 8. voluit, ut ipsius honori consultum foret, occultè dimittere illam, idest, ne quid infamix periculive puellæ constaret, dare voluit libellum repudii coram paucis arbitris, parentibus, ac proximis agnatis, vel, ut aliis placet Scripturæ Sacræ Interpretibus, voluit Ioseph, semoto omni strepitu, Mariam deferre, peregrinatione in aliam regionem commeando institutâ, ei que potestatem facere ineundi nuptias cum eo, cujus consortio prægnans videbatur.

Alteram huius loci interpretationem, post aliquos Sanctos Patres assertit Gersonius, sacre Facultatis Parisiensis Cancellarius, in epistola secunda de festo S. Iosephi instituendo, quæ extat in quarta parte Operum eius. Dicit enim celeberrimus ille Doctor, Iosephum per revelationem & colloquium Mariæ cognovisse, etiam antequàm pergeret in montanam Judææ regionem, eam prægnantem esse, & de Spiritu Sancto concepisse; tuncque Iosephum stupore quodam percussum, & tam sublimis

mis honoris admiratione defixum, simile aliquid cum Petro sensisse, ac dixisse: *Exi à me Domina, quia peccator sum*. Aut cum Centurione: *Domina, non sum dignus ut inhabites mecum*. Hanc doctissimi Cancellarii interpretationem piam esse fateor, & ad commendandam S. Iosephi humilitatem seu modestiam appositè, atque ingeniosè ex contextu Scripturæ Sacræ exculptam, priori tamen interpretationi potius standum esse censeo, quippe quæ, ut ait Doctor Angelicus 3. p. q. 29. *¶* art. 2. ad 3. magis consonat Evangelio.

Arguitur quartò: Omnes Theologi docent contra Calvinum, & Centuriatores Magdeburgenses, aliosque hujus furfuris heterodoxos, Mariam voto virginittis sese obstrinxisse longè antequàm ab Angelo sciret, se Matrem Dei esse electam. Eò namque spectat plena Mariæ admirationis interrogatio: *Quomodo fiet istud, quoniam virum non cognosco?* ex quibus verbis S. *Augustinus*, lib. de sancta virginittate cap. 4. Mariam virginittatem vovisse colligit, alioquin non appositè videretur interrogatio, si de præsentì tantùm, aut de præterito loqueretur Maria, non de futuro, potuisset siquidem Angelus respondere Mariæ: *Etsi nunc virum non cognoscas, & necdùm cognoveris, postmodùm cognoscas, aut cognoscere poteris*. In eundem planè sensum Virginis Mariæ ab Angelo salutariæ Responsum acceperunt, Votumque Virginittatis priùs ab ea emissum fuisse, ex illis verbis collegerunt Ecclesiæ Patres, & Scripturæ Sacræ Interpretes, S. *Gregorius Nissenus* Oratione in diem Natalem Christi, S. *Bernardus* serm. 4. *super Missus est*, Venerabilis *Peda* in cap. 1. *Lucæ*, B. *Edmerus* in libro *De Excellentia B. Virginis* cap. 4. *Arnoldus*, Abbas, in *Laudatione B. Virginis*, & alii; Atqui voto virginittis è diametro opponitur matrimonium, quia necessariò importat consensum in copulam carnalem, ergo verosimile est, Mariam aut nunquam matrimonium iniisse cum Iosepho, aut saltem illud duntaxat contraxisse post Legationem Gabriëlis, à quo didicit Incarnationis Mysterium, & nullum ex ineundo connubio virginittati suæ allatum iri nocumentum.

Respondet *Bollandus* tom. 3. de Actis Sanctorum ad diem 19. mensis Martii, Mariam & Iosephum, cui se obstrinxerant, obligatione fuisse solutos, aut saltem meritò dubitasse: Num voti religione obligarentur, quandò matrimonium invicem contrahere debuerunt. Verba illius Auctoris subnectam: *Dirarum*, inquit, *omniumque malorum extremum censebatur in veteri Lege à speratio posteritatis, maxime si qui parentibus suis sic vicini essent, ut nisi procreande proli operam darent, frustrandi essent majores sui sperate successionis bono, & retrò in caput revolvenda hereditas*. Cum itaque hæc omnia in Iosepho atque Maria tantò fuerint majora, quantò propius illi per rectam tam naturæ, quàm legis lineam ad illam spem admovebantur, cur ego hic verear cogitationem meam utriusque honori non parùm fortè conducturam aperire, faterique, suspicari me rebus sic constitutis; reverà, & ex ipsa natura obligationis, simul cum tali

tali voto vix ac ne vix quidem consistentis, potiori debito prævalente, solutū fuisse ea religione utrumque, aut saltem dubitasse, nūm adhuc obligarentur. Hactenus Bollandus, cujus conjectura jejuna & frigida est, nec in Scriptura Sacra, nec in Sanctis Patribus, nec in tota retrò antiquitate vel minimum vestigium habet, immò Mariæ honori non satis prospicere videtur hic Auctor, dum eam emissio virginitalis voto, instante matrimonio, fuisse solutam, aut saltem dubitasse: Num voti adhuc religione obligaretur? nimium audacter ariolatur. Relictā itaque hac Bollandi responsione.

Respondeo primò cum S. Thoma 3. p. q. 28. art. 4. Mariam, antequam cum Iosepho jungeretur matrimonio, non absolute, sed solum sub hac conditione: si Deo placeret, virginitalatem ex voto Deo nuncupasse: Nam tempore Legis Mosaica, inquit Sanctus ille Doctor, oportebat generationi insistere tam mulieres, quam viros, quia secundum carnis originem cultus Dei propagabatur, antequam ex illo populo Christus nasceretur, quapropter, licet Virgo in desiderio virginitalatem habuerit, super hoc tamen voluntatem suam divino commisit arbitrio. Nec mirum, si sub hac conditione virginitalatem voverit Maria, nam cum certò ipsi non constaret, eo tempore quo vovit, an gratior esset Deo virginitas, quam matrimonium, debuit hanc adhibere conditionem, si Deo placeret, quæ conditio propositum virginitalis haud minuit, sed potius obedientiæ merito decoravit. Hinc S. Bernardus homil. 4. super Missus est disertè docet, Mariam in ea fuisse præparatione animi, ut virginitalis, cui se obstrinxerat, votum frangeret, si ita Deo placeret. Sic enim Mariam inducit Gabrielem alloquentem: Cum sciat Dominus meus testis conscientie meæ, votum esse ancillæ suæ non cognoscere virum; qua lege, quo ordine placebit ei ut fiat istud? si oportuerit me frangere votum ut pariam talem filium, & gaudeo de filio, & doleo de proposito, fiat tamen voluntas ejus. Addere etiam possum cum S. Thoma, Mariam ante legationem, Gabrielis etiam absolute virginitalatem despondisse, quia speciali revelatione sciebat, votum à se editum Deo gratum & acceptum esse, nec nuptiis, quas cum Iosepho celebrare debebat, copulam carnalem accessuram, unde in revelationibus Sanctæ Brigittæ lib. 7. cap. 25. Mater Dei famulæ suæ sic locuta legitur: Ego in Spiritu Sancto certissime sciivi, quod virginitas mea perpetuò permaneret illæsa, licet ex occulta Dei dispensatione viro desponsabar. Quapropter, illæso persistente virginitalis voto, quod edidit Maria, sive absolute, sive conditionatum fuerit, potuit Maria ante legationem Gabrielis nuptias celebrare cum Iosepho.

Respondeo secundò: Idem argumentum posse retorqueri in adversarios, nam sponsalia opponuntur virginitalis voto, sunt etenim sponsalia futuri matrimonii inchoatio, seu futurarum nuptiarum promissio; & in hoc tantum discrepat à matrimonio rato, quod matrimonium ratum sit contractus per verba, ut ajunt, de præsentì expressus, accipio te in

uxorem, accipio te in virum; sponsalia verò fiant per verba de futuro, at loquuntur Scholastici, *accipiam te in uxorem, accipiam te in virum*; si ergo Maria, propter emissum virginitatis votum, non potuisset ante, legationem Gabrielis inire cum Iosepho matrimonium, pari quoque ratione, nec ipsi sponsalia contrahere licuisset, & tamen ultrò fateñtur aduersarii, Mariam, non obstante virginitatis voto, fuisse ante legationem Gabrielis Iosepho sponsione promissam; quidni ergo potuit, etiam ante legationem Gabrielis, vero & rato cum Iosepho jungi matrimonio?

Arguitur quintò: Maria & Ioseph nuptias proculdubio celebrarunt, servatis Hebræorum circa connubia legibus: Atqui *Maimonides* in Tractatu de Connubiis Hebræorum cap. 10. n. 17. asserit: Puellam non statim post sponsalia in domum conjugis fuisse deductam, sed ei aliquam in parentum ædibus moram fuisse concessam, credibile itaque est, Mariam tempore legationis Gabrielis fuisse Iosepho sponsione promissam, eamque hoc temporis spatium, quod puellis desponsatis ante solemnem in ædes conjugis deductionem concedebatur, insumpsisse; commorando per tres menses apud cognatam suam Elisabeth, quibus exactis, Maria, in ædes Iosephi deducta est, & nuptias cum eo celebravit.

Respondet: Tempus, quod puellis desponsatis ante solemnem in ædes conjugis deductionem concedebatur, nullà lege apud Hebræos fuisse præfixum, & aliquandò breve admodum fuisse, ut liquet exemplo *Rebeccæ* *Genesis* cap. 24. ubi dicitur: Fratres *Rebeccæ* postulasse, ne ad *Isaac*, cui modò fuerat desponsata *Rebecca*, deduceretur, nisi post decem dies: *Maneat, inquit, puella saltem decem dies apud nos & postea proficietur*. Tempus etiam illud puellis desponsatis concessum, nullà apud Hebræos fuisse Lege præfixum, testatur *Leo de Modena* part. 4. cap. 5. *historia de ritibus Judæorum*, ubi asserit: Quasdam desponsatas manere per integrum annum, alias per semestre, plus minus, pro voluntate & commoditate contrahentium. Quid ergo prohibet, ut dicam: Mariam, quatuor circiter mensibus ante legationem Gabrielis, fuisse Iosepho sponsione promissam; sicque desponsatam per tres menses in ædibus paternis esse versatam, quarto verò ineunte mense à contractis sponsalibus, matrimonium solemnè ritu iniisse cum Iosepho, & in eisdem ædibus habitare cæpisse ante legationem Gabrielis. Hæc conjectura, quamvis non sit omninò certa, plus tamen probabilitatis habet, quàm conjectura *P. Lamy*, asserentis: Mariam commorando per tres menses apud cognatam suam Elisabeth, id temporis insumpsisse, quod puellis desponsatis concedebatur ante solemnem in ædes conjugis deductionem. Hæc siquidem doctissimi illius viri conjectura, aliena est à ritibus Iudæorum, apud quos, ut testatur *Maimonides*, loco supra laudato, desponsata versari debent in domo paterna, quamdiù sunt sponsione solùm promissa, & nondùm viris tradita. Adde etiam, nec addidisse pigebit, verosimile non esse, his legibus circa connubia sancitis ita Hebræos fuisse

adstrictos, ut ab illis, maxime ita volente & disponente Deo, eximii haud potuerint Maria, & Ioseph.

Arguitur ultimò: Non decebat, ut Maria subjaceret imperio mariti, & unà cum eo habitaret, qui necdum sciebat, eam esse Matrem Dei electam; istud autem Mysterium Iosepho patefieri non debebat, nisi elapso aliquo tempore, post Verbi Divini conceptionem. Desponsanda, itaque erat Maria Iosepho, sed donec ille rem omnem esset edoctus, congruebat, ut Maria interea ab eo abesset post desponsationem per aliquod tempus ante nuptias complendas, quò constare posset, Mariam, neutiquàm rem habuisse cum Iosepho, sed solum Spiritus Sancti operatione concepisse. Igitur Maria ante legationem Gabrielis fuit tantum sponsione promissa Iosepho, & post reditum à visitatione Elisabeth, fuit ipsi nupta, & in ejus consortium domesticum adscita; eo siquidem tempore innotuit Iosepho arcanum, quod ipsum antehàc latebat, Verbi Divini Incarnationis Mysterium.

Respondeo: Hanc jejunam & sublestem esse conjecturam, quæ facile admodum exsufflari potest. Enimverò expediebat potius, teste S. Ambrosio lib. 2. in Lucam, ad Mariæ comprobendam virginitatem, ut in ædibus Iosephi, habitaret, eique nupta esset, dum concepit, quàm si extrà domum Iosephi eique nondum nupta concepisset: *Pides*, inquit ille Pater, *verbis Mariæ magis adsciscitur, & mendacii causa removetur; videretur enim culpam obumbrare voluisse mendacio innupta prægnans, causam autem mentiendi desponsata non habuit, cum conjugii præmium & gratia nuptiarum partus sit faminarum*. Quibus verbis, ni mea me fallat mens, luculenter docet S. Ambrosius, ad Mariæ adstruendam virginitatem, & omnem suspicionis causam removendam, convenientissimum, fuisse, ut Maria cum Iosepho nuptias celebraret, antequàm conciperet, essetque prægnans. Idem planè sentit *Doctor Angelicus* 3.p. q. 29. art. 2. ad 3. Nullà ergo ratione dici potest, Mariam tribus abhinc mensibus prægnantem fuisse, quando nupta est Iosepho, & ab eo in consortium domesticum suscepta. Nam, ut suprà observatum est, factà semel illà hypothesi, Maria sexto mense post celebratas nuptias filium peperisset, quod cessisset in dedecus tam Mariæ, quàm eius prolis, & Iudaorum animis tam insoliti parus novitate suspensis, stupri suspicionem facile ingerere potuisset. Quod verò in obiectione subditur, non decuisse, ut Maria habitaret unà cum Iosepho, qui necdum sciebat eam esse Matrem Dei electam; frivolum omnino est & frigidum argumentum. Iosephus siquidem perpetuus castitatis amator, & omnis prorsus libidinis expers, tranquillè cum purissima sua coniuge sub eodem tecto versabatur, & per matrimonium, quod inierat cum Maria, nuptias à suspicionem criminis defendebat, virgineum partum tegebat, & Mariæ ministerium exhibebat, undè nullum prorsus ex habitatione & societate Mariæ cum Iosepho, licet Mysterium nondum edocto, periculum emergere poterat.

An-

Antequàm huic paragrafo coronidem imponam, velim advertat obiter Lector, *Joannem Gersonium*, Fac. Paris. Cancellarium, pro institutione festi Desponsationis, seu matrimonii Mariæ cum Iosepho, strenuam navasse operam; cuius eà de re pag. 733. & 735. tom. 4. recentis & castigatæ Operum illius Editionis, à *Ludovico Ellia du Pin*, Doctore Sorbonico, adornatæ anno 1706. duæ extant epistolæ; unâ cum Officio de hacce festivitate à Gersonio concinnato, quod diversum est ab Officio de eodem festo, edito à nostro *Aurato*, qui à Paulo III. Summo Pontifice obnixè postulavit anno 1546. ut illud suâ auctoritate approbaret pro die 11. mensis Januarii. Cæterùm, licèt modò plures Ecclesiæ festum Desponsationis, seu matrimonii Mariæ cum Iosepho, celebrent, discrepant tamen circa diem, quam huic festivitati assignant, ut videre est apud *Bollandum* ad diem 19. mensis Martii, ubi etiâ varias inter orationes à variis conceptas Auctoribus, ut huic festo congruerent, hanc potissimum refert ex *Colvenerio*, Universitatis Duacensis Cancellario, desumptam ex antiquo Brugenſi Breviario, quæ sic habet: *Deus, qui Mariam virginem matrimonialiter Iosepho sociasti, ut ex virginali conjugio virginum sponsus nasceretur; fac nos per utriusque intercessionem ipsum diligere virginitatis Autorem Dominum nostrum Jesum Christum, &c.*

H Y M N U S

*In laudem Sancti Josephi , Beatissimæ
Virginis Mariæ castissimi
Sponsi.*

Regum Progenies , Ifacidum decus ,
Festo te celebrent carmine conjuges ,
Certatimque ferant candida Virgines ,
Sponso lilia Virgini .

Tu Joseph , novi lux , nova fœderis ,
Tu custos focia Virginis integer ,
Tu Sanctæ thalamo conjugis abstines ,
Tu Christi tamen es Pater .

Alto Progeniem quàm benè creditam
Servas consilio , depositum Dei !
Tecum pervigiles cœlituum Pater
Curas , juraque dividit .

Artus invalidum tu puerum foves ,
Infantique Deo pabula sufficis ;
Et formata Dei te sine , de tuis
Crescunt membra laboribus .

Sint qui mille tubis undique personent ,
Adventasse Deum , qui populos regat ,
Tu commissa tibi non violabili
Velas Sacra silentio .

ALTER HYMNUS

*In laudem ejusdem Sancti Josephi,
Virginis Matris Conjugis
castissimi.*

Matris intactæ venerande conjux,
Testis, & custos nivei pudoris,
Quid Deo plenam meditaris anceps
Linquere Sponsam.

Anxium, cœlo tibi missus Ales
Firmat; hinc Virgo tibi visa major:
Mente sedatâ modò nasciturum
Numen adoras.

Vix puer natus; redit ecce præpes
Nuncius Patri; Fuge, dixit, infans
Quæritur, Matrem puerumque tutas
Transfer in oras.

Tu nihil contra; per opaca noctis
Protinus Matrem, puerumque transfers.
Dirigit gressus, aperitque calles,
Dum filet infans.

Ora mox solvet; Solymas per urbes,
Quem dolens quæres comitante Matre
Hunc fenes inter, puerum stupebis
Mira loquentem.

Anxias mentes, tenebrisque mersas
Christus illustret, Patris ipse splendor:
Nos inoffenso pede ducat astris,
Semitâ factus.

PARAGRAPHUS SECUNDUS

*An matrimonium Mariæ cum Iosepho fuerit aliquando consummatum ?
seu utrùm Maria perpetuò permanserit virgo ?*

Matrimonium Mariæ cum Iosepho fuisse virili congressu consummatum, impiè etiamnùm contendunt obstinati Judæi, qui Christum ex carnali Iosephi cum Maria consortio procreatum fuisse blasphemant. In eodem erroris luto hæseruat olim *Cerinthus & Ebionitæ*, quasi pauperes & mendici dicæi, ut, juxta vocis Hebræicæ ethymologiam, interpretatur *Eusebius* lib. 3. Hist. Eccl. cap. 27. Denique, quarto Ecclesiæ sæculo, & aliis sequentibus, infernus evomit hæreticos, Mariæ virginitatis ofores, *Antidicomarianos* nimirum, *Iovinianum*, *Bonosum*, *Helvidium*, qui Mariam in partu, & post partum virginitatis suæ jacturam, fecisse asseverare non erubuerunt. Quorum ut confundatur impietas, & Catholicæ Ecclesiæ de perpetua Mariæ virginitate stabiliatur doctrina,

DICO PRIMÒ: *Matrimonium Mariæ cum Iosepho non fuisse consummatum, ac subindè Christum Dominum ex carnali Iosephi cum Maria consortio non fuisse procreatum.*

Hanc assertionem Sole clariùs probant innumera Scripturæ Sacræ loca, quæ generatim ostendunt: Quod, sicut Christus secundum divinam naturam fuit *ἀνὴρ*, hoc est, sine Matre; ita secundum naturam humanam fuit *ἄνθρωπος*, hoc est sine Patre; ut planè responderet typo Melchisedechi, qui dicitur ad Hebræos cap. 7. *sine Patre, sine Matre, sine genealogia, neque initium dierum, neque finem vitæ habens*. Hinc in sacris Litteris Christus antonomastice vocatur: *Semen mulieris*, Genes. cap. 3. *Lapis è monte excisus absque manibus*, Danielis cap. 2. Quibus omnibus Scripturæ locis, majorem lucem ac claritatem affundit celeberrimum vaticinium *Isaiæ* cap. 7. ubi legimus, quòd, cùm à *Rasin*, Rege Syriæ, & *Phacee*, Rege Israel, obsessa esset Civitas Jerusalem, & impius *Achaz*, Rex Juda, signum à Deo, ob incredulitatem & hypocrisim, petere detrectaret; sic locutus fuerit Propheta: *Audite ergo domus David: nunquid parùm vobis est molestos esse hominibus, quia molesti estis & Deo meo? propter hoc dabit Dominus ipse vobis signum. Ecce Virgo concipiet & pariet filium, & vocabitur nomen ejus Emmanuel, butyrum & mel comedet, ut sciat reprobare malum, & eligere bonum*. Hoc autem *Isaiæ* vaticinium fuisse adamussim impletum in Christo, quem Maria, integrâ & illibatâ virginitate, ex Spiritu Sancto concepit; docet Evangelista *Matthæus* cap. 1. Cùm esset, inquit, desponsata mater ejus Maria Ioseph, antequàm convenirent, inventa est in utero habens de Spiritu Sancto Ioseph, fili David, noli timere accipere Mariam conjugem tuam: quod enim in ea natum est, de Spiritu Sancto est, pariet autem filium, & vocabis nomen ejus Iesum: ipse enim salvum faciet populum suum à peccatis eorum.

Hoc

Hoc autem factum est, ut adimpleretur, quod dictum est à Domino per Prophetam dicentem : Ecce Virgo in utero habebit, & pariet filium, & vocabunt nomen ejus Emmanuel. Ex eo itaque clarissimo *Isaie* vaticinio planum ac expeditum est, Mariam citrà carnale Josephi consortium concepisſe Christum Dominum, ac subindè virginem sinul & matrem permanſiſſe; quod etiam ipsâ rei veritate convictus negare non est ausus *Mahometes*, qui, licèt pleraque Christo Domino ornata sacrilego ore detraxerit, Mariæ tamen virginitatem nunquam negavit, immò eam laudavit in Alcorano, & Iesum Adamo comparavit, qui sine virili congressu conceptus & in lucem editus est. Soli recutiti Judæi, qui callum obduxerunt, hoc perspicuo *Isaie* oraculo, quantùm Christiana Fides nitatur, probè intelligentes, sinistris interpretationibus illud aliò detorquere, ejusque vim nonnullis responsionibus eludere ac elevare tentant, quas hîc brevi confutatione dispungere non absre erit.

Respondent primò Judæi: Ex hoc laudato *Isaie* vaticinio evinci nequaquàm posse, Mariam in conceptu & partu illibatam custodiſſe virginitatem; quia apud *Isaiam* non legitur: *Ecce virgo concipiet*, sed potius legendum est: *Ecce adolescentula concipiet*. Vox siquidem *Alma*, inquit, quæ est in Textu Hebræo, significat juvenculam, seu adolescentulam, per quam indigitatur puella quæcunque, sive virum experta, sive intacta, sive nupta, sive innupta. Hinc *Theodorion* & *Aquila*, in his, quas adornarunt, Scripturæ Sacræ versionibus, hoc *Isaie* vaticinium hoc pacto sunt interpretati: *Ecce adolescentula in ventre habebit, & pariet filium*. Hanc suam responsionem tutantur Judæi ex Proverbiorum cap. 30. v. 19. ubi *Salomon* hæc habet: *Tria sunt difficilia mihi, & quartum penitus ignoro: viam aquilæ in cælo, viam colubri super terram, viam navis in medio mari, & viam viri in Alma, hoc est, in puella*. Quod videtur non posse non designare puellam, quæ jam experta est virum; nam *Salomon* versu sequenti comparat hanc puellam cum muliere adultera, & dicit talentū esse viam mulieris adulteræ, quæ castitatem jactat, nec servat tamen; & abstergens os suum dicit: *Non sum operata malum*.

Respondent secundò Judæi: Hæc *Isaie* verba: *Ecce virgo concipiet, &c.* dicta esse de uxore Achaz, Regis Iuda, & de ejus filio Ezechia, quem propedièm paritura erat.

Verùm, utraque Iudæorum Responsio, quæ plèna rimarum hæc illæc perſeuit, multis, iisque invictis momentis convellitur. Primò, quia certissimè constat, hanc vocem, *Alma*, ei soli puellæ convenire, quæ virginitatem adhibitâ custodiâ servavit, & nunquàm virorum aspectibus patuit, sicut asserit *S. Hieronymus* Comment. in cap. 7. *Isaie*: *Quantum, inquit, cum me a pugno memoria, nunquàm me arbitror, Alma, in muliere nupta legisse, sed in ea, quæ virgo est, ut non solum virgo sit, sed virgo innioris ætatis, & in annis adolescentiæ*. Et in Traditionibus Hebraicis sic

fic S. Doctor refellit Iudæos: *Ostendant igitur nobis Iudæi in Scripturis alicubi positum, Alma, ubi adolescentulam tantum & non virginem sonet, & concedimus eis illud, quod in Isaia apud nos dicitur: Ecce virgo concipiet & pariet, non absconditam virginem, sed adolescentulam significare iam nuptam.* Secundò, hæc vox, *Alma*, sæpiùs in sacris Litteris ad designandam virginem viro omninò incognitam adhibetur, velut Geneseos cap. 24. ubi Rebecca puella pulchra nimis dicitur, virgoque incognita viro, in Textu Hebræo legitur, *Alma*, & Exodi cap. 2. Mariz, sorori Moysi, quæ virgo itidè erat, idipsum nomen *Alma* tribuitur in Textu Hebræo. Tertiò, *Septuaginta Interpretes* in sua versione, *Onkelosus*, & *Jonathan* in suis Paraphrasis, hunc *Isaie* locum sic sunt interpretati: *Ecce virgo concipiet, &c.* Ita paritèr habent Versiones Syriaca & Arabica. Denique, certò certius est, *Isaiam* proponere conceptum virginis tanquàm mirabile signum, idest, seu rem novam, inusitatam, & prodigii loco habitam; porrò, si *Isaias* in hocce vacicio loqueretur de adolescentula, quæ, post delibatam virginitatem, more cæterarum mulierum, concipere, & parere debebat, nullum profectò in hoc mirabile signum, aut rarum prodigium *Isaias* proposuisset, cum frequentèr accideret, ut adolescentula, facta semel virginitatis suæ jacturà, concipiat & pariat: *Abfurdisimum autem est omnium, & ineptissimum*, inquit *S. Basilus* hom. 25. de hum. Christi generatione, *d. Domino dari signum tanti mysterii, quod natura sit commune omni.* Theodotionis autem & Aquilæ præposteram, interpretationem nihil moror; fuerunt enim, ut observat *S. Irenæus* lib. 3. adversus hæreses cap. 24. Iudæi profelyti, qui in suis Scripturæ Sacre versionibus hoc *Isaie* oraculum, & alia quàmplurima Scripturæ loca, quæ Christianæ religioni favebant, de industria immutarunt, mutilarunt, interpolarunt. *Aquila*, gente Ponticus, urbe Synopæus, primùm Gentilis, postea ex Christiano factus Iudæus, & Rabbinus *Akiba*, Christiani nominis hostis infensissimus, discipulus; Scripturæ Sacre versionem Græcam conflagavit sub Hadriano Imperatore circa annum Christi 130. teste *S. Epiphano* lib. de pond. & mens. Hunc Iudæorum profelytum, Biblia in Græcam linguam contentiosè transtulisse affirmat *S. Hieronymus* Epist. ad Pammachium cap. 4. & Comment. in *Isaiam* cap. 8. Theodotion verò, qui sub Commodò, Imperat. suam Scripturæ versionem fecit, fuit natione Ponticus, qui Fidem Christianam amplexus, deindè ad Ebionis, & Marcionis hæreses prolapsus, tandè profelytus & apostata, Iudæus factus est. Undè à *S. Hieronymo* Proœmio ad Danielelem vocatur *incredulus & Ebionita*. Et epist. 89. ad Augustinum, *homo Iudæus, & blasphemus*.

Ad testimonium verò, quod Iudæi ad suam fulciendam interpretationem profuerunt ex lib. proverbiorum cap. 30. quadrifariam respondetur. Primò dici potest, etiamsi eò loci vox *Alma*, designaret puellam corruptam, quod tamen oppidò falsum est, indè tamen minimè sequi, eandem vocis significationem locum habere cap. 7. *Isaie*. Ratio est: Quia ali-

alibi, ubicumque hæc vox, *Alma*, in Sacris Litteris occurrit, Virginem semper designat; nemo autem non fatebitur, ex plurium locorum collatione potius de genuinâ illius vocis, *Alma*, significatione iudicandum esse, quàm ex solius loci sensu. Secundò, dici potest, in Versione septuaginta Interpretum, sicut & in Editione nostra Vulgata non legi: *viam viri in Alma*, seu *in puella*, sed *viam viri in adolescentia*, quasi dicat sapiens: difficile admodum esse dignoscere viam viri in adolescentia, quia vaga, versatilis, inconstans est, & perinde difficilis exploratu, ac via aquilæ, serpentis, & navis, quæ nullum post se relinquunt vestigium. Solent enim juvenes in adolescentiæ æstu nunquàm sibi constare, sed in diversâ singulis horis rapi, diversisque moveri affectibus, ita ut difficillimum sit eorum viam investigare posse, seu eorum vitæ institutum ac scopum internoscere. Tertiò, dici potest, Salomonem, dum ait, se ignorare *viam viri in Alma*, voluisse conceptus, & partus Virginis Mariæ grande, & inexplicabile indicare Mysterium, quod longè difficilius sit cognitu viâ vel aquilæ, vel serpentis, vel navis, eò quòd in illis omnibus scissio aliqua datur, & divisio, in partu autem Mariæ Virginis nullum prorsus vestigium transitus vel divisionis remanserit, sed claustra pudoris virginis penitus intacta persisterunt. Denique, dici potest, Salomonem eò loci innuere dumtaxat velle, incerta esse Virginis integræ aut corruptæ indicia, tum quia Virgines, etiam defloratæ, crimen suum strenuè mentiendo tegere & celare possunt; tum quia clandestinæ, & occultæ sunt mille nocendi artes virorum, qui Virginibus insidiantur, & tortuosa eorum consilia, adeò ut perdifficile sit eorum fraudes, machinationes, & scelera detegere, ac penetrare.

Alteram quod spectat Iudeorum responsionem, manifestum est, eam apertè cum Historia Sacra pugnare; edita si quidem est hæc Isaïæ prophetia: *Ecce virgo concipiet, &c.* regnante jam Achaz Rege Judæ; supponamus itaque eiusmodi vaticinium editum esse ab Isaïa, anno quo regnum auspiciatus est Achaz, certum est, non posse prædictum Isaïæ oraculum intelligi de Ezechia, quia Ezechias initio regni patris sui Achaz, iam ut minimùm novem annos natus erat. Regnavit quippè Achaz annos sexdecim, ut patet ex lib. 4. Regum cap. 16. & eo mortuo, statim regnavit eius filius Ezechias, viginti quinque annos natus cum regnare cepit, ut colligitur ex lib. 4. Reg. cap. 18. ex quo calculo sequitur: Ezechiam in exordio regni patris sui, iam nonum ætatis suæ attingisse annum. Se se ergo Iudei plenis buccis deridendos propinant, dum istud Isaïæ oraculum, *Ecce virgo concipiet, &c.* intelligendum esse garriunt de vxore Achaz, & de eius filio Ezechia, quem propedièm paritura erat.

Elisâ utrâque Iudeorum responsione, nunc propullare iuvat insignem calumniam, quam *Celsus*, ethnicus auctor, Beatæ Mariæ Virgini temerario ausu importavit, asserens, ut testatur *Origenes* lib. 1. quem edidit contra hunc fidei hostem, Mariæ in adulterio fuisse deprehen-

sam, eamque Christum, ex illicito cuiusdam *pantheræ* concubitu conceptum, clam enixam fuisse. Hæc autem putidissima calumnia non solum ex luculentissimo Isaïæ vaticinio, & ex historia Evangelica confutata manet, sed etiam evidenti ratione dissolvi potest. Enim verò, ut solido utar ratiocinio Illustrissimi Daniëlis Huetii, Episc. Abrincensis, in lib. de Demonstr. Evangelica, propos. 9. quis credat, tantà patientiâ fuisse Iosephum, ut manifestam criminis, quod Legibus Iudæorum tam severâ animadversione puniebatur, securam vivere perniiserit? quis credat, infamem mulierem, inter consanguineos & affines, inter infensos filio legisperitos, Sacerdotes, & Phariseos tutam fuisse? quis credat, Iesum ipsum tam spurco, & damnato genitum concubitu, in Ecclesiam Domini fuisse admissum contra Mosis interdictum, neque ipsi ab invidis, & inimicis, quos complures sua ei virtus pepererat, obiectum publicè, & exprobatum? quis credat denique, Evangelistas, & Apostolos in manifesta re præfractè mentiri ausos, & adversus rei propalàm editæ notitiam, superstitionibus etiam pervulgati facinoris testibus, mirabilem quemdam Christi ortum esse commentos, & ad Davidem retulisse. Apagè ergò hanc tener rimam, malèque confutam calumniam, quam hic adduxisse, satis superque refutasse est.

DICO SECUNDÒ: *Mariam tam in partu, quam post partum, Virginem permanxisse.*

Prima hujus assertionis pars probatur non solum ex variis veteris Testamenti figuris, quibus Mariæ partus fuit præmonstratus, rubo videlicet ardente & incombusto, Exodi cap. 3. vellere Gedeonis, Iudicum cap. 6. & virgâ Aaronis, quæ absque ullo exterioris humoris adminiculo, solâ Dei virtute floruit, fronduit, ac fructum fecit, Numerorum cap. 17. sed etiam ex perspicuo adstruitur Scripturæ Sacræ testimonio petito ex cap. 44. Ezechielis, *porta hæc clausa erit, & non aperietur, & vir non intrabit per eam, quoniam Dominus Deus Israel ingressus est per eam.* Quod Prophetæ oraculum interpretantur SS. PP. de Maria Virgine, quæ ob perpetuam, quam conservavit, Virginitatem, verè fuit porta clausa, hortus conclusus, fons signatus: *Porta igitur Maria, inquit, S. Ambr. lib. de Institut. Virginis cap. 7. Per quam Christus intravit in hunc mundum, quando virginali fusus est partu, & genitalia virginis claustra non solvit, mansit intemeratum septum pudoris, & inviolata integritatis duravere signacula, cum exiret ex Virgine.* Atque hæc est Sanctorum Patrum, Augustini lib. 22. de Civit. Dei cap. 8. S. Gregorii Magni Homiliâ 26. in Evangelia, Theodoretii Dialogo 2. S. Maximi, Taurinensis, Homil. 2. de Nativitate, S. Fulgentii lib. de Fide ad Petrum cap. 2. & Ephesini præterea Concilii Doctrinâ, Symbolorum protestationibus, & utriusque Ecclesiæ perpetuò consensu comprobata, quâ credimus, illibatam Mariæ in partu Virginitatem perstitisse, Christique corpus, clausis uteri virginalis repagulis, eodem modo foras prodiisse, quo obseratis fori-

foribus post resurrectionem ad Discipulos penetravit. Nascitur Christus, inquit *Catechismus Concilii Tridentini*, ex matre sine ulla maternæ virginitatis diminutione, & quomodo postea ex sepulchro clauso, & obliuato egressus est, atque ad discipulos januis clausis introiit: vel ne à rebus etiam, quas naturâ quotidie fieri videmus, discedatur, quomodo solis radii concretam vitri substantiam penetrant, neque frangunt tamen, aut aliqua ex parte lædunt: simili, inquam, & infinitis partibus altiori modo, Jesus Christus ex materno alveo, sine ullo maternæ virginitatis detrimento editus est. Quod quidem Spiritus Sancti virtute effectum est, qui in filii conceptione & partu, matri ita adfuit, ut ei fecunditatem dederit. Cæterum, tres rejici debent errores, in quos impegerunt quidam Scriptores, in modum, quo Corpus Christi clauso Virginis utero exivit, curiosius inquirere audentes. Alii quippè putarunt, quòd Corpus Christi ex Matris latere prodierit, quos merito *S. Damascenus* cap. 14. lib. 4. de *Fide Orthodoxa*, juxta postremam doctissimi nostri *P. Michaelis Le Quien* Editionem, redarguit his verbis: *Conceptio quidè per auditum facta est, ortus verò per eam partem, per quam exire solus consuevit; quamlibet aliqui fabulantur, illum, seu Christum, per Genitricis Dei latus editum esse. Neque enim hoc impossibile erat, ut per portam transiret, sigillis eius nulla parte labefactatis.* Alii existimarunt, eo momento temporis, quo Christus è Virginis utero prodiit, aperta fuisse pudoris claustra, sicut tamen ut Christus integritatem omnem nascendo faceret: *Quasi, Maria ad horam Virgo fuerit, & ad horam perdidit Virginitatem. Infantum est hoc dicere & credere prophannum*, inquit *Goffridus*, Abbas Vindocinensis, *Sermone 4. de Nativitate Domini*. Alii demùm, post *Joannem Mayronium* in 3. *Sent. distinct. 4. quæst. unica*, art. 6. sixerunt, Corpus Christi fuisse in utero Mariæ Virginis localitèr inextensum, ad eum scilicet modum, quo nunc in augustissimo Eucharistiæ Sacramento continetur, ac subindè mirum non esse, quòd, illæsis pudoris virginei claustris, è Virginis Mariæ utero prodierit. Sed hic error facile refellitur, quia si Corpus Christi fuisset in utero Mariæ Virginis localitèr inextensum, nec foveri, nec nutrirì, nec augeri potuisset, nullaque externa graviditatis signa in Maria Virgine comparuissent. Quæ omnia adversantur Scripturæ Sacræ, & Traditioni Sanctorum Patrum, qui communiter docent, Corpus Christi, etsi localitèr extensum, per miraculum tamen, hoc est, per penetrationem, exiisse è Virginis Mariæ utero, non secus ac è sepulchro clauso prodiiit per penetrationem redivivum.

Altera assertionis pars perpetuà nititur Sanctorum Patrum traditione, *Origenis*, *Homil. 7. in Lucam*, *Hieronymi* àversus *Helvidium*, & *Joaninianum*, *Basilii* *Homil. 25.* *Epiphani* hær. 78. *Siricii* Papæ *Epist. 5. ad Theophilum*, & *Anysium* *Episcopos*, *Ambr.* lib. de *Institut. Virginis*, *Chrysologi* *Serm. 142. & 143.* *Hildephonsi*, *Episcopi Toletani*, qui circa medium septimi Sæculi duos scripsit libros, in quibus latè disserit de perpetua

tua Virginitate Mariæ, adversus quosdam Hispanos, qui Helvidii hæresim recoquebant. Huic autem aviæ Sanctorum Patrum traditioni, inviolabili temporum serie ad nos usque propagatæ, & in Ecclesia Catholica conservatæ, nemo citrà hæresim refragari potest. Accedit etiam, efficac, quam tradit *Sanctus Thomas*, ratio, 3. part. quæst. 28. art. 3. ubi ait: Impium errorem Helvidii, Mariæ post partum Virginitatem negantis, primò, injuriam irrogare Spiritui Sancto, cujus Sacrarium fuit uterus Virginalis. Secundo, derogare dignitati, & sanctitati Matris Dei, quæ post hominum memoriam ingratissima mulier videretur, si tanto filio contenta non fuisset, & Virginitatis, quæ in ea miraculosè fuerat conservata, spontè per carnis concubitum jacturam facere voluisset. Tertiò, ipsi Josepho ad maximam præsumptionem fore imputandum, si eò audaciæ venisset, ut eam, quam revelante Angelo, de Spiritu Sancto Deum concepisse cognoverat, polluere præsumpsisset.

DILUUNTUR

Judeorum, & Hæreticorum objectiones.

ARguitur primò, hoc Isaïæ vaticinium: *Ecce Virgo concipiet, & pariet filium*, intelligi non potest de Maria, quæ concepit & peperit Christum, sed aptari tantùm potest conceptui, & partui Prophetissæ, uxoris Isaïæ, ergo ex illo Isaïæ oraculo perperam colligitur, Mariam illibatâ virginitatè, & sine congressu virili concepisse & peperisse Christum. Prob. ant. ex serie rerum, quæ istud Isaïæ oraculum præcesserunt, eique occasionem dederunt. Refert quippè Scriptura Sacra, quodd, cum esset obsessa à Regibus Syriæ, & Israel, Civitas Jerusalem, Achaz, qui tum temporis Iudææ Regni habenas moderabatur, hac Syrorum & Israelitarum in se facta conspiratione, cui repellendæ impar erat, perterritus & tantùm non exanimatus, spem omnem salutis & fiduciæ suæ anchoram in Rege Assyrio reponebat. Isaïas hoc in præsentissimo discrimine Achazum constitutum hortabatur, ut Deo potiùs consideret, & ne dubitaret de proximè adfuturo auxilio divino, dedit ei optionem alicujus signi, quò cognosceret Achaz copias duorum illorum Regum *Razin & Pekach*, discessuras ex Iudæa irritò conatu, sed Achazo signum postulare nolente, sive ex hypocrisis, quasi major esset fides sua, quàm ut his egeret fulcris, sive ex odio Dei veri, ne per miraculum, gloria ejus populo innotesceret, sed potiùs subséquutura liberatio, vel Idolis suis, vel etiam prudentiæ & fortitudini suæ accepta referretur, signum, inquam, Achazo postulare detractante, Isaïas, videns se surdo loqui, sermonem suum direxit ad domum David, eique proximæ liberationis signum dedit, dicens: *audite ergo Domus David Dominus dabit vobis signum, ecce virgo concipiet, & pariet filium*, quasi diceret:

ret: puella, quæ nunc virgo est, nubet, concipiet, pariet, & infantem educabit, & antequam ille infans, quem paritura est, sciat reprobare malum & eligere bonum, idest, antequam adoleverit, perfectam ab his hostibus qui Iudæam infestant, liberationem consequemini. Proponit ergo Isaias puellæ partum, & infantem, qui ex illo partu prodire debebat, tanquam signum proximæ liberationis Iudæorum, & fugæ duorum illorum Regum, qui ferro flammæque Iudæam depopulabantur. Non potest itaque hoc Isaiæ vaticinium congruere Mariæ, quæ tantum septem post sæcula paritura erat Christum, cuius etiam nativitas, signum esse non poterat beneficii statim, vel brevi post tempore exhibendi Iudæis; sed potius ad Prophetissam, uxorem Isaiæ referri debet hoc vaticinium, idque apertè innuere videtur *Isaias cap. 8.* ubi sic loquitur: *Et accessi ad Prophetissam, & concepit, & peperit filium.* Ergo istud Isaiæ vaticinium, ecce virgo concipiet, & pariet filium, intelligi non potest de Maria, Matre Christi, sed de prophetissa, uxore Isaiæ.

Respondeo primò, hoc Isaiæ oraculum: *Ecce virgo concipiet, & pariet filium*, de conceptu & partu Mariæ Virginis esse intelligendum. Quod quidem ut clariùs percipiatur, observari debet, conceptum & partum, de quo loquitur *Isaias cap. 7.* discerni omninò debere à conceptu & partu de quo sermonem habet *cap. 8.* Primus namque conceptus & partus est Mariæ Virginis, quem his verbis designat Isaias: *Ecce virgo concipiet, & pariet filium.* Alter, est conceptus, & partus Prophetissæ, uxoris Isaiæ, & accessi ad Prophetissam, & peperit filium. Primum puerum, quem ex partu Mariæ Virginis nasciturum vaticinatur Prophetia, *Emmanuel* vocat, illumque constituit celi signum conservationis domus Davidicæ, ex qua proditurus erat Christus, Mariæ filius, undè ait: *audite ergo domus David.* Alterum verò, seu Prophetissæ filium, appellat, *accelera spolia detrahare, festina prædari*, illumque statuit tanquam signum destructionis regnorum Syriæ, & Samariæ, ita ut antequam ille puer, quem prophetissa parere debebat, ætatem adultam attigisset, duo illi Reges, qui Iudæam vexabant, profligandi essent, eorumque regna destruenda. Ut igitur faciliùs solvatur Iudæorum obiectio & planior sit oraculi Isaiæ sensus, duo distingui debent conceptus & partus, duo itidem pueri, quorum primus sit Christus Dominus, natus ex Maria Virgine: alter prophetissæ uxoris Isaiæ filius. Verùm, quia ille puer, quem peperit prophetissa, fuit typus Christi, filii Mariæ Virginis, quacumque Isaias de puero prophetissæ vaticinatur, excellentiorem, & veriorum sensum habent, dum Christo Domino accomodantur. Exempli gratiâ, Isaias vaticinatur de puero prophetissæ, quod *antequam sciat vocare Patrem suum, & Matrem suam auferetur fortitudo Damasci, & spolia Samariæ coram Rege Assyriorum.* Id autem perfectiùs fuit impletum in Christo, filio Mariæ Virginis, quàm in filio prophetissæ, uxoris Isaiæ: nam Christus in ipsa infantia prædam Damasci, & Samariæ, Regi Assyriorum,

riorum , hoc est gentes tenebris idololatriæ immerfas , typicis nominibus designatas , eripuit dæmoni , typico pariter nomine adumbrato . Quod in adoratione , quam Magi Christo , adhuc vagienti in cunis , exhibuerunt , ac gentium in iisdem vocatione completum est , sicut præclare edidit *Tertullianus* lib. 3. adversus Marcionem cap. 12.

Respondeo secundò cum aliis celeberrimis Theologis : *Isaiam* capitibus 7. & 8. de eodem conceptu , & partu Mariæ Virginis , & de ortu Christi agere . Quantum autem ad signum quod pollicetur *Isaias* , dum ait : *Dominus dabit vobis signum , ecce virgo concipiet , &c.* dicunt illi Theologi , partum Virginis non statui ab *Isaia* tanquam signum proximæ liberationis à duobus Regibus *Razin* , & *Pekach* , qui ludæam armis infestabant , sed partum Virginis proponi ab *Isaia* velut signum conservationis familiæ David . Ratio est , quia postquam Propheta missus à Deo optionem dedisset Achazo , Regi Iudæ , petendi aliquod signum ad confirmationem proximæ ab hostibus liberationis , quam ipsi nomine Dei pollicebatur , & Achaz huiusmodi signum postulare noluisse , tunc *Isaias* convertit se ad domum David , dicens : *Audite ergo domus David , Dominus dabit vobis signum : Ecce virgo concipiet & pariet filium .* Quasi diceret : ó Iudæi bonis estote animis , non est excidenda domus David , sed perpetuò conservanda , & propter hoc dabit vobis Deus signum : *Ecce virgo concipiet , & pariet filium* , scilicet Christum , qui erit verus Messias ex domo & familia David oriundus . Addunt etiam illi Theologi , *Isaiam* ex illo signo , quod daturus erat Deus pro conservatione domus David in virgine pariturâ , sumpsisse argumentum à maiori ad minus , ut trepidantes confirmaret Iudæorum animos , erga proximam liberationem ab illis duobus Regibus , à quibus vexabantur . Quasi diceret *Isaias* : ó Iudæi , Deus vobis pro perpetua conservatione domus David aliquando daturus est stupendum & prorsus inauditum signum , ut virgo concipiat & pariat Emmanuelem ! Procul igitur omnem abiciite timorem , & in certam erigimini spem , fore ut proximam à Deo consequamini liberationem ab illis duobus Regibus , qui vos impræsentiarum vexant ; si enim Deus maximum illud , & penè incredibile beneficium , de cuius promissionis complemento nemo vestrum dubitat , aliquando concessurus est , certè istud , quod minus est , quodque vestram ab hostibus liberationem spectat , multò facilius largietur .

Arguitur secundò , *Matth. cap. 1.* dicitur de Iosepho : *Et non cognoscebat eam* , id est Mariam , *donec peperit filium suum* . Particula autem *donec* indicat Iosephum cognovisse Mariam , postquam filium suum peperit . Deinde , *Tertullianus* in lib. de Monogamia cap. 8. ait : Mariam , post natum Iesum , coniugale solvisse debitum , & *Christum quidem* , inquit : *virgo enixa est , semel nuptura post partum* , quo exemplo probat , secundas nuptias permitti haud debere in Ecclesia . Denique , *S. Basilius* homilia 25. de humana Christi generatione exponens hæc verba : *non cognovit eam*
do-

donec peperit, sic loquitur : *affert hic locus suspicionem, quod, postquam generationi Domini per Spiritum Sanctum administrare castè pureque servivit, tum demum usitata nuptiarum opera Maria non recusaverit. Nos autem, quamvis nihil hoc doctrinæ pietatis officiat, siquidem eò usque virginitas fuit, dum dispensationi illa serviret : quod autem deinde secutum est, tanquam nihil ad Mysterii rationem pertinens curiosius omittamus inquirere.* Ergo Maria saltem post partum virgo non permanfit.

Respondeo, particulam illam, *donec*, non innuere Iosephum cognovisse Mariam post partum, sed significare, sicut docet S. Thomas, infinitum tempus, adeò ut sensus sit : Iosephum nunquam rem habuisse cum Maria. Quæ explicatio aliis Scripturæ Sacræ locis illustrari potest. Nam, dum Psalm. 119. dicitur : *Oculi nostri ad Dominum Deum nostrum, donec misereatur nostri*, non significatur, quod post impetratam misericordiam oculi avertantur à Deo. Et Genesis cap. 8. iuxta editionem vulgatam, de corvo ex arca emisso dicitur : *qui egrediebatur, & non revertebatur, donec siccarentur aquæ*. Non indè tamen significatur, corvum siccatis aquis rediisse : cum certum sit corvum nunquam in arcam else reversum, sed vel cadaveribus incubuisse, vel arcæ infedisse. Ad auctoritatem Tertulliani dico, eum, quando librum de Monogamia scripsit, jam à Fide Catholica descivisse. De Tertulliano, inquit S. Hieronymus cap. 9. lib. 3. contra Helvidium, *nihil amplius dico, quam Ecclesiæ hominem non fuisse*. Denique, ad testimonium S. Basilii respondeo : Sanctum illum Doctorem, dum ait : *Nihil pietatis doctrinæ officere, si quis suspicetur, Mariam post partum nuptialia opera viro non negasse, non hoc dicere, quasi unicuique integrum ac liberum sit utrumvis opinari, sed quod putet, id nihil referre ad Mysterium ab Isaia prædictum, Ecce virgo concipiet, & pariet filium*, de quo Prophetæ oraculo potissimum disserit S. Basilii in prædicta homilia. Nam huic Isaïæ vaticinio suæ semper constaret veritas, etiamsi Maria post partum virginitatem non servasset. Cæterùm, perpetuam Mariæ Virginitatem ad fidem & pietatem pertinere, manifestè docet S. Basilii verbis proximè sequentibus : *Nihilominus, inquit, quoniam Christum amantium aures non sustinent hoc audire, quod Dei Genitrix aliquando virgo esse desierit, &c.* & deinde exponens illam particulam *donec*, ait : *Illud dicimus, quod, donec, etsi alicuius temporis terminum circumscribere videatur, verè tamen infinitum : liquod præ se fert.* Quæ Sancti Doctoris explicatio, ut nemo non v. det, perpetuam Mariæ Virginitatem adstruit.

Arguitur tertio, Matth. cap. 1. Iesus appellatur *primogenitus* Mariæ, sed primogenitus ille dicitur, post quem alius genitus est, alioquin non primogenitus, sed unigenitus dici deberet. Ergo Maria, postquam peperit Christum, procreandis liberis operam dedit, adeoque perpetuam non servavit virginitatem. Præterea, in Evangelio commemorantur fratres Christi Domini, Matth. cap. 13. *Non ne hic est fabri filius ? non ne*
Ma.

Mater ejus dicitur Maria? & fratres ejus Jacobus, & Ioseph, & Simon, & Iudas, & soror ejus apud nos sunt? Si ergo Christus Dominus fratres & sorores habuit, necesse est, ut Maria post partum non permanferit virgo.

Respondeo : Christum appellari primogenitum Mariæ, non quòd Mariam alios post Christum genuerit filios, sed quia nullum ante Christum genuit filium. Etenim hic est sollemnis Scripturæ Sacræ usus, ut unigeniti interdum vocitentur primogeniti. ex. gr. Deus in veteri Lege iubet sibi omnem primogenitum offerri & consecrari, & tamen si ovis unicum genuisset agnum, debuisset ille agnus, licet unigenitus, vi Legis & præcepti divini, offerri & consecrari Domino tanquam primogenitus. Non absimili igitur ratione Christus, etsi filius Mariæ fuerit unigenitus, appellatur tamen à S. Matthæo, iuxta consuetudinem legis, Mariæ primogenitus.

Ad fratres, quod attinet Christi Domini, qui commemorantur in Evangelio, respondeo : illos fuisse fratres Christi non quidem naturâ, quasi eodem ex patre, aut eadem ex matre progeniti essent, sed cognitione dumtaxat, quippè qui erant filii Mariæ Cleophæ, quæ cognatione & sanguine iuncta erat Mariæ virgini, & uxor erat Alphæi, ac mater Iacobi minoris, Iosephi, &c. vel ut putant *Baronius* in Apparatu, & *Bollandus* ad diem 9. mensis Aprilis, illi, qui *fratres Christi Domini* in Evangelio dicuntur, fuerunt filii Mariæ, uxoris Cleophæ, Cleophas autem erat frater Iosephi, Sponsi virginis Dei. paræ, sicut asserunt *Egesippus* apud *Eusebium* lib. 3. hist. Eccl. cap. 11. & alii Patres apud *Christophorum Castrium* Hist. Deiparæ cap. 1. Quapropter, sicut Iosephus, & Cleophas erant fratres, ita Maria, mater Iesu, & Maria, uxor Cleophæ, appellabantur sorores, & filii Mariæ, uxoris Cleophæ, dicebantur fratres Christi, filii Mariæ virginis, propter eam, quæ inter illos intercedebat, cognationem.

Non me fugit, esse aliquos Patres, *Origenem* in cap. 13. Matth. *Epiphanium* hæresi 78. *Eusebium* lib. 2. Hist. Eccl. cap. 1. *Hilarium* in cap. 1. Matth. & alios, qui existimant, eos, qui *fratres Christi Domini* in Evangelio appellantur, fuisse filios Iosephi ex priori uxore susceptos. Sed, hæc viris doctis meritò non probatur sententia. Primò, quia ipsemet *Origenes* in Matth. iuxta editionem *Cl. Danielis Huetii* pag. 223. fatetur, hanc sententiam haustam fuisse ex libris apocryphis, nempe ex Evangelio Petri, aut ex Protoeuangelio Jacobi, idque confirmat *S. Hieronymus* in cap. 12. Matth. ubi hæc habet: *Quidam fratres Domini de alia uxore Ioseph filios suspicantur, sequentes deliramenta apocryphorum.* Secundò, Iosephum perpetuò virginem permanfisse docet *S. Hieronymus* in lib. contra *Helvidium* : *Tu dicis, inquit, Mariam virginem non permanfisse: ego tibi plus vindico, etiam ipsum Ioseph virginem fuisse per Mariam, ut ex virginali coniugio virgo filius nasceretur. Si enim in virum sanctum* for-

fornicatio non cadit, & aliam uxorem habuisse non legitur. Denique, ut optimè notat *Baronius* in Apparatu, erroris arguuntur illi antiqui, qui senferunt Mariam, matrem Jacobi minoris, fuisse priorem uxorem Iosephi, Sponsi Mariæ virginis. Nam Maria, quæ fuit mater Jacobi minoris, vivebat tempore passionis Christi Domini, ut constat cap. 15. *Marci*, erant autem & mulieres de longè aspicientes: inter quas erat Maria, Magdalene, & Maria, Jacobi minoris, & Ioseph mater, & Salome. Si ergo Maria, mater Jacobi minoris, fuisset prior uxor Iosephi, Sponsi Mariæ virginis, habuisset Ioseph eodem tempore duas uxores, nempe Mariam, Jacobi minoris matrem, & Mariam, matrem Christi Domini, quod vel cogitare animus horret. Hac itaque antiquorum reliquæ sententiâ, dicendum est cum *S. Thoma* 3. p. q. 28. art. 3. ad 6. illos, qui in Evangelio fratres Christi Domini nuncupantur, fuisse cognatos Christi. Nec enim in sacris litteris insolens est, ut cognati interdum appellentur fratres, sic Abraham nepoti suo Loth dicit *Genesis* cap. 13. fratres nos sumus. Sic etiam Saram vocavit sororem suam. Sic denique Laban alloquitur Iacob generum suum *Genesis* cap. 29. v. 15. Quoniam frater meus es, non servies mihi gratis.

Arguitur ultimò, in lib. de ortu Salvatoris dicitur: Ad partum, Mariæ accurrisse obstetrices, quæ necessariæ videntur mulieri patienti in partu dolorem; atqui si Maria fuisset virgo in partu, obstetricibus opus nequaquam habuisset, quia pariendo nullum fuisset passa dolorem, ergo Maria in partu non permansit virgo. Præterea, *Tertullianus* lib. de carne Christi cap. 4. *Origines* hom. 14. in Lucam, *Irenæus* lib. 4. adversus hæreses cap. 66. *Ambrosius* in Lucam, & alii affirmant: Christum nascendo aperuisse vulvam matris, sed vulva aperiri non potest, nisi pariens mater virginitate spoliatur, ergo Maria in partu virginitatem non servavit.

Respondeo: Mariam citra dolorem filium, quem absque libidine conceperat, peperisse. Conceptus enim Christi, inquit *S. Bernardus* Serm. 4. in vigilia Nativitatis, fuit sine pudore, partus sine dolore. Hinc fabularum loco accenseri debet id quod legitur in libro de ortu Salvatoris de obstetricibus ad partum Mariæ accurrentibus. Id quippè primò oppositur Scripturæ Sacræ *Lucæ* cap. 2. ubi dicitur, à Maria Virgine Puerum, quem pepererat, pannis fuisse involutum, & in Præsepio repositum. Secundò, liber de ortu Salvatoris, ut constans est omnium Criticorum iudicium, ad apocryphorum classem ablegari debet. Tertiò, *S. Hieronymus* hanc de obstetricibus fabulam reiecit in lib. contra Helvidium: Nulla, inquit, obstetrix, nulla muliercularum sedulitas intercessit, & mater & obstetrix fuit, pannis involvit Infantem, & posuit in Præsepio: quæ sententia apocryphorum deliramenta convincit. Quartò, Eminentissimus Annalium Ecclesiæ parens, *Card. Baronius*, in Notis ad diem 25. mensis Decembris; Martyrologii Romani carpit ac perstringit quos-

dam audaces, & imperitos homines, qui dicunt, *S. Anastasiam*, Virginem, obstetricis officio in partu *Mariæ Virginis* esse defunctam, eaque de causâ factum putabant, ut in Sacro die Natalitio, eiusdem Sanctæ *Anastasiæ* memoriam celebret Ecclesia. Hoc, inquam, insulsum commentum putido Anachronismo coniunctum refellit, seu potius ridet *Baronius*. Quis enim fieri potuit, ut *S. Anastasia*, quæ tertio cadente Ecclesiæ Sæculo, Martyrium sub *Diocletiano*, Imperatore, passa est, potuerit in partu *Mariæ Dei* paræ obire obstetricis officium? Ecclesia autem die vigesimâ quintâ mensis Decembris, in quam Natale Christi incidit, solet in Missa ad Auroram celebrare memoriam *S. Anastasiæ*, quia hæc Virgo eadem die sub *Diocletiano* Martyrii coronam promeruit, & Statio in Ecclesia, huic Virgini Sacra, Romæ eadem die 25. mensis Decembris quotannis peragitur. Denique, in cæteris quidem puerperis obstetrice opus est, quia ea multipliciter sordent, & fœtus ex materno utero prodians scatet fœcibus, & turpi illuvie fœdatus in lucem venire solet; at in virginis puerperio, nihil huiusmodi accidit, quia in illius partu nihil fuit impurum, nihil illicitum, nihil purgandum, sed omnia, potius summâ puritate ac nitore tam ex parte prolis, quam ex parte matris contigerunt. Quapropter, Sancti Patres in obiectione laudati, dum asserunt, Christum nascendo aperuisse vulvam matris, nolunt dicere, sicut rectè explicat *S. Thomas* 3. p. q. 28. art. 2. fractionem vel apertionem aliquam intercessisse in hoc partu, seu refectionem clausuri pudoris virginæ, sed per vulvam apertam intelligunt dumtaxat, eam divino miraculo fuisse perviam, & nullatenus obstituisse exitui Corporis Christi subeuntis, integris tamen remanentibus pudoris virginæ signaculis. Dicendum itaque est, hunc partum non aperuisse Virginis uterum, sed illæso pudoris signaculo Christum ex utero Matris miraculosa penetratione emerxisse, sine dolore nixus, sine diductione partis, quâ fœtus egreditur, sine sordibus & repurgamentis, quæ fœtum in cæteris puerperis comitari solent.

Indè colliges, duas opiniones æquè improbables hinc iure optimo reiici debere. Prima opinio est *Ratramni*, Cænobii Corbeien-sis Monachi, qui nono Ecclesiæ Sæculo scripsit Libellum *De Nativitate Christi* contra quosdam Germanos, qui Corpus Christi ex utero Virginis *Mariæ* non viâ communi, sed singulari, prodiiisse affirmabant. In hoc autem Libello, qui extat Tomo 1. Spicilegii *Dacheriani*, contendit *Ratramnus*, Corpus Christi per naturæ januam, per solemnem parturitionis viam ex utero Sacratissimæ Virginis *Mariæ* prodiiisse, vulvamque aperuisse, non ut clausam corrumpere, sed ut eam suæ Nativitati ostium aperiret, non quò violaret integritatem, sed quò ventris palatium vacuaret. Hanc *Ratramni* sententiam *Paschasius Radbertus*, ejusdem Cænobii Corbeien-sis Monachus, qui quæ etiam Sæculo nono florebat, confestim impugnavit in Libello, quem edidit, de partu Virginis, in quo ostendit, *Ratramnum*

minum in suo novo systemate sibi minimè constare. Nam si Christus aperuit uterum, sicut *Ratramnus* assererat, quo pacto per clausum exivit? rursus, si Christus nascendo vulvam Matris aperuit, quomodo Maria Virginitatem suam fartam testam conservavit? Hæc sanè rectà fronte secum pugnare nemo est, qui statim non videat. Poterit etiam Lector, si plura eà de re scire desideret, legere ea, quæ adversus hanc *Ratramni* sententiam diximus in Colloquio tertio in Historiam Ecclesiasticam, noni Sæculi.

Altera sententia, quæ paritèr improbari debet, patronos hæc est quosdam Græcos, qui effutiebant, Corpus Christi ex utero Mariæ Virginis prodiiisse pollutum, sordibus inspersum, & secundinis, seu membranis involutum. Quæ sententia multis momentis confutari potest. Primò, quia si Corpori Christi, è Virginis prodeunti utero, adhæsisset externæ illæ sordes, quæ ad nativam nascentis hominis conditionem pertinent, debuisset Maria Virgo nascentis Christi Corpusculum abluere, atque à sordibus purgare, antequàm illud pannis involveret; & tamen Evangelista *Matthæus* hæc tantùm de Maria pariente refert cap. 2. sui Evangelii: *Et peperit filium suum primogenitum, & pannis eum involvit, & reclinavit eum in Præsepio*; de ablutione verò Corporis Christi ne minimum quidem habetur verbulum. Præterea, Sancti Patres *Augustinus* in Oratione de quinque Hæresibus, *Epiphanius* hæresi 69. *Leo Magnus* Serm. 2. de Nativitate, *Zeno Veronensis* Serm. 2. *Hildephonsus* lib. de perpetua Mariæ Virginitate, *S. Bernardus* Serm. 3. de Purificatione, & alii, nascentis Christi Corpusculum ab externis sordibus, communi nascentium hominum Lege adhærentibus, liberum faciunt, & non minùs à pariente Virgine, quàm à Christo nascente, fæces ac sordes longè ablegant. Quod si alitèr quidam alii Sancti Patres loqui videantur, eorum locutiones non ut propriæ, sed ut figuratæ accipi debent, ita ut sensus sit, Corpus Christi, licèt absolutè loquendo, ab omni sorde liberum prodierit ex Mariæ Virginis utero, nihilofeciùs comparatè ad Verbum Divinum, cui erat hypostaticè unitum, dici poterat sordidum; non secùs, ac exempli gratià, licèt uterum Mariæ Virginis mundissimum fuisse in confesso sit apud omnes Catholicos, attamen virgineum illum uterum (comparatè ad Verbum Divinum, quod in illo incarnari debebat) Divinæ Unitati concipiendæ, fovendæ, gestandæ, velut indignum proficitur Ecclesia in pia illa solemnique precatione: *Tu ad liberandum suscepturus hominem, non horruisti Virginis uterum*. Addo insuper, Episcopos Græcos, in Synodo Trullana congregatos, damnaße Canone 79. sententiam illorum, qui Corpus Christi, secundinis, seu membranis involutum, ex utero Mariæ Virginis exiisse affirmabant. Sed dicet fortasse aliquis, si Corpus Christi nascendo debuit ab omni sorde, & secundinarum illuvie esse purum, quorsùm igitur Christus toto vitæ decursu humanæ naturæ contumelias, sordes, inquinamenta, non secùs ac nos ipsi,

perpeſſus ſit? Quid flagris cædi, quid conſpui, quid ſpinis in ludibrium coronari, quid Cruci ſuſſigî, atque inter iniquos reputari voluerit? cum & hæc omnia, ſi primâ fronte ſpectentur, vero homine Deo indigniora videri poſſint. Hæc, inquam, ſi quis dicat, breviter Reſpondebo cum S. Ambroſio lib. 2. in Lucam, noluiſſe Chriſtum ſuſcipere eas naturæ humanæ contumelias, & ſordes, in quibus periclitari potuiſſet Virginis Matris ſux pudor: Maluit Dominus aliquos de ſuo ortu, quàm de Matris pudore dubitare: ſciebat enim, teneram eſſe Virginis verecundiam; nec putavit ortus ſui fidem Matris injuriis adſtruendam. Hæc autem effluentis ſanguinis, ac ſecundinarum, quibus pueri Jeſu naſcentis corpulculum, fuiſſet involutum, illuvies, haud parùm læſiſſet pudorem virgineum. Quid igitur mirum, ſi Chriſtus noluerit hoc pacto naſci? Quamvis alias vitæ humanæ contumelias toto vitæ ſux decurſu ſpontè ſubjerit.

DISSERTATIO SECUNDA

*De circumſtantiis & prodigiis conceptionis Chriſti
Domini, quibus probatur eam fuiſſe planè
miraculoſam & ſupernaturalem.*

UBi illuxit fortunata illa dies, quâ Deus homines primigeniâ proparentis labe perditos in libertatem aſſerere, eoſque variis idolorum cultibus diſtractos atque diſſipatos, in unius veræ religionis ſocietatem convocare ſtatuerat; miſit Archangelum Gabrielem ad Mariam virginem, ut ab ea peteret, an Mater Dei eſſe vellet? Sacrum colloquium, quod miſcuit Gabriel cum Maria, deſcriptum legimus apud S. Lucam cap. 1. cujus circumſtantias paucis hîc delibabo, prætermiſſis fabulis, quæ habeantur in Proto-Evangelio Jacobi.

In primis, Archangelus Gabriel, Mariam, quam ſolam in penetralibus, ſolam ſine comitè, ſolam ſine teſte offendit, hiſ verbis conſalutavit; *Ave Maria, gratia plena, Dominus tecum, benediſta tu in mulieribus*. In qua ſalutatione, ut optimè obſervat S. Thomas, tria præſtitit Angelus: Primò, Mariæ idoneitatem expreſſit, dicens: *Ave Maria, gratia plena*. Secundò, indigitavit conceptum, dum dixit: *Dominus tecum*. Tertiò, prænunciavit honorem conſequentem hiſ verbis: *Benediſta tu in mulieribus*, ſivè inter mulieres, ob Filii Dei mox futurum conceptum, ob fecunditatem cum perpetua virginitate conjunctam, ob partum omnis præſens doloris expertem, denique ob excellentiſſima dona, quibus tam Maria fuit nobilitata. Hanc autem Angelicam ſalutationem, quo animi ſenſu exceperit Maria, explicat S. Lucas dicens: Mariam non nihil turbatam fuiſſe in auditu hujus ſermonis. Quæ quidem perturbatio profecta non

non est ex Angelico aspectu, quasi insolito, cum potius Maria sæpè ab Angelis visitaretur, sed accidit ob conspectum Angeli in peregrina adulescentis specie apparentis, vel ob novam, blandam, nemini mortaliū antehac auditam salutationis formam, vel ob admirationem eorum, quæ ab Angelo dicebantur, quia de se tam magnifica non sentiebat post hominum memoriā; modellissima Virgo, vel denique quia hæc turbatio conveniens fuit verecundiæ virginali: *Virginum est*, inquit S. Ambrosi. lib. 2. in Lucam, *ad omnes viri ingressus pavere, & omnes viri affatus vereri, Maria etiam salutationem Angeli verebatur*. Mariam trepidantem his verbis confirmavit Angelus: *Ne timeas Maria, invenisti gratiam apud Deum, ecce concipies in utero, & paries filium, & vocabis nomen ejus Jesum, &c.* Sed Maria de adamato virginitatis suæ thesauro, quò nihil secundum Deum antiquius habebat, plurimum sollicita; Angelum interrogavit: *Quomodo fiet istud, quoniam virum non cognosco?* Quæ interrogatio, non dubitantis Mariæ, aut fluctuantis animi motum, sicut blaterant Calvinus, Lutherus, eorumque gregales, sed Mariæ admirationem prodit. Hinc penitus proscribi debet sententia, Auctoris libri *Quæstionum veteris & novi Testamenti*, qui quæst. 51. asserit, *Virgini ambigenti de conceptu possibilitatem Angelum prædicasse*. Hic siquidem liber, qui olim sub e mentito S. Augustini nomine circumferebatur, Pelagianis erroribus refertus est, multisque aliis nævis infusatur, ut luce meridiana clariùs evincunt Bellarminus in lib. de Scripturis Ecclesiasticis verbo *Augustinus*, Possevinus in Apparatu, & Lovanienses in Censura huic Operi præfixâ, Augustinianorum operum tomo quarto. Idque liquet ex benè multis quæstionibus, quæ passim occurrunt in hoc libro, maxime decimâ tertiâ, vigesimâ primâ, quadagesimâ quintâ, octuagesimâ, centesimâ nonâ, &c. ubi illius libri Auctor, Pelagianæ hæreseos fuligine tinctus, docet: *Homines non nasci filios diaboli*, aliaque id genus absorta, dura, & à veritate prorsus aliena obtrudit, quæ jam laudati Auctores, & doctissimi Patres Benedictini Congregationis S. Mauri in recenti & castigatissima Operum S. Augustini editione optimo jure perstringunt. Rejeto itaque illius Auctoris, & hæreticorum errore, convenit inter omnes Theologos, Mariam, quæ omnia oracula Prophetarum, qui Messiam venturum cecinerunt, ad unguem callebat; de possibilitate conceptionis Christi Domini nunquam dubitasse, sed modum dumtaxat, quo mirabile istud Mysterium adimpleri debebat, non curiositatis, sed admirationis affectu impulsam inquisivisse ab Angelo, qui eam confestim hunc ineffabilem modum edocuit, in hæc verba prorumpens: *Spiritus Sanctus superveniet in te, & virtus Altissimi obumbrabit tibi &c.* quasi diceret: *ô Maria, concipies, non naturali viâ, non virili concursu, sed solâ operatione Spiritus Sancti, qui in te novo & planè incomprehensibili modo illapsus, virtute & efficaciâ fecundam te reddet, & ex tuis purissimis sanguinibus corpus verbo Dei aptando formabit,*

mabit, nec alium sponsum quàm Deum habebis; quapropter, virginitas tua nullum ex conceptu patietur detrimentum, sed potiùs sanctus hic divinæ naturæ cum humana coitus pudicitiam tuam consecrabit. Quæ ubi audiisset Maria, demissè respondit ac præstitit assensum, dicens: *Ecce Ancilla Domini, fiat mihi secundum Verbum tuum*. Et è vestigio in castissimis ejus visceribus operâ Spiritus Sancti ex purissimis Virginis sanguinibus Deum hominem, cui omnes mortales felicitatem acceptam re-terre debent, formatum esse, docent SS. Patres, *Augustinus* serm. 18. de Sanctis, *Gregorius Magnus* lib. 18. *Moralium*, cap. 27. *Joannes Damascenus* lib. 3. de Fide Orthodoxa cap. 2. *S. Bernardus* Serm. 4. super *Missus est*, & alii. Hæ sunt circumstantiæ colloquii Gabriëlis cum Maria Virgine, quibus ex Historia Evangelica prælibatis.

Dico: Conceptionem Christi Domini esse planè miraculosam & supernaturalem.

Hæc assertio, quæ est S. Thomæ & omnium SS. Patrum, efficacius stabiliri non potest, quàm breviter expendendo sublimia artis & beneficentiæ divinæ miracula, quæ in conceptione Christi Domini certatim collucet, eamque solitis hominum conceptionibus immensum antecellere apertissimè demonstrant.

Primò, in conceptione Christi Domini Maria virgo simul & mater permanfit. Hoc quippè eximium ac singulare privilegium soli Mariæ in conceptione Christi asserunt Sancti Patres, quorum traditioni indivisè adhærens Sedes Apostolica damnavit anno 1677. quemdam Auctorem, Italum, Imperialem dictum, qui apocryphorum librorum *de ortu Virginis*, & Tragediæ, quæ inscribitur, *Christus patiens*, ideliramenta secutus, docebat, S. Annam, citra suæ virginitatis jacturam, Mariam concepisce, sicut observat *Tilmontius* Nota 3. de Beata Virgine Tom. 1. Documentorum Hist. Eccl. Nec minus, meâ quidem sententiâ, improbari debent nugacissimi quidam Auctores, qui, pro innatâ, quâ titillantur, cudendi fabulas prurigne, satis ludicrè fingunt Annæ puerperium absque dolore contigisse, & Mariam absque actu conjugii à Ioachimo & Anna, aut saltem in mentis raptu & osculo, in momento, adeoque excluso astrorum concursu, & sine præscriptis à natura tegumentis editam, fuisse. Quæ omnia inter gerras & aniles fabulas jure merito reponunt viri eruditi, qui nullam, præter Christi Domini conceptionem, supernaturali modo & in utero Virginis factam unquam fuisse, ex Scriptura, Sacra & ex perpetua Sanctorum Patrum traditione constanter profitentur.

Secundò, conceptionem Christi miraculosam & planè supernaturalem fuisse, probat repentina ejus corporis in utero Virginis conformatio. Enimverò, statim ac Beata Virgo, voluntaria sui obsequii postulanti Deo munera offerens, Gabriëli præbuit assensum, dicens: *Ecce Ancilla Domini, fiat mihi secundum Verbum tuum*. Mirum dictu! eodem momento,

mento, nullâque interpositâ morâ, abscedente Angelo, Spiritus Sancti operatione, quæ tarda molimina nescit, compactum est in virginis utero corpus Christi integrum, omnibusque organicis membris absolutum; Angelo nuntiante, & Spiritu Sancto adveniente, inquit S. Gregorius lib. 18. Moralium cap. 35. *mox Verbum in utero, mox intra uterum Verbum caro.* Hæc autem repentina corporis Christi in castissimo Virginis utero formatio, longè excedit omnes limites naturæ, quæ paulatim, variisque gradibus puerulos maternis in visceribus format, suæque opera non tam citò maturat, sed tardo gressu ad perfectionem provehit, ut videre est in aliis solitis hominum conceptionibus, in quibus nonnisi pedetentim & interiecto diuturno temporis intervallo, corpus humanum disponere, & in carnem, ossa, cæteraque, quibus conflatur membra, conformare consuevit.

Tertiò, in generatione ordinaria semen continuâ serie elaboratum distinguitur in membra, donec menti suscipiendæ fiat idoneum die post conceptum circiter quadragesimo, at Corpus Christi non solum in momento conceptionis fuit integrè formatum, sed insuper eodem momento fuit animatum animâ rationali, *simul caro, simul Verbi Dei caro, simul verò animata anima rationali*, inquit S. Damascenus lib. 3. de *Orthodoxa Fide* cap. 2. Hoc Fidei dogma impugnarunt olim Arianî, qui, ut testantur S. Epiphanius hæresi 60. & S. Augustinus lib. de *hæresibus ad quod vult Deum*, pertendebant, Christum animâ humanâ fuisse destitutum, eiusque vices Verbum divinum supplevisse. In eundem errorem abierunt Apollinaristæ, sic dicti ab *Apollinario*, qui sub Valentiniano, Imperatore, & Damaso, Romano Pontifice, docere cœpit, Christum corpus sumpsisse quidem ex Beata Virgine, sed sine anima. Postea, quasi palinodiam decantans, addidit, Christum sumpsisse quidem animam, sed quæ mente careret, Verbumque divinum ei fuisse mentis loco. Quæ hæresis, cum sit è regione opposita Scripturæ Sacræ, quæ multis in locis Christo Domino spiritum & animam tribuit, fuit meritò confutata à Sanctis Patribus *Athanasio*, utroque *Gregorio*, *Nazianzeno*, & *Nisseno*, *Basilio*, *Ambrosio*, *Epiphanio*, *Theodoreto*, atque in pluribus Conciliis damnata, *Alexandrino* videlicet anno Christi 362. ab *Athanasio*, cæterisque Catholicis Episcopis, cœcto, *Romano*, anno 373. Præsidente Damaso, Summo Pontifice, & tandem in *Œcumenico* secundo, *Constantinopoli* habito, sub eodem Damaso, anno 381.

Quartò, Corpus Christi in instanti conceptionis fuit unitum Verbo divino, itaut Christus per ineffabilem illam unionem, & utriusque naturæ, divinæ scilicet & humanæ, consortium, fuerit Deus & homo, duasque habuerit voluntates & operationes, divinam scilicet & humanam: *Non est intervallum temporis æstimandum inter conceptæ carnis initium, & concipiendæ divinitatis adventum; unâ quippè fuit in utero Mariæ virginis conceptio divinitatis & carnis, & unus est Dei filius in utraque natura*

tura conceptus, inquit S. Fulgentius cap. 4 libri de Incarnatione & gratia. Hinc tria Fidei dogmata circa conceptionem Christi Domini firmiter credenda proponit Ecclesia Catholica. Primò, docet, naturam humanam à Christo assumptam aliam non habuisse hypostasim præter hypostasim Verbi divini, contra Nestorium, Patriarcham Constantinopolitanum, qui sub Theodosio, Imperatore, & Cœlestino I. Romano Pontifice, anno circiter 427. cœpit asserere, duas in Christo esse personas, duosque Christos, unum filium Dei, & filium hominis alterum, ac subinde Mariam virginem non Dei, sed hominis matrem esse, dicendamque non *θεοτόκον*, sed *χριστοτόκον*. Quam hæresim longè latèque per omnes ferme Orientis plagas grassantem profligavit Concilium Ephesinum celebratum anno 431. In Nestorium etiam calamum acuit S. Cyrillus, Patriarcha Alexandrinus, eiusque exitialem hæreseos labem, obiectâ Catholicæ veritatis luce, atque doctissimis editis lucubrationibus, strenuè oppugnavit. Secundò, docet Ecclesia, naturam humanam per unionem hypostaticam non fuisse absorptam à natura divina, sed potius admirabilem illam coniunctionem utriusque naturæ, divinæ scilicet & humanæ, actiones & proprietates sartas ac testas conservasse, itaut nec inferiorem consumeret glorificatio, nec superiorem minueret assumptio, sicut ait S. Leo Serm. 1. de Nativ. Chr. Domini. Id etiam definitum est contra Eutichetem, Archyemandritam Constantinopolitanum, qui magno animi æstu Nestorii hæresim impugnans, contrariam in partem deflexit, & à Fide Catholica descivit: negans in Christo duas esse naturas, & asserens carnem in ipso Incarnationis articulo in divinitatem fuisse commutatam, & ex utraque natura divinâ & humanâ, substantiam coaluisse unam; sicque Christum, ut Deum, fuisse passum. Quæ hæresis confixa est in Chalcedonensi Æcumenica Synodo sub Marciano, Imperatore, & Leone I. Romano Pontifice, anno Christi 451. indictâ, in qua sancitum est duas in Christo Domino distinctas & inconfusas esse naturas, divinam nimirum & humanam. Denique, docet Ecclesia, duas in Christo esse voluntates & operationes, divinam scilicet & humanam, contra hæreticos Monothelitas, qui ex infecta Eutychianorum stirpe, tanquàm mali furculi pullularunt, & Christo humanam voluntatem & operationem abjudicabant, distitantes, in Christo esse unicam voluntatem & operationem, scilicet divinam. Quæ hæresis proscripta est in sexta Synodo generali sub Constantino Pogonato, Imperatore, & Agathone Papâ anno 680. atque juxtà Scripturam Sacram & traditionem SS. Patrum approbata fuit doctrina de duabus in Christo voluntatibus & operationibus, divinâ nimirum & humanâ.

Quintò, Christus in instanti conceptionis suæ fuit verus Sacerdos, idque constat primò ex Apostolo ad Hebræos cap. 5. *Nec quisquam sumit sibi honorem, sed qui vocatur à Deo tanquam Aaron, sic & Christus non semetipsum clarificavit ut Pontifex fieret: sed qui locutus est ad eum: filius meus*

*meus es tu, ego hodie genui te. Quomodo & in alio loco dicit: Tu es Sacerdos in æternum secundum ordinem Melchisedech. Ex quibus Apostoli verbis sic conficitur argumentum: Christus tum temporis fuit Sacerdotio inauguratus, quando Pater sic eum allocutus est: Filius meus es tu, ego hodie genui te: Atqui Pater sic alloquutus est Christum in primo conceptionis momento, eo quippe primo instanti Christus fuit filius Dei naturâ, & à Patre missus, ut esset Mediator Deum inter & homines, ac cruento in Cruce sacrificio eorum peccata expiaret; Christus igitur in primo suæ conceptionis instanti fuit inauguratus Sacerdos, non verò postquam à mortuis excitatus cælos ascendit, sicut impiè docet Socinus in libro, cui titulus est: *Christianæ Religionis Institutio*. Præterea, Sacerdotis officium est, Deo sacrificium offerre, atqui Christus in momento conceptionis suæ verum sacrificium Deo Patri offerre cœpit, incarnari namque perinde est ac victimam Deo Patri immolandam à Deo Verbo assumi, nec alio fine, ut docent Sancti Patres, à Verbo divino, quod vitæ ubertate omnino redundabat, assumpta est natura hominis, quam velut rationalis hostia Deo offerenda. Cum igitur Incarnatio, juxta doctrinam Sanctorum Patrum, non tam vitæ humanæ, quam mortalitatis & mortis sit assumptio, sequitur, Christum in momento Incarnationis suæ sacrificium fuisse auspicatum, quod toto vitæ suæ tempore produxit, & in Cruce consummavit, sicut infra adversus Socinum multis momentis evincam.*

Sextò, Christus à momento conceptionis suæ fuit Rex quantum ad jus & dominium, non quantum ad usum, & exercitium, seu non quòd externum & temporale habiturus esset regnum, leges nimirum, politicas condendo, arces ædificando, populum suum vi armorum defendendo, hostes corporalibus pœnis afficiendo, sicut falsò carnales Iudæi de suo Messia jactare solent; sed Christus à momento conceptionis suæ fuit Rex, eo quòd spirituale ac sempiternum habiturus esset regnum, populum suum videlicet à peccati servitute redimendo, dæmonum potentiam debellando, æternas fidelibus divitias ministrando, animæ sanctitatem, corpori vitam perennem impartiendo, & in hoc sensu Christus sæpius in Scriptura Sacra appellatur Rex, eiusque Imperium æternum fore prædixit *Isaias* cap. 9. his verbis: *Parvulus natus est nobis, & filius datus est nobis, & factus est principatus super humerum ejus: & vocabitur nomen ejus Admirabilis, Consiliarius, Deus fortis, Pater futuri sæculi, Princeps pacis. Multiplicabitur ejus Imperium, & pacis non erit finis: super solium David & super regnum ejus sedebit, ut confirmet illud & corroboret in iudicio & justitia, à modò usque in sempiternum.* Regnum autem Messie, inquit *Cornelius Jansenius* Concord. in *Lucam*, dicitur sedes & regnum David, non quòd temporale esset, sensibile & terrenum, sed quòd in regno Davidis fuit adumbratum, & Davidi in proprio semine promissum sub typo regni sui. Hinc Christus,

Tom. I. X

quam.

quamdiù vixit, ab omni fastu alienus, summà semper fuit humilitate, conspicuus, non aureis, sed vilibus vestibus usus, pauperibus comitibus stipatus, & ut omnem affectatì imperii suspicionem à se removeret, palàm atque apertè coram Pilato professus est, regnum suum non esse de hoc mundo. Idem testati sunt Christi, Servatoris nostri, propinqui, qui, interrogati à Domitiano, Imperatore, de Christi Regno, cujusmodi esset, quando & ubinam locorum appareret? Responderunt, teste *Eusebio* lib. 3. Hist. Eccl. cap. 20. non hujus mundi, nec terrenum illud imperium esse, sed Angelicum ac planè cœlestè. Id egregiè confirmat *S. Hilarius*, Arelatensis Episcopus, dùm de *Herode*, Rege, sibi, suoque Regno, ob Natale Christi, metuente, sic loquitur: *Putabat infelix, se regali solio detrudendum, sed non est ita, non enim ad hoc venerat Christus, ut alienam invaderet gloriam, sed ut suam donaret, non ut Regnum terrestre præriperet, sed ut cœlestè conferret: non venerat ad dignitates recipiendas, sed ad injurias perferendas: non ut caput ad gemmarum diadema, sed ad spinam coronam præpararet, non ut super sceptrum constitueretur magnificus, sed ut crucifigeretur illusus. Quibus apprime consentit Tertulliani Sententia lib. de Idololatria, cap. 8. ubi hæc habet: Si potestatem quoque nullam Christus ne in suos quidem exercuit, quibus sordido ministerio functus est, si Regem se denique fieri conscius, regni sui fieri refugit, plenissimè dedit formam suis de reiiciendo fastigio & suggestu tam dignitatis, quam potestatis. Quis enim magis his usus fuisset quam Dei filius? Quales & quanti eum fasces perducerent? Qualis purpura de humeris ejus floreret? Quale aurum de capite radiaret? Nisi gloriam sæculi alienam & sibi, & suis judicasset.*

Postremo: Conceptionem Christi fuisse miraculosam & supernaturalem, facile colligitur ex beatissima cœlestium donorum copia, & omnigenâ virtutum suppellectili, quâ in momento conceptionis suæ fuit cumulativè exornatus. Enim verò, Christus in instanti conceptionis suæ non solum fuit sanctus sanctitate accidentariâ per gratiam habitualem, quâ ipsius anima fuit plenissimè donata, verum etiam fuit sanctus sanctitate substantiali, à Verbo Divino naturæ humanæ Christi substantialiter unito, profectâ. Habuit insuper à momento conceptionis suæ gratiam, quam Theologi vocant *Capitalem*, quâ constitutus est Caput Angelorum & hominum. Præditus fuit scientiâ divinâ, quatenus Deus, & habuit, quatenus homo, scientiam acquisitam, scientiam infusam & scientiam beatam, cujus beneficio jam comprehensor ab instanti conceptionis factus, essentiam Dei videbat, omnia præterita, præsentia & futura, singulasque cordium cogitationes etiam secretiores penetrabat. Perfectum denique habuit intellectus & voluntatis usus, per quem statim gloriam accidentalem corporis sui promereri cœpit. Hunc omnium donorum apparatus, quo fuit illustrata conceptio Christi, eleganter describit *S. Bernardus* Homil. 2. super *Missus est*, ubi explicans verba *Jeremiæ* cap. 31. *Creavit Dominus noxum super terram, semina cir-*

cum

cumdabit virum : sic loquitur : *Virum autem dixerim fuisse Jesum* , non solum cum jam diceretur vir Propheta potens in opere & sermone , sed etiam cum tenera adhuc etate infantis membra Dei Mater blandosoveret in gremio , vel gestaret in utero . Vir igitur erat Jesus necdum etiam natus , sed sapientia , non etate , animi vigore , non viribus corporis , maturitate , sensuum , non corpulentia membrorum , vel potius non minus fuit sapientia Jesus conceptus , quam natus : parvus , quam magnus ; sive ergo latens in utero , sive vagiens in Præsepio , sive grandiusculus interrogans Doctores in Templo , sive jam perfectæ etatis docens in Templo , æquè profectò plenus fuit Spiritu Sancto . Nec fuit hora in quacumque etate sua , qua de plenitudine illa , quam in sui conceptione accepit in utero , vel aliquid minueretur , vel aliquid eidem adiceretur , sed à principio perfectus ; à principio , inquam , plenus fuit Spiritu sapientiæ & intellectus , Spiritu consilii & fortitudinis , Spiritu scientiæ & pietatis , & Spiritu timoris Domini . His prodigiis , donis , ac privilegiis condecorata fuit conceptio Christi , ex quibus facillè quisque intelligere potest , eam fuisse miraculosam & supernaturalem .

Supereft nunc , antequàm objectionibus faciam satis , ut paucis exponam , qua die & quo anno conceptus fuerit Christus Dominus . Et in primis , circa diem conceptionis Christi , existimo : standum esse perantiquæ traditioni Ecclesiæ , quæ conceptionem Christi , seu Annunciationem Beatæ Virginis præfixit diei vigesimæ quintæ mensis Martii , seu octavo Kalendas Aprilis . Testatur enim S. *Augustinus* lib. 4. de Trinitate cap. 5. Christum Dominum , juxta avitam traditionem , auctoritate Ecclesiæ roboratam , conceptum fuisse octavo Kalendas Aprilis , hoc est , die 25. mensis Martii : *Sicut à Majoribus* , inquit ille Pater , *traditum suscipiens Ecclesiæ custodit auctoritas* , octavo Kalendas Aprilis conceptus creditur Christus , quo & passus . Id etiam constat ex praxi Ecclesiæ Orientalis , quæ Festum Conceptionis , seu Incarnationis Verbi divini , celebrat die 25. Martii , ut videre est in Græcorum Menologiis , Menæis , & Synaxariis , apud Bollandum Tom. 3. de *Actis Sanctorum* pag. 135. Ægyptii etiam , Copti , Syri , Chaldæi & Rutheni Festum Conceptionis Christi , seu Annunciationis Beatæ Virginis eadem die 25. Martii recolunt , ut comperitur est ex eorum Kalendariis & Martyrologiis . Nec dissentiunt Latini , qui festum Conceptionis , seu Incarnationis , ex pervetusta consuetudine assignarunt diei 25. mensis Martii , sicut ex bene multis illorum Martyrologiis , Breviariis & Missalibus probat idem Bollandus , sed potissimum ex libro Sacramentorum Gregorii Magni , in quo ad 8. Kalendas Aprilis celebratur Annuntiatio Angeli ad Beatam Mariam . Porro , hic tam constans & uniformis usus , qui in utraque obtinet Ecclesia celebrandi festum Conceptionis Christi , seu Incarnationis Verbi divini , statà die 25. Martii , argumento est , universalem Ecclesiam ex perantiqua traditione persuasum habuisse , hac die Christum Dominum fuisse conceptum .

Fuerunt tamen quædam particulares Ecclesiæ, quæ festum Conceptionis, seu Annunciationis Mariæ Virginis, transfulerunt ad diem, octavam ante Nativitatem Christi, seu ad diem decimam octavam mensis Decembris. Hunc ritum observavit Ecclesia Toletana, ut liquet ex canone 1. Concilii Toletani decimi, anno Christi 656. celebrati. Ecclesia etiam Ambrosiana, seu Mediolanensis, festum Annunciationis Beatæ Virginis transfudit ad Dominicam sextam Adventus, qui in prædicta Ecclesia auspiciatur à vespers Sabbati proximi festo Sancti Martini, quò fit, ut Dominica sexta Adventus sit Dominica dies, quæ Natalem Domini præcedit. Ex hoc autem particularium Ecclesiarum ritu colligi non potest, Christum non fuisse conceptum die 25. Martii, tum quia ille ritus fuit à paucis Ecclesiis observatus, tum quia etiam, particulares illæ Ecclesiæ eo dumtaxat fine festum Conceptionis Christi, seu Annunciationis Beatæ Virginis, in aliam transfulerunt diem, quia, dum illa festivitas præfixa erat diei 25. Martii, interdum in Quadragesimam, vel in festum Paschale incidebat, quibus temporibus condignè, & eâ, quâ par erat, solemnitate celebrari haud poterat, sicut innuunt Patres Concilii Toletani decimi, Can. 1. Notat etiam *Bollandus*, Ecclesiam Toletanam, ne recederet à vetusta consuetudine celebrandi festum Conceptionis Christi, seu Annunciationis B. Virginis, die 25. mensis Martii, hanc festivitatem geminasse in eodem anno, idque probat ex lectione, quæ in secundo nocturno Officii Annunciationis Virginis recitatur in Ecclesia Toletana, quæ sic habet: *Quamvis Annunciationis B. Mariæ festum octavo Kalendas Aprilis nunc celebretur, Toletana tamen Ecclesia utramque retinet solemnitate, alteram mense Martio, ut Romanæ Ecclesiæ, quæ Magistræ omnium Ecclesiarum & Mater est, sanctissimum institutum sequatur; alteram octavo die ante Natalem Domini: tum quòd hæc solemnitas ab ipsa Toletana Ecclesia instituta fuerit, & magna veneratione ab aliis Ecclesiis suscepta, per universam Hispaniam hæcenus celebretur.* Consulat Lector, si plura desideret, *Bollandum* loco supra laudato, *Thomassinum* in libro de celebratione festorum, Gallico conscripto idiomate, & *Baronium* in Notis ad Martyrologium ad diem 25. mensis Martii.

De anno, quo Maria concepit Christum Dominum, non convenit inter Chronologos. Verum, quia juxta probabiliorē Theologorum sententiam, quam infra benè multis adstruam argumentis, Maria peperit Christum die 25. mensis Decembris, anni Urbis Romæ conditæ 749. Imperii Augusti 40. ante æram vulgarem, seu Christianam, 5. Consulibus C. Cæsare Augusto 12. & L. Cornelio Sylla, dicendum est, Mariam hoc eodem anno & die 25. mensis Martii Christum Dominum concepisse. Quoto autem anno ætatis suæ Maria conceperit Christum? etsi certò definiri non possit, probabilius tamen est, Mariam, exeunte anno ætatis suæ decimo quarto, Christum Dominum in suo castissimo utero concepisse; nec enim admitti debet nova *Caietani* sententia,

tia, afferentis in cap. 1. Lucæ: Beatam Virginem, dum concepit & peperit Christum, fuisse novemdecim, aut viginti quatuor annorum.

Extat etiamnum, ad solatium & pietatem fidelium, sacra Deiparæ Virginis ædícula, in qua filium Dei de Spiritu Sancto concepit, & quam, habitatione multorum annorum, Jesus, Deipara, & Josephus consecrarunt. Memorix siquidem prodiderunt Historici probatissimæ fidei, hanc sacram ædiculam, è Galilæa Syriæque in Dalmatiam primum, & mox è Dalmatia in Picenum miraculo delatam, in Recinetenfis agri sylva, piæ Matronæ, cui Lauretanæ nomen, propriâ, consedissee; & inde ortam esse appellationem Lauretanæ domus B. Virginis, quam & in ipso Piceno ter sedem infra annum, iterato divinitus miraculo, Angelicâ ope mutasse, iidem testantur Historici. Rem, omnium litteris & constanti famâ comprobata, Summorum Pontificum decretis confirmatam, confluentium populorum numero longè latèque celebratam, sanctitate loci, & frequentia miraculorum luce clariùs manifestatam, hic contra, quosdam nimium morosos & Criticæ intemperantioris viros fusiùs demonstrare supervacaneum omnino esse arbitror; maximè cum hac Provinciâ egregiè jam defuncti sint viri doctissimi, *Moratinus Turfelinus*, Scriptor elegans Historiæ Lauretanæ, *Petrus Canisius* lib. 5. de *Virgine Deipara* cap. 25. *Baronius* & *Spondanus* in *Annalibus Eccles.* quos Lector adire potest, si plura scire aveat.

Ad recolendum Conceptionis Christi, seu Incarnationis Verbi divini Mysterium, Christiani impræsentiarum recitare solent Salutationem Angelicam, cuius prima pars, quæ Angeli est, & quæ incipit: *Ave Maria gratia plena, Dominus tecum &c.* in Horis, seu precibus Canonicis, non fuit in usu ante Sæculum XI. ut probat doctissimus *Mabillonius* Præfatione in Acta quinti Sæculi Benedictini, ex omnibus Statutis, quæ ad fidei, morumque institutionem ad illud usque sæculum edita sunt. In his siquidem Statutis sola Oratio Dominica, & Simbolum Apostolorum proponuntur absque Salutatione Angelica. Et, ne quis putet Salutationem Angelicam, quæ Orationi Dominicæ adungi solet, ipsius Orationis Dominicæ nomine latè sumpto significari, profert hic Cl. Auctor librum precum *Hemma*, Regina, Lotharii Francorum Regis, conjugis, in Bibliotheca Hemmiana aservatum, in quo Oratio Dominica & Simbolum integra, citra Salutationem Angelicam sunt descripta. Eadem etiam Salutatio Angelica Fratribus laicis & illiteratis non præscribitur in Statutis Guigonis; sed neque in Regulis Templariorum, Carmelitarum, & Minorum, nec in Testamento S. Francisci, nec in Ritibus Humiliatorum, teste *Ioanne à Vitriaco*, immò, nec habetur in Breviario Ordinis Fratrum Prædicatorum ad preces Canonicas. Cum igitur Orationi Dominicæ non semper fuerit adiuncta Salutatio Angelica, dici non potest, Orationis Dominicæ nomine latè sumpto importari etiam Salutationem Angelicam. Addit etiam doctissimus *Mabillonius*, quòd, licet circa

XI. Sæculum prima pars Salutationis Angelicæ in vulgari fidelium usu esse cæperit, altera tamen pars, quæ incipit his verbis : *Sancta Maria, Mater Dei &c.* fuit tantum post XV. Sæculum, instar appendicis, addita, quia, ante Breviarium jussu B. Pii V. Summi Pontificis reformatum, in solo Breviario Cardinalis S. Crucis occurrebat. Non caret tamen probabilitate sententia aliorum, qui Angelicæ Salutationis posterioris partis : *Sancta Maria, Mater Dei, ora pro nobis peccatoribus*, originem & usum altius repeti debere autumant. Cæterum, hæc integra Salutatio Angelica, quam mox devotè omnes in Ecclesia Catholica recitant fideles, solis hæreticis, iuratis pietatis hostibus, displicet, quamvis nihil omnino sit, quod tantillum carpere aut vellicare possint in hac Salutatione Angelica, in qua dumtaxat voces Angelicas repetimus, verba, quæ Elisabeth, Spiritu Sancto repleta, protulit, usurpamus; *Iesum*, Servatorem nostrum, & ventris Mariæ fructum, collaudamus, Verbi divini Incarnationis Mysterium in mentem nostram revocamus, ac denique Mariam Patronam & Advocatam adhibemus, sive eius auxilium & interventionem nunc & in hora mortis postulamus.

DILUUNTUR OBJECTIONES.

A Reguitur primò : Christus non est conceptus operatione Spiritus Sancti; ergo conceptio Christi non est supernaturalis & miraculosa. Prob. antec. Si Christus fuisset operatione Spiritus Sancti conceptus, deberet dici filius Spiritus Sancti, sicut dicitur filius Mariæ. Immo potiori iure esset filius Spiritus Sancti, qui fuisset conceptionis ejus principium activum, quam esset filius Mariæ, quæ solum materiam subministravit; atqui Christus non est filius Spiritus Sancti, alioquin non esset ex semine Adæ, nec filius Davidis, & Abraham; ergo Christus non est conceptus operatione Spiritus Sancti.

Respondeo cum S. Thoma 3. p. qu. 32. art. 3. ad 1. Christum conceptum esse ex Maria virgine, materiam ministrante, in similitudinem naturæ, seu speciei, & ideo dici filium ejus; Christum autem, quæ homo est, fuisse quidem conceptum de Spiritu Sancto, sicut de activo principio, non tamen secundum similitudinem speciei, & ideo Christum non dici filium Spiritus Sancti. Hæc autem S. Thomæ ratio probat, Christum Dominum, etsi conceptum Spiritus Sancti operatione, ipsius tamen filium, sive perfectæ, sive imperfectæ sumatur filiatione, esse non posse. Primò, Christus nequit esse filius Spiritus Sancti, filiatione perfectâ; quia non procedit à Spiritu Sancto in similitudinem naturæ humanæ, quam in sua conceptione assumpsit; in qua tamen similitudine, ut docent omnes Theologi, sistit perfectæ filiatione, utpotè orta ex generatione, quæ est origo viventis à vivente in similitudinem naturæ. Secundò : Christus esse non potest filius Spiritus Sancti filiatione imperfectâ, quæ con-

consequitur gratiam sanctificantem; quia hæc filiatio imperfecta efficit dumtaxat homines filios Dei adoptivos, ratione videlicet similitudinis imperfectæ, quam beneficio gratiæ sanctificantis habent cum Deo; Christus autem, sicut omnes profitentur Catholici, non adoptione, sed naturâ fuit filius Dei, idque definitum est in Concilio Francofordienti contra duos Episcopos, Felicem, Urgelitanum & Elipandum, Toletanum.

Aliam rationem adducit *Paschasius*, S. R. E. Diaconus, lib. 1. de *Spiritu Sancto* cap. 2. cur Christus non sit filius Spiritus Sancti, licet ipsius operatione conceptus? *Quia*, inquit, *homo assumptus ex Maria, operatio Spiritus Sancti fuit, non portio; nec ab eo genitus, sed creatus; conceptus est potentia, non substantia; operatione, non participatione; virtute, non genere.* Nascitur itaque Christus de Spiritu Sancto, & de Maria virgine, nec tamen est filius Spiritus Sancti, sed Mariæ virginis; quia suam illi confert Spiritus Sanctus potentiam, non substantiam; Maria utrumque: confert illi Spiritus Sanctus operationem suam, non genus; Maria utrumque: nascitur de Spiritu Sancto per gratiam, nascitur de Maria generante per naturam. Legi potest *Enchiridion* S. Augustini cap. 39. & 40. ubi S. Doctor hanc quæstionem: Cur Christus operatione licet Spiritus Sancti conceptus, illius tamen filius non sit? solide tractat, eamque multis exemplis dilucidè explanat.

Arguitur secundò: Si conceptio Christi fuisset miraculosa & supernaturalis, corpus ipsius, quod operatione Spiritus Sancti in castissimo Virginis utero supponitur formatum, debuisset esse venustum, elegans, omnibusque suis numeris absolutum, sicut sentiunt Theologi de corpore Adami, quod fuit à Deo immediatè productum, atqui ex Scriptura Sacra, & ex Sanctis Patribus constat, Corpus, quod habuit Christus, non fuisse venustum, sed potius deforme & indecorum. *Isaias* namque cap. 43. de Christo dicit, quod non est ei species neque decor. Sancti Patres *Clemens Alexandrinus* lib. 6. *Stromatum*, *Origenes* lib. 6. contra *Celsum*, *Tertullianus* lib. de carne Christi, & lib. 3. contra *Marcionem*, alique nonnulli asserunt, Corpus Christi fuisse indecoræ & iliberalis formæ. Corpus igitur Christi non fuit Spiritus Sancti operatione formatum, ac subindè eius conceptio non est supernaturalis & miraculosa.

Respondeo: Corpus, quod Verbum divinum assumpsit, quodque in mundissimo B. Virginis alvo miraculosè Spiritus Sancti operatione compactum est, summam quidem pulchritudinem non habuisse, deforme tamen & indecorum nullatenus fuisse. Primò namque non decebat, ut corpus, quod Verbum divinum assumpsit, esset elegans ac venustum, tum quia non expediebat, ut Verbum divinum, quod in incarnatione se sex inaniivit, formam servi accipiens, corporis pulchritudinem, quam despectui habere debemus, assumeret; tum quia etiam, si Christi corpus fuisset elegans ac venustum, homines plus æquò sensibus additi, ni-

miùm

miùm fortassis tribuissent gratiæ corporali, seu eximio Christi corporis, præstantiorisque vultus lenocinio, quàm gratiæ cœlesti, & occultæ divinitati. Propter has & alias huiusmodi rationes non congruebat, ut corpus Christi, operatione licèt Spiritus Sancti in Mariæ utero formatum, summam pulchritudinem ac venustatem haberet. Secundo, corpus, quod Verbum divinum assumpsit, non fuit deforme & indecorum; tum quia, nunquàm Iudæi corporis deformitatem Christo exprobrarunt, qui tamen livore & odio in ipsum perciti, eum à capite ad calcem, ut dicitur, observabant, & subobscuros parentes illi vitio vertebant, *hic est faber, & fabri filius*; tum quia etiam incredibile omninò videtur, ex omni divinitatis plenitudine, quæ in Christo corporaliter inhabitabat, ut ait Apostolus ad Coloss. cap. 2. nullum in eius corpus profluxisse radium, quo illud mediocri saltem formâ perfunderet. Quocirca, mihi præ cæteris arri-det sententia illorum Theologorum, qui Christo Domino nec illiberalem speciem, quâ homines offendere, aut à se repellere potuisset, nec summè venustam, sed mediocrem formam tribuunt. Undè quando *Isaias* cap. 43. de Christo ait: quòd non est ei species neque decor, hoc non est accipiendum de corporis Christi specie & formâ, sed de Christo, cùm in crucem ageretur, plagis, verberibus, à planta pedis ad verticem usque lacerato, & sputis propter nos deformato. Hinc *Hieronymus* in cap. 43. *Isaiæ*, *Despectus*, inquit erat Christus & ignobilis; quando pendebat in cruce, & factus est pro nobis maledictum. Vel, ut ait *S. Augustinus* Serm. 22. de verbis Apostoli, Pendebat ergo deformat in cruce, sed deformitas illius pulchritudo nostra erat. Similiter, quando ex adversò Vates Regius psalm. 44. Christum vocat, *Speciosum forma præ filiis hominum*; id de externa corporis Christi elegantia intelligi non debet, sed de interna potiùs illius pulchritudine, quæ innocentia, sanctimonia, iustitiâ, & divinâ omnium virtutum complexione sita est. *Speciosum forma Domini* appellat *Propheta*, inquit *S. Basilus* in eundem psalmum, cum aciem mentis pressius intendisset in eius divinitatem, non carnis pulchritudinem laudat. Sic etiam Vatem Regium interpretantur alii Sancti Patres, *S. Cyrillus Alexandrinus* in cap. 53. *Isaiæ*, *Theodoretus* in Psalmum 44. *S. Irenæus* lib. 4. adversus Hæreses cap. 66. *S. Isidorus Pelusiota* lib. 3. Epist. 130. *S. Augustinus* pluribus in locis, & præcipuè in Psalm. 118. *Cassiodorus* in Psalm. 44. quibus succinit *S. Thomas* in Psalm. 44. ubi ait: *Pulchritudinem Christus habuit, secundum quod competebat ad statum & reverentiam suæ conditionis. Non est ergò intelligendum, quòd Christus habuerit capillos flavos, vel fuerit rubeus, quia hoc non decuit eum. Et in cap. 53. Isaiæ hæc habet idem Angelicus Doctor: Christo non erat aspectus magnificus, secundum quod dicitur, quòd species Priami digna est Imperio. Dici etiam potest, Christum Dominum non semper, sed interdum quibusdam hominibus eximæ pulchritudinis virum se se videntum præbuisse, & suavissimis sermonum leporibus, atque stupendis, quæ*
ede-

edebat, miraculis quamdam adjunxisse oris venuſtatem, quæ tamen oris venuſtas, corporiſque elegantia erat tantummodò ad tempus, atque à nativa, & eà, quam præ ſe ferre ſolitus erat, diverſa. Ad hanc mediam ſententiam, quam ipſe probabiliorẽ eſſe autumo, benignà interpretatione ſlecti & adduci poſſunt ſupra laudati SS. Patres, *Clemens Alexandrinus, Origenes*, & *Tertullianus*, qui affirmare videntur, Chriſtum fuiſſe indecoræ & illiberalis formæ. Nam vel illi Patres corpori Chriſti formæ leporem, oris & vultus præſtantem elegantiam tantùm abjudicant, vel loquuntur de corpore Chriſti plagis & verberum iſtibus deformato, vel denique, comparant formam corporis Chriſti cum pulchritudine divinitatis ipſi hypſtaticè unitæ, quâ factà comparatione, jure merito dicunt, formam corporis Chriſti cum divinitate collatam deformem fuiſſe & indecoram. Legi poteſt ſuper hac re liber de forma Chriſti, editus à P. Vavaffore Soc. Jeſu.

Arguitur tertio: Conceptio, quæ eſt ex muliere, non eſt ſupernaturalis & miraculoſa, ſed planè naturalis, immò immunda, juxtà illud Job cap. 25. *Numquid poteſt apparere mundus natus de muliere?* Sed conceptio Chriſti fuit ex muliere; dicit enim Apoſtolus ad Galatas cap. 4. *Miſit filium ſuum factum ex muliere.* Ergo conceptio Chriſti non fuit miraculoſa & ſupernaturalis.

Reſpondeo cum S. *Thoma* 3. p. q. 33. art. 4. Conceptionem Chriſti, ſi conſideretur ex parte materiæ, quam Virgo Mater ſubminiſtravit, fuiſſe naturalem; ſed, ſi ſpectetur ex parte virtutis activæ, omninò ſupernaturalem & miraculoſam fuiſſe, utpotè novum atque admirabile Spiritus Sancti opus. Ex quo colligit *Angelicus Doct̃or*, Conceptionem Chriſti fuiſſe omnis immunditiæ expertem, quia immundities, quæ ſolitis hominum conceptionibus ineſſe ſolent, originem trahunt ex peccato, quatenus cum libidine quis concipitur ex commixtione maris & ſceminæ. Quæ quidem carnalis commixtio locum non habuit in conceptione Chriſti. *Omnis homo*, inquit *Origenes* Homil. 12. in Leviticum, in patre & matre pollutus eſt, ſolus verò Jeſus Dominus meus in hac generatione mundus ingreſſus eſt, in matre non eſt pollutus. Ipſe enim erat, qui dudum per Salomonem dixerat: magis autem cum eſſem bonus, veni ad corpus incoſtaminatum. Non eſt ergo contaminatus in matre. Sed ne in patre quidem; nihil enim Joſeph in generatione ejus præter miniſterium præſtitit & affectum. Nec ſolùm Chriſtus in conceptione ſua impollutus omninò remanſit, ſed etiam matrem ſuam ſanctificavit, ejuſque pudicitiam auxit, ut docet S. *Auguſtinus* in libro contra quinque hæreſes cap. 5. Dicit Deus Creator hominis, filius hominis, quid eſt, quod te promovet in mea nativitate? Non ſum libidinis conceptus cupiditate: ego matrem, de qua naſcerer, feci, ſi Solis radius cloacarum ſordes ſiccare novit, quāto magis ſplendor Lucis æterna, quocumque radiaverit, mundare poteſt, & ipſe, pollui non poteſt. Idem repetit *Aquilinus* ille Doct̃or lib. de Fide & Sim-

bolo cap.4. Quando itaque Apostolus dicit : Christum factum esse ex muliere, per mulierem indicare voluit foemina non corruptam, sed virginem . Nam, ut inquit *Tertullianus* libro de velandis virginibus cap.5. *hujus vocabuli, scilicet mulieris, proprietas ad sexum ipsum, non ad gradum sexus pertinet* . Cur autem Christus carnem ex foemina suscepit, cum tamen alio pacto incarnari potuisset, si reverà voluisset ? Duplicem rationem afferunt Sancti Patres . Prima est : Ut nobilitaret totam naturam humanam; hinc *S. Augustinus* libro de Agone Christiano cap.11. *Nolite, inquit, vos ipsos contemnere viri, filius Dei virum suscepit. Nolite vos ipsas contemnere foeminae, filius Dei natus est ex foemina* . Alteram rationem tradit *S. Ambrosius* lib. de Incarnationis Dominicæ Sacramento cap.6. Quia, si Christus conceptus & natus haud fuisset ex foemina, occasionem inde facile arripuissent hæretici asserendi, ejus humanitatem non esse veram, sed phantasticam . At conceptus Christus ex foemina, seu corpus ex purissimis virginis sanguinibus formatum assumens, ostendit, se veram carnem corpusque humanum habere, cum illud omnium hominum corporibus commune sit, ut ex matris sanguine formentur, sicque in antecessum præfocavit Christum hæresim Gerdonianorum, Marcionitarum, Valentinianorum, Appellitarum, & Manichæorum, asserentium : Verbum divinum non veram, sed phantasticam & apparentem sumpsisse carnem, vel eam è cælo detulisse; nec ipsum ex Maria fuisse genitum, sed in opinione dumtaxat apparuisse, atque virgineo utero tanquam canali usum esse . Legatur Epistola *S. Augustini* 137. aliàs 3. ad Volusianum, in qua *S. Doctor* hanc & alias hujusmodi difficultates sibi à Volusiano propositas, & ineffabile Incarnationis Mysterium spectantes, luculenter exponit .

Arguitur quartò : Maria fuit mater Christi Domini, atqui matres in conceptione filiorum concurrunt activè per effusionem seminis, ut post Galenum & Avicennam docent celeberrimi recentiores Medici, Ergo Maria activè concutrit in conceptione Christi Domini, ac subindè conceptio Christi non fuit miraculosa & supernaturalis, etiam ex parte virtutis activæ .

Respondeo : Huic quorundam Medicorum opinioni, præferendam esse sententiam *S. Thomæ*, & aliorum Theologorum, qui docent, Mulieres in generatione non concurrere activè, sed solum passivè, subministrando videlicet materiam, hoc est, sanguinem ad prolis formationem necessarium. Hæc siquidem *S. Thomæ* sententia, magis consentanea est doctrinæ omnium Sanctorum Patrum, qui totam efficaciam, seu virtutem activam conceptionis Christi, soli Spiritui Sancto tribuunt, ita ut Maria activè per seminis emissionem non fuerit operata. Sanè, ægrè audiunt castæ aures, vixque salvo pudore dici potest, Beatam Virginem in conceptione Christi activè concurrisse, & semen, instar aliarum mulierum, emisisse . Nam, si Maria in conceptione Christi semen emisit, sequitur

tur primò, eam passam esse delectationem veneream, quod cum illibatà ejus virginitate cohzrere nequit. Secundò sequitur, Christum fuisse in Adamo secundum feminalem rationem, & non tantum secundum corporulentam substantiam; quia eatenus alii homines secundum feminalem rationem in Adamo esse dicuntur, quatenus ab Adamo per virtutem activam viri propagantur, si ergò ponatur activum semen in Beata Virgine quoad generationem Christi, planum erit, Christum, quà homo est, & quoad ipsam naturam humanam, fuisse in Adamo, secundum feminalem rationem, quod tamen tam falsum est, quàm quod maximè, sicut bene multis, iisque invictis rationibus demonstrat S. Thomas 3. part. qu. 31. art. 6. 7. & 8. dicendum igitur est cum Angelico Præceptore, nullam in Beata Virgine factam esse resolutionem seminis, propter integerrimam ejus virginitatem, ac subindè Mariam in conceptione Christi activè non fuisse operatam, eam tamen Christi Domini Matrem fuisse, quatenus submisit materiam, seu purissimum sanguinem, ex quo Spiritus Sanctus corpus Christi in ejus utero, ad prolis conceptionem à natura destinato, formavit, non verò in illius pectore, seu corde, sicut perperàm visum est cuidam Doctóri Italo, qui, nescio cujus fanaticæ mulieris somniis, & præstigiis delusus, Bononiæ inter concionandum dixit, Mariam concepisse Christum ex tribus guttis purissimi sanguinis in pectore, seu in corde suo, quæ malè nata, ac temerè in vulgus sparsa sententia fuit Romæ, teste nostro Cardinali Cajetano, qui tùm præsens aderat, confixa & natalitiis tenebris damnata. Pulchrum etiam contra hoc delirium, novumque commentum *Baptista Mantuanus* edidit opusculum.

Brevitè dicam, hoc Systema, hætenus inauditum, apertè Scripturæ Sacræ & experientię adversari, Scripturæ quidè Sacræ, quæ quotiès Christi Conceptionem memorat, totiès in utero Virginis Mariæ factam contestatur. Matthæi cap. 1. v. 18. *Inventa est in utero habens de Spiritu Sancto*. V. 23. *Ecce Virgo in utero habebit*. Lucæ cap. 1. v. 31. *Ecce concipies in utero, & paries Filium*. Vers. 41. *Benedictus fructus Ventris tui*. Lucæ cap. 2. v. 21. *Prinsequam in utero conciperetur*, & Lucæ cap. 11. vers. 27. *Beatus venter, qui te portavit*. Repugnat itidè experientiæ hoc novum systema, quia nullus locus, præter mulieris uterum, ad factum formandum fovendumque à natura est destinatus. Nec enim mulier, quæ juxtà cor aut stomachum intumesceret, reverà prægnans, aut gestans puerum diceretur, sed potiùs ea intumescencia contracto morbo à Medicis jure optimo adscriberetur. At, Virgo Maria per plures menses externa patentiaque graviditatis signa prodidit, fuitque verè Mater Christi Domini, sicut mox ex constanti Sanctorum Patrum traditione ostendam; debuit ergò Virgo Maria Jesum Christum, qui verus homo, verique hominis Filius fieri voluit, concipere in utero, qui locus est ad formandum factum à natura destinatus, & in quo cæteræ matres fetus concipere ac formare solent. Legitur quidè apud aliquos Sanctos Pa-

tres, quòd *Virgo Maria Christum corde conceperit*, & quòd *Dei Verbum ad Virginem Mariam per aurem illapsum fuerit*. Verùm, istæ Patrum locutiones non propriæ sunt, sed figuratæ, quibus id unum significatur, Mariam Virginem non solùm carne, seu in utero, concepissee Christum Dominum, sed etiam Fide & Spiritu illum concepissee in corde, vocemque Angelicam, Virginis aure perceptam, cui & ipsa Virgo fidem actutùm præbuit, primum instrumentum, seu organum fuisse, quo illa ad Christum utero concipiendum adducta fuit, ita ut hæc auris organo excepta Angelica vox fuerit fecunditatis Virginis Mariæ Nuncia & Administra.

Ex hac responsione facilè Lector colligere potest, Beatam Virginem non solùm veram esse & naturalem Matrem Christi, in quantum ex purissimis ejus sanguinibus corpus Christi in illius utero Spiritus Sancti operatione fuit formatum, sed eam verè Dei Genitricem esse, non quòd sit Mater divinitatis, sed quia personæ habentis divinitatem, & humanitatem, est mater, secundùm humanitatem. Hæc est Ecclesiæ Catholicæ doctrina, Sanctorum Patrum testimoniis, & Conciliorum generalium decretis contrà Nestorium firmata, atque roborata. Nam primò, Ignatius martyr in epistola ad Ephesios, Justinus in Dialogo cum Tryphone, Irenæus lib. 3. adversùs hæreses cap. 31. Dionysius Alexandrinus in epistola contra Paulum Samosatenum, Tertullianus in lib. de Carne Christi cap. 17. disertè profitentur: *filium Dei natum esse ex Maria, Verbum Divinum extitisse de Virgine*, id est, de illius substantia formatum, ex quo necessariò sequitur, Beatam Virginem esse Deiparam. Secundò, Athanasius Oratione 4. contra Arianos, Basilius homilia 25. de humana Christi generatione, Gregorius Nazianzenus epist. 1. ad Cledonium, & Cyrillus Alexandrinus in lib. de recta Fide ad Reginas, seu ad Pulcheriam, & Eudoxiam, cap. 6. Beatam Virginem appellant *Θεοτόκον*, seu Deiparam. Immo Joannes Antiochenus, qui Nestorii personæ impensius favebat, ultro fatetur in Epistola, quam scripsit ad Nestorium, quàm plurimos Ecclesiæ Doctores Mariam, Dei Genitricem nuncupasse, sic enim loquitur in prædicta epistola: *Etenim nomen Θεοτόκου nullus unquam Ecclesiasticorum Doctorum repudiavit, qui enim illo usi sunt, & multi reperiuntur, & apprimè celebres, & infra: Etenim, si id quod nominis significatione offertur, non recipimus, restat, ut in gravissimum errorem prolapsamur; immò verò, ut inexplicabilem unigeniti filii Dei æconomiam abnegemus, quando quidem, hoc nomine sublato, vel hujus nominis ratione repudiata, sequitur mox illum non esse Deum, qui admirabilem illam dispensationem nostræ salutis causa suscepit.* Hanc avitam Sanctorum Patrum doctrinam suis Decretis confirmant Concilia Generalia. Ephesium Canone 1. anathemate percellit eum, qui non *constitetur Deum esse secundùm veritatem Emmanuel, & propter hoc Dei Genitricem Sanctam Virginem*. Et Synodus quinta Œcumenica Canone 6. anathemate itidem ferit eum, qui *Sanctam Gloriosam semper Virginem Mariam non constitetur verè,*

verè, & propriè Dei Genitricem. Nec inde tamen inferri potest: Mariam genuisse divinitatem, aut Deam appellari debere, quemadmodum inscitè objectabat Nestorius. Nam Maria non ideò Dei Genitrix appellatur, ut inquit Sanctus Cyrillus in epist. ad Monachos, quòd genuerit divinitatem, sed quia hominem Deum genuit, non secus ac et si mulieres non nisi terrenorum sint corporum Matres, nihilominus, cum totum animal pepererint ex anima & corpore compositum, non solam, ejus partem peperisse dicuntur; nec aliquis, exempli causà, dixerit, Elisabetham, Matrem Joannis, carnis esse genitricem, non animam: peperit enim animatum Baptistam. Hujusmodi quidpiam actum esse fatebimur in Emmanuelis generatione. Quippè natum est ex Dei Patris substantia unigenitum ipsius Verbum, cum autem carnem suscepit Dei Filius, eamque propriam sibi fecit, ut filius hominis esset, & nostri similis foret; tunc minimè absurdum dictu, immò necessariò profitendum: illum ex muliere secundum carnem genitum esse, quemadmodum & hominis anima unà cum proprio corpore gignitur, & unum cum eo reputatur: tamen si naturà intelligatur, & sit ab eo diversa secundum propriam rationem. Maria ergo dicitur Dei genitrix, quia genuit Christi humanitatem, cui in momento Conceptionis divinitas fuit hypostaticè unita.

Arguitur ultimò: Christus non fuit in instanti Conceptionis suæ donatus plenitudine sapientiæ, nec copià virtutum ac donorum supernaturalium, ergo ejus Conceptio non fuit miraculosa & supernaturalis. Probatur antecedens, Lucæ cap. 2. legitur, quòd *Jesus proficiebat sapientia & atate coràm Deo, & hominibus*. Cum igitur Christus profecerit sapientià sicut & ætate, argumento est, eum in instanti Conceptionis suæ nec plenitudine sapientiæ, nec copià virtutum, ac donorum supernaturalium fuisse donatum.

Respondeo: hæc verba S. Lucæ eo in sensu accipi debere, quòd Christus proficiebat sapientià quoad actum, non quoad habitum, sicut exponit Sanctus Thomas 3. part. qu. 12. art. 2. Majora quippè Christus in dies edebat sapientiæ opera, non ut augmentum aliquod acciperet, inquit Sanctus Gregorius Nazianzenus Oratione 1. ad Cledonium, cum ab initio omni gratià, ac sapientià esset absolutus, sed quòd dotes, quibus ob unionem hypostaticam erat cumulatifsimè instructus, magis expromeret, dum ingenua, quæ pollebat, indoles, mores amabiles, sapiens, sibi que semper constans vivendi ratio, in agendo maturitas, in loquendo prudentia, eum in dies magis admirandum redderent, tum apud homines, quorum salutem consulebat, tum apud Deum, cujus gloriam virtute miraculorum illustrabat. Hinc Sanctus Lucas eodem in capite ait, quod *stupebant omnes, qui audiebant super prudentia & responsis ejus*. Profectus itaque ille non erat aliud, quàm manifestatio divinæ illius sapientiæ, & scientiæ, quæ, instar thesauri, erant in Christo absconditæ, & quas Christus in infantili ætate prodere non debebat, ne homines eum ultra

ultrâ ætatem sapere videntes, de illius humanitate dubitassent. Hac responsione falsi convincitur interpretatio *Erasmi*, qui in suis Annotationibus in cap. 2. *Lucæ*, ait: deitatem per gradus quosdam, dotes, quibus prædictus fuit Christus, impartitam esse naturæ humanæ assumptæ: ac subindè Christum, sicut profecit ætatis accessu, ita profecisse dotium incrementis.

Advertat primò in fine hujusce Dissertationis Lector, totam Sacram Triadem individuâ operatione concurrisse ad opus conceptionis Christi, juxtâ illud in Scholis consecratum Theologorum effatum, opera Dei ad extra sunt indivisa, & toti Trinitati communia. Cùm igitur opus Conceptionis Christi sit ad extra productum, toti Trinitati commune esse debet. Id etiam non obscure insinuare videtur *Sanctus Lucas* cap. 1. his verbis: *Spiritus Sanctus superveniet in te, & virtus Altissimi obumbrabit tibi*. Quæ verba sic interpretatur *Rufinus* in Expositione Symboli, vide, inquit; cooperantem sibi invicem Trinitatem, *Spiritus Sanctus* venire dicitur super Virginem, & virtus *Altissimi* obumbravit ei. Quid est virtus *Altissimi*, nisi ipse Christus, qui est Dei virtus, & sapientia. Cujus est virtus? *Altissimi*. Adest ergo *Altissimus*, adest & virtus *Altissimi*, adest & *Spiritus Sanctus*. Huic interpretationi favent multi SS. Patres, *Chrysostomus* homil. 49. in Genesim, *Gregor. Magn.* lib. 18. Moral. *Bernardus* hom. 4. super missus est, & *Sanctus Thomas* 3. par. qu. 32. art. 1. Non desunt tamen alii SS. Patres, & Scripturæ Sacræ Interpretes, qui, ut videre est in Præfatione Operibus Sancti Hilarii recentis editionis à PP. Benedictinis adornatæ præfixâ, per *Spiritum Sanctum* in Virginem supervenientem, intelligi volunt, vel omnipotentiam Patris, vel filium Dei, seu Verbum Divinum. Verùm, etsi hujusmodi interpretationes cum analogia Fidei non pugnent, meliùs tamen, per *Spiritum Sanctum* in Virginem supervenientem, intelligitur tertia persona Sanctissimæ Trinitatis, quæ *Spiritus Sancti* nomine in sacris Litteris signatur, & per virtutem *Altissimi* rectiùs pariter intelligitur filius Dei, qui per unionem hypostaticam obumbravit Mariæ, & ex illa carnem, & membra humana assumens, sibi naturam humanam intimè adunavit, atque indivisibili nexu sociavit. Cœterùm, quamvis omnia, quæ de rebus creatis extra se agit Deus, tribus personis ex æquo sine communia, neque unam magis, quàm aliam, aut unam sine alia agere fides doceat, interdùm tamen sacræ Litteræ earum operationum, quæ personis omnibus communes sunt, aliam alteri personæ adjudicare solent, sicut creationem Patri, Redemptionem filio, sanctificationem Spiritui Sancto, non secus ac Patri potentiam, filio sapientiam, Spiritui Sancto amorem. Quamobrem, opus Conceptionis Christi, etsi toti Trinitati commune sit, nihilofecius Spiritui Sancto speciatim aseritur propter tres rationes, quas affert *Sanctus Thomas*, & quas hic compendiosè proponam. Primò, quia in Conceptione Christi immensus Dei erga homines pro-

fun-

funditur amor, sic Deus dilexit mundum, ut filium suum unigenitum daret, Joannis cap. 3. Porro, Spiritui Sancto maxime tribuitur amor, quippe qui à Patre Filioque procedit, & est terminus eorum voluntatis. Secundo, quia Conceptio Christi facta est ex nullis præcedentibus meritis, sed ex sola gratia, ex pura, & gratuita Dei voluntate, sicut compluribus in locis inculcat Sanctus Augustinus; at Spiritus Sanctus est fons uberri- mus ex quo omnes gratiæ scaturiunt, juxta illud 1. ad Cor. cap. 12. *divi- siones gratiarum sunt, idem autem Spiritus*. Tertiò denique: quia Christi Conceptio fuit Sancta, & Immaculata, non enim, inquit Sanctus Augusti- nus Tractatu 4. in Joannem, *conceptus est Christus in iniquitate, quia non de mortalitate Conceptus est, nec eum in peccatis mater eius in utero aluit, quem virgo peperit, quia fide concepit, fide suscepit*: Sanctificatio autem tribuitur Spiritui Sancto, qui cap. 1. Epist. ad Rom. appellatur *Spi- ritus Sanctificationis*. Ex his D. Thomæ rationibus liquet, opus Con- ceptionis Christi, toti licet Sacræ Triadi commune, peculiari tamen ra- tione Spiritui Sancto esse asserendum.

Advertat secundo Lector, Mariam Virginem, postquam salutatio- nem Anglicam exceperat, Deumque & hominem suo in castissimo ute- ro concepisset, peregrinationem in montanam Iudææ Regionem susce- pisse, ut cognatam suam Elisabetham, in senectute divinitus gravidam, officiosâ salutatione conveniret: *Ubi hoc audiuit Maria* (inquit S. Am- brosius lib. 2. in Lucam) *non quasi incredula de Oraculo, nec quasi incer- ta de Nuncio, nec quasi dubitans de exemplo, sibi ab Angelo dato sterilis Elisabethæ, sextum jam graviditatis mensem agentis, sed quasi lata pro voto, religiosa pro officio, festina præ gaudio, in montana perrexit*. Huic itineri Mariam non quidem solam & absque comite se dedisse certum est, sed quem itineris comitem habuerit, an Josephum, maritum suum? An prudentem aliquam Matronam? Non liquet. Narrat dumtaxat Scri- ptura Sacra, Mariam Virginem, quoniam ex Angeli sermone didice- rat, Elisabetham, consobrinam suam, sextum jam mensem esse gravidam, relictis ædibus suis, profectam esse in montana, magnâque celeritate pervenisse in Civitatem Iudæ, ubi habitabat Zacharias, Pater Joannis Baptistæ. Domum Zachariæ ingressa Maria, quæ fontem omnium Dono- rum cælestium secum ferebat in utero, suique fatus afflatu jam tota spirabat Deum, salutem & gratulationem obtulit cognatæ suæ Elisa- bethæ, ex qua gratulatione factum est, ut statim ac Virginis salutatio teti- git aures Elisabethæ, Infans, quem anus gestabat in utero, gaudio ge- stiens exillierit. In hoc latentis in utero materno Joannis Baptistæ gau- dio, duo miracula Scripturæ Sacræ Interpretes agnoscunt. Primum est, quòd iste Joannis Baptistæ in utero materno subfultus non à natura pro- dierit (quasi ex Matris gaudio motus exillientis pueruli obortus fuerit, sicut impiè effutiant quidam Novatores) sed ex peculiari Spiritus Sancti motu atque impulsu contigerit, nec corporis tantum motus extiterit, sed & ani-

& animi *Ioannis Baptista*, qui repletus Spiritu Sancto ad repentinum Iesu Christi, in utero Virgineo conclusi, adventum exultavit, velut occurrere gestiens Domino suo, ac debitum honoris exhibere officium. Porro, tantum abest, ut pueri *Ioannis Baptista* exilientis motus ex Matris gaudio naturaliter processerit, sicut comminiscuntur Novatores, ut potius ex ipso parvuli *Ioannis Baptiste* exilientis motu enatum sit Matris gaudium: *Exultavit Infans, & repleta est Mater. Non prius repleta Mater, quam filius; sed cum filius repletus esset Spiritu Sancto, replevit & Matrem*, inquit S. *Ambrosius* lib. 3. in *Lucam*. Alterum, quod in hac *Ioannis Baptiste*, in Matris utero adhuc delitescens, exultatione miraculum, observant Sacri Interpretes, in hoc positum est, quod in *Ioanne Baptista* Infantulo acceleratum fuerit donum rationis, seu præproperus ei concessus fuerit usus rationis divinæ luce illustratæ, cuius beneficio Verbum Dei carne vestitum agnovit, & supplex veneratus est, gestiens quodammodo prius illud nunciare, quam nasci. In hoc consentiunt omnes Sancti Patres, quorum aliqui datum *Ioanni Baptista* jam tunc Propheticum lumen affirmant, quod certè nemini, nisi ratione pollenti, concedi potest. Ceterum, an ille inditus tunc *Ioanni Baptista* rationis usus fuerit dumtaxat momentaneus ac transitorius? an usque ad ipsius nativitatem, & deinceps sit continuatus? non convenit inter Scripturæ Sacræ Interpretes. Ipse verò cum S. *Ambrosio* probabilius existimo, usum rationis fuisse in puerulo *Ioanne Baptista* continuatum; eumque primo Virginis Mariæ aditu sanctificatum, virtute deinceps etiam in utero Matris profecisse. Sic enim loco mox à me laudato scribit Sanctus ille Doctor: *Non sola familiaritatis est causa, quod apud Elisabetham Maria diu manserit, sed etiam tanti viri profectus. Nam si primo ingressu tantus profectus extitit, ut ad salutationem Mariæ exultaret Infans in utero, repletur Spiritu Sancto Mater Infantis, quantum putamus usu tanti temporis Sanctæ Mariæ addidisse præsentiam? Non potuisset autem Ioannes Baptista per trium ferme illorum mensium spatium, quo Maria Virgo in ædibus Elisabethæ permanisset, virtute & meritis proficere, nisi rationis usu fuisset donatus. Hunc Marianæ salutationis fructum derivatum in Ioannem Baptistam, alius protinus sequutus est, qui in eius Matrem Elisabetham, promanavit, effusus nimirum in eam Spiritus Sanctus, eique concessum Propheticum lumen, quo Deum in utero Virginis factum hominem, agnovit, & magnâ voce, quam ingens suppedibat affectus, exclamavit, in hæc verba prorumpens: *Benedicta tu inter mulieres, & benedictus fructus Ventris tui. Et undè hoc mihi, ut veniat Mater Domini ad me? Ecce enim, ut facta est vox salutationis in auribus meis, exultavit gaudio Infans in utero meo. Et Beata, quæ credidisti, quoniam perficientur ea, quæ dicta sunt tibi à Domino. Quasi diceret Elisabetha, ô felix virgo, tu primam laudem obtinebis inter omnes laudatas mulieres, & cuius utero proditurus est flos ille mirabilis, qui gentium omnium voce prædica-**

dicabitur per uniuersum Orbem, & de quojam olim vaticinati sunt Prophetæ. Sed quonam meo merito tanta felicitas mihi contigit, ut Mater Domini mei ultrò veniat ad me? Argumento siquidem indubitato sensi Domini mei adventum. Ecce enim, simul ac vox salutationis tuæ personuit aures meas, sensi Infātem subsultantem in utero meo. Hoc certè nomine felix es, quòd Angeli promissis assensum, absque ullā vel minimā animi hēstitatione, præbuisi. Concepisti citra virilem operam, nec dubium est, quin eādem fide sint tibi præstanda cætera, quæ Domini nomine pollicitus est Angelus.

Hæc cū afflatu Prophetico dicta essent ab Elisabetha, protinùs Maria, quæ hætenùs virginali pudore texerat animi sui gaudia, Spiritu Sancto correpta, quo jamdudū erat plena, gratulabundum illud cælestis sapientiæ, Mysteriorumque plenissimum, cecinit Canticum: *Magnificat anima mea Dominum &c.* In quo Cantico non linguā tantū, sed ex intimis præcordiis exultavit Maria gaudio ineffabili, non in se sē, sed in Deo, qui cunctis totius salutis est auctor, & cui uni tam singulare, & à Sæculis inauditum beneficium retulit acceptum, dicens: *Et exultavit spiritus meus in Deo salutari meo: Quia fecit mihi magna qui potens est &c.* Infinita Mysteria, quæ magnā verborum simplicitate supra terrenarum mentium capacitatem in isto cælesti Cantico proloquuta est Maria Virgo, Interpretibus Scripturæ Sacræ, ne longior sim, explananda relinquo. Addiderim dumtaxat, Mariam Virginem commorata esse apud cognatam suam Elisabetham sērmē tribus mensibus, ut eam sanctis colloquiis, & amicis obsequiis sublevaret: *Mansit autem Maria cum illa mensibus quasi tribus & reversa est in domum suam* Lucæ cap. I. vers. 56. Cæterū, an B. Virgo Maria domum suam, idest, Nazarenos lares, repetierit ante partum Elisabethæ? vel an ejus partui interfuerit? Nihil certi super hac quæstione tum ex Scriptura Sacra, quæ, interiectā particulā quasi, rem dubiam facit, tūm ex Sanctis Patribus, qui in varias sciunduntur opiniones, statui potest. Magis tamen, ut candidè fatear, propendeo in sententiam illorum Scripturæ Sacræ Interpretum, qui asserunt, Mariam Virginem, sub instantem cognatæ suæ Elisabethæ partum, suam repetiisse domum, tum quia non conveniebat Virgini obstetricandi officium, à pudore, & verecundia Virginis omnino alienum: Tum etiā, quia Maria mox affixuram turbam, quæ cognitionis, vel amicitiz titulo ad Elisabetham, à partu decumbentem, ventura erat, prudenter fugere ac declinare voluit.

H Y M N U S

*De Incarnatione Christi, seu Annun-
tiatione Dominica.*

HÆc illa solemnis dies,
Dies salutis nuntia,
Quæ missa cælo, tristibus
Venere terris gaudia.

Unius omnes crimine,
Casu gravi lapsi sumus
Ut ipse lapsos erigat,
Descendit in terras Deus.

Qui, Patris æterno sinu,
Æterna proles nascitur,
Obnoxius fit temporis,
Sinum non horret Virginis.

Mortale corpus induit,
Orbi piando victimam;
Ut innocenti sanguine,
Scelus nocentum diluat.

Qui cuncta complet numine,
Nostros se in artus colligit:
Ut nos reducat ad Deum,
Est ipse nobiscum Deus.

Cælestis ales nuntiat
Implenda mox Mysteria:
Virtute fecunda Deus
Illapsus implet Virginem.

Qualis stupendo gloria
Te, Virgo, de partu manet!
Conceptus in tuo sinu
Natus Deo, nunc est tuus.

De virginali sanguine,
Quem nulla labe inficit,
Fingente Sancto Spiritu,
Christi caro compingitur.

Nobis per hanc mortalibus
Lactescit esca Cælitum:
Nos pascit infantes homo,
Qui pascit Angelos Deus.

Pulsum supernis sedibus,
Umbris tot annos oblitum,
Cælestis ignarum viæ,
Errabat humanum genus.

Supremus ergo Cælitum
Rex monstrat ad cælum viam,
Secumque ducat exules,
Se spontè fecit exulem.

Se deviis præbet ducem,
Vires dat ambulantiis,
Est ipse, quæ ducit, via,
Quò ducit, ipse terminus.

Deus suprema veritas,
Umbrata velo corporis,
Puris videnda mentibus
Lustra tuo nos lumine.

Et tu, tuorum sis memor,
Quæ dum modesto pectore
Te dicis ancillam Dei,
Regina mundi diceris.

*De Incarnatione Christi seu Annun-
tiatione Dominica, Prosa, quæ in
quibusdam Ecclesiis inter
Missarum solemnias
canitur.*

Quod sine tempore
De Patre nascitur
Mortali corpore
Verbum induitur,
Ut salvet hominem.

Humani generis
Cessent suspiria;
Beata miseris
Affert hic nuntia
Dies mortalibus.

Corpus hoc offeret
In Sacrificium;
Servos ut liberet,
Totum in pretium
Effundet sanguinem.

Unius scelere
Cuncti cecidimus;
Lapsos erigere
Venit Altissimus
De Cæli sedibus.

Errabam devius
Exul à Patria,
Semitæ nescius
Ad vera gaudia,
Per quam regrediar.

Delectæ Virgini
Quæ Deum pariat,
Angelus Domini
Salutis nunciat
Nostræ Mysterium.

In mea Dominus
Venit exilia,
Vixque terminus
Ipse sit, & via:
Tutus hæc gradiar.

O beatissima
Præ mulieribus,
Virgo castissima,
Deum visceribus
Suscipe filium.

O veritas latens
Sub velo corporis,
Sed oculis patens
Mundati pectoris,
Tu nos illumina.

Virtute Spiritûs
In sinu Virginis,
Innocens penitens
A labe criminis
Caro compingitur.

Et tu pro miseris
Supplica Numini,
Quæ te dum asseris
Ancillam Domini,
Fis Mundi Domina.

Per hanc infantibus
Lactescet teneris
Ille, qui mentibus
Panis à Superis
In Cælis editur.

*In laudem B. Mariæ Virginis, quæ
postquam in castissimo suo utero
Iesum Christum, Deum & homi-
nem, solâ Spiritus Sancti opera-
tione concepiisset, Elisabetham, co-
gnatam suam, visitavit.*

Vatum patent Oracula,
Promissa priscis Patribus
En Virgo, quæ gravis Deo,
Nobis parem parit Deum.

Toto quid Orbe par fuit,
Virgo parens, homo Deus?
Quo nascitur partu Puer,
Hoc nascitur Mundi salus.

Ut nocte caligantibus
Cæleste lumen temperet,
Velo tegi vult corporis,
Hoc, Virgo, velum præparas.

Quod prima mater perdidit,
Mater reformat altera:
Mors ipsa nobis profuit,
Dum vita per te redditur.

Per te Deo conjungimur,
Cui corpus aptasti Parens:
Per te Dei nos filii,
Per te Dei fratres sumus.

Tu Dux Olympi prævia,
Clausas diù pandis fores:
Nos exules, si nos amas,
Reddas paternis sedibus.

Quis ore digno te canat
Virgo, Dei puerpera?
Adeste puri Spiritus,
Vestri sit illud muneris.

Quis intret augustissima
Mentis tuæ Sacraria,
Dotes quis enarrans tuas
Perterritus non hæreat?

Dic, Virgo, quæ vis traxerit
Patri corvum filium,
De Patris æterno sinu
Mortalis in matris sinum?

Ad hos honorum gradus
Non virginalis te pudor,
Non extulit tantum fides,
Nec igne fervens charitas.

Sed quæ sibi numquam placet
Deo placens modestia:
Quæ tu tibi sis vilior,
Hæc digna sis mater Dei.

Quam celsa! quæ se deprimens,
Altum Tonantem deprimit!
In te, sui jam non memor,
Descendit è cælo Deus.

Quò sanctus ardor te rapit,
O Virgo, flos ó Virginum?
Quò tendis, & cito gradu
Conscendis alta montium?

Urget sacer te Spiritus
Toto repletam numine:
Matris Dei jam dignitas,
Nil charitati detrahit.

Tibi propinquam sanguine
Matrem puella prævenis;
Concessa cui divinitus
Grataris alvi munera.

O quanta matrum gaudia?
Stupente naturâ gravem
Anum stupes, quæ Virginem
Plenam Deo te prædicat, Ab-

Abconditum sub intimo ,
 Ceu nube, portabas sinu
 Solem, suo qui protinus
 Lustrabit Orbem lumine.

Montes superbum verticem ,
 Quæ Virgo transit, subdite,
 Cui se libenter sternerent
 Vel ipsa Cæli sidera.

Ad prima verba Virginis,
 Intus movente Spiritu
 In Matris alvo conditus
 Infans Joannes gessit.

Occulta, quæ latet domi,
 Audet foras se prodere.
 Semper sibi timens pudor
 Se charitate protegit.

Agnovit infantem Deum;
 Quem sensit, ardet prodere;
 Vates & infans, quæ potest,
 Adesse Christum nuntiat.

It illa: non nequit moras:
 Fugit videri, nec minus
 Fugit videre, ne suo
 Quidquam pudori detrahat.

Hic jam Redemptoris vices,
 Præconis ille sustinet:
 Materna claustra non vetant,
 Quin ambo munus impleant.

Beata, quam pressit pede
 Tellus! beata semita!
 Colles beati, qui simul
 Cum matre sensitis Deum!

Felix puer, felix parens,
 Felix Sacerdos, & domus,
 Quæ per parentem Virginem
 Deo fruuntur hospite!

Beatiores hospites,
 Vos o quibus, cælestia,
 Loquente Matre Virgine,
 Audire verba contigit.

A L T E R H Y M N U S

*In laudem B. Mariæ Virginis, Cognatam suam
 Elisabetham Visitantis.*

Hunc diem festum veneremur omnes,
 Quo Deus nostrum miseratus ævum,
 Cum novis signis oriens ab alto
 Visitat Orbem.

Cesset humani generis querela
 Virginis claustrum subiit Redemptor;
 Girat & cælum recubans sub arcto
 Tegmine matris.

Ut suo felix utero Maria
 Sentit æternum sobolem recondi,
 Transilit montes gravidata digno
 Munere Virgo.

Vix

Vix in occurſu gravidam ſalutat
Cui prius durum ſterilem vocari;
Ipſe cùm clauſus genitricis alvo
Subſilit infans.

Parvulus miles Dominum ſalutat
Et ſuum complet Dominus clientem;
Phoſphorus tandem rutilat propinqui
Lumine Solis.

Quod Prophetarum chorus omnis olim
Quodque tot Reges cupiere, matris
Viſcerum clauſus latebris Joannes,
Percipit infans.

Qui paras talem Deus alme terris,
Ut tuo Chriſto præeat lucernam
Hunc chorum turmis precibus Mariæ
Junge ſupernis.



DISSERTATIO TERTIA

*De Stemmata, & de Origine Christi Domini, seu utrùm
Christus ex stirpe Abrahamæ, & Davidis Regis,
ac subinde ex Tribu Juda, ex qua proditurus
erat Messias, suum genus duxerit?*

Tot inter Fidei articulos, quos Christiana Religio fidelibus credendos proponit, non alius est, meâ quidem sententiâ, in quo oppugnando plus Ethnici, & Judæi infudarint, operæque posuerint, quàm in isto, de genere, seu origine Christi, Servatoris nostri, quem, hac in Dissertatione, pro meo modulo, dilucidandum aggredior. Enim vero, cùm Ethnici, & Judæi compertum, ac exploratum haberent, Messiam ex stirpe Davidica, & à Tribu Juda, juxta Prophetarum oracula, proditurum; in id præsertim incubuerunt, omnesque ingenii sui vires contulerunt, ut obscurarent genus, & originem Christi, quem, ob plusquàm adamantinam cordis duritiem, ac stupendam mentis cæcitate, verum Messiam agnoscere, atque profiteri detrectarunt. Primò, ex gentilibus emerfit *Celsus*, qui in genus Christi aperto Marte insurrexit, eumque ex Regio Davidis sanguine satum esse insulse negavit, quem *Origenes* perdoctè confutavit. Celsum secutus est *Porphyrus*, sicut testatur Sanctus Hieronymus, & *Porphyrii* vestigia pressit *Iulianus Apostata*, qui de industria varias conquisivit, ac congestit cavillationes, quibus Evangelistarum fidem elevare atque sollicitare posset. In hunc fidei transfugam, & Christianæ Religionis infensissimum hostem, calammum acuit Sanctus *Cyrillus*. Nec desuere etiam hæretici, qui genus Christi aggressi sunt; *Tatianus* quippè, teste *Theodoro* lib. 1. Fab. hæret. amputavit in Harmonia, quam edidit in quatuor Evangelia, genealogias, & alia, quæ ostendunt, Christum Dominum natum esse ex Davide secundum carnem. *Faustus* itidem Manichæus, ne fateri cogeretur, Christum ex Regio Davidis sanguine cretum, seu oriundum esse, ausus est asserere: Christi genealogiam, à *Matthæo* contextam, nec Evangelium esse, nec ad Evangelium pertinere, adeoque, salvâ Evangelii veritate, à se reiici posse. In hunc hæreticum multos libros conscripsit Sanctus *Augustinus*, sed illius errorem, circâ genealogiam Christi, potissimum confutavit in libris 2. 3. 7. & 23. quos edidit contra hunc hæreticum Manichæum. Ut igitur tot infrunitorum, malæque feriatorum hominum, calumniæ retundantur, & omnibus Scripturæ Sacræ oblatrantibus ora obturentur, probandum hac in Dissertatione suscipio, Christum Domi-

num

num verè ex stirpe Abraham, & Davidis Regis, atque è Tribu Juda oriundum esse, sicut Sancta, & Catholica credit Ecclesia.

DICO Igitur: Christum Dominum verè ortum esse ex stirpe, Abraham, & Davidis Regis, ac subindè ex Tribu Iuda, ex qua proditurus erat Messias, suum genus duxisse.

Hæc assertio inconcusse ex utroque stabilitur Testamento, in quo sæpius referuntur promissiones à Deo factæ Abraham, & Davidi de Messia ex eorum semine nascituro. Enim verò, postquam Deus præcepisset Abraham, ut de terra & cognatione sua egrederetur, pollicitus est ei, in præmium obedientiæ, Messiam, ex ipsius semine nasciturum, in quo benedicerent omnes gentes, *Genesis* cap. 12. dicit Dominus ad Abraham: *in te benedicetur universæ cognationes terræ. Et cap. 22. benedicentur in semine tuo omnes gentes.* Quæ verba sic exponit Apostolus ad *Galatas* cap. 3. *Abrahæ diffæ sunt promissiones, & semini ejus. Non dicit in feminibus, quasi in multis, sed quasi in uno, & semini tuo, qui est Christus.* Simili privilegio fuisse donatum Davidem Regem, patet Primò, ex *psalmo* 58. ubi Deus de Davide sermonem habens, hæc dicit: *Ponam in seculum seculi semen ejus. Semen ejus in æternum manebit.* Secundò, in multis historiæ Regum locis, Deus, sæpius licet ad iracundiam concitatus sceleribus posterorum Davidis, affirmat tamen: Se eos exterminare nolle, eo quòd, juxta verbum suum, servare vellet lucernam David, idque apertius declarat *Isaias* cap. 11. *Egredietur virga de radice Jesse, & flos de radice ejus ascendet. Quæ divini oraculi verba, R. Aben Ezra, R. Salomo, R. Kimchi, R. Arbabenel, R. Arama, quibus assentiuntur Lipmannus in Nizzachon, & plerique recentiores Hebræi, de Messia interpretantur. Denique, eandem veritatem sexcentis in locis inculcat Novum Testamentum, Lucæ cap. 3. Et ipse Iesus erat incipiens quasi annorum triginta; ut putabatur filius: Ioseph, qui fuit Heli qui fuit Iuda qui fuit Abraham. At Romanos cap. 10. Manifestum est enim, quòd ex Iuda ortus sit Dominus noster. Et, ut cætera id genus mitam testimonia, quæ Sacras Litteras legenti pallim obvia sunt, Matthæus cap. 1. sic suum auspiciatur Evangelium, Liber generationis Iesu Christi, filii David, filii Abraham &c. Porro, si Christus reverà non fuisset ortus ex stirpe Abraham, & Davidis Regis, Matthæus in Evangelii sui exordio sibi omnem omnino abrogasset fidem apud Judæos, in quorum gratiam suum conscripsit Evangelium. Judæi namque integras genealogias tam privatim, quàm publicè in Tabulariis Sacris, & in publicis Archivis maximà curâ, & religione asservabant, eorum præsertim, qui ex Tribu Levi, vel ex Tribu Iuda originem habebant; ex Tribu quidem Levi, ne Sacerdotium quiquam ab ea Tribu alienus temerario ausu invaderet, ut videre est apud Iosephum lib. 1. contrà Appionem; ex Tribu verò Iudæ, ob Messiam ex ea nasciturum. Et quia promissio generalis de prodituro Messia ex Tribu Iuda, postea restricta fuit ad domum, & familiam Davidis*

dis Regis , hac de causa Iudæi nihil tam curæ habebant , quàm ut singulari diligentia custodirent Tabulas genealogicas eorum , qui à Davide Rege suum genus ducebant , sicut testatur *Iulius Africanus* in Epistola ad *Aristidem* apud *Eusebium* lib. 1. Hist. Eccl. cap. 7. Si ergo Evangelistæ , *Matthæus* falsò alseruisset , Christum ex Abrahamo per Davidem fuisse propagatum , confestim reclamassent Iudæi , *Matthæo* acerrimè contradixissent , ipsum mendacii palàm insinulassent . Certum autem est , Iudæos nunquam reclamasse , nec ullam super hac re litem *Matthæo* movisse , quamvis Christum , & Evangelistas calumniandi impotenti libidine æstuant ; Silentium itaque Iudæorum , in re tanti momenti , liquidò probat , eos pro comperito habuisse , Christum Dominum prodiisse ex prosapia Abraham , & Davidis Regis .

Præter hæc momenta ex Sacris litteris petita , aliud , ad genus Christi stabiliendum , efficax suppetit argumentum , quod in hanc formam redigi potest : Christus natus est ex Maria Virgine , atqui Maria , Mater Christi , orta est ex stirpe Davidis Regis , ergò itidè Christus . Probatur minor , primò , quia *S. Lucas* cap. 2. ait : *Iosephum ascendisse à Galilea de Civitate Nazareth in Iudæam , in Civitatem David , quæ vocatur Bethleem , eò quòd esset de domo , & familia David , ut proficeretur cum Maria desponsata sibi uxore prægnante* . Ex quibus Sacri Evangelistæ verbis colligunt SS. Patres , *Ambrosius* , *Hieronymus* , & *Augustinus* , Mariam idè cum Iosepho venisse in Bethleem , Davidis gentilem Civitatem , ut juxtà Cæsaris Edictum nomen daret , quia ex Tribu Iuda , & stirpe Davidica unà cum castissimo suo Sponso erat oriunda . Et meritò quidem id ex verbis Evangelistæ colligunt Sancti Patres . Nam si Beata Virgo non fuisset orta ex stirpe , & familia Davidica , necesse haud fuisset , ut Ioseph Mariam jam sætam , immò cuius partus in procinctu erat , tanto itinere , fatigaret , eamque secum duceret in Civitatem Bethleem , in qua hi solùm , qui erant de domo , & familia David , profiteri debebant iuxtà Cæsaris Edictum . Secundò , Maria idè fuit nupta Iosepho quia , ut mox ex Sanctis Patribus evincam , proximo agnationis gradu erat Iosepho conjuncta , ita ut Maria , & Ioseph ex eadem Tribu , & familia essent ; atqui Iosephus , ut Sacri testantur Evangelistæ , ex Regio Davidis sanguine editus est , ergò Maria Virgo ex eadem quoque prosapia genus suum ducebat . Denique , ut solidè arguit *Sanctus Augustinus* lib. 23. contra Faustum Manichæum , Christus ad stirpem David , & Tribum Iuda pertinere haud poterat per Iosephum , ex cujus femine natus non est , sed tantùm per Mariam Virginem , in cuius utero carnem humanam assumpsit . Cum itaque Christus , sicut sæpiùs in utroque perhibetur fædere sacro , ortus sit ex stirpe Davidica , & è Tribu Iuda , necesse est ut credamus Mariam , ex qua Christus Dominus natus est , ad Davidis Regis consanguinitatem pertinuisse ; Consanguinitas quinpè cum Davide non potuit Christo communicari nisi per Mariam Virginem . *Quisquis itaque , inquit Sau-*

Etus Augustinus cap. 9. mox citati libri, dicit : Mariam ad consanguinitatem David non pertinuisse, manifestum est, quod istarum Scripturarum tam excellenti auctoritati obliuiscitur, ipse ergo convincat non eam pertinuisse ad semen David, & hoc ostendat non ex quibuscumque literis, sed Ecclesiasticis, Canonicis, & Catholicis. Quibus verbis Sanctus Doctor dispungit vanam, & frivolum Fausti Manichæi objectionem, asserentis : Mariam non fuisse ortam ex Tribu Juda, sed ex Tribu Levi, eò quòd in quibusdam Scripturis apocryphis, & fabulosis traditionibus legiset, Joachim, Patrem Mariæ Virginis, fuisse Sacerdotem, undè insulse inferebat, Iesum esse de genere Aaronidarum. Qui error ex summa sacrarum Historiarum ignoratione profluxit, perindè ac alius error qui habetur in Alcorano cap. 2. de familia Amrami, & cap. 1. lib. 3. cui titulus est de Maria, ubi asseritur Mariam Virginem, Iesu Christi Matrem, esse sororem Aaronis, & filiam Amrami; quod sanè putidum mendacium est. Nam Maria, Mater Christi, orta est tempore Zachariæ, quandò non erant Reges, nec in Juda, nec in Israel, sed iam sceptrum erat translatum ad Herodem, quem non fuisse genere Judæum, sed Idumæum, infra ostendemus. Maria autem, quæ fuit filia Amrami, & soror Moysis, & Aaronis, orta est tempore Pharaonis in Ægypto, & mortua est in Cades, ut legitur cap. 20. lib. Numerorum vers. 1. Cum igitur inter utramque Mariam multæ sæculorum myriades intercesserint, non potuit author Alcorani, nisi per summam, & plusquam supinam Sacrarum Scripturarum ignorantiam, promissè confundere Mariam, Matrem Christi, quæ ex stirpe David, & è Tribu Juda orta est, cum Maria, filia Amrami, & sorore Moysis, & Aaronis, quæ ex Tribu Levi originem traxit.

DILUUNTUR OBJECTIONES.

Arguitur primò: Christus Dominus ortus est è Tribu Levi, ergo nec ex Tribu Juda, nec ex Prosapia Davidica genus suum duxit. Prob. antec. Benè multi SS. Patres & antiqui Scriptores tradunt: Evangelistam Lucam texuisse Christi Domini genealogiam per lineam Sacerdotalem, seu per lineam *Nathanis*, qui fuit filius naturalis *Uriæ*, Sacerdotis, à Davide Rege, post initum cum *Bersabæa*, uxore *Uriæ*, matrimonium, adoptatus; ergo Christus, juxta genealogiam, quam edidit Lucas, ortus est è Tribu Levi, non ex Tribu Juda.

Respondeo: Maximà quidem cum veneratione excipiendam esse SS. Patrum, & antiquorum Scriptorum sententiam in iis, quæ ad fidem & morum regulam spectant, neminem tamen SS. Patrum, quando in unam & eandem sententiam non conspirant, in his præsertim, quæ ad historiam, & minuta, levique rerum genera pertinent, auctoritate ita constringi debere, ut ab ea interdum recedere non liceat, maxime, quando certò certius constat, sententias, quas tradiderunt, minus veritati

ti consonas esse. Porro, multis momentis evinci potest: sententiam illorum Patrum & antiquorum Scriptorum, qui docuerunt, Lucam texuisse genealogiam Christi per lineam Sacerdotalem, non esse veritati consentaneam. Primò, quia minimè constat, *Uriam*, virum *Bersabæ*, fuisse Sacerdotem, nec proinde *Nathanem*, quem illi antiqui putarunt esse *Uriæ* filium naturalem, ad lineam Sacerdotalem pertinuisse. Secundò, *Nathan* non fuit filius naturalis *Uriæ*, viri *Bersabæ*, sed potius *Davidis Regis*, ut claro adstruitur sermone lib. 1. Paralip. cap. 3. ubi sic referuntur generationes *Davidis Regis*: Porro, in *Ierusalem nati sunt ei filii Simmaa, & Sobab, & Nathan, & Salomon, quatuor de Bersabea, filia Ammiel*. Tertiò, *Iosephus* lib. 20. Antiq. Jud. cap. 18. in serie, quam edidit, Pontificum, nullius meminit eorum, quos *Lucas* recenset à *Nathane*, usque ad *Iosephum*, virum *Mariz*, quod quidem argumento est, neminem eorum fuisse Sacerdotem. Denique, si *S. Lucas* edidisset genealogiam Christi per lineam Sacerdotalem, ut visum est illis antiquis, Christus fuisset ortus ex Sacerdotibus, adeoque ex Tribu *Levi* suum genus duxisset, quod tamen erroris arguit *Apostolus* in *Epist.* ad *Hebræos* cap. 7. ubi hæc habet: Si ergo consummatio per Sacerdotem *Leviticum* erat, quid adhuc necessarium fuit secundum ordinem *Melchisedech* alium surgere Sacerdotem, & non secundum *Aaron* dici? manifestum est enim, quod ex *Iuda* ortus sit Dominus noster, in qua Tribu nihil de Sacerdotibus *Moyse* locutus est. Quamvis ergo nonnulli SS. Patres & antiqui Scriptores existimaverint, Lucam Christi Dominum texuisse genealogiam per lineam Sacerdotalem, nihilominus nobis religio esse non debet ab eorum desciscere sententia, nam, ut optimè ait *Vincentius Lirinensis* cap. 39. sui *Commonitorii*: Antiqua Sanctorum Patrum consensio, non in omnibus divine Legis questionibus, sed solum in certa præcipue fidei regula, magno nobis studio & investiganda & sequenda est. Sed de auctoritate SS. Patrum plura leges apud nostrum *Melchiorum Canum* lib. 7. de locis Theologicis.

Arguitur secundò: Si Christus ortus esset ex stirpe *Abrahæ*, & *Davidis Regis*, sequeretur: eum fuisse in *Adamo*, & decimatum in lumbis *Abrahæ*, atqui aullà ratione dici potest, Christum fuisse in *Adamo*, & decimatum in lumbis *Abrahæ*, alioqui ejus caro fuisset obnoxia peccato originali, quod transfunditur in omnes, qui ab *Adamo* propagantur; ergo Christus non fuit ortus ex stirpe *Abrahæ*, & *Davidis Regis*.

Respondeo cum *S. Thoma* 3. p. q. 3. r. art. 6. ad 1. Christum fuisse in *Adamo* secundum corpulentam, seu corporalem substantiam, quia substantia corporis Christi, idest, materia, quam sumpsit ex virgine *Maria*, fuit in *Adamo* sicut in principio activo, non autem sicut in materiali principio. Nam materia illa non fuit formata in corpus Christi per virtutem seminis ab *Adamo* profectam, sed per solam *Spiritus Sancti* operationem; & ideo concludit *S. Thomas*: Christum non fuisse in *Ada-*

mo secundum feminalem rationem, per quam ad omnes omnino homines via ordinaria propagatur peccatum originale, cujus penitus expertus fuit Christus Dominus. Similiter, respondet Doctor Angelicus: Christum non fuisse decimatum in lumbis Abraham, quia nomine decimationis intelligit Apostolus in Epist. ad Hebræos cap. 7. actionem illam, quæ, ut narratur Geneseos cap. 14. Abraham decimas obtulit Sacerdoti Melchisedech, illâ actione figurans, & quasi protestationem faciens, quod Melchisedechum tanquam superiorem agnosceret, se verò imperfectum & inferiorem. Unde infert Apostolus, Sacerdotium Melchisedechi, in quantum gerit figuram Christi, esse majus Sacerdotio Levi, qui erat in lumbis Abraham, & simul cum eo decimatus, utpotè per Isaac & Jacob ab eo propagatus. Si igitur Christus esset in lumbis Abraham decimatus, fuisset subditus & inferior Melchisedeco, quod palam Scripturæ Sacræ adversatur. Dicitur enim de Christo Psalmo 109. *Tu es Sacerdos in æternum secundum ordinem Melchisedech*. Quapropter, dicendum est cum S. Thoma: Omnes quidem in Abrahamo fuisse decimatos, idest, præfiguratos indigere curatione, quæ est per Christum, at in lumbis Abraham non fuisse decimatum Christum Dominum, quia ab eo secundum feminalem rationem non fuit propagatus. Id præclare exponit S. Augustinus lib. 10. de Genesi ad litteram cap. 20. his verbis: *Nec Levi, nec Christus in lumbis Abraham secundum animam, secundum verò carnem & Levi & Christus, sed Levi secundum concupiscentiam carnalem, Christus autem secundum solam substantiam corporalem; cum enim sit in semine & visibilis corpulentia, & invisibilis ratio, utrumque concurrit ex Abraham, vel etiam ex ipso Adam usque ad corpus Mariæ; quia & ipsum eodem modo conceptum & exortum est. Christus autem visibilem carnis substantiam de carne virginis sumpsit; ratio verò conceptionis ejus non a semine virili, sed longe aliter, & desuper venit. Ille igitur est decimatus in Abraham qui sic est natus per legem scilicet repugnantem legi mentis, & invisibilem concupiscentiam, &c. Non autem & ille ibi decimatus est, cujus caro inde non fervorem vulneris, sed materiam medicaminis traxit; nam cum ipsa decimatio ad præfigurandam medicinam pertinuerit, illud in Abraham carne decimabatur, quod curabatur, non illud unde curabatur. Idem docet Aquilinus Doctor Serm. 14. de verbis Apostoli cap. 10.*

Arguitur tertio: Christus pertinere non potuit ad stirpem & familiam Davidicam, nisi per Mariam virginem, ex qua natus est; atqui Maria virgo non est orta ex progenie & familia David, ergo nec pariter Christus. Maj. certa est: Christus enim pertinere non potuit ad stirpem & familiam David per Josephum, cum fidei dogma sit, Josephum non fuisse patrem naturalem Christi, nihilque ipsi cum generatione Christi fuisse commune. Probatur itaque minor propositio: Maria virgo, Lucæ cap. 1. dicitur cognata Elisabeth de filiabus Aaron, atqui Aaron erat de Tribu Levi, Exodi cap. 6. ergo Maria, quæ erat cognata Eli.

Elisabeth, ex Tribu Levi suam originem ducebat.

Respondeo: Mariam virginem fuisse quidem cognatam Elisabeth, indè tamen deduci minimè posse, eam fuisse de Tribu Levi, seu de Tribu Sacerdotali. Ratio est, quia Sacerdotes, quorum Deus portio erat, et lege non adstringebantur, quâ cautum erat, ut qui hæreditate potiebantur, intra suam Tribum & familiam nubarent, ne hæreditates permiscerentur, quæ lex habetur Numerorum libri cap. ultimo, sed cuilibet Sacerdoti integrum erat sibi ex omni Tribu uxorem adsciscere. Fieri ergo potuit, inquit *S. Thomas* 3. p. q. 31. art. 2. ad 2. ut pater Elisabeth, qui erat de Tribu Sacerdotali, uxorem duxerit de stirpe David, ratione cuius matrimonii Maria virgo ex stirpe David oriunda cognationem habuerit cum Elisabeth. Vel potuit pater, aut aliquis majorum Mariæ virginis uxorem ducere de stirpe Aaron, seu de Tribu Levi, iisdem cum Elisabeth parentibus profatam. Lex siquidem, quæ lib. Numerorum cap. ultimo jubet intra eandem Tribum virgines nubere, ad solas spectat virgines, quæ, defectu prolis masculæ, ex alse hæredes erant, seu quæ patri in hæreditate succedebant, & non ad illas, quæ nullam sortiebantur hæreditatem, sicut exponit *S. Thomas* 1. 2. q. 105. art. 2. ad 2. eandemque huic legi adhibent interpretationem doctissimi Scripturæ Sacræ Interpretes, *Paulus à Sancta Maria, Burgenfis Episcopus*, ad cap. 36. lib. Numerorum. *Cajetanus* in Commentario, *Andreas Mastius* Comment. in Iosue cap. 17. *Mariana* in Scholiis, *Bonfrerius*, & alii. Immo virgines, quæ hæredes erant, modò hæreditatem, quæ illis obtingebat, repudiarent, & avitis renunciarent iuribus, poterant cum aliis Tribubus jungere connubia. Hinc lib. Judicum cap. 21. legimus: Cæteras Tribus, quominus filias suas nuptum darent Beniaminitis, ostendisse, se non lege divinâ, sed iusiurandi religione dumtaxat prohiberi. Constat etiam ex lib. 1. Regum cap. 18. Davidem sine ulla religione aut scrupulo Beniamitidem duxisse uxorem; & lib. 2. Paralip. cap. 22. *Jejada* Pontifex nupsit filiæ Ioram, quæ erat de Tribu Juda. Alia id genus exempla passim in sacris litteris occurrunt. Cum itaque Leviticæ gentis virgines rerum soli capaces non essent, idest, nullam sortirentur hæreditatem, poterant viris extra Tribum suam nubere. Potuit ergo Maria virgo esse cognata Elisabeth, quia aliquis majorum Mariæ virginis, licet de stirpe Davidis esset, nupsit virgini Leviticæ. Quod quidem, sicut observat *S. Thomas* post *S. Gregorium Nazianzenum* in carmine de genealogia Christi, nutu superno contigit, ut Christus Dominus, qui Rex est & Sacerdos, ab utroque genere tam Regio, quam Sacerdotali nasceretur secundum carnem, & dum unus in Cælo Dei filius ante sæcula ineffabili nascitur exordio, etiam in terra ex clara Regum pariter & Sacerdotum progenie ortus, illustrium titulorum, sibi apices vindicaret.

Inflabis: in Editione Vulgata, quæ à Concilio Tridentino authentica fuit declarata, sic legitur cap. ultimo lib. Numerorum: *Omnes viri ducent*

cent uxores de Tribu & cognatione sua, & cunctæ femine de eadem Tribu maritos accipient. Quæ quidem lex his verbis concepta omnes omnino viros & feminas comprehendit, ipsisque indiscriminatim vetat, ne nubant extra suam Tribum. Falsum igitur est, hanc legem, latam Numerorum cap. ultimo, non spectasse Sacerdotes, quorum Deus portio erat, aut illas virgines, quæ nullam sortiebantur hæreditatem, vel quæ hæreditati nuncium remittebant.

Respondeo, Editionem Vulgatam id unum dumtaxat (sicut docent periti Scripturæ Sacræ Interpretes) innuere, omnes Viros, qui non erant è genere Sacerdotali, debuisse uxores ducere de Tribu & cognatione sua; omnes itidem filias, quæ possidebant hæreditatem, non alios, quàm de Tribu sua, maritos accipere potuisse. Quò fit, ut Editio Vulgata circa connubiorum legem, latam cap. ultimo libri Numerorum, optimè consentiat non solum cum Textu Hebræo, sed etiam cum antiquis Scripturæ Sacræ Versionibus, quæ eandem legem limitant ad filias, quæ, ob defunctum fratrem, paternam hæreditatem colligebant. Sic enim habet Text. Hebr. *Omnis idè filia possidens hæreditatem de Tribubus filiorum Israel, alicui de familia Tribus patris sui erit in uxorem, ut hæreditent filii Israel singuli possessionem patrum suorum*. Targum Onkelosi: *Et omnis filia heres possessionis de Tribu filiorum Israel, Vni de familia Tribus patris sui sit in uxorem, ut hæreditent filii Israel singuli possessionem patrum suorum*. Syriaca versio: *Et quæcumque filia possederit hæreditatem ex Tribu filiorum Israel, alicui ex Tribu domus patris sui nubat, ut possideat quisque filiorum Israel hæreditatem patris sui*. Idem legitur in versione Arabica, & in versione 70. Interpretum. Quocirca, cum Textus Hebræus, & antiquæ Scripturæ Sacræ versiones legem, latam Numerorum. cap. ultimo de ineundis connubiis intra eandem Tribum, limitent ad filias, quæ, defectu prolis masculæ, possident hæreditatem, dicendum est, eodem in sensu esse intelligendam nostram editionem vulgatam. Addo etiam: non deesse Criticæ disciplinæ peritos, & Scripturæ Sacræ doctissimos Interpretes, qui existimant: Editionem vulgatam, loco mox laudato, in quo legem de ineundis connubiis non satis clarè explicat, corrigi, & emendari debere ad normam Textus Hebræi. Quamvis enim Concilium Tridentinum cæteris, quæ id ætatis circumferebantur Scripturæ Sacræ versionibus Latinis, editionem vulgatam prætulerit, eamque authenticam declaraverit; non eam tamen eo in sensu authenticam declaravit, ut præponi debeat originariis, seu primigeniis exemplaribus Hebræicis, & Græcis, cum certum sit; Summos Pontifices Sixtum V. & Clementem VIII. etiam post Concilium Tridentinum, nonnullæ editionis vulgaræ loca, quæ temporis, rerum omnium edacis, injuriâ, vel incuriâ Typographorum, vel ignorantia sciorum erant interpolata, aut minus accuratè translata, ad normam Hebræorum, & Græcorum Codicum correxisse, atque diligenter calligasse; sed solum eo in sensu editionem

tionem vulgatam authenticam pronunciavit Sac.Synodus Tridentina, ut nihil prorsus contra Fidem, & bonos mores complectatur. *Eatenus igitur*, verba sunt *Andree Vegæ*, qui Concil. Trid. aderat, cùm Decretum illud de Sac. Scripturis editum est, lib. 15. in Concil. Trident. cap. 9. *Voluit Synodus authenticam haberi* (editionem vulgatam) *ut certum omnibus esset, nullo eam defecatum errore, ex quo perniciosum aliquod dogma in fid., & moribus colligi possit.* Hanc nonnullorum hujus temporis Theologorum sententiam obiter dumtaxat refero, nec tamen approbo. Consultat Lector nostrum *Natalium Alexandrum* in Dissert. de Edit. vulg. & in Anticriticâ contra *P. Frassenum, Franciscanum*.

Arguitur quartò : Si Maria reverà orta esset ex prosapia Davidis Regis, debuissent *Matthæus & Lucas* texere Christi genealogiam per Mariam, ex qua Christus natus est, non verò per Iosephum, qui, ut Fides docet, non fuit pater naturalis Christi, & cuius proindè genus ad Christum pertinere minimè potuit; atqui *Matthæus*, & *Lucas* genealogiam Christi per Mariam non texuerunt; sed per Iosephum, argumento itaque est, Mariam non esse oriundam ex stirpe Davidis Regis, ac subindè Christum ad familiam, & stirpem Davidicam nullo pacto pertinere posse.

Antequàm huic subricæ & implexæ difficultati, quæ omnibus stemmatis, seu geneologiæ Christi Expositoribus crucem fixit, faciam satis; varias subnectam responsiones, quas ad hunc gordium nodum dissolvendum varii excogitarunt Auctores.

Primò, respondent nonnulli: *Matthæum & Lucam* genealogiam Christi duxisse usque ad Iosephum, cujus tamen filius naturalis non fuit, quia *Matthæus & Lucas* in texenda genealogia Christi se se accommodarunt opinioni Judæorum, & Paganorum, qui putabant, Christum esse filium naturalem Iosephi, & hoc pacto Evangelistas ostendisse, Christum, juxtà Judæorum, & Infidelium hypothèsim, ortum esse ex stirpe, & familiâ David, siquidem Judæi, & Pagani inficiari haud poterant, Iosephum, quem patrem naturalem Christi esse arbitrabantur, ex stirpe, & semine David processisse.

Verùm, hæc responsio admitti non debet. Primò, quia Spiritus Sanctus, cujus lumine afflati fuerunt Sacri Evangelistæ, veritatem falso medio non probat; porrò, si *Matthæus & Lucas* dixissent: Christum Dominum ortum esse ex stirpe Davidis Regis eo sòlo nomine, quòd Christus à Judæis, & Paganis filius naturalis Iosephi putabatur, veritatem, falso medio probasset Spiritus Sanctus, qui per Evangelistas loquebatur; falsum quippè est, Iosephum fuisse patrem naturalem Christi. Secundò, ex hac responsione sequeretur: *Matthæum* consultò voluisse lustris occultare Mysterium Incarnationis, quod tamen à fine, & scopo *Matthæi* omninò alienum est, nam tantùm adest, ut *Matthæum* Mysterium Incarnationis Dominicæ reticeat, ut potius cap. 1. disertè dicat: Mariam gravidam

dam fuisse ex Spiritu Sancto, probetque ex prophetia Isaïæ, Christum nasci debuisse ex Virgine Maria. Denique, hæc responsio probaret, Evangelistas *Matthæum*, & *Lucam* non Christi, sed Iosephi tantum, tenuisse genealogiam, quæ non magis ad Christum pertinere potuisset, quam genealogia vitrici ad privignum. Quis autem non videt, id è diametro oppositum esse scopo, quem sibi *Matthæus* proponit in limine sui Evangelii, quod sic orditur: *Liber generationis Iesu Christi*.

Respondent secundò *Hugo Grotius* in cap. 1. *Matth. & P. Bernardus Lamy* cap. 6. Commentarii in Concordiam Evangelicam: *Matthæum*, & *Lucam* perduxisse genealogiam Christi usque ad Iosephum, quia origo Iosephi non est existimanda aliena à genere Christi. Originem autem Iosephi non fuisse alienam à genere Christi probant prædicti Auctores Primò, quia Christus, ex lege connubii Mariæ cum Iosepho, idem genus habebat, ac ipse Ioseph, verus, & legitimus Matris ejus Sponsus. Secundò, quia Ioseph Christum natum ex Maria, sponsa suâ, in filium suum adoptaverat, ex quo inferunt, quòd, etiam si Virgo Maria non fuisset orta ex prosapia Davidis Regis, Christus attamen per Iosephum ad regiam Davidis stirpem, & familiam pertinuisset. Sic enim loquitur Grotius: *Si ea vis est legis, ut partus viduæ, ex agnato viri defuncti conceptus, in omne jus defuncti succedat, non aliter quam si ex ipsius genitura ortum traxisset, & proles à fratre genita, semen vocatur non illius, per quem suscepta est; sed illius, cui suscepta est, nempe fratris, sine liberis defuncti, quid ni id, quod sine humana opera ex legitima Iosephi conjugē natum est, quasi ipsius solo divinitus instrum, ipsius proprium censeatur? Atque hinc est nimirum, quod non tantum ab Evangelii Scriptoribus Iosephus pater Christi, nuptiis videlicet patrem demonstrantibus, nominetur, sed & Christus omnia obsequia, atque operas præstitit, quæ expectari possunt à filio in sacris paternis constituto. Quod si ubique gentium adoptivi liberi ex ejus generis, cui velut insiti sunt, nobilitate censentur; quantò justius omnia jura gentilitia Iosephi, ac promissiones divine ipsius majoribus factæ ad Dominum Iesum pertinebant? Hactenus Grotius.*

At meritò displicet hæc responsio: Primò, quia si Christus ad stirpem, & familiam Davidicam dumtaxat pertinuisset ratione legitimi matrimonii, quod erat Mariam inter & Iosephum, vel ratione filiationis adoptivæ, quam accepisset à Iosepho, non debuissent, nec potuissent Evangelistæ veram, & naturalem Christi genealogiam texere per parentes Iosephi, ex quibus verè, & naturaliter natus non fuisset. Nec enim parentes Iosephi poterant esse veri, & naturales parentes Christi ex lege matrimonii Mariæ cum Iosepho, vel ex sola filiatione adoptiva, quam Christus à Iosepho sortitus fuisset. Certum quippè est, parentes, & majores illius, qui aliquem adoptat in filium, non esse veros, ac naturales parentes illius, qui adoptatur, ac subindè veram, & naturalem genealogiam filii adoptivi texi haud posse per parentes illius, à quo fuit adoptatus. Sequetur

retur itaque ex hac responsione, nullum Evangelistam veram & naturalem Christi genealogiam edidisse, quod tamen, ut mox observatum est, aperte falsi convincitur ex verbis, quæ *Matthæus* in fronte sui Evangelii proscripsit: *Liber generationis Iesu Christi*. Secundò, Scriptura sacra sexcentis in locis asserit, Christum verà, & naturali generatione ortum esse ex stirpe Davidis Regis, & tamen juxta hanc *Grotii*, & *P. Lamy* responsionem, Christus non verà, & naturali generatione, sed tantùm legali, & per meram adoptionem ad stirpem, & familiam Davidicam pertinuisse. Denique, exemplum, quod asserunt prædicti Auctores, Levirorum, seu Patrum Legalium, ineptè omnino ad Iosephum respectu Christi applicatur, tùm quia Christus non est suscitatus ad conservandum nomen, & memoriam Iosephi, quæ causa potissimè fuit seminis, & generationis legalis; tùm quia Christus non est genitus à fratre, vel agnato Iosephi, vel ab aliquo mortali, sed à Spiritu Sancto formatus; tùm quia denique filii legales gignebantur, prioribus maritis jam demortuis, at Iosephus adhuc in vivis erat, quando Christus in lucem editus est, quò fit, ut illud exemplum Levirorum, seu Patrum Legalium, ad Iosephum respectu Christi nullà ratione applicari possit.

Respondent denique alii Theologi, & Scripturæ sacræ Interpretes: idèò *Matth.* texuisse genealogiam Christi per Iosephum, quia Iosephus proximo agnationis gradu erat cum Maria junctus, itaut communes avos, & Majores haberent Maria, & Iosephus. *Lucam* verò edidisse genealogiam Christi per Mariam Virginem, cujus pater naturalis fuit *Heli*, dictus etiam *Eliakim*, & *Ioakim*; hanc autem Mariæ genealogiam, quam describit S. Lucas, ad Christum Dominum pertinere nullus inficias ire potest, cùm Christus fuerit filius Mariæ Virginis.

Sed hæc responsio, quatenus supponit S. Lucam Christi genealogiam non per Iosephum, sed per Mariam, texuisse, non mihi probatur. Primò, quia nunquàm solenne fuit Iudæis texere genealogias per feminas, nec verosimile est S. Lucam, qui hanc Iudæorum consuetudinem, apprimè callebat, ab ea recedere voluisse. Secundò, incertum omnino est, an *Heli*, cujus S. Lucas in genealogia Christi meminit, idem sit ac *Eliakim*, & *Ioakim*, qui fuit pater naturalis Mariæ virginis? ex nullo quippe Scripturæ sacræ loco id clarè evinci potest. Tertiò, si *Heli*, qui ex Salomone per Nathanem descendit, fuit pater naturalis Mariæ virginis, sicut ariolantur illi Theologi, sequitur, promissionem de nascituro Messia à Deo Davidi factam, impletam fuisse non in linea Salomonis, sed in linea Nathanis, quod sanè adversatur antiquissimorum Patrum, & omnium fermè Theologorum doctrinæ, asserentium, promissionem de nascituro Messia impletam fuisse in linea Salomonis, & non in linea Nathanis. Denique, si Maria fuit filia *Heli*, qui ex Davide per Nathanem descendit, necesse est, ut familia Mariæ virginis diversa fuerit à familia

Iosephi; nam Maria, sicut affirmant illi Theologi, orta est ex familia *Heli*, qui ex Davide per Nathanem descendit; & Iosephus ortum suum traxit ex Iacob, qui ex Davide per Salomonem genus suum ducebat. Id autem planè alienum est à doctrina Sanctorum Patrum, qui, ut mox ostensurus sum, constanter docent: Iosephum non tantum fuisse contribulem Mariæ, sed ex eadem familia fuisse oriundum, & hac de causa nupuisse Mariæ, iuxta legem latam lib. Numerorum cap. 36. quæ præcipitur, ut viri intra suam Tribum, & familiam uxores ducant, ne hæreditates permisceantur. Rejctis itaque illis responsionibus.

Respondeo primò: *Matthæum*, & *Lucam* ideò ad Iosephum, & non ad Mariam virginem retulisse Christi genealogiam, quia Hebræi, ut observant Sancti Patres, *Ambrosius*, *Hilarius*, *Hieronymus*, *Chrysostomus*, *Damasceus*, & *S. Thomas*, non solent texere fœminarum genealogias, ut viri alicujus genus ostendatur. Hinc tritum est illud apud Hebræos essatum: *Matris familia non familia*; quod tamen non ita est accipiendum, quasi mulierum in sacris litteris nunquam texantur genealogiæ, nam *Ludith* cap. 8. heroinæ illius fœminæ describitur genealogia; sed in hoc sensu dumtaxat est intelligendum, ut Iudæi nunquam describant genealogiam viri per fœminas. Undè non mirum, si *Matthæus*, & *Lucas*, iuxta morem, qui obtinet apud Hebræos, Christi genealogiam describentes, eam non ad Mariam, sed ad Iosephum retulerint, ne videlicet ab avita illa consuetudine recedentes in ipso Evangelii exordio impingerent, & in se Iudæorum, qui id ægrè admodum tulissent, odium intempestivè concitarent.

Respondeo secundò: *Matthæum* & *Lucam* ideò texuisse genealogiam Christi per Iosephum, quia Maria & Iosephus consanguinei erant, seu proximo agnationis gradu coniuncti, ac subindè sacros Evangelistas, dum directè describunt genealogiam Iosephi, indirectè quoque edidisse genealogiam Mariæ, ex qua Christus Dominus natus est. Quod verò Maria & Iosephus proximo fuerint consanguinitatis gradu coniuncti, constans est omnium Sanctorum Patrum sententia, quorum agnec non ducit *S. Ambrosius*, qui lib. 3. in *Lucam* hæc habet: *Cur Ioseph magis quam Mariæ generatio describatur, cum Mariæ generaverit Christum, & Ioseph à generatione Domini videatur alienus, dubitare possemus: nisi consuetudo instrueret Scripturarum . . . noli mirari, quod Ioseph origo descripta est, etenim secundum carnem natus, usum debuit sequi carnis: & qui in seculum venit, seculi debuit more describi, maxime cum in Ioseph origine etiam origo sit Mariæ, nam cum vir justus fuerit Ioseph, utique ex Tribu sua, & ex patria sua (seu familia) accepit uxorem, nec potuit justus facere contra id, quod Lex præceptum est. In eandem sententiam conspirant *Eusebius* lib. 1. Hist. Eccles. cap. 7. *Chrysostomus* hom. 2. in *Matth.* *Hieronymus* Comment. in *Matth.* *Hilarius* in cap. 1. *Matth.* & *S. Thomas* 3. p. q. 23. art. 1.*

art. 1. Afferunt quippè omnes illi Patres, Iosephum, cum esset iustus, transgredi haud potuisse Legem, quæ lib. Numerorum cap. 36. occasione filiarum Salphaad, sancita est, quæ jubetur ut puellæ, quæ hæreditatem, adeunt, nubant suæ Tribus & familiæ hominibus, & quia casus prædictæ Legis in Beata Virgine contigit, quæ unica Ioachimi proles, atque ex asse hæres erat, ideo necesse fuisse dicunt, ut, juxta Legem editam, Iosephus, qui erat ejusdem Tribus & familiæ ac Maria, illam uxorem duceret. Quod autem Maria fuerit unica Ioachimi & Annæ proles, ac subindè ex asse hæres, disertè docent Sancti Patres, sicut testatur Eminentissimus Annalium parens *Baronius* in Apparatu ad Annales Ecclesiasticos, ubi hæc habet: *Univiram fuisse beatam Annam, nec post obduratam sterilitatem, ex voto conceptam, repromissione obtentam, susceptamque in senectute filiam, alios novisse partus, tam veteres, quam Orthodoxi Patres sunt professi.*

Nec valet si quis dicat, Mariam fuisse pauperrimam, adeoque non fuisse adstrictam huic Legi Numerorum cap. 36. quæ spectabat solas virgines, quæ amplam poterant sortiri hæreditatem, ne possessiones in illam Tribum vel familiam abirent. Non valet, inquam, si quis illud regerat; nam primò, constat ex Scriptura Sacra, *Ruth*, licet extremè egena esset, nuptiarum tamen spe adiisse propinquum suum Boozum, cui juncta est matrimonio, juxta Legem Numerorum cap. 36. Deindè, *S. Epiphanius* hæres 78. quæ est *Antidicomarianitarum*, asserit: Mariam virginem, fuisse reverà hæredem, quamvis tenuis esset illius hæreditas: *Beata Virgo*, inquit, *Iosepho tradita est, quò illam jura hæreditatis, quam possidebat, adegerant.* Non potuit ergo Maria, quæ fuit unica Ioakimi proles & hæres, transgredi hanc Legem, quam fuisse à Iudæis summà ac perpetuà religione observatam, patet ex lib. Tobiz cap. 6. ubi Angelus sic Tobiam alloquitur: *Est hic Riguel nomine, vir propinquus de Tribu tua, & hic habet filiam nomine Saram. Sed neque masculum, neque feminam ullam habet aliam præter eam. Tibi debetur omnis substantia ejus, & oportet eam te accipere coniugem.* Author etiam, qui Iudithæ historiam scripsit, ait: Maritum eius non modò ejusdem Tribus, sed etiam ejusdem familiæ fuisse. Denique, hanc Legem, de ineundis connubiis intrà eandem Tribum & familiam, perpetuo in usu apud Iudæos fuisse, scribit *Philo*, Iudæus, eamque temporariam fuisse non meminit *Iosephus* in Antiquitatibus & ritibus Iudæorum versatissimus.

Arguitur ultimò, si Maria & Iosephus fuissent proximo agnationis gradu coniuncti, possent & deberent Theologi indicare quinam fuerit proximus ille agnationis gradus, atqui Theologi, & Scripturæ Sacræ Interpretes, nec ex Scriptura, nec ex traditione Sanctorum Patrum assignare possunt proximum illum agnationis gradum, quo supponunt Mariam, & Iosephum fuisse coniunctos, gratis ergò dicitur, Mariam, & Iosephum fuisse proximo agnationis gradu coniunctos.

Respondeo : quòd licèt Theologi , & Scripturæ Sacræ Interpretes assignare non possint agnationis gradum, quo Maria, & Iosephus fuerunt coniuncti, attamen non solum ex constanti Sanctorum Patrum traditione, ut suprà ostensum est, verum etiam ex Scriptura Sacra luculenter commonstrant : Iosephum, & Mariam proximo fuisse agnationis gradu coniunctos. At enim, *Matthæus* in exordio sui Evangelii apertè profiteatur, se texere genealogiam Christi, & aliundè disertis verbis asserit : Iosephum non fuisse Patrem naturalem Christi. Non potuit ergo *Matthæus* texere genealogiam Christi per Iosephum, nisi quia probè compertum habebat, idque omnibus tum temporis notum erat, Iosephum proximo agnationis gradu fuisse cum Maria coniunctum. Ratio evidens est, nam cum Iosephus se habuerit ergà Christum sicut Vitricus ad privignum, quemadmodum fatentur omnes, Vitricorum Avos, Proavo que nullo prorsus modò ad genealogiam privignorum pertinere, ità certum est, parentes, seu Avos, & Proavos Iosephi (factà hypothesi, quòd Iosephus nullo cum Maria agnationis gradu fuerit coniunctus) ad Christi genealogiam pertinere minimè potuisse. Si ergo Iosephus non fuisset proximo agnationis, seu consanguinitatis gradu cum Maria coniunctus, sequeretur, *Matthæum*, dum Christi genealogiam per Iosephum, eiusque Maiores descripsit, vel imprudentem in ipso Evangelii limine aberrasse, vel de industria Lectoribus fucum facere voluisse, & cum evidenti famæ suæ periculo, cum perniciè credulitatis nostræ genealogiam Christi pollicitum, non nisi verba dedisse, & otiosam plane nominum sylvam, nihil ad Christum pertinentium induxisse. Quod sanè citrà impietatem, ne cogitari quidem potest de Sacro illo Evangelista, quem in conscribendo Evangelio divinitus assatum, instructum, & adiutum fuisse certissime constat. Manifestum igitur est: idèò *Matthæum* texuisse genealogiam Christi per Iosephum, quia pro comperto habebat, Iosephum proximo cum Maria consanguinitatis gradu esse coniunctum, ac subindè genealogiam Iosephi ad Christum itidè pertinere, quod abundè sufficit, etiamsi nec Theologi, nec Scripturæ Sacræ Interpretes assignare possint proximum agnationis gradum, quo Maria, & Iosephus erant coniuncti.

Non me latet tamen, quosdam esse doctissimos Theologos, & Scripturæ Sacræ Interpretes, qui proximum consanguinitatis gradum, quo Maria & Iosephus fuerunt coniuncti, assignare, ac præfigere volunt. Sed, ut ingenuè fatear, coniecturæ, quibus indulgent, et si ingeniosè argutè, atque subtilitè sint excogitatæ, precariæ tamen sunt, jejunæ, nulloque solido nixæ fundamento, sicut facili negotio iudicabit Lector, si eas tantisper expendere non gravetur.

In primis, *Petrus Possinus* in *Diallaëtico Theogenealogico*, *Bollandus* ad diem 19. mensis Martii, & *Dominus de Marca* in *Dissertatione de Stemmate Christi*, inter ipsius Opuscula posthuma à doctissimo *Baluzio* in lucem

lucem edita, asserunt, Joakimum, Patrem Mariæ Virginis, & Josephum, eiusdem Sponsum, fuisse filios *Heli*, quorum prior, idemque primogenitus, uxore ductâ, serò tandem Mariam genuerit, alter verò, scilicet Josephus, raro tùm exemplo cælebs, & virgo vixerit; qui tamen Mariam, pupillam relictam maioris fratris, domum suam ducere, sibi que despondere lege sit cōactus. Undè colligunt prædicti Auctores, Iosephum fuisse Patruum Mariæ Virginis. Sed hæc coniectura stare non potest, nam si Joakin, & Iosephus fuerunt fratres, uti volunt prædicti Auctores, necesse est ut Iosephus annosus fuerit, & in ætate provec̃ta quando nupsit Mariæ, Joakin siquidè tantùm in senectute sua genuit Mariam Virginem. Porrò, fabulosum omninò est, ut jam observavimus, Iosephum, fuisse senem quando cum Maria connubium junxit.

Secundo, *Hugo Grotius* in Annotationibus ad cap. 3. Lucæ existimat, Iosephum fuisse proximo agnationis gradu cum Maria Virgine junctum, quia Iosephus erat fratrueles, seu consobrinus *Barpant'zeris*, quem putat ille Author fuisse Proavum Mariæ Virginis. At, hæc coniectura præcedenti nihilò melior est, immò continet rem planè absurdam, quæ illicò in omnium incurrit oculos, nam si Iosephus fuit fratrueles, seu consobrinus Proavi Mariæ Virginis, debuit ad minùs Iosephus esse centenarius quando matrimonium inivit cum Maria. Quis autem tam bonus, ut in animum inducere possit, Mariam homini depontano, & plusquàm centenario fuisse nupram?

Tertiò denique, Author Gallicæ Analyseos, & multalii Scripturæ Sacræ interpretes affirmant: Iosephum fuisse fratruelem, seu consobrinum Mariæ Virginis. Supponunt namque, Mathanem, qui ex Davide per Salomonem descendebat, genuisse Jacob, & Annam, Jacob verò genuisse Iosephum, Annam autem, Sororem Jacob, fuisse Matrem Mariæ Virginis, quæ proindè proximo agnationis gradu ex materno genere erat Iosepho coniuncta, & eundem Avum, scilicet Mathanem, communem habebat cum Iosepho. Sed hæc coniectura non plus probabilitatis habet, nam primò, incertum est an Mathan fuerit Pater S. Annæ, Matris Mariæ Virginis? de hoc si quidem altum est in sacris litteris silentium, nec ullum antiqui Authoris probatæ fidei extat testimonium. Secundò, huius sententiæ patroni supponunt, Mariam virginem secundùm dumtaxat maternum genus ex Davide per Salomonem descendisse, secundùm verò paternum genus dicunt, eam ex Davide per lineam Nathanis originem traxisse, ita ut pater naturalis Mariæ Virginis fuerit *Heli*, qui ex Davide per Nathanem genus suum ducebat. Quod sanè penitus abhorret à pervulgata sententiâ Theologorum, qui docent, promissiones, factas à Deo, Abrahamo, & Davidi Regi de nascituro Messia, impletas fuisse non in linea Nathanis, sed in linea Salomonis; At, si *Heli*, qui ex Davide per Nathanem descendebat, fuisset pater naturalis Mariæ Virginis, ut censent illi Auctores, promissiones à Deo factæ de nascituro Mes-

Messia fuissent impletæ non in linea Salomonis, sed in linea Nathanis, quod cùm Scripturæ Sacræ nullo nitatur testimonio, & com nuni Theologorum opinioni adversetur, non multum ponderis apud viros eruditos habere potest hæc precaria recentiorum coniectura.

Reiectis itaque his coniecturis, quibus nonnulli Theologi, & Scripturæ Sacræ Interpretes proximum agnationis gradum, quo Maria, & Ioseph fuerunt coniuncti, assequi se posse confidunt; potius standum est sententiæ Theologorum, qui, licet fateantur, Mariam, & Iosephum, proximo fuisse agnationis gradu coniunctos, quinam tamen fuerit proximus ille agnationis gradus? nec curiosius investigari debere, nec certo assignari posse consultius esse putant.

DISSERTATIO QUARTA

In qua conciliatur antilogia, seu apparens contradictio, quæ videtur esse Matthæum inter & Lucam, in ea, quam describunt, genealogia Christi.

Matthæus cap. 1. & Lucas cap. 3. texunt Stemma genealogicum Christi Domini, illudque perducunt, usque ad Iosephum, virum Mariæ. At in quibusdam conveniunt, in aliis verò discrepare, & quasi datâ operâ sese mutuò intestinâ conflictatione collidere videntur. In primis, Matthæus, & Lucas consentiunt in numerandis Maioribus Christi ab Abrahamo, usque ad Davidem Regem, parem siquidem generationum numerum, & easdem exhibent personas, cum isto tamen discrimine, quod Matthæus incipiat ab Abrahamo, & deinde descendat usque ad Christum, Lucas verò vice versâ auspicietur à Christo, dein, ascendendo, generationum numerum non terminet in Abrahamo, sed ad Deum utque perducatur. Verum, ubi ad Davidem Regem pervenerunt ambo illi Evangelistæ, diversam planè in describenda genealogia Christi viam ineunt. Matthæus namque per Salomonem, Davidis filium, textit genealogiam Christi, & stirpem Davidicam perducit, usque ad *Iacob*, quem Iosepho patrem tribuit, Lucas autem per prolem Nathanis, alterius Davidis filii, ascendit à Iosepho, usque ad Davidem Regem, totamque stirpem Davidicam terminat in *Heli*, quem Iosepho patrem adscribit; quò sit, ut Matthæus, & Lucas diversos Christi avos, atque proavos à Davide Rege ad Iosephum, usque recenseant. Scio, nonnullos esse Scripturæ sacre Interpretes, qui autumant, in Salathiele, & Zorobabele, utramque Salomonis, & Nathanis lineam coaluisse, sive per nuptias, sive aliquâ ratione legali; post Zorobabelem verò utramque decussari lineam, & Matthæum genealogiam

giam Iosephi ex Abinde, filio primogenito Zorobabelis, texere, Lucam verò ex Rhesa, filio Zorobabelis secundo genito; sed ipse haud levibus adductus rationibus, quas infrà in medium proferam, probabilius arbitror: Salathielem, & Zorobabelem, quos in genealogia Christi inserit Matthæus, alios esse ab illis, quos recenset Lucas, adeoque omnes Christi avos, atque proavos, quos à Davide Rege ad Iosephum usque numerat Matthæus, esse omnino diversos ab his, quorum meminit Lucas. Hæc autem avorum Christi diversitas, iuncta cum necessitate duos Iosepho assignandi patres, *Iacob* scilicet & *Heli*; veterum Scriptorum ab ipsis Ecclesiæ incunabulis vehementer torfit, & tantum non oppresit ingenia, summumque etiamnum gravissimis Theologis facessit negotium, ità ut candidè fateantur: se, ob multas, quas in utraque Matthæi, videlicet & Lucæ, genealogia Christi nanciscuntur difficultates, hære ad aquas, & quà sibi vadam tentandum sit prorsus ignorare. Quod sanè nemini mirum videri debet, nam, etsi temporibus Evangelistarum genealogia Christi Domini omnibus fuerit notissima, modò tamen sæculorum caligine quasi involuta, nec amplius extantibus antiquis Iudæorum Tabulis genealogicis, unde lux aliqua affulgere posset, implexa, ac perobscura evasit, amplamque suppeditat viris eruditissimis disputandi materiem. Non is certè ego sum, qui tantas velim componere lites, omnesque eximere scrupulos, qui animum subire possunt circà genealogiam Christi, ex qua Ilias disputationum enata est; sed solum statui breviter, quoad ejus fieri poterit, rationem, quam ad conciliandum utrumque Evangelistam, tradit Iulius Africanus, proponere, eamque à cavillis, quibus recentiores quidam Critici eam audaciùs, quàm par esset, impetere solent, vindicare. Difficultas autem, quam in præsentia ventilandam suscipio, in hoc potissimum sita est, cur Matthæus Iosepho, viro Mariæ, patrem tribuat *Iacob*, Lucas verò Iosepho patrem tribuat *Heli*? hæc est famosa Evangelistarum in origine Iosephi antilogia, seu apparens contradictio, quam olim *Celsus*, *Porphyrus*, *Iulianus*, apostata, cæterique huius furfuris homines, ut Evangelistarum fidem, & autoritatem labefacerent, Christianis objecerunt.

DICO ITAQUE: Ad conciliandum utrumque Evangelistam, *Matthæum*, videlicet, & *Lucam*, in origine Iosephi, nullam rationem efficaciorẽ, expeditiorẽve esse eã, quam tradit Iulius Africanus antiquissimus Author in Epistola ad Aristidem, apud Eusebium lib. 1. Histor. Eccles. cap. 7.

Ut efficacius hæc nostra stabiliatur assertio, in primis, proponenda est ratio, quam assert Iulius Africanus ad conciliandum utrumque Evangelistam in origine Iosephi. Ait igitur antiquissimus ille Author loco mox laudato: quòd *Mathan*, qui ex Davide per Salomonem descendebat, uxorem duxit nomine *Estham*, & ex ea filium sustulit, *Iacob* appellatum, *Mathan* autem mortuo, eamdem *Estham*, viduam *Mathanis*, matri-

trimonio sibi sociavit *Melchi*, seu potius *Mattath*, qui ad Davidem per Nathanem suam referebat originem (lex quippè minimè vetabat, ne mulier vidua, viro ipsius mortuo, alteri nuberet) *Melchi* autem, seu potius *Mattath*, secundus maritus *Espha*, suscepit ex ea filium, *Heli* dictum. Hoc modo *Iacob*, & *Heli*, diverso licèt genere prognati, fratres erant uterini, quorum alter, scilicèt *Iacob*, cum frater ipsius uterinus *Heli* sine liberis decessisset, viduam eius coniugem sibi accipiens, ex ea Iosephum, genuit naturali quidem ratione filium suum, sed secundùm legem filium *Heli*, quia eius sen. en *Iacob* frater jure leviratus suscitaverat, juxtà legem, quæ habetur *Deuteronomii* cap. 25. Quocirca Iosephus, juxtà Iulium Africanum, duos Patres habuit, naturalem unum, scilicèt *Iacob*, qui ex Davide per Salomonem descendebat, legalem alterum videlicèt *Heli*, qui ex Davide per Nathanem procedebat. Un tè, quia Lucas describit legalem dumtaxat successionem parentum Iosephi, idèò patrem ipsi tribuit *Heli*; Matthæus verò, quia naturalem parentum Iosephi genealogiam texit, ipsi Patrem asserit *Iacob*. Hæc est ratio, quâ ad conciliandum utrumque Evangelistam in origine Iosephi, usus est Iulius Africanus, & quam ex cognatis Servatoris nostri, se apud Eusebium, loco mox citato, accepisse profitetur his verbis: *Cognati enim Servatoris nostri, sive ad ostendendam generis sui nobilitatem, sive et simpliciter rem docerent, veraci utique sermone hæc nobis tradiderunt.*

Fuerunt nonnulli, qui putarunt, Iustinum martyrem, ante Iulium Africanum, eandem utrumque conciliandi Evangelistam rationem tradidisse in libro Responsionum ad Orthodoxos ad quasdam quæstiones. Sed illos Authores, pace eorum dixerim, Criticæ disciplinæ ignorantia fefellit, nam hic liber responsionum ad Orthodoxos Iustinum martyrem non habet Authorem, quia non solùm Irenæus, Episcopus Lugdunensis, Iustino posterior, in eo citatur, sed etiam ad Origenis libros, ut ex eis nominum Hebraicorum interpretationes edoceantur, Lectores suos Author remittit, nemo autem nescit, Iustinum esse Origene antiquiorem. Quin etiam Manichæi, ipso etiam Origene recentiores, ibidem, notantur. Undè Sixtus Senensis, Bellarminus, & alii huius temporis periti Critici hunc librum Iustino martyri meritò abudicant.

Haftenus proposuimus rationem, quam Iulius Africanus proferat ad conciliandum utrumque Evangelistam in origine Iosephi, nunc paucis expendamus, & semoto omnium partium studio, libremus momenta, quibus gravissimi Theologi, post Sanctum Thomam, hanc Iulii Africanus rationem ceteris omnibus ad conciliandum utrumque Evangelistam longè efficacior, atque expeditior esse docent.

Primo, certum est, in hanc Iulii Africani rationem omnes antiquos SS. Patres tam Græcos, quàm Latinos, ad conciliandum utrumque Evangelistam, manibus, pedibusque ivisse. Idque non negat *Petrus Possinus* Soc. Iesu Scriptor doctissimus, in libro superius citato, in quo, licèt hanc

hanc Iulii Africani rationem omnibus ingenii, & eloquentiæ suæ viribus oppugnet, disertè attamen fatetur: eam omnibus Patribus fuisse probatam, quorum autoritate se nihil planè conturbari elato supercilio, ac fronte perfrictà pronunciat; sic enim loquitur: *Itaque nihil nos conturbat autoritas Patrum, quo minus omni metu, ac reverentia soluto animo, ad examen istius sententiæ accedamus, qua obiter dumtaxat usi sunt, periculo eius in se minimè suscepto. Qua in re modestiam, ac reverentiam Possini Sanctis Patribus debitam desiderare cogor, quam penitus exuisse videtur, dùm inflatis tibiis sententiam suam, levissimis, ut mox ostendam, sultam conjecturis, totius retrò antiquitatis iudicio anteponit, seque, ut ajunt, cornicum confixisse oculos ineptè gloriatur.*


Secundò, hanc Iulii Africani rationem ad conciliandum utrumque Evangelistam in origine Iosephi unam instar omnium esse, cæterisque longè expeditiorem, evidentiùs patebit, si hic tantisper expendamus alias rationes, quas ad conciliandam apparentem istam Evangelistarum contradictionem moderni excogitarunt Critici, & Scripturæ Sacræ Interpretes, easque paucis confutemus.

Fuerunt in primis aliqui Theologi, qui, ut conciliarent utrumque Evangelistarum in origine Iosephi, affirmarunt, *Iacob*, & *Heli* non fuisse diversos homines, sed eundem binominem, quomodo alios binomines, immò, & quosdam trinomines in sacris litteris legere est.

Sed hæc sententia, inquit S. Thomas 3. part. quæst. 31. artic. 3. *stare minimè potest, quia Matthæus ponit unum filiorum David, scilicet Salomonem, Lucas autem ponit alium, scilicet Natham, quos secundum historiam libri Regum constat fratres fuisse. Præterea, Matthæus alios Iacob, Lucas verò alios Heli parentes assignant, nec parentes modò, sed etiam Avos, Proavos, Atavos, & Tritavos. Quis autem credat, omnes istos fuisse binomines, ac de industria voluisse Lucam semper eos isto vocare nomine, quo viderit abstinuisse Matthæum. Hæc itaque sententia, seu ratio conciliandi utrumque Evangelistam in origine Iosephi, omni probabilitate caret.*

Aliam viam, utrumque in origine Iosephi conciliandi Evangelistam, iniiit Hugo Grotius, vir peritissimus, acerrimique iudicii, in cap. 3. *Luce*. Supponit quippè prædictus Author: *Mathanem*, qui ex Davide per Salomonem descendebat, uxorem duxisse nomine *Estham*, Mathane autem mortuo absque liberis, *Melchi*, qui ex Davide per Nathanem procedebat, nupsisse *Estha*, viduæ Mathanis, & ex ea tres suscepisse filios, videlicet *Iacob*, *Heli*, & *Levi*, sed, Iacobo mortuo etiam sine prole, *Heli*, qui erat frater *Iacob*, genuisse *Ioseph*, qui subinde fuit filius naturalis *Heli*, & hæres *Iacob*. Unde concludit Grotius: ideò Matthæum Iosepho Patrem assignasse *Iacob*, quia Iosephus fuit hæres *Iacob*, Lucam verò tribuisse Iosepho Patrem *Heli*, quia Iosephus fuit filius naturalis *Heli*. Denique, supponit Grotius, *Levi*, quem dicit fratrem fuisse *Iacob*,

& *Heli*, genuisse *Barpantherem*, quem putat esse Proavum Marię, virginis, *Barpantherem* autem genuisse *Pantherem*, Pantherem verò genuisse *Ioakimum*, Patrem Marię virginis. Hoc est Grotii de genealogia Christi Systema, quod, ut clariùs percipiatur, illud in sequenti schemate oculis Lectoris subiicio.



Hoc Systema, quod ad conciliandum utrumque Evangelistam in origine Iosephi induxit *Grotius*, meo calculo probare non possum. Primb, quia, ut in superiori Dissertatione observatum est, si Iosephus fuisset fratruelis, seu consobrinus Barpantheris, quem Marię Proavum putat esse *Grotius*, necesse esset, ut Ioseph, quando nupsit Marię virgini, esset ad minùs centenarius, quò quid absurdius dici, aut fingi possit, certè non video. Secundò, non solum gratis, sed etiam falsò supponit

Gro-

Grotius, Mathanem, qui ex Davide per Salomonem descendebat, obiisse absque liberis. Nam, si reverà *Mathan* absque prole è vivis excessisset, non debuisset *Matthæus* recensere Mathanem in genealogia Christi, ad cuius generationem nihil prorsus contulisset *Mathan*. Non debuisset etiam idem Evangelista tam longam exhibere seriem Avorum Mathanis, ex quibus Christus non descendisset, si *Mathan* fuisset absque liberis demortuus. Idem dicendum est de *Jacob*, quem frustra itidem *Matthæus* in genealogia Christi inseruisset, si absque liberis è vita migrasset, ut dicitur *Grotius*. Tertio, sine ullo prorsus fundamento *Grotius* supponit, *Jacob*, *Heli*, & *Levi* fuisse filios Melchi, qui ex Davide per *Nathanem* descendebat; undè enim, amabo, illud colligit *Grotius*? certè non ex Scriptura Sacra, cùm potius *Matthæus* aperte dicat, *Jacob* fuisse filium Mathanis, qui ex Davide per Salomonem genus suum ducebat, *Mathan genuit Jacob*. Constat etiam ex Evangelio Lucæ, *Levi* non fuisse fratrem *Heli*, sed potius ipsius Avum, sic enim habet Lucas: *qui fuit Heli, qui fuit Matthat, qui fuit Levi*. Quarto, si *Joseph* non esset filius naturalis *Jacob*, sed tantum ipsius hæres, sicut ait *Grotius*, quorsum igitur *Matthæus* diceret: *Jacob genuit Joseph*. Hic enim loquendi modus non solum durus, sed à communi loquendi usu esset penitus alienus, hæres siquidem, iuxta tritum, ac vulgarem loquendi usum, non dicitur *genitus* ab eo, cuius hæreditatem sortitur. Denique, *Levi*, fuisse Patrem *Barpantheris*, *Barpantherem* patrem *Pantheris*, *Pantherem* verò genuisse *Ioachimum*, Patrem Mariæ virginis, asserunt periti Critici, purum figmentum esse, quod prodiit ex schola Rabbiorum, qui vento, & fabulosis traditionibus pascuntur. Sed, quia Sanctus *Damasceus* cap. 15. lib. 4. De Fide Orthodoxa, in texenda Genealogia Christi disertam inter Avos Christi mentionem facit *Pantheris*, & *Barpantheris*, nolum ipse hanc Traditionem ad aniles Rabbiorum fabulas ablegare, sed potius cum *Possino*, & *Bollando*, doctissimis Soc. Iesu Scriptoribus, censeo, *Pantherem*, & *Barpantherem*, quorum, loco mox laudato, in serie Avorum Christi meminit S. *Damasceus*, non esse diversos à *Mattath* & *Heli*, ita ut *Levi* genuerit *Mattath*, cognomento *Pantherem*, cuius filius, seu *Heli*, dictus est *Barpanther*, eò quod *Pantheris*, seu *Matthat*, filius esset; & sic intelligendus est S. *Joannes Damasceus*, qui hac in re Systemati *Grotii* minimè favet. De *Panthere*, & *Barpanthere*, quos Genealogiæ Iesu Christi inseruit S. *Joannes Damasceus* plura legis apud *Danielem Huetium*, Episcopum Abrincensem, in *Demonstratione Evangelica*, Propositione 19. & doctissimum nostrum *Michaelem Le Quien*, Annotatione secundâ in cap. 15. lib. 4. De Orthodoxa Fide. Reiciit itaque debet Systema *Grotii*, cùm vanis dumtaxat nitatur coniecturis, quæ in Sacri Evangelii interpretatione non sunt admittendæ, ne infirmis vacillandi detur occasio, & desultoriis, ac procacibus ingeniis de Sacri Textus autoritate dubitandi, aut cum præter genuinum scopum aliò flectendi latissima porta pandatur.

Tertiam rationem, seu viam conciliandi utrumque Evangelistam in origine Iosephi, suppeditat *Petrus Possinus* in libro, cui titulum dedit, *Diallaſticon Theogenealogicum*, seu de genealogia Christi Domini. Vult etenim eruditus ille Author: Matthæum legalem tantum successionem, seu ordinem juris ad Regiam dignitatem fuisse secutum; Lucam autem naturalis generationis ordinem attendisse. Quo posito, asserit: Matthæum idè Iosepho Patrem assignasse *Iacob*, quia Iacob Pater erat legalis Iosephi, habitâ ratione legalis successionis, seu ordinis juris ad Regiam dignitatem; Lucam autem Iosepho Patrem tribuisse *Heli*, quia Heli Pater erat naturalis Iosephi. Eandem viam conciliandi utrumque Evangelistam in origine Iosephi sectantur *Bollandus* ad diem 19. mensis Martii, Dominus de *Marca* in Dissertatione de *Stemmata Christi*, *Bernardus Lamy* in sua Harmoniâ Evangelicâ, &c. Verùm, quominus huic sententiæ calculum adiciam, obstant primò, verba quibus Matthæus, & Lucas in describenda genealogia Christi utuntur, & quæ nullum omninò de eorum mente dubitandi locum relinquunt. Ecquid enim, sodes, sonant hæc verba, quæ usurpat Matthæus: *Iacob genuit Ioseph*, nisi veram, & naturalem generationem? Quid verò indignant ista verba, quibus utitur Lucas, *Iesus, ut putabatur, filius Ioseph, qui fuit Heli*, nisi filiationem legalem? Nullum siquidem in Scriptura Sacra potest proferri exemplum, quo verbum *genuit*, intelligatur de successione in hæreditate, vel de adoptione, vel de filiatione legali, sed semper determinatè sumitur, ad veram, naturalem, & carnalem procreationem significandam. Secundò, assirant prædicti Authores, extincto absque liberis *Iechonia*, Rege Iuda, stirpem Salomonicam penitus exaruisse, & à Salomonidis ad *Nathanitis*, hoc est, à linea Salomonis ad lineam *Nathanis* transiisse promissionem à Deo factam de nascituro Messia ex femine *David*, adeò ut illa promissio non fuerit impleta in linea Salomonis, sed in linea *Nathanis*, alterius *Davidis* filii. Id autem, ut suprà observavimus, communi adversatur antiquorum Patrum, & Theologorum sententiæ, qui docent, promissionem de nascituro Messia ex femine *David* fuisse impletam in linea Salomonis, & non in linea *Nathanis*. Denique, me ab illorum Authorum sententiâ abducunt luculentissima testimonia Sanctorum Patrum, qui in prioribus Ecclesiæ sæculis ad conciliandum utrumque Evangelistam in origine Iosephi unanimi consensu tradiderunt: Iacob fuisse Patrem naturalem Iosephi, cui tamen antiquæ Sanctorum Patrum traditioni apertè refragantur istius sententiæ assertores, qui censent, Iacob fuisse Patrem legalem Iosephi, Heli verò Patrem ipsius naturalem. Coniecturas, quas magno quidem, sed inani studio, ad suam astringendam sententiam, congerunt hi Authores, opportuniùs inter solvendas obiectiones refellemus.

Postremam rationem, seu viam conciliandi *Matthæum* & *Lucam* in
ori-

origine Iosephi, tradit clarissimus Auctor Gallicæ analyseos Dissertatione quintâ, ubi cum multis Scripturæ Sac. Interpretibus docet, *Matthæum* edidisse genealogiam Iosephi, cuius pater naturalis fuit *Iacob*, qui ex Davide per Salomonem descendebat, *Lucam* verò texuisse genealogiam Mariæ, cuius pater naturalis fuit *Eli*, qui idem est ac *Eliakim*, seu *Ioakim*, & qui fuit etiam pater civilis Iosephi, utpotè ipsius generi, ratione veri & legitimi matrimonii cum Maria virgine contracti. Ex quo infer prædictus Auctor, *Matthæum* ideò Iosepho patrem assignasse Iacob, quia *Matthæus* edidit genealogiam Iosephi, cuius pater naturalis fuit Iacob; *Lucam* verò Iosepho patrem tribuisse Heli, quia Iosephus fuit gener Heli, patris naturalis Mariæ virginis, cuius genealogiam descripsit *Lucas*. Itaque, juxta doctissimum illum Auctorem, cum Ioseph esset gener Heli, potuit à *Luca* appellari filius Heli; fatentur siquidem Scripturæ Sacræ Interpretes, interdum generos appellari filios eorum, quorum sunt generi. Addit etiam idem Auctor; quòd, quia non erat consuetudinis Hebræorum texere genealogias per fœminas, & aliunde *Lucas* referre non potuerit patrem naturalem Christi Domini, quo in terris caruit, solâ nimirum Spiritus Sancti operatione conceptus; ideò *Lucas* gradum fecit à nepote ad avum, ita ut, quando *Lucas* dicit: *Iesus erat incipiens quasi annorum triginta, ut putabatur, filius Ioseph, qui fuit Heli*, illa dictio, *qui*, non referatur ad Iosephum, sed ad Christum, ut sit sensus: Christus putabatur filius Ioseph, qui tamen, Christus, fuit Heli, idest, nepos *Ioakim*, patris Mariæ virginis. Sed hæc sententia, licet primâ fronte ceteris plausibilior, & ad secundum nosdum expeditior esse videatur, mihi tamen arridere non potest, supponit quippè, *Lucam* texuisse genealogiam Christi per Mariam contra consuetudinem Hebræorum, & patrem naturalem Mariæ virginis fuisse Heli, qui ex Davide per Nathanem descendebat, quod etiam nullum in Scriptura, & traditione Patrum fundamentum habet, ut supra diximus.

Prolixior fortassis fui in referendis & confutandis rationibus, quas ad conciliandum utrumque Evangelistam in origine Iosephi excogitarunt moderni quidam Critici, & Scripturæ Sacræ Interpretes, at, hæc prætermittere non debui, ut Lector clariùs intelligeret: omnibus, illis recens adinventis rationibus præponendam esse *Iulii Africani* rationem, omnium antiquorum Patrum auctoritate munitam, & ad conciliandam apparentem istam Evangelistarum antilogiam, magis appositam, & efficacem.

DILUUNTUR OBIECTIONES.

Arguitur primò: *Iulius Africanus* loco supra citato ait: *Melchî* fuisse patrem Heli, nullâ vel *Mattath*, vel *Levi* mentione factâ, atqui hoc esse falsum constat ex Scriptura Sacra, quæ *Lucæ* cap. 3. sic ha-

habet: *Qui fuit Heli, qui fuit Mattath, qui fuit Levi, qui fuit Melchi.* Ergo admitti non debet hæc Iulii Africani ratio.

Respondeo: quod licet audaciores quidam Critici, quos inter numerantur *Cordeſius*, *Canonicus Lemovicenſis*, & *Hugo Grotius*, ex ea omiſſione factâ à *Iulio Africano*, occaſionem ſumpſerint ſuſpicandi *Levi*, & *Mattath* in Textum *S. Lucæ* irrepiſſe, aut oſcitantiâ Librariorum fuiſſe intruſos, ac ſubindè expungendos eſſe; nullus tamen dubito, quin ſtandum ſit lectioni noſtræ editionis vulgatæ, in qua legimus, *Melchi* fuiſſe patrem *Levi*, *Levi* autem patrem eſſe *Mattath*, *Mattath* patrem eſſe *Heli*. Omnibus quippè Theologis & Scripturæ Sacræ Interpretibus religio eſſe debet, citrà antiquorum Codicum, aut tranſlatorum fidem, veſ minimum apicem in ſacris Litteris Antiqui & Novi fœderis ex ingenio immutare. Undè *S. Hieronymus*, qui novum Teſtamentum juſſu *Damaſi*, Summi Pontificis, Græcæ fidei reddidit, *Mattath*, & *Levi* in Textu *S. Lucæ* agnovit & ſervavit. Quapropter, ipſe probabilius cenſeo cum doctiſſimo *Valeſio* in annotationib. ad cap. 7. Hiſt. Eccl. *Eusebii*, *Iulium Africanum* eò loci memoriâ fuiſſe lapſum, dum dicit: *Heli* fuiſſe filium *Melchi*, quem potiùs filium *Mattath* dicere debuiffet. Cæterùm, hic lapſus ne tantillùm quidem ſententiæ *Iulii Africani* labefactat fundamentum, in eo præcipuè poſitum, quod *Iacob* & *Heli* fuerint uterini fratres ex eadem matre, patre tamen diverſo prognati. Nodum ergo in ſcirpo quærunr, qui, ex hoc *Iulii Africani* memoriæ lapſu, rationem, quam tradidit ad conciliandum utrumque Evangeliftam in origine *Iosephi*, infringere ſe poſſe putant.

Arguitur ſecundò: *Iulius Africanus* aſſerit, naturalem à *Matthæo* exhiberi ſucceſſionem parentum *Iosephi*, legalem verò à *Luca*, atqui hoc apertè falſi convincitur, nam *Matthæus* legalem tantùm ſucceſſionem, ſeu ordinem juris ad regiam dignitatem deſcribere voluit; *Lucas* autem naturalis generationis ordinem ſecutus eſt, ergo concidit *Iulii Africani* ratio. Prob. min. ex modo, quo uterque Evangelifta deſcripſit genealogiam Chriſti. *Matthæus* ſiquidem, quia oſtendere dumtaxat voluit jus regnandi, nepotibus *Abrahæ* & *Davidis* Regis promiſſum, ad Chriſtum Dominum pertinere, ideò genealogiæ Chriſti exordium ducit ab *Abrahamo*, cui primùm promiſſiones factæ ſunt, poſteà, *Davidem* ipſum, cæterosque Reges *Iudæorum* invicem ſibi ſanguinis jure ſuccedentes proponit uſque ad *Iechoniam*, & eius fratres ſub ipſa *Babilonici exilii* tempora. Dein, ſubiungit ſucceſſionem Principatus *Judaici* in *Salathiele*, & *Zorobabele*, qui ex *Davide* per *Nathanem* deſcendebant, quia ad eos, extinctâ ſtirpe *Iechoniz*, Regis *Iuda*, qui ex *Davide* per *Salomonem*, genus ducebat, jus ad regiam dignitatem fuit devolutum. Denique, quia jus regnandi à *Zorobabale* tranſmiſſum eſt ad *Abiudem*, primogenitum *Zorobabelis*, ideò *Matthæus* *Abiudis* poſteros perſequitur uſque ad *Iacob*, quem, habitâ ratione ſucceſſionis ad regiam dignitatem, patrem aſſignat

gnat Iosepho . At, ex adverso, *Lucas*, cùm in describenda genealogia Christi ordinem naturalis successionis sibi proposuerit, orsus est ab Adamo, primo omnium parente, deindè, stirpem Davidicam perduxit usque ad Salathielem & Zorobabelem, non per lineam Salomonis, & aliorum Regum, vel Principum, sed per lineam Nathanis, eiusque posterorum, qui iure ad regiam dignitatem non potiebantur . Denique, postquam *Lucas* pervenit ad Zorobabelem, totam stirpem Davidicam per Rezam, filium secundò genitum Zorobabelis, eiusque posteros, qui jus ad regiam dignitatem non habebant, terminat in Heli, quem, attento solùm ordine generationis naturalis, patrem tribuit Iosepho . Patet itaque ex modo, quem uterque Evangelista in describendo stemmate Christi tenuit, *Matthæum* voluisse dumtaxat exhibere legalem successionem, seu ordinem juris ad regiam dignitatem; *Lucam* verò, prætermisâ illà successionem ad regium sceptrum, naturalis tantùm generationis ordinem fuisse secutum .

Respondeo primò : *Matthæum* genealogiæ Christi exordium duxisse ab Abrahamo, cui promissiones de Messia nascituro datæ sunt, eamque continuasse per Davidem, Salomonem, cæterosque Reges, ac Principes Iudæorum, non solùm ut ostenderet jus ad regiam dignitatem, pertinere ad Christum, sed etiam ut demonstraret, Christum non legali, sed verâ & naturali ratione ortum esse ex stirpe Abrahamæ, & Regum Iudæ, ac subindè ipsum esse verum Messiam; quia promissiones de Messia nascituro fuerunt potissimùm factæ Abrahamo & Davidi Regi, sicut expendit *S. Thomas* 3. p. q. 3. 1. art. 2. *Lucam* verò genealogiam Christi ab Adamo fuisse auspicatum, ut doceret, beneficia Messiæ, qui pro salutem omnium erat venturus, non solùm pertinere ad Abrahamum, eiusque posteros, sed ad ipsum etiam Adamum, totius generis caput, ac proindè ad omnes omninò homines, qui ab Adamo propagantur .

Respondeo secundò : Quædam ab adversariis in obiectione supponi tanquam certa & indubitata, quæ tamen non solùm precaria sunt, sed penitus abludunt à vero . Supponunt enim primò, extinctâ stirpe Iechoniz, Regis Iudæ, qui ex Davide per Salomonem descendebat, jus ad Regium sceptrum, quod in posteris Salomonis ad Iechoniam usque fuerat iugiter conservatum, devolutum tandem esse ad Salathielem & Zorobabelem, qui ex Davide per Nathanem procedebant, & hanc volunt fuisse rationem, ob quam *Matthæus* immediatè post Iechoniam subiunxerit successionem Principatus Iudaici in Salathiele & Zorobabele, qui iure regnandi in se devoluto per Assyrios licebat, potiebantur . Verùm, mox ostendam, falsam esse hanc adversariorum suppositionem, nec fuisse extinctam stirpem Iechoniz, nec jus regnandi, quod erat assertum nepotibus Salomonis, fuisse unquam translatum ad posteros Nathanis . Secundò, supponunt adversarii, *Abjudem*, per quem *Matthæus* stirpem Davidicam perduxit usque ad Iacob, esse filium primogenitum Zoro-

Zorobabelis, *Rezam* verò, per quem *Lucas* stirpem Davidicam perduxit usque ad Heli, esse filium secundogenitum Zorobabelis. Sed hanc suppositionem itidem falsam esse contendo cum multis peritis Scripturæ Sacræ Interpretibus, qui docent, Abiudem fuisse filium Zorobabelis, qui ex Davide per Salomonem descendebat, *Rezam* autem fuisse filium alterius Zorobabelis, qui ex Davide per Nathanem genus suum ducebat, quò fit, ut, juxta doctissimos Scripturæ Sacræ Interpretes (quorum sententiæ utroque pollice subscribo) Salathiel, & Zorobabel, quos in genealogia Christi reponit *Matthæus*, sint planè diversi à Salathiele & Zorobabele, quos in genealogia Christi recenset *Lucas*, quamvis iisdem nominibus insigniantur, quod sanè non est insolens in sacris Litteris.

Arguitur tertio : *Matthæus* dicit, Iechoniam fuisse patrem Salathielis, *Lucas* verò scribit, *Neri* fuisse patrem Salathielis, atqui Iechonias non fuit pater naturalis Salathielis, sed solum legalis, *Neri* autem fuit reverà pater naturalis Salathielis, ergo *Matthæus* non est secutus naturalis generationis ordinem, sed potius *Lucas*. Prob. min. ex Ieremiæ cap. 22. ubi Propheta prædixit Iechoniæ, Regi Juda & deportationem in Babylonium Solum, & orbitatem, ita ut nullus ex eius stirpe, Davidis solum infessurus, vel potestatem in Juda nactus esset, *Scribe virum sterilem*, &c. quibus verbis, inquit *Possinus*, absoluta atque irrevocabilis damnatio exprimitur, palàmque declaratur neminem Iechoniæ superstitem filiorum, nepotumve fuisse, qui generis seriem post ipsum propagaverit. Quapropter, ne falsa sit divini illius oraculi comminatio, necesse est, ut dicatur : Iechoniam non fuisse patrem naturalem Salathielis, sed solum legalem. Undè, quandò *Matthæus* dicit : Iechoniam genuisse Salathielem, vult tantum ostendere sacer ille Evangelista, extinctà stirpe Iechoniæ, qui ex Davide per Salomonem descendebat, jus ad regiam dignitatem fuisse devolutum ad Salathielem, filium naturalem *Neri*, qui ex Davide per Nathanem procedebat; & quia Salathiel ordine juris ad regiam dignitatem successit Iechoniæ, ideò *Matthæus* Salathielem appellat filium Iechoniæ, habità scilicet ratione legalis successionis, seu spectato dumtaxat ordine iuris ad regiam dignitatem; quod quidem manifestò probat : *Matthæum*, in conscribenda genealogia Christi, legalem tantum successionem, seu ordinem juris ad sceptrum exhibuisse, *Lucam* verò ad naturalem successionem, seu ad naturalis generationis ordinem attendisse.

Respondéo : Iechoniam fuisse patrem naturalem Salathielis, nec contrarium evinci posse ex prædictione Ieremiæ, in qua adversarii suæ coniecturæ proram puppimque constituunt. At enim, quamvis Deus per suum Prophetam denunciaverit, Iechoniam futurum sterilem, hæc tamen divina maledictio non orbitatem prolis, sed dumtaxat Regni, prosperitatisque negationem significat, hæc dicit Dominus : *Scribe virum sterilem, virum, qui in diebus suis non prosperabitur: neque erit de semine ejus*

eius vir, qui sedeat super solium David & potestatem habeat ultra in Iuda. Idque constat ex ipsomet *Ieremia*, qui cap. 18. testatur, *Iechoniam* filios reverè procreasse, & ex lib. 1. Paralip. cap. 3. ubi numerantur octo filii *Iechoniz*, quorum secundus appellatur *Salathiel*, quæ sanè Scripturæ Sacræ loca omni tergiversationi, & comminiscendi libidini aditum præcludunt. Cæterùm, quamvis *Iechonias* filios genuerit, non fuit at tamen cassa sacri oraculi comminatio, nam in *Iechoniz* filios reapse incubuit divina maledictio, quando quidem, sicut refert Scriptura Sacra, è regio fastigio exciderunt, & in statum inferiorem sunt redacti, illumque maximam partem luctuosum, probrosum, variisque adversæ fortunæ casibus & calamitatibus obnoxium. Ita hunc *Ieremie* locum interpretantur Sancti Patres, potissimum *Hieronymus* in cap. 22. illius Prophetæ, S. Thomas 3. p. q. 31. art. 2. ad 3. Præterea, etsi darem, *Iechoniam* obiisse improlem, falsum tamen esset, quod asserunt adversarii, videlicet extinctâ stirpe *Iechoniz*, qui ex Davide per Salomonem descendebat, jus regnandi ad posteros *Nathanis* fuisse devolutum. Enim verò, quod credibile est, nullos, mortuo *Iechonia*, extitisse supersites nepotes *Salomonis*? Legimus cap. 11. lib. 2. Paralip. Roboamum, filium *Salomonis*, genuisse viginti octo filios: *Abiam*, filium *Roboami*, genuisse viginti duos, cap. 12. *Iosaphat* procreasse septem, cap. 21. & sic de cæteris Regibus Iuda usque ad *Iechoniam*, verosimile autem non est, numerosam stirpem tot nepotum *Salomonis*, qui à tempore *Roboami* usque ad obitum *Iechonie* in plures familias succrescere & sobolescere potuerunt, ita post obitum *Iechoniz* fuisse extinctam, ut ne ullus quidem ex stirpe *Salomonis* residuus fuerit, qui jus haberet ad regiam dignitatem, & ad eam necessarium fuerit asciscere posteros *Nathanis*. Denique, quamvis *Matthæus* dicat, *Salathielem* esse filium *Iechoniz*, *Lucas* verò *Salathielis* patrem assignet *Neri*, indè tamen nullo pacto colligi debet, *Iechoniam*, fuisse patrem dumtaxat legalem *Salathielis*, *Neri* autem fuisse patrem naturalem *Salathielis*, sed potius indè colligitur id, quod mox dicebamus, duos videlicet extitisse *Salathieles*, unum, qui fuit filius *Iechoniz*, qui ex Davide per Salomonem descendebat; alterum, qui fuit filius *Neri*, qui ex Davide per *Nathanem* suam originem trahebat, illius meminisse *Matthæum*, istius *Lucam*. Et certè, cum alii fuerint *Salathielia* Maiores apud *Lucam*, quàm apud *Matthæum*, longè probabilius est, utrumque Evangelistam diversarum personarum mentionem fecisse. Idem dicendum puto de *Zorobabele*, quem in genealogia Christi ponit *Matthæus*, & quem alium fuisse arbitror à *Zorobabele*, cuius, in describendo stemmate Christi, mentionem facit *Lucas*. Ita post *Iulium Africanum* docent antiqui Sancti Patres, qui constanter affirmant: *Iacob* ex Davide per lineam *Salomonis* descendisse, & promissiones de *Messia* nascituro in linea itidem *Salomonis* fuisse impletas; porro, si *Salathiel* & *Zorobabel*, quos ex Davide per *Nathanem* descendentes exhibet S. Lu-

cas, essent iidem ac Salathiel, & Zorobabel, quos *Matthæus* in genealogia Christi recenset; Iacob non ex Davide per lineam Salomonis, sed per lineam Nathanis descendisset, & promissiones à Deo factæ Davidi de nascituro ex eius femine Messia, non in linea Salomonis, sed in linea Nathanis fuissent adimpletæ. Sicut ergo duo distingui debent Salathiel, quorum unus pertinet ad lineam Salomonis, & fuit filius naturalis Iechoniæ, cuius meminit *Matthæus*, alter verò pertinet ad lineam Nathanis, & fuit filius naturalis Neri, quem *Lucas* recenset: sic duo discerni debent Zorobabes, quorum unus ex Davide originem habet per lineam Salomonis, & fuit filius naturalis Salathielis, ut ait *Matthæus*; alter verò ex Davide per Nathanem descendit, & est filius naturalis alterius Salathielis, quem inter posteros Nathanis *Lucas* reponit. Idque duplici momento confirmari potest, primò, quia Zorobabel, cuius meminit *Matthæus*, diù post captivitatem Babylonicam genitus fuit, Salathiel namque pater ipsius fuit genitus in captivitate Babylonica, at Zorobabel, quem exhibet *Lucas*, fuit vel ante captivitatem Babylonicam, vel saltem primis annis captivitatis genitus, utpote qui iam annis maturus populum Iudaicum è captivitate ad patrium solum reduxit, sicut legitur lib. 2. Esdræ cap. 2. Deindè, à Zorobabele, quem refert *Matthæus*, usque ad Iosephum, novem dumtaxat putantur generationes, sed à Zorobabele, quem producit *Lucas*, septemdecim numerantur generationes, ex quibus apparet, utrumque Zorobabelem, non unum, sed duos planè diversos homines fuisse.

Arguitur quartò: *Matthæus*, texendo genealogiam Christi, asserit Iosiam fuisse patrem Iechoniæ: *Iosias*, inquit, genuit *Iechoniam*. Atqui Iosias non fuit verus & naturalis pater Iechoniæ, nam constat ex lib. 4. Reg. cap. 24. lib. 2. Paralip. cap. 36. & Ieremiæ cap. 22. Ioakinum fuisse patrem naturalem Iechoniæ, ergo *Matthæus* non est secutus naturalis generationis ordinem.

Priusquàm diluam hanc objectionem, quam olim *Porphyrus*, sicut testatur *S. Hieronymus* in cap. 1. Danielis, Christianis tanquam inextricabilem obiiciebat, præstat observare, quòd interfecto Iosia, Regi Iuda, in prælio Mageddonensi susceptus est Ioachaz filius Iosia, sed cum paulò post Ioachaz exutus Regno obiisset captivus in Ægypto, victor Pharaon Nechao successorem Ioachazo dedit Eliakim fratrem eius, alterum scilicet Iosia filium, qui etiam Ioachim, & Iechonias est nuncupatus. Hic regnum per annos undecim varià & ancipiti fortuna tenuit, sed tandem ab Ægyptiorum servitute recedens, Nabuchodonosori Chaldæorum Regi cum se addixisset, fidem ei datam violare, & impositum sibi iugum excutere tentavit, at id non impunè tulit, nam Syrorum & vicinarum gentium incursionibus vexatus, tot inter discrimina, acerbosque casus vità functus est, filiumque reliquit, qui Binominus fuit, dictus scilicet Ioakin, & Iechonias. Hic, tribus mensibus in Principatu exactis, deportatus est in

in Babylonem , & in eius locum subrogatus est Sedecias , Iosiz filius , & patruus Iechoniz , qui , post annos undecim , oculis effollis abductus est Babylonem . Hac præmissâ observatione .

Respondeo : Duos debere distingui Iechonias , primum videlicet & secundum . Iechonias primus , qui & Eliachim , ac Ioakim est appellatus , fuit filius Iosiz , eum quippe Iosias genuit in transmigratione Babylonis , hoc est , sub tempora transmigrations Babyloniz , jam nutante statu populi Judaici , & imminente deportatione Babylonica . Iechonias verò secundus , qui etiam dictus est Ioakim , fuit filius Iechoniz primi , nepos Iosiz , & Pater Salathielis , quem genuit post transmigracionem Babylonis , idest , postquam populus iudaicus fuisset in Babylonem asportatus . Quamvis enim iste Iechonias secundus , post tres menses in principatu exactos , fuerit , ut mox diximus , in captivitatem abductus , ibique catenis vinctus , & in carcere durè admodum , vivente Nabuchodonosore , habitus , illo tamen mortuo , & ab Evilmerodacho , filio Nabuchodonosoris , carcere eductus , Regiè in illius aula habitus est , sicut legitur *Ieremia cap. 52. & lib. 4. Reg. cap. 25.* quo tempore , persistente adhuc captivitate Babylonica , Salathielem genuit . Utrumque Iechoniam accuratè distinguit Matthæus in genealogia Christi , nam quando dicit : *Iosias genuit Iechoniam & fratres eius in transmigracione Babylonis* , indicat Matthæus his verbis Iechoniam primum , qui *Eliachim* , ac *Ioakim* est appellatus , quem Iosias circa transmigracionis tempora genuit , quique fratres habuit *Ioachazum , & Sedeciam & Sellum* . Quando vero subdit idem Evangelista : *& post transmigracionem Babylonis Iechonias genuit Salathiel* , his verbis designat Matthæus Iechoniam secundum , qui fuit filius Iechoniz primi , nepos Iosiz , Pater Salathielis , nullosque fratres habuit . Non ergo , inquit S. *Ambrosius lib. 3. in Luc. suppressit alterum Evangelista , sed utrumque signavit , quod uterque Iechonias dictus sit* . Idem docent SS. Patres , Epiphanius hæresi vi. *Hieronymus in cap. 1. Matthæi , & Sanctus Thomas 3. part. quæst. 31. art. 3. ad 3.* ubi asserunt , in Iechoniam primum , qui fuit filius Iosiz , desinere secundam tessaredecadem , seu numerum quatuordecim personarum , quas in secunda classe exhibet Matthæus , & à Iechonia secundo , qui fuit filius Iechoniz primi , & nepos Iosiz , tertiam incipere tessaredecadem , quæ desinit in Christum . Quapropter , audiri non debent moderni quidam Critici , qui suspicantur mendosum esse codicem Matthæi , putantque Ioakimum , patrem Iechoniz , omissum esse in secunda classe , ita ut vera sic debeat restitui lectio , *Iosias genuit Ioakim , Ioakim genuit Iechoniam* . Refellitur etiam coniectura *Petri Possini* , qui existimat , Matthæum unius dumtaxat Iechoniz , patris Salathielis , mentionem fecisse , alterum verò silentio penitus obruisse . Refellitur , inquam , hæc vana Possini coniectura , nam si Matthæus unius tantum Iechoniz , patris Salathielis , mentionem fecisset , tredecim solum personæ reperirentur in tertia classe , seu in

tertia tessaredecade à transmigratione Babylonis, usque ad Christum, cum tamen certum sit, quatuordecim numerari à Matthæo. Nec valet, quod reponit *Possunt*, ad complendum numerum quatuordecim in tertia classe, præter Iosephum numerari debere etiam Mariam, Matrem Christi; futilis, inquam; est hæc responsio; nam primò, moris non erat apud Hebræos, sicut antè observavimus, ut sceminx in genealogiis hominum censerentur. Secundò, cum pater, & mater unius dumtaxat generationis sint authores, Iosephus, & Maria non potuerunt, respectu Christi, nisi unius generationis numerum conficere. Non potuit ergò Lucas, ad complendum in tertia classe numerum quatuordecim, Mariæ generationem computare quasi diversam à generatione Iosephi. Quapropter, ut plenè, & integrè stent tres classes, seu tres tessaredecades, quas in genealogia Christi exhibet Matthæus, necessariò dicendum est: eum utriusque Iechoniæ mentionem fecisse, idque Lector facillè intelliget ex ordine genealogiæ Christi secundum Matthæum, quem in fine hujus Dissertationis attexam.

Arguitur quintò: Matthæus in genealogia Christi ait, Achazum, Regem Juda, genuisse Ezechiam, atqui tamen Achaz non fuit pater naturalis Ezechiz, ergò Matthæus, in describenda genealogia Christi, non est secutus naturalis generationis ordinem, sed solum successionem, seu ordinem juris ad Regiam dignitatem. Prob. min. Legitur lib. 4. Reg. cap. 16. Achazum, Regem Juda, Joatham filium, regnare cepisse anno ætatis suæ vigesimo, eumque sexdecim annis Regnum occupasse, sicque in integrum vixisse triginta sex annis. Et cap. 18. eiusdem libri dicitur: Ezechiam, Achazi filium, & immediatum in Regno successorem, viginti quinque fuisse annorum cum regnare cœpit, si ergò viginti quinque anni, quos natus erat Ezechias, dum Regni habenas moderari cœpit, detrahantur de annis triginta sex, quos habebat Achazus quando mortuus est, constabit Ezechiam fuisse conceptum ab Achazo dum adhuc puerulus decennis erat, & anno undecimo vitæ Achazi natum esse Ezechiam, quòd sanè tam experientiæ, quàm consueto naturæ ordini omninò repugnare videtur, nemo quippè in tota historia, seu sacrâ, seu exoticâ, auditus est, qui genuerit decennis. Longè ergo vero similis est, Achazum non fuisse verum, & naturalem patrem Ezechiz, sed Achazo absque liberis mortuo, proximum Regii sanguinis Principem, seu Ezechiam, ritu generis, & jure recepto, successisse. Quod quidem jus ad Regiam dignitatem attendens Matthæus, dicit, Achazum genuisse Ezechiam, quia Ezechias in Regia dignitate successit Achazo, quamvis non esset filius ipsius naturalis.

Præterea, lib. 4. Reg. cap. 16. legitur, Achazum transfulisse filium suum per ignem, secundum Idola gentium, idest, eum flammis combussisse sacrilego gentium ritu, ergò Achazus nullum post suum obitum reliquit supersutem filium, ac subindè esse non potuit pater naturalis Ezechiz.

Huic

Huic obiectioni respondet *S. Hieronymus*: Epist. 132. ad Vitalem, Achazum anno decimo ætatis suæ reverà genuisse Ezechiam; pleraque adducit exempla, ut probet, Achazum, impotentis libidinis æstu abreptum, hac in juvenili ætate procreare potuisse Ezechiam tanquàm præcocem protervæ, & luxuriantis pueritiæ fructum. Huic *S. Hieronymi* responsioni subscribit *Fridericus Spanhemius* part. 2. Dubiorum Evangelicorum, Dubio 5. ubi ætatem undecim annorum quandòque forturæ habilem esse probat exemplo, quod *Scaligerus* memoriâ suâ contigisse narrat in Civitate Lectoratenſi Novem populaniæ, in qua puer minor annorum undecim genuit ex puella consobrina sua, quæ nondùm decimum annum expleverat. Verùm, quia difficile creditu est, Achaz antè pubertatis annos genuisse Ezechiam, ideò

Respondeo cum multis Scripturæ Sacræ Interpretibus: Achazum fuisse quatuordecim annorum quando genuit Ezechiam. Ratio est, quia in Scriptura Sacra tacentur anni incompleti Achazi; erat enim Achaz, cùm regnare cœpit, viginti annorum & unius incompleti, quem non numerat Scriptura, rursùm Achaz regnavit sexdecim annis scilicet integris, & decimo septimo incompleto: quare, iuxtà hunc computum, Achaz mortuus est anno ætatis suæ trigésimo octavo. Similiter, Ezechias erat tantùm viginti quatuor annorum completorum cùm regnare cœpit, sed inchoarat annum vigésimum quintum. Si ergo numerus viginti quatuor annorum completorum, quos natus erat Ezechias, quando Regnum capessivit, detrahatur de annis triginta octo, quos habebat Achaz, quando è vivis excessit, perspicuum erit, Achazum anno ineunte decimo quarto ætatis suæ genuisse Ezechiam, quod sanè non est incredibile, utpotè nec experientiz, nec naturæ ordini contrarium.

Ad aliam obiectionis partem respondeo: Achazum non combussisse filium suum, sed illum dumtaxat traduxisse per ignem, hoc est, filium suum, iuxtà sacrilegum gentium ritum, lustrasse & consecrassè Idolo Moloch. Hinc lib. 2. Paralip. cap. 28. dicitur de eodem Achazo, quod lustravit filios suos in igne. Non est autem verosimile, Achazum truculentâ superstitione & feritate plusquàm Scythicâ in honorem Idoli Moloch filios suos holocausto consumpsisse.

Arguitur sextò *Matthæus* in genealogia Christi asserit, Zorobabelem genuisse Abiudem, atqui tamen lib. 2. Paralipom. cap. 3. inter filios Zorobabelis nullus nominatur Abjud, igitur Zorobabel non fuit pater naturalis Abiudis, ac proindè *Matthæus* non est secutus naturalis generationis ordinem.

Respondeo: *Matthæum* non ex libris Paralip. recensuisse in genealogia Christi Abiudem, Zorobabelis filium, eiusque posteros usque ad Iosephum, sed hanc seriem genealogicam Abiudis, filii Zorobabelis, legisse *Matthæum* in Tabulis genealogicis, quæ, ut superius diximus, maximâ curâ & religione apud Judæos servabantur, & quæ nunc omni-

nò perierunt. Cur autem hæc series genealogica Abiudis non fuerit à Scriptore Sacro lib. Paralip. observata? Hanc rationem probabilem allignant Scripturæ Sacræ Interpretes; dicunt enim, genealogiam à *S. Mattheo* contextam, & ad Iosephum per Abiudem perductam, fuisse quidem hominum è Davidis familia progenitorum, sed obscuræ admodum conditionis, & singulari Dei dispensatione ad statum privatum, vilem & abiectum redactorum; & quia ista declinatio in Abiude, filio Zorobabelis, facta est, indè fortè contigisse, ut Auctor librorum Paralip. nec Abiudis, nec posterorum eius, Maiorum Iosephi obscuram vitam agentium, meminerit, sed eos dumtaxat filios Zorobabelis, illorumque posteros memorarit, quorum tàm temporis nomen clarius & celebrius erat.

Arguitur septimò: *Mattheus* in genealogia Christi scribit, *Ioramum* genuisse *Oziam*, atqui tamen *Ioram* non genuit *Oziam*, sed potius *Ioram* genuit *Ochoziam*, *Ochozias* genuit *Ioasum*, *Ioasus* genuit *Amaziam*, *Amazias* genuit *Oziam*, ut constat ex libris Regum & Paralip. ergo *Mattheus* tres generationes prætermisit, cuius omissionis alia nequit asserri ratio, nisi quia *Mattheus* in genealogia Christi non naturalem successionem exhibere voluit, sed solùm proponere ordinem iuris & successionis ad regiam dignitatem.

Præterea, *Mattheus* in genealogia Christi à *Salmone*, filio *Naasson*, usque ad nativitatem Davidis Regis, quatuor tantummodò numerat generationes, videlicet *Salmon*, *Booz*, *Obed*, & *Iesse*, atqui plures quàm quatuor debuerunt esse generationes à *Salmone* usque ad nativitatem Davidis Regis, nam *Salmon*, postquam Israelitæ ingressi sunt in terram Chanaan, seu paulò post excidium Urbis Jericho, uxorem duxit *Rahab*, & genuit *Boozum*. Chronologi autem ab ingressu Israelitarum in terram Chanaan usque ad nativitatem Davidis Regis numerant ad minus trecentos sexaginta sex annos; porrò, credibile non est, quatuor tantummodò generationes implere potuisse spatium trecentorum sexaginta sex annorum, debuissent enim *Salmon*, *Booz*, & *Obed* in affecta & decrepita senectute, immò ultrà centesimum ætatis annum procreandis liberis operam dare. Sed quis non videt, absurdum esse in tribus personis eisdem familiæ sibi invicem succedentibus tàm tardas & intempestivas ponere generationes, iis propè temporibus, quibus dies annorum hominis septuaginta anni, si autem in potentatibus octoginta anni, & ampliùs eorum labor & dolor, ut habetur Psalm. 89. Constat igitur, *Mattheum* à *Salmone* usque ad ortum Davidis Regis aliquas reticuisse generationes, ac proindè illum naturalis generationis ordinem non fuisse secutum.

Respondeo ad primam obiectionis partem: *Mattheum* quidem in genealogia Christi tres prætermisisse Reges, *Ochoziam* nimirum, *Ioasum*, & *Amasiam*; indè tamen non sequi: *Mattheum* in genealogia Christi naturalem parentum Iosephi successionem non exhibuisse. Ratio est, quia licet *Ozias* immediatè non successerit *Ioramo*, ei tamen mediatè &

secundum naturam, utpotè ipsius nepos, successit. Nec *Matthæus* vitio verti debet, quòd in genealogia Christi aliquas omiserit generationes, in genealogiis namque aliquas personas reticere posse tententur omnes, quia salvà recti sermonis proprietate dici potest, filium à patre, nepotem ab avo, & pronepotem à proavo genitum fuisse; undè, sicut nepotes dicuntur filii apud Hebræos, ita avi, proavi, & atavi, patres appellantur, qui censerì possunt nepotes genuisse, generatione videlicet mediata, quà reverà ab illis genus ducunt. Cur autem *Matthæus* in texenda genealogia Christi tres illos Reges prætermiserit? Hæc ratio afferri potest, voluit quippè *Matthæus* totam seriem progenitorum Christi tribus tesselaredecadibus, hoc est, quatuordecim personarum numero ter repetito, sive rotundandi numeri, vel memoriz iuvandæ causâ, completi. Cùm igitur in secunda classe maiorum Christi septemdecim occurrerent generationes, ut numerus quatuordecarius sibi constare posset, tres illos Reges prætermisit Evangelista, ob peculiarem Dei maledictionem domui Achab, scelestissimi Israel Regis, per Eliam Prophetam 3. Reg. cap. 31. & 4. Reg. cap. 9. prædictam, & quia Deus, solito furore exardescens, in castigandis filiis ob peccata parentum ultrà tertiam, vel quartam generationem pœnam protendere non consuevit, sicut legitur Exodi cap. 30. ideo *Matthæus*, omisissis tribus illis Regibus, recenset alios Reges, qui in eadem linea ab Achabo per fœmineum genus, idest, per Athalias, Joaram uxorem, & filiam Achabi, genus ducebant. Sunt nonnulli Auctores, qui dicunt: *Matthæum* ideo tres illos Reges, Ochoziam, Joazum, & Amasiam silentio damnasæ, quia in Tabulis genealogicis, quas Judæi maximà religione aservabant, trium illorum Regum nomina desiderabantur, utpotè per quamdam veluti excommunicationis, quam viventes incurrerant, sententiam, ex iisdem Sacerdotali expuncta iudicio, ignominiz causâ, non secus ac deindè in Ecclesia Catholica mos usurpatus est, nomina quorundam Episcoporum mortuorum, qui ob fidem malè audiebant, & graviori maculâ notati erant, è sacris dyptichis eradendi. Sed hæc conjectura, ut verum fatear, è sacris est, nulliusque antiqui & probatz Fidei Auctoris testimonio nixa.

Ad alteram objectionis partem respondeo: *Matthæum*, à tempore, quo *Salmon* duxit uxorem *Rahab*, hoc est, ab ingressu Israelitarum in terram Chanaan usque ad ortum Davidis Regis, aliquas generationes silentio præterisse. Enimverò, à tempore, quo *Salmon* matrimonium inivit cum *Rahab* usque ad ortum Davidis Regis, non solum interfluxere trecenti sexaginta sex anni, ut vulgò opinari solent Chronologi, sed potius elapsi sunt quadringenti nonaginta duo anni, supputando videlicet annos servitutum Israelitarum distinctos ab annis præfecturæ Iudicum, sicut re verà distingui debere, infrà in Canone Chronologico præbabo ex libro Iudicum, in quo anni servitutum Israelitarum, qui post obitum Iosue, alienis interdum servierunt Regibus, accuratè recensentur.

tur distincti ab annis Præfecturæ Iudicum . Si ergo à tempore, quo Salomon sibi matrimonio *Rahab* sociavit, usque ad ortum Davidis Regis, quadringenti nonaginta duo interfluxerunt anni, impossibile est, ut quatuor tantummodò generationes tam diuturnum impleverint temporis intervallum, nisi dicatur Salmonem speciali miraculo ultra centesimum, & vigesimum quintum ætatis annum genuisse Boozum; idemque miraculum in eadem familia fuisse in *Boozo*, *Obede*, & *Iesse* iteratum, quod sanè agrè credi, ac multò difficiliùs persuaderi potest. Quapropter, standum est sententiæ virorum eruditorum, qui docent: *Mattheum*, à Salmonis tempore usque ad nativitatem Davidis Regis, aliquas prætermisisse generationes, sive ut in omni classe numerum quatuordecim personarum, sibi præfixum retineret, sive ob aliam rationem, quam Deus nobis ignorat & occultam esse voluit; quod tamen non impedit, quin *Mattheus*, sicut mox exposuimus, naturalis generationis ordinem fuerit secutus.

Arguitur ultimò: Ideò *Iulius Africanus* asserit, Iosephum filium fuisse naturalem *Iacob*, & filium legalem *Heli*, quia supponit, quòd defuncto *Heli* absque liberis, *Iacob*, qui erat frater ipsius uterinus, ei, juxta legem Deuteronomii cap. 25. suscitavit semen, & genuit Iosephum naturali quidem ratione filium suum, sed secundùm legem filium *Heli*, atqui lex, quâ jubetur Deuteronomii cap. 25. ut frater demortui fratris uxorem viduam ducat, atque prolem suscitet, non intelligitur de fratribus uterinis, sed solùm de fratribus consanguineis, ad conservanda scilicet familiarum jura, quæ ex sola agnatione censentur; fratres autem, uterini non sunt inter agnatos, immò possunt esse ex diversa Tribu & familia orti; igitur *Iulii Africani* ratio falso nititur fundamento.

Respondeo: Legem latam Deuteronomii cap. 25. esse intelligendam, juxta SS. Patres, qui *Iulii Africani* rationem secuti sunt, non solùm de fratribus germanis, sed etiam de fratribus uterinis, qui tenebantur uxorem ducere fratris defuncti absque liberis, eique jure leviratus suscitare prolem. Quocirca, cum in hoc consentiant SS. Patres, flocci fieri debet hæc recentium Criticorum conjectura.

Præterea, negari non potest hanc legem, de suscitando semine fratris absque liberis demortui, extendi etiam ad propinquos, ut constat ex facto *Ruth*, quæ in matrimonium ducta fuit à *Boozo*, ut hic suscitaret semen *Mahaloni*, propinquo suo; falsum igitur est, hanc legem restringi ad solos fratres, qui ex eodem patre geniti sunt.

Denique, quamvis hæc lex Deuteronomii cap. 25. fratres uterinos ab hæreditate fratris, & ab uxoris ejus viduæ nuptiis removeret; necessariò tamen hujus legis exceptio esset admittenda in specie proposita *Iacob*, & *Heli*, quierant duo fratres uterini. Ratio est, quia *Heli* fuit ultimus eorum, qui ex Davide per Nathanem descendebant; mortuo itaque *Heli* absque liberis, & in eo extinctâ stirpe Davidis per Nathanem, hæreditas *Heli* devoluta fuit ad *Iacobum*, fratrem ipsius uterinum, qui ex Da-

vide

vide per Salomonem descendebat ; quamobrem, Iacob ad capeſſendam, hæreditatem Heli fratris ſui uterini abſque liberis deſuncti, fuit lege Deuteronomii adaſtus inire cum vidua Heli matrimonium, cuius matri. monii onus, unà cum hæreditatis honore fuit coniunctum, & ſic, extin- cta ſtirpe Davidis per lineam Nathanis, hæreditas Heli, qui fuit illius lineæ poſtremus, conſervata eſt in familia Iacob, qui ex Davide per li- neam Salomonis originem ducebat.

Inſtabis, ſi Iosephus fuiſſet filius legalis Heli, debuifſet ejus nomi- ne appellari, nam Deuteronomii cap. 25. in deſcriptione juris, & exercitii Leviratus præcipitur, ut primogenitus ſuſcitatus fratri deſuncto nomen ejus ſuſcipiat; atqui conſtat, Iosephum non fuiſſe appellatum nomine Heli, argumento itaque eſt, Iosephum non fuiſſe filium legalem Heli.

Reſpondeo cum Sancto Auguſtino Quaſt. 46. in Deuteron. hæc lege Leviratus præcipi, non ut filius procreatus nomen deſuncti Pa- tris, cui ſuſcitatur, obtineat, ſed quod ille non ſine poſteritate mortuus eſſe videatur, ideò permaneat ejus nomen, hoc eſt, me- moria. Neque etiam ſi ipſe filium genuiſſet, inquit Aquilinus ille Do- ctor, nomen ſuum ei fuerat impoſiturus, ut nomen ejus non deleteretur ex Iſrael; ſed ex hoc utriusque non deleteretur, quia non ſine liberis ex hac vita emigraret. Et hoc jubetur in ejus uxore fratrem ejus implere, quod ille non potuit, nam eſſi frater non fuiſſet, & propinquus ducebat uxorem ejus, qui ſine filiis mortuus eſſet ad ſuſcitandum ſemen fratri ſuo: ſic ſ. cit Booz ducendo Ruth ut ſemen excitaret propinquo ſuo, Mahaloni ſcilicet, cujus fuerat uxor, nec de illo pepererat, & tamen qui de illa natus eſt, ex nomi- ne quidem deſuncti conſtitutus eſt, quia filius ejus eſt dictus, atque ita fa- ctum eſt, ut nomen deſuncti non deleteretur ex Iſrael, nec tamen ejus nomine appellatus eſt, ſed dictus eſt Obed. His gemina habet S. Auguſt. lib. 2. Re- tract. cap. 7. & 12.



ORDO GENEALOGIÆ CHRISTI

secundum Matthæum.

Prima Tessaredecas. Secunda Tessaredecas. Tertia Tessaredecas.

1 Abraham.	1 Salomon.	1 Iechonias secundus.
2 Isaac.	2 Roboam.	2 Salathiel.
3 Iacob.	3 Abias.	3 Zorobabel.
4 Iuda.	4 Afa.	4 Abiud.
5 Phares.	5 Iosaphat.	5 Eliacim.
6 Efron.	6 Ioram.	6 Azor.
7 Aran.	7 Ofias.	7 Sadoc.
8 Aminadab.	8 Ioathan.	8 Achim.
9 Naafson.	9 Achaz.	9 Eliud.
10 Salmon.	10 Ezechias.	10 Eleazar.
11 Booz.	11 Manafses.	11 Mathan.
12 Obed.	12 Amon.	12 Iacob.
13 Iesse.	13 Iofias.	13 Ioseph.
14 David.	14 Iechonias primus.	14 CHRISTUS.

ORDO GENEALOGIÆ CHRISTI

secundum Lucam.

1 Adam.	16 Phaleg.
2 Seth.	17 Ragau.
3 Enos.	18 Sarug.
4 Cainan.	19 Nacor.
5 Malaleel.	20 Thare.
6 Jared.	21 Abraham.
7 Enoch.	22 Isaac.
8 Mathufale.	23 Iacob.
9 Lamech.	24 Iuda.
10 Noe.	25 Phares.
11 Sem.	26 Efron.
12 Arphaxad.	27 Aran.
13 Cainan.	28 Aminadab.
14 Sale.	29 Naafson.
15 Heber.	30 Salmon.

31 Booz.

31 Booz .	54 Neri .
32 Obed .	55 Salathiel .
33 Iesse .	55 Zorobabel .
34 David .	57 Refa .
35 Nathan .	58 Ioanna .
36 Mathata .	59 Iuda .
37 Menna .	60 Ioseph .
38 Melca .	61 Semei .
39 Eliakim .	62 Mathathias .
40 Jona .	63 Maath .
41 Ioseph .	64 Nagge .
42 Iuda .	65 Hesli .
43 Simeon .	66 Nahum .
44 Levi .	67 Amos .
45 Mattath .	68 Mathathias .
46 Iorim .	69 Ioseph .
47 Eliezer .	70 Ianne .
48 Iesu .	71 Melchi .
49 Her .	72 Levi .
50 Elimadan .	73 Mathat .
51 Cofan .	74 Heli .
52 Addi .	75 Ioseph .
53 Melchi .	76 CHRISTUS .

In hac Genealogia CHRISTI, quam texit *S. Lucas*, septuaginta sex enumerantur generationes. At, si Deus, ad quem *S. Lucas* generationum numerum perducit, his generationibus accenseatur, erunt generationes septuaginta septem, ut optimè observat *S. Thomas* 3. part. quæst. 31. art. 3. ad 3. ubi mysticam illius numeri septuaginta septem generationum expositionem tradit.



DISSERTATIO QUINTA

In qua evincitur, in putatione annorum, qui à Mundi primordio ad Natale usque Christi Domini interfluxerunt, standum esse sacri Textus Hebraei, & Editionis nostræ vulgatæ Chronologiæ, non autem calculo versionis LXX. Interpretum.

QUamvis tam ex sacra, quam ex prophana historia supputari possint anni, qui à mundi exordio ad Natale Christi Domini effluxerunt, fateri tamen necesse est, hanc temporum notitiam hisce præsertim temporibus lubricam nimis, implexam & operosam evasisse, ob incredibilem Chronologorum opinandi diversitatem, & penè inexplicabiles, quas in vixerunt, difficultates, quæ plurimum laboris & negotii etiam viris doctis exhibere solent. Alii siquidem, quos inter hac tempestate celebriores fuerunt Jo. Morinus in suis *Exercitationibus Biblicis*, Isaac Vossius, Vintoniensis in Anglia Canonicus, in *Syntagmate de LXX. Interpretibus*, & Pater Paulus Pezronus, Ordinis Cisterciensis, sacræ facultatis Parisiensis Doctor, in Gallico libro, anno 1687. edito, cui titulus est: *Antiquitas temporum restituta, & propugnata adversus Judæos, & recentiores Chronologos*, contendunt, LXX. Interpretum Chronologiam, in putandis annis, qui à conditu mundi ad Natale usque Christi interfluxere, longè præferendam esse sacri Textus Hebraici, & editionis vulgatæ Chronologiæ, idque potissimum probant ex Chaldæorum, Egyptiorum, Sinarumque antiquitatibus, quæ cum sacri Textus Hebræi Chronologia, utpotè contrarij, nullo pacto coherere possunt. Sed non advertunt sagacissimi illi antiquitatis indagatores, nationum Orientalium populos ignorantiz, & idololatriæ tenebris immerfos, ut gentis suæ primordia augulliora redderent, splendida mendacia adornasse, nullasque, præter Sacram, esse Historias, quæ primas suas origines fabulis permixtas non habeant. Alii ex adverso viri doctissimi sacri Textus Hebræi Chronologiam, cui apertè consona est nostra Editio vulgata, pro aris ac focis tuentur, eamque in putandis annis, qui à mundi creatione usque ad Natale Christi elapsi sunt, LXX. Interpretum Chronologiæ anteponendam esse asserunt. Hæc autem Chronologorum opinandi diversitas nata est ex discrepantia Hebræorum, Græcorumque Codicum in numerandis annis primæ, & secundæ ætatis, seu in recensendis annis Patriarcharum antè, & post diluvium. Græcus siquidem Codex, seu Versio LXX. Interpretum, addit su-
pra

pra Textus Hebræi calculum mille fermè & quingentos annos, quæ discrepantia multos hujus temporis doctissimos Chronologos ad scribendum impulit, aliis calculum Hebræorum, calculo Græcorum, seu LXX. Interpretum, anteponentibus, aliis stantibus pro calculo LXX. Interpretum. Accedit ad difficultatis cumulum, quod eorum, qui vel LXX. Interpretum, vel Hebræorum sequuntur Chronologiam, non una sit omnium sententia. Nam primò, inter eos, qui LXX. Interpretum sectantur Chronologiam, alii sunt, qui à creatione mundi usque ad Natale vulgare Christi numerant annos 5493. sicut Græci Antiocheni, alii numerant annos 5501. sicut Græci Alexandrini, alii recensent annos 5509. ut Græci Constantinopolitani, alii denique, cum *Paulo Pezrono*, mox citato, computant à conditu mundi usque ad Natale Dionysianum, seu vulgare Christi, annos 5873. Secundò, non minùs inter se dissident hi, quibus probatur sacri Textus Hebræi Chronologia. Sunt etenim, qui cum doctissimo *Petavio* subducunt à creatione mundi usque ad Natale vulgare Christi, annos 3983. Sunt alii, qui cum *Vsserio* numerant annos 4003. uno verbo, quilibet Chronologus in consignando anno mundi, quo natus est Christus Dominus, suis indulget coniecturis, adeò ut in re tam obscura quidquam certi definiri posse non videatur. Verùm, ut quod ipse probabilius esse cenfeo, aperiam; multis argumentis hac in Dissertatione probandum aggredior, sacri Textus Hebræi Chronologiam in, consignando anno mundi, quo natus est Christus Dominus, præferendam esse LXX. Interpretum Chronologiæ. Quoto autem mundi anno natus sit Christus Dominus? opportuniùs ostendam in Canone Chronologico, quem ad calcem hujusce Tractatus in rem Chronologiæ studioforum attexam, & in quo per singulas mundi decurrendo ætates, & supputando annos servitutum Israelitarum (quos, nonnulli Chronologi, tempora plùs iustò contrahentes, cum annis præfecturæ Judicum perperram confundere solent) Natale vulgare Christi consignabo anno mundi 4138.

DICO ITAQUE: In putatione annorum, qui interfluxerunt à creatione mundi usque ad Natale Christi Domini, præferendam esse sacri Textus Hebræi Chronologiam calculo LXX. Interpretum, ac subindè Christum Servatorem nostrum natum esse expleto quarto mundi millenario, juxta sacri Textus Hebræi calculum, non verò in sexto mundi millenario, sicut habent mendosi, & interpolati Codices Græci.

Hæc assertio probatur primò, convellendo præcipuum fundamentum, quo nituntur LXX. Interpretum Chronologiæ patroni. Huic siquidè standum est Chronologiæ, quæ à Mosis tempore ad hanc usque ætatem semper pura, integraque permanfit, nec à Iudæis fuit unquàm corrupta, atqui sacri Textus Hebræi Chronologia à Mosis tempore ad hanc usque ætatem pura, integraque permanfit, nec unquàm Iudæorum malitià fuit corrupta, ergò standum est sacri primigenii Textus He-

Hebræi Chronologiæ . Prob. min. multis momentis, primò , quia credibile non est, Iudæos, odio licèt in Christianos percitos , in depravandam, sacri Textus Hebræi Chronologiam incumbere, & certatim conspirare potuisse . Quæ enim, amabo, spes esse potuisset neminem inter ipsos alieno animo fore, neminem intercessurum, neminem fraudem proditurum ? Ecquis tam bonus, ut in animum inducat, Iudæos, qui longè latèque per Orbem terrarum erant dispersi, & inter se factionibus divisi, qui etiam sacras Litteras tantâ veneratione prosequerantur, ut earum causâ, si opus esset, mortem oppetere non detrectassent, sicut testantur *Philo* apud *Eusebium* libro 8. de Præparat. Evangel. cap. 2. & *Iosephus* apud eundem *Eusebium* lib. 3. cap. 10. Hist. Eccles. clàm id funesti consilii inire, tamque horribile potuisse patrare sacrilegium, quod si Christianis innotuisset, sicut erat necesse (cùm à Iudæis ad Christianos aliqui nullo non die perfugerent, ut prodit *Eusebius* lib. 3. Hist. Eccl. cap. 31.) nonne prævidebant Iudæi, fore ut, cùm nihil omnino assequerentur, suæ præterea parti præiudicium asserrent, si se faterentur, eam defendere, & fovere causam, quam sibi conscii essent non alitèr posse se quàm sacrorum Codicum depravatione defendere. Secundò, quis credat, Iudæos tam effusè temerarios, & audaciæ tam projectæ fuisse, ut sacram immutarint Chronologiam, quæ nihil, aut parum adjumenti Christianæ Religioni afferebat, dùm tamen sacra Prophetarum oracula, aliaque id genus luculentissima testimonia, quibus Messias adventus, & Christianæ Religionis veritas luce meridianâ clariùs demonstrantur, nunquàm adulterarunt, sed teste S. Hieronymo, inviolabili temporum serie jugitèr facta tecta conservarunt ? Certè, Iudæos ab hoc nefando crimine, semper fuisse alienos liquidò probat summa illa diligentia peritiorum Scholæ Tyberiadis Rabbiorum, qui vulgò *Massorethe* nuncupantur, quique circa quintum Ecclesiæ sæculum, ut volunt multi Critici, vel circa octavum sæculum, ut censet doctissimus Pater *Thomassinus* in suo *Glossario Hebraico*, omnia Scripturæ sacræ capita, vocabula, versus, radices, & litteras, Herculeo labore, & accuratissimo Criterio censuerunt, ut, genuinam Scripturæ sacræ lectionem ab omni corruptione servarent immunem, undè Opus suum *Massoram* * appellarunt .

Eandem diligentiam in describendis libris sacris semper adhibuerunt Iudæi, ut videre est in libro *Sopherim*, seu Scribarum, in quo de maximis, & minimis præceptis ad rectam Sacrorum librorum descriptionem requisitis, de litteris maiusculis, & minusculis, suspensis, intortis, &c. scrupulosè, & tantùm non superstitiosè pertractatur, sicut observat

cla-

* *Massora* nihil aliud est, quàm Critica Hebræorum doctrina, in sacra Scriptura litteris, vocibus, versibus, accentibus, & punctis vocalibus occupata, ut sic genuina permanent Scriptura sacra lectio. Inde *Massora* a Rabbini sepius nomen Legis appellatur .

clarissimus Pater *Morinus*, Hebræis licet infensus, cap. 3. Exer. 14. lib. 2. de *Hebræi*, *Græcique Textus sinceritate*. Denique, si Judæi sacri Textus Hebræi Chronologiam de industria corruperunt, sicut contendunt moderni quidam Chronologi, quorsum igitur Christiani, quorum plurimi intererat Judæorum detegere, ac propalare fraudem, nunquam reclamarent? Quorsum Sancti Patres tam immane scelus ipsi nunquam approbarunt, sed potius illos Capсарios nostros, & librorum sacræ Fidei Bajulos sæpius appellant? Quare etiam S. Hieronymus sacri Textus Hebræi Chronologiam sic immutatam, & vitiatam in nova, quam lucubrauit, Scripturæ sacræ versione, sectatus est? Ut quid Patres Concilii Tridentini, Spiritus Sancti lumine, quo erant congregati, affusi, editionem vulgatam, quæ sacri Textus Hebræi Chronologiæ ad amissim respondet, authenticam declararunt, suoque calculo comprobant? Addo etiam, nec addidisse pigebit, credibile non esse, Providentiam Divinam permisisse, ut sacri libri, omniaque Scripturæ sacræ Exemplaria Judæorum malitiâ corrumpere. Concidit ergo ruinosum fundamentum, quo, ceu baculo arundineo, nituntur Lxx. Interpretum Chronologiæ defensores, dum asserunt, sacri Textus Hebræi Chronologiam à Judæis datâ operâ fuisset corruptam.

Probatum secundò hæc nostra assertio argumento petito ex auctoritate Ecclesiæ. Huic standum est Chronologiæ, quam sua auctoritate approbat Romana, seu Catholica Ecclesia, atqui Ecclesia Romana suâ auctoritate approbat sacri Textus Hebræi Chronologiam, eamque præponit calculo Lxx. Interpretum, ergo uni Textus Hebræi Chronologiæ standum est. Prob. min. primò, quia Ecclesia Romana Editionem vulgatam à mille & trecentis circiter annis à S. Hieronymo concinnatam, atque à sac. Tridentina Synodo approbatam, etiam nunc retinet, & fideliter custodit; porrò, Editio vulgata, nemine refragante, in annorum calculo optimè cohæret cum sacri Textus Hebræi Chronologia, & è contra ab epilogismo Lxx. Interpretum, quàm longissimè distat. Præterea, hunc sensum Ecclesiæ Romanæ expressit sacræ Indicis Congregatio, quæ, dum *Censorio* stigmate confixit tertium *Sancti Iuliani* Archiepiscopi Toletani librum, declaravit certum, & exploratum omnibus esse debere, Ecclesiam Catholicam in editione vulgata approbare annorum rationem, quæ est in Codicibus Hebræis. Hæc sacræ Cardinalium Congregationis censoria Nota legitur (teste nostro *Malvenda* lib. 2. de *Antichrista* c. 8.) in margine Operis *Sancti Iuliani* in editione posteriori Operum *Bibliothecæ Patrum*. Eadem etiam Congregatio, damando Annotationes, quas *Antonius Coinsius*, Doctor Bituricensis, in Chronologiam Nicephori Patriarchæ Constantinopolitani edidit, hunc Auctorem idè censurâ perstrinxit, quòd, dum nimio studio Lxx. Interpretum Chronologiam, tuebatur, non videret se incautè Hebræici fontis, & editionis vulgatæ Chronologiam labefactare, & Sanctos Patres corruptelam Chronologiæ

giæ LXX. Interpretum ingenuè profiteri . Hæccensoria Nota Tomo septimo *Bibliotheca Patrum* editionis Parisiensis anni 1585. in Chronologia Nicephori affixa est . Denique , sacra Bibliorum Congregatio sub Gregorio XIV. Summo Pontifice , cuius Acta manuscripta Romæ in Bibliotheca Angelica asservantur, sanxit, ut in emendandis sacris Bibliis, quotiescūque Codices Græcos inter & Hebræos aliqua occurrit dissimilitudo, Codices Hebræi semper præponantur Græcis, iuxta regulam, quam tradit S. *Augustinus* cap. 13. lib. 15. de *Civitate Dei* . Patet itaque, calculo LXX. Interpretum sacri Textus Hebræi Chronologiam esse præferendam, quia Ecclesia Catholica, ut ait sacræ Indicis Congregatio, in Editione vulgata approbat annorum rationem, quæ est in Codicibus Hebræis, & Sancti Patres corruptelam Chronologiæ LXX. Interpretum ingenuè profitentur.

Probatur ultimò: LXX. Interpretum Chronologia multis mendis scatet, quorum expertus est sacri Textus Hebræi Chronologia, ergò Textus Hebræi calculus anteponendus est calculo LXX. Interpretum . Probatur ant. Primò, in Chronologia LXX. Interpretum Patriarchis primæ, & secundæ ætatis multæ adduntur annorum centuriæ, quæ non extant in Editione vulgata, Textui Hebræo omnino consonæ . Secundò, LXX. Interpretum Chronologiam in cap. 4. *Geneseos* sub mendo cubare observant periti Chronologi . Ibi namque , juxta calculum LXX. Virum, Mathusalem invenitur vitæ functus annis quatuordecim post diluvium, quod, ut nemo non videt, apertè adversatur Scripturæ sacræ, quæ primæ Epist. *Petri* cap. 3. disertè asserit, octo tantum animas, Noemum scilicet & uxorem eius, tres eius filios, cum tribus eorum uxoribus universalis diluvii exitium evasisse . Quod quidem, ut clariùs intelligatur, sciendum est, Mathusalem, juxta Chronologiam LXX. Interpretum, genuisse Lamechum, cùm esset annorum 167. & rursus Lamechum, cùm esset 188. annorum, genuisse Noemum; fiunt itaque ad diem natiuitatis Noemi, anni vitæ Mathusalem trecenti quinquaginta quinque, diluvium autem universale contigit anno sexcentesimo vitæ Noemi, & sic, habitâ supputatione per partes, anno nongentesimo quinquagesimo quinto vitæ Mathusalem diluvium accidisse convincitur : cùm autem Mathusalem, nemine reclamante, nongentis sexaginta novem annis vixerit, nulli dubium est, quin Mathusalem, juxta Codices Græcos, quatuordecim annis vixerit post diluvium. At, in sacri Textus Hebræi Chronologia omnia sunt plana, expedita, & optimè sibi coherentia, nam juxta Hebræos Codices, sicut argumentatur S. *Hieronymus* in lib. *Quest. Hebraicarum in Genesim*, Mathusalem genuit Lamechum, cùm esset annorum 187. Lamechus autem genuit Noemum, cùm esset annorum 182. à die ergo natiuitatis Mathusalem, usque ad natiuitatem Noemi, sunt trecenti sexaginta novem anni, quibus si addas sexcentos annos, quos natus erat Noemus, quando diluvium in totum, quâ latè patet, orbem gra-

grassari cœpit, comperietur, Mathusalem anno vitæ suæ nongentesimo sexagesimo nono obiisse, eodem videlicet anno, quo contigit diluvium. Hic est profectò nodus implicatissimus, in quo dissolvendo, postquam *S. Augustinus*, Versioni LXX. Interpretum alioquin addictissimus, omnes ingenii sui vires exacuisset, ipsâ tandem difficultatis mole oppressus fatetur candidè lib. 15. de Civitate Dei cap. 13. LXX. Interpr. Chronologiam fuisse adulteratam, & in generatione Mathusalem correctione indigere, immò ibidem asserit, hunc errorem non casum redolere, sed industriam. Et cap. 11. ejusdem libri sic loquitur *Sanctus Doctor*: Sed inquirunt, Indæos, dum nobis invident, quod Lex, & Propheta ad nos interpretando transmiserunt, mutasse quædam in Codicibus suis, ut nostri minueretur auctoritas, hanc opinionem, vel suspicionem accipiat quisque ut putaverit, certum est tamen, non vixisse Mathusalem post diluvium, sed eodem anno fuisse defunctum.

Respondent moderni quidam Chronologi: Hoc mendum circa annos vitæ Mathusalem irrephisse quidem in nonnulla exemplaria Græca, sed non omnia pervasisse. Testatur quippè *S. Augustinus*, se tria exemplaria Græca vidisse, in quibus legebatur, Mathusalem vitâ functum, esse sex annis ante diluvium.

Sed hæc responsio falsi convincitur. *Eusebius* siquidem Cæsariensis in Chronico profitetur, se legisse in omnibus Codicibus Græcis Mathusalem genuisse Lamechum, cum esset annorum 167. adeoque illum superstitem fuisse quatuordecim annis post diluvium. Ita etiam cum *Eusebio* legerunt Theophylus Antiochenus, & Georgius Syncellus, ita etiam legitur in versione LXX. Interpretum, quæ extat in Hexaplis *Origenis*, & quam *S. Hieronymus* in Ep. 135 ad Sunnam & Fretellam scribit, fuisse cæteris omnibus exemplaribus Græcis correctiorem. Ita denique scriptum est in omnibus Scripturæ sacræ versionibus Latinis, quæ ad normam versionis LXX. Interpretum sunt concinnatæ, præsertim in Editione Italica, quæ ante Hieronymianam, seu vulgatam Editionem, publicè in Ecclesia legebatur, & quam doctissimus *Flaminius Nobilius* è tineis, cum quibus extremum agonem agebat, eruit, lucique denuò restituit. Quod autem spectat tria illa exemplaria Græca, in quibus *Sanctus Augustinus* asserit, se legisse Mathusalem è vivis excessisse sex annis ante diluvium, dici potest, tria illa exemplaria Græca, quæ sine hoc mendo exstant tempore *Sancti Augustini*, fuisse ex Textu Hebræo correctâ, & emendata. Nam, quemadmodum *Aquila*, *Symmachus*, *Theodotion*, *Origenes*, *Hesychius*, & *Lucianus*, Martyr, benè multa in versione LXX. Interpretum omiſsa addiderunt ex Textu Hebræo, aut mutilata castigarunt ad normam Textus Hebræi, ita non absimili ratione fieri potuit, ut nonnulli deprehensum in versione LXX. Interpretum circa annos ætatis Mathusalem errorem, juxta veritatem Hebraicam, in tribus illis exemplaribus Græcis correxerint, atque repurgarint.

ARguitur primò : Huic Chronologiæ standum non est , quam à Judæis fuisse corruptam certis argumentis evinci potest , atqui certis argumentis evinci potest , sacri Textus Hæbræi Chronologiam fuisse à Judæis vitiatam , ergo &c. Prob. min. primò , quia constans est , & usu apud Judæos recepta hæc traditio , fore ut Messias appareat in sexto mundi millenario , quâ Judæorum traditione cùm Christiani in primis Ecclesiæ temporibus uterentur ad probandum Christum esse verum Messiam , utpotè natum in sexto mundi millenario, *Akibah*, famosus Rabbinus , qui sub Hadriano Imperatore , seu in secundo vivebat sæculo , ut se se faciliùs ab illo Christianorum argumento , quod Judæorum jugulum petebat , expediret , mille ac quingentos circiter annos ex Textus Hæbræi Chronologia de industria expunxit, ne Christum verum esse Messiam fateri cogeretur . Quâ facta annorum detractio, accidit , ut sacri Textus Hæbræi Chronologia modò contractior sit mille ac quingentis ferme annis calculo LXX. Interpretum; hinc igitur prima labis origo . Secundò, Judæi in primo, vel secundo Ecclesiæ sæculo facilè admodum depravare potuerunt Textus Hæbræi Chronologiam, nam tum temporis soli Judæi linguam Hebraicam callebant ; Christiani verò , linguæ Hebraicæ penitus ignari , solam versionem LXX. Interpretum legebant & sectabantur , cùm igitur Christiani , ob linguæ Hebraicæ imperitiam , reclamare , & impiis Judæorum obsistere conatibus haud possent ; quid miram, si Judæi id temporis Textus Hæbræi corruerint Chronologiam , ex qua Christiani invictum poterant adversus illos petere argumentum ad probandum Christum esse verum Messiam ?

Respondeo : Has conjecturas , quas ad sacri Textus Hæbræi Chronologiæ auctoritatem elevandam adducunt moderni quidam Chronologi , non solum inanes & futiles esse , verum etiam apertè falsas . Primò siquidem falsum est , hanc traditionem , de nascituro Messia in sexto mundi millenario , fuisse apud Judæos pervulgatam , cùm potius apud illos vigeret traditio huic planè opposita & inserta in *Talmude* Tractatu *Sanhedrin*, juxtà quam Messias nasciturus est in quarto mundi millenario . Porro , antequàm *Talmud* Babylonicum esset à Rabbini septimo Ecclesiæ cadente sæculo editum , (sicut ex Judæorum traditionibus colligit *Morinus* lib. 2. Exercit. 6. cap. 4.) nulla erat apud Judæos traditio de nascituro Messia sive in quarto, sive in sexto mundi millenario . Præterea , falsum itidem est, Rabbinum *Akibah* è sacri Textus Hæbræi Chronologia mille & quingentos expunxisse annos , quò faciliùs ab eo se extricaret argumento , quod in ipsum intorquebant Christiani , ad probandum Christum esse verum Messiam . Enimverò , Christiani & antiqui Patres nunquam contra

tra Iudæos calculatoriis disputarunt argumentis, sed potius clarissima, usurparunt Prophetarum vaticinia, quæ in Christum Dominum mirum in modum quadrant, & ad quæ Iudæi, licet in omne latus se se versent, ac miserè torqueant, nihil hæcenus solidi hincere, atque mustitare potuerunt. Unde, si Iudæi, ut Sanctorum Patrum eluderent argumenta, scripturas ipsas depravare voluissent, procul omni dubio non in Chronologia veterum Patriarcharum primæ & secundæ ætatis, quæ ad eorum disputationem nihil omnino conferebat, sed in prophetiis Isaiæ, Danielis, & aliorum id tentassent, quod tamen eos nunquam tentasse comperitum est. Tertio, Rabbinus *Akibah* quemdam nominæ *Barcochebam*, tanquam verum Messiam, propalavit, sicut testatur *S. Hieronymus* in cap. 8. Isaiæ, at, non solum imprudens, sed post homines natos stultissimus fuisse Rabbinus *Akibah*, si, dum *Barcochebam* tanquam Messiam Iudæis obtrudebat, detraxisset à Chronologia Hebræorum mille & quingentos annos, ne fateri cogeretur Christum esse verum Messiam, factà siquidem illà annorum detractioe, ludibrium dedisset Rabbinus *Akibah*, seque unà cum suo Pseudo-Messia Iudæis perinde ac Christianis plenis buccis deridendum propinasset. Denique, *S. Augustinus* cap. 13. lib. 15. de Civitate Dei, ait: Hanc discrepantiam, quæ Codices Hebræos inter & Græcos reperitur in putatione annorum, non esse refundendam in malitiam Iudæorum, sed acceptam referri debere huic Scriptori, qui è Bibliotheca *Ptolomæi Philadelphi*, Ægyptiorum Regis, sacrum Codicem, seu versionem adornatam à *LXX.* Interpretibus describendam primus accepit. Ille quippe Scriptor persuadere volens Ægyptiis, annos, quibus genuerunt, vel vixerunt Patriarchæ primæ & secundæ ætatis, non fuisse Solares, qui constant diebus 365. & horis sex, sed potius à Mose accipi tanquam menstruos, hoc est, Lunæ senio definitos, quales Ægyptii numerabant (uti asserunt *Censorinus* cap. 19. lib. de die Nat. *Macrobius* cap. 12. lib. 1. *Saturnal.* *Plutarchus* in *Numa*, *Plinius* lib. 7. & *Diodorus Siculus* in Bibliotheca) multis centenariis Patriarcharum ante & post diluvium vitas auxit, ut eorum ætas habilis, seu tempestiva ad generandum inveniretur, juxta supputationem brevium illorum annorum. *Nimirum*, inquit Sanctus ille Pater, cum vellet persuadere, qui hoc fecit, idèd numerosissimos annos vixisse antiquos, quod eos brevissimos nuncupabant, & hoc de maturitate pubertatis, qua idonea filii gignerentur, conaretur ostendere; atque in illis centum annis decem nostros insinuandos putaret incredulis, ne homines tamdiu vixisse recipere in fidem nollent; addidit centum, ubi habilem gignendis filiis non invenit ætatem; eosdemque, post genitos filios, ut congrueret summa, detraxit. Sic quippè credibiles voluit facere idonearum generande prolis convenientias ætatum, ut tamen numero non fraudaret universas ætates viventium singulorum. Quod autem in sexta generatione id non fecit, hoc ipsum est, quod magis movet illum idèd fecisse, cum res, quam dicimus, postulavit, quia non fecit ubi non pos-
ff 2
stula.

stulavit. Invenit namque in eadem generatione apud Hebræos vixisse Jared, antequam genuisset Enoch, centum sexaginta duos annos, qui secundum illam rationem brevium annorum sunt anni sexdecim, & aliquid minus quam menses duo; quæ jam ætas apta est ad gignendum: & ided addere centum annos breves ut nostri viginti sex fierent, necesse non fuit. Ex quibus S. Augustini verbis exsufflatur inanis illa conjectura, quæ nituntur moderni quidam Patriarcharum primæ & secundæ ætatis interpolasse, eumque mille & quingentos annos è sacri Textus Hebræi Chronologia expunxisse, ne fateri cogeretur: Christum esse verum Messiam.

Ad alteram objectionis partem respondeo: Falsò ab adversariis supponi, nec in primo, nec in secundo Ecclesiæ sæculo fuisse Christianos, qui linguam Hebraicam callerent, & impiis Iudæorum possent intercedere conatibus in temerandis Scripturis sacris. Legimus quippè apud *Eusebium* lib. 3. Hist. Eccl. cap. 31. & lib. 5. cap. 5. Iudæos, qui à passione Christi Domini ad tempus usque Rabbinum *Akibah* Christianæ Religionis nomen dederunt, in maximo numero fuisse, adeò ut universa Ecclesiæ Hierosolymitana ex solis Hebræis ad fidem Christi conversis esset conflata; sic enim loquitur *Eusebius*: *Tam temporis universa Hierosolymitana Ecclesia constata erat ex Hebræis fidelibus, qui jam inde ab Apostolorum ætate ad illam usque obsidionem permanserunt, quæ Iudæi iterum à Romanis deficientes, maximis præliis domiti sunt atque expugnati.* Fuerunt ergo tam in primo, quam in secundo Ecclesiæ sæculo benè multi Christiani, qui Hebræicæ linguæ notitiâ erant exculiti, utpotè genere Hebræi, quique in Ecclesiâ Hierosolymitana permanserunt ulque ad Imperatorem Hadrianum, qui in secundo Ecclesiæ sæculo Civitatem Hierosolymitanam armis occupavit, & ex ea Iudæos, & Christianos expulit, sicut refert *Baronius* ad annum Christi 137. Quo anno etiam Rabbinus *Akibah*, unâ cum suo insigni impostore *Barcocheba*, pseudo-Messia, fuit ab exercitu Imperatoris Hadriani occisus, vel, ut alii referunt Historici, in angustissimum ac teterrimum conjectus carcerem, in quo paulò post foetidam animam expuit. Nullam ergo vel levissimam veritatis umbram habet hæc adversariorum conjectura.

Arguitur secundò: Textus Samaritanus à diluvio usque ad Abrahamum, exceptâ generatione secundi Cainanis, quam omittit, aliorum Patriarcharum numerat annos juxtâ calculum LXX. Interpretum, ergo præferendum est epilogsimus Septuaginta Interpretum calculo Hebræorum.

Respondeo: Pentateuchum Samaritanum, quem doctissimus *Joannes Morinus* post tot annorum silentium è tenebris eruit, eruditæ Exercitationibus illustravit, ipsumque cæteris antiquioribus versionibus admiscuit in Heptaplis Parisiensibus, & in Bibliis Polyglottis Londinensibus, fuisse in annis Patriarcharum mutilatum. Id constat primò, quia S. Hieronymus in lib. Quæst. Hebr. in Genesim, ait: se legisse in Pen-

Pentateucho Samaritanorum, Mathufalem genuisse Lamechum anno ætatis suæ 187. & tamen *Morinus* specimen exhibet Samaritani Codicis, ubi Mathufalem vixisse dicitur annis 67. antequàm genuit Lamechum; *Josephus* etiam *Scaliger* affirmat in exemplari Samaritano, quod præ manibus habebat, reperiri annos 77. nempe quos habebat Mathufalem quandò genuit Lamechum. Quæ profectò legendi varietas plurimùm derogat Codicis Samaritani sinceritati, immò apertè demonstrat eum fuisse vitiatum. Oportet siquidem, ut aliud fuerit exemplar Samaritanum *Sancti Hieronymi*, aliud Patris *Morini*, aliud *Scaligeri*. Non me latet, *Seldenum* Præfatione in Marmora Arundelliana, memoriz lapsum impingere S. *Hieronymo*, quòd in Textu Samaritano sectatus fuerit numeros diversos ab illis, quos ante ipsum sequutus fuerat *Ensebius*; at inanem esse hanc *Seldeni* conjecturam, ex eo maximè constat, quòd Sanctus ille Doctor famosam illam quæstionem de annis Mathufale enodaturus, libros non tam Hebræorum, quàm Samaritanorum indefesso labore, & accurato criterio examinaverit. Potiùs ergo dicendum est, apud Samaritanos varia & discrepantia extitisse exemplaria, præsertim in numeris; adèoque aliud *Ensebius*, aliud *Hieronymum* nactos esse exemplar Samaritanum. Secundò, Codicem Samaritanum in annis Patriarcharum ante diluvium fuisse vitiatum nullus negare potest, quandò quidem à creatione mundi usque ad diluvium in Codice Samaritano numerantur dumtaxat anni 1307. quem quidem numerum contractiorem esse convenit inter omnes Chronologos. Sicut ergò in annis Patriarcharum ante diluvium depravatus est Text. Samarit. ita & in annis Patriarcharum, post diluvium potuit corrumpi. Nec defunt viri eruditi, qui autumant, Samaritanos vel propter idololatriam, vel propter vatiniarum illud odium, quo Judæos prosequabantur, eosque cane pejus & angue ode- rant, suum Pentateuchum etiam in annis Patriarcharum interpolasse. Ut ut sit, inconfesso est apud omnes, non aliam Pentateucho Samaritano auctoritatem concedi debere, quàm aliis antiquis exemplaribus, quæ injuriâ temporum, vel negligentia Scribarum, vel ignorantia Sciorum nazvos & maculas quasdam contrahunt, quæ ex aliorum primigeniorum, seu Hebræicorum Codicum collatione corrigi & emendari debent. Cùm igitur hodiernus Samaritanus Pentateuchus in annis Patriarcharum primæ & secundæ ætatis sit mendosus, ad normam Textus Hebræi originarii Codicis est castigandus.

Arguitur tertio: in serie Chronologica Patriarcharum post diluvium nulla in Textu Hebræo *Cainanis* sit mentio, cuius tamen meminit versio LXX. Interpretum, atqui Cainanem verum fuisse Patriarcham, & filium Arphaxad, apertè testatur S. *Lucas* cap. 3. sui Evangelii, ubi hæc habet: *qui fuit Sale, qui fuit Cainan, qui fuit Arphaxad*; ergo LXX. Interpr. Chronologia præponenda est Textus Hebræi calculo.

Respondent huic objectioni periti quidam huius temporis Critici:

Cai-

Cainanem juniorem esse Patriarcham institutum, idque probant primò, quia illius Cainanis, ne vola, ne vestigium quidem extat in Textu tam, Hebræo, quam Samaritano, nec in antiquis Scripturæ sacræ versionibus, Syriacâ, Arabicâ, Chaldaicâ, Vulgatâ, & lxx. Interpretum versione, quæ extabat in Hexaplis Origenis, & quæ, teste S. Hieronymo Epist. 135. ad Sunniam & Fretellam, erat emendatissima. Secundò, quia Philo, & Josephus, peritissimi Judæi, necnon auctores prophani *Berosus* Chaldæus, Græcis Interpretibus antiquior, & *Eupolemus*, citatus ab Alexandro Polysthore apud Eusebium lib. 9. Præp. Evang. prædictum Cainanem alto silentio prætermittunt. Tertiò, quia Sancti Patres illius Cainanis nullam mentionem faciunt. Irenæus lib. 3. adversus hæreses cap. 33. Theophylus Antiochenus lib. 3. ad Autolycom, Epiphanius hæresi 55. quæ est Melchisedechianorum, Origenes, Julius Africanus, & Eusebius Cæsariensis, qui in suo Chronico, à Scaligero edito, veterum Patriarcharum ante, & post diluvium annos ex triplici Textu, Hebræo nimirum, Græco, & Samaritano recensens, in nullo eorum juniorem Cainanem reponit, unde Georgius Syncellus carpit Julium Africanum & Eusebium, quòd Cainanem in serie Patriarcharum, qui post diluvium vivere, non numerando, centum & triginta annis in suo calculo fuerint hallucinati: Denique, certum est, inquit illi auctores, Moysen temporum historias, & Patriarcharum annos integrè, exactè, ac pfectè in libro Geneleos describere voluisse, porrò, si Cainan junior, cujus generationem prætermisit Moyses, verus esset Patriarcha, perturbata, & confusa Chronologia reddidisset Moyses, & siis dequæ miscuisset historias temporum, nemo quippè inficias ire potest, junioris Cainanis adiectione, vel detractone haud parùm variari Chronologiam; quæ diluvium inter & Abrahamum à Moysè describitur.

Huic responsioni, quæ multis probatur viris doctissimis, quominus calculum adiciam, vetat auctoritas S. Lucæ, qui cap. 3. Evangelii texens Genealogiam Christi Domini disertè Cainanem inter Salem, & Arphaxad medium reponit. Nemini igitur fas esse puto, Cainanem juniorem velut Patriarcham supposititium ex Evangelio expungere, quem vetustissimi, sanctissimique Doctores, & Scripturarum Interpretes, potissimum Augustinus lib. 16. de Civit. Dei cap. 10. & S. Hieronymus in translatione Evangelii secundum Lucam, legerunt, agnoverunt, retinuerunt, quemque etiam Romana, post sacrorum Codicum emendationem, jussu Summorum Pontificum Sixti V. & Clementis VIII. adornatam, legit, agnoscit, & retinet Ecclesia.

Scio, laudari à peritissimis quibusdam Criticis vetustissimum Codicem manuscriptum Græco-latinum B. Lucæ Evangelistæ in antiquissimis membranis literis majusculis sine spiritibus, & accentibus descriptum, in quo Cainanis illius junioris reticetur generatio. Hic autem Codex quatuor Evangeliorum & Actuum Apostolorum complectitur historias, & ex

& ex Græcia olim in Gallias asportatus in Monasterio S. Irenæi in suburbio Lugdunensi repositus est, ibique asservatus, donec exorto civili bello anno 1562. repertus est à Theodoro Beza, qui eum Cantabrigensis Academiae Bibliothecæ dono dedit anno 1581.

Sed, ut candidè fatear, huic manuscripto Codici, cui maiorem, quàm par sit, auctoritatem quidam Critici conciliare moliuntur, duo gravissima momenta fidem derogare debent. Primò, quia Codex ille, nullo pàcio præponi potest editioni vulgatæ à sacrosancto, & œcumenico Tridentino Concilio, & Sede Apostolica probatæ, & emendatæ, in qua cap. 3. Evangelii S. Lucæ conceptis verbis legitur Cainan insertus Arphaxad inter & Salem: verosimilius siquidem est negligentia alicuius Amanuensis iuniorem Cainanem fuisse omissum in illo manuscripto Codice, quàm ipsum, nemine reclamante, irrepsisse in Evangelium S. Lucæ, eumque sic intrusum legi, & retineri ab Ecclesia Romana. Secundò, hic manuscriptus Codex fuit dumtaxat exaratus circa sextum sæculum, sicut probant eruditj Critici Richardus Simon cap. 30. hist. Textus novi Testamenti, & Ellias Dupin §. 2. cap. 3. lib. 2. To. 3. Dissert. prælim. in sacra Biblia, adeoque manuscriptus ille Codex posterior est translatione, quam lucubravit S. Hieronymus, Evangelij secundum Lucam, in qua S. Doctor, post accuratam antiquorum Scripturæ sacræ Codicum lectionem, Cainanem reposuit Arphaxad inter & Salem. Nec ullam veri speciem habet conjectura Friderici Spanhemii, qui in prima parte Dubiorum Evang. Dubio 23. ariolatur, Cainanem in Evangelium S. Lucæ fuisse intrusum à quodam sciolo hifce temporibus, quibus Ecclesia sub Imperatoribus Decio, Valeriano, Diocletiano, & Tyrannis alijs exagitata, vexata, & dissipata fuit, atque non solum in Corpora Christianorum, sed & in libros sacros, præsertim sub Diocletiano, & Maximiano Collegis, ferro, flammâque id ætatis favitum est. Hæc inquam Spanhemii conjectura nullam veri speciem habet; incredibile namque est Providentiam Divinam permisisse unquam, ut falsaretur S. Lucæ Evangelium, quod eo fine conscribi voluit, ut ex illo sacro fonte omnes gentes salutare Christianæ Religionis, vitæ, & doctrinæ Christi haurirent aquas.

Ad obiectionem itaque breviter ipse respondeo: Moysem nullam, quidem in Textu Hebræo Genesis cap. 11. Cainanis junioris mentionem fecisse, inde tamen inferri haud posse, Cainanem è numero Patriarcharum fuisse à Mose sublatum, alioqui, quia S. Matthæus in Genealogia Christi tres omisit Reges Iuda, dicendum itidem esset, tres illos Reges ab Evangelista omissos, nunquam in rerum natura extitisse, sed planè commentitios esse, quod tamen tam falsum est, quàm quod maximè. Nemini autem mirum videri debet, quod in antiquis Scripturæ sacræ versionibus Cainanis junioris reticeatur generatio, illæ siquidem Scripturæ sacræ versiones exactæ sunt ad normam Textus Hebræi, in quo

Moy-

Moyſes Cainanem illum prætermiſit. Idem judicium ferendum eſt de his SS. PP. & de Scriptoribus tam Judæis, quàm profanis, qui Cainanis junioris non meminerunt; hi ſiquidem omnes Scriptores Textum Hebræum, in quod ſideratur Cainanis generatio, ſectati ſunt. Cæterum, inter SS. Patres, & Scriptores, ſeu Judæos, ſeu profanos, nullum reperire eſt, qui diſertis verbis Cainanem ex albo Patriarcharum poſt diluvianorum expungat, & ex adverſo multi ſunt ſancti Patres, & Scriptores Eccleſiaſtici, qui poſt S. Lucam cap. 3. Evangelii, Cainanem iuniorē inter Patriarchas reponendum eſſe autumat.

Ut autem Cainanis junioris adiectione non variet Chronologiam, quæ diluvium inter & Abrahamum à Moſe in Geneſi deſcribitur, dicendum eſt cum Genebrardo lib. 1. Chronographiæ, quod Arphaxad genuit Cainanem anno ætatis ſuæ 18. & quod Cainan genuit Salem anno ætatis ſuæ 17. quâ ratione dici poteſt, Salem natum eſſe ipſi Arphaxad, cùm Arphaxad annum ætatis ſuæ ageret trigeliſimum quintum, ſicut legitur in Textu Hebræo, & in Edit. vulg. Geneſis cap. 11. v. 12. Nam, & more loquendi ſacris litteris non inuſitato genuiſſe nepotem avus verè dicitur, quamvis eum immediatè non genuerit. In eandem Genebrardi ſententiam deſcendit P. Io. Harduinus, recens Soc. Jeſu Scriptor, in Chronologia Vet. Teſtam. ad Vulgatam verſionem exactâ, inter ſelecta illius Opera edita Amſtelodami anno MDCCX. Hunc igitur Genebrardi modum conciliandi generationem Cainanis junioris cum Chronologia Textus Hebræi, & Editionis vulgatæ, obviis ulnis ipſe amplector, quodquidem ad illam concordiam ineundam, nulla alia, meâ quidem ſententiâ, expeditior ſuppedit via.

Arguitur quartò: Benè multi SS. Patres, quos laudant *Baron. in Appar. ad Anna. Eccleſ. Morinus* cap. 1. Exercit. 7. lib. 1. de Hebræi, Græciq; Textu: ſinceritate, *Pezronus* in lib. de antiquitate temporum reſtituta &c. annos ab origine mundi iuxtà LXX. Interpretum calculum ſubduxerunt, ergo potiùs ſtandum eſt LXX. Interpretum Chronologiæ, quàm ſacri Textus Hebræi calculo. Præterea, Eccleſia Romana ſua auctoritate etiamnùm approbat Chronologiam LXX. Interpretum, quippè quæ ſingulis annis in pervigilio Natalis Chriſti in Martyrologio, quod publicè recitatur, numerat annos ab exordio Mundi ulque ad Natale Chriſti Dom. iuxtà calculum LXX. Interpret. quem ſequitur *Euseb.* in ſuo Chronico, à *S. Hieronymo* latinitate donato. Denique, ſexta Synodus œcumenica Conſtantinopoli celebrata, iſſdem numeris ſua Acta conſignavit, à mundi ſiquidem origine ulque ad illud tempus celebrati Concilii, anni numerantur ſex mille centum nonaginta novem anni. Ergò tam ex SS. PP. quàm ex Fabulis Eccleſiaſticiſ conſtat, Chronologiam LXX. Interpret. anteponendam eſſe ſacri Textus Hebræi Chronologiæ.

Reſpond. ad ſingula illa momenta, & primò, quòd ſpectat SS. PP. dico: Eorum auctoritati præponendam eſſe auctoritatē Eccleſiæ, quia

quia, ut optimè observat *S. Thomas 2.2. qu. 10. art. 12. Doctrina Catholicorum Doctorum ab Ecclesia auctoritatem habet, adeoque magis standum est auctoritati Ecclesie, quam auctoritati Augustini, vel Hieronymi, vel cuiuscunque Doctoris.* Quapropter, cum Ecclesia Catholica, ut supra, probatum est, Hebræorum Chronologiam in nostra Editione vulgatam, approbaverit, auctoritati Ecclesie, velut sacre anchoræ, indivulsè adherere debemus, & ab ea ne latum quidem unguem deliscere. Nemi- ni autem mirum videri debet, quòd SS. PP. in primis Ecclesie tem- poribus Chronologiam LXX. Interpretum sectati fuerint, nam Ecclesia id ætatis nullà alià Scripturæ sacre versione utebatur præterquam, versione LXX. Interpretum, quæ proinde, ut ait *Morinus*, Ecclesiam Christianam peperit, lactavit, educavit, fovit, ac instituit. Quapropter, SS. PP. temporì servientes, & Fidelium utilitati consulere volentes, versionem, & Chronol. LXX. Interp. in tanto tum temporis pretio ha- bitam immutare, aut non sequi religioni duxerunt. At, propagatà semel Christianà Religione, Sancti Patres, & præcipuè Hieronymus, & Au- gustinus, postquam hanc quæstionem maturo, & accurato criterio exa- minassent, Textum Hebræum, eiusque Chronologiam versionì, & calcu- lo LXX. Interp. præponi debere disertè pronunciarunt, multisq; argumen- tis comprobarunt; quorum iudicio stetit Ecclesia Latina, quæ, repudia- rà versione LXX. Interpretum, quam olim in Editione, vulgò dictà *Itala*, sequebatur, obviis ulnis amplexa est editionem vulgatam, quam *Sanctus Hieronymus* ad normam sacri, & primigenii Textus Hebræi concinnavit.

Secundò, quod attinet ad Martyrologium Romanum, quod in per- vigilio Natalis Christi Domini recitari solet, breviter respondeo: Hoc Martyrologium in Ecclesia recitari juxta Chronologiam LXX. Interpre- tum, non quòd veram, & incorruptam eam esse Chronologiam censet Ecclesia, cùm potius huic è diametro adversantem, ut veram, & genui- nam, quæ in Editione vulgata consignata est, omnibus recipiendam pro- ponat; sed quia vult Ecclesia, ut ait noster *Malvenda lib. 2. de Antichri- sto cap. 16.* verus aliquod exhibere venerandæ antiquitatis monumentum, tametli lacerum, ac deforme, & pannis, annisque obsitum; omnibusque palli facere, quam olim Scripturæ sacre versionem secuti fuerint anti- qui Patres in numerandis annis ab orbè condito ad Christum nascentem. Solent enim vetera antiquitatis monumenta, quantumvis corrosa, & at- trita, gratum inspectantibus præstare intuitum. Addo etiam, Ecclesiam non multo abhinc tempore uti prædicto Martyrologio, nam olim Ec- clesia utebatur alio Martyrologio, quod ab *Heriberto Rosweido* Pa- risiis anno 1613. fuit typis excusum, in quo, absque annorum numero, hæc tantum modò verba leguntur: *Nativitas Domini secundum carnem.*

Denique, ad auctoritatem sextæ Synodi generalis, dico: Concilia œcumenica convocari ad dirimendas emergentes tam circa fidem, quam circa mores Controversias, in quibus definiendis infallibili pollent au-

floritate, at non congregari Concilia ad expendendas Chronologicas quæstiones, de quibus talvâ fidei regulâ hinc inde disceptari potest. Præterquàmquod, oppidò falluntur adversarii, dùm hanc Synodum appellant sextam generalem, quæ tamen reverà non fuit sexta Synodus generalis, sed potius pseudo-Synodus, dicta *Trullana*, vel *Quini-sexta*, tempore Iustiniani Imperatoris celebrata, quæ nullam prorsùs in Ecclesia Latina, ut multis probat noster *Melchior Canus* lib. 5. de *Locis*, obtinet auctoritatem.

Arguitur quintò: Iosephus, peritissimus Iudæus, lib. 1. *Antiqu.* cap. 4. & cap. 7. annos Patriarcharum antè diluvium recenset juxtâ Chronologiam LXX. Interpretum. *Philo* etiam, Iudæus, annos à creatione mundi numerat juxtâ calculum LXX. Interpretum; ergò præponenda est LXX. Interpretum Chronologia calculo Hebræorum.

Respondet: Iosephum in putatione annorum non aliam, quàm sacri Textus Hebræi Chronologiam esse sectatum, sicut ex multis locis Operum Iosephi evincunt periti huius temporis Chronologi, potissimùm doctissimus P. *Le Quien* cap. 5. partis 2. *Defensionis Textus Hebræi*, & *Fridericus Spanhemius Chronolog. Sac.* par. 2. cap. 3. idque probant viri illi eruditi primò, quia si annos, quos Iosephus in lib. 7. *Antiq.* cap. 2. & in lib. 10. *Antiq.* cap. 1. numerat à creatione mundi usque ad fabricam Templi, quæ facta est anno quarto Salomonis, accuratè quis supputare velit, reperiet à creatione mundi usque ad structuram Templi effluxisse dumtaxat, juxtâ calculum Iosephi, ter mille & quadraginta quinque annos, qui Iosephi calculus optimè consentit cum epilogismo Hebræorum. Secundò, idem Iosephus lib. 1. contra *Appionem*, cap. 2. ab exordio mundi usque ad Moyseis obitum scribit interfuxisse tria propè annorum millia, sic enim loquitur: *Neque innumera apud nos habentur volumina, inter se invicem discordantia, sed duo tantum & viginti sunt libri, ex quibus quinque sunt Moyseis continentes Leges, vite, & successionis humanæ prosapiam, quod quidem tempus tria propè annorum millia comprehendit.* Porro, si Iosephus in putatione annorum sequutus fuisset LXX. Interpretum Chronologiam, numerasset à creatione Mundi usque ad Moyseis obitum non tantum tria propè annorum millia, sed quatuor annorum millia, nam juxtâ calculum LXX. Interpretum, sicut fateatur doctissimus *Pezronus*, à creatione Mundi usque ad Moyseis obitum numerantur anni ter mille nongenti octoginta tres anni. His, & aliis momentis, quæ adducunt viri eruditi, liquet, Iosephum annos Mundi juxtâ sacri Textus Hebræi Chronologiam subduxisse. Fateor tamen, Iosephi Chronologiam, in annis Patriarcharum antè & post diluvium, fuisse deindè à Græcis datâ operâ interpolatam, ut tanti viri patrociniò in fabulosa sua antiquitate gloriari possent. Huius corruptionis factæ à Græcis multa deprehenduntur vestigia. Duo hîc dumtaxat, brevitatibus ergò, indicabo, ut prudens Lector, tanquàm ex ungue leonem, prædi-

Atque labis originem compertam habere possit. In primis, cap. 4. lib. 1. Antiqu. scriptum legimus, à creatione Mundi ad diluvium usque effluxisse annos bis mille sexcentos quinquaginta sex, & tamen si anni Patriarcharum in eodem capite, & Textu hodierno Iosephi ad calculum revocentur, summam dumtaxat, à creatione Mundi usque ad diluvium, conficiant bis mille ducentorum quinquaginta sex annorum. Quis autem non videt, Iosephum reverà scripsisse à creatione Mundi usque ad diluvium mille sexcentos quinquaginta sex interfluxisse annos, & postea à Græcis hunc Iosephi calculum in annis Patriarcharum antè diluvium interpolatrice manu fuisse depravatum, ita ut tamen apertum reliquerint suæ corruptionis vestigium. Non enim qui ad fraudem callidi sunt, tantum audent, quantum excogitant; sæpèque accidit, ut hi, qui audaci cæteris eminent, imprudentià labantur. Deinde, Iosephus à diluvio usque ad ortum Abrahami ait: se numerare dumtaxat annos ducentos nonaginta duos, & tamen si anni Patriarcharum post diluvianorum accuratè, computentur, sicut in hodierno Iosephi Textu sunt descripti, summam dabunt à diluvio usque ad ortum Abrahami annor. nongentorum nonaginta duorum. Hinc Clar. *Arnaldus Dandilly* in sua Gallica versione Operum Iosephi fatetur ingenuè, Iosephi calculum, in annis Patriarcharum antè, & post diluvium, fuisse de industria à Græcis vitiatum. Immo, *Morinus* cap. 1. Exercit. 7. lib. 1. de *Hebræi, Græcique Textus sinceritate*, asserit, à quodam sciolo multos Textui Iosephi additos esse centenarios: *Nam, inquit, cum videret, ille sciolo, Iosephum in priori distributione antè diluvium vitas Patriarcharum, lxx. Interpretibus æquales fecisse, idem existimavit in posteriori distributione post diluvium esse faciendum.* Hæc habet *Morinus*, qui tamen falsò supponit, Iosephum in priori distributione antè diluvium vitas Patriarcharum calculo lxx. Interpretum æquales fecisse, cum potiùs dicere debuisset, Textum Iosephi tam in priori distributione antè diluvium, quàm in posteriori post diluvium, fuisse à Græcis in annorum numeris interpolatum, sicut mox ostendimus, idque etiam apertè declarant innumeræ contradictiones, quibus, in annorum numeris, scatet hodiernus Iosephi Textus; neque enim, credibile est, Iosephum, in scribendo diligentissimum, atque gravissimum Auctorem, tot contradictionibus in notandis temporibus se implicuisse, ut observat noster *Melchior Canus* lib. 11. de *Locis* cap. 5. ad argum. 9. *Sed in numeris Iosephi libri menda habent innumera, quæ ego menda viro diligentissimo, atque gravissimo assignare nec volo, nec debeo.*

Quòd spectat *Philonem*, Judæum, testantur *Sixtus Senensis* lib. 5. *Bibliothecæ Sanctæ, & Ricciolius* cap. 2. lib. 7. *Chronologiæ reformatae*, eum Patriarcharum annos numerasse juxta calculum Hebræorum, nec contrarium probari potest ex libro, qui de temporibus inscribitur, & quem noster *Joannes Annius*, Viterbiensis, *Philoni* Judæo perperam asserit. Constat enim apud viros eruditos, hunc librum spurium esse *Philonis*

Iudæi factum, tùm quia *Eusebius* lib. 2. *Histor. Eccles.* cap. 18. & *S. Hieronymus* in *Catalogo Scriptorum Eccles.* *Philonis* Iudæi Opera diligenter criterio censuerunt, & tamen nullum memorant Opus, in quo *Philo* res gestas Regni cuiusquam temporaque notarit; tùm quia etiam liber ille multa falsa, multa absurda, nonnulla contrà Scripturam sacram profert, totque mendis, & anilibus fabulis à capite ad calcem refertus est, ut nemo, qui cum tantisper lectitare voluerit, confestim non fateatur, hunc librum malè confarcinatum *Philoni* Iudæo vindicari haud posse.

Arguitur sextò: Multi Ethnici Historici, qui antè Christum vixerunt, videlicet *Demetrius Phalereus*, *Eupolemus*, *Philo senior*, & *Alexander Polyhistor*, in conscribendis suis Historiis, & numerandis annis, qui elapsi sunt ab exordio mundi, Lxx. Interpretum Chronologiam sunt secuti, & ad eam ætatem, in qua floruerunt, quinque mille supra ducentos, & ampliùs annos numerarunt, ut videre est apud *Clementem Alexandrinum* lib. 1. *Stromatum*, & apud *Morinum* cap. 2. *Exercit.* 7. lib. 1. de *Hebræi Græcique Textus sinceritate*, atqui ille annorum numerus, quem secuti sunt prædicti Historici Græci, coherere non potest cum Hebræorum Chronologia, benè tamen cum Chronologia Lxx. Interpretum; ergo potius standum est Lxx. Interpretum Chronologiæ, quàm Hebræorum calculo.

Respondeo: Hoc argumentum petitum ex testimoniis Historicorum Græcorum elumbe, immò nullius esse momenti. Primò, quia illi Historici, utpotè Græci, gentis Iudaicæ Chronologiam hauserunt ex versione Lxx. Interpretum, quæ tunc in illa regione vulgata erat. Secundò, quia in hac causa audiri minimè debent Historici illi prophani, qui in sacris Codicibus Hebræis peregrini & hospites fuerunt, sicut optimè observat *Iosephus* lib. 1. contrà *Appionem* cap. 8. ubi sermonem habens de *Demetrio Phalereo*, *Philone seniore*, & *Eupolemo*, hoc de illis fert iudicium: *Plurimi namque prædictorum virorum veritate quidem antiquarum causarum frustrati sunt non enim inerat eis, ut nostras Litteras possent omni scrupulositate sequi.* Quid igitur mirum, si errarint illi Historici Græci, veram Codicum Hebræorum ignorantes Chronologiam, & ex ea, quæ apud ipsos promulgata erat, Lxx. Interpretum versionis Chronologiæ, gentis Iudaicæ historiæ describentes. Reiectis ergo horum Græcorum testimoniis, uni Textui Hebræo, cui consona est nostra Editio vulgata, mordicùs adhærere debemus, quia, ut ait *Tertullianus* in libro de *Prescriptionibus Hæreticorum* cap. 12. *Nemò indè instrui potest, undè destruitur, nemo illuminatur, à quo contenebratur; queramus ergò in nostro, & à nostris, & de nostro; idque dumtaxat, quod salva regula fidei potest in questione devenire.*

Arguitur septimò: Iuxta sacri Textus Hebræi Chronologiam, *Geneseos* cap. 11. à diluvio usque ad ortum *Phaleg*, filii *Heberis*, quo tempore facta est divisio terræ, & dispersio hominum, centum tantummodò

modò numerantur anni, atqui credibile non est, *Sem, Cham, & Japhet*, tres Noemi filios, potuisse intrà centum annos tot gignere filios, ex quibus regna, populi, & numerosæ colonix ad universam terram, incolendam formarentur; ergò sacri Textus Hebræi Chronologia paulò contractior esse videtur, ac subindè minùs accurata in consignatione temporum.

Præterea, à diluvio usque ad nativitatē Abrahæ, ducenti nonaginta duo anni, iuxtà calculum Hebræorum, dumtaxat effluerunt, verosimile autem non est, in tam exiguo temporis intervallo tot Reges, qui Abrahamo fuerunt cōtānzi, ex quatuor hominibus, Noemo videlicet, & tribus eius filiis à diluvio superstitibus, prodire potuisse. Enim, verò, ut nihil dicam de Assyriorum, Ægyptiorumque Regibus, qui etiam ante ortum Abrahami amplissima jam regna occupabant, & multa sævissima bella movebant; Scriptura Sacra *Genesis* cap. 14. mentionem facit novem Regum, qui Abrahamo cōzvi & supbares fuerunt, quorum, vov, scilicet *Chodorlaomor*, quinque Reges annis duodecim servierunt, annoque decimo quarto redintegratum est bellum, quo *Loth* captus est, & ab Abrahamo servatus. Cùm igitur, juvene adhuc Abrahamo, tot extiterint Reges, multaque exarserint bella, intellectu difficillimum est, quomodò tot Reges. totque nationes longè à se invicem separatæ, ex quatuor hominibus intra spatium ducentorum nonaginta duorum annorum pullulare, & exurgere potuerint. Chronologia igitur Hebræorum æquò brevior est, ac proindè ipsi anteponenda est Lxx. Interpr. Chronologia, quæ à diluvio usque ad nativitatē Abrahami numerat annos mille centum & septuaginta tres. Facillimè quippè, juxtà hunc Lxx. Interpr. calculum, intelligitur tempore Abrahami fuisse amplissima Regna, potentissimos extitisse Reges, consertisque inter se præliis acriter dimicasse.

Respondeo ad primam objectionis partem: Scripturam Sacram non assignare confusionem linguarum, sicut & divisionem terræ, ac dispersionem hominum nativitati *Phaleg*, sed tantum innuere, Patriarcham *Heber* filio suo indidisse nomen *Phaleg*, eò quòd in diebus ejus divisæ fuerit terra. Cæterum, an in nativitate *Phaleg*, an verò in ejus morte, an denique in medio ipsius vitæ intervallo factum id fuerit? Scriptura non indicat. Probabilius autem ipse existimo, confusionem linguarum, ac terræ divisionem accidisse anno nonagesimo secundo ætatis *Phaleg*, hoc est, anno mundi 1848. sic enim fiet, ut à diluvio ad divisionem usque terræ anni sint 192. Non est autem incredibile intrà spatium 192. annorum, tres Noemi filios, divinà maximè favente, ac fecundante benedictione, pares fuisse procreandis hominibus, qui ad Turrim Babylonicam struendam, & diversa regna, quæ initio admodum angusta, & tenuia fuerunt, condenda, sufficere potuerunt; idque eò facilius credi potest, quòd post diluvium fuerit à Deo permessa Polygamia ad sobolis huma-

nx incrementum, ad Orbis vastitatem inflaurandam . Undè homines id ætatis, cùm propter vivax, & vegetum corporis robur ad multos annos superstites essent, multis procreandis liberis operam dederunt, & quot annis singulos filios susceperunt, aliquandò geminos, nonnunquàm ter geminos habuerunt . Addo etiam, non deesse Auctores graves, qui per regulas Arithmeticz evidenter probant, tempore, quo facta est Orbis divisio, extare potuisse numerum trecentorum octoginta octo millium, sexcentorum & quinquaginta marium, totidemque fæminarum, quæ demonstratio legi potest apud Petavium, & alios Chronologos, qui hanc rem ex professo tractarunt .

Ad alteram objectionis partem ; Respondeo : à diluvio usque ad ortum Abrahami fluxisse annos 352. non verò annos tantùm 292. ut constabit ex his, quæ dicturus sum in Canone Chronologico, ubi ostendam, Abrahamum, juxtà calculum Hebræorum, natum esse non anno septuagesimo ætatis *Thare*, ut nonnulli putant Chronologi, sed anno centesimo trigésimo vitz *Thare* produsse in lucem, ex quo, factà annorum supputatione, colligitur, à diluvio usque ad ortum Abrahami numerari debere annos 352. Et rursùs à diluvio usque ad vocationem Abrahami intercessisse annos 426. Non est autem creditu difficile, intra spatium 332. vel 426. annorum, à tribus filiis Noemi, eorumque posteris sic homines fuisse propagatos, ut Abrahami tempore multi extiterint Reges, jamque conditæ fuerint Assyriorum, Egyptiorumque Monarchiæ, quæ tamen in ortu suo parvæ fuerunt, tenues, & angustæ. Quò sit, ut fabulis accenseri debeat id, quod *Diodorus* de Assyriorum imperii amplitudine, ac potentia sub *Nino* refert lib.2. ubi ait : Ninum, amplissimà sui nominis conditâ Urbe, Armeniam, Mediam, Syriam, Asiam, Egyptum, Phæniciam, & Asianos tractus omnes, præter Indiam, occupasse ; postremò Bactrianos infinitis copiis fuisse aggressum, ita ut in ejus exercitu peditum essent decies septies centena millia, equitum ducenta & decem millia, falcatorum curruum centum millia cum sexcentis . In qua narratione, *Diodorus*, ut Assyriorum Imperii, cujus historiam describebat, originem angustioreni redderet, de Nini potentia ejusque Regni amplitudine multa finxit, & , ut vulgò ajunt, ex Musca Elephantem fecit .

Arguitur ultimò : Egyptiorum Dynastiæ, Assyriorum, seu Chaldeorum, atque Sinensium antiquitates, nullo pacto conciliari possunt cum Textus Hebræi Chronologia, benè tamen cum calculo Lxx. Interpretum, ergò potius standum est Lxx. Interpret. Chronologiæ, quàm calculo Hebræorum . Prob. ant. Assyriorum, seu Chaldeorum Regnum, cæpit ter mille annis, & ampliùs ante Christum . Regnum verò Egyptiorum conditum est annis plusquam 2560. ante Christum . Regnum denique Sinensium præcessit natale Christi annis plusquam 2950. atqui certum est à diluvio usque ad natale Christi numerari non posse, juxtà calculum Hebræorum, nisi annos circitèr bis mille, & quadrigentos annos ,

nos, cūn tamen juxta LXX. Interpr. Chronologiam, à diluvio usque ad ortum Christi ter mille, & ampliùs effluerint anni. Ergò Ægyptiorum, Assyriorum, seu Chaldæorum, & Sinensium antiquitates cum arctiori Textas Hebraici calculo cohærere haud possunt, benè tamen cum LXX. Interpr. Chronologia.

Respondeo primò : nullam fidem habendam esse Ægyptiorum, & Chaldæorum Historiis, teste S. *Augustino* lib. 12. de Civitat. Dei cap. 10. ubi dicit, non esse credendum Litteris, quas Chaldæi, & Ægyptii plenas fabulosis antiquitatibus proferunt contra auctoritatem vetustissimorum, divinatorumque librorum. Idem asserit *Lactantius* lib. 7. Divinarum Institutionum cap. 14. Idque triplici momento confirmari potest. Primò, quia *Callisthenes*, qui se Alexandro Magno in expeditione Babylonica comitem adjunxit, retulit Aristoteli, teste *Simplicio* lib. 2. de Cælo, Chaldæos Astronomicas habere Observationes annorum 1903. usque ad tempus, quo Alexander M. Dario devicto Babylone potitus est. Qui annorum computus, sicut fatentur omnes Chronologi, optimè consentit cum Hebræorum Chronologia, fabulosasque ostendit antiquitates quas jactant Chaldæi. Secundò, peritissimi Astronomi illas immensi temporis Astronomicas Observationes, quas venditant Chaldæi, tanquàm omninò fabulosas explodunt, quia de illis nullam prorsùs mentionem fecerunt veteres Astronomi *Ptolomæus* scilicet, *Hyparchus*, *Aristarchus*, & alii, quas tamen non omisissent, si reverà factæ fuissent, cum omnibus exploratum sit, Observationes Astronomicas, quò antiquiores sunt, eò esse utiles & aptiores motibus cælestium corporum rimandis, ac detegendis illis, qui sunt tardiores, & qui non nisi magno spatio deprehendi, & dignosci possunt. Denique, Historici, qui de Assyriorum Imperii exordio, ac duratione scripserunt, adeò inter se dissident, ut nihil certi, meà quidem sententiâ, super hac re statui, aut definiri possit. *Ctesias* namque Assyriorum Imperium à prima sui origine, usque ad Sardanapalum, hoc est, usque ad defectionem Medorum, perdurasse ait annis 1305. *Diodorus* 1360. *Georgius Syncellus* 1460. *Æmilius Sura*, & *Justinus*, *Trogii* brevior, 1300. *Castor Rhodius* 1280. *Ensebius* 1240. denique *Herodotus*, quem peritissimi hujus temporis Critici veriùs, & accuratius Historiam Assyriorum descripsisse affirmant, Assyriorum Imperio à prima sui fundatione, usque ad defectionem Medorum, tribuit dumtaxat annos 530. Hæc autem Historicorum, circà Assyriorum Chronologiam, tam patens dissonantia manifestò evincit, Assyriorum, seu Chaldæorum Historias cimmeriis plusquàm tenebris esse involutas, eorumque Imperii originem incertam planè & incertam esse.

Respondeo secundò : Chaldæorum, & Ægyptiorum Historias non solùm Hebræorum calculo, sed etiam LXX. Interpr. Chronologiæ adversari. Nam Chaldæi, ut Auctores sunt *Diodorus* lib. 2. Bibliothecæ, & *Cicero* lib. 1. de Divinatione, tempore expeditionis Alexandri Magni in

Asiam,

Asiam, numerabant quadringenta, & septuaginta tria annorum millia, ex quo apud ipsos sydera observari cæptum est. Ægyptii verò, teste eodem Diodoro, viginti tria annorum millia, immò nonnulli apud ipsos centum annorum millia numerabant, quando Alexander M. Asiam ingressus est. Quod quidem commentum his verbis refellit *Saunders Augustinus* lib. 18. de Civitat. Dei cap. 40. *Frustrà vanissima præsumptione garriunt quidam dicentes, ex quo rationem syderum comprehendit Ægyptus, amplius quàm centum annorum millia numerari. In quibus enim libris istum numerum collegerunt, qui non multum ante annorum duo millia litteras, Magistra Iside, didicerunt. Cum igitur fictitiæ Regnorum illorum antiquitates tam Hebræorum calculo, quàm LXX. Interpr. Chronologiæ adversentur, inter aniles fabulas jure meritò computari debent, quippè quæ à regula veritatis omninò discrepant, & eò tantum modò tendunt, ut ei insulsiæ favule de hominibus ante Adamum existentibus aliqua addatur autoritas, eò si quidem argumento, petito ex incompertissimis & fabulosis Nationum Orientalium originibus, potissimum usus est Auditor systematis Præadamitarum.*

Respondeo ultimò: tam ex sacra, quàm ex profana Historia evinci posse, Ægyptiorum, & Chaldæorum Regna post diluvium condita fuisse. Nam primò, Ægyptus vocatur *Cham* non tantum in sacris litteris, verum etiam in gentiliū libris, hoc enim nomine insignitur à Plutarcho. Idèò autem Ægyptus vocatur *Cham*, quia data fuit Cham, Noemi filio, qui ibi habitavit, & cujus posterì Atricam implevere. Undè *Chamur*, Noemi filius, fuit primus Ægypti Rex, quem *Menem* appellant *Hæredtas*, *Diodorus Siculus*, *Eratosthenes*, & ex Manethone *Julius Africanus*, *Eusebius*, & *Georgius Syncellus*. Ægyptus etiam appellatur *Misraim*, propter *Misraim*, filium Chami, sicut testantur *Georgius Syncellus* in sua Chronographia, & *Josephus* lib. 1. Antiq. c. 12. Duo itaque illa nomina, *Cham*, & *Misraim*, Ægypto imposita, apertè demonstrant, Ægyptiorum originem non altius, quàm à filiis Noemi post diluvium, esse arcesendam. Nulla ergò fides adhibenda est Manethoni, qui, originem Ægyptiacas describens, triginta Dynastias Deorum, Semideorum, mortaliumque Regum pro arbitrio finxit. Hinc, *Eusebius* suum Canonem Chronicum à nativitate Abrahamæ pertexens, quindecim Ægyptiorum Dynastias, à Manethone, & à *Julio Africano* recensitas, expunxit, quod quidem argumento est, *Eusebium* putasse, hujusmodi Regum Ægyptiorum Dynastias maximam partem fabulosas esse. Quin etiam *Julius Africanus*, & *Georgius Syncellus* in Regum Ægyptiorum Dynastiis describendis longè latèquæ à Manethone discrepant. Addo etiam, multos esse hujus temporis doctissimos Chronologos, qui asserunt, Dynastias Ægyptiorum Regum non fuisse successivas, sed collaterales, hoc est, non collecti seriem propriè Regum, qui sibi continuè in Ægypti Regno successerint, sed exhibere dumtaxat diversos regulos, qui in

di-

diversis *Ægypti* Nomis, seu Præfecturis, simul, & eodem tempore regnarunt. Consulere poteit Lector Chronicum Canonem *Ægyptiorum* editum à *Marshamo*, in quo *Ægyptiorum* Dynastiæ, cum *Hebræorum* calculo conciliantur, & Tabulas Chronologicas Regni *Ægyptiorum*, quas doctissimus *Ellias du Pin*, Doctor Sobornicus, inferuit in sua Bibliotheca universali Historicorum.

Secundò, *Chaldæos*, seu *Assyrios* diluvio posteriores esse, ex eo maxime liquet, quòd *Chaldæi*, referente *Diodoro*, ex *Ægyptiis* suam ducunt originem, in quo cum *Mose* *Diodorus* consentit, nam *Moses* cap. 10. *Geneseos*, *Chaldæorum* originem repetit à *Chus*, filio *Chami*. Quapropter, *Assyriorum* historiz, etiam in sententia eorum, qui *Ctesianam* sentantur Chronologiam, conciliari possunt cum *Hebræorum* calculo, si semel è serie Regum expungantur septem Reges *Chaldæi*, & sex Reges *Arabes*, quos *Georgius Syncellus*, *Julius Africanus*, & *Eusebius*, *Berosi*, fabulosi Auctoris, testimonio nixi, asserunt regnasse annis 444. ante Belum, seu *Nembrodom*. Non desunt attamen periti hujus temporis Chronologi, qui, repudiata *Ctesianâ* *Assyriorum* Chronologiâ, docent, juxtâ *Herodoti* de *Assyriorum* Imperii duratione calculum, posse cum *Hebræorum* Chronologia optimè cohærere tempora, quæ *Georgius Syncellus*, & alii mox laudati Auctores adscribunt septem Regibus *Chaldæis*, & sex *Arabibus*: *Herodotus* siquidem, quem *Cicero* appellat *Historiarum Patrem*, scribit lib. 1. cap. 95. *Assyriorum* Imperium perstitisse dumtaxat annis 520. usque ad defectionem *Medorum*, qui contra *Assyrios* rebelantes, *Dejocem* sibi Regem præfecerunt, novumque Imperium condiderunt. *Medorum* autem Imperium, juxtâ eundem *Herodotum*, centum quinquaginta duravit annis, usque ad *Astyagem*, ultimum *Medorum* Regem, quem vicit, ejusque Regnum occupavit *Cyrus*, *Perse*, anno periodi *Julianæ* 4155. ante Christum 559. Imperium itaque *Assyriorum*, juxtâ *Herodoti* chronologiam, cœpit anno periodi *Julianæ* 3485. ante Christum 1229. ac subindè longè post diluvium. Falluntur ergo illi Chronologi, qui asserunt *Assyriorum* Imperii exordium Natale Christi antevertisse annis 3000. *Herodotum* in Chronologia *Assyriorum* præferendum esse *Ctesiz*, multis momentis evincunt *D. Bernardus Monfaucon* in sua Historia *Judith*. *P. le Quien* in Responsione ad defensionem antiquitatis temporum, & *Ellias du Pin* in Bibliotheca universali Historicorum, in *Herodoto*, & in *Ctesia*.

Denique, quòd spectat *Sinensium* antiquitates, non est quod in his refellendis diutius immorer, maxime cum ipsimet *Sinenses*, teste *P. Martinio* S. J. lib. 1. Historiz *Sinicz*, pro dubiis, & suspectis habeant omnia, quæ de Imperii sui exordio ante Imperatorem, dictum *Fohi*, narrantur, utpotè quæ quàmplurima falsa, & ridicula complectuntur, nullæque antè prædictum Imperatorem essent apud *Sinas*, litteræ, nullæ leges, nullæ artes, nulla religio. Quin etiam, asserit idem Auctor, è *Sinensium*

Annalibus delendos esse sex primos Imperatores, & ab Imperatore, dicto *Tao*, ducendum esse initium, quia omnia, quæ antè illum Imperatorem in Sinenfium Annalibus gesta produntur, fabularum loco haberi debent, & à sapientibus, apud Sinas, tanquam mera vulgi deliria exhibantur. Idem testatur *P. Philippus Cuppletus S. J.* qui, cum tribus aliis ejusdem Soc. Patribus, Sinarum Imperium perlustravit, in Declaratione Præmiali ad Opera Confucii, quæ Latino idiomate donavit. Ut ut sit, etiam si Sinenfium, aliarumque Nationum Orientalium Historiæ cum sacri Textus Hebræi Chronologia nullo pacto conciliari possent, semper tamen & indivulsè standum esset Hebræorum Chronologiæ, quam in nostra Editione vulgata etiamnum retinet, & sequitur Ecclesia Catholica: nam, ut ait *Sanctus Augustinus* lib. 18. de Civit. Dei cap. 40. *Quomodo non isti ridendi potius, quam refellendi sunt, qui de spatio temporum tam diversa, & huic tam exploratæ veritati contraria persuadere conantur, cui etenim melius narranti præterita credamus, quam qui futura prædixit, quæ præsentia jam videmus, nam & ipsa historicorum inter se dissonantia copiam nobis præbet, ut ei potius credere debeamus, qui divinæ, quam tenemus, non repugnat veritati.*

DISSERTATIO SEXTA

De anno Natalis proprii Christi, seu quoto Imperii Augusti anno natus sit Christus Dominus?

AD hanc celeberrimam dignè, uti par est, pertractandam difficultatem, de qua ab ipso nascentis Ecclesiæ exordio diversæ fuerunt Sanctorum Patrum sententiæ, & magno animorum æstu etiamnum digladiantur inter se periti hujus temporis Chronologi; necessarium foret notitiam præmittere principiorum, quibus potissimum nititur doctrina temporum. Verum, ne nimia prolixitate Lectoribus fastidium ingereret hæc Dissertatio, consultius factum me esse duxi, si hanc principiorum Chronologiæ notitiam traderem in Apparatu Chronologico, quem ad calcem hujusce Tractatus subnectam, & in quo disseram de Cyclis, Periodis, Æris, & Epochis, quæ sunt sicut fixi cardines, & indices, quibus rerum gestarum indignantur tempora. Hanc autem difficultatem de anno, cui illigari debet proprium Natale Christi, eo lubentius hic excutiendam aggredior, quod illius elucidatio ad vitam Christi Domini illustrandam plurimum juvare potest. Enim verò, Sacri Evangelistæ, dum vitæ Christi historiam describunt, annum ipsius natalitium tribus præcipue characteribus consignant. Primum, notatione Regni Herodis, *Matth.* cap. 2. deinde notatione Imperii Augusti,

gusti, & Descriptionis primæ institutæ à *Cyrino*, seu *Quirinio*, Præside *Syriæ*, *Lucæ* cap. 2. denique, notatione anni decimi quinti Imperii *Tiberii*, & ætatis, quam habebat Christus, dùm accessit ad Baptismum, *Lucæ* cap. 3. quæ omnia rectè explicari, & intelligi haud possunt, nisi Fastorum Consulum Romanorum, & Historiæ Imperatorum habeatur notitia, quia, ut observat *S. Augustinus* lib. 2. de *Doctrina Christiana* cap. 28. per *Olympiades*, & Consulum nomina, multa sæpè queruntur à nobis, & ignorantia consularis, quo natus est Dominus, & quo passus est, non nullos cœgit errare. Hinc viri doctissimi *Onuphrius*, *Baronius*, *Petavius*, *Norifius*, *Pagius*, *Gruterus*, *Vaillantius*, aliique benè multi, diù multùmque insudarunt, ut ex nummis, inscriptionibus, cæterisque id genus venerandæ vetustatis monumentis, & terræ ruderibus effosis, præcipuas explanarent epochas, Fastosque Romanorum Consulum digererent, & in optimo lumine collocarent. Hæc igitur difficultas, quam in præsentia versamus, cùm ad vitam Christi illustrandam plurimum lucis ex historia profana, asferre possit, debet à nobis accuratè pertractari, & majori, quàm fieri poterit, perspicuitate explicari. Quamobrem, præmittam quasdam observationes, ut omnia, quæ deinceps dicturus sum, nullo negotio Lector assequi possit.

Observandum itaque primò, duplicem præsertim à Chronologis distingui Epocham Imperii *Augusti*, sub quo natus est Christus Dominus. Prima Epocham Imperii *Octaviani Augusti* sumit exordium ab anno secundo Juliano, seu ab anno Urbis Romæ conditæ septingentesimo decimo, ante Æram vulgarem quadragesimo quarto. Hoc siquidem anno, die xv. Martii, *C. Julius Cæsar* in curuli sedens à Senatu occisus est, eoque occiso, *Octavianus Augustus*, *Julii Cæsar*is nepos, Imperium iniiit, sicut disertè ostendit *Cl. Pagius* in Apparatu chronologico ad *Annales Baronii* ex locupletissimis testimoniis *Iosephi* lib. 18. *Antiq.* cap. 3. *Ensebi* lib. 1. *Hist. Eccles.* cap. 9. & celeberrimorum Scriptorum, qui annos Imperii *Augusti* numerant ab anno secundo Juliano, seu ab anno Romæ conditæ septingentesimo decimo. Altera Imperii *Augusti* Epocham auspicatur anno Urbis Romæ conditæ septingentesimo vigesimo tertio, seu anno Juliano decimo quinto, ante Æram vulgarem trigésimo primo, quo anno Imperator *Augustus* die 2. Septembris de *Antonio*, & *Cleopatra* victoriam in pugna *Actiaca* reportavit, quemadmodum, refert *Dio* lib. 51.

Observandum secundò, duplicem itidem à Chronologis distingui Epocham Regni *Herodis*, quo in *Judæa* regnante, natus est Christus Dominus. Prima Regni *Herodis* Epocham ducit initium ab anno quinto Imperii *Augusti*, seu ab anno sexto Juliano, ab anno Urbis Romæ conditæ septingentesimo decimo quarto, & periodi *Julianæ* quater millesimo sexcentesimo septuagesimo quarto, Consulibus *Cn. Domitio Calpurnio*, & *C. Asinio Pollione*, in Autumno, seu mense *Octobri*, sicut multis mo-

mentis evincit *Cardinalis Norisius* in *Genoraphiis Pisanii* Dissertatione secunda, maxime ex ludis Apollinaribus, quos *Agrippa*, Prætor, teste *Dione*, exhibuit mense Julio dimidiâ sui parte jam exacto, idest, quarto idus Julias anni Urbis Romæ conditæ septingentesimi decimi quarti, quo tempore *Sextus Pompejus* Thurios, ac *Cosentian* obsidebat, *Antonius* verò *Brundisium* militari coronâ vallatum premebat. Constat enim mense Septembri ejusdem anni, *L. Coccejum*, Imperatori Augusto, & Antonio ex æquo gratum, ultrò citròque ad eos comiteantem, certis quibusdam conditionibus pacem diù in Italia exoptatam inter utrumque feliciter conciliasse, Senatum verò ob initam concordiam decrevisse, ut ambo ovantes Romam ingrederentur, quod quidem totâ plaudente, & gratulante Italiâ factum est. Sub idem tempus, *Herodes*, instructâ apud *Rhodium* trireme, *Brundisium* appulit, inde, Romam profectus narravit Antonio ea omnia quæ sibi in Iudæa contigerant, quomodo videlicet *Antigonus* *Palestinam* invasisset, & à *Pacoro*, *Parthorum* Rege, fuisset Judæis Rex impositus, *Hircanus* verò è folio deturbatus esset & in vincula conjectus; quomodo etiam ipse malâ alite, variisque jactatus procellis Romam venisset, ut ejus pro afflictâ, atque tum ab hoste obsessa familiâ patrocini um imploraret, melioraque fata post tot adversos fortunæ casus sperare posset. *Antonius*, miseratione mutatæ fortunæ Herodis perimor, vicemque amici dolens, re cum Collegâ, triumviro, idest, *Augusto*, communicatâ, communi consilio decreverunt ambo, *Herodem* Iudæorum Regem designare; itaque convocatis Patribus Regnum *Palestinæ*, seu Iudææ, Herodi delatum est. Hæc refert *Iosephus* lib. 14. Antiq. cap. 26. ex quo liquidò patet, Herodem fuisse Regem Iudææ declaratum anno quinto Imperii Augusti, seu anno Urbis Romæ conditæ 714. ac proinde ab illo anno putandos esse Regni Herodis annos, sicut illos hoc modo computarunt *Iosephus*, qui Historiæ Judaicæ peritissimus, & ipsius Herodis tempori valdè proximus fuit, *Philo* etiam Judæus, qui Herodis temporibus fuit Iosepho proximior, & *Nicolaus Damascenus*, scriptor egregius, qui Herodi contemporaneus, & familiarissimus fuit, eidemque superstes. Fallitur ergo *Cardinalis Baronius*, dùm asserit, annos Regni Herodis putari debere à pugna Actiaca, seu ab anno Urbis Romæ conditæ septingentesimo vigesimo tertio, quandò videlicet Imperator Augustus navali prælio Antonium, & Cleopatram debellavit.

Alter a Regni Herodis Epocha cæpit à morte Antigoni, seu ab expugnatione Hierosolymorum, quæ facta est ab Herode, & Sosio Kalendis Januarii, sicut videtur *Vissario*, vel ut putat *Bucherius* sub finem mensis Junii anni Urbis Romæ conditæ septingentesimi decimi septimi, & periodi Julianæ quater millesimi sexcentissimi septuagesimi septimi, *M. Agrippa*, & *Caninio Gallo* Consulibus. Hoc est, tribus annis, postquam Herodes fuit à Senatu Romano Rex Iudææ salutatus. In hac Epocha Re-

Regni Herodis dissentit ab aliis Chronologis *Norissius* in Cenotaphiis Pisaniis, putatque cum *Dione*, Hierosolymorum expugnationem, factam ab *Herode*, & *Sosio*, incidisse in annum Urbis Romæ conditæ septingentesimum decimum sextum, ac subindè ab illo anno cœpisse alteram Regni Herodis Epocham. At, non debuisset doctissimus ille Cardinalis propter Dionis testimonium recedere à communi Chronologorum sententia, fides namque potiùs adhibenda est Iosepho, qui Hierosolymorum expugnationem refert ad annum Urbis Romæ conditæ 717. quàm *Dioni*, qui lib. 49. eam incidisse scribit in annum Urbis Romæ conditæ 716. *Iosephus* quippè res Iudaicas apprime callebat, easque diligentius executus est exscribens vitam Herodis ex voluminibus *Nicolai Damasceni*, à quo illa fuit exarata. *Damascenus* autem, ut mox diximus, fuit amicus fidelissimus, & intimus Herodis Consiliarius, cujus nomine legatione functus est ad Cæsarem.

Observandum denique, duplex à Chronologis distingui Natale Christi. Aliud est Natale Christi, quod appellatur *Dionysianum*, vel *vulgare*, seu commune. Et aliud est Natale Christi, quod dicitur *verum* & proprium. Natale Christi Dionysianum, seu vulgare ac commune, consignari debet anno quadragesimo quarto Imperii Augusti. Sic autem appellatur, quia licet vulgò, putetur, Christum natum esse anno quadragesimo quarto Imperii Augusti; periti tamen Chronologi invictis argumentis demonstrant, in hunc annum incidere non potuisse *verum* & proprium Natale Christi, sicut falsò sibi persuasit *Dionysius Exiguus*, Æræ vulgaris, seu Christianæ, Auctor. Nam hoc anno quadragesimo quarto Imperii Augusti jam è vivis excelserrat Herodes, ut ex his, quæ mox dicturus sum, manifestò patebit. Constat autem, Christum natum esse in diebus Herodis Regis, *Matth.* cap. 2. Deindè, hoc anno quadragesimo quarto Imperii Augusti immensum in Germania bellum erupit, & *Cajus Cæsar* adversus Parthos pugnavit, sicut ex *Vellejo Paterculo* probant Cardinalis *Norissius* in Cenotaphiis Pisaniis, & *P. Pagius* in fine Apparatus Chronologici ad *Annales Baronii*, porrò, anno, quo Christus, Servator noster, in lucem prodiit, totum Orbem in pace compositum fuisse in sequenti Dissertatione commonstrabo. Erravit ergo *Dionysius Exiguus*, dum Natale Christi consignavit anno quadragesimo quarto Imperii Augusti, & in hoc consentiunt omnes Chronologi, quamvis in assignando anno *veri* & *proprii* Natalis Christi variant linguis & sententiis. Alii enim cum *Antonio Capello*, *Keplero*, *Bollando*, *Pagio*, *Harduino*, & *Schellbrato* asserunt, proprium Natale Christi illigari debere anno 39. Imperii Augusti, seu anno Juliano 40. anno 3. Olymp. 193. Urbis Romæ conditæ 748. Periodi Iulianæ 4708. ante Æram vulgarem, seu Christianam, quinquennio solido, Consulibus *Lælio Balbo*, & *Antistio Vetere*. Alii cum *Dionysio Petavio*, *Eucherio*, *Usserio*, *Senescalio*, Natali *Alexandro*, *Norisso* &c. sentiunt, proprium Natale Christi consignandum esse anno

anno 40. Imperii Augusti, seu anno Iuliano 41. anno 4. Olymp. 193. Urbis Romæ conditæ 749. Periodi Iulianæ 4709. ante Æram vulgarem, quadriennio solido, Consulibus *Augusto Cesare XII. & L. Cornelio Sylla*. Alii cum *P. Bernardo Lamy* in Apparatu Chronologico par. 1. cap. 11. autumant, proprium Natale Christi præfigendum esse anno 41. Imperii Augusti, seu anno Iuliano 42. anno 1. Olymp. 194. Urbis Romæ conditæ 750. Periodi Iulianæ 4710. ante Æram vulgarem triennio solido, Consulibus *C. Salvio Sabino II. & L. Passieno Rufe*. Alii denique cum, Eminentissimo Annalium parente *Baronio*, *Josepho Scaligero*, *Setho Calvisio*, *Guillelmo Langio*, & *Ioanne Gerardo Vossio* censent, proprium Natale Christi incidisse in annum Imperii Augusti quadragesimum secundum, seu in annum Iulianum 43. in annum secundum Olymp. 194. Urbis Romæ conditæ 751. Periodi Iulianæ 4711. ante Æram vulgarem biennio solido, Consulibus *Cn. Cornelio Lentulo*, & *M. Valerio Messalino*. Quænam ex tot diversis circa Natale proprium Christi sententiis probabilior ac verior sit, etsi definire non sit ita facile, eam tamen opinionem, quæ mihi præ cæteris magis probatur, hæc proponam, multisque adstruam argumentis.

DICO ITAQUE: Verum & proprium Natale Christi consignari debere anno quadragesimo Imperii Augusti, anno quadragesimo primo Iuliano, anno quarto Olympiadis centesima nonagesima tertia, à pugna Actiaca anno vigesimo septimo, Regni Herodis trigesimo sexto, à morte Antigoni trigesimo tertio, Urbis Romæ conditæ septingentesimo quadragesimo nono, Periodi Iulianæ quater millesimo septingentesimo nono, quadriennio integro ante æram vulgarem, Consulibus *Augusto Cesare XII. & L. Cornelio Sylla*.

Probatur hæc assertio: Christus natus est in diebus Herodis Regis, idest, regnante Herode in Judæa, atqui Herodes à vivis excessit anno quadragesimo primo Imperii Augusti, ergo proprium & verum Natale Christi consignari debet anno quadragesimo Imperii Augusti, &c. Maj. certa est, & à nullo in dubium revocari potest, cum Scriptura Sacra *Matthæi* cap. 2. conceptis verbis dicat: Christum natum esse in diebus Herodis Regis. Totius itaque difficultatis cardo vertitur in minori propositione, in qua supponimus: Herodem Regem mortuum esse anno quadragesimo primo Imperii Augusti, seu anno à condita Roma septingentesimo quinquagesimo. Probatur igitur minor multis, jisque efficacissimis momentis.

Primo: Auctoritate Josephi, testis, ut fatetur *Eusebius*, probatissimæ fidei, & omni exceptione majoris, cuique inter omnes, qui Historiam Herodianam conscripsere, palma citrà controversiam debetur. *Josephus* itaque lib. 17. Antiq. capitibus 8. & 9. de morte Herodis Regis sermonem texens, ait, eum quinto die, post occisum filium suum Antipatrum, extremum diem clausisse, anno videlicet, ex quo à Romanis Regnum

gaum Judææ obtinuit trigesimo septimo, anno vero, ex quo vicit Antigonom, & cœpit Hierosolymam, trigesimo quarto. *Moritur Herodes*, inquit Josephus, *cum regnasset, post sublatum Antigonom, triginta quatuor annos, postquam verò renunciatus fuerat Rex à Romanis, triginta septem*. Porro, Herodes, sicut supra observavimus, Regnum Judææ à Romanis obtinuit anno quinto Imperii Augusti, seu anno Urbis Romæ conditæ 714. & vicit Herodes Antigonom tribus annis, postquam à Romanis Regnum Judææ obtinuisset, hoc est, anno octavo Imperii Augusti, seu anno Urbis Romæ conditæ 717. Si igitur anno quinto Imperii Augusti, quo Herodes in Judæa regnare cœpit, addas annos triginta septem (incluso tamen, in hoc 37. annorum numero, Imperii Augusti anno quinto, hoc enim anno regnare cœpit Herodes) incidet in annum quadragesimum primum Imperii Augusti, & in annum Urbis Romæ conditæ 750. quo anno è medio sublatus est Herodes. Similiter, si anno octavo Imperii Augusti, quo Herodes, devicto Antigono, solus in Judæa Regnum obtinuit, addas triginta quatuor annos (incluso tamen, in hoc 34. annorum numero, Imperii Augusti anno octavo, quo anno Herodes vicit Antigonom) incidet itidem in annum quadragesimum primum Imperii Augusti, & in annum Urbis Romæ conditæ 750. quo extinctus est Herodes, postquam Regnum Judææ, solus, devicto Antigono, triginta quatuor annis occupasset. Pater itaque ex illo locupletissimo Josephi testimonio, Herodem in vivis esse desuisse anno quadragesimo primo Imperii Augusti, seu anno Urbis Romæ conditæ 750. ante Æram vulgarem quadrennio integro.

Secundò: Herodem mortuum esse anno quadragesimo primo Imperii Augusti, seu anno Urbis Romæ conditæ 750. certò colligitur ex eclipsi Lunæ, quæ Hierosolymis conspicua visa est, teste *Josepho* lib. 17. *Antiq.* cap. 8. quæ quidem eclipsi Herodis fatalis fuit, illiusque mortis, pœnas ipsius impietatis exigente Numine, prænumcia.

Eodem siquidem anno, quo Hierosolymis accidit hæc eclipsi, è vivis raptus est Herodes. Atqui hæc eclipsi Lunæ Hierosolymis accidit anno quadragesimo primo Imperii Augusti, seu anno Urbis Romæ conditæ 750. ergo eodem anno occubuit Herodes.

Advertendum tamen est cum doctissimo *Schellstrato* in lib. de *Antiq. Eccl.* duas Lunæ eclipses Hierosolymis accidisse anno 41. Imperii Augusti, quarum primam laudatus Auctor asserit incidisse in diem 12. mensis Martii, & non in diem 13. ut visum est *Petavio*, aliisque Chronologis. Alteram verò Lunæ eclipsim censet *Schellstratus*, accidisse die quinta, mensis Septembris ejusdem anni quadragesimi primi Imperii Augusti, & post illam secundam Lunæ eclipsim Herodem vitæ functum fuisse die 25. mensis Novembris. Hæc *Schellstrati* sententia mihi videtur probabilior opinione illorum, qui asserunt, Herodem mortuum esse circa Paschatis festum, hoc est, post primam Lunæ eclipsim. Nam primò, Judæi mor-

tem

tem Herodis assignant in volumine jejunii septimo mensis *Casleu*, idest; daci vigesima quinta mensis Novembris, quæ dies ideo à Judæis festiva habetur, quòd in ea Herodes, qui sapientes odio persecutus est, mortem obiit. Hujus autem voluminis jejunii auctoritatem & antiquitatem commendant *Usserius* in suis Annalibus, & *Schelfstratus* in libro mox citato. Præterea, vix fidem faciunt, qui Herodem circa Paschatis festum anni quadragesimi primi Imperii Augusti mortuum esse asseverant. Enim verò, inter hanc Lunam, quæ defecit die 12. vel 13. Martii, & alteram Lunam, quæ festi Paschatis propria fuit, unicus dumtaxat interfuit mensis. Verosimile autem non est, in tantulo spatio, seu intra brevissimum mensis intervallum, Herodem hæc omnia gerere potuisse, quæ ab illo post eclipsim Lunæ gesta fuisse narrat *Iosephus*. Herodes siquidem, teste *I. Saphi*, post Lunæ defectionem non statim mortuus est, sed morbus ipseus in gravem cœsit, & post varia, quæ frustra adhibuit remedia, ut deploratæ valetudini confuleret, profectus est ultra Jordanem, ubi calidis se te fovebat aquis, ibi cum visus esset efflare animam, Jerichuntem repetiit, atque huc nobilissimos inter Judæos ferali edicto accersit, & in Circo conclusit, datis mandatis Salomæ, sorori suæ, ut, postquam expirasset, per milites occiderentur. Interim, Romæ accepit litteras, quibus ab Imperatore Augusto ipsi potestas permittebatur animadvertendi in filium suum Antipatrum, quem irâ percitus trucidari jussit, & quintâ die post occisum Antipatrum è vita decessit. Profectò, hæc omnia intra mensis spatium ab Herode fieri potuisse difficile creditu est. Denique, si Herodes mortuus esset circa Paschatis festum, non sibi constaret *Iosephus*, dum scribit: Herodem, postquam à Romanis fuisset Rex Judææ renunciatus, triginta sep em regnasse annis. Herodes namque Rex Judææ à Romanis est renunciatus anno quinto Imperatoris Augusti, in mense Octobri, ac proinde annus trigessimus septimus Regni Herodis inire dumtaxat potuit mense Octobri anni quadragesimi primi Imperii Augusti; si ergo Herodes mortuus esse ante Paschatis festum, non regnasset annos 37. imò nec trigessimum sextum omninò complevisset. Probabilius itaque est: Herodem mortuum esse non post primam Lunæ eclipsim, quæ Hierosolymis die 12. vel 13. Martii accidit, idest, in ipsa nocte, quâ Herodes Judam, Sariphæi filium, & Matthiam Margolothum, eorumque socios vivos exuri jussit ob deturbatam Aquilam auream, quam supra majorem portam Templi ipse contra legem crexerat, sed mortuum esse post alteram Lunæ eclipsim, quæ eodem anno, die Septembris quintâ Hierosolymis accidit.

Tertiò: Herodem mortuum esse anno quadragesimo primo Imperii Augusti, seu anno à condita Roma 750. facile probatur ex epocha, seu initio Regni Archelai, qui, teste *Iosepho*, septem diebus post obitum Patris Herodis, regnare cœpit in Judæa, sed anno sequenti, cum fuisset coram Augusto Imperatore accusatus, quòd, illo incio, Regnum patris occu-

occupasset, Romam profectus est, eumque Augustus dimidiâ parte ditionis patris donavit, & Ethnarcham Judææ declaravit, ei etiam pollicitus regiam dignitatem, si virtutem exhiberet Regno convenientem. Scribit autem Iosephus, quòd, postquàm Archelaus regnasset in Iudæa decem annis (computando illius Regni exordium ab obitu Herodis patris ejus) vel, ut alibi Iosephus dicit, postquàm Archelaus regnasset novem annis (illius videlicet Regni initium ducendo ab anno post obitum patris Herodis, quando nimirum Archelaus ab Imperatore Augusto dimidiâ partē ditionis paternæ donatus est) omnes procures tam Iudæi, quàm Samaritani, tyrannidem Archelai ægrè ferentes, cum apud Imperatorem Augustum denuò accusarunt, quò factum est, ut Imperator Archelaum, omni pecuniâ multatum, Viennam in Gallis in exilium amandarit. Hæc refert Iosephus lib. 2. de Bello Judaico cap. 6. & lib. 17. Antiq. cap. 15. Hæc autem exauctoratio, seu Archelai abdicatio, ab Imperatore Augusto facta, incidit, teste *Dione* lib. 55. in annum Imperii Augusti quinquagesimum, quo anno Consules erant *M. Emilii Lepidus*, & *L. Arruntius*. Jam verò si ex annis quinquaginta Imperii Augusti decem eximas annos, per quos Archelaus statim ab obitu patris sui Herodis regnavit in Iudæa, comperies Archelaum in Iudæa regnare cœpisse anno quadragesimo primo Imperii Augusti, ac subindè eodem anno Herodem, Archelai patrem, mortuum fuisse. Similiter, si ex annis quinquaginta Imperii Augusti novem semoveas annos, per quos Archelaus fuit Ethnarcha Iudææ, invenies Archelaum fuisse ab Imperatore Augusto Ethnarcham Iudææ institutum anno Imperii Augusti quadragesimo secundo, idest, anno jam elapso ab obitu patris sui Herodis. Ex quo evidenter sequitur, Herodem, patrem Archelai, obiisse anno quadragesimo primo Imperii Augusti, seu anno Urbis Romæ cond. æ 755. quadriennio integro antè Æram vulgarem.

Quartò: Herodem mortuum esse anno quadragesimo primo Imperii Augusti probat initium Regni *Herodis Antipæ*, qui fuit frater Herodis Archelai. Repertus quippè est nummus æneus minimi moduli, quem Cardinalis *Norisius* in Præfatione Operis sui de Epochis Syro-Macedonum publicâ luce donavit, & quem etiam exhibent *Pagius*, *Harduinus*, *Schelfstratus*, *Lamy*, & alii periti huius temporis Chronologi; in parte autem priorè illius nummi ænei legitur intra *Lauream* inscriptio Græca, sic Latine reddita: CAJVS CÆSAR GERMANICVS. In altera verò parte exhibetur ramus palmæ cum altera inscriptione Græca, sic Latine reddita: HERODES TETRARCHA ANNO XLIII. Ex hac gemina nummi ænei inscriptione constat primò, Herodem Antipam Galilææ Tetrarchiam obtinuisse per annos 43. deindè, hunc nummum fuisse cussum anno tertio Caii Imperatoris, nam, teste Iosepho, Herodes Antipas anno quarto Caii Imperatoris fuit Tetrarchiâ Galilææ privatus, & vni cum uxore Herodiade Lugdunum in Galliis pulsus in exilium. Oportet

ergo, ut annus quadragesimus tertius Herodis Tetrarchæ Galilææ referatur ad annum tertium Cæii Imperatoris, quo anno Herodes Antipas Tetrarchiâ Galilææ adhuc potiebatur. Hoc autem semel supposito, liquet Herodem Antipam occupare cœpisse Galilææ Tetrarchiam anno quadragesimo primo Imperii Augusti. Ab eo siquidem anno usque ad annum tertium Cæii Imperatoris numerantur ab omnibus Chronologis anni quadraginta tres, per quos Herodes Antipas Tetrarchiam Galilææ rexit. Porro, si Herodes Antipas Tetrarchiâ Galilææ potiri cœpit anno quadragesimo primo Imperii Augusti, necesse omnino est, ut Herodes, pater ipsius, eodem anno vitâ functus fuerit, nam *Herodes Antipas Galilææ* Tetrarchiam obtinuit dumtaxat post obitum Herodis, patris sui, qui cum primò per Testamentum suum Regem Iudææ designaverat, sed mutata voluntate Regnum Iudææ Archelao reliquit, Herodi verò Antipæ Tetrarchiam Galilææ adjudicavit.

Quintò: Herodem mortuum esse anno quadragesimo primo Imperii Augusti, seu anno à condita Roma septingentesimo quinquagesimo, probari potest ex his, quæ refert Josephus de Philippo, filio Herodis, & fratre Archelai, & Herodis Antipæ. Philippus enim, ut scribit Josephus lib. 18. Antiq. cap. 3. cùm esset Tetrarcha Traconitidis, Gaulanitidis, ac Batanææ, rebus suæ Tetrarchiæ ordinatis, & dispositis, vico Bethsaide in ripa lacus Genesarethini Urbis speciem addidit, frequentato incolis, & auxilio opibus, quem Iulia, Cæsaris filia, cognominem esse voluit. Verosimile autem non est, Philippum hanc Urbem voluisse dedicare Iuliæ, Augusti Imperatoris filia, postquàm evulgata est ejus infamia, ejusque adulteria fuerunt propalata, quæ Augusti animum ita ab illa abalienarunt, ut ne minimam quidem ipsius mentionem ferre posset, sicut Suetonius in Octavio, & Tacitus lib. 1. Annalium memoriæ prodiderunt. Omnes verò Chronologi fatentur, Iuliæ flagitia, seu propudiosa adulteria fuisse detecta anno quadragesimo tertio Imperii Augusti, & Urbis Romæ conditæ septingentesimo quinquagesimo secundo, Consulibus Augusto XIII. & M. Plantio Silvano. Negari etiam non potest, Philippum biennio integro opus habuisse tum ad res suæ Tetrarchiæ ordinandas, tum ad novam, quam moliebatur, Urbem perficiendam. Oportet igitur, ut Philippus jam cœperit esse Tetrarcha Traconitidis anno quadragesimo primo Imperii Augusti, seu anno Urbis Romæ conditæ septingentesimo quinquagesimo, eodemque anno è vita migrarit Herodes, pater Philippi.

Denique, Herodem mortuum esse anno quadragesimo primo Imperii Augusti, seu anno Urbis Romæ conditæ septingentesimo quinquagesimo, evinci potest ex judicio, quod tulit Imperator Augustus ad dirimendam litem exortam inter filios Herodis de paterni Regni successione. Testatur siquidem Josephus lib. 17. Antiq. cap. 12. filios Herodis de paterni Regni successione litigantes, Romam ad Augustum integram-

detu-

detulisse Causam, Augustum verò in amicorum Consilio rem discussisse, quos inter Iosephus recenset *Cajum*, Agrippæ, & Julii filium, ab Imperatore Augusto iam adoptatum. Illud autem iudicium habitum est, sicut solidè probat Cardinalis *Norisius* in Cenotaphiis Pisanis, anno Urbis Romæ conditæ septingentesimo quinquagesimo primo, seu Imperii Augusti quadragesimo secundo, adeò ut in annum proximè insequentem, protrahi nullatenus possit, nam si illud iudicium habitum fuisset anno Urbis Romæ 752., seu Imperii Augusti 43., procul omni dubio *Lucius*, *Cæsar*, qui hoc anno virilem togam induit, Princeps juventutis, omnibusque honorum titulis Cajo, majori natu fratri, æquatus est, Consulque designatus, unà cum Cajo fratre suo ad idem iudicium fuisset ab Imperatore Augusto admissus; cum igitur *Lucius* ad illud consilium non fuisset adscitus, argumento est, filios Herodis anno superiori, seu Urbis Romæ conditæ 751. & Imperii Augusti anno 42. hoc est, anno ab obitu patris Herodis jam emenso, Romam venisse, eodemque anno litem de successionem paterni Regni inter ipsos enatam in Consilio Imperatoris fuisse Romæ dijudicatam, atque compositam.

Patet itaque ex omnibus illis momentis, quæ hæcenus adduximus, Herodem mortuum fuisse anno quadragesimo primo Imperii Augusti, seu anno Urbis Romæ conditæ septingentesimo quinquagesimo, ac subindè verum, & proprium Natale Christi consignandum esse anno superiori, quo adhuc vivebat Herodes, scilicet anno quadragesimo Imperii Augusti, seu anno Urbis Romæ conditæ septingentesimo quadragesimo nono, antè Æram vulgarem quadriennio integro. Sic enim stat Scripturæ sacræ veritas, dum *Matth.* cap. 2. dicit, Christum natum esse in diebus Herodis Regis.

DILUUNTUR OBJECTIONES.

Arguitur primò: Ecclesia Latina in numerandis annis, qui ab Incarnatione Christi Domini ad hanc usque ætatem interfluxerunt, utitur Ærâ vulgari, seu Christianâ, cujus auctor fuit circa initium sexti sæculi *Dionysius*, natione Scythæ, & Abbas, cognomento *Exiguus*; atqui juxta Æram Dionysianam, seu vulgarem, Natale Christi consignari debet anno quadragesimo quarto Imperii Augusti, ergo Natale Christi non est illigandum anno quadragesimo Imperii Augusti.

Respondeo primò: Duplex, ut antehac observatum est, Natale Christi esse discernendum, unum, quod dicitur *proprium*, alterum, quod *vulgare* nuncupatur. Natale proprium Christi illud est, quod reverà contigit in diebus Herodis Regis, sive, sicut mox latè probavimus, quod incidit in annum quadragesimum Imperii Augusti, quo anno adhuc in vivis erat Herodes. Natale vulgare Christi illud dicitur, quod *Dionysius Exiguus* consignavit anno quadragesimo quarto Imperii Augusti.

Quà in re *Dionysium* fuisse hallucinatum inconfesso est apud omnes Chronologos, qui Sole clariùs ostendunt, Herodem jam vita functum esse anno quadragesimo quarto Imperii Augusti. Mortuus est enim Herodes anno quadragesimo primo Imperii Augusti, sicut ex his, quæ supra diximus manifestò patet. Quapropter, *Dionysius Exiguus* in assignando anno Natalitio Christi Domini quadriennio integro à recta via aberravit. Nec assertioni nostræ officit consuetudo Ecclesiæ, quæ annos Christi, juxtà Æram à *Dionysio Exiguo* excogitatam, numerare solet, dum ex. gr. hunc annum, quem decurrimus, dicit esse ab Incarnatione Domini millesimum septingentesimum vigesimum tertium. Enim verò, Ecclesia Latina Æram Dionysianam, seu vulgarem, in usum transtulit, non quòd eam omni ex parte accuratam esse judicaverit, sed quòd eam Christiani à tempore *Dionysii Exigui*, qui eam invenit, in numerandis annis Christi communiter usurpaverint. Has etenim temporum, annorumque minutias, & quisquilias non moratur, aut penitiùs expendit Ecclesia, sed potius hujusmodi tricas, gravitate, & auctoritate suà indignas, permittit Chronologis discutiendas, ac dirimendas. Non secus ac, licet Ecclesia in Martyrologio, quod in pervigilio Natalis Christi singulis annis recitatur, calculum LXX. Interpretum retineat, hoc tamen perantiquo non obstat Ecclesiæ Latinæ usu, omnes fermè periti hujus temporis Chronologi constanter docent, calculum LXX. Interpretum multis scate-re mendis. Quamvis ergò Ecclesia Latina numeret annos Christi juxtà Æram Dionysianam, seu vulgarem, indè tamen hanc Æram accuratam esse evinci minime potest.

Respondeo secundo: Hanc consuetudinem subducendi annos Christi juxtà Æram Dionysianam non semper viguisse in Ecclesia Latina, siquidem, antè *Dionysium Exiguum*, mos in Ecclesia obtinebat notandi annos per Olympiades Græcorum, per annos Imperatorum, & Consulum Romanorum, sed potissimum per Æram Alexandrinorum Martyrum, seu per Æram Diocletiani Imperatoris, qui in Christianos ferro, flammæque sævit, & maximam ipsorum stragem edidit. *Dionysius* autem, ægrè ferens, quòd Christiani ab exordio Imperii Diocletiani suos notarent annos, Æram illam, quæ dicitur *vulgaris*, aut *Christiana*, adinvenit, quam tamen Ecclesia non confestim in usum transtulit. Observat quippè doctiss. *Pagius* in Dissertatione de periodo Græco-Romana, in Galliis, primà dumtaxat Francorum Regum stirpe deficiente, hanc Æram *Dionysianam* in usum vocatam esse, sicut videre est in Capitalibus Regum Francorum ab erudito *Baluzio* publicatis, quorum etiam mentionem facit doctissimus *P. Mabillonius* in libro *De re Diplomatica*. Hispani quoque, & Lusitani nonnisi paucis abhinc sæculis Æram Hispanicam, antiquarunt, & in ejus locum *Dionysianam*, seu *vulgarem*, subrogarunt; quin & Summi Pontifices eandem Æram tardiùs in suis Diplomatis expresserunt, Eugenius quippè IV. suasu *Elondi*, Æram Dionysianam adhibere cœpit.

Ar-

Arguitur secundò: Idèò maximè proprium Natale Christi consignari deberet anno quadragesimo Imperii Augusti, quia Herodes, quo in Judæa regnante, natus est Christus Dominus, supponitur mortuus, juxta calculum Josephi, anno quadragesimo primo Imperii Augusti, atqui Herodes non est mortuus anno quadragesimo primo Imperii Augusti, sed potius anno quinquagesimo, ergò concidit præcipuum, & unicum fundamentum nostræ fundamentum. Prob. min. Anni triginta septem, quos Regno Herodis tribuit Josephus, putari non debent ab anno quinto Imperii Augusti, sed ab anno decimo quarto illius Imperii, quando videlicet Imperator Augustus in pugna Actiaca vicit Marcum Antonium, qui, spretà Octaviâ, sorore Augusti, quam, pace apud Brundisium factâ, uxorem duxerat, deindè cum Cleopatra, Regina Ægypti, matrimonium iniit. Ab eo siquidem anno Imperii Augusti decimo quarto numerari debere annos triginta septem Regni Herodis, ex eo præsertim suaderi potest, quòd cum Herodes vasro, ac politico esset ingenio præditus, maximusque Cæsaris adulator, ubi primùm intellexit, Marcum Antonium, patronum, & Mæcenatem suum, in pugna Actiaca fuisse profligatum, omniaque illius Acta ab Imper. Augusto fuisse omninò rescissa, tunc ut gratiam victoris Augusti faciliùs aucupari, & in ejus amicitiam blandiùs irrepere posset, ipsum Rhodi degentem convenit, depositoque diademate veniam supplex flagitavit, quòd Antonio contrà Augustum, superstitis tulisset, quo quidem obsequio Herodes benevolentiam Augusti sibi conciliavit, & ab ipso confirmatum Judææ Regnum recepit. Quapropter, Herodes ab hoc anno decimo quarto Imperii Augusti annos Regni sui deinceps numerare cœpit. Cùm igitur Herodes, teste Josepho, regnaverit annis triginta septem, mors ipsius incidit in annum quinquagesimum Imperii Augusti, nam si ab anno decimo quarto Imperii Augusti numeres annos triginta septem Regni Herodis, comperies Herodem obiisse anno quinquagesimo Imperii Augusti. Hanc conjecturam, urget Cardinalis Baronius in Apparatu ad Annales Ecclesiasticos, & postquàm multa congestit ad fidem elevandam Josephi, qui annos triginta septem Regni Herodis numerat ab anno quinto Imperii Augusti, sic tandem sermonem concludit: *Si Josephum quis sibi sequendum proponat, deserat necesse est Evangelicam veritatem, utpotè qui Judæus auctor (ut ostendimus) antè Christum natum ponat Herodis senioris obitum. Sed redarguimus ejusdem auctoris levitatem, & inconstantiam ex ipsiusmet scriptis recitatis; Porro, si quis eidem secum ita pugnanti, & Evangelicæ veritati penitus repugnanti fidem adhibendam putaverit, hac ex parte Celsum, Porphyrium, Julianum se superasse cognoscat, cùm iidem, licèt Christianæ Religionis hostes insensissimi, & contradictores acerbissimi, nunquàm tamen ausi reperiantur præponere Josephum Evangelistis, &c.*

Respondeo: Hanc Eminentissimi Annalium Parentis conjecturam, solidam non esse, nec ullo probatæ fidei auctoris testimonio fultam. nul-

Nulla quippè proferri potest ratio, cur Herodes Regni sui annos numeravit ab eo tempore, quo Augustus in pugna Actiaca Antonium expugnavit. Nam quod ait Baronius, Herodem ab ea Augusti victoria annos Regni sui numerasse, quia Augustus omnia Antonii Acta resciderat, à veri vestigiis longissimè abest. Constat siquidem, Imperatorem Augustum non rescidisse post pugnam Actiacam Decretum illud, quo anno quinto ipsius Imperii Herodes fuerat Senatus Romani auctoritate Rex Judææ declaratus, Ecce, quæso, illud Decretum rescidisset Augustus, cum ipsemet unà cum Antonio, sicut refert Josephus, hanc regiam dignitatem ultrò Herodi concessisset? Præterea, hallucinatur Baronius, dum ait, Herodem eodem anno, quo apud Actium pugnatum est, adiuisse Augustum in insula Rhodo, veniam ab ipso supplicem petiisse, & Regnum denuò ab eo impetrasse. In hoc, inquam, hallucinatur Baronius, primò, quia Josephus cap. 10. lib. 15. Antiq. disertis verbis asserit Herodem etiam post pugnam Actiacam partes Antonii adhuc sequutum fuisse. *Herodes, inquit Josephus, properavit Rhodum, ut illic Cæsari occurrat. Quò postquam appulit, posito tantum diademate, de cætero apparatu regio nihil mutavit: admissusque ad colloquium tum maximè ostendit animi sui magnitudinem, neque ad supplicationes (ut in tali forma mos est) versus, neque preces adhibens quasi rogandi veniam, sed facti sui rationem reddens intrepidè.* Secundò, ex Historia Romana liquet, Imperatorem Augustum non fuisse in Asiam profectum illo ipso anno, quo ad Actium victus est Antonius, sed post hanc insignem victoriam petiisse Italiam, & anno demùm sequenti in Græciam, & insulam Rhodum concessisse, ubi cum Herodes inivit, & nihil de Regio apparatu mutans Judææ Regnum ab Imperatore Augusto precariò obtinuit. Debuisset ergo Baronius initium novæ hujus Epochæ Regni Herodis ducere non ab anno decimo quarto Imperii Augusti, seu ab anno Juliano xv. quo pugnatum est ad Actium, sed ab anno decimo quinto Imperii Augusti, seu ab anno Juliano xvi. quo Consules fuerunt *Augustus IV. & M. Licinius Crassus*. Denique, Herodem annos Regni sui numerasse ab anno quinto Imperii Augusti, quo Senatus Romani auctoritate Judææ Regnum obtinuit, non verò ab eo anno, quo Augustus vicit Antonium, luculento probari potest exemplo Archelai, qui ab Antonio Cappadociæ Regnum obtinuerat anno Urbis Romæ conditæ septingentesimo decimo octavo, sicut scribit *Dio lib. 49.* quique in Antonii castris contrà Augustum stetit, huic tamen Augustus post victoriam Actiacam veniam dedit, eique Regiam dignitatem, ac nomen reliquit. Verùm, demortuo Augusto, Tiberius Imperator eundem Archelaum, qui jam per quinquaginta annos regnaverat in Cappadocia, Romam evocavit, *Tacito hæc scribente: Rex Archelaus quinquagesimum annum Cappadocia potiebatur invisus Tiberio, quòd eum Rhodi agentem nullo officio coluisset.* Porro, constat, Archelaum, Cappadociæ Regem, fuisse Romam à Tiberio accitum anno

Urbis

Urbis conditæ 770. *Cæcilio Rufo*, ac *Pomponio Flacco* Consulibus, quemadmodum testantur *Cornelius Tacitus*, & *Dio Cassius*; non potuit ergo Archæalus annos Regni sui numerare ab eo tempore, quo post victoriam Actiacam fuit ab Augusto in Regno Cappadociæ confirmatus, quando quidem à victoria Actiaca, quam retulit Augustus anno Urbis Romæ conditæ septingentesimo vigesimo tertio, usque ad annum, quo Archæalus Romam venire iussus est, hoc est, usque ad annum Urbis Romæ conditæ septingentesimum septuagesimum, intercesserunt tantum anni septem supra quadraginta, cum tamen *Tacitus*, & *Dio* scribant, Archelaum jam quinquaginta abhinc annis Cappadociæ potitum esse, quando à Tiberio Romam fuit vocatus. Sicut ergo *Archæalus* annos Regni sui ab eo tempore computavit, quo Regnum Cappadociæ obtinuit ab Anronio, non verò ab eo tempore, quo in Regno Cappadociæ fuit ab Augusto post pugnam Actiacam confirmatus; ita, non absimili ratione, Herodes annos Regni sui ab eo tempore numeravit, quo à Romanis Judææ Regno donatus est, idest, ab anno quinto Imperii Augusti, non autem ab eo tempore, quo post victoriam Actiacam in Regno Judææ fuit ab Imper. Augusto confirmatus. Standum itaque est calculo Josephi, qui cum Evangelica veritate optimè consentit, & à quo dum recessit *Baronius*, in multis circa Chronologiam errores impegit, quos in sua Critica doctissimus *Pagius* observavit, & accuratè emendavit.

Arguitur tertio: non sibi constat Josephus in numerandis annis vitæ Herodis, ergò nullam omninò meretur fidem. Probant. *Josephus* lib. 14. Antiq. cap. 17. scribit, Antipatrum commississe filio suo Hierodi curandam, seu regendam Galilæam, quando Herodes adhuc juvenis erat, idest, natus dumtaxat annos quindecim, idque contigisse ait septem annis, antequam Herodes fuisset à Romanis, idest, anno quinto Imper. Augusti, Rex Judææ salutatus. Insuper, idem Auctor lib. 17. Antiq. cap. 8. dicit, Herodem vitæ functum esse circiter annum ætatis suæ septuagesimum. In quo calculo Josephus se se manifestè implicat antilogiâ, nam juxtà Josephum Herodes quindecim annos erat natus, quando Antipater ei tradidit curandam Galilæam, quibus quindecim annis si addas annos illos septem, qui effluerunt ab eo tempore, quo Herodi ab Antipatro tradita est curanda Galilæa, usque ad quintum Imperii Augusti annum, quo Herodes fuit à Romanis Rex Judææ renunciatus, summam habebis annorum viginti duorum, quos natus erat Herodes quando Rex Judææ anno quinto Imperii Augusti fuit designatus. Si ergo Herodes mortuus est anno ætatis suæ septuagesimo, sicut scribit Josephus, necessum est ut Herodes, qui juxtà calculum Josephi natus erat annos viginti duos, quando à Romanis anno quinto Imp. Augusti Rex Judææ fuit salutatus, regnaverit annis quadraginta octo: & obierit anno quinquagesimo tertio Imper. Augusti, & tamen Josephus exertè pronunciat, Herodem mortuum esse anno trigesimo septimo Regni sui. Scilicet cum

cùm igitur apertè pugnat Josephus, & calidum ac frigidum simul ex eodem ore perflat, ac proindè in numerandis annis vitæ Herodis sibi omnem omninò abrogat fidem. Hæc & alia hujusmodi ad labefactandam, autoritatem Josephi obicit P. Harduinus, Societ. Jesu, in Prolusione de Nummis Herodiadum.

Respondeo primò : cum doctissimo Schelstrato in lib. de Antiq. Eccl. Herodem reverà fuisse dumtaxat annos quindecim natum, quandò Antipater illi regendam Galilæam demandavit, mendum tamen in Textum Josephi irrepsisse, circa annos vitæ Herodis. Conjecit quippè sagacissimus ille Auctor, Herodem non esse mortuum anno ætatis suæ septuagesimo, sicut nunc legitur in Textu Josephico, sed mortuum esse anno ineunte ætatis suæ sexagesimo. Quæ quidem Schelstrati conjectura, si vera sit, omnem solvit difficultatem, nam si Herodes mortuus est anno ineunte sexagesimo vitæ suæ, facili negotio intelligitur, Herodem fuisse annorum quindecim, quandò Antipater illi regendam Galilæam concedidit, eumque è vivis excessisse anno trigésimo septimo Regni sui, seu anno quadragesimo primo Imperii Augusti.

Respondeo secundò cum alius doctissimis hujus temporis Chronologis: mendum irrepsisse in hodiernum Textum Josephi, & loco *quindecim*, legendum esse *viginti quinque annos*, quos natus erat Herodes, quandò ipsi ab Antipatro curanda fuit tradita Galilæa. Enim verò, cum in Codice Græco Josephi omni procul dubio scriptum esset *xx*, idest, 25, in *ii*, hoc est, 15, Librariorum errore facilè mutari potuit. Hanc conjecturam probat Cardinalis Norisius ex ipsomet Josepho, qui lib. 4. Antiq. cap. 12. asserit, Antipatro quatuor filios fuisse, videlicet *Phasaelum*, *Herodem*, secundo genitum, *Pheroram*, ac *filiam Salomen*, quos idem Antipater apud *Aretam*, Regem Arabum, deposuit, dum bellum contrà Aristobulum gereret, hoc est, annò Urbis Romæ conditæ 688. Herodes ergo, filius Antipatri, anno Urbis Romæ conditæ 688. vivebat obfès Regi Arabum datus, atque tum temporis natus erat annos circitèr quinque, Herodes namque major natu erat ipso Pherora. Antipater autem, juxtà Josephum, curandam Herodi tradidit Galilæam anno Urbis Romæ conditæ 707. Hoc est, viginti annis postquam Herodem filium suum Quinquennem Regi Arabum obsidem dedisset, annos itaque viginti quinque, juxtà calculum Josephi, natus erat Herodes, quandò ipsi Antipater regendam commisit Galilæam. Et sanè, tot egregia facinora, quæ Josephus ibidem refert ab Herode gesta, postquàm illi Antipater curandæ Galilææ Provinciam demandasset, apertè innuunt, Herodem tum temporis attigisse annum ætatis suæ vigesimum quintum, in qua robusta ætate sat virium, fortitudinis, & prudentiæ habere potuit, ut par esset tot exantlandis laboribus, & arduis suscipiendis, atque felici exitu perficiendis Expeditionibus. Addo insuper, perdoctum *Vsserium* in Annalibus Veteris Testamenti rectè observare, primos vitæ Herodianæ descriptores

Pro-

Ptolomæum, scilicet, & *Nicolaum Damascenum*, ex quibus sua *Iosephus* hausit, non quindecim, sed viginti quinque annos tribuisse Herodi, quando illi Antipater curandam tradidit Galilæam. Hoc autem errore, qui Textum hodiernum *Iosephi* pervasit, semel emendato, planum ac expeditum est, Herodem obiisse anno ætatis suæ septuagesimo, sicut scribit *Iosephus*. Enim verò, ad calculos, si placet, revocemus Herodis annos. Herodes viginti quinque annos natus erat, quando ab Antipatro illi tradita fuit, curanda Galilæa anno Urbis Romæ conditæ 707. his ergo annis viginti quinque Herodis adde alios septem annos, qui elapsi sunt à tempore, quo Herodi tradita fuit ab Antipatro curanda Galilæa, usque ad annum Urbis Romæ conditæ 714. seu usque ad annum quintum Imp. Augusti, quo anno Herodes Regnum Judææ à Romanis obtinuit, & fiet summa annorum triginta duorum, quos natus erat Herodes, quando à Romanis Rex Judææ fuit salutatus. Adde denique triginta septem annos Regni Herodis, & summam habebis vitæ Herodis sexaginta novem annorum, quibus si adjicias aliquot menses qui prætermissi sunt, liquidò constabit Herodem mortuum esse anno ineunte ætatis suæ septuagesimo, anno verò Regni Judææ sibi à Romanis concessi trigesimo septimo, quemadmodum scribit *Iosephus*. Facebat itaque *Harduinus*, qui meritò apud viros eruditos malè audit, eò quòd tam in sua *Chronologia veteris Testamenti*, quàm in Prolusione de *Nummis Herodiadum*, *Iosephi* in Herodiana describenda Historia fidem elevat, omniù penè Sanctorum Patrum, & Historicorum auctoritatem suis deque habet, & omne genus monumentorum, quibus apud nos res Historica nititur, convellere ausu temerariò aggreditur. Sed *Harduinum*, ejusque socium *Germonium*, totius venerandæ Antiquitatis memoriam abolere gestientes, pro meritis castigarunt, plautinoque sale asperferunt viri hujus temporis eruditi, qui nobilissima tam sacræ, quàm prophanæ Antiquitatis monumenta, quibus Christiana religio cæteris omnibus antecellit, à paradoxis, quibusambo illi Auctores seipfos, quasi cæli convexa tetigerint, superbiùs jactant, egregiè vindicarunt, *Joannes Mabillonius*, *Bernardus Lamy*, *Justus Fontanus*, *Dominicus Lazarinus*, *Spanhemius* in lib. de Usu, & Præstantia Numismatum Antiquorum Dissertationibus 5. 7. & 8.

Arguitur quartò : verum, & proprium Natale Christi huic anno consignari debet, quo exiit Edictum à Cæsare Augusto, ut describeretur universus Orbis, sicut testatur Sacer Evangelista *Lucas* Cap. 2. atqui census, seu hæc universalis descriptio facta est anno quadragesimo secundo Imp. Augusti, ut videre est apud *Eusebium* in Chronico, ergo verum, & proprium Natale Christi illigari non debet anno quadragesimo Imp. Augusti, sed potiùs anno quadragesimo secundo.

Respondeo negando minorem : hæc quippè universi Orbis descriptio, cujus mentionem facit *S. Lucas* cap. 2. non incidit in annum quadragesimum secundum Imp. Augusti, sicut perperàm visum est *Eusebio*,

sed fieri cœpit anno trigesimo septimo Imp. Augusti, hoc est, octo annis ante Æram Dionysianam, seu Christianam. Quod quidem, ut clariùs intelligatur.

Observandum est, Imperatorem Augustum, teste *Suetonio* in *Ostasio* cap. 82. tẽr Censum, seu descriptionem populi egisse, primum, ac tertium Censum egisse cum Collega, medium verò sine Collega. Id ipsum testatur Imperator Augustus in Indice, seu Breviario vitæ suæ in monumento apud Suburbium Ancyrae reperto, quod *Augerus Gislenius Busbequius* Turcarum immanitari ereptum, sicut narrat *Cassaubonus*, in Europam asportavit, & ab *Andraa Scotto*, *Lipso*, *Grutero*, aliiq; clarissimis viris publicatum fuit. Ex hac, inquam, Inscriptione Ancyrana manifestò constat, primum Censum ab Augusto, & Collega Agrippa peractum fuisse, dum ambo Consulatum gererent, hoc est, anno decimo septimo Imp. Augusti, & anno vigesimo octavo ante Æram vulgarem. Alterum Censum eadem Inscriptio Ancyrana indicat fuisse, peractum ab Augusto solo, seu anno trigesimo septimo Imp. Augusti, & anno octavo ante Æram vulgarem, Consulibus *C. Mario Censorino*, & *C. Asinio Gallo*. Tertius denique Censum, juxta Inscriptionem Ancyranam, peractus est ab Augusto, & Collega Tiberio, anno quinquagesimo septimo, seu anno ultimo Imp. Augusti, & anno decimo quarto Æræ vulgaris, Consulibus *Sexto Pompejo Magno*, & *Sexto Apulejo*. Hoc autem semel supposito, certum est apud omnes, nec per primum, nec per tertium Censum indicari posse verum, & proprium Natale Christi, sed tantum per secundum Censum, qui, ut mox diximus, ab Augusto, absque Collega editus est, anno trigesimo septimo ipsius Imperii, quo anno *Cyrinus*, sed *Quirinius*, missus est ab Imperatore Augusto, cum plena, & extraordinaria potestate in Syriam, aliasque Orientis Provincias, ut indiceret Censum, quem hoc anno incepit quidem *Quirinius*; sed eum paulò post intermittere cõactus est, ut Homonadenfes, qui contra Romanos rebellarant, in ordinem redigeret; sicut testatur *Cornelius Tacitus* lib. 3. *Annalium*, ubi scribit *Quirinium*, mox expugnatis per *Ciliciam* *Homonadenfium* *Castellis*, insignia triumphi fuisse adeptum. Idem de *Quirinio* testatur *Strabo* lib. 12. ubi, teste *Lipso* in *Commentario* ad *Annales Taciti*, hæc habet: *Homonadenfes autem Quirinius fame expugnavit, quatuor millia virorum cepit, & in vicinas Urbes distribuit, regione spoliata omni juventute*. Hic itaque Censum, seu hæc populi descriptio, quæ, ut perhibet *Sanctus Lucas*, facta est tempore Natalis Christi Domini, incepta fuit à *Cyrino*, seu *Quirinio*, anno trigesimo septimo Imperii Augusti, sed cum hæc descriptio, ob tumultum *Homonadenfium*, fuisset à *Quirinio* intermissa, deinde à *Sentio Saturnino*, tum temporis Præside Syriæ, fuit continuata, & denique absoluta est anno quadragesimo Imperii Augusti à *Quintilio Varo*, qui in Syriæ præfectura successit *Sentio Saturnino*, Quapropter, hoc anno Imp. Augusti quadragesimo, quo

quo absoluta est hæc populi descriptio, natus est Christus Dominus.

Arguitur quintò : *Iosephus* sub finem lib. 17. Antiq. narrat quo pacto Archelaus filius Herodis ab Imperatore Augusto fuerit Viennam Allobrogum relegatus, & lib. 18. Antiq. cap. 1. ait : Quirinium, post exilium Archelai, missum fuisse ab eodem Imperatore in Syriam, ut illam administraret, & facultates censeret omnium, etiam Judæorum, atqui constat Archelaum fuisse Viennam in Galliis pulsum in exilium anno Imperii Augusti quinquagesimo, seu anno Urbis Romæ conditæ septingentesimo quinquagesimo nono, & anno sexto *Æræ* vulgaris; ergo hæc descriptio, quæ indicta est ab Imperatore Augusto paulò ante ortum Christi, non est facta à Cyrino, seu Quirinio.

Respondeo : Duplicem à Cyrino, seu Quirinio, factam esse Judææ descriptionem. Prima Judææ descriptio facta est à Cyrino, seu Quirinio, anno trigésimo septimo Imperii Augusti, seu anno Urbis Romæ conditæ septingentesimo quadragésimo sexto, & anno octavo ante *Æræ* vulgarem. Hoc siquidem anno, ut mox diximus, *Quirinius* missus est ab Imperatore Augusto cum plena & extraordinaria potestate in Syriam. Altera Judææ descriptio facta est ab eodem Quirinio post relegatum Archelaum Viennam in Galliis. Tunc enim, uti refert *Iosephus* lib. 18. Antiq. cap. 1. Ipse Quirinius in Judæam venit jam attributam Provinciam Syriæ, & ut percenseret facultates eius regionis civium, & Archelai pecuniam in potestatem suam redigeret. Prima Judææ descriptio, facta à Quirinio, dum adhuc in vivis esset Herodes, non fuit propriè Censui, qualis erat cæterorum populorum, qui sui juris non erant, & omnem amiserant libertatem. Judæi siquidem, quamdiù in Judæa regnavit Herodes, fuerunt immunes à persolvendis Tributis, non secus ac socii, & amici Romanorum, qui non censebantur, seu quibus vectigalia aut tributa Romani non imponebant. At, altera descriptio Judææ, facta à Quirinio post exilium Archelai, fuit verus Censui; tunc namque Judæa, dejecto Archelao potestate sua & in exilium missa, fuit attributa Provinciæ Syriæ, teste *Iosepho*, suæque libertatis jacturam omninò fecerunt Judæi. *Fridericus Spanhemius* par. 2. Dubiorum Evang. Dub. 3. dilucidè exponit primam descriptionem, factam à Quirinio paulò ante ortum Christi Servatoris nostri, esse planè diversam ab altera descriptione facta ab eodem Quirinio post exilium Archelai. Hanc autem diversitatem repetit ex sex capitibus. Primò, ex ratione causæ impulsivæ. Secundò, ex ratione formæ. Tertio, ex ratione finis. Quarto, ex ratione temporis. Quintò, ex ratione latitudinis. Sextò, ex ratione successus. Prioris descriptionis causa impulsiva, fuit vel curiositas, vel ambitio Augusti, vel utraque conjunctim. Posterioris descriptionis causa impulsiva, fuit Judæorum criminationes, Augusti indignatio, & Archelai tùm abdicatio, tùm relegatio. Forma prioris descriptionis erat sine Censui, hoc est, sine pensitatione, & tributicujusdam consueti exa-

atione. Posterioris descriptionis forma, fuit cum Censui pecuniarii exactione. Finis prioris descriptionis erat vel ostentatio potentiae Imperii Romani, vel ejus securitas. Finis posterioris descriptionis, incrementum ararii ex Archelai facultatibus. Prior descriptio facta est tempore, quo adhuc vivebat Herodes. Posterior descriptio facta est novennio jam completo à morte Herodis, Archelao ejus filio jam Viennam Gallicae relegato. Prior descriptio fuit universalis & œcumenica. Posterior descriptio particularis fuit, nec attigit nisi Syriam, & Judæam. Prior denique descriptio peracta est saltem in Judæa sine tumultu. Posterior descriptio multos in Judæa excitavit tumultus, sicut refert *Josephus* lib. 18. Antiq. cap. 1. Patet itaque primam Judææ descriptionem, factam Quirinio paulò ante Christi ortum, diversam esse ab altera Judææ descriptione facta ab eodem Quirinio post exilium Archelai. Quam etiam diversitatem haud obscurè insinuare videtur *S. Lucas* his verbis: *Hæc descriptio prima facta est à Præfide Syriæ Cyrino*. Vocat enim *S. Lucas* hanc descriptionem factam à Cyrino, seu Quirinio, *primam*, ut eam discernat à secunda Syriæ descriptione, quæ facta est ab eodem Quirinio post exilium Archelai, seu anno Urbis Romæ conditæ 760. anno Imperii Augusti quinquagesimo primo, anno septimo Æræ Christianæ. Consulibus *M. Licinio Nerva Silano*, & *Q. Cecilio Metello Cretico*. Sunt nonnulli Critici, qui putant Textum *S. Lucæ* in mendo cubare, nec legendum esse: *Præfide Syriæ Cyrino*, seu *Quirinio*; sed legendum esse: *Præfide Syriæ Quintilio*. Verùm, hæc Criticorum conjectura admitti non debet, tum quia falsi convincitur ex omnibus *S. Lucæ* Codicibus, in quibus legitur: *Præfide Cyrino*, seu *Quirinio*. Tum quia Sancti Patres, & Scriptores veteres *Quirinium* legunt, non *Quintilium*. Tum quia denique, nefas est omnino quidquam Sacris Codicibus addere, mutare, aut expungere.

Arguitur ultimò, *Tertullianus* lib. 4. contra Marcionem cap. 19. ait: Censum, qui paululùm præcessit Nativitatem Christi, peractum, fuisse sub *Sentio Saturnino*, Syriæ Præfide, atqui *Sentius Saturninus* non erat Syriæ Præfex anno quadragesimo Imperii Augusti, seu anno Urbis Romæ conditæ 749. sed *Quinctilius Varus*, qui *Sentio Saturnino* in Syriæ Præfectura successit, sicut compertum est ex multis nummis, quos exhibent periti hujus temporis Chronologi; ergo verum & proprium Natale Christi consignari haud debet anno quadragesimo Imperii Augusti, seu anno Urbis Romæ conditæ 749.

Hoc argumento convicti *Pagius*, *Harduinus*, *Schellstranus*, *Bollandus*, & c. autumant, verum & proprium Natale Christi consignandum esse anno trigésimo nono Imperii Augusti, seu anno Urbis Romæ conditæ septingentesimo quadragesimo octavo, & anno Juliano quadragesimo, quo anno putant Saturninum fuisse adhuc Syriæ Præsidentem. Sed hæc sententia stare non potest. Primò, quia constat, *Quinctilium Varum* successisse *Sentio Saturnino* in Præfectura Syriæ anno trigésimo octavo Impe-

rii Augusti, seu anno Urbis Romæ conditæ septingentesimo quadragésimo septimo, & anno Juliano trigésimo nono. Id, inquam, constat ex nummo, qui cufus est anno, quo *Quintilius Varus* successit Saturnino, & Syriæ Præfecturam suscepit. Hic autem nummus, Teste Cardinali *Norifio*, Dissert. 2. de Epochis Syro Macedonum, asservatur Florentiæ in Scriniis Marchionis *Francisci Richardi*, & in eo hæc legitur Inscriptio Græca :

ΕΠΙ ΟΤΑΡΟΥ ΑΝΤΙΟΧΕΩΝ ΕΚ.

Hoc est : *Sub Varo Antiochenfium anno vigesimo quinto* : seu anno vigesimo quinto à pugna Actiaca . Antiochenfes enim, partes Augusti secuti, Æram suam deducebant à victoriâ, quam de Antonio in pugna Actiaca reportavit Imperator Augustus die 2. Septembris anni Urbis Romæ conditæ 723. sicut latè probat Card. *Norifius* Dissert. 3. de Epochis Syro-Macedonum, ex pluribus Nummis Præsidum Syriæ, quos ibidem exhibet . Patet itaque ex hoc nummo, *Quintilium Varum* successisse Saturnino, & Syriæ Præfecturam suscepisse anno vigesimo quinto à pugna Actiaca ; seu anno vigesimo quinto Regni Augusti in Syriâ . Porro, annus vigesimus quintus Regni Augusti in Syriâ, hoc est, à pugna Actiaca, incidit in annum trigésimum octavum Imperii Augusti, seu in annum Urbis Romæ conditæ 747. & in annum Julianum 39. sicut fatetur ipsemet Cl. *Pagius* in sua Critica Baronii. Cùm igitur juxta *Pagium*, & alios supra memoratos Auctores, Christus natus fuerit anno trigésimo nono Imperii Augusti, seu anno Urbis Romæ conditæ 748. nullâ ratione asseri potest : Christum natum fuisse sub Sentio Saturnino Syriæ Præsede, siquidem Saturninus ante diem 2. Septembris anni 39. Imperii Augusti, seu Urbis Romæ conditæ 748. debuit è Syriæ Præfecturâ abire, & Varo locum cedere, quia annus Æræ Antiochenæ vigesimus quintus, quo currente, Varus successit Saturnino, fuit die 2. Septemb. anni 39. Imperii Augusti, seu anni Urbis Romæ conditæ 748. completus . Quapropter, in sententia *Pagii*, & aliorum, qui asserunt, Sentium Saturninum fuisse Syriæ Præsidem, quandò Christus natus est, necessariò dicendum est : aut Christum natum esse anno 38. Imp. Augusti, seu anno Urbis Romæ conditæ 747. quo anno Sentius Saturninus adhuc erat Syriæ Præsides . Vel dicendum : Christum natum esse ante mensem Septembrem anni 39. Imperii Augusti, seu anni Urbis Romæ conditæ 748. Nam ante mensem Septembrem ejusdem anni jam Varus successerat Saturnino in Præfectura Syriæ. Hinc non benè sibi constare videtur doctissimus P. *Pagius*, quippè qui ex una parte affirmat, Saturninum fuisse Syriæ Præsidem, quando natus est Christus, & ex alia parte asserit: Christum natum esse die vigesimâ quintâ Decembris anni trigésimi noni Imperii Augusti, seu anni Urbis Romæ conditæ septingentesimi quadragésimi

gesimi octavi, quo tempore fatentur omnes periti Chronologi, Sentium Saturninum jam è Syria abcessisse, eique Quintilius Varum in Præfectura Syriæ successisse.

Hanc difficultatem subodoratus est *P. Harduinus*, & ut ab ea se expediret, ait: Christum natum esse mense Septembri anni Imperii Augusti trigesimali noni, dum adhuc Sentius Saturninus esset Syriæ Præses. Sed hoc inane *Harduini* effugium adversatur antiquæ traditioni Ecclesiæ. Quæ, sicut testantur Sancti Patres *Chrysostomus*, & *Augustinus*: Christus natus creditur die vigesima quinta mensis Decembris. In qua traditione consentit tam Orientalis, quàm Occidentalis Ecclesia. Hac itaque relictâ Auctorum sententiâ.

Respondeo ad argumentum propositum, vel omninò deferendum esse Tertullianum, cujus auctoritas, sicut docent *Norissus*, in Cenotaphiis Pisanis, & *Bernardus Lamy* in Apparatu Chronologico, tanti non est, ut à nobis assensum impetrare debeat, vel sic explicandum esse Tertullianum, ut velit dumtaxat Censum indictum ab Imperatore Augusto inceptum fuisse à Cyrino, seu Quirinio, quem Augustus anno 37. Imperii sui misit in Syriam cum potestate extraordinaria, dum adhuc Sentius Saturninus esset Præses Syriæ. Potuit enim Tertullianus hunc Censum Sentio Saturnino adscribere, tum quia Saturninus Syriæ Præses erat, quando ad illum Censum incipiendum cum plena & extraordinaria potestate *Cyrinus* seu *Quirinius* missus est in Syriam. Tum quia, *Saturninus*, Quirinio in debellandis Homonadenibus occupato, Censum ab eo inceptum continuavit, quem postea absolvit *Quintilius Varus*, qui Saturnino in Syriæ præfectura successit.

Advertendum est primò in fine hujusce Dissertationis, *Baronium*, virum alioquin de Historia Ecclesiastica optimè meritum, lapsum esse non solum in assignando anno Natalis proprii Christi, verum etiam in præfigendo exordio Æræ Dionysianæ, seu vulgaris, aut Christianæ. Nam primò *Baronius* asserit: Christum natum esse die vigesima quinta mensis Decembris anni quadragesimi secundi Imperii Augusti. Quod tamen oppidò falsum est, nam anno quadragesimo secundo Imperii Augusti jam è vivis excesserat Herodes, sicut constat ex his, quæ supra diximus. Christum autem natum esse regnante in Judæa Herode sacrum perhibet Evangelium. Secundò, erravit *Baronius* in præfigendo exordio Æræ Dionysianæ, seu vulgaris. Nam annum primum Æræ vulgaris ortus est Kalendis Januarii anni quadragesimi tertii Imperii Augusti, Consulibus *C. Cesare Augusto XIII.* & *M. Plautio Silvano*. Cum tamen in confesso sit apud omnes Chronologos, annum primum Æræ Dionysianæ, seu vulgaris, initium habuisse Kalendis Januarii anni quadragesimi quinti Imperii Augusti, Consulibus *Cajo Cesare*, *Augusti nepote*, & *L. Emilio Paulo*. Hinc Eminentissimus ille Annalium Parens duobus integris annis in præfigendo exordio Æræ vulgaris à vero deflectit usque
ad

ad annum ejusdem *Æræ* ducentefimum quinquagesimum primum, ubi suis Annalibus inferendo primum Decii Imperatoris Consulatum, quem tamen non ordinarium, sed suffectum fuisse disertè ostendit doctissimus *Pagius* ad annum *Æræ* vulgaris, seu Christianæ, 251. non amplius biennio, sed triennio solido ab *Æræ* vulgari exorbitavit *Baronius*, qui tamen ubi primum animadvertit se integro triennio in adornandis Ecclesiæ Annalibus ab *Æræ* vulgari recessisse, ut deprehensum corrigeret errorem, primò expunxit è fastis Consularibus Consulatum *Fulvii* & *Emiliani*, & *Pomponii Bassi*, quos anno *Æræ* vulgaris 259. Consules fuisse, testantur Fasti Græci tam Theonis, quàm Heraclii, Fasti Idatiani, quos *Sirmundus*, & *Labbeus* publici juris fecerunt, fragmentum etiam Consulare, quo usus est *Cuspinianus*, quodque Cardinalis *Norisius* egregiis Notis illustravit ad calcem lib. de *Epochis Syro-Macedonum*; varia denique Rescripta Codicis Justinianæ, quæ laudat idem Cardinalis in Dissertatione de votis decennialibus. Secundò, *Baronius* expunxit è Fastis Consularibus Consulatum *Cornelii Sæcularis*, & *Iulii Donati*, quos tamen anno *Æræ* vulgaris 260. fuisse reverà Consules, convenit inter omnes eruditos. Porro, omisso utroque illo Consulatu, *Baronius* anno Christi 261. *Æram* Dionysianam, seu vulgarem, esset assecutus, nisi, ut mox diximus, primum Decii Imperatoris Consulatum, quem suffectum esse certissimè constat, tanquàm ordinarium intrusisset. Quapropter, *Baronius* anno Christi 261. ab *Æræ* Christiana adhuc integro anno recedebat, quam, post longum erroris cursum, ut tandem aliquandò attingere posset, anno Christi 278. *Probi* Imperatoris II. Collega *Lupo*, Consulatum abdicavit, quem tamen Consulatum ordinarium fuisse *Norisius* cap. 3. Dissert. 2. de *Epochis Syro-Macedonum*, & *Pagius* ad annum Christi 278. latè probant ex libello de Præfectis Urbis, & ex Fastis Idatii, *Prosperi*, *Victorii*, *Calliodori*, &c. Hoc autem prætermisso secundo *Probi* Imperatoris Consulatu, *Baronius* *Æram* Christianam assecutus est anno Christi 280. à qua deinceps in suis Annalibus nunquàm recessit. Observant etiam *Norisius* & *Pagius* locis mox citatis, *Baronium* ad assequendam *Æram* vulgarem non solum tres Consulatus ordinarios è Fastis Consularibus abraisisse, sed etiam Imperatori *Probo* duos ademisse annos, ut videlicet Imperatorum annos cum *Æræ* vulgari connectere posset. Nam cum *Baronius* mortem Imperatoris *Augusti* illigasset anno 16. *Æræ* vulgaris, idest, duobus annis eam postposuisset (mòrtuus quippè est Imperator *Augustus* anno 14. *Æræ* vulgaris) hunc errorem in consignandis Imperatorum annis cum *Æræ* Christiana retinuit *Baronius*, donec in *Æram* Imperatoris *Diocletiani* impingens, animadvertit initium Imperii *Diocletiani* amoveri non posse ab anno *Æræ* Christianæ, seu vulgaris, 284. Quamobrem, ut in viam redire posset *Baronius*, & annos Imperatorum cum *Æræ* vulgari connectere, Imperium *Probi* aggressus duos illi eripuit annos, dans ei dumtaxat annos quatuor, cum tamen

tamen sex annis eum imperasse, Auctores sint *Eusebius* in *Chronico*, *Cassiodorus*, *Idatius*, *Entropius*, *Victor Scotticus*, multaque indubitatae fidei evincant Antiquitatis monumenta. Sic *Baronius*, sublatis illis duobus annis Imperii Probi, in viam rediit anno Christi 280. ab eo siquidem anno non solum Fasti Consulares, sed & Imperatorum anni cum *Æra* vulgari, seu Christianâ, perfectè in Annalibus *Baronii* consentiunt.

Advertendum secundò : Errasse itidem *Baronium*, dum annum quadragesimum quintum Imperii Augusti, qui fuit primus *Æræ* vulgaris seu Christianæ annus, consignat per Consulatam Augusti xiv. & *Æmilii Pauli*. Hunc errorem refellit Cardinalis *Norisius* *Dissert. 2. de Cynotaphiis Tifanis* cap. 13. ubi invictis argumentis demonstrat, Imperatorem Augustum tredecim dumtaxat Consulatus egisse. Doctissimus etiam *Pagius*, bono Historiæ Ecclesiasticæ natus, in *Critica Baronii* ad annum primum *Æræ* Christianæ, luculenter ostendit, Consulatam decimum quartum Imperatoris Augusti esse planè commentitium, & in vetustis ac correctis Dionis Codicibus legi *Cajum Cæsarem* fuisse Consulem cum *Æmilio Paulo*, non verò *Cæsarem Augustum*, quò fit, ut interpolata fuerint illa Dionis Exemplaria, quæ consu luit Cardinalis *Baronius*, & in quibus legit, Imperatorem Augustum Consulatam egisse decimum quartum cum *Æmilio Paulo*.

Huic Dissertationi finem imposueram, nec quidpiam ei addere animus erat. Sed postea animadvertens, notitiam anni, quo Christus Dominus natus est, pendere ex Historia Romana, præsertim ex serie Romanorum Consulum (penès enim Romanos, ut nemò nescit, supremæ erat potestas etiam in Judæa, his temporibus, quibus Christus Dominus natus est) non abs re facturum me esse duxi, si ad hanc Dissertationem de anno, quo Christus Dominus sub Imperatore *Augusto* natus est, magis ac magis illustrandam, Lectoris ob oculos ponerem seriem Consulum Romanorum ab anno Urbis Romæ conditæ 709. quo anno *Caius Julius Cæsar* quartum Consulatam gessit, usque ad annum ejusdem Urbis conditæ 754. seu usque ad annum quadragesimum quintum Imperii *Augusti*, quo anno Kalendis Januarii auspicatur primus annus *Æræ* Christianæ. Exhibebo autem seriem Romanorum Consulum, qualem doctissimus *Antonius Pagius* in sua *Critica Baroniana* exposuit, digessit, expressitque ex antiquis & probatissimæ fidei Historicis, atque ex vetustissimis Nummis, Inscriptionibus, cæterisque id genus monumentis ita egregiè confirmavit, ut nullus sit hac tempestate Scriptor, aliquâ eruditionis laude clarus, qui in rebus Chronologicis, seu in disponenda Romanorum Consulum serie, *Antonius Pagio*, falces ultrò non submittat, ac candidè fateatur, sepultam penè olim rationem temporum, immenso tantî viri labore fuisse excitatam, & ab eo innumeras Historiæ, cum Ecclesiasticæ, tum Prophane ambages fuisse feliciter solutas, & Chronologiam veritati tandem aliquando restitutam. Hujus itaque Clarissimi

viri

viri vestigiis insistens, Chronologicam Romanorum seriem aggrediar, eademque operâ brevem tradam notitiam rerum, quæ obliervatione dignæ contigerunt sub Consulibus Romanis ab anno Urbis Romæ conditæ 709. usque ad annum ejusdem Urbis conditæ 754. hoc est, usque ad annum quadragesimum quintum Imperii Augusti, quo anno numerari cœpit annus primus Æræ Christianæ.

Series Consulum Romanorum ab anno Urbis Romæ conditæ 709. usque ad annum ejusdem Urbis conditæ 754. idest, ad annum usque quadragesimum quintum Imperii Augusti, quo anno cœpit primus annus Æræ Christianæ.

Anno Urbis Romæ conditæ 709. Anno quarto Olympiadis 183. Anno Iuliano I. Anno Periodi Iulianæ 4669. Ante Æram Christianam, anno 45. Consules fuerunt C. Iulius Cæsar IV. & M. Æmilius Lepidus, Magister Equitum. Hoc anno Cæsar Iulius Cæsar, qui anno præcedenti ad luxati Romani anni correctionem animum adjecerat, eumque, adhibito Sossigene, aliisque Mathematicarum Discipularum viris peritissimis, ad illam, quâ nunc Orbis Christianus utitur, formam redegerat; voluit, ut à Kalendis Ianuarii hujusce anni Urbis conditæ 709. quo quartum Consulatum iniit, primus ordinationis Julianæ annus annumeraretur. Ab hoc igitur Urbis conditæ anno 709. exordium ducit annus Romanus, à Iulio Cæsare correctus, qui idcirco annus Iulianus appellatur, sicut asserit Censorinus in lib. de die Natali cap. 20.

Anno Urbis conditæ 710. Anno primo Olympiadis 184. Anno Iuliano secundo. Anno Periodi Iulianæ 4670. Anno primo Imperii Cæii Octaviani Augusti. Ante Æram Christianam anno 44. Consules fuerunt C. Iulius Cæsar V. & M. Antonius, Magister Equitum. Eodem anno, cum, Cæsar Iulius Cæsar in Curiam venisset, Expeditionem Parthicam meditans, ibi in curuli sedentem Senatus eum invasit, tribusque & viginti vulneribus per fudit, dum annum ætatis suæ ageret quinquagesimum sextum, exactis, ut inquit Iosephus, Hebræus, in Principatu suo tribus annis cum dimidio. Post necem C. Iulii Cæsaris, nomen Cæsaris assumpsit Cæsar Octavianus, qui erat Cæii Iulii Cæsaris ex Sorore Nepos, seseque in Iuliam gentem adsciscens, pro Cajo Octavio, se deinceps Cajum Cæsarem Octavianum appellavit, sicut testatur Dio lib. 45. Ab isto Cajo Cæsare Octaviano, qui primus cœpit appellari Augustus, & non à Cajo Iulio Cæsare, ejus Avunculo, deduci debet exordium Imperatorum Romanorum,

rum, quia, vivente *Cajo Iulio Cæsare*, quædam adhuc extabat libertatis, Reipublicæque species.

Anno Urbis conditæ 711. Anno secundo Olympiadis 184. Anno Periodi Iulianæ 4671. Anno Iuliano tertio. Anno secundo Imperii Octaviani Augusti. Anno ante Æram Christianam 43. Consules ordinarii fuerunt C. Vibius Pansa, & A. Hirtius. Eo etiam eodem anno fuerunt suffecti, seu extraordinarii Consules, videlicet Octavianus Cæsar, & Q. Pedius. Eodem anno Cæsar Octavianus, M. Antonius, & Æmilius Lepidus, Imperium Romanum quasi hæreditatem quamdam inter se partiti sunt, simulque constituerunt, ut Triumviri essent Reipublicæ in proximum quinquennium. Cæptus est autem Triumviratus V. Kalendas mensis Decembris ejusdem anni, sicut videre est in Inscriptione Gruteriana pag. 298. Hinc, seu ex initio Triumviratus, initium Imperii Cæsaris Octaviani Augusti deducunt Suetonius in Octaviano cap. 8. & Eutropius lib. 7.

Anno Urbis conditæ 712. Olympiadis 184. Anno tertio. Periodi Iulianæ anno 4672. Anno Iuliano quarto. Anno tertio Imperii Octaviani Augusti. Ante Æram Christianam anno 42. Consules fuerunt M. Æmilius Lepidus II. & L. Munatius Plancus. Eodem anno Bellum contra Cassum, & Brutum, necis Caii Iulii Cæsaris auctores, ab Octavio Cæsare Augusto, & M. Antonio gestum est, de quibus, commisso prælio in campis Philippiis in Macedonia, Victores exiterunt.

Anno Urbis conditæ 713. Anno quarto Olympiadis 184. Periodi Iulianæ anno 4673. Anno Iuliano quinto. Anno quarto Imperii Octaviani Augusti. Ante Æram Christianam anno 41. Consules fuerunt L. Antonius, & P. Servilius Isauricus. Eodem anno Cæsar Octavianus Augustus in Italiam, M. Antonius in Asiam profecti sunt. Herodes à Marco Antonio in colloquium admissus, illum sibi adeo conciliavit, ut ejus acculatores, à ludæis missi, nequidem auditi, re infectâ, discesserint.

Anno Urbis conditæ 714. Anno primo Olympiadis 185. Periodi Iulianæ 4674. Anno Iuliano sexto. Anno quinto Imperii Octaviani Augusti. Anno primo Regni Herodis in Iudæa. Ante Æram Christianam anno quadragesimo. Consules fuerunt C. N. Demitius Calvinus, & C. Asinius Pollio. Eodem anno Cæsar Octavianus Augustus, expugnata Perusâ, profectus est in Galliam, injungens Vipsanio Agrippæ Bellum gerendum, contra Sextum Pompejum. Pergit M. Antonius hyemare in Ægypto, dumque ibi sine Insigniis Imperii otia retur, sive tamquam in alieno Imperio, Civitateque Regiâ esset, Cæsarem Octavianum Augustum suum hostem fecit, & cum Pompejo amicitiam junxit. Parthi etiam eodem anno arma in Syriam intulerunt, suppetiasque Antigono contra Hircanum tulerunt. Tunc Marcus Antonius, ineunte Vere, relicta Ægypto, navigavit in Asiam, sed usque in eam prætervectus, transmisit in Græciam. Cæsar Octavianus Augustus Bellum in Galliam intulit; & circa tem-

temporâ Pentecostes *Antigonus*, expugnatis Hierosolymis, Regnum, eripuit *Hircano*, & expulit *Herodem*, qui *Massadam*, Arcem munitissimam, se se recepit, & primum in Arabiam, deindè Pelusium venit. Circâ mensem Iulium ejusdem anni *Vipsanius Agrippa* exhibuit ludos Apollinares. Quam occasionem nactus *Sextus Pompejus* irruit in Italiam, solvens Alexandriâ *Herodes*, Rhodum appulit, ubi Triremem ad navigandum instruxit. *Marcus Antonius*, ex Græcia transmittens, expugnat Brundisium. At, *Cæsar Octavianus Augustus*, à Gallia magnis itineribus revertens, castra ponit propè Brundisium, & pace ibidè cum *M. Antonio* initâ, ambo Romam reversi sunt, & in illam ovantes ingressi. *Herodes*, ab *Antigono* Hierosolymis expulsus, Brundisium venit, Autumni tempore, hinc Romam se contulit, ubi à Senatu Romano Rex Judææ declaratus est. Ab hoc igitur anno Urbis conditæ 714. deducenda est Herodiani in Judæa Regni Epocha, secundum quam dicitur à *Iosepho* lib. 1. de Bello Judaico cap. ult. *Herodem* regnasse annos triginta septem, postquam Rex à Romanis designatus est.

Anno Urbis conditæ 715. Anno secundo Olympiadis 185. Periodi Iulianæ anno 4675. Anno Iuliano septimo. Anno sexto Imperii Octaviani Augusti. Anno secundo Regni Herodis. Ante Æram Christianam anno trigesimo nono. Consules fuerunt *L. Martius Censorinus*, & *C. Calvisius Sabinus*. Eodem anno *Ventidius*, in Asiam à *M. Antonio* missus ut reprimeret Parthos, Syriam infestantes, armis aggressus est *Labienum*, qui, post Philippensem pugnam, ad Parthos defecerat, eorumque exercitus Dux evaserat. Hunc itaque *Labienum* fugientem insequutus est *Ventidius*, eumque tandem vicit, cepit, & Syriam, à Parthis relictam, recepit, indeque in Iudæam venit. *Massadam*, validissimam Arcem, in qua propinqui & domestici Regis Herodis erant conclusi, *Antigonus* oppugnavit, & instante hyeme, *M. Antonius* venit in Græciam, meditans Expeditionem in Parthos.

Anno Urbis conditæ 716. Anno tertio Olympiadis 185. Periodi Iulianæ anno 4676. Anno Iuliano octavo. Anno septimo Imperii Octaviani Augusti. Anno tertio Regni Herodis. Ante Æram Christianam anno trigesimo octavo. Consules fuerunt *Appius Claudius Pulcher*, & *C. Norbanus Flaccus*. Eodem anno *M. Antonius* è Græcia venit Brundisium, ut opem ferret *Cæsari Octaviano Augusto* adversus *Sextum Pompejum*, Magni Pompeii filium. Postea, in Græciam reversus est. Parthis Bellum intulit *Ventidius*, & in Comagenam, adversus *Antiochum* duxit exercitum. *Herodes* verò, collecto exercitu, appulit Ptolomaida, cum Parthi jam cessissent Syriâ. *Massadam* properans *Herodes*, cœctus est in itinere oppugnare Ioppem. Quâ expugnata, liberavit *Massadam*, & propinquos, domesticosque suos in ea arce obsessos. Deindè, obsidione cinxit Hierosolymam. Sed, ob appetentem hyemem, dimisit in hyberna milites Romanos, qui in ipsius castris militabant. *M. Antonius*, qui in Orientem venerat,

tunc Samosatam obsidebat. *Herodes* verò, dimisso in hyberna exercitu, venit *Sephorim* hyemali tempore.

Anno Urbis conditæ 717. Anno quarto Olympiadis 185. Anno Periodi Julianæ 4677. Anno Iuliano nono. Anno octavo Imperii Octavianii Augusti. Anno quarto Regni Herodis. Anno ante Æram Christianam 37. Consules fuerunt M. Vipsanius Agrippa, & L. Caninius Gallus. Eodem anno Herodes Galilæam totam subegit, victis pulsisque Antigonianis, sive his, qui à partibus Antigoni stabant. Dein, ad M. Antonium, qui Samosatam oppugnabat, properavit. Certis cum Antiocho pactis conditionibus, M. Antonius Samosatam cepit. Herodes autem, unà cum Sosio, Hierosolymam venit, eique M. Antonius Syriam, exercitumque tradidit. Herodes, & Sosius obsident Hierosolymam, sed Herodes, durante obsidione, Samariam profectus, ibi nuptias inivit cum Mariamne, reversusque ad obsidionem, cepit Urbem Hierosolymam in die festo Expiationis, multisve pecuniis induxit M. Antonium, ut Antigonum, qui ad illum victus deductus fuerat, è medio tolleret, eumque apud Antiochiam securi percuti juberet. Quo semel facto, tum demùm Herodes, omni metu liberatus, regnavit in Iudæa, sublato penitus Principatu Assamonæorum, quorum ultimus fuit Antigonus, qui in Iudæa regnavit annis tribus & tribus mensibus. Ab isto anno Urbis conditæ 717. desumenda est secunda Regni Herodis Epochæ, secundum quam Iosephus, Hebræus, ait, Herodem, devicto Antigono, idest, triennio postquam Rex Iudææ à Senatu Romano fuerat declaratus, regnasse annos xxxiv.

Anno Urbis conditæ 718. Anno primo Olympiadis 186. Anno Periodi Julianæ 4678. Anno Iuliano decimo. Anno nono Imperii Octavianii Augusti. Anno quinto Regni Herodis. Anno ante Æram Christianam 36. Consules fuerunt L. Gellius Poplicola, & M. Cocceius Nerva. Eodem anno Hircanus, Iudæorum Pontifex, quem Phraates, Parthorum Rex, captivum detinebat, dimissus à Parthis, reversus est in Iudæam, eumque honorificè excepit Herodes, Rex Iudææ, eique, quominus suspicaretur insidias, quas ei parabat, primum in Conventibus locum tribuit. Sed cavens, ne quis Procerum crearetur Pontifex Maximus, Ananæ, obscuri generis Sacerdoti, Summum Pontificatum donavit.

Anno Urbis conditæ 719. Anno secundo Olympiadis 186. Anno Periodi Julianæ 4679. Anno Iuliano undecimo. Anno decimo Imperii Octavianii Augusti. Anno sexto Regni Herodis. Anno ante Æram Christianam 35. Consule fuerunt L. Cornificius, & Sextus Pompeius, qui alius est à Sexto Pompejo, filio Magni Pompeii. Eodem anno Herodes, Rex Iudææ, Aristobulum, adolescentem septemdecim annorum, Mariamnis, uxoris suæ, fratrem, assiduus ejusdem Mariamnis precibus victus, vivo adhuc Ananæo successorem in Pontificatu dedit. Sed quia Aristobulus populo gratus & acceptus erat, curavit Herodes, Rex crudelissimus, ut præfocaretur, dum nataret, annos tunc decem & octo dumtaxat natus.

Anno Urbis conditæ 720. Anno tertio Olympiadis 186. Anno Periodi Iulianæ 4680. Anno Iuliano duodecimo. Anno Imperii Octaviani Augusti undecimo. Anno septimo Regni Herodis. Anno ante Æram Christianam 34. Consules fuerunt Antonius II. & L. Scribonius Libo.

Anno Urbis conditæ 721. Anno quarto Olympiadis 186. Anno Periodi Iulianæ 4681. Anno Iuliano decimo tertio. Anno Imperii Octaviani Augusti duodecimo. Anno octavo Regni Herodis. Anno ante Æram Christianam 33. Consules fuerunt Augustus Cæsar II. & L. Volcatius Tullus.

Anno Urbis conditæ 722. Anno primo Olympiadis 187. Anno Periodi Iulianæ 4682. Anno Iuliano decimo quarto. Anno Imperii Octaviani Augusti decimo tertio. Anno nono Regni Herodis. Anno ante Æram Christianam 32. Consules fuerunt C. N. Domitius Ahenobarbus, & C. Sosius.

Anno Urbis conditæ 723. Anno secundo Olympiadis 187. Anno Periodi Iulianæ 4683. Anno Iuliano decimo quinto. Anno Imperii Octaviani Augusti decimo quarto. Anno decimo Regni Herodis. Ante Æram Christianam anno 31. Consules fuerunt Augustus Cæsar III. & M. Valerius Messala. Eodem anno pugna Actiaca Octavianum Cæsarem Augustum inter & M. Antonium habita est. Nonas Septemb. id est, die secundâ Septemb. sicut testatur Dio lib. 51. Victor in pugna Actiaca extitit Octavianus Cæsar Augustus, & hac insigni reportatâ victoriâ, solus evasit totius Imperii Romani Supremus Monarcha; Jam enim Æmilius Lepidus, tertius Triumvir, omni potestate fuerat exutus. Ab eodem anno Urbis conditæ 723. quo Octavianus Cæsar Augustus devicit in pugna Actiaca M. Antonium & Cleopatram, Ægypti Reginam, peti debet exordium Æræ Antiochenæ, eò quòd hoc anno cum Antiochiæ Urbs partes Octaviani Cæsaris Augusti, ad Actium Victoris, fuisset amplexa, novam in honorem Cæsaris Augusti Antiocheni instituerunt Epocham, quæ in variis Numismatibus Præsidum Syriæ legitur, sicut superius ostendimus. Nonnulli etiam Scriptores Historici initium Imperii Octaviani Cæsaris Augusti deducunt ab isto Urbis conditæ anno 723. quo Octavianus Cæsar Augustus, profligato in pugna Actiaca M. Antonio, solus in Imperio Romano summâ rerum potius est.

Anno Urbis conditæ 724. Anno tertio Olimp. 187. Anno Iuliano decimo sexto. Anno Periodi Iulianæ 4684. Anno Imperii Octaviani Cæsaris Augusti decimo quinto. Anno Regni Herodis undecimo. Ante Æram Christianam 30. Consules fuerunt Augustus Cæsar IV. & M. Licinius Crassus. Eodem anno M. Antonium, qui in pugna Actiaca anno superiori habitâ victus, in Ægyptum ad Cleopatram, Reginam, fugerat, Bello profectus est Victor Octavianus Cæsar Augustus. Alexandriam, Urbem Ægypti Regiam, cepit in mense sextili, qui ejus nomine Augustus fuit appellatus, totâque Ægypto potitus est. Sibi in Ægypto necem conficivit M. Antonius, mortuique est in sinu Cleopatrx, Ægypti Reginæ, quæ ipsa etiam metuens, ne à Victore Cæsare Augusto in triumpho duceretur, Alpidis mor-

morſu periit. Eodem anno Herodes, Iudææ Rex, qui partes *M. Antonii* fuerat ſequutus, ad Victorem *Cæſarem Auguſtum*, ſummâ rerum potentem, properavit, Rhodumque venit, ut illic *Cæſari Auguſto* occurreret. Benignè à *Cæſare Auguſto* exceptus eſt *Herodes*, & dono ejus, atque Senatus Conſulto Rex Iudææ, fuit confirmatus. Eminentiffimus Eccleſiaſticorum Annalium Parens, Cardinalis *Baronius*, exiſtimat, annos Regni *Herodis* triginta ſeptem, quos, illi tribuit *Iosephus*, Hebræus, inchoari debere ab iſto Urbis conditæ anno 724. quo Regnum Iudææ ab *Auguſto*, Imperatore, fuit *Herodi* traditum, & ex S. C. confirmatum. Sed hoc in calculo Regni annorum *Herodis* fuiſſe hallucinatum doctiſſimum illum Cardinalem, eumque nec initium, nec exitum Regni *Herodis* rectè aſſignaviſſe, ſat ſuperque, poſt peritiſſimos Chronologos Scriptores, Cardinalem *Noriſum*, & *Antonium Pagium*, ſuperiùs commonſtravi.

Anno Urbis conditæ 725. Anno quarto Olympiadis 187. Anno *Iuliano* decimo ſeptimo. Anno Periodi *Iulianæ* 4685. Anno Imperii *Oſtaviani Cæſaris Auguſti* decimo ſexto. Anno duodecimo Regni *Herodis*. Anno ante *Æram Chriſtianam* vigefimo nono. Conſules fuerunt *Auguſtus Cæſar V. & Sextus Apulejus*. Eodem anno Ara Victoriz V. Kalendas Septembris in Curia dedicata eſt, ſicut in antiquo Kalendario notatur, quâ *Cæſar Auguſtus* oſtendere voluit, ſe ex Victoria, quam de *M. Antonio* in pugna *Adiacâ* retulerat, Imperium eſſe adeptum. De hac Victoriz Ara, poſt pacem à *Conſtantino M.* Imperatore, Chriſtianis redditam, magna Chriſtianos inter & Paganos fuerunt oborta diſſidia, de quibus lato calamo diſſerit in Annalibus Eccleſiaſticis Cardinalis *Baronius*.

Anno Urbis conditæ 726. Anno 1. Olympiadis 188. Anno *Iuliano* decimo octavo. Anno Periodi *Iulianæ* 4686. Anno Imperii *Oſtaviani Cæſaris Auguſti* decimo ſeptimo. Anno decimo tertio Regni *Herodis*. Anno ante *Æram Chriſtianam* vigefimo octavo. Conſules fuerunt *Auguſtus Cæſar VI. & M. Vipsanius Agrippa II.*

Anno Urbis conditæ 727. Anno ſecundo Olympiadis 188. Anno *Iuliano* decimo nono. Anno Periodi *Iulianæ* 4687. Anno Imperii *Oſtaviani Cæſaris Auguſti* decimo octavo. Anno decimo quarto Regni *Herodis*. Anno ante *Æram Chriſtianam* vigefimo ſeptimo. Conſules fuerunt *Auguſtus Cæſar VII. & Vipsanius Agrippa III.* Eodem anno *Auguſti* nomen *Oſtaviano Cæſari* tributum eſſe ſcribunt *Cenſorinus* in Lib. de die Natali cap. 21. & *Dio* lib. 53.

Anno Urbis conditæ 728. Anno tertio Olympiadis 188. Anno *Iuliano* vigefimo. Anno Periodi *Iulianæ* 4688. Anno Imperii *Oſtaviani Cæſaris Auguſti* decimo nono. Anno Regni *Herodis* decimo quinto. Anno ante *Æram Chriſtianam* vigefimo ſexto. Conſules fuerunt *Auguſtus Cæſar VIII. & T. Statilius Taurus II.*

Anno Urbis conditæ 729. Anno quarto Olympiadis 188. Anno *Iuliano* vigefimo primo. Anno Periodi *Iulianæ* 4689. Anno Imperii *Oſtaviani Cæſaris*

Saris Augusti vigesimo . Anno decimo sexto Regni Herodis . Ante Æram Christianam anno vigesimo quinto . Consules fuerunt Augustus Cæsar IX. & M. Iunius Silanus .

Anno Urbis conditæ 730. Anno primo Olympiadis 189. Anno Iuliano vigesimo secundo. Anno Periodi Iulianæ 4690. Anno Imperii Octaviani Cæsaris Augusti vigesimo primo . Anno decimo septimo Regni Herodis . Ante Æram Christianam anno vigesimo quarto . Consules fuerunt Augustus Cæsar X. & C. Nerbanus Flaccus .

Anno Urbis conditæ 731. Anno secundo Olympiadis 189. Anno Iuliano vigesimo tertio. Anno Periodi Iulianæ 4691. Anno Imperii Octaviani Cæsaris Augusti vigesimo secundo. Anno decimo octavo Regni Herodis . Ante Æram Christianam anno vigesimo tertio . Consules fuerunt Augustus Cæsar XI. & C. N. Calpurnius Piso . Eodem anno Senatus Imperatori Augusto perpetuam Tribunitiam potestatem contulit, indeque , ut ait Dio lib. 53. exortum est, ut Imperator Augustus, quique eum secuti sunt Imperatores, lege quadam uterentur Tribunitiâ potestate .

Anno Urbis conditæ 732. Anno tertio Olympiadis 189. Anno Iuliano vigesimo quarto . Anno Periodi Iulianæ 4692. Anno Imperii Octaviani Cæsaris Augusti vigesimo tertio. Anno decimo nono Regni Herodis . Ante Æram Christianam anno vigesimo secundo . Consules fuerunt M. Claudius Marcellus Eserinus, & L. Arruntius .

Anno Urbis conditæ 733. Anno quarto Olympiadis 189. Anno Iuliano vigesimo quinto . Anno Periodi Iulianæ 4693. Anno Imperii Octaviani Cæsaris Augusti vigesimo quarto . Anno vigesimo Regni Herodis . Ante Æram Christianam anno vigesimo primo . Consules fuerunt Q. Æmilius Lepidus, & M. Lollius .

Anno Urbis conditæ 734. Anno primo Olymp. 190. Anno Iuliano vigesimo sexto . Anno Periodi Iulianæ 4694. Anno Imperii Octaviani Cæsaris Augusti vigesimo quinto . Anno vigesimo primo Regni Herodis . Ante Æram Christianam anno vigesimo . Consules fuerunt M. Appuleius, & P. Silius Nerva .

Anno Urbis conditæ 735. Anno secundo Olympiadis 190. Anno Iuliano vigesimo septimo . Anno Periodi Iulianæ 4695. Anno Imperii Octaviani Cæsaris Augusti vigesimo sexto. Anno vigesimo secundo Regni Herodis . Ante Æram Christianam anno decimo nono . Consules fuerunt Q. Lucretius Vispillo, & C. Sentius Saturninus . Eodem anno Beatissimam Virginem Mariam, Matrem Christi Domini, natam esse mense Septembri existimo .

Anno Urbis conditæ 736. Anno tertio Olympiadis 190. Anno Iuliano vigesimo octavo . Anno Periodi Iulianæ 4696. Anno Imperii Octaviani Cæsaris Augusti vigesimo septimo . Anno vigesimo tertio Regni Herodis . Ante Æram Christianam anno decimo octavo . Consules fuerunt P. Cor. Lentulus Marcellinus, & C. N. Cornelius Lentulus . Eodem anno Maria, Virgo, Mater

ter Christi Domini, complevit annum ætatis suæ primum.

Anno Urbis conditæ 737. Anno quarto Olympiadis 190. Anno Iuliano vigesimo nono. Anno Periodi Iulianæ 4697. Anno Imperii Octaviani Cæsaris Augusti vigesimo octavo. Anno vigesimo quarto Regni Herodis. Ante Æram Christianam anno decimo septimo. Consules fuerunt C. Furnius. Et C. Iunius Silanus. Eodem anno Maria, Virgo, Mater Christi Domini, complevit annum ætatis suæ secundum.

Anno Urbis conditæ 738. Anno primo Olympiadis 191. Anno Iuliano trigesimo. Anno Periodi Iulianæ 4698. Anno Imperii Octaviani Cæsaris Augusti vigesimo nono. Anno vigesimo quinto Regni Herodis. Ante Æram Christianam anno decimo sexto. Consules fuerunt L. Domitius Abenobardus, & P. Cornelius Scipio. Eodem anno Maria, Virgo, Mater Christi Domini, complevit annum ætatis suæ tertium.

Anno Urbis conditæ 739. Anno secundo Olympiadis 191. Anno Iuliano trigesimo primo. Anno Periodi Iulianæ 4699. Anno Imperii Octaviani Augusti trigesimo. Anno Regni Herodis vigesimo sexto. Ante Æram Christianam anno decimo quinto. Consules fuerunt M. Livius Drusus Libo, & L. Calpurnius Piso. Eodem anno Maria, Virgo, Mater Christi Domini, complevit annum ætatis suæ quartum.

Anno Urbis conditæ 740. Anno tertio Olympiadis 191. Anno Iuliano trigesimo secundo. Anno Periodi Iulianæ 4700. Anno Imperii Octaviani Cæsaris Augusti trigesimo primo. Anno Regni Herodis vigesimo septimo. Ante Æram Christianam anno decimo quarto. Consules fuerunt M. Licinius Crassus, & C. N. Cornelius Lentulus. Eodem anno Maria, Virgo, Mater Christi Domini, complevit annum ætatis suæ quintum.

Anno Urbis conditæ 741. Anno quarto Olympiadis 191. Anno Iuliano trigesimo tertio. Anno Periodi Iulianæ 4701. Anno Imperii Octaviani Cæsaris Augusti trigesimo secundo. Anno Regni Herodis vigesimo octavo. Ante Æram Christianam anno decimotertio. Consules fuerunt Tiberius Claudius Nero & P. Quinctilius Varus. Eodem anno Maria, Virgo, Mater Christi Domini, complevit annum ætatis suæ sextum.

Anno Urbis conditæ 742. Anno primo Olympiadis 192. Anno Iuliano trigesimo quarto. Anno Periodi Iulianæ 4702. Anno Imperii Octaviani Cæsaris Augusti trigesimo tertio. Anno Regni Herodis vigesimo nono. Ante Æram Christianam anno duodecimo. Consules fuerunt M. Valerius Messalla Barbatus, & P. Sulpicius Quirinus. Eodem anno Maria, Virgo, complevit annum ætatis suæ septimum.

Anno Urbis conditæ 743. Anno secundo Olympiadis 192. Anno Iuliano trigesimo quinto. Anno Periodi Iulianæ 4703. Anno Imperii Octaviani Cæsaris Augusti trigesimo quarto. Anno Regni Herodis trigesimo. Ante Æram Christianam anno undecimo. Consules fuerunt Paulus Fabius Maximus, & Q. Elius Tubero. Eodem anno Maria, Virgo, complevit annum ætatis suæ octavum.

Anno

Anno Urbis conditæ 744. Anno tertio Olympiadis 192. Anno Iuliano trigesimo sexto. Anno Periodi Iulianæ 4704. Anno Imperii Octavianii Caesaris Augusti trigesimo quinto. Anno Regni Herodis trigesimo primo. Ante Æram Christianam anno decimo. Consules fuerunt Iulius Antonius, & Q. Fabius Max. Africanus. Eodem anno Maria, Virgo, Mater Christi Domini, complevit annum ætatis suæ nonum.

Anno Urbis conditæ 745. Anno quarto Olympiadis 192. Anno Iuliano trigesimo septimo. Periodi Iulianæ 4705. Anno Imperii Octavianii Caesaris Augusti trigesimo sexto. Anno Regni Herodis trigesimo secundo. Ante Æram Christianam anno nono. Consules fuerunt Nero Claudius Drusus Germanicus, & T. Quinctius Crispinus. Eodem anno Maria, Virgo, complevit annum ætatis suæ decimum.

Anno Urbis conditæ 746. Anno primo Olympiadis 193. Anno Iuliano trigesimo octavo. Periodi Iulianæ 4706. Anno Imperii Octavianii Caesaris Augusti trigesimo septimo. Anno Regni Herodis trigesimo tertio. Ante Æram Christianam anno octavo. Consules fuerunt C. Martins Censorinus, & C. Asinius Gallus. Eodem anno Maria, Virgo, complevit annum ætatis suæ undecimum.

Anno Urbis conditæ 747. Anno secundo Olympiadis 193. Anno Iuliano trigesimo nono. Periodi Iulianæ 4707. Anno Imperii Octavianii Caesaris Augusti trigesimo octavo. Anno Regni Herodis trigesimo quarto. Ante Æram Christianam anno septimo. Consules fuerunt Tiberius Claudius Nero II. & Cn. Calpurnius Piso. Eodem anno Maria, Virgo, complevit annum ætatis suæ duodecimum. Ioannes Harduinus, Societatis Iesu Scriptor, opinatur Christum Dominum mense Septembri ejusdem anni natum fuisse.

Anno Urbis conditæ 748. Anno tertio Olympiadis 193. Anno Iuliano quadragesimo. Periodi Iulianæ 4708. Anno Imperii Octavianii Caesaris Augusti trigesimo nono. Anno Regni Herodis trigesimo quinto. Ante Æram Christianam anno sexto. Consules fuerunt D. Lalius Balbus, & C. Antistius Vetus. Eodem anno Maria, Virgo, complevit annum ætatis suæ decimum tertium. Sub his Consuli bus ejusdem anni Christum Dominum natum esse censent Marcus Antonius Capellus, Keplerus, Henschenius, & Antonius Pagius in suo Apparatu Chronologico ad Annales Baronii.

Anno Urbis conditæ 749. Anno quarto Olympiadis 193. Anno Iuliano quadragesimo primo. Anno Periodi Iulianæ 4709. Anno Imperii Octavianii Caesaris Augusti quadragesimo. Anno Regni Herodis trigesimo sexto. Ante Æram Christianam anno quinto. Consules fuerunt Augustus Caesar XII. & L. Cornelius Sulla. Eodem anno Christum Dominum die 25. mensis Decembris natum esse probabilius existimo cum viris doctissimis, Ioanne Dekerio, Dionysio Petavio, & aliis. Beatissima itaque Virgo Maria, anno labente ætatis suæ decimoquarto, & elapsis à conceptione novem men-

libus, peperit *Jesus Christum*, omnium hominum Salvatorem.

Anno Urbis conditæ 750. Anno primo Olymp. 194. Anno Iuliano quadregesimo secundo. Anno Periodi Iulianæ 4710. Anno Imperii Octaviani Cæsaris Augusti quadregesimo primo. Anno Regni Herodis trigesimo septimo. Ante Æram Christianam anno quarto. Consules fuerunt C. Calvisius Sabinus, & Rufus, seu Rufinus, sicut legitur apud Severum Sulpicium. Eodem anno Herodes, Rex Iudææ, post occisos pueros à bimatu & infra, ut ait Scriptura Sacra, mortuus est.

Anno Urbis conditæ 751. Anno secundo Olympiadis 194. Anno Iuliano quadregesimo tertio. Anno Periodi Iulianæ 4711. Anno Imperii Octaviani Cæsaris Augusti quadregesimo secundo. Ante Æram Christianam anno tertio. Consules fuerunt Cn. Cornelius Lentulus, & M. Valerius Messalinus. Cum eodem anno Natale Christi Domini Eminentissimus Cardinalis Baronius, Scaliger, & Sethus Calvisius copulant.

Anno Urbis conditæ 752. Anno tertio Olympiadis 194. Anno Iuliano quadregesimo quarto. Anno Periodi Iulianæ 4712. Anno Imperii Octaviani Cæsaris Augusti quadregesimo tertio. Ante Æram Christianam anno secundo. Consules fuerunt Augustus Cæsar XIII. & M. Plantius Silvanus. Sub hujus anni Consulibus Natale Christi Domini. consignat Onuphrius Panvinus, doctissimus Fastorum conditor.

Anno Urbis conditæ 753. Anno quarto Olympiadis 194. Anno Iuliano quadregesimo quinto. Anno Periodi Iulianæ 4713. Anno Imperii Octaviani Cæsaris Augusti quadregesimo quarto. Ante Æram Christianam anno uno. Consules fuerunt Cornelius Lentulus, & L. Calpurnius Piso. In hunc annum Dionysius Exiguus, Abbas, quem sequuntur Philippus Labbeus, & Iacobus Grandamicus, aliique, Natale Christi Domini contulit. Immo, Ecclesia Latina, seu Occidentalis, quæ primum Christi annum à Cæsi Cæsaris, & M. Emilii Pauli Consulatu, qui anno sequenti, seu Urbis conditæ 754. & anno Iuliano XLVI. exorditur, numerare solet, supponit cum Dionysio Exiguo, Christum natum esse anno Urbis conditæ 753. seu anno Iuliano XLV. At Ecclesia Latina iudicium suum ad has tricas Chronologicas discutiendas, ut superius ostendimus, iudicium suum non interponit, hoc annorum computo, qui vulgò receptus est, contenta. Ceterum, convenit modò inter omnes Chronologiæ peritos, distinguendum esse duplex Natale Christi, videlicet proprium Natale Christi, & Natale Christi Dionysianum, seu commune, ac Vulgare. Primum, seu Natale proprium Christi, est illud, quod quilibet probabilis putat. Alius quippè annum Iulianum XL. alius annum Iulianum XLI. alius alium, intra tamen annum Iulianum XL. & XLVI. inclusivè. Nam aliquo eorum annorum Iesum Christum natum esse, extra omnem dubitationis aleam positum est. Nobis, sicut ostendimus in ista Dissertatione, magis aridet opinio illorum, qui Natale proprium Christi copulant cum anno Iuliano XLI., seu cum anno Urbis conditæ 749. ita ut Natale proprium Christi.

Christi, juxta probabiliorem, quam sequor, sententiam, præcesserit quadriennio integro Natale Christi, quod vocatur *Dionysianum*, seu *Vulgare ac commune*. Porro, istud Natale proprium Christi nullam potest constituere Æram Christianam: Alioquin tot essent Æræ Christianæ, quot sunt de anno *Natalis proprii* Christi sententiæ. At verò, Natale Christi, quod dicitur *Dionysianum*, seu *Vulgare ac commune*, non pendet à Doctorum opinionibus, sed necessario copulandum est cum anno Urbis conditæ 753. seu cum anno Iuliano XLV. quo Consules fuerunt *Cornelius Lentulus*, & *L. Calpurnius Piso*, cum Æra Christiana, seu *Dionysiana*, incipiat à Kalendis mensis Ianuarii anni Urbis conditæ 754. seu anni Iuliani XLVI. Christumque die 25. mensis Decembris anni antecedentis natum supponat.

Anno Urbis conditæ 754. Anno primo Olympiadis 195. Anno Iuliano quadragesimo sexto. Anno Periodi Iulianæ 4714. Anno Imperii Octaviani Cæsaris Augusti quadragesimo quinto. Anno primo Æræ Christianæ. Consules fuerunt *Cajus Cæsar*, & *L. Æmilius Paulus*. Initium Æræ Christianæ, seu *Dionysianæ*, peti debere à Kalendis Ianuarii hujus anni, quo Consules fuerunt *Cajus Cæsar*, & *L. Æmilius Paulus*: certissimis demonstrationibus evincunt periti hodierni Chronologi. Quare à recta via aberravit Cardinalis *Baronius*, dum Æram Christianam, seu *Dionysianam*, exorsus est à Kalendis Ianuarii anni Urbis conditæ 753. seu anni Iuliani XLIV. Quò factum est, ut *Baronius* biennio integro anteverterit Æram Christianam, seu *Dionysianam*, sicque, in suis Annalibus Ecclesiasticis, annis duobus, & aliquando etiam tribus, ab Æra Christiana, seu *Dionysiana*, usque ad annum Christi CCLXX. ditet, sicut passim in sua *Critica Baroniana* ostendit doctissimus *Antonius Pagius*. Fuerunt quidem, fateor, nonnulli, qui Cardinalem *Baronium* editis Lucubrationibus defenderunt, eumque Æræ Christianæ, seu *Dionysianæ*, exordium rectè consignasse demonstrare conati fuerunt. Immo, *Henricus Spondanus*, Appamiarum in Gallia Episcopus, & de universa Ecclesia optime meritus, in fine Apparatus in Annales *Baronii* dicit, aliquos à se petiisse, ut Annales *Baronii* in Epitomen redigens, eisdem etiam emendaret, & à vera Æra Christiana, seu *Dionysiana*, non ab anno Urbis conditæ septingentesimo quinquagesimo secundo cum Cardinali *Baronio* inciperet, sed ab anno Urbis conditæ 754. quo *Cajus Cæsar*, & *L. Æmilius Paulus* Consules fuerunt, inchoaret; istud tamen sibi à quibusdam insinuatum consilium auscultare, & executioni mandare noluisse, quòd alii non deessent viri docti, quibus etiam Cardinalis *Baronii* computandi ratio probaretur. Verùm, hanc *Spondani*, & aliorum quorundam, Cardinali *Baronio* suffragantium, opinionem certissimis demonstrationibus falsi convincunt Cardinalis *Nerissus*, & *Antonius Pagius*, luceque meridiana clariùs probant, exordium Æræ Christianæ, seu *Dionysianæ*, juxta usum Ecclesia Latinæ, removeri haud posse ab anno Urbis conditæ

ditæ 754., qui insignitur Consulatu *Caii Cesaris*, & *L.Æmilii Pauli*. Hujus Cardinalis *Norisi*, & *Antonii Pagii*, quibus ætas nostra nullo Chronologiæ peritiores tulit, sententiæ, manifestis demonstrationibus innixæ, standum esse censeo, quia, ut vulgò dicitur, miserum est vesci glandibus, inventis frugibus.

Hactenus pertexui seriem Consulum Romanorum ab anno Urbis conditæ 709. quo *Cajus Julius Cesar* quartum Consulatum iniit, usque ad annum ejusdem Urbis conditæ 754. hoc est, usque ad annum quadragessimum quintum Imperii *Octavianii Cesaris Augusti*, quo cæpit annus primus *Æræ Christianæ*, seu *Dionysianæ*; in Dissertatione autem hujusce Tractatus decimâ, in qua de anno, quo Christus Dominus Baptizatus est, sermonem institutus sum, seriem exhibebo Consulum Romanorum, qui ab anno Urbis conditæ 754. seu ab anno quadragesimo quinto Imperii *Augusti*, quo cæpit annus primus *Æræ Christianæ*, seu *Dionysianæ*, usque ad annum ejusdem Urbis conditæ septingentesimum septuagesimum nonum, qui concurret cum anno *Æræ Christianæ*, seu *Dionysianæ*, vigesimo sexto, quo anno Christum Dominum sub Consulatu *Cn. Lentuli Gentulici*, & *C. Calvisii Sabini*, fuisse in Iordane à Ioanne Baptistâ, multis momentis adstruere conabor.

DISSERTATIO SEPTIMA

De vaticinio Iacob, Genesis cap. 49. Non auferetur Sceptrum de Juda, &c. & de circumstantiis Nativitatis Christi Domini.

Hanc Dissertationem partiar in duos Paragraphos. In primo ostendam, hoc vaticinium Jacobæum Geneseos cap. 49. *Non auferetur Sceptrum de Juda, &c.* fuisse impletum in Nativitate Christi. In altero adversus Judæos commonstrabo, ex circumstantiis Nativitatis Christi invictè probari, eum esse verum Messiam, Prophetarum Oraculis prædictum.

PARAGRAPHUS PRIMUS

Utrum hoc Jacobi vaticinium: Non auferetur Sceptrum de Juda &c. fuerit impletum in Nativitate Christi?

EA est Judæorum pervicacia, ut in lætione Moysis ultrò velamen cordi suo obducant, & in tanta Prophetarum, Evangelique luce sicut nocturnæ ad Solem cæcutiant. Hinc, omnibus Prophetarum oraculis,

lis, quæ in Christo Domino fuere adamussim completa, tenebras consulto offundunt, suosque oculos ad tot assurgentes veritatis radios deploranda cæcitate occludunt. *Excæca cor populi hujus, & aures ejus aggravæ, & oculos ejus claudet, ne forte videat oculis suis, & auribus suis audiat, & corde suo intelligat, & convertatur, & sanem eum.* Isaia cap. 6. Quapropter, ut eorum obstinatio magis ac magis retundatur, hoc in Paragrapho probandum suscipio, in Christi Nativitate fuisse completum illud vaticinium Patriarchæ Jacobi morientis his verbis conceptum: *Non auferetur Sceptrum de Juda, & Dux de femore ejus, donec veniat, qui mittendus est, & ipse erit expectatio gentium*, simulque ostendam, omnia tela, quæ adversus tam evidentem Jacobi prædictionem intendunt increduli Judei, adeò infirma, frigida, & obrusa esse, ut eam potius confirmant, quàm labefactent.

DICO ITAQUE: Hoc vaticinium Jacobi morientis, *non auferetur Sceptrum de Juda, & Dux de femore ejus, donec veniat qui mittendus est, & ipse erit expectatio gentium*, &c. fuisse impletum in Nativitate Christi Domini.

Probatur hæc assertio unico, sed efficacissimo argumento. Patriarcha Jacob hoc vaticinio prædixit, venturum Messiam eo tempore, quo, potestate Judæorum deficiente, Sceptrum, sive Regia, vel Ducalis dignitas ad alienigenam transire debebat, atqui Christus Dominus natus est eo tempore, quo Sceptrum, seu Regia, vel Ducalis dignitas Judæis ablata ad alienigenam transivit, ergo hoc vaticinium Jacobi morientis fuit reverà impletum in Nativitate Christi. Major constat ex tenore vaticinii Jacobæi, quod juxta Editionem vulgatam sic habet: *non auferetur Sceptrum de Juda, & Dux de femore ejus, donec veniat qui mittendus est, & ipse erit expectatio gentium*. In Textu verò Hebræo sic legitur: *non recedet Sceptrum de Juda, neque Dux de inter pedes ejus, donec veniat Siloh, & ipsi obedientia populorum*. Hoc est, ejus doctrinam populi recipient, illiusque præceptis, ac mandatis obtemperabunt. Voce autem *Siloh* Messiam significari consentiunt Chaldæi Paraphrastæ, videlicet *Thargum Onkelosi, Hierosolymitanum, & Ionathanis*. Sicque etiam unanimi calculo interpretantur omnes Sancti Patres, qui licet in Jacobæi oraculi interpretatione in varias abeant sententias, in eo tamen concordantes sunt, quod velint, illud Oraculum venturi Messie prædictionem continere, & ad ipsum esse referendum. Probatur igitur minor, videlicet Christum natum esse eo tempore, quo Sceptrum, seu Regia, vel Ducalis dignitas non solum à Tribu Juda, sed etiam à tota gente Iudaica ablata transivit ad alienigenam. Christus natus est Herode regnante in Iudæa, sicut legitur *Matth. cap. 2.* atqui Herodes fuit alienigena; ergo Christus natus est eo tempore, quo Regia, vel Ducalis dignitas non tantum à Tribu Juda, sed etiam à tota gente Iudaica ablata transivit ad alienigenam. Quod Herodes fuerit alienigena, liquet ex multis momentis.

Primò, quia Herodes nec postulato, nec expectato Iudzorum consensu, sed solo favore, atque ope Romanorum adjutus, Iudææ Regnum obtinuit anno quinto Imperii Augusti. Secundò, Iosephus passim in lib. 14. Antiqu. & in lib. 1. de Bello Iudaico cap. 25. asserit, Herodem, Antipatri filium, genere Idumæum fuisse. Tertiò, idem testantur veteres SS. Patres, & Scriptores Ecclesiastici, qui Herodem alienigenam, & *allophy-lum*, seu extraneum, & peregrinum summo consensu pronunciant; quamvis quidam illum *Ascalonitam*, quidam *Idumæum* appellent. Ità sentiant *Origenes* hom. 17. in Genesim, *Eusebius* lib. 1. Histor. Eccles. cap. 6. *Ambrosius* lib. 3. in Lucam, & libro de *Benedictionibus Patriarcharum* cap. 9. *Hieronymus* Commentario in cap. 3. *Osæ*, *Augustinus* lib. 18. de Civitat. Dei cap. 45. *Theodoretus* dialogo primo, *Sulpicius Severus* lib. 2. Hist. Sacræ cap. 27. & alii quàmplurimi, quorum sententiæ subscribit *S. Thomas* 3. part. quæst. 35. art. 8. ad 2. Porro, tam cano, tamque venerando totius antiquitatis consensui, citrà temeritatem reclamare non licet. Quartò, Herodem fuisse alienigenam, & non genere Iudæum, colligitur ex Secta Herodianorum, qui, sicut docent *Tertullianus*, *Epiphanius*, & *Philastrius*, ità appellabantur, quòd Herodem haberent pro Messia, eò quòd, cùm esset alienigena, Regnum Iudææ occupasset; Regno quippè Iudææ ad extraneum hominem translato, sibi persuaserunt Herodiani, Herodem esse Messiam, quod ex eo Scripturæ loco consequi videbatur: *non auferetur Sceptrum de Iuda, donèc veniat qui mittendus est*. Quintò, Herodem fuisse alienigenam apertè declarant ea quæ, teste *Iosepho* lib. 15. Antiq. cap. 11. gessit postquàm fuit à Romanis Regià dignitate auctus. Nam Iudzorum instituta peregrinis ritibus violavit, instituit Athletica certamina, quinto quoque anno, in honorem Cæsaris, theatrum in Urbe, & amphitheatrum in campo extruxit, Sacerdotio, aut abdicavit, aut promovit quos voluit, sibi omne jus, supremam, atque Regiam in Iudæa autoritatem arrogavit, & exercuit; Samariam, *Sebaste*n dictam, Augusti honori dicavit, Davidis sepulchrum reclusit, interemit eos, qui ex stirpe Regia erant oriundi, & omnes libros, qui de Iudææ Regum genealogia conscripti erant, sedulò conquiri, & comburi iussit, ne videlicet genti Herodianæ, utpotè quæ nec ex Davidis familia, nec ex Judaica genere prodierat, aditus ad Regnum Iudææ præcluderetur. Hac potissimùm de causâ Herodes, politicis artibus insignis, suæque ignobilitatis concitus, in omnes profapiæ Regiæ Iudzorum grassari, eorumque genealogias penitus abolere sibi necessarium duxit, existimans, inquit *Eusebius* lib. 1. Histor. Eccles. cap. 6. *Se nobilem videri posse, si novicius esse, & advena Israelitici generis nullis conscriptionum Fastis urgeretur*. Sextò, tam constans erat apud Iudæos fama, Herodem non esse Iudæum, sed alienigenam, adeoque nullum ipsi jus ad Regnum Iudææ esse assertum, ut benè multi ex Eissenis, aliisque Iudzorum Sectis adduci nunquam potuerint, ut in ejus fidem jurarent, plurimique etiam

tor-

tormentis, & comminatione ad juramentum illud præstandum fuerint compulsi. Denique, qui credibile est, Herodem fuisse genere Judæum, quem constat infensissimum fuisse hostem Judæorum, eosque odio plurquam vatiniano semper fuisse persecutum, ita ut etiam in illos ultrà funus suum sævire voluerit, dùm *Salomæ*, sorori suæ, & *Alexæ*, Salomæ viro, ferale illud dedit mandatum occidendi post suum obitum omnes nobiles Judæos, quos in hunc finem, paulò antequàm animam efflaret, in Circo concludi jusserat? Ex his itaque momentis manifestò patet, Herodem non fuisse genere Judæum, sed alienigenam, ac subindè reverà in Nativitate Christi fuisse impletum hoc Jacobæum oraculum: *non auferetur Sceptrum de Juda, & Dux de femore ejus, donec veniat qui mittendus est, &c.*

Scio, quosdam esse Theologos, qui putant illud Jacobi oraculum non fuisse reapse completum regnante Herode, sed eo dumtaxat tempore, quo omnis Magistratus Civilis, & Hierarchicus, apud Judæos abolitus est, quod quidem contigit anno *Æræ vulgaris lxx.* quandò videlicet captà per *Titum*, Imperatorem, Jerosolymorum Urbe, & solo æquatà, Templum quoque funditùs dirutum est. Verùm, etsi ipse non inficias eam, Judæos non destitisse efficere populum distinctum à reliquis gentibus, eosque Leges, & mores suos servasse, donec à *Tito*, & *Vespasiano* vastati per totum Orbem dispersi sunt; contendo attamen, Sceptrum, seu Regiam, & Supremam potestatem è tota Judaica gente fuisse sublatam tempore Herodis, qui Regnum Judææ Romanorum auctoritate invasit. At enim, tunc non solum Judæi Romanorum Imperium, ac jugum subjerunt, duramque servitutem servierunt, sed & Regem habuerunt Herodem non origine Judæum, sed Idumæum; eo itaque regnante completum est illud Jacobæum oraculum: *non auferetur Sceptrum de Juda, & Dux de femore ejus, donec veniat qui mittendus est, &c.* Quo oraculo prænunciare voluit Jacob, sublato semel è gente Judaica Sceptro, & ad alienigenam transeunte, venturum Messiam.

Hoc argumentum Judæorum jugulum petit. Inficiari si quidem non possunt, Regiam potestatem è tota gente Judaica, regnante Herode, fuisse ad peregrinum, seu alienigenam, translata, seque omnes post cladem Jerosolymitanam fuisse quo quo versum dissipatos, alienis parère cōactos legibus, nihil eorum prorsus habentes, quibus constat Regia potestas, putà jus reos morte plectendi, belli denunciandi, ac gerendi, monetam cudendi, leges ferendi. Imò, invitì licèt, nunc experiuntur, se tanquam bipedum vilissimos contemptui, & ludibrio haberi, sine Rege, sine sacrificio, exules, & in summa rerum omniū penuria vivere, adeò ut Teste *Tertulliano* Apologetici cap. 21. *Dispersi, palabundi, & Celi, & Soli sui extorres vagentur per Orbem sine homine, sine Deo Rege, quibus nec advenarum jure terram patriam saltèm vestigio salutare conceditur.* Quæro ergo nuac à Judæis, quænam tot calamitatum, quibus impræsen-

tiarum

tiarum tantum non opprimuntur, potuerit esse causa? Certè idololatriam causari non possunt, ob quam Deus interdum illos in captivitatem abduxit, nam constat, Iudæos post captivitatem Babylonicam nunquam fuisse in idololatriam prolapsos, semperque totis obstitisse viribus, ne in Dei Templum imagines quævis Deorum, hominumque inferrentur, vel illud Templum, alteri, quàm vero Deo, sacretur. Quid etiam egerint, quidvè passi fuerint Iudæi, nè *Cajus Caligula* in Templo suam imaginem poneret, aut illud suo Numini, nomine Iovis illustris, dedicaret, uberrimè exponunt *Philo de legatione ad Cajum*, & *Josephus lib. 18. Antiq. cap. 11*. Quin etiam *Cornelius Tacitus lib. 5. Historiarum* de Iudæorum ritibus loquens, hæc habet: *Judæi mente sola, unumque Numen intelligunt, summum illud, & æternum, neque mutabile, neque interitum. Igitur nulla simulachra Urbibus suis, nedum Templis sunt. Non Regibus hæc adulatio, non Caesaribus honor iussi à Cajo Casare effigiem ejus in Templo locare, arma potius sumpsere. Undè ergò, amabo, in tot mala inciderunt Iudæi, quibus à tempore passionis Christi Domini continuò vexantur? nisi quia Christum, verum Messiam, in cujus ortu impletum est Iacobi oraculum, suscipere, & agnoscere detrectarunt, & etiamdum persequentem, ut ità loquar, fugiunt veritatem, dum Prophetarum de Christi vaticinia vanis argutiis incrustare, & obscurare moluntur. Sed difficile non est futes rationes, ac sinistras interpretationes, quibus Iudæi Christianorum argumenta eludere tentant, confutare; & Iacobi vaticinium, quod præcipuè impetunt, ab eorum cavillis vindicare.*

D I L U U N T U R

Iudæorum objectiones.

Arguitur primò: Iacobi morientis vaticinium sic exprimitur in Textu Hebræo, *non recedet Sceptrum de Iuda, neque Dux de inter pedes ejus donec veniat Siloh*. Atqui *To' Siloh* ad Messiam referri minimè debet, sed potius ad Urbem *Silo*, in qua *Saul*, & *Ieroboam* Reges inaugurati sunt; adeò ut hic sit genuinus prophetiæ Iacobi sensus, non auferetur Sceptrum de Iuda, donec veniat tempus, quo vel *Saul*, vel *Ieroboamus* inungetur Rex in Urbe *Silo*. Ergo hæc Iacobi prædictio ad Messiam nullatenus pertinet.

Respondeo: Iudæos in meridie planè cæcutire, dum hoc Iacobi vaticinium ad *Sauem*, vel ad *Ieroboamum* referendum esse pervicacitèr contendunt: Nam primò, præter quàm quòd, nec *Saul*, nec *Ieroboamus* in Urbe *Silo* potestatem Regiam acceperunt (si quidem *Saul* electus est Rex in *Maspha*, confirmatus in *Galgala*, & unctus à *Samuele* in *Ramathaim Sophin*, sicut legitur lib. 1. Reg. cap. 10. *Ieroboamus* verò in *Sichem* Rex fuit consecratus, ut habetur 3. Reg. cap. 12.) præter hoc, in-

inquam, manifestum est, Sceptrum Iuda, tum temporis, necdum defecisse, cum potius post mortem Saulis in Davide emicuerit, immò, post mortem Salomonis in duabus Tribubus, usque ad captivitatem Babyloniam, perseveraverit. Secundò, antequàm regnaret Saul, Sceptrum, nondum erat in Tribu Iuda, sed in Tribu Levi, nam *Heli*, & post ipsum *Samuel* Iudæis tanquam Iudices præfuerunt. Non potuit ergo Principatus è Tribu Iuda transferri ad Saulem. Tertiò, non dixit Iacob, non auferetur Sceptrum de Iuda, donec veniat aliquis ungendus in *Silo*, sed, inquit, donec veniat ipse *Siloh*, idest, Messias, sicut Paraphrases Onkelos, & Ionathas, nec non Targum Hierosolymitanum exponunt, sic enim habet Onkelos: *usque dum veniat Messias*. Ionathas verò, & Targum Hierosolymitanum, *usque ad tempus, quo veniet Rex Messias*. Versio LXX. Interpretum non deficiet Princeps ex Iuda, & Dux de femore ejus, donec veniant quæ reposita sunt ei. Et ipse est expectatio gentium. Textus Samaritanus, non auferetur Sceptrum de Iuda, & Dux de vexillis ejus donec veniat pacificus, & ad ipsum congregabuntur populi. Denique hoc Iacobi vaticinium non de alio quàm de Messia intelligi debere fatentur ipsi Rabbini in Talmude, Tractatu *Sanhedrin* cap. 12. *Rabba* in Genesim, *Raschi*, *Salomon Jarchi*, *David Kimki*, & alii. Ex quo patet, frivolas omnium esse interpretationes recentiorum Iudæorum, quorum alii hanc Iacobi prædictionem ad Mosem, alii ad Saulem, alii ad Davidem, alii ad Ieroboamum, alii ad Nabuchodonosorem, alii ad Ahiam Silonitem, alii ad Herodem, alii ad Vespasianum referunt, quibus tamen omnibus hæc Iacobæi oraculi verba, & ipse erit expectatio gentium, nullatenus convenire possunt, sed soli Messie, seu Christo Domino.

Arguitur secundò: sensus vaticinii Iacobi non est ille, quem ipsi violentà interpretatione affingunt Christiani, videlicet, quòd in gente Iudaica permanens sit Sceptrum Regium donec veniat Messias, sed potius hic est oraculi Iacobæi sensus, quòd premendi, ac vexandi sint Iudæi, virgæque afflictionis puniendi, donec veniat Messias, à quo in pristinam libertatem sunt asserendi. Ergo ex eo Iacobi vaticinio colligi non potest, Christum esse verum Messiam, licet in ejus ortu fuerit è gente Iudaica ablatum Sceptrum, & ad alienigenam, seu Herodem, transierit. Prob. ant. In fonte, seu in Textu Hebræo, sic legitur: non recedet *Scheveth* seu *Sebet*, à Iuda, hæc autem vox *Scheveth*, non significat Regium Sceptrum, sed virgam afflictionis, quâ Iudæi cædi debent, donec veniat Messias, ergo verus sensus Iacobi vaticinii hic est, quòd Iudæi virgâ afflictionis premi, & flagellari debent, donec veniat Messias eorum liberator.

Respondeo: Hoc vaticinio Iacobi reverà prædici permanens in gente Iudaica Sceptrum Regium, donec veniat Messias, ac subinde vanam, frivolum, tortam, & impiam esse expositionem, quam adhibent Neoterici Iudæi, asserentes, per *Scheveth*, seu *Sebet*, significari virgam

afflictionis, quâ Iudæi cædi debent, donèc veniat Messias. Id ex multis momentis demonstrare proclive est. Primò, quia constat, Patriarcham Iacob, dum benedixit filio suo Iudæ, imprecare ei noluisse, nèc quidquam infausti ominari, sed potius ei aliquid faustum, ac singulare prædicere voluisse. Secundò, in hoc vaticinio Iacobzo de ea virga sermo est, quæ spectat ad Regiam, vel Ducalem dignitatem, nam habetur: *Non auferetur Sceptum de Iuda, & Dux &c.* Porro, virga, quæ ad Regiam, vel Ducalem spectat dignitatem, non est virga afflictionis, sed virga Principatus, & dominationis. Terriò, certum est, Iudæos non fuisse semper virgâ afflictionis punitos, sed potius temporibus Regum Davidis, & Salomonis. res eorum maximè floruisse. Regnum siquidem Salomonis fuit opibus abundans, ditione augustum, pacis munere fortunatum. Quartò, illa prædictio Iacobi de perpetua afflictione non stat cum eo, quod dicit item Patriarcha, videlicet manum Iudæ fore in cervicibus inimicorum suorum, nèc illa perpetuæ afflictionis virga convenit, cum voce Hebræa, *Mecbokek*, quæ non indicat tyrannum, sed Legislatorem, & Scribam, sicut fatentur periti Rabbini. Quintò, vox *Scheveth*, seu *Sebet*, ingerit non afflictionis, sed dignitatis notionem, seu significat Principatum, Imperium, Magistratum, Regiam dignitatem, sicut ex Hebræorum dictionariis, & ex quàm plurimis Scripturæ sacræ locis compertum est, immò, hanc vocem *Scheveth*, seu *Sebet*, eo in sensu non semel usurpavit Psalmista: *Reges eos in virga ferrea*. Psalm. 3: *Virga directionis, virga Regni tui*. Psalm. 44. Sextò, hanc vocem *Scheveth*, seu *Sebet*, LXX. Interpretes, qui diù antequàm Christus oriretur, sacra Biblia Hebraica Græcè reddiderunt, de regia, seu summâ auctoritate sunt interpretati. Hos secuti sunt *Theodotion*, *Aquila*, & *Symmachus*, quibus succinunt paraphrastæ Chaldæi, sic enim vertit *Onkelosus*: *Non deficiet exercens dominium*. Paraphrasis Ionathanis sic habet: *Non cessabunt Reges, & Principes*. Targum Hierosolymitanum: *Non cessabunt Reges*. Sic etiam legendum esse docent celebriores Rabbini, nimirum *R. Raschi*, *R. Rabba*, auctor libri *Bereschith*, *R. Maimonides*, *R. Bechai*, *R. David Kimki*, *R. Hirschia*, *R. Salomo Urbinas*, & alii. Undè patet, Iudæos negare non posse hanc vocem *Scheveth*, seu *Sebet*; in oraculo Iacobi sceptrum, seu regiam dignitatem significare, quin suas paraphrasas Scripturæ sacræ, quas tamen in summo pretio habent, explodant, & celebriores gentis suæ Magistros, quos tam impensè venerant, & tantum non adorant, errasse contendant. Apeant ergò nunc Iudæi, quorum tanta est impudentia, ut quascumque absurdissimas licèt interpretationes, quas ad eludenda Christianorum argumenta adducere possunt, non abhorreant; tantum nec colla veritati subdere; atque Christum, cæu verum Messiam, fateri, atque agnoscere cogantur. Digni profectò homines, qui, divino cum sint rebelles lumini, & clarissimis Prophetarum oraculis fidem habere nolint, suis plusquàm cimmeriis tenebris perpetuò

tuò obvolvuntur. Verùm, pergamus alias Iudæorum argutias proponere, atque diluere.

Arguitur tertio : Tempore, quo Iesus Christus natus est, Sceptrum è gente Iudaicâ nondùm erat ablatum, nec ad alienigenam transierat, ergo hoc Iacobi vaticinium : *Non auferetur Sceptrum de Iuda, &c.* exitum non habuit in Nativitate Christi. Prob. ant. Christus natus est in diebus Herodis Regis in Iudæa, atqui Herodes non erat alienigena, sed Iudæus genere, *Nicolaus* siquidem *Damascenus*, qui genus, & itemma Herodis apprimè noverat, illum genere Iudæum esse scripsit, nec ab eo dissentit Iosephus, qui lib. 20. Antiq. cap. 6. referens Contentionem ortam Cæsarææ Syros inter & Iudæos, ait : Iudæos, qui Cæsarææ erant, idèò Syris præponi voluisse, quòd Urbis Cæsarææ conditor Herodes, Rex, fuerit Iudæus genere : *Apud Cæsaream*, sunt verba Iosephi, *inter Iudeos habitatores, & Syros de pari jure Civitatis rixa exorta est, nam Iudæi priori conditione volebant esse, quòd Urbis hujus conditor, Herodes, Rex, fuerit Iudæus genere. Id Syri, non inficiabantur quidem, sed agebant, Urbem Turris Stratonis dictam à principio, quo tempore nullum Iudæum habitasse inibi.* His momentis Scaligerus, famosus olim Criticus, pertendit, Herodem, quo regnante in Iudæa natus est Christus Dominus, fuisse genere Iudæum. Non ergò è gente Iudaicâ ablatum fuit Sceptrum, quandò in Iudæa regnavit Herodes.

Respondeo: Me jam satis supèrque inter probandam assertionem, tam ex testimonio Iosephi, & Sanctorum Patrum, quàm ex multis aliis momentis ostendisse, Herodem, quo in Iudæa regnante, natus est Christus Dominus, alienigenam fuisse respectu Iudæorum, quaproptèr, nulla fides habenda est *Nicolaò Damasceno*, dùm, assentandi, palpandique studio ductus, finxit Herodem esse genere Iudæum, & à Iudæis oriundum, qui Babylone captivi fuerunt, immò eum è Tribu Iuda genus suum duxisse ait. Quæ fabulosa Herodis genealogia jure meritò rejicitur à Iosepho, qui asserit, Herodem non fuisse genere Iudæum, sed Idumæum; undè *Nicolaum Damascenum*, contrarium effutientem, tanquàm ignavum Herodis assentatorem perstringit. Nec sibi contradicit Iosephus, quandò refert, loco in objectione laudato, Iudæos Cæsarienses, ut jus Civitatis contra Syros sibi alciscere possent, dixisse, Herodem genere Iudæum fuisse: non in hoc, inquam, sibi contradicit Iosephus, quia id dumtaxat historicè refert, ut reverà à Iudæis Cæsariensibus dictum, illud tamen suo calculo non probat, quin potius, sicut mox diximus, invehitur in *Nicolaum Damascenum*, qui, ut Herodi palpum obtruderet, eum genere Iudæum fuisse commentus est. Cæterùm, quamvis Herodes non fuerit genere Iudæus, negari tamen haud potest, illum fuisse religionis professione Iudæum. Erat quippè Idumæus; Idumæi autem, ex quo *Ioannes Hircanus*, Iudæorum Pontifex, atque Rex, ipsos edomuit, circumcissione acceptà ad Iudæos aggregati sunt, quamvis nihilominus diversos ritus, & In-

stituta habuerint . Hinc *Idumæi* in Scriptura sacra alienigenæ respectu Iudæorum appellantur, in *Idumæam* extendam calceamentum meum, *mibi alienigenæ amici facti sunt* . Addo etiam, Herodem non fuisse genere Iudæum, quia ejus mater, dicta *Cypros*, oriunda erat ex Arabia, ut fatentur omnes Historici, ac subinde non origine Iudæa erat, sed Ethnicorum Religioni addicta. Cum igitur juxta leges tam Hebræorum, quam Romanorum, & aliarum Nationum, *partus ventrem sequatur*, planum est, Herodem non potuisse esse genere Israëlitam, seu Iudæum. Sed quorsum, dicet fortasse aliquis, ritus, ac leges *Idumæorum* Iudæis non imposuit Herodes, si esset ipsemet Idumæus? Huic quæstioni facile fit satisfactio, dicendo, Herodem, licet genere Idumæum, id tamen non ausum, esse tentare, tùm quia probè sciebat, Iudæos Legi, ac ritibus suis addictos, quidvis potius toleraturos, quàm eorum immutationem. Uadè, ne intempestivâ rituum mutatione, eorum animos, jam satis commotos, exasperaret, in Iudaicis ritibus nihil immutandum esse duxit. Tùm quia etiam Herodes, utpotè vir politicus, fortunæ tantum, ac temporì serviens, de religione parùm admodum curabat, undè quamvis genere esset Idumæus, Iudaico tamen more semper vixit, ut constat ex Dicto Imperatoris Augusti, quod refert *Macrobius* lib. 2. *Saturn.* cap. 4. *Meliùs est porcum Herodis esse, quàm filium*, eò quippè Dicto insinuat, Herodem Mosaicæ Legis ritus observasse, & à porcis, aliisque id genus animalibus à Lege prohibitis, abstinuisse. Consulat Lector opusculum, quod *Serarius* edidit de *Herode*. Legat etiam eruditum librum, à Cl. Viro D. Ferrando, in supremo Parisiensi Senatu Causidico, Gallicè editum, cui titulus est: *Reflexions sur la Religion Chretienne*, sed præsertim Tomum I. qui complectitur Doctissimam Explanationem Prophetiarum *Iacobi*, & *Danielis* de adventu Messie .

Arguitur quartò: Tamdiù Sceptrum Regium permanfit in gente Iudaica, quamdiù penès eam fuit jus vitæ, & necis, atqui penès gentem Iudaicam fuit jus vitæ, & necis, etiam post passionem Christi Domini, ergo è gente Iudaica non fuit ablaturum sceptrum tempore Nativitatis Christi. Prob. min. Pilatus compellens Iudæos, *Matth.* cap. 27. ait: *Habetis custodiam, ite, custodite sicut scitis*. Dùmque eum instigare Iudæi, ut Iesum in crucem ageret, respondit: *Accipite eum vos, & secundum Legem vestram judicate eum*. *Ioannis* cap. 18: Præterea, Iudæi, post passionem Christi, potestatem judicariam exercuerunt in *Stephanum*, quem lapidibus obruerunt, sæpiùs etiam Apostolos in vincula coniecerunt. Denique, Paulus, qui tùm temporis appellabatur *Saulus*, cum mandatis Principum Sacerdotum profectus dicitur *Damascum*, ut si, quos nactus fuisset Iudæos Christianis adhærentes, victos perduceret Hierosolymam. Quæ omnia apertè probant, Iudæos, etiam post passionem Christi, exercuisse judicariam potestatem, & habuisse jus vitæ, & necis.

Respondeo: Hanc potestatem judicariam, quam Iudæi post natum Chri-

Christum exercuerunt, non fuisse supremam, sed umbratilem, precariam, & fiduciariam, quam videlicet Romani, Iudææ Procuratores, ipsis Iudæis indulgebant, ut eis omnem tumultuandi occasionem adimerent, vel hanc potestatem judicariam fuisse à Iudæis usurpatam insciis Procuratoribus Romanis: Hæc responsio triplici momento confirmari potest. Primo, quia constat, ejecto Archelao, qui, post obitum patris sui, Ethnarchæ Iudææ titulum ab Imper. Augusto obtinuit, Iudæam fuisse à Romanis in Provinciam redactam, summamque illius administrandæ auctoritatem fuisse penes Procuratores, qui Romam mittebantur. Testatur enim Iosephus lib. 18. Antiq. cap. 1. & lib. 2. de Bello Judaico cap. 22. *Coponium*, qui primus, post abdicatum Archelaum, in Iudæam à Romanis missus est, jus habuisse vitæ, & necis, *missus est*, inquit Iosephus, *Coponius, Eques Romanus, in Iudæam cum potestate occidendi*. Secundo, legimus in Evangelio Ioannis cap. 18. quòd, postquam Pilatus Iudæis, Christum ad mortem postulantibus, dixisset: *Accipite eum vos, & secundum Legem vestram iudicate eum*, incunctanter ei responderunt Iudæi: *Nobis non licet interficere quemquam*. Tertiò, Iosephus lib. 20. Antiq. cap. 8. refert, quòd postquam junior *Ananus*, Summus Pontifex, mortuo *Festo*, Iudææ Præsides, & *Albino*, ejus successore, adhuc agente in itinere, Synedrium advocasset, & fratrem Iesu Christi, Iacobum nomine, & unà quosdam, alios reos impietatis peractos, lapidandos tradidisset, quidam Iudæi Albino occurrentes venienti ab Alexandria, docuerunt eum, non licuisse Anano Synedrium sine ipsius consensu advocare, quorum verbis ille persuasus scripsit Pontifici, daturum sibi pœnas minitans. Ex quo Iosephi loco colligitur, Synedrium à Summis Iudæorum Pontificibus convocari, haud potuisse absque consensu eorum, qui ad procurandam Iudæam à Romanis mittebantur. Quod spectat lapidationem S. Stephani, dico: hanc lapidationem non per judicariam potestatem, & secundum solemnes juris formas statutam fuisse, sed potius tumultuario impetu à Iudæis factam esse, sicut narrat S. Lucas cap. 7. v. 57. Actuum Apostolorum, ubi hæc habet: & exclamantes, seu Iudæi, voce magnâ continuerunt aures suas, & impetum fecerunt unanimiter in eum (idest, in Stephanum) & ejicientes eum extra Civitatem lapidabant. Quæ verba aperte innuunt, lapidationem Stephani non potestate judiciaria, sed præcipiti, & tumultuario Iudæorum impetu factam fuisse. Addo etiam, fateri ipsosmet Iudæos in Talmude, Tractatu Sanhedrin cap. 5. quadraginta annis ante everisionem, seu devastationem Templi, iudicium animarum, ut loquuntur, seu potestatem judicandi in Causis criminalibus Synedrio fuisse ablatam, porro, Templum eversum est anno Æræ Christianæ septuagesimo. Undè manifestum est Iudæos, nato semel Christo Domino, supremam potestate judicandi fuisse exutos, nec aliam nisi umbratilem, & precariam exercere potuisse.

Arguitur quintò: Rabbi Benjamin Tudelensis, qui tempore Alexan-

dri

dri III. Summi Pontificis, & Friderici Ænobarbi, Imperatoris, varias Orbis Regionem perlustravit, in sui Itinerarii historia asserit, se propriis inspexisse oculis in Urbe Bagdad, maxima & amplissima Civitate, multa millia Israelitarum, ubertate rerum omnium affluentium, amœnissimæ loca incolentium, & ab omni reliquorum hominum societate, & aditu seclutorum propter vastissimas solitudines interjectas, atque etiam, ibi sedem habere quendam Æmalotarcham, seu Principem, è Tribu Juda oriundum, & in Asia Judaicum Imperium tenentem, cujus dignitatem perpetuâ successionem ad Messiam usque duraturam scribit. Ergo etiam nunc perseverat in gente Judaica Regia, seu suprema potestas.

Respondeo: Hanc de Asiatico Judæorum Imperio, & de Æmalotarcha narrationem, puram putamque fabulam esse vel ad Judæorum, qui, ut omnes norunt, chymæris, & commentis pascuntur, miserum solatium excogitatam, vel ad Christianorum facilius eludenda argumenta à Rabbiniis confarcatam. Quod quidem multis momentis evinci potest. Primò, quia post Hierosolymorum expugnationem permixtæ adeò sunt Tribus, ac promiscuè confusæ familiæ, ut earum origines, aut genealogiæ ne levi quidem suspitione internosci possint. Secundò, constat, Judæos à tempore Nativitatis Christi jus Sceptri, ditionemve ullam, aut Imperium nusquam gentium obtinere, immò quicumque Orientem peregrinationibus lustrarunt, & longinquarum, quas complectitur, Regionum accuratam notitiam tradiderunt, inter aniles fabulas reponunt ea, quæ Judæi de Israelitarum in Oriente amplissimo Senatu, gloria, dominio, & Regno splendide mentiuntur. Legi potest super hac re Buxtorfius in Præfat. ad librum *Cofri*, in qua fabulosas refert quorundam Rabbiorum epistolas de gloria, potentia, & fictitio Judæorum Regno, dicto *Cozar*, ex quibus, quàm fecundum sit Judæorum in commentis fingendis ingenium, quilibet facile intelligere potest. Tertiò, Judæi tempore passionis Christi publicè protestati sunt, se nullum habere Regem, nisi Cæsarem. Quartò, fatetur ipsemet Rabbi Benjamin Tudelensis, Æmalotarcham illum, seu Principem, à Mahumedanorum Calipha potestatem per sigilli traditionem accipere solitum esse. Non ergo proprium, & absolutum, sed precarium, ac fiduciarium est illius dominium. Denique, præcipui Rabbini hujus Judaici Imperii Asiatici nullatenus meminerunt, immò potius ingenuè fassi sunt, Regiam potestatem è gente Judaica penitus defecisse. David siquidem *Kimchi*, cujus auctoritas maximi ponderis est apud Judæos, explicans caput 3. *Oseæ*, ubi dicitur, quòd dies multos sedebunt filii Israel sine Rege, sine Principe, sine sacrificio, sine Altari, sine Ephod, & sine Theraphim. Hæc habet: *Hi sunt dies exilii, in quo hodiè sumus, nec Regem, nec Principem ex Israele habemus; sed in potestate Gentilium sumus, & in potestate Regum ipsorum, & Principum ipsorum.* Abrahaniel, alter Judæorum doctissimus Rabbini, exponens verbum octavum cap. 33. *Isaiæ*, ait: *Præterea meminit Isaias ter-*

iii generis malorum, exilii nempè, quod pendens Israelitas non sit Regnum, nec dominium, nec Sceptrum judiciale. His duobus Rabbinis assentiuntur Rabbi Bechai, Rabbi David Ganz, & Rabbi Manasses, ut videre est apud Illustriss. Episcopum Abrincensem Danielelem Huetium, Propositio-
ne 9. Demonstrationis Evangel. quam Lector adire potest, si plura hoc de argumento nosse desideret.

Arguitur sexto: Hoc Jacobzrum oraculum: *Non auferetur Sceptrum de Juda, & Dux de femore ejus, donec veniat, qui mittendus est, ad solam Tribum Juda restringi debet, cum exclusione Leviticæ, Beniamiti-
cæ, & aliarum Tribuum, ita ut illius Jacobzi oraculi hic sensus sit: Non auferetur Sceptrum de Tribu Juda, & Dux de femore ejus, donec veniat, qui mittendus est.* Atqui Sceptrum ablatum est à Tribu Juda multo tem-
pore antequàm Christus nasceretur, ergò illud Jacobi vaticinium in Nativitate Christi non fuit completum. Major videtur certa, nam Patriarcha Jacob filium suum Iudam alloquebatur, eique benedictionem imper-
tiebatur, dùm hæc vaticinatus est, quòd sit ut ad aliam Tribum prædictum vaticinium pertinere non possit. Probatur itaque minor. Tempore capti-
vitatibus Babylonicæ Sceptrum è Tribu Juda ablatum est in Techonia, & Sedecia; post solutam verò captivitatem Babylonicam, Aristocratiz for-
mam assumpsit Iudzorum Respublica, ita ut Iudæi nunquàm ampliùs Regiam, & absolutam imperandi formam obtinuerint. Nam primùm
Persarum Monarchis subditi fuerunt. Deindè, postquàm Alexander Magnus, Macedo, Dario Codomanno, & Persarum simul Imperio dele-
to, omnem hujus gloriam ad Græcos transfudit, Iudæi Græcis paruerunt,
seu Asiæ minoris, & Egypti Regibus, donec à Romanis devicti tan-
dèm Iudæi sub jugum missi sunt. Atqui per totum illud temporis inter-
vallum, quod à captivitate Babylonica fluxit usque ad Christum, nullos
Duces habuerunt Iudæi è Tribu Juda oriundos, sed summâ rerum potiti
sunt Pontifices, quæ potestas per Assamonæos in ordine Sacerdotali fir-
mata est usque ad tempus Herodis, qui, devictò Antigono, genus As-
samonæorum extinxit, & Regnum Iudææ à Senatu Romano obtinuit. Pa-
ter igitur, quingentis, & ampliùs annis ante Christum, hoc est, à tempo-
re captivitatis Babylonicæ fuisse ablatum Sceptrum à Tribu Juda, ac
proindè hoc Jacobi vaticinium in Nativitate Christi non fuisse com-
pletum.

Antequàm huic argumento faciam satis, non abs re erit observare, esse quidam Theologos, qui Jacobi vaticinium non de tota gente Iudæica, sed de sola Tribu Juda exponendum esse docent, variasque respon-
siones ad diluendum illud argumentum adhibere solent.

Primò respondent, illos Pontifices, qui post reditum captivitatis
Babylonicæ usque ad Herodem Reipublicæ Iudæicæ præfuerunt, inisse
Matrimonia cum filiabus ortis è Tribu Juda, ac subindè Sceptrum sem-
per hoc pacto permanisse in Tribu Juda, quia hi Pontifices, licet pater-

no genere essent oriundi ex Tribu Levi, materno tamen genere ex Tribu Iuda originem ducebant.

Secundò: Respondent fuisse apud Iudæos Synedrium, seu Senatum, vel Collegium LXX. Virum, qui ex Tribu Iuda selecti erant. Hoc autem Synedrium, quod apud Iudæos supremâ pollebat auctoritate, extitisse volunt usque ad Herodem, & in eo sensu Sceptrum, seu supremam potestatem semper fuisse penès Tribum Iuda.

Tertiò: Respondent Sceptrum usque ad adventum Christi permanisse in Tribu Iuda, non quidem eo sensu, quòd sēper actu fuerit penès Duces ortos è Tribu Iuda, sed quòd illa Tribus, ex quo Sceptrum obtinuit, nusquàm exciderit jure, quod in illud habebat, hoc est, quamvis Tribus Iuda aliquandò Regni usumfructum non habuerit, illius tamen proprietatem non amiserit; sicut, exempli gratiâ, dici potest, non ablatum fuisse Angliæ Sceptrum à Stuartorum gente, postquam in eam semel concessit, quamvis Iacobus III. Rex Angliæ, patriâ, Regnoque depulsus vivat, quia videlicet nunc quoque jus ad Regnum, & Regni proprietatem habet, etsi actu illo non potiatur.

Denique, respondent, quòd, quamvis Tribus Iuda Sceptrum amiserit, quandò, extincto Sedecia, ultimo Davidici sanguinis Rege, gens Iudæorum captiva ducta est Babylonem, vaticinium tamen Iacob reverà fuit impletum, quia, inquit, Iacob non prædixit filio suo Iudæ, quod ab eo, ejusque Tribu nunquàm recederet Sceptrum, sed tantum prædixit, quòd à Iuda, ejusque Tribu non recederet Sceptrum in perpetuum. Quod verè impletum est, nam etsi Tribus Iuda, mortuo Sedecia, Sceptrum amiserit, illud tamen non in perpetuum amisit, quia illud recuperavit in Christo, qui ex sanguine, seu ex Tribu Iuda, satus fuit.

Verum, ut cordatè fatear, quatuor istæ Theologorum responsiones ad solvendam propositam difficultatem parùm solidæ esse videntur, nec ullo pacto mihi probari possunt.

Prima responsio non placet, quia, præterquàm quòd illi Theologi gratis, & citra ullam Scripturæ, aut Sanctorum Patrum auctoritatem, affirmant, Pontificum uxores fuisse de Tribu Iuda, certum est, istam uxorum successionem, si qua fuisset, sufficere nequaquàm potuisse ad continuationem Sceptri in familia David, & in Tribu Iuda, quia familia matris apud Iudæos non vocatur familia. Addo etiam, quòd si Pontifices materno genere fuissent oriundi ex Tribu Iuda, paterno verò genere ex Tribu Levi, Maria itidè, quæ Christum genuit, paterno quidè genere fuisset orta ex Tribu Iuda, materno verò ex Tribu Levi, ac subindè Christus in utraque Tribu Iuda scilicet, & Levi censeri deberet, possetque dici Sacerdos ex Tribu Levi, idest, secundum ordinem Aaronis, quod tamen negat Apostolus cap. 7. Epist. ad Hebræos.

Altera responsio præcedenti nihilo solidior est. Nam in primis incertum est, an illud Synedrium perseveraverit usque ad Herodem,

Dein.

Deinde, gratis supponunt illi Theologi, Synedrium conflatum fuisse, dumtaxat ex viris selectis ex Tribu Juda. Id quippe alienum esse videtur à consuetudine Judæorum, quibus solemne semper fuit, ut quoties ad Reipublicæ pertractanda negotia certus aliquis virorum prudentum diligendus esset numerus, ii ex omnibus Tribubus indiscriminatim seligerentur, qui jus singulis Tribubus dicturi essent. Unde Exodi cap. 18. Moses, prudenti foci sui consilio, constituit Judices ex singulis Tribubus electos; & in lib. Numerorum legimus, septuaginta viros, quos Moses elegit, de senibus Israel, non autem de senibus tantum Tribus Juda electos fuisse. Denique, unde, amabo, habent illi Theologi Regiam auctoritatem, seu supremam potestatem in rebus politicis, & Judæorum negotiis pertractandis penes Synedrium fuisse? nullum siquidem hujusce rei suppetit argumentum, vel minimum in Scriptura sacra vestigium, immò potius constat, summam rerum apud Judæos fuisse ante captivitatem Babylonicam penes Reges, post verò reditum ex captivitate Babylonica fuisse penes Pontifices. Certè *Alexander Magnus*, cum Tyrum oppugnaret, non ad Ducem aliquem, sed ad Pontificem Judæorum litteras scripsit, & ab eo petiit comitatum, & alia, quæ Dario prius pendebantur, eique Hierosolymam ingredienti non Dux aliquis, sed *Iadus* Pontifex occurrit, sicut narrat Iosephus lib. 11. Antiq. cap. 8. quod sanè argumento est, post captivitatem Babylonicam summam rerum potius fuisse Judæorum Pontifices.

Tertia responsio parum etiam probabilitatis habet. Primò, quia si hæc vox, *Sceptrum*, de solo jure ad Sceptrum semel explicetur, quemadmodum placet illis Theologis, infringitur robur demonstrationis, quam ex eo oraculo Iacobico petitam Christiani Iudæi proponunt ad probandum Christum esse verum Messiam Lege promissum. Siquidem pertinaces Iudæi facili negotio respondere poterunt, Sceptrum sensu, quo sumitur, necdum recessisse à Tribu Juda; seu dictitare poterunt, Tribum Iudæam etiamnum jure potiri ad Sceptrum, ac subinde nondum esse completum Iacobi oraculum. Secundò, poterunt regerere Iudæi, hoc Iacobi oraculum non fuisse saltem completum in nativitate Christi, seu eo tempore, quo Herodes in Iudæa regnabat, nam cum Herodis tempore distinctio Tribuum, & familiarum adhuc apud Iudæos accuratè servaretur, Tribus Iudæa jus habebat ad Sceptrum, quod Herodes alienigena usurpaverat, spemque habebat illud aliquandò recuperandi.

Postrema responsio admitti non debet, quia vim apertè facit verbis Patriarchæ Iacobi, qui nullam in Iudæa Sceptri interruptionem prædicit, sed potius vaticinatur perpetuam in Iudæa fore Sceptri continuationem, donec veniat Messias. Quapropter, rejectis illis responsionibus Theologorum, qui hoc Iacobi vaticinium de sola Tribu Iudæa exponunt, superest, ut proposito argumento faciam satis.

Respondeo itaque, hoc Iacobi vaticinium: *Non aufergetur Sceptrum*
Tom. I. O o de

de Iuda &c. de tota gente Iudæorum, non verò de sola Tribu Iuda esse intelligendum. Sic primò, censent Sancti Patres, *Iustinus* Martyr in dialogo cum Tryphone, *Athanasius* lib. de Incarn. *Ensebius* lib. 8. Demonstr. Evang. *Chrysostomus* homilia 77. in Genesim, *Ambrosius* lib. de benedictionibus Patriarcharum cap. 4. *Augustinus* lib. 18. de Civitate Dei cap. 45. *Theodoretus* quest. 110. in Genesim, aliique Sancti Patres, & Scriptores Ecclesiastici, adè ut vix nullum inter veteres, præter Sanctum *Cyrillum Alexandrinum*, reperire sit, qui hanc sententiam suo calculo non probaverit. Secundo, compertum habemus ex Scriptura sacra, à Iacobi morientis edito vaticinio usque ad Christum, plures extitisse gentis Iudaicæ Duces, ac Principes, qui ex Tribu Iuda non fuerunt oriundi. *Moses* namque, & *Iosue*, qui post egressionem ex Ægypto populo Iudaico præfuerunt, ex Tribu Iuda originem non ducebant, sed *Moses* erat de Tribu Levi, *Iosue* verò de Tribu Ephraim. Inter Iudices postea, qui apud Iudæos summâ potestate præditi erant, duo tantum, fuere ex Tribu Iuda prognati, videlicet *Othoniel*, & *Abesai*. Et post captivitatem Babylonicam supremum dominium fuit penès Pontifices, qui ex Tribu Levi suum genus ducebant. Quapropter, ut huic vaticinio Iacobæo, de non auferendo Sceptro à Iuda, veritas constet, necessum est, ut de tota Iudæorum gente, & non de sola Tribu Iuda exponatur. Tertiò, si hoc Iacobi vaticinium: *Non auferetur Sceptrum de Iuda &c.* de sola Tribu Iuda, & non de tota gente Iudaica esset exponendum, sequeretur, Assamonæos, seu Machabæos, qui non erant de Tribu Iuda, sed de Tribu Levi, non fuisse legitimos Reges, aut Duces Iudæorum, sed potius tyrannos, quippè qui usurpassent Sceptrum, & supremum dominium, quod soli Tribui Iudæ erat assertum. Probabilius igitur est hoc Iacobi vaticinium esse de tota gente Iudaica, & non de sola Tribu Iuda, exponendum.

Hac autem semel admissâ sententiâ, proclive est ostendere, hoc Iacobi oraculum in ortu Christi fuisse completum. Nam Iudæi ad Herodem usque semper habuerunt ex gente sua, seu ex genere suo, & ex aliqua Tribu, Reges, Duces, aut Principes. Regia siquidem potestas permansit in Tribu Iuda, & in familia Davidica usque ad captivitatem Babylonicam; à tempore autem captivitatis Iudæi habuerunt Duces ex genere itidem suo, seu Principes exercitus, qui ipsis reducibus, & proprio solo, laxatâ captivitate, restitutis præfuerunt. His Ducibus successerunt Pontifices, & Assamonæi, seu Machabæi, qui ex genere Iudæorum erant, & quibus incumbere totius Reipublicæ Iudaicæ cura. Denique, hanc supremam Reipublicæ Iudaicæ administrandæ potestatem conservarunt Assamonæi, donec Herodes, genere Idumæus, devicto Antigono, ultimo Assamonæorum Principe, Regnum Iudææ à Romanis obtinuit. Quo tempore, cum Iudææ Regnum ad Herodem alienigenam transierit, advenit Messias juxta Iacobi vaticinium.

Unum

Unum tamen est, ne quid dissimulem, quod adversus nostram Jacobæi vaticinii expositionem opponi potest. Nam si hoc vaticinium, *Iacob non auferetur Sceptrum Juda, &c.* de tota gente Iudaica, & non de sola Tribu Iuda est exponendum, nihil ergo, dicet fortasse aliquis, peculiare prædixit Patriarcha Iacob de filio suo Iuda, dum ei, antequam moreretur, suam benedictionem largitus est. Et tamen legimus in Scriptura sacra, Patriarcham Iacob morti proximum convocatis filiis suis, singulis viritim, speciatim, ac distinctè benedixisse, atque prædixisse ea, quæ ipsis, eorumque posteritati olim obventura erant. Verùm, hæc difficultas solvitur dicendo, hanc benedictionem, seu prædictionem Iacob morientis, *non auferetur Sceptrum de Iuda, &c.* sic toti Iudæorum genti, idest, omnibus Tribubus esse communem, ut tamen ipsi Iudæ peculiariùs accommodari debeat, ejusque Tribum magis quam cæteras alias respiciat. Primò, in eo quod soli filii Iudæ à Davide usque ad captivitatem Babylonicam, hoc est, per annos circitèr quingentos Regnum obtinuerint, idque sub Davide, & Salomone florentissimum. Secundò, in eo quod, post captivitatem Babylonicam, cum ad aliam Tribum suprema potestas transire cœpit, nihilominus universus populus Israeliticus à *Iuda* nomen sortitus sit, tumque primùm Israelitæ cœperunt cognominari *Iudei*. Tertio, in eo quod eodem tempore, quo suprema potestas penès Assamonæos, aliosve Sacerdotes futura erat, Regio tamen ipsa, quæ Imperium, seu Regnum continebatur, tota, aut maxima ex parte ad sortem Tribus Iuda pertinere debebat. Quartò, in eo quod Tribus Iuda sive in castris ponendis, sive in ordine offerentium, sive in divisione Terræ Chanaan, cæteris Tribubus præstantiâ quâdam & excellentiâ singulari præire debebat. Quintò denique, in eo quod Christus verus Messias ex stirpe Iuda proditurus erat. Quaproptèr, licèt, hoc Iacobi vaticinium omnibus Tribubus commune sit, peculiari tamen ratione Tribui Iudæ, proptèr rationes mox adductas, accommodari debet. Consulat Lector *Eusebium* lib.8. *Demonst. Evang.* ubi hanc difficultatem perdoctè versat, & dilucidè explanat.

Arguitur septimò: Messias, juxtà vaticinium Iacob, venturus est eo ipso tempore, quo Sceptrum à Iuda, seu à tota gente Iudaica auferetur. Atqui Christus natus non est eo ipso tempore, quo Sceptrum à Iuda, seu à tota gente Iudaica est ablatum; ergo Christus non est Messias, quem venturum prædixit Patriarcha Iacob. Prob. minor: Sceptrum ablatum est à Iuda, seu à tota gente Iudaica, statim ac Herodes, qui fuit alienigena, regnare cœpit in Iudæa. Atqui Christus non est natus statim ac Herodes regnare cœpit in Iudæa, sed solùm anno trigesimo sexto Regni Herodis, sicut in superiori Dissertatione ostensum est; ergo Christus non est Messias, quem venturum prædixit Patriarcha Iacob.

Respondeo: Hoc Iacobi vaticinium: *Non auferetur Sceptrum de Iuda, donec veniat, qui mittendus est, &c.* non designare aliquod mo-

mentum indivisibile, in quo Messias, ablato à Iuda, & gente Iudaica, Sceptro, statim proditurus esset, sed aliquam temporis admittere latitudinem, adeò ut sensus sit: venturum Messiam, quandò Sceptrum à Iuda, idest, à gente Iudaica esset ablatum. Cùm igitur Christus natus sit regnante in Iudæa Herode, qui, utpotè alienigena, Sceptrum à gente Iudaica primus removit, verè dici potest, hoc Iacobi vaticinium in Christi ortu exitum habuisse. Addo etiam, quòd cùm ablatio Sceptri à gente Iudaica signum esse deberet dignoscendi adventum Messie, conveniens erat, ut hæc Sceptri ablatio paululùm anteverteret Nativitatem Christi, ut indè faciliùs intelligerent Iudæi, complementum huiusce vaticinii Iacobæi, tempusque à Deo destinatum Natali Messie, jam advenisse.

Arguitur ultimò: Si hoc Iacobæum vaticinium fuisset in Christo impletum, omni procul dubio Christus, Apostoli, & Evangelistæ illud aliquando adduxissent, quòd maiorem dictis suis fidem conciliare possent. Atqui nec Christus, nec Apostoli, nec Evangelistæ illud Iacobæum vaticinium, unquam adduxerunt; argumento itaque est præfatum Iacobæum oraculum in Christo non fuisse completum.

Respondeo: Neque Christo Domino, neque Apostolis, neque sacerdotibus Scriptoribus propositum unquam fuisse, singula Prophetarum recensere oracula; alioquin si Prophetarum vaticiniis, quæ in Christo exitum habuerunt, pugnare voluissent, totum vetus Testamentum in medium proferre debuissent. Id autem minimè erat necessarium, sed abundè sufficiebat, ut Christus Iudæos remitteret ad vetus Testamentum, quod ad Messiam spectare non inficiabantur. Porro constat, id à Christo sæpius factitatum fuisse, dicendo Iudæis: *Scrutamini Scripturas, & ille sunt, quæ testimonium perhibent de me . . . si enim crederetis Moysi, crederetis forsitan & mihi: de me enim ille scripsit. Si autem illius litteris non creditis, quomodo verbis meis credetis?* Joannis cap. 5. & rursum Luc. cap. 16. *Habent Moysen, & Prophetas, audiant illos.* Si igitur Iudæi monenti Christo obtemperassent, & Moysen, atque Prophetarum oracula, eà, quæ par erat, spiritus humilitate, & fuis ad Deum precibus lectitassent, confestim intellexissent, hoc Iacobi vaticinium fuisse in Christo completum. Sed illi superbiâ tumidi, odio & invidiâ flagrantibus, prophetias perperam interpretabantur, Christum docentem aut aspernabantur, aut malignè auscultabant, aut seditiosè interrogabant, ut eum caperent in sermone. Unde non mirum, si divino lumine non fuerint illustrati, & nunc, tanquam cæci in meridie palpantes, sacrarum Scriptorum sensum non assequantur.

PARAGRAPHUS SECUNDUS,

In quo ex circumstantiis Nativitatis Christi probatur ipsum esse verum Messiam, Prophetarum Oraculis prædictum.

Quales fuerint circumstantiæ Nativitatis Christi, Servatoris nostri, breviter hic tam ex Historia Evangelica, quam ex perpetua Ecclesiæ traditione perstringere necessarium est, ut deinde facilius ex his circumstantiis adversus Iudæos probemus, Christum esse Messiam, Prophetarum vaticiniis prædictum.

Refert autem sacer Textus, quod Beatissima Virgo, propediem paritura, & castissimus ejus Sponsus Ioseph Bethleem venerunt, ut morem gereret Imperatori Augusto, qui, summâ pace terrarum Orbe composito, jussit Edicto promulgato describi quidquid in eo erat suæ ditio-
ni subjectum, ut in sua quisque Civitate, unde originem duceret, & progenitores haberet, nomen daret publicis tabulis recensendum; cum-
que castissimi Conjuges Bethleemum pervenissent, ibique ob confertam multitudinem hospitem, & peregrinorum, qui Bethleemum ad profi-
tendum appulerant, nullum in hospitii cubiculis locum nacti fuissent, secesserunt in eam hospitii partem, quâ jumenta excipiebantur. Hunc locum appellat S. Hieronymus Epist. 17. & 18. *Parvum terræ foramen.* Sic enim scribit ad Marcellam. *Eccè in hoc parvo terræ foramine Celorum conditor natus est: Hic pannis involutus, hic visus à Pastoribus, hic demonstratus à Stella, hic adoratus à Magis &c.* Beda lib. de loc. sanct. cap. 8. ait esse *Semiantrum*. Nicephorus lib. 1. Hist. Eccl. cap. 12. *Tugurium humile.* Alii denique probabilius speluncam esse putant. Observat quippe ex Strabone *Casabonius* Exercit. 2. in Baronium, totam regionem circa Hierosolimam usque ad sexagesimum lapidem esse petrosam, atque in illo tractu multas fuisse domos saxi inclusas, vel potius cellas, in quibus homines religionis ergò se se includerent. Cæterum, an spelunca, in quam se receperunt Maria, & Ioseph, fuerit in Bethleemo sita, vel in ejus suburbiis, seu propè Bethleemum? Alii affirmant, alii negant; id, quia incertum est, in medio relinquo. Ut ut sit, in hoc humili loco natus est Christus, Mundi Salvator, exacto à conceptione nonimestri spatio, media hyeme, die 25. mensis Decembris, sub frigidam mediæ noctis auram. Qua in re observet Lector, & expendat illas Nativitatis Christi circumstantias, quæ apertè demonstrant admirabilem Dei in Filii sui Nativitate providentiam. Nam primò, statuerat Deus, immò per Prophetam Michæam prædixerat, egressurum Messiam ex Bethleem, ut autem id fiat, indicitur ab Imperatore Augusto descriptio totius Orbis, publicatur in Iudæa, Maria virgo, ut obediat Imperatoris Edicto, è Nazareth in Bethleem, adverso licet anni sydere, venit, partus urget, & in

in Bethleem virgo Christum enititur, quem domi, seu Nazareth, parere constituerat. Secundò, Christus in hyeme, & sub obscuræ noctis silentium nascitur, ut omnes mortales, qui vitiis & erroribus impliciti per inextricabiles tenebras jamdudum oberrabant, intelligerent Christum esse verum Messiam, qui humanorum pectorum, in quibus refrigerat charitas, glaciem solvere, flammam in his Divini amoris accendere, & tenebrarum caliginem, quâ obductus erat totus, quâ latè patet, mundus, dissipare debebat. Unde ait Isaias cap. 9. *Populus, qui ambulabat in tenebris, vidit lucem magnam, habitantibus in regione umbræ mortis lux orta est eis.* Eâ ratione permoti Sacræ Scripturæ Interpretes fermè omnes, in eam sententiam conspirant, ut Iesus Christus mediâ nocte prodierit in lucem, idque partim ex Ecclesiæ traditione, quæ idcirco eam noctis partem anniversariis precibus ac vigiliis celebrat jam à primis Ecclesiæ sæculis, ut ostendit *Albinus Flaccus* Cap. 1. *De Divinis Officiis*, partim ex Vaticinio, quod legitur cap. 18. libri Sapientiæ: *Cum quietum silentium contineret omnia, & nox in suo cursu medium iter haberet. Omnipotens sermo tuus, domine, exiliens de Cælo d' regatibus sedibus, durus debellator in mediam exterminii terram profiliavit.* Quod de Divini Verbi, facti hominis, Natiuitate dictum plerique Sancti Patres interpretantur.

Scio, Iosephum Scäligerum, Sethum Calvisium, Samuelem Basnagium, & alios Novatores negare, Christum natum esse in hyeme, seu 25. mensis Decembris; dicunt enim, hanc tempestatem asperiores fuisse, quàm ut Pastores sub dio, & intempestâ nocte excubias in agris agere, & pecudes, quæ caulis clausæ tum temporis latere solent, custodire possent. Constat autem ex Luc. cap. 2. Pastores, quandò natus est Christus, in agris vigilasse & custodiisse vigilias noctis super gregem suum; ex quo inferunt prædicti Novatores: Christum vel menfè Septembri, vel menfè Aprili natum esse. Verùm, hanc conjecturam futilem esse ex eo maximè patet, quòd Iudæa est Regio temperatissima, quæ hyemis asperitatibus non est obnoxia. Quaproptèr, si in Anglia, sicut testantur *Casaubonus* Exercit. 2. ad annum 1. Christi, & *Montacutius* in lib. de Vita Christi pag. 48. armenta toto anno in agro pernoctare solent, & si in Dania, ut asserit *Langius* ex ea Regione oriundus lib. 2. de Annis Christi part. 2. cap. 2. oves totâ hyeme in agris degunt; nemini sanè mirum videri debet, quòd in Iudæa, Regione admodum temperatâ, eadem vigeat consuetudo. Hinc etiam solvitur alia conjectura, quâ nituntur isti Novatores, dum dicunt, Christum natum esse eo tempore, quo Census, indictus ab Imperatore Augusto, agi commodè potuit, & quo itidem Iudæi potuerunt ascendere in loca sibi assignata, quale non est tempus hybernium. Hæc, inquam, conjectura ex his, quæ mox diximus, abundè soluta manet. Nam cum Regio, quam incolebant Iudæi, fuerit temperata, facili negotio potuerunt Iudæi, aut saltem absque ullo gravi

gravi incommodo, sub tempus hybernium iter peragere, maximè cum menses November & December in multis tractibus Europæis satis & amœni sint & temperati. Præterquàm quòd dici etiam posset, Judæam totam exiguis finibus fuisse circumscriptam, adeoque non longinquo itinere opus fuisse Judæis, ut Imperatoris obedirent mandato. Christus ergo, juxta perpetuam Ecclesiæ traditionem, natus est die 25. mensis Decembris, non verò sub finem mensis Septembris, ut visum est Scaligero, & Calvisio: nec mense Aprili, ut putat Nisbetus; nec die sexta Januarii, sicut censet S. Epiphanius hæresi 51. Videfis, si plura hac de re scire aveas, Baronium in Notis ad Martyrologium ad diem 25. Decembris, & in Apparatu ad Annales Eccles. n. 120. Petavium in Notis ad mox citatum Epiphani locum, & lib. 2. de doctrina Temp. cap. 1. & seq. Bailium lib. 2. Operis Hist. quæst. 1. 2. & 3. Pagium in Apparatu chronologico n. 138. Schelstratum lib. 1. de antiq. Eccles. Montacutium in Apparatu ad origines Ecclesiasticas Apparatu 11. & complures alios.

Difficultas est inter Criticos, an ad latera Christi in sæno jacentis duo reverà procubuerint animalia, bos scilicet & asinus? Id negat Erasmus in Notis ad Hymnum Prudentii de Natali Christi, ubi hæc habet: *A priscis usque sæculis manavit ad nos pictura, quæ Jesu Præsepi addit bovem & asinum, quod tamen in sacris literis nusquam apertè proditum est; sed occasio sumpta videtur ex Isaie Prophetia, quæ dicit: Cognovit bos possessorem suum, & asinus Præsepe Domini sui, populus autem Israel me non cognovit, & populus meus non intellexit.* Certè huc spectavit Prudentius: bos enim & asinus nihil crediderunt, sed barbaræ gentes servientes demoniis & cupiditatibus suis, ac brutorum in morem viventes crediderunt Christo, quum populus Israeliticus etiam hodiè Christo rebellet. Hactenus Erasmus, cujus sententiæ subscribunt Casaubonus Exercit. 2. ad 1. Annum Christi, Montacutius in lib. de Vita Christi pag. 28. & 29. & Samuel Basnagius tomo 1. Annal. politico-Ecclesiast. cap. 112. Sed hanc præposteram Novatorum, aliorumque id genus intemperantioris Criticæ hominum dubitationem damnat constans ac perpetua Ecclesiæ traditio, quam rectè exponit Eminentissimus Annalium Parens Baronius ad annum 1. Christi, ubi citat Sanctos Patres Hieronymum, Gregorium Nazianzenum, Gregorium Nissenum, Prudentium, & alios, qui affirmant, bovem & asinum ad Præsepe Domini fuisse alligatos, verbaque Isaie mox adducta, non ad sensum allegoricum detorqueri debere, sed in sensu litterali esse intelligenda. Ab hac igitur perantiqua Ecclesiæ traditione, communi SS. Patrum interpretatione roboratâ, fideles disciscere non debent.

Hactenus satis superque expendimus Nativitatis Christi circumstantias, nunc operæ pretium est ex illis probare adversus Judæos, Christum esse verum Messiam.

DICO ITAQUE: *Ex circumstantiis Nativitatis Christi Domini in-*

invictè adversus Judæos probari posse, Christum esse verum Messiam, Prophetarum oraculis prædictum.

Prob. primò: Messias, Prophetarum oraculis prædictus, nasci debuit eo tempore, quo, sedatis omnibus bellis, summa pax per totum Orbem vigeat; atqui Christus Dominus natus est eo tempore, quo summa pax per totum Orbem vigeat, ergo ex ea circumstantia Nativitatis Christi certò evinci potest ipsum fuisse verum Messiam, Prophetarum oraculis prædictum. Major patet ex benè multis Scripturæ sacræ locis, in quibus promittitur Messiae adventus. *Orietur in diebus ejus justitia & abundantia pacis*, Psalm. 71. *Miser cordia & veritas obviaverunt sibi, justitia & pax osculate sunt*. Psalm. 84. *Non levabit gens contra gentem gladium*. Isaïæ cap. 2. *Vocabitur nomen ejus Princeps pacis*. Isaïæ cap. 9. Probatum igitur minor: primò, ex S. Luca, qui cap. 2. sui Evangelii ait, exiisse Edictum à Cesare Augusto, ut describeretur universus Orbis. Hæc autem œcumenica descriptio fructus fuit, ac universalis indicium pacis, nec enim imperari, aut executioni mandari potuisset, nisi totus Orbis fuisset in pace compositus. Deinde, idem Evangelista scribit: Angelos immediatè post Nativitatem Christi pacem suis cantibus per æra celebrasse his verbis: *Gloria in excelsis Deo, & in terra pax hominibus, &c.* Tertio, in Fastis Sanctorum, seu in Martyrologio Romano die 25. Decembris Natali Christi sacrâ, legitur: Christum natum esse toto Orbe in pace composito. Quartò, Christum natum esse, pace ubique florente, una est omnium SS. Patrum & Scriptorum Ecclesiasticorum sententia, Origenis lib. 2. contra Celsum, Eusebii lib. 1. de Præp. Evang. cap. 3. Ambrosii Comment. in Psalm. 45. Augustini lib. 18. de Civit. Dei cap. 46. ubi hæc habet: *Regnante ergo Herode in Judæa, apud Romanos jam Republica mutato statu, imperante Cesare Augusto, & per eum Orbe pacato natus est Christus*. Id ipsum legitur apud S. Hieronymum Comment. in Isaïam cap. 2. *Veteres*, inquit, *revolvamus Historias, & inveniemus usque ad vigesimum octavum annum Cesaris Augusti, cujus quadragesimo primo anno Christus natus est in Judæa, in toto Orbe terrarum fuisse discordiam, & singulas Nationes contra vicinas gentes arsisse studio præliandi, ita ut caderent, & caderentur*. Orto autem Domino Salvatore, quando sub Præsede Syria Cyrino prima est in Orbe terrarum facta descriptio, & Evangelicæ doctrinæ pax Romano Imperio preparata, tunc omnia bella cessaverunt, & nequaquam per oppida & vicos exercebantur ad prælia, sed ad agrorum cultus: militibus tantum, legionibusque Romanis contra barbaras Nationes bellandi studio delegato, quando impletus est ille Angelorum concentus: *Gloria in excelsis Deo, & in terra pax hominibus bonæ voluntatis*. Hactenus S. Hieronymus. Denique, Christus natus est anno quadragesimo Imperii Augusti, seu anno Urbis Romæ conditæ 749. sicut in superiori Disserta-

tione

tionem ostensum est, atqui hoc anno totus Orbis in pace erat compositus, ergo Christus natus est eo tempore, quo pax per totum Orbem vigeat. Prob. minor ex Suetonio, Historico Romano, qui in vita Augusti cap. 22. hæc habet: *Janum Quirinum semel atque iterum à condita Urbe memoriam ante suam clausum, in multo breviori temporis spatio, terra marique pace parta, tunc clausit.* Nonnulli Critici putant, in Suetonio non tunc, sed tertio clausit, legendum esse, ita ut sensus sit, Jani Templum, quod ante Imperatoris Augusti ævum bis clausum fuerat, clausum fuisse tertio ab Augusto. Sed Baronius, Casaubonus, Lipsius, Norisius, Pagius, alii-que ex Dione lectionem Suetonii confirmant, ostenduntque, Imperatorem Augustum tunc Jani fores clausisse. Enim verò, Cassius Dio lib. 51. ad annum Urbis Romæ conditæ 725. scribit, inter cætera, à Senatu Romano decreta ob victoriam Actiacam, maximæ voluptati Augusto fuisse, quod portæ Jani ab ipsis clausæ sunt. Idem Dio lib. 53. ait: Imperatorem Augustum anno Urbis conditæ 729. belli Cantabrici curis ac difficultatibus vexatum, in morbum incidisse, cum gereret Consulatum IX. Collega M. Junio Sylano. Barbaros tamen, C. Antistii Legati operâ, devicisse; tum-que Augustum sanitati restitutum, ac bellis ubique feliciter confectis, Jani Templum, quod propter bella Cantabricum, & Germanicum fuerat resecratum, clausisse. Cæterum, quo anno Imperator Augustus Jani fores tertio clausit? non convenit inter Scriptores, probabilis autem ipse existimo cum Antonio Byæo lib. 1. de Natali Christi cap. 4. Norisio, & Pagio locis mox laudatis, Jani fores ab Imperatore Augusto fuisse tertio obseratas anno Imperii sui trigesimo nono, seu anno Urbis Romæ conditæ 748. Ab eo siquidem anno usque ad annum Urbis Romæ conditæ 752. nulla à quoquam Scriptore Romanorum bella produntur. Cum igitur Christus natus fuerit anno quadragesimo Imperii Augusti, seu anno Urbis Romæ conditæ 749. manifestò sequitur, Christum natum esse eo tempore, quo totus Orbis sub uno Principe Augusto summâ pace fruebatur. Non me latet, Joannem Massonum, Presbyterum Anglicanum, in contrariam descendisse sententiam, cumque novitatis studio abreptum, totâ licet reclamante traditione, in libro, quem inscripsit: *Janii Templum Christo nascente resecratum*, mordicus contendere, Jani Templum tempore Nativitatis Christi non fuisse clausum, nec subindè pacis in sinu quievissse Imperium Romanum. Sed quàm infirmo tibicine nitatur noy-um istud, & hæcenus inauditum nuperi illius hæretici systema, opportuniùs inter diluendas objectiones commonstrabo.

Hic tantum velim obiter advertat Lector, errasse Paulum Orosium lib. 6. cap. 22. & Casaubonum, qui ipsum secutus est in Notis ad cap. 22. Suetonii, dum scribunt: Christo nato Jani Templi portas ab Augusto fuisse tertio clausas usque ad cladem Variam, quæ accidit anno Urbis Romæ conditæ 762. Consulibus Sulpicio Camerino, & Poppæo Sabino, easque per duo decim ferme annos remansisse obseratas. Quod sanè cul-

cul abest à vero, & est purum *Orosii* commentum, nam constat, annò Urbis conditæ 752. erupisse bellum Parthicum, ad quod conficiendum Imperator Augustus Cajum Cæsarem hoc anno destinavit. Immò varia bella, videlicet Germanicum, Dalmaticum, Pannonicum, Dacicum, Illyricum, &c. sequentibus annis à Romanis gesta fuisse, latè probant *Norisius* in Cenotaphiis Pisanis cap. 8. & *Tagius* in Apparatu chronologico ad Annales Baronii.

Probatur secundò ex altera circumstantia Nativitatis Christi. Messias, juxtà Prophetarum vaticinia, in Bethleem nasci debet: *Et tu Bethleem Ephrata parvulus es in millibus Juda, ex te mihi egredietur, qui sit dominator in Israel*, inquit *Michæas* cap. 5. Atqui Christus natus est in Bethleem, Iudæ viculo, qui ab Urbe Hierosolyma sexto milliaro distat, idque constat ex locupletissimis testimoniis *Matth.* cap. 2. & *Lucæ* cap. 2. deindè ex Tabulis censualibus Romanorum, ad quas olim provocarunt *Justinus* in Apologia 2. *Tertullianus* in libris adversùs Marcionem, & *Sanctus Chrysostomus*. Tertiò, *Origenes* lib. 1. contrà Celsum, & *Eusebius* libro 7. Demonstr. Evang. cap. 2. testantur, ab ipsis Christianæ Religionis hostibus ostensam fuisse Bethleemi speluncam, in qua Jesum peperit Maria. Illustre hic proferam *Origenis* testimonium: *Quod autem*, inquit, *in Bethleem sit genitus Jesus, si velit aliquis post Michææ testimonium, & post Evangelii per Jesu discipulos conscriptam historiam, fieri aliis certior, intelligat, & in Bethleem speluncam ostendi, ubi ille sit natus, quod utique, & in locis percelebre est, vel apud eos, qui à fide sunt alieni, fama, & nomine circumfertur eadem & in spelunca Jesum quemdam, quem adorent, & demirentur, genitum esse.* Denique, ipsimet Judæi non negant Christum Bethleemi natum esse, sed id ultrò agnoscit R. *David Ganz* in germine Davidis, sicut observat Illustrissimus Episcopus Abrincensis Propos. 9. Demonstr. Evang.

Nec valet si quis dicat, Christum in Scriptura Sacra sæpiùs appellari *Nazaræum*, & *Galileum*, eumque à Pilato ad Herodem, Galilææ Tetrarcham, esse remissum, tanquàm hominem Galilææ ditionis, ac subindè Christum Nazarethi, & non Bethleemi esse natum. Non valet, inquam, si quis illud opponat: nam, ut optimè ait *Sanctus Thomas* 3. part. quæst. 35. art. 7. ad 2. Christus in Scriptura *Nazaræus* appellatur, non ad significandum locum, in quo natus est, sed quem parentes ejus incolebant, & in quo ipse fuerat educatus. Porro, locum, in quo quis educatus est, patriam vulgò dici solere, benè multis prophanorum Auctorum testimoniis evincit Illustrissimus Abrincensis Episcopus loco mox laudato.

Probatur tertiò. Verus Messias, juxtà Prophetarum oracula, nasci debet ex Virgine, & eo tempore quo à Juda, idest, à tota gente Judaica Sceptrum est auferendum: atqui Christus natus est ex Virgine, ut in 2. Parag. primæ Dissert. ostendimus; natus est etiam eo tempore, quo à gente Judaica ablatum est Sceptrum, ut abundè probatum manet ex his, quæ

quæ in superiori Dissertatione diximus; ergo Christus est verus Messias à Prophetis prædictus. Major constat ex *Isaia* cap. 7. *Ecce Virgo concipiet, & pariet Filium &c.* & *Genesis* cap. 49. *Non auferetur Sceptrum de Juda, & Dux de femore ejus, donec veniat qui mittendus est.*

Probatur ultimò. Verus Messias, juxtà Judæorum traditionem, debet Mundo apparere quatuor mille annis à Mundo condito præteritis: legitur enim in *Gemara* ad Tractatum *Sanhedrin*: *traditio domus Eliæ: sex mille annos durat Mundus: bis mille annis inanitas, & vastitas: bis mille annis lex: denique bis mille annis dies Christi.* Ex qua traditione, quæ passim in Judæorum libris occurrit, liquidò patet, Messiam, fatentibus ipsismet Judæis, nasci debere expleto quarto Mundi millenario à creatione Mundi: atqui Jesus Christus reverà natus est expleto quarto Mundi millenario, juxtà calculum Codicis Hebræi, quem calculo *LXX*; Interpretum præponendum esse in Dissertatione quinta latè probavimus; ergò Christus, juxtà pervulgatam hanc Judæorum traditionem, verus est Messias. Hæc autem opinio de venturo Messia post expletum quartum Mundi millenarium adeò Judæos circà tempora Nativitatis Christi pervaserat, ut palàm id temporis assererent, instare tempus, quo toti Orbi dominarentur. Rem narrant Scriptores Romani. *Cornelius Tacitus* lib. 5. *Historiarum*, oraculum, quod ad se trahebant Judæi, interpretatur de Imperatoribus *Vespasiano*, & *Tito*. *Pluribus*, inquit, *persuasio inerat, nempe Judæis, antiquis Sacerdotum litteris contineri, eo ipso tempore fore ut invalesceret Oriens, profectique Judæa rerum potirentur, quæ ambages Vespasianum, ac Titum prædixerunt.* Idem vaticinium referunt *Suetonius* in *Vespasiano*, & *Josephus* lib. 7. de Bello Iudaico cap. 31. Falluntur tamen prædicti Scriptores, dum assentandi, palpandique studio ejusmodi vaticinium, quod jactabant Judæi, ad *Vespasianos* detorserunt, quibus tamen convenire non poterat. Nam Regnum Messie, quem Judæi id ætatis expectabant, & quem Prophetæ prædixerunt, toti Orbi salutare, ac sempiternum esse debebat, at *Vespasianorum* principatus, nec fuerunt diuturni, nec toti Orbi multùm profuerunt: *Flavius* quippe *Vespasianus* pater, annis tantùm novem imperavit, *Titus*, ejus filius, natiorum major, tantùm annis duobus, *Domitianus* verò, filiorum minor, imperavit quindecim annis, & in hoc ultimo, qui fuit scelestissimus, tota *Vespasianorum* domus extincta exaruit. Verùm, quamvis illi Auctores hæc oracula, quæ solum Christum spectabant, de *Vespasianis* perperam sint interpretati, hoc tamen certò ex eorum testimoniis colligitur, Judæos expectasse Messiam eo ipso tempore, quo Christus in lucem prodiiit.

Hoc argumentum torquet Judæorum animos, & ut ab illo se se expediant, duo perquàm absurda comminiscuntur. In primis dicunt, Messie adventum propter peccata populi fuisse retardatum. Deindè fatentur, se planè ignorare, quandònam venturus sit Messias? imò, im-

precantur illis, qui calculo subducunt tempus venturi Messiae. Legitur quippè in Talmude, dixisse Ioachanem, *rumpantur illa eorum, qui terminos captivitatis supputant*. At, inania, hæc Iudæorum effugia facili negotio præcludi possunt. Nam primò, adventus Messiae ex mera gratia, & misericordiâ divinâ profluxit, ejusque primarius scopus fuit peccatorum populi absolutio, ac subindè nihil ex parte hominum adventum Messiae procrastinare potuit, maximè, cùm, juxta Prophetarum oracula, removendo, & destruendo peccato esset destinatus. Falsum igitur est, Messiae adventum ob populi peccata fuisse retardatum, ut dictitant Iudæi, cùm potiùs divina bonitas sua in peccatores acceperet beneficia, nunquàm retardet, ubi præsertim definitum est tempus, quo Deus peculiare aliquod promissit beneficium. Deindè, stupenda est pervicacia Iudæorum, quorum alii, cum Rabbino *Abarbanel* Comment. in Daniele, valere jussâ Scripturâ Sacrà, adventus Messiae tempus ex constellatione syderum, sed ex conjunctione Saturni, & Jovis in sydere piscium colligere se posse præsumunt. Alii verò profitentur, se impræsentiarum omninò ignorare, quandònam venturus sit Messias? Sed præterquamquòd eorum ignorantia conclamat, quam obstinatis animis defendunt, causâ manifestum est argumentum, convincitur insuper eorum ignorantia luculentissimò vaticinio Danielis, qui spatio lxx. hebdomadum, nativitatis, vitæ, & mortis Messiae tempus circumscripsit. Convincitur etiam ignorantia Iudæorum ex Sybillinis oraculis, (non jis quidem, quæ nunc circumferuntur, & quæ ficta, ac supposititia esse probant periti hujus temporis Critici,) sed ex his quæ sunt genuina, & ante Christi ortum vulgata, quæ magnum Regem oriturum portendunt, circa tempus, quo Christus Servator noster editus est, quæque passim citantur à Sanctis Patribus, *Lactantio*, *Iustino*, aliisque, qui adversus Gentiles pro defensione Christianæ Religionis Apologias adornarunt.

Hæc si Iudæi æquis, uti par esset, animis expendenter, facillè admodum intelligerent, omnia Prophetarum oracula, quæ compluribus sæculis ante Christi ortum fusa fuerunt, suum in Christo exitum sortita fuisse. Sive enim Iudæi Christi originem velint, sive requirant gentem, Tribum, familiam, matrem, patriam, nativitatis locum, tempus, doctrinam, vitam, miracula, resurrectionem, uno verbo, quid quid de Christo credimus; id totum invenient longè antehac prædictum à sacris Prophetis, qui in his omnibus præluserunt sacris Evangelistis; quòd sit ut non tam Prophetæ, quàm Evangelistæ sint nuncupandi. *Venit Christus*, inquit *Sæctus Augustinus* epist. 137. aliàs 3. ad Volusianum, *complentur in eju: ortu, vita, dictis, factis, passionibus, morte, resurrectione, ascensione, omnia præconia Prophetarum*. Iam verò, si ad calamitates, quibus tot abhinc sæculis miserimè vexantur Iudæi, tantisper mentem adverterint; velint nolint, agnoscent, se non ob aliam causam nunc per universum Orbem esse dispersos, miseriis, & calamitatibus oppressos, laribus, & solo

solo avito proligatos, Republica, & Civitate propriâ privatos, sine Rege, sine Duce, sine Templo, sine Sacrificio, sine Sacerdote, nisi quia, ut antè dicebamus; Christum verum Messiam non agnoverunt, sed in crucem egerunt. Nec enim Deus ad misericordiam propensus gentem illam, sibi olim tam caram, populum prædilectum, quem tot tantisque beneficiis cumulavit, & singulari protectione dignatus est, pateretur tot abhinc sæculis tribulationibus exagitari, innumerisque subiacere pœnis, nisi ille populus reus esset nasandissimi post hominum memoriam scele-
 ris, quo se polluit, dum Christum verum Messiam profiteri, ejusque doctrinam auscultare detrectavit. Certè, tot calamitatibus justo Dei judicio puniri Iudæos, agnovit, paulò post mortem Christi, Titus Imperator in obsidione Hierusalem, & excidio Templi. Nam hic Imperator, teste Iosepho lib. 7. de Bello Judaico cap. 16. post expugnatos Iudæos, Civitatem Jerusalem ingressus, ejusque munitiones, ac turrium cautes, altitudinem, & magnitudinem miratus, in hæc verba erupit: *Deo planè adjuvante pugnâvimus, & Deus erat qui detraxit ab istis munimentis Iudæos, nam quæ hominum manus, aut quæ machinæ ad ista valerent? Idem etiam Iosephus cap. seq. describit tragediam calamitatum, quas passi sunt Iudæi tempore obsidionis Hierusalem, quâ durante, undecies centum millia fame consumpta sunt, captivorum numerus nonaginta & septem milium, tota insuper Iudæa ferro flammæque vastata, ac sanguine Judaico cruentata est, templum pollutum, & solo æquatum. Denique, ne quid deesset ad malorum omnium cumulum, post illam Urbis expugnatæ sub Vespasiano, & Tito desolationem, iterùm Urbs Hierusalem ab Adriano Imperatore destruitur, nova Civitas Hierosolymitanis in ruderibus iussu illius Imperatoris ædificatur, cujus ingressu prohibentur Iudæi. Quis ergo non videt tot malorum agmina, quibus hætenus vexantur Iudæi, evidentissima esse argumenta divinæ ultionis, quam ipsis comminatus est Christus, dicens Luca cap. 21. *Cùm autem videritis circumdari ab exercitu Hierusalem, tunc scitote quia appropinquavit desolatio ejus: tunc autem qui in Iudæa sunt, fugiant ad montes, & qui in medio ejus, discedant, & qui in Regionibus, non intrent in eam, quia dies ultionis hi sunt, ut impleantur omnia quæ scripta sunt. Nec causari possunt Iudæi, se ob Idololatricæ crimen fuisse universali illa clade punitos; non, inquam, id causari possunt Iudæi, cùm certum sit, eos à tempore adventus Christi nunquàm fuisse in Idololatriam prolapsos, immò sic ab illa abhoruisse, ut, teste Origene lib. 4. contra Celsum, in Civitate eorum nullus Pictor admitteretur, nullus Statuarius, legibus totum hoc genus arcentibus, ne qua occasio præberetur hominibus crassis, neve animi avocarentur de cultu ad res humanas per hujusmodi illecebras. Quod idem ex Philone, Iudæo, non obscure colligitur, lib. de Decalogo, & lib. de Legatione ad Cajum, nec non ex Iosepho, itidem Iudæo, lib. 17. Antiq. Jud. cap. 8. Quid ad hæc mutire possunt obstinati Iudæi, quibus post universalem illam**

cladem nihil monumentorum superest ad discernendas Tribus suas, nihilque spei relictum est extruendi templi sui, in quo, juxtà Moysis Legem, religionem suam publicè exercere possint? Tentavit quidem Imperator *Julianus*, Apostata, in odium Christianorum Templum Hierosolymitanum dirutum instaurare, sed flammis è fundamentis erumpentibus, variisque id genus portentis, quæ refert id ætatis ethnicus Scriptor *Marcellinus*, ab incepto opere desistere cōactus est. Idem testantur *S. Chrysostomus* Oratione 3. contra Iudæos, *S. Gregorius Nazianzenus* Oratione 4. quæ est 2. contra Iudæos, *Sozomenus* lib. 5. Hist. Eccl. cap. 21. & alii Scriptores Ecclesiastici. Immò, id totum multò ante prædixerat *Daniel* cap. 9. suæ Prophetiæ, ubi ait, quod, post occisum Christum veniet Populus, idest, Romanus, qui Civitatem Hierusalem & Sanctuarium ita dissipabit, ut in Templo perpetua & usque ad finem Mundi, absque ulla spe instaurationis, futura sit abominatio desolationis: *Et post Hebdomades sexaginta duas occidetur Christus, & non erit ejus populus, qui cum negaturus est. Et Civitatem, & Sanctuarium dissipabit populus cum Duce venturo, & finis ejus vastitas, & post finem Belli statuta desolatio. Confirmabit autem (Christus) pactum, seu Doctrinam suam Evangelicam, multis hebdomadâ unâ, & in dimidio hebdomadis deficiet hostia & Sacrificium, & erit in Templo abominatio desolationis, & usque ad consummationem, & finem perseverabit desolatio; Hoc est, Templum Hierosolymitanum, à Tito, & exercitu Romano destructum ac solo æquatum, non amplius instaurabitur. Hæc omnia, inquam, si obstinati Iudæi, semotis tantisper præjudiciis, expendere non gravarentur, Christum esse verum Messiam non minùs clarè cernerent, quàm Solis radii meridianâ luce cernuntur. At nunc præ cæcitate videre non possunt juxtà terribilem illam Moysis comminationem, quæ legitur *Deuteronomii* cap. 28. Percutiat te Dominus amentia, & cæcitate, ac furore mentis, & palpes in meridie, sicut palpare solet cæcus in tenebris, & non dirigas vias tuas, omnique tempore calumniam suslineas, & opprimari violentia, nec habeas qui liberet te.*

DILUUNTUR OBJECTIONES

Tam Criticorum, quàm Iudeorum.

ARguitur primò: Messias, juxtà Prophetarum oracula, eo tempore nasciturus est, quo pax per totum Orbem vigeat: atqui Christus natus non est eo tempore, quo pax per totum Orbem vigeat; ergo vel Christus non fuit verus Messias, vel saltem pax, de qua loquuntur Prophetæ, non debebat esse terrena, ut vulgò creditur, sed spiritalis, quam Christus nascendo attulit hominibus, eos è captivitate diaboli afferendo in libertatem filiorum Dei. Prob. minor, Christus, ut in sexta Dis-

ferta-

fertatione probatum est, natus est anno Urbis Romæ conditæ 749. id est anno Imperii Augusti quadragesimo: atqui hoc anno complura bella contra Parthos, Armenos, Arabes, Germanosque à Romanis gerebantur, ergo Christus natus non est eo tempore, quo pax per totum Orbem florebat. Prob. minor, ex *Vellejo Paterculo*, qui lib. 2. cap. 100. hæc scribit de Tiberii Neronis ab Urbe Româ discessu: *Sensit terrarum Orbis digressum à custodia Neronem Urbis. Nam Parthus desciscens à Societate Romana, adiecit Armeniæ manum, & Germania aversis domitoris sui oculis rebellavit.* Quibus verbis disertè innuit *Vellejus Paterculus*, statim ac Tiberius Nero Rhodum secessit, bella Armeniacum, Parthicum, ac Germanicum contra Romanos erupisse. Porro, constat ex *Dione* lib. 55. idque fatentur *Norisius*, & *Pagius*, Tiberium Româ Rhodum secessisse anno Urbis Romæ conditæ 748. *Aristio Vetere*, & *Lelio Balbo* Consulibus. Bella igitur Armeniacum, Parthicum, & Germanicum exorta sunt anno Urbis Romæ conditæ 748. quæ solùm post ortum Christi fuerunt composita, nam ad Bellum Armeniacum, & Parthicum missus est *Cajus* anno Urbis Romæ conditæ 752. & ad Bellum Germanicum missus est *Tiberius* anno Urbis Romæ conditæ 754. Cùm itaque Christus natus sit, anno Urbis Romæ conditæ 749. manifestò sequitur illum inter Bellorum motus, & armorum fragorem editum fuisse.

Respondeo, cum Cardinali *Norisi*, ex verbis citatis *Velleii Paterculi* colligi non posse Bella Armeniacum, Parthicum, & Germanicum sævisse, statim ac Tiberius Româ Rhodum secessit, sicut perperam visum est *Joanni Massono*, Presbytero Anglicano. Enim vero, *Vellejus Paterculus* volens eò loci Tiberio pro more suo adulari, asserit quidè, illius absentiam Barbaris addidisse animos, ut Romanorum jugum excutere tentarent; at eodem anno, quo Tiberius Româ Rhodum profectus est, hæc bella continuo erupisse, ne verbo quidem indicat *Vellejus Paterculus*. Immo, hic Auctor lib. 2. cap. 104. scribit, bellum Germanicum esse dumtaxat inchoatum anno Urbis Romæ conditæ 754. ait quippè, mortuo *Cajo Cæsare* anno Urbis Romæ conditæ 757. Tiberium v. kal. Jul. fuisse ab Imp. Augusto adoptatum, & confestim in Germaniam missum, ubi ante triennium immensum exarserat bellum. Igitur, juxta *Vellejum*, *Paterculum*, bellum Germanicum non fuit inchoatum anno Urbis Romæ conditæ 748. sed anno 754. quod verò spectat bellum Armeniacum, dico Armenos bis defecisse, seu rebellasse contra Romanos. Primò, quidè rebellaverunt anno Urbis Romæ conditæ 748. sicut *Dio*, apud *Zonaram* refert, at Imperator Augustus, ejectionis à Regno Armeniæ filiis *Tigranis*, & *Artavasse*, sedit, ut alii dicunt, *Artabazano* Rege Armenis imposito, hanc motam apud Armenos rebellionem eodem anno compescuit, ac sedavit; quare non fuit necesse propter exortam illam Armenorum seditiunculam, quæ statim sopita, & compressa est, Iani Templum aperire. Altera autem Armenorum rebellio contigit anno Urbis Romæ

Romæ conditæ 752. quondò nimirum *Artavafdes*, quem Augustus Armenis Regem imposuerat, ab altero Tigraue, cum Phraate Parthorum Rege sibi fœderato, fuit è solito dejectus, & è Regno pulsus. Hujus secundæ Armenorum rebellionis meminit *Dio*, apud *Zouaram*, quippè qui, cum narraffet, togam virilem anno Urbis Romæ conditæ 752. Lucio Cæsari ab Imp. Augusto datam esse, addit: *Cùm Armenii defecissent, & à Parthis juuarentur, ea de re dolens, scilicet Imper: Augustus, quid ageret, ambigebat, nec enim propter senectutem bellum gerere poterat, & Tiberius, ut dictum est, iam secesserat.* Hæc itaque secunda Armenorum rebellio locum dedit bellis Armeniaco, Parthico, ad quæ gerenda Templum sani referatum est. Errant ergo illi Auctores, qui putant, contrà Armenos, Parthos, & Germanos bella movisse Romanos anno Urbis Romæ conditæ 748. cùm potius ex prophanis Scriptoris certissimè constet, nulla bella ab anno Urbis Romæ conditæ 748. usque ad annum 752. à Romanis gesta fuisse, ex quo sequitur, Christum Dominum, cujus ortus consignatur anno Urbis Romæ conditæ 749. natum esse eo tempore, quo Iani Templum erat occlusum, & universus Orbis altissimè sub Imp. Augusto pace fruebatur.

Arguitur secundo: Vaticinium Prophetæ *Michæ* de prodituro Duce è Bethlehem applicari, nec convenire post Iesu Nazareno; ergo ex eo Michæ vaticinio probari nequit Christum esse verum Messiam. Prob. antec. primò, quia in eo Michæ vaticinio fit sermo de Duce, qui Israël liberaturus erat ab Assyriis, & filios Israël è captivitate Assyriacâ ad patrium solum reducturus: at Iesus Nazareus illud minimè præstitit. Secundò, loquitur Propheta de eo Duce, qui futurus esset dominator in Israël: at constat, Iesum Nazarenum non fuisse Judæis dominatum, sed potius Iudæos illi imperasse. Tertiò, de illo agit Propheta, qui pascere debebat Israël in fortitudine Domini, in sublimitate nominis Dei sui. Quod sanè ad Iesum Nazarenum pertinere non potest, vel si ad ipsum pertineat, sequitur illum non fuisse Deum, sed Deo subditum.

Respondeo neg. ant. ad cujus probationem dico, liberationem ab Assyriis, de qua in prædicto Michæ vaticinio fit sermo, non in litterali, sed in mystico sensu esse accipiendam, adeò ut hæc liberatio ab Assyriis signi ficeret vindicationem Ecclesiæ ab omnibus hostibus suis, qui à Christo Domino expugnari, ac profligari debebant. Alioquin si de Israelis liberatione è captivitate Assyriaca ibi sermo fieret, sequeretur hoc Michæ vaticinium nunquàm fuisse impletum, constat enim ex Scriptura Sacra, Israël, sive decem Tribus nunquàm reductas fuisse è captivitate Assyriaca, immò nec fuisse reducendas, dicente Propheta *Osee* cap. 11. *Deum non additurum ulterâ misereri domus Israel.* Ad id verò quod subditur, Iesum Nazarenum non fuisse dominatum Iudæis, sed potius verâ vice Iudæos imperasse Christo; Dico, Christum, quâ homo est, dominium temporale non exercuisse, sed solum dominium spirituale, & in:

& internum, quo Israeli dominabatur, sed, quā Deus erat, utrumque dominium obtinuisse, quo I nunc, velint nolint, experiuntur Iudæi, qui ubique terrarum Christianis sunt obnoxii, eisque serviunt. Ad tertium dico, Christum Dominum pavisse Israelē in fortitudine Domini, in sublimitate nominis Dei sui, per suam scilicet doctrinam, miracula, & gloriam passionis. Non est autem inconveniēns, quōd Christus secundum suam generationem temporalem, & formam servi, quam assumpsit, Deo sit subditus, cū ipsemet Joannis cap. 10. Patrem æternum appellet Deum suum: *Ascendo ad Patrem meum, & Patrem vestrum, Deum meum, & Deum vestrum.* Hoc itaque Michæ vaticinium in Christo fuit impletum, nec ad Zorobabelem, ut volunt Iudæi, pertinere potest, quia Zorobabel non in Iudæa, nedūm Bethleemi, natus est, sed in captivitate Babylonica: Dux autem, de quo loquitur Michæas, nasci debebat in Bethleem. Secundō, quā Zorobabeli convenire non potest hæc pars vaticinii: *Egressus ejus ab initio, à diebus æternitatis.* Denique, hoc Michæ vaticinium non de Zorobabele, sed de Messia esse intelligendum ultrō fatentur Paraphraſtes Chaldæus Jonathan, auctores Talmudis in libro Sanhendria cap. ult. & in lib. de Paschate, Rabbi Salomo, & Rabbi David Kimki.

Arguitur ultimō: Multa sunt Prophetarum oracula; quæ in Messie adventu adimpleri debent, & quæ tamen in Nativitate Christi completa non fuerunt; ergo Christus non est verus Messias Prophetarum Oraculis prædictus. Probant, primō, Messias proditurus est in novissimis diebus, *Isaie* cap. 2. hoc est, senescente jam Mundo: Christus autem jam multis abhinc sæculis natus est. Secundō, prædicit *Isaia*, quōd a.1. Messiam, *confluent omnes gentes*, id tamen in adventu Christi nullatenus impletum est. Tertiō, quod *conflabunt gladios suos in vomeres, & lanceas suas in falces*; quod non levabit gens contra gentem gladium, nec exercebuntur ultra ad prælium: quod *habitabit lupus cum agno, & pardus cum hædo accubabit, leo & ovis simul morabuntur &c.* Tanta autem pax sive inter homines, sive inter bruta animantia necdūm visa est. Denique, verus Messias terreno Regno potiturus est, iuxta illud *Psalmi* 2. *Dabo tibi gentes hereditatem tuam, & possessionem tuam terminos terræ*: Christus autem pauper in stabulo natus est, pauperulam Matrem habuit, & privatam vitam, ac ignobilem degere affectavit, Ergo multa Prophetarum Oracula, quæ in Messie adventu adimpleri debent, non fuerunt completa in Nativitate Christi.

Respondeo ad hæc singula Judæorum argumenta, & ad primum, dico: Tempus Messie tribus de causis appellari ab *Isaia* novissimum, & ultimum. Primō, quia in Messia, scilicet in Christo, compleri debebant omnes veteris Legis figuræ, ac Prophetiæ, quæ ad ipsum tanquā totius Legis finem collimabant. Secundō, quia Messias, seu Christus, debebat esse ultimus Legislator, & Propheta, quem *Moyſes Deuteronomio* cap. 18.

genti Iudaicæ post se à Deo datum iri pollicitus fuerat : *Prophetam de gente tua, & de fratribus tuis sicut me, suscitabit tibi Dominus Deus tuus : ipsum audies* . Cujus oraculi veritatem in Christo Domino eluxisse , accuratâ , & luculentâ comparatione Mosem inter & Christum institutâ , probat *Eusebius* lib.3. de Demonstratione Evang. cap.2. Denique, tempus Messias dicitur novissimum, & ultimum, quia ætas, in qua Christus, verus Messias, venit, est ultima, seu novissima respectu quinque aliarum præcedentium. Scilicet prior Mundi ætas ab Adamo ad diluvium fluxit, altera à diluvio usque ad Abrahamum, tertia ab Abrahamo usque ad Davidem, quarta à Davide usque ad captivitatem Babylonicam, quinta à captivitate Babylonica usque ad Christum, sexta tandem, quæ novissima est, quamque Prophetæ prænuñciarunt, auspiciatur à Christo, & ad finem sæculorum perdurabit . Addo etiam, Christum, ut mox ostensum, est, eo venisse tempore, quo Messias à Judæis expectabatur, hoc est, jam expleto quarto Mundi millenario; congruo igitur tempore natus est Christus.

Ad secundum dico : Hæc Prophetæ Isaïæ verba : *Fluent ad eum omnes gentes* , in Christo fuisse impleta : Tum quia Christus natus, & mortuus est ad redimendum omne genus hominum, & ad universas totius Orbis nationes à peccatis liberandas . Tum quia etiam Lex gratiæ, seu Evangelii, ad omnes omnino gentes diffusa est, illiusque tuba, ministerio Apostolorum, qui universum Orbem peragrarunt, infonuit. Præterea, dici potest, quod sæpius hæc vox *omnis* in Scriptura Sacra non singulos, sed plurimos significat .

Ad tertium, & quartum dico : *Isaiam* his expressionibus usum esse, ut denotaret altissimam illam pacem, quæ toto Orbe, pacatis bellorum discordiis, sub Imperatore Augusto vigere debebat, quod, ut supra demonstravimus, Christo nascente contigit . Ea autem, quæ Isaïas de pace inter bruta animantia futurâ vaticinatur, non ad litteram sumi debent, sed ad sensum quemdam mysticum sunt potius trahenda, adeo ut sit sensus, barbaras gentes, quæ morum sævitia ante Incarnationem, & ortum Christi belluas æquabant, vel superabant, Evangelii prædicatione in mansuetissimos agnos esse convertendas . Quâ in re maxime deploranda est obstinatio Iudæorum, qui ne fateri cogantur, Iesum Christum esse verum Messiam, Prophetarum Oraculis prædictum, non pauca Prophetarum vaticinia de venturo Messia, quæ ad litteram sumi debent, ad sensum mysticum, & allegoricum detorquere solent, alia verò Prophetarum Oracula, quæ mysticum in sensum sumenda veniunt, mortiferam secuti litteram, præposterè accipiunt, ut necdum Prophetias omnes impletas obtendant .

Ad ultimum dico : Messiam non caduco, & temporario Regno potiri debere, uti sibi perperam persuadent Judæi, qui etiamnum expectant venturum Messiam opibus, copiis, reliquisque mundanis prædiis affluen-

fluentem, sed potius Messiae Regnum spirituale, & æternum fore, atque in eo præsertim positum, quòd omnes gentes, & omnes linguæ nomen ejus venerentur, majestatem confiteantur, virtutes imitentur, præceptis ejus obtemperant, Divinitatem adorent, suamque omnes salutem ipsi referant acceptam. Cæterum, Messiam pauperem futurum prædixerunt Prophetæ: dicitur enim in persona Messiae Psalm. 35. *Ego autem mendicus sum, & pauper; & Zachariæ cap. 9. Ipse pauper, & ascendens super asinam, & super pullum asine.* Hæc Prophetarum de Messia paupertate Oracula, ut eludant Judæi, asserunt duos Christos, seu Messias, in Sacris Litteris esse promissos, unum videlicet, in quem conveniunt abjecta quæque, & humilia de Christo in Sacris Libris prædicta, alterum, cui splendida, & magnifica omnia de eodem nuntiata tribuant. Priorem nominant Messiam filium Josephi, posteriore vocant Messiam filium Davidis. Deinde dicunt, Messiam, filium Josephi, in certamine Gog, & Magog interfectum iri, sed tamen à mortuis excitandum per virtutem alterius Messiae filii Davidis, qui redimet Israel, ejusque Regnum restituet, Sacerdotium Leviticum instaurabit, Salomonis Templum, & Hierosolymam à fundamentis eriget, ac demùm totam Gentem Judæicam, per Orbem dispersam & profugam, relictis, spretis, atque armatâ manu debellatis Gentilibus, omnibus bonis locupletabit, ac ubique beatam fortunatamque reddet. Verùm, in hac, & in aliis hujusmodi fabulis, quas obtrudunt Rabbini, apertissimo documento probant, quàm mala, & deplorata sit Judæorum causa, quam nonnisi putidis commentis tueri, ac defendere possunt. At enim, nihil insulsius est, quàm duos fingere Messias, cum nullibi Scriptura Sacra duos Messias commemoret, sed unius tantùm Messiae duplicem notet adventum, unum quidem ut Redemptoris in humilitate, alterum verò in majestate ut Judicis. Sed Judæi, qui vento, & chymæris pascuntur, Scripturam Sacram tot inani-bus figmentis corrumpunt, ut facilius esset Augiæ stabulum repurgare, quàm fabulas, quibus eorum libri scatent, retegere, & confutare.



O D E

*De Casa Natalitia Pueri Iesu, deque paupere Puerperio
Virginis Dei-paræ Mariæ.*

Altero versu heroico hexametro, altero Iambico dimetro.

ECquid adhuc veterum sequimur spectacula rerum ?
Huc huc frequentes currite .
Hæc casa, quæ lacera & stat agrestibus horrida culmis ,
Novum dabit spectaculum ,
Quale nihil seclis proavi videre vetustis ,
Nihil videbunt posteri .
Hic , cujus tonitru tellusque tremiscit & æther ,
Teneris crepat vagitibus .
Hic Orbis magni moderator maximus infans .
Virginea mulget ubera .
His ego non stabulis augusta Palatia Romæ
Feliciora judicem .
Non (operosa licet) Solomonia Templâ , nec auream ,
Lydi Tyranni Regiam .
Salve clara domus , Cœloque beator ipso ,
Partus Sacratæ conscia ,
Jure tibi Jovis invideant Capitolia falsi .
Divis superba saxeis .
Ægyptus Sancta invideat cunabula , monstros
Finem datura turpibus .
Nec minus apta Deo es , quod hiantibus undique rimis ,
Imbres & euros excipis .
Talia nascentem decuere cubilia Christum , ut
Qui dedocere venerit
Fastum, nullaque non suadentem turpia luxum .
Non hic renident purpuræ ,
Sertave frondea , non imitantes fulmina tedæ .
Non mensa sumptuosior ,
Non strepit officiis domus ambitiosa , nec alti
Foveant puerperam thori .
Pannosus jacet in duris Præsepibus infans :
Divinus attamen vigor
Emicat, & patrios vagitu dispuit ignes .
Senfere præsentem Deum ,

Quod

Quodque licet, puero jumeata tepentibus auris
 Frigus Decembre temperant .
 Upilio calamis jisdem, quibus ante capellis ,
 Agreste, sed pium canit ,
 Æthereique chori volitant cunabula circum ,
 Ut mensibus Vernis, Apum
 Degenerem simul ac pepulere examina Regem ,
 Regi novo, faventibus
 Applaudunt alis, sublimemque agmine tollunt ,
 Sic turma cælitum Duci
 Circumfusa suo, gaudens stupet, atque jacentem
 Pronis adorat vultibus ,
 Et natalitium sonat ad Præsepia carmen .
 Conjux pudicus interim ,
 Fusus humi, magnum trepidus veneratur a lumen .
 Porro Puella nobilis ,
 Pars bona spectaculi, defixis hæret ocellis ,
 Primumque se se non capit ,
 Seque suumque stupens genitrix virguncula partum
 Nulli marito debitum .
 At simul ejecit pietas materna stuporem ,
 Prædulce pignus corripit ,
 Ac modo porrectis cohibet vagire papillis ,
 Modo tepente frigidum .
 Blanda fovet gremio, parvisque dat oscula labris .
 Nunc pectori adprimit suo ,
 Nunc blæso teneros invitat murmure somnos .
 Amabili invicem modo ,
 Latam prole Deo videas gestire parentem ,
 Prolem parente Virgine .



DISSERTATIO OCTAVA

*De manifestatione, seu signis Nativitatis Christi,
de Magis, qui ad ipsius cunas accesserunt,
& de strage Infantium ab Herode.
edita.*

Magnum illud pietatis Sacramentum, quod, sicut ait Aposto-
lus 1. ad Timotheum cap. 3. Manifestatum est in carne, ju-
stificatum est in spiritu, apparuit Angelis, predicatum est
gentibus, creditum est in Mundo, assumptum est in gloria,
nil aliud est, quàm ineffabile Incarnationis Mysterium, quod Pastoribus
ostensum est in ipsa Nativitate Christi, Magis in die Epiphaniæ, Simeoni,
& Anna in Templo Hierosolymitano. Ad omnium hominum spectat
salutem (inquit S. Leo, Papa, Sermon. 1. in Epiphaniam cap. 1.) quòd infan-
tia Mediatoris Dei & hominum jam universo declarabatur Mundo, cum
adhuc exiguo detineretur oppidulo. Quamvis enim Israëliticam gentem,
& ipsius gentis unicam familiam delegisset, de qua naturam universitatis
assumeret, noluit tamen intra maternæ habitationis angustias, ortus sui
latere primordia. Sed mox ab omnibus voluit agnosci, qui dignatus est
omnibus nasci. Tribus igitur Magis in Regione Orientis Stella novæ cla-
ricitatis apparuit, quæ illustrior cæteris, pulchriorque syderibus, facili in se
intuentium oculos animosque converteret, ut confestim adverteretur non esse
otiosum, quod tam insolitum videbatur. Dedit ergo aspicientibus intelle-
ctionem, qui præstitit signum; quod fecit intelligi, fecit inquiri, & se inve-
niendum obtulit requisitus. Decebat autem, ut probat S. Thomas 3. p. q. 36.
art. 2. ut Nativitas Christi Domini secundum carnem quibusdam à Deo
præordinatis conspicua fieret, ad fidem adstruendam tanti Mysterii ab-
sconditi à sæculis in Deo: nam quemadmodum, juxta Sanctum illum,
Doctorem, extincta fuisset ratio fidei, aut saltem diminutum maximè
illius meritum, si omnibus promiscuè Christi Servatoris nostri innotuis-
set Nativitas, immò impedita esset generis humani redemptio, quia nul-
lus Christo mortem inferre voluisset, juxta illud 1. ad Cor. cap. 10. Si co-
gnovissent, nunquàm Dominum gloriæ crucifixissent; ita non ab simili ratio-
ne, fides haud quaquàm stabiliri potuisset, nisi Nativitas Christi aliqui-
bus innotuisset, per quos tam sublimis & incomprehensibilis Mysterii
notitia ad cæteros propagaretur; Fides enim ex auditu, ut dicitur ad Rom.
cap. 10. Quà de causâ, juxta Sanctum Thomam, principiò Mariz, & Jose-
pho manifestata fuit Nativitas Christi, etiam antequàm nasceretur,
ut proli conceptæ reverentiam exhiberent. Sed quia eorum testimo-
nium,

nium, utpotè domesticum, suspectum haberi potuisset, ideo oportuit, ut Christi Nativitas etiam extraneis proderetur, quò eorum testimonia majorem apud omnes Nativitati Christi fidem conciliarent. Ex omnibus autem hominum conditionibus selegit Deus testes Nativitatis Filii sui, qui omnibus salutem erat allaturus. Pastores selegit, quia simplices erant; *Non autem mediocre Fidei tibi videatur exemplum*, inquit S. Ambrosius, quòd exilis sit persona Pastorum. Certè, quòd vilior ad prudentiam, è pretiosior ad Fidem. Non gymnasia Choris referta Sapientium, sed plebem Dominus simplicem requisivit, quæ phalerare audita, & fucare nesciret. Simplicitas enim queritur, non ambitio desideratur. Sic Deus amat illucere simplicibus & pauperibus, quos amor sæculi non occæcat; & tenebras offundit oculis superbiorum, quos solus divitiarum & gloriæ splendor perstringit. Elegit etiam Deus testes Nativitatis Filii sui Magos, quia Sapientes, & scrutandis rerum causis, syderumque considerationi erant intenti; *Simeonem*, quia vir justus; denique *Annam*, quia mulier Prophetissa. Angelum tamen ad Pastores delegavit, quia Pastores Judæi erant, apud quos frequenter fiebant apparitiones Angelorum; *Magis* verò, quia motus, & ortus syderum, annique tempestates sedulo observabant, Christi Nativitatem indicavit per Stellam radiantem in Cœlis, quæ portendebat natum esse hunc eximium Regem, quem Judæi expectabant, & de quo vaticinatus fuerat Propheta Balaam Numerorum cap. 24. *Orietur Stella ex Jacob*. Postmodò, quia viris justis familiare & consuetum est interiori Spiritus Sancti instinctu edoceri absque signorum sensibilibus demonstratione; ideo *Simeon* & *Anna* per interiore Spiritus Sancti instinctum Nativitatem Christi perspectam habuerunt, juxta illud Lucæ cap. 2. *Responsum acceperat*, Simeon, *non visurum se mortem, nisi prius videret Christum Domini*. Hæc, & alia id genus signa, quæ Sacra narrat Historia, divinam Christi Servatoris nostri majestatem, quam paupertas, & humilis ortus celabant, indicaverunt, atque illustrarunt.

Verùm, quia moderni Theologi, & Scripturæ Sacræ Interpretes narrant alia signa & prodigia variis in Regionibus accidisse, vel eodem anno, vel in ipsa nocte, quâ Christus Dominus natus est, illa ad crism hinc revocare, & quàm parum veritatis habeant, paucis demonstrare non pigebit.

In primis dicunt: Ipsâ nocte Nativitatis Christi, Romæ Templum Pacis subitò corruisse. Sed id abludere à vero, & purum otiosorum hominum figmentum esse fatetur ipsemet *Baronius* in Apparatu ad Annales Ecclesiasticos, ubi ait: *Nullum Templum Pacis Romæ ante Christum natum apud classicos Scriptores reperiri extructum, sed solùm ab Imperatore Vespasiano post captam Hierosolymam, & Judæos in ordinem redactos, illud Romæ fuisse constructum*; idque disertè asserunt *Josephus* lib. 7. de bello Judaico cap. 24. *Suetonius*, in Imp. *Vespasiano* cap. 9. *Plinius* lib. 34. cap. 8. & lib.

& lib. 36. cap. 15. *Sextus Aurelius Victor* in Epitome Historiarum in Vespasiano, & *S. Hieronymus* in cap. 3. *Isaïis* Prophetæ. Deinde, mirabilis illius & repentinæ Templi Pacis ruinæ, quæ omnium proculdubio sermone celebrata fuisset, nec Historici Romani, nec *Hieronymus*, nec *Eusebius*, nec *Orosius*, nec alii antiqui Patres vel leviter meminerunt, eam utique non omitturi, si reverà contigisset.

Alterum signum seu prodigium, quod refert *Nicephorus* lib. 1. *Hist. Eccles.* cap. 17. ex quo postea hauserunt *Suidas*, *Cedrenus*, *Baronius*, & alii, est cessatio Oraculorum. Fertur enim, quod, cum Imperator Augustus ad Delphici Apollinis Templum venisset, ut sciret quisnam post ipsum Romani Imperii clavum regere deberet, hunc in modum fuerit ei ab Oraculo responsum, non Latine quidem, sed Græcè:

Me Puer Hebræus, Divos Deus ipse gubernans,

Cedere sede jubet, tristemque redire sub orcum.

Aris ergo dehinc tacitus abscedito nostris.

Quo responso accepto, Imperator Augustus Romam reversus est, atque ibi in Capitolio Aram maximam extrui jussit cum ejusmodi Latina inscriptione: *Ara Primogeniti Dei*. Verum, quin huic prodigio fidem præbeam, hæc obstant. Primum, quia constat, à bene multis post Nativitatem Christi Oracula Delphis petita fuisse, neque desisse illa Oracula omnino eo loco reddi, sed desisse dumtaxat reddi versibus, sicut ex *Plutarcho*, qui duos de cessatione Oraculorum libros, imperante *Traiano*, edidit, luculenter probat *Cassaubonus* Exercitatione primâ ad Apparatum Annalium *Baronii*. Delphis etiam data fuisse Oracula post ortum Christi Domini, hoc est, sub Imperatoribus *Nerone*, *Domitiano*, *Adriano*, *Septimio Severo*, & *Constantino Magno*, attestantur *Suetonius* in Vita *Neronis*, *Philostrophus* in Vita *Apollonii Tyannæi*, qui sub Imp. *Domitiano* vixit, *Dio Chrysostomus*, *Spartianus*, & *Eusebius* lib. 2. De Vita *Constantini Imp.* cap. 49. Certè, nemo negare potest, imperante Vespasiano, *Velledæ* Oraculum, magno in pretio apud Germanos fuisse, & Imperatorem *Julianum Apostatam* longè post Natale Christi consuluisse Oracula, & ab ipsis responsa accepisse. Denique, nulla sunt antiquitatis, non solum prophanz, sed Ecclesiasticæ etiam monumenta, nulla Historicorum, aut Sanctorum Patrum testimonia, ex quibus evinci possit, anno, quo Christus natus est, cessasse penitus Oracula. Immo *Justinus Martyr*, *Tertullianus*, *Lactantius*, *Minutius Felix*, *Origines*, & multi alii veteres Patres, qui pro Fidei Christianæ defensione Apologias concinnarunt, tanti pro firmâ Fide, & à Gentilium calumniis vindicandâ ponderis argumentum non adhibuerunt, illud utique non pratermissuri, si Oraculum ejusmodi reverà editum fuisset, aut Ara Primogenito Dei consecrata in Capitolio ab Augusto posita esset.

Tertium signum seu prodigium, quod à nonnullis accidisse memoratur, est apparitio Virginis, quam Puerum gremio gestantem Syria

Im.

Imperatori Augusto in aëre ostenderit. Sed hoc prodigium falsi convincitur. Primò, quia Augusti temporibus, ut est in confesso apud omnes, nulla Sybilla superstes erat. Sybilla enim Cumana, omnium, ultima, vixit Olympiade quinquagesimâ, fuitque Romæ temporibus Regis Tarquinii Superbi, sicut scribit *Solinus Polyistor*. At, Jesum Christum sub Imperatore Augusto, anno quarto Olympiadis centesimæ nonagesimæ tertiæ, ac subindè longè post Sybillas, natum esse, ostendimus superius in Dissertatione sexta. Secundò, illius prodigii nullam omnino mentionem fecerunt antiqui Sancti Patres, quamvis Sybillina sapius laudent Oracula. Tertiò, ipsemet *Baronius* in Apparatu ad Annales Ecclesiasticos nullam huic prodigio, aut saltem exiguam fidem habendam esse, censet. *Adjunt*, inquit, *Genitricem Dei Mariam, Infantem in ulnis habentem, monente Sybilla, sublimem in aere ab eodem Augusto illic esse conspectam. Quod tamen ita velim intelligant, qui ei rei majorem fidem adhibendam putant, quam his, quæ ex Græcis Auctoribus recensuimus: non quod Sybilla aliqua Augusti temporibus, quæ illum hæc docuerit, superstes fuerit: Siquidem Cumæa, quæ novissima omnium fuisse traditur, quinquagesima Olympiade (Auctore Solino) vixit, temporibusque Tarquinii Regis Romæ fuit: sed sic accipiendum, ut ea ipsa Augustus à Sybilla, hoc est, Sybillinis carminibus, quæ Sybille nomine citari à majoribus consueverunt, non à Sybilla, quasi adhuc vivente vate, ei ostensa fuerint.*

Quartum signum seu prodigium, est olei fons, quem putant nonnulli Romæ manasse eadem nocte, quâ Christus natus est, eumque instar torrentis se Mari junxisse, atque per aliquot dies perdurasse. Cui prodigio aliud addunt detribus scilicet Solibus, qui paulatim in eundem Orbem coiverunt. At, utrumque prodigium quadraginta circiter annis ante Nativitatem Christi contigisse testantur *Eusebius* in Chronico, & *Orosius* lib. 6, cap. 18. quibus assentitur *Baronius* in Apparatu ad Annales Ecclesiasticos, quapropter, non potuit esse Nativitatis Christi indicium.

Denique, ut prætermittam alia ejusmodi, quæ circumferuntur Nativitatis Christi signa, de quibus latè disserunt *Barradius* lib. 8. Concordiæ Evang. cap. 13. *Ludovicus de Dieu* in animadversionibus in Excerpta ex Historia Christi Persicè scripta à *P. Hieronymo Xavier*, Soc. Jesu, *Casaubonus* Exercit. 1. ad Appar. Baronii, & *Montacutius* in *Analectis Exercitatione quarta*; inter signa, & prodigia Nativitatis Christi nonnulli ponunt oblationem Templi Jani, quod ante Nativitatem Christi erat referatum. Sed, licet ipse fatear, Templum Jani anno, quo Christus natus est, fuisse occlusum, existimo tamen, id prodigii loco non esse habendum, quia Templum Jani, tempore Nativitatis Christi, more solito, fuit ab Imperatore Augusto post expugnatos sui Imperii hostes obferatum, perindè ac post mortem etiam Iesu Christi idem Jani Templum Imperatores clausurunt. Clausit enim Nero, Imperator, anno Ur-

bis condita 811. Clausit *Vespasianus* anno Urbis condita 824. Immò hunc morem claudendi tempore pacis. Templum *Jani* fuisse ab ipsis Imperatoribus Christianis servatum, testis est Scriptor Ethnicus, *Ammianus Marcellinus* lib. 16. ubi Templum *Jani* ab Imperatore Christiano. *Constantino Magno* clausum fuisse disertè testatur. Quòd ergo tempore, quo Christus natus est, Templum *Jani* fuerit clausum, non tam prodigium dici debet, quàm complementum vaticinii Prophetarum, qui Christum eo tempore proditum cecinerunt, quo pax per totum, quà latè patet, Orbem, vigere debebat.

Missis itaque ementitis, fictisque illis portentis, quibus non indiget Christi Domini Nativitas, quæ tot tantisque certis & indubitatis miraculis fulget; nam, ut inquit *S. Ambrosius* lib. 2. in *Lucam*, *Angeli* mediocribus signis Deus probatur, quòd *Angeli* ministrant, quòd *Magi* adorant, quòd *Martyres* constantur, ex utero funditur, sed coruscet è Cælo: terreno in diversorio jacet, sed cælesti lumine viget. Nupta peperit, sed virgo concepit: nupta concepit, sed virgo generavit. Missis, inquam, aliis confictis prodigiis, nunc pauca dicenda sunt de *Magis*, qui ductu *Stellæ* radiantis in Cælis ad cunas Christi proni ipsum adoraturi accesserunt. Quatuor autem Dubia de *Magis* potissimum moveri solent. Primò, an tres dumtaxat ad cunas Domini venerint? Secundò, an Regiæ dignitate fuerint insigniti? Tertiò, quænam sint eorum nomina? Denique, ex qua patriâ sint oriundi? Quæ Dubia hîc breviter discutienda suscipio. Et primò, quòd spectat numerum *Magorum*, qui ad cunas Christi Domini accesserunt, dico, perantiquam sequendo traditionem. *Ecclesiæ*, illos tres tantum fuisse, tum quia, ut sacer perhibet *Evangelista Matthæus*, tria tantum munera infanti Deo obtulerunt *Magi*, aurum videlicet, thus, & myrrham: ut auro Regem, thure Deum, myrrâ mortalem Christum profiterentur, sicut interpretantur Sancti Patres; cum igitur tria dumtaxat munera *Magi* obtulerint Christo Domino, argumento est: non plures quàm tres fuisse *Magos*, & à quolibet speciale munus Christo fuisse oblatum. Tum quia etiam, in perantiquis Catholicorum Templorum totius Orbis monumentis & picturis nonnisi tres *Magi* representantur Christum Dominum adorantes, eique munera viritum offerentes. Tum quia denique, in hanc sententiam omnes Sancti Patres, & *Ecclesiæ* Doctores conspirant, quorum testimonia recensere nimis longum esset. Quod spectat secundum Dubium, an scilicet *Magi* Reges fuerint? Paulò major est difficultas. Sunt quidam doctissimi Theologi, & *Scripturæ sacræ* Interpretes, qui docent, illos non tam Reges, quàm Regulos fuisse, quales etiam dici possunt *Toparchæ* quicumque, sive unius tantum loci Principes. Certè, *Matthæus* hanc Regiam *Magorum* dignitatem, comitarum, apparatus, & alios, quibus ab *Herode* fuissent excepti, honores silentio non prætermisisset: nec aliundè verosimile est, *Herodem*, quem *Iosephus* lib. 9. de bello Judaico cap. 19. dicit, timore

-pavi-

pavidum fuisse, & ad omnes suspiciones excitari solitum, tam facile permisisset, ut ignoti Reges in propriam ditionem irrumperent. *Timore pavidus erat*, inquit de *Herode Iosephus*, & ad omnes suspiciones excitabatur, multosque innocentes, metu ne quem nocentium prætermitteret, in tormenta ducebat. His conjecturis nititur hæc sententia. At, sunt alii Theologi & Scripturæ sacræ Interpretes, qui exadverso contendunt, tres Magos, qui ad cunas Christi Domini accesserunt, fuisse Reges; idque probant ex multis testimoniis Sanctorum Patrum, qui tribus Magis hæc accommodant Psalmi 71. verba: *Reges Tharsis & Insula munera offerent, Reges Arabum & Saba dona adducent*. Utrique opinioni præjudicare nolo, nec cum viris eruditis contentiosum funem ducere, suas ergo cuiuslibet sententiæ constet probabilitas; siue enim hæc, siue illa opinio vera sit, perindè est, nec ullo modo elevatur, aut imminuitur sacræ Historiæ auctoritas, cum neutra harum opinionum sacræ Historiæ veritate, sed probabili dumtaxat conjecturâ fulciatur. Ut ut sit, certissimè constat, in Magorum adventu impletum esse illud Vaticinium, quo Propheta *Isaias* cap. 60. Ecclesiam ad exultationem excitat his verbis: *Leva oculos tuos, & vide: omnes isti congregati sunt, venerunt tibi. Filii tui de longè venient, & filia tua de latere surgent. Tunc videbis, & afflues, & mirabitur & dilatabitur cor tuum, quando conversa fuerit ad te multitudo maris, fortitudo gentium venerit tibi. Inundatio Camelorum operiet te, Dromedarii Madian & Ephra: Omnes de Saba venient, aurum & thus deferentes, & laudem Domino annunciantes*. Magi itaque, superni luminis ductum sequentes, & prævii fulgoris indicium intentâ contemplatione comitantes, appulerunt Bethleem, ubi Christum Dominum invenerunt, non imperantem Dæmonibus (sicut ait S. Leo, Papa, Sermone 7. de Epiphania cap. 2.) non mortuos suscitantem, non cæcis visum, aut claudis gressum, aut mutis eloquium reformantem, vel in aliqua divinarum virtutum actione viderunt, sed puerum silentem, quietum, & sub matris sollicitudine constitutum, in quo nullum apparet de potestate signum, sed magnum præbatur de humilitate miraculum. Ipsa namque species sanctæ Infantie, cui se Deus, Dei filius, aptarat, prædicationem auribus intimandam oculis ingerebat, ut quod adhuc vocis non proferebat sonus, visionis jam doceret effectus. Ad tertium, quod attinet Dubium de Magorum nominibus, consultius esse iudico ea curiosius non esse inquirenda, cum nulla planè tam sacræ, quàm Ecclesiasticæ suppetant antiquitatis monumenta, ex quibus assignari possint; unde merito à viris doctis fugillantur moderni quidam Auctores, qui incredibili quolibet fingendi prurigne titillati, ficta, & adscititia tribus Magis nomina imponere, multaque Historiæ Evangelicæ ariolando addere præsumunt. Adire potest lector *Theophylum Rynaldum* in Diptychis Mariæ Parte 5. puncto 8. num. 25. ubi solide refellit vanum commentum cuiusdam Auctoris, qui anno 1638. eò temeritatis prorupit, ut assereret, sub nomine

Magorum tres ad cunas Christi venisse insignes in sacris litteris viros, *Enochum* videlicet, *Melchisedechum*, & *Eliam Thesbitem*. Quod sanè quàm vanum, ineptum, ac insulsum sit, nemo est, qui statim non videat. Pergamus nunc ad ultimum Dubium, ex qua videlicet patria *Magi* sint oriundi? an ex *Chaldæa*? an ex *Perside*? an ex *Arabia* Felice venerint? quæ difficultas cùm inter Theologos, & Scripturæ sacræ Interpretes celebrior sit, eam hîc operosius ventilare necesse est.

DICO ITAQUE PRIMÒ; *Magos nec ex Chaldæa, nec ex Perside venisse, ac subindè nec Chaldæa, nec Persidi suos natales debere.*

Probatur hæc assertio: *Chaldæa* ab Urbe Hierosolyma distat 370. leucis, & *Persia* 500. ut videre est apud doctissimum Auctorem Gallicæ analyseos Dissertatione tertiâ. Porro creditu difficile est, Magos intra 13. dies, qui à die Natali usque ad eorum adventum numerantur, tam longum ac diuturnum iter emetiri potuisse, etiamsi demus, eos perniciosissimis equis, dromedariis, & camelis fuisse vectos: tùm quia verisimile non est, Magos, ubi primùm Stella in Oriente apparuit, se se accinxisse ad iter, sed potiùs credibile est, eos antehàc de novæ & insolitæ Stellæ apparitione invicem contulisse, consultationem adhibuisse, consensum firmasse, res ad iter conficiendum præparasse, comites ordinasse, sic enim factitare solent Magnates, maximè quando longum & arduum iter sunt aggressuri. Tùm quia etiam *Magi*, antequàm Bethleemum accederent, Hierosolymis paululum temporis sunt commorati. Refert siquidem Evangelista *Matthæus*: Herodem ad Magorum adventum turbatum & anxium de loco, in quo nasciturus erat Messias, accersisse primores Sacerdotes & Legisperitos, qui ei responderunt, locum Nativitatis Messie designari à Propheta Michæa in Bethleem Juda, quæ erat Civitas Davidis Regis ortu celebris, insuper Herodem interrogasse Magos de tempore apparitionis Stellæ, eosque rogasse, ut ad Urbem redirent, sibi omnia, quæ Puerum spectabant, narraturi, ut ipse eodem adorationis officio defungi posset. Jam verò quis credat, Magos se se ad tam longum iter præparare, illud per tot populos, ac diversas Regionem adornare, Hierosolymis paululum temporis commorari, & intra 13. dierum spatium ad cunas Domini accedere potuisse? Id profectò ab omni veri specie abhorre videtur, etiamsi fingamus, Magos, cursorum instar, mutatis ac concitatis equis iter maturare voluisse.

Respondent primò quidam Theologi ut ab hoc argumento sese expediant, Stellam apparuisse quidem in Oriente die, quâ natus est Christus, idest, die 25. mensis Decembris, Magos tamen Bethleemum dumtaxat adventasse biennio post Natale Christi. Idque probant, tùm quia ità censet *S. Epiphanius* hæresi 51. cui suffragantur quàmplurimi recentiores; tùm quia etiam Beata Virgo in die Purificationis suæ non agnum, sed par turturum, aut duos pullos columbarum obtulit in Templo, quod quidem argumento est, eam non habuisse pretium agni, nec proin-

proinde aurum accepisse à Magis ; tùm quia denique Herodes iussit occidi omnes pueros à bimatu , & infrà , secundùm apparitionis Stellæ tempus , quod exquisierat à Magis : non est autem credibile , Herodem voluisse bimos mactare pueros , si ab ortu Stellæ ad Magorum adventum , nonnisi 13. dies interfluxissent .

Verùm , hæc responsio apertè adversatur antiquæ Ecclesiæ traditioni , quæ docet Christum adhuc in pannis , in gremio Matris , atque in Præsepio collocatum , adoratum fuisse à Magis decimotertio die ex quo natus est . Id etiam non obscurè innuit *Matthæus* , dùm dicit : *Cùm natus esset Iesus , ecce Magi ab Oriente venerunt* . Sanè si , quandò Magi Bethlehem venerunt , Christus fuisset anniculus , aut bimus , ut *Epiphanius* , *Faber* , *Osiander* , *Bollandus* , &c. existimant , non dixisset Evangelista , *cùm natus esset Iesus , ecce Magi ab Oriente venerunt* , nàm ecce non dicitur de re tam serà , sed potius de subitâ , & improvisâ , vel certè proximâ , & quasi præsentî dici solet , sicut compertum est ex benè multis Scripturæ Sacræ locis . Præterea , idem Evangelista narrationem ortus Domini , Angelorum nuntium , Pastorum officia , nullo alio interjecto , cum Magorum adventu connectit . Quod quidem demonstrat , Magos , paulò post Nativitatem Christi , hoc est , decimotertio die ex quo natus est Christus , ad illius cunas accessisse . Tertio , si Magi biennio dumtaxat post Natale Iesu Christi ad ejus cunas accessisset , *Herodem* , *Judææ Regem* , in vivis invenire haud potuissent , quia , ut ostendimus in Dissertatione sexta , *Herodes* , Rex , è vivis excessit anno post Natale Christi elabente . Denique , SS. Patres *Hieronymus* Epist. 17. ad *Marcellam* , & *S. Bernardus* Serm. 1. & 2. de Epiphania , disertè tradunt , Christum , in vili tugurio pannis obvolutum , à Pastoribus fuisse inventum , & à Magis adoratum . Porro , si Magi biennio dumtaxat post Christi Natalem diem Hierosolymam adventassent , puerum Iesum non in vili tugurio , seu in vico Bethleemitico , adorare potuissent , quippè quem , ut legitur in Scriptura Sacra , parentes ejus die ab ortu quadragesimo , ad purificationis officium implendum , Hierosolymam tulerant ; inde verò non ultra Bethlehem redierunt , sed *reversi sunt in Galileam , in Civitatem suam Nazareth* , ut habetur Lucæ cap. 2.

Nec obstat huic traditioni Ecclesiæ , quòd Beata Virgo in die Purificationis suæ obtulerit more pauperum par turturum , aut duos pullos columbarum : nàm in hoc potius laudare , & mirari debemus liberalitatem , ac beneficentiam Virginis , quæ brevi aurum acceptum à Magis in pauperes erogavit , nihilque sibi retinuit ; vel ipsius prudentiam , quod viaticum paravit mox fugitura in Ægyptum ; vel denique ipsius modestiam , quia non decebat , ut quæ pauper erat , ea divitum oblationem subito inferret ; ab omni quippè fastu , & ostentatione erat Virgo aliena , nec mutare conditionem illi erat animus , quam sciebat Dei Filio placuisse .

Nec

Nec magis urget alia ratio, quam opponunt adversarii, videlicet Herodem iussisse occidi pueros à bimatu, & infra, nàm primò dici potest, inter apparitionem Stellæ, & Magorum adventum intercessisse quidem tredecim dumtaxat dies, sed Herodem, irâ & furore percitum, tempus ex propria malitia ampliassè, sicut reverà ampliavit locum occisionis puerorum. Quamvis enim probè sciret Herodes tam ex propheta Michæ, quàm ex Sacerdotum, atque Scribarum responso, Christum natum esse in Bethleem, omnes tamen pueros trucidari iussit non solum in Bethleem, sed in omnibus finibus ejus. Quemadmodum ergo Herodes sibulam crudelitati suæ laxavit extrà Bethleemum sæviendo, ne fortè in ejus confinio latitaret Rex recens natus, sic stimulante furore extendit temporis periodum, ne sibi illius carnificinæ fructus periret. Sic sentit *Sacellus Chrysostomus* homil. 7. in Matthæum, ubi hæc habet: *Quod si à biennio, & infra Herodes pueros interfecit, ne mireris. Siquidem conveniens in eundem tyrannum pavor, & furor, pro abundantia cautionis, & licentia persecutionis, majus etiam tempus includit, ne quis profectò ejus ætatis, & fortè is, propter quem alii interimuntur, effugiat.* Dici etiam potest, puerulos bimos idèò ab Herode fuisse occisos, quia timebat scelestus ille tyrannus, ne puer, scilicet Christus, cui sydera famulabantur, speciem suam paulò suprà ætatem, vel infra, transformaret, sicque carnificum manus effugeret.

Respondent secundò alii Theologi: Stellam biennio antè Natale Christi Domini apparuisse in Oriente, eaque admonitis Magos de ortu proximo novi Regis, quem diù constans fama nasciturum prædicabat, se itineri dedisse, eosque biennio dumtaxat post apparitionem Stellæ Bethleemum, jàm nato Christo, adventasse. Hac autem semel admittà hypothèsi, dicunt faciliè admodum concipi posse, Magos ex Chaldæa, aut ex Perside se ad longum iter præparare, illudque intrà integrum, biennium commodè peragere potuisse; illud quippè temporis interval- lum ad totum Orbem peragrandum abundè sufficere posset.

Verùm, hæc responsio faciliè refellitur. Primò, quia Stella, quæ apparuit in Oriente, non fuit signum nascituri, sed jàm nati novi Regis, sicut colligitur ex interrogatione Magorum: *Ubi natus est Rex Judæorum? Vidimus enim Stellam ejus in Oriente, &c.* Si autem Stella biennio antè Natale Christi apparuisset in Oriente, fuisset signum non jàm nati, sed nascituri novi Regis. Præterea, si Stella biennio antè Natale Christi apparuit in Oriente, quorsum igitur Magi professionem suam tamdiù procrastinarunt, ut elapso dumtaxat biennio ab apparitione Stellæ ad cunas novi Regis pervenerint? Credibile ne est, Magos in re tanti momenti morasnectere voluisse, vel sic suum iter ordinare potuisse, ut quamvis biennio circiter ante Nativitatem Christi fuerint ab Oriente profecti, Bethleemum tamen ad præfixum Natalis Christi tempus, hoc est, decimotertio die post illius ortum acceperint? Hæc igitur respon-
sio,

ſſo, quæ etiam nec in Sanctis Patribus, nec in tota retrò antiquitate, vel minimum veſtigium habet, nullo pacto ſtare poteſt .

Reſpondent denique alii Theologi : Magos dumtaxat poſt Purificationem Beatæ Virginis ad cunas Chriſti Domini acceſſiſſe, ac proinde ex Chaldaæ, vel ex Perſide venire potuiſſe . Si enim, inquiunt illi Theologi, die decimo tertio poſt Natale Chriſti Bethleemum Magi advenſarunt, cur ergo *Herodes* ſolum poſt Purificationem Beatæ Virginis intellexit ſe à *Magis* fuiſſe deluſum ? Credibile ne eſt, impium illum Regem, qui cædem, ſanguinem, vivicomburia, crucifixiones, carnificinas inauditas ſpirabat, quique nihil intentatum reliquit, ut puerum recens natum de medio tolleret, per integrum ſemè menſem poſt Magorum adventum in utramvis aurem dormiſſe, nec per id temporis animadvertiſſe ſibi à *Magis* non redeuntibus verba data eſſe ? Profectò, qui ambitioſum, ſuſpicacem, atque crudelem Herodis animum, graphice à *Joſepho* deſcriptum, noverit, ille vix dubitabit, quin ingenti metu trepidarit Herodes, dùm Magi Bethleemum petebant, moræque impatiens ipſorum reditum anxie expeſtarit, ut quem Imperii ſibi rivalem exiſtimabat, abjectâ omni cunctatione obruncaret . Cùm igitur Herodes tantùm poſt Purificationem Beatæ Virginis intellexerit, ſe à *Magis* fuiſſe deluſum, & hac de cauſa tùm temporis, ut inquit Scriptura Sacra, omnem ſuum furorem exacuere, toroque ſævitiæ impetu in parvulos promiſcuis cœdibus debachari cœperit, argumento eſt, Magos ſolum poſt Purificationem Beatæ Virginis Herodem allocutos fuiſſe, & ad cunas Chriſti Domini acceſſiſſe .

Sed hæc reſponſio nihilò præcedenti melior eſt . Nàm, ſi Magi poſt Purificationem dumtaxat Beatæ Virginis Bethleemum perveniſſent, non fuiſſet haud dubiè Herodes animo turbatus, quandò *Magi* Hieroſolymis Chriſti, ſeu novi Regi Nativitatem nunciarunt, nec convocaret Herodes Sacerdotes Legis peritos, ut dignoſceret locum, in quo novus ille Rex, ſeu Meſſias naſciturus erat; hæc quippè Herodes jamjam perſpecta omnia habuiſſet ex his, quæ in Purificatione Beatæ Virginis contigerant, videlicet ex prædictionibus *Ainæ*, & *Simeonis* de divino Infante in Templo Hieroſolymitano factis, quæ quidem prædictiones, cùm omnium ſermone celebrarentur, earumque fama in dies percrebreſceret, Herodem latere minimè potuerunt . Accedit præterea traditio Eccleſiæ Latinæ, quæ ab initio ſaltem quinti ſæculi *Epiphaniam*, ſeu adventum, & adorationem Magorum diei ſexto Januarii, hoc eſt, antè Purificationem B. Virginis affixit, cui traditioni Eccleſiæ indiviſè ſtare debemus . Nec quemquam movere debet conjectura, quâ aiuntur illi Theologi : nàm idèò Herodes antè Purificationem Virginis ſuum furorem cohibuit, quia ſibi fortè perſuaſit, Magos à ſe dimiſſos non reperiſſe puerum, quem quærebant, eoſque pudore ſuffuſos ſua relegiſſe veſtigia, nec Hieroſolymam remeare voluiſſe, ne in vulgi fabulam abirent . At, ubi poſt Purificationem

tionem Virginis ex fama prædictionum Simeonis, & Annæ, quæ per omnium ora volitabat, intellexit se à Magis delusum, & reverà natum esse novum illum Regem sibi ab ipsis nunciatum, tunc excanduit tyrannus, & vehementer dolens de excussa sibi prædâ, impotenti furori laxavit habenas, atque è vestigio jussit omnes occidi pueros, in eam spem erectus, fore ut Christus, cujus vitæ insidias struebat, & cujus sanguinem sitiebat, in tam universalî clade mortem effugere non posset. Hoc pacto sibi, Regno, rebusque suis meliùs consultum iri putavit immanissimus ille tyrannus. Hanc difficultatem sic dirimit S. *Augustinus* lib. 1. de *Consensu Evangelistarum*, ubi hæc habet: *Omitto dicere, quot & quantis occupationibus Regia cura distendi poterat, & per plurimos dies ab illa intentione vel averti omninò, vel impediri. Illud dico, posteaquàm Herodi Magi nihil renuntiaverunt, eum credere potuisse, illos fallaci Stellæ visione deceptos, posteaquàm non invenerunt, quem natum putaverant, erubuisse ad se redire, atque etiam, timore depulso, ab inquirendo & persequendo puero quiescisse. Deindè, vulgatis rebus, quæ in Templo (scù in die Purificationis Mariæ Virginis) sacæ dictæ fuerant, Herodes se à Magis sensu delusum, & Infantes occidit.*

DICO SECUNDO; Probabiliùs esse Magos venisse ex Arabia Felice.

Probatur primò, ex Psalm. 71. *Reges Arabum, & Saba dona adducent. Et dabitur ei de auro Arabiæ.* Secundò, quia intervallum itineris ex Arabia Felice ad Hierosolyma potest intrà octiduum per Camelos peragi, teste Illustrissimo *Petro de Marca* in Opusculo de *Adventu Magorum ad Christum*, quod extat inter illius Auctoris posthuma Opuscula à *Stephano Baluzio* in lucem edita. Ex quo facili negotio intelligitur, Magos post apparitionem Stellæ ex Arabia Felice profectos, potuisse decimo tertio die post Natale Christi ad illius cunas accedere. Tertid, id patet ex donariis, scù speciebus munerum, quæ Magi obtulerunt Christo Domino, videlicet ex Auro, Thure, & Myrrha, quæ sunt aromaticum genera domestica, & propria Sabæ Regionis in Arabia Felice, ubi quoque optimum aurum gignitur, sicut scribit *Plinius* libro 12. *Histor. Nat.* cap. 14. Denique, id colligitur ex Prophetia *Balaam* libri Numerorum cap. 24. *Orietur Stella ex Jacob*, quæ prophetia permovit Magos ad quærendum novum Regem, cujus ortum Stella radians in Cælo indigitabat. Porro, hæc prophetia *Balaam* notior erat jis, qui in Arabia versabantur, quàm Chaldæis, & Persis, quia *Balaam* hanc prophetiam edidit in Arabia, quandò videlicet *Balac*, Princeps Moabitarum, eum ad populo Israelitico imprecandum inducere voluit. Probabiliùs ergò est, Magos in Arabia ad novi Syderis expectationem per prophetiam *Balaam* erectos, eo affulgente, in Messiam, novumque Regem sibi inquirendum duxisse.

Dicit aliquis, constat ex Scriptura Sacra Magos venisse ab Oriente :
atqui

atque Arabia non est Orientalis respectu Judææ, sed potius Australis; ergo Magi ex Arabia Felice non venerunt, sed ex Chaldæa, vel ex Perside. Hinc S. Thomas 3. part. qu. 36. art. 7. ait, Magos ex Perside venisse.

Respondeo, Arabiam esse vastissimam Regionem, in *Desertam*, *Petream*, & *Felicem*, distributam, situm verò Arabiæ Felicis comparatè ad Judæam esse ad Orientem. Quando enim Abraham filios, quos susceperat ex *Cethura*, uxore sua, separavit à filio suo Isaac, ne videlicet inter eos suborirentur dissidia, largitus est illis munera, scilicet bona, & possessiones assignavit ad plagam Orientalem, hoc est, in Arabia, sicut dicitur *Genesis* cap. 25. *Cornelius* etiam *Tacitus* libro 5. Historiarum scribit, Arabiam ad Orientem Judææ esse positam, sic enim habet: *Terra, finesque quæ ad Orientem vergunt (Judæi) Arabia terminantur*. Ad auctoritatem S. Thomæ dico, Angelicum illum Doctorem hanc quæstionem facti nec discutere, nec dirimere voluisse, sed eam in medio reliquisse. Id patet ex his, quæ habet Sanctus Præceptor 3. part. quæst. 36. art. 3. ad 3. *Quidam tamen dicunt eos venisse de Regione propinqua, unde fuerat Balaam, cujus doctrine fuerunt Sectatores: dicuntur autem ab Oriente venisse, vel quia de ultimis Orientis partibus venerunt secundum quosdam, vel quia de aliquibus vicinis partibus venerunt, quæ tamen sunt Regioni Judæorum ad Orientem*. Quibus verbis constat, S. Thomam ab illa quæstione facti, juxta Criticæ disciplinæ regulas penitus examinandâ, pro more suo consultò abstinere voluisse.

Advertat hæc obiter Lector, Stellam, quæ Magos perduxit ad cunas Christi, fuisse à Deo de novo creatam, non in Cælo, cui affixæ sunt Stellæ Cælestes, positam, sed in aere terræ vicino. Ita sentit Sanctus Thomas 3. part. quæst. 36. art. 7. ubi, postquam observavit alios fuisse Theologos, qui docebant Angelum, qui apparuit Pastoribus in humana specie, apparuisse itidem Magis in specie Stellæ; alios verò Theologos existimasse, quòd, sicut Spiritus Sanctus super Christum baptizatum, descendit in specie columbæ, ita apparuit Magis in specie Stellæ; his duabus relictis sententiis, probabilius cum S. Chrysost. hom. 6. in Matth. censet S. Doctor: hanc Stellam, quæ Magos ad cunas Christi perduxit, fuisse à Deo de novo creatam, non tamen in Cælo cui affixæ sunt Stellæ Cælestes, sed in aere terræ vicino, quæ secundum divinam voluntatem movebatur, & in multis à Stellis, vel fixis, vel erraticis discrepabat. Primò, quia hæc Stella non solum nocte fulgebat, sed etiam interdiu, (quod non est virtutis Stellarum, sed nec etiam Lunæ.) Secundò, hæc Stella quandoque apparebat, & quandoque occultabatur: cum enim Magi ingressi sunt Hierosolimam, occultavit se ipsam, sed ubi Hierodem reliquerunt, se ipsam Duce itineris denuò monstravit, quod Stellæ, vel fixæ, vel erraticæ præstare minimè possunt. Tertio, hæc Stella nec continuum, nec rapidum motum habebat, sed potius lentum: nam,

quandò Magi incedere debebant, ibat; cum oportebat eos stare, stabat, ad instar columnæ nubis in deserto; Stellæ autem, vel fixæ, vel erraticæ continuæ, & rapidum motum habent. Quartò, hæc Stella post ministerium *Magis* præstitum, confestim evanuit, nec unquam ampliùs visa est; at corpora Cœlestia sunt ab intrinseco incorruptibilia, & eadem sunt hodie quæ in creationis exordio. Denique, hæc Stella, quæ *Magos* ad cunas Christi perduxit, non sursùm manens partum Virginis demonstrabat, sed deorsùm descendens nativitatis Christi locum indigitabat: dicitur enim *Matth.* cap. 2. Quòd *Stella*, quam viderant *Magi* in Oriente, antecedebat eos, usque dum veniens staret supra, ubi erat *puer*. Cæterùm, hæc Stella, quæ *Magis* apparuit in Oriente, eosque toto itinere præcellit, ab illis, dum Hierosolymam pervenerunt, duplici de causâ se subtraxit. Primò, quia voluit Deus, ut *Magi*, Hierosolymis oraculis Prophetarum de loco Nativitatis Messie ab ipsismet Judæis confirmati, ardentiori fide expeterent eum, quem Stellæ claritas, & prophetiæ manifestabat auctoritas. Secundò, quia voluit etiam Deus, ut Judæi omninò inexcusabiles essent, quippè qui, dùm interrogantibus *Magis* locum nativitatis Regis Judæorum, juxta Prophetarum oracula incumbentèr indicarunt, ipsi tamen deplorandâ cæcitate similes facti sunt *Fabris Arcæ Noe*, qui aliis, ut evaderent, præstiterunt, & ipsi diluvio perierunt: *Asdierunt*, inquit, *Augustinus* in *Serm.* Epiphaniæ, & abjecerunt inquisitores, dixerunt, & remanserunt *Doctores*, similes *lapidibus milliaris*, qui viam ostendunt, nec ambulant.

Hactenus de his, quæ *Magos* spectant, satis superque diximus. Nunc duo *Dubia*, quæ circâ itragem infantium ab *Herode* editam moveri solent, paucis excutiemus. Primum *Dubium* est: An *Herodes* biennium post Natale Christi expectaverit ad occidendos pueros? Alterum *Dubium* est: An *Herodes*, in illa cruenta, quam edidit, infantium carnificina, filium suum biñum occiderit?

Ad primi itaque *Dubii* resolutionem dico: *Herodem* biennium post Natale Christi non expectasse ad infantes trucidandos. Idque probatur primò, quia *Herodes*, sicut in sexta Dissertatione ostendimus, vitâ functus est anno elabente post Natale Christi; non ergò potuit *Herodes* expectare biennium post Natale Christi ad pueros occidendos. Secundò, quia verisimile non est, crudelissimum illum Regem, qui in Christi recens nati exitium totus incumbabat, furorè, quo in transversum agebatur, per biennium cohibere, & dissimulare potuisse.

Dices: *Sanctus Thomas* 3. part. quæst. 36. art. 6. ad 3. hæc habet: *Et secundùm hoc Herodes non statim recedentibus Magis, sed post biennium pueros interfecit, vel quia dicitur accusatus Romanis venisse: vel aliquorum periculerum terroribus agitatus à cura interficiendi puerum interrim desistisse: vel quia potuit credere Magos fallacis Stellæ visione deceptos, postquàm non invenerunt, quem natum putabant, erubuisse ad se redire,*

dire, &c. Ergo ex S. Thoma Herodes biennio dumtaxat post Natale Christi funestam edidit infantium cædem.

Respondeo, Sanctum Thomam eò loci, non quid ipse sentiat, sed aliorum tantummodò referre opinionem, quam ne quidem examinat, nedùm approbat. Norunt quippè omnes, Sanctum illum Doctorem in ea, quàm elucubravit, Summâ tripartitâ, quæstiones, quæ vel ad Criticam disciplinam, vel ad Historiam Ecclesiasticam pertinent, discutendas non suscepisse; tùm quia, in rem Theologiæ Candidatorum brevitati studere voluit, & compendiosè pertractare ea, quæ alii ante ipsum Theologi, non sine aliqua temporis jactura longo latoque calamo tractare solebant. Tùm quia, Sanctus Doctor Theologiam Scholasticam, non positivam, quam tamen apprimè callebat, adornare sibi proposuit. Nunc verò convenit inter omnes eruditos, qui in Historia sunt versati, Herodem quidèm, postquàm Rex Judææ à Romanis fuit declaratus, tēr Romam navigasse, trinam tamen illam navigationem ab eo fuisse susceptam ante Natale Christi. Enim verò, *Iosephus* lib. 16. Antiq. cap. 1. narrat, Herodem venisse Romam, & indè filios suos *Alexandrum*, & *Aristobulum*, optimis jam Romæ disciplinis instructos, in Palæstinam secum duxisse. Et in cap. seq. recitatis nuptiis, quas iidem filii Herodis nobilibus fœminis copulati celebrarunt, ait: *post hoc audito, quod M. Agrippa ex Italia redisset in Asiam, profectus illò invitavit eum*, Herodes, in *Regnum suum*. Agrippa denuò ab Augusto Imper. in Orientem missus fuit anno Urbis Romæ conditæ 738. sicut ad illum annum testatur *Dio* lib. 54. igitur Herodes anno superiori, scilicet Urbis Romæ conditæ 737. Romam venerat, ubi ab Augusto fuit humanissimè exceptus, teste *Iosepho* initio laudati libri. Prima itaque Herodis navigatio in Italiam, seu Romam, præfigi debet anno Urbis Romæ conditæ 737. ac proindè præcessit duodecim circitèr annis Natale Christi, quod, sicut in Dissertatione sexta probatum est, anno Urbis Romæ conditæ 749. illigandum est. Præterea, idem *Iosephus* cap. 6. ejusdem lib. 16. narrat, Antipatrum, Herodis filium, Romæ degentem, frequentibus litteris fratribus suis Alexandro scilicet, & Aristobulo, insidias struxisse, veritum ne illi, se absente, paternam gratiam, quâ exciderant, recuperarent. Quò factum est, ut Herodes, ergà ipsos indignatione commotus, Romam navigare decreverit, & ibi filios apud Cæsarem accusare, ne propter indignationem parùm ergà filios pius videretur. Sed cùm Romam pervenisset, non inventum ibi Cæsarem, Aquilejam ad eundem perrexit. Et in cap. 8. recitat *Iosephus* orationem, quâ Alexander illata sibi à patre suo Herode crimina apud Cæsarem confutavit, additque, Augustum hac oratione persuasum, & induc-tum fuisse, ut Herodem cum filiis in concordiam revocaret. *Cardinalis Norisus* Dissert. 2. de *Cenotaphiis Pisanis* evidentèr ostendit tam ex rebus ab Imper. Augusto gestis, quàm ex vetustis inscriptionibus ac characteribus chronologicis id contingisse anno Urbis Romæ conditæ 741.

Unde sequitur, secundam navigationem Herodianam in Italiam, seu Romam, antevertisse septem circiter annis proprium Natale Christi. Denique de anno, quo Herodes tertium Romam venit, etsi, propter silentium Iosephi, non una sit omnium Scriptorum sententia, omnes tamen ad unum fatentur, hanc tertiam navigationem in Italiam fuisse ab Herode susceptam ante Natale Christi, sicut videre est, apud Cardinalem Norisium loco mox laudato. Idque confirmari potest ex his quæ in Dissertatione sexta diximus, nam, cum Herodes unico dumtaxat anno post Natale Christi superstes fuerit, & sub finem vitæ suæ acerbis doloribus, atque acutissimo morbo vexatus fuerit, incredibile planè est, Herodem post Natale Christi & Magorum adventum, venisse Romam, ut se se apud Cæsarem ab impati sibi accusationibus purgaret, suamque coram ipso causam peroraret. Cardinalis Baronius ad annum I. Christi Num. 48. refert quiddam observat, explodi debere commentum illorum, qui dixerunt, idcirco pueros bimulos ab Herode, Rege, fuisse occisos, quod tunc temporis ipse Romam abierit, accusatus à filiis, neque usque ad biennium redierit Palæstinam; in hoc tamen hallucinatus est Eminentissimus ille Annalium Parens, quod velit, Herodem, Regem, bis tantum, tempore Regni sui, Romam venisse. Sic enim scribit: *Hic tantum refellendum est illorum commentum, qui dixerunt, idcirco bimulos ab Herode fuisse iussos occidi, quod tunc temporis ipse Romam abierit, accusatus à filiis, neque usque ad biennium redierit Palæstinam. Hæc licet conficta esse videantur, tamen esse falsa Iosephi testimonio vincuntur. Constat quippe ejusdem auctoritate lib. 16. Antiq. Iud. cap. 7. 8. & 9. Herodem, tempore Regni sui, Romam bis concessisse non quidem accusatus à filiis, sed potius ipse accusaturus filios, illuc se contulit, indeque in Palæstinam est reversus ante annum vigesimum octavum Regni sui: Quo anno, Olympiade centesimâ nonagesimâ secundâ Cæsaream (Urbem) in honorem Cæsaris dedicavit. Quod certè tempus neque secundum annos Regni Herodis, ab eodem Iosepho supputatos, neque secundum initam à nobis superius rationem, ejusdem Regni, tempori Natalis Domini aptari potest. Et multò minùs posterior ejusdem Romam adventus, cujus meminit Iosephus eodem libro cap. 13. ut rectè inveniendi veritas se ante oculos offert. Hactenus Baronius, qui licet in hoc erret, quod dicit, Herodem bis tantum, tempore Regni sui, Romam venisse, cum tamen certissimè ex Iosepho constet, Herodem, tempore Regni sui, Romam ter venisse; verè tamen & apertè Baronius refellit commentum illorum, qui dixerunt, idèd Pueros bimulos ab Herode fuisse occisos, quia Herodes tum temporis Romam abierit, accusatus à filiis, indeque dumtaxat post expletum biennium Palæstinam fuerit reversus. Idem commentum repudiat Henricus Spondanus in Epitome Annalium Card. Baronii ad annum I. Christi Num. XI. ubi sic loquitur: Sed quod nonnulli scripserunt, idcirco bimulos iussos occidi, quod tunc temporis Herodes Romam abierit accusatus à filiis, neque usque ad biennium in*

Palæ-

Palestinam redierit : hoc ex Iosepho falsum convincitur , cujus testimonio exploratum habetur , cùm Herodes toto tempore Regni sui Romam sæpius concesserit , filiorum suorum causâ , nullam ejusmodi ipsius professionem aptari posse tempori Natalis Christi .

Ad secundi Dubii propositi resolutionem dico , Herodem in eâ , quam edidit , strage infantum , non occidisse filium suum bimulum . Idque probatur primò , quia nulli Scriptores memoriæ unquam prodiderunt , Herodem in hac laniena infantum Bethleemiticorum , infantem suum bimulum occidisse , quamvis aliundè atris coloribus depingant sævitiam ferocissimi illius tyranni , qui barbarie plusquam scythicâ interfecit tres suos jam adultæ ætatis filios , nimirum Alexandrum , Aristobulum , & Antipatrum . Secundò , qui credibile est , Herodem senio confectum (ieptuagesimum quippè annum , teste *Iosepho* , agebat dum obiit) genuisse biennio ante mortem filium , quem jussit cum cæteris occidi ? Tertiò , ratio , quæ permovit Herodem ad cædem infantum Bethleemiticorum , est quia persuasum ex Scriptura Sacra habebat , quemdam esse Bethleemi natum infantem , qui futurus erat Rex Judææ : atqui hæc ratio locum , habere non potuit in bimulo Herodis filio , qui potius Judææ Regnum in familia Herodis conservasset ; nihil ergò causæ erat , cur Herodes in hunc filium suum bimulum sæviret . Denique , Herodes , teste Scripturâ Sacrâ , jussit tantum occidi pueros à bimatu , & infra , qui erant in Bethleem , & in omnibus finibus ejus ; Porro , verosimile non est , Herodis conjugem filium peperisse Bethleemi , & non in Regia , seu Hierosolymitana Urbe , aut filium , si quem peperit , fuisse altum , & educatum Bethleemi , & non Hierosolymis . Cùm igitur puer ille Herodis (dato quod extiterit) fuisset enutritus , & educatus Hierosolymis , non video sanè quâ ratione Herodes filium suum bimulum , nec Bethleemi natum , neque nutritum , vnâ cum cæteris puerulis Bethleemiticis trucidare voluerit . Patet itaque Herodem in illa infantum carnificina filium suum bimulum non occidisse . *Baronius* tamen , Annalium Ecclesiasticorum , parens , ad annum primum Christi censet , Herodem in cæde infantum Bethleemiticorum de medio quoque sustulisse filium suum recens natum , idque probat ex testimonio *Macrobii* , Auctoris Ethnici , qui lib. 2. Saturn. cap. 4. hæc habet : *Cùm audisset Augustus , inter pueros , quos in Syria Herodes , Rex Judæorum , intra biennium jussit occidi , filium quoque ejus occisum , ait : Melius esse Herodis porcum esse , quàm filium .* Ex quibus *Macrobii* verbis infert Eminentissimus ille Cardinalis , filium Herodis bimulum inter pueros Judæos Bethleemitas fuisse à Patre occisum . Verum , id ex *Macrobii* testimonio colligi haud posse meritò asserit Illustrissimus Abrincensis Episcopus *Daniel Huetius* Demonstrat. Evang. Propos. 9. cap. 25. ubi ostendit , *Macrobiu* potius notare , seu indigitare , voluisse Antipatrum , Herodis filium , quem fugam è carcere meditantem Pater ipsius Herodes interfici jussit , paulò antequam è vita migraret .

Quam

Quam ob rem, quandò *Macrobius* scribit, Herodis filium inter pueros Bethleemitas fuisse occisum, id non est sic intelligendum, quasi ille Herodis filius fuerit unus ex his pueris, sed quòd eodem circitè tempore, quò pueri illi interfecti sunt, & hic quoque filius Herodis, seu Antipater, è vivis fuerit sublatus. Consule doctissimum illum Præfulem loco mox memorato, & *Casaubonum* Exercit. 2. in Annales Baronii paragrapho 17. Addo etiam, notum esse omnibus linguæ Latinæ peritis, particulam, *inter*, quâ utitur *Macrobius*, dùm ait: *inter pueros* &c. tempus plerumque designare, non adnumerationem; sicut, exempli gratiâ, dùm dico: *hoc mihi contigit inter loquendum*, idest, *tempore quo loquebar*. Sic *Cicero* Philipp. 2. ait: *inter canam hoc illi accidit*; hoc est, *tempore canæ*; ita pariter, dum *Macrobius* ait: *inter occisos pueros Bethleemitas trucidatum fuisse Herodis Regis filium*, id unum dumtaxat significat, quo tempore occisi sunt pueri Bethleemitz, occisum itidè fuisse Antipatrum, Regis Herodis filium, quamvis ex eorum bimulorum Infantium numero non esset Antipater, utpotè qui jam ætate grandævus erat, & alia longè de causa, jussu Patris Herodis, fuit ex hac vita sublatus.

Ex hoc *Macrobi*i testimonio confirmatur veritas Historiæ de cæde infantium bimulorum, quam sacer Evangelista *Matthæus* cap. 2. à truculentissimo Tyranno Herode editam fuisse perhibet, & quæ in dubium revocari non debet, etiamsi *Josephus*, Antiquitatum Judaicarum Scriptor, eam infideli silentio prefferit. Nam primò: cur fidem non habebimus *Sancto Matthæo*, qui Spiritu Sancto afflatus suum conscripsit Evangelium, & Christi Servatoris nostri Historiam simplicem, candidam, ab omni tùm affectatione, tùm ostentatione alienam, & characteribus evidentissimis hominis probi, ingenui, & sinceri consignatam? Secundò, quid præmii in hac narratione de infanticidio sub Herode edito sperare poterat *Matthæus*? vel potius, quam infamiam pertimescere non debebat, si à consuetâ narratione, & quidem rei recenter, & apud Judæos factæ, historiam Christi auspicari ausus fuisset? Tertiò, constat, *Josephum* non solum multa ad res Judaicas pertinentia in veteri Testamento prætermisisse, verùm etiam pauca admodùm scripsisse de Christo Domino, & nonnulla, contra veritatem historiæ Evangelicæ, dissimulasse, sicut exempli causâ, *Josephus* lib. 18. Antiquit. cap. 10. ait: *Joannem Baptistam fuisse ab Herode interfectum*, eò quòd timeret, ne tanta Joannis Baptistæ auctoritas, quam ad ipsum confluentium populorum concursus ei conciliaverat, defectionem aliquam pararet: *Ex sola hac suspitione Herodis*, inquit *Josephus*, *vinculus in Castellum Machærunta abducitur Joannes*, *ibique obtruncatur*; sicque *Josephus* veram de industria dissimulat causam, quæ movit Herodem ad interficiendum Joannem Baptistam. Constat etenim ex Evangelio Marci cap. 7. Joannem ab Herode Antipa fuisse detrusum in carcerem, & morti adjudicatum propter Herodiadem uxorem *Philippi* fratris sui, quia duxerat eam; dicebat enim

Joan-

Joannes Herodi : non licet tibi habere uxorem fratris tui . Ille S. Hieronymus Comm. in Caput 14. *Matthæi* ait, quod *Joannes Baptista* increpide Herodem redarguit, malens periclitari apud Regem, quam, propter adulterationem, immemor esse præceptorum . Denique, mirum non est, si *Josephus* infanticidium ab Herode editum silentio obvolverit : exscripsit quippe ille Auctor *Nicolaum Damascenum*, qui, ut omnes probè norunt, laudes Herodis potius celebrandas susceperat, quam veram describendam vitæ hujus Principis historiam . Talem fuisse Nicolai Damasceni genium perdoctè observat *Hugo Grotius* in epistola ad *Pereskium* . Cum igitur *Nicolaus Damascenus* silentio obvolverit infanticidium, in quo Herodes culpari poterat, non est mirum, si *Josephus* illius exscriptor illud ignoraverit .

Credere itaque debemus S. *Matthæo*, referenti infanticidium Bethlehemiticum, cui circumstantiæ, quæ præcesserunt, & à sacro illo Evangelista referuntur, occasionem dederunt ; nimirum indicium de Messia recens nato, quem sui Regni æmulum rebatur Herodes, confirmatio Prophetica Nativitatis Christi in Bethlehem, prædictiones Annæ, & Simeonis in Templo factæ de Christo, furor Herodis se à Magis delusum esse existimantis . Hæ, inquam, circumstantiæ, quæ animum Herodis occupabant, impulerunt impium illum, & sanguinarium Tyrannum ad patranda tam belluinam & horrendam infantium cædem, ut Christo, quem unice extinctum cupiebat, necem inferret . At, Deus, cujus antè oculos frustrà jacitur rete, evanidum reddidit hoc nefandum sceleratissimi illius Principis de divina necanda prole consilium ; nam Magi accepto responso in somnis ne redirent ad Herodem, per aliam viam reversi sunt in Regionem suam ; & Maria, impletis juxta Legem purgationis diebus, confestim cum Marito, & Puero fugit in Ægyptum, quò truculenti Herodis manus, quantumvis longæ, non pertingebant . Fugit autem Christus in Ægyptum, tum ut impleretur, quod dictum est per Prophetam Oseam : *Ex Ægypto vocavi filium meum*, tum etiam, ut Christus cederet temporori, non Herodi . Nam, si Christus mactatus fuisset in grege lactentium, mors ei casus fuisset, non voluntas, non virtus, sed infirmitas, necessitas, non potestas . Ut ergo staret Legis veritas, Prophetiæ fides, Psalmistæ testimonium, & Redemptionis adimpleretur Mysterium, Christus, sicut docent Sancti Patres, fugit in Ægyptum, & ex impii Tyranni sævitia subductus omnes ipsius conatus elusit . Si enim puerulus Iesus fuisset in Iudæa, vel in Galilæa relictus, facile ejus Vitæ insidiari potuisset Herodes Magnus, qui non solum in Iudæa, sed in Galilæa dominabatur, atque integrum Iudæorum Regnum tum temporis obtinebat . Hujus quippe Iudæorum Regni discissio, seu divisio in quatuor partes ac Tetrarchias dumtaxat post obitum Herodis Magni facta est, videlicet in *Judæam*, proprii nominis dictam ; in *Samariam* & *Idumæam*, quæ pars data est *Archelao* ; in *Galilæam*, quæ data est alteri

Hc.

Herodi, cognomento *Antipæ*; in *Ituream*, & *Traconidem*, quæ *Philippo* concessa fuit; denique in *Abylinam*, quam *Lysanias* obtinuit, sicut legere est apud *Lucam*. cap. 3. *Evang.* & apud *Iosephum*, *Hebræum*, lib. 10. Antiquit. Iud. cap. 10. Consultò itaque extra fines dominationis & potestatis *Herodis Magni*, Iudæorum Regis, fugam arripere iussus est *Iosephus*, & in *Ægyptum*, abiectâ omni cunctatione, se se recipere, ubi *Herodes* nullâ authoritate ac potestate pollebat, subindèque vita pueruli *Jesu Christi* periclitari non poterat. Quâ in re *Herodis* Regis crudelitatem, & impotentiam carpit, & meritò ridet, *S. Leo*, Papa, Sermone 1. in *Epiphaniam*, ubi his verbis in *Herodem* invehitur: *O Cæca stultæ emulationis impietas, quâ perturbandum putas divinum tuo furore consilium! Dominus Mundi temporale non querit Regnum, qui præstat æternum. Quid incommutabilem dispositarum rerum ordinemvertere, & aliorum facinus præoccupare conaris? Mors Christi non est temporis tui. Antè conandum est Evangelium; antè, prædicandum est Dei Regnum; antè, sanitates donandæ; antè, faciendâ miracula. Cur quod alieni futurum est operis, tui vis esse criminis? Et non habiturus es ædum sceleris, in solum te reatum præcipitas voluntatis? nihil hac molitione proficis, nihil peragis. Qui voluntate natus est, sui arbitrii potestate morietur. Et rursus Serm. 4. in Epiph. idem Summus Pontifex sic alloquitur *Herodem*: Frustrâ in suspectum tibi puerum sævire moliris. Non capit Christum Regio tua, nec Mundi Dominus potestatis tuæ Sceptri est contentus angustiis. Quem in *Iudæa* regnare non vis, ubique regnat, & felicius ipse regnares, si ejus Imperio subdereris. Cur sincero officio non facis, quod subdolâ falsitate promittis? Perge cum Magis, & verum Regem suppliciter adorando venerare. Sed tu, *Judaicæ* sequacior cæcitatibus, non imitaris gentium fidem, corque perversum ad crudeles convertis insidias, nec illum occisurus, quem metuis, nec jis nociturus, quos perimis.*

Advertat hîc primò Lector, infantium, qui ab *Herode* occisi sunt, numerum non exprimi quidem à *Sacro Evangelista Matthæo*, sed à *Græcis* in suo *Menologio*, & ab *Æthyopiis* in sua *Liturgia* extendi ad quatuordecim millia, quod etsi incertum sit, non est tamen difficile creditu, nec fabulæ loco habendum, maxime cùm id temporis *Iudæa*, teste *Iosepho*, populatissima esset. Non ergo audiri debet *Bollandus*, qui *tom. 1. mensis Maii pag. 57.* asserit, istum quatuordecim millium infantium occisorum numerum ad cæteras *Græcorum* fabulas esse adjiciendum. Hos innocentes pro Christo occisos *Ecclesiâ* colit ut Martyres, eosque Martyres appellant *Sancti Patres Irenæus* lib. 3. cap. 3. *Cyprianus* Epist. 56. & *Petrus Chrysologus* Sermonibus 152. & 153. non quòd in illis fuerit acceleratus usus liberi arbitrii & rationis, sicut quidam existimant, teste *S. Thoma* 2. 2. q. 124. art. 1. ad 1. sed quia, ut inquit *Sanctus ille Doctor*, Martyrii gloriam, quam in aliis propria voluntas meretur, parvuli isti Dei speciali beneficio sunt assequuti. Effusio enim

san-

sanguinis pro Christo, aut pro gloria Dei, vicem obtinet Baptismatis, unde, sicut Baptismus in parvulis solâ Dei gratiâ per meritum Christi operatur ad obtainendam gloriam vitæ æternæ: ita effusio sanguinis propter Christum in parvulis solâ Dei gratiâ per meritum Christi proficit ad lauream martyrii adipiscendam. Quamvis ergo cunabula Christi infantibus Bethleemitanis funesta in speciem esse videantur, reverâ tamen ipsis gloriosâ fuerunt, cum ex eorum numero ingentem Martyrum turbam sibi Christus sacram esse voluerit, & ex eorum ore perficere laudem ad destruendum inimicum & ultorem.

Utrum autem *Joannes Baptista*, tenellus adhuc & necdum anniculus, adnumerari debeat his pueris Bethleemiticis, à crudeli Herode Rege ad necem quæsitis? non convenit inter omnes. *S. Petrus*, Patriarcha Alexandrinus, in Regulis Ecclesiasticis, à sexta Synodo Æcumenicâ probatis atque receptis, asserit, *Ioannem Baptistam* his pueris Bethleemiticis ad necem quæsitis esse accensendum, qui tamen parentis sui *Zacharie* curâ ac diligentia ab impii Herodis ferro tempestivè subductus est; idque ait, in causa fuisse, cur *Zacharias*, pater *Joannis Baptistæ*, jubente Tyranno Herode, fuerit occisus Templum inter & Altare. *S. Petri*, Alexandrini, hæc verba sunt: *Cum quibus* (pueris nimirum Bethleemitis) *Herodes & alium prius natum infantem, cum interfecturus quævisset, & non invenisset, Patrem ejus, Zachariam, interfecit inter Templum & Altare, cum effugisset filium cum Matre Elizabeth.* Petro Alexandrino succinit *Nicephorus Callixtus* lib. 1. Hist. Eccles. cap. 8. ubi ait, *Ioannem Zachariæ filium, unâ cum Matre Elizabetha in speluncâ quadam ad Regionem montanâ fuisse servatum, & ibi Herodis sanguinariam manum effugisse.* Hanc Petri Alexandrini, & Nicephori Callixti sententiam improbant alii Scriptores, ajuntque, tenellum *Ioannem Baptistam* non fuisse à truculento Herode ad necem quæsitum, quia *Ioannes Baptista* in montanis Judææ natus erat; ibidemque à parentibus alebatur, quò non pervenit funestum Edictum *Herodis*, qui procul inde pueros jussit occidi, eos videlicet, qui erant in Bethleem, & in finibus ejus. Sed, quamvis verum sit, *Herodem* jussisse tantum occidi pueros in Bethleem & in finibus ejus, nihil secus vero quàm simillimum videtur, *Herodem*, publico rumore excitatum eorum, quæ in pueri *Joannis Baptistæ* ortu mira ac stupenda contigerant, atque per ora omnium volitabant, facile sibi persuasisse, illum esse Christum, ac subindè novum ac peculiare de illo morti tradendo mandatum dedisse. Quocirca, ipse, licet super hac re quidpiam certò, silente præsertim Scripturâ Sacrà, pronunciare non ausim, probabilem tamen esse censeo sententiam *S. Petri Alexandrini*, & *Nicephori Callixti*, qui existimant, *Ioannem Baptistam*, tenellum & anniculum, fuisse cum pueris Bethleemitis ab *Herode* quæsitum ad necem, & ab eâ singulari divinæ providentiæ beneficio, piâque Parentum suorum curâ ac diligentia ereptum.

Advertat secundò Lector : Edictum Herodis Regis de occidendis pueris Bethleemiticis esse omninò diversum ab illo Edicto, quo impius ille Rex, ingravescente ipsius morbo, sicut scribit *Iosephus* lib. 17. Antiqu. nobilissimos Judæorum undique Jerichuentem accivit, & in hyppodromo conclusit, datis mandatis *Salome* sorori, & ejus viro *Alexa*, ut, se extincto, per milites interficerentur, quò videlicet Judæi lugendi causam haberent, aliqui lataturi de illius interitu. Ratio est, quia illud Edictum Herodis de occidendis illis nobilissimis Judæorum viris non fuit executioni mandatum, sicut testatur *Iosephus*, qui ibidem refert, *Salome* mortuo Herode, & antequam ipsius mors fuisset propalata, omnes Judæos in hyppodromo conclusos dimisisse, dicendo : Ita Herodem jussisse. At Herodis Edictum de trucidandis pueris Bethleemiticis executioni traditum fuisse, vivente adhuc Herode, scribit *Sanctus Matthæus* cap. 2. Confundi etiam non debet cædes infantium Bethleemiticorum cum illa cæde, quâ Herodes paulò antè suum obitum, sicut ibidem narrat *Iosephus*, *Matthiam Margolothum*, ejusque socios, doctissimos Judæorum & Interpretes Legis præstantissimos, vivos exuri jussit ob deturbatam Aquilam auream, quam supra majorem Templi portam ipse Herodes contra Legem posuerat. Ratio est, quia certissimè constat, *Matthiam Margolothum*, ejusque socios, ætatis jam provectæ viros fuisse, ac subindè illorum cædem nihil commune habere potuisse cum strage infantum, quos Bethleemi, & in omnibus finibus ejus à bimatu & infra jussit Herodes occidi.

QUÆRES IN FINE HUIUS DISSERTATIONIS: *Utrum in Ecclesia sit per antiqua festivitas Epiphaniæ, seu Theophaniæ?*

Respondeo: Per antiquam esse, semperque in Ecclesia fuisse celeberrimam Epiphaniæ festivitatem, quæ peragitur die sextâ Januarii. Primò, quia Ecclesia in hacce festivitate tria recolit Mystéria, seu adorationem Magorum, Baptismum Christi, & miraculosam conversionem aquæ in vinum factam à Christo in Canâ Galilææ. Secundò, Deus hanc Epiphaniæ solemnitatem perpetuo miraculo in Oriente sanctificavit. Omnes enim, teste Sancto Chrysostomo tom. 1. hom. 24. in hac solemnitatem sub median noctem cum aquati fuerint, latices domum referunt, & reconducunt, ac per integrum annum conservant, utpotè quoddam hodierna die sanctificata sunt aquæ; sitque miraculum evidens, dum nihil temporis longinquitate aquarum illarum natura vitiat; sed integro anno, atque adeò biennio & triennio sæpè, quæ hodiè fuit hausta, incorrupta, & recens permanet; ac post tantum temporis cum iis, quæ fuerint è fontibuseductæ, certat. Doctissimus P. Thomassinus Tract. de celeb. Fest. lib. 2. cap. 7. testatur, hanc consuetudinem etiamnùm observari ab omnibus Orientis Christianis, quamvis sint inter se variis Sectis divisi. Quin etiam, Cl. Pagius ad ann. 29. Christi, ait: quoddam *Iosephus Georgerinus*, Archiepiscopus Samos in Insula Archipelagi, cùm anno 1676. eadem Epiphaniæ die in Aquis

Civitate in Galliis versaretur, aquam in Ecclesia consecravît, & in ea, juxta Ecclesiæ Orientalis ritum, pueri Jesu Statuam, tēr immerit, Baptismi Christi cæremoniam solemniter renovando, cujus aquæ phiala plena conservata per multos annos incorrupta permansit, ac fortè diutius conservata fuisset, si illam phialam frangi non contigisset. Denique, Epiphaniæ festivitatem semper in Ecclesia celeberrimam fuisse, ex eo potissimum colligitur, quod quidam Imperatores, licet aliundè impii, hanc tamen solemnitatem unâ cum populo in Ecclesiis celebrarunt. Observat quippè *Marcellinus* lib. 21. Imperatorem Julianum, qui postea turpi apostasi à Fide Christiana defecit, Epiphaniæ festivitatem unâ cum Christianis celebrasse: *Et ut hæc*, inquit, *interim celarentur, seriarum die, quem celebrantes mense Januario Epiphaniam dicebant, progressus in Ecclesiam, solemniter Numine adorato, discessit.* Idem de Valente Imperatore, *Ariano*, narrat *S. Gregorius Nazianzenus* Oratione vigesima, in qua *Sancti Basilii* pangit encomium.

P R O S A,

Quæ in quibusdam Ecclesiis Gallicanis inter Missarum solemnias canitur in die Epiphaniæ.

AD Jesum accurrite,
Corda vestra subdite
Regi novo gentium.

Stella Christum prædicat,
Intus fides indicat
Redemptorem omnium.

Hæc afferte munera
Voluntate liberâ
Sed munera cordium.

Hæc erit gratissima
Salvatori victima
Mentis sacrificium.

Aurum offert charitas,
Et myrrham, austeritas;
Et thus desiderium.

Auro Rex agnoscitur,
Homo myrrhâ colitur,
Thure Deus gentium.

Judæa gaudentibus
Non invidet gentibus
Retectum Mysterium.

Post Custodes ovium
Se Magi Fidelium
Jungunt in consortium.

Qui Judæos advocat
Christus, Gentes convocat
In unum tugurium.

Bethleem sit hodie
Totius Ecclesiæ
Nascentis exordium.

Regnet Christus cordibus,
Et victis rebellibus,
Proserat Imperium.

DISSERTATIO NONA

*De Circumcisione, & aliis Legalibus circa puerum
IESUM observatis.*

CHISTUS Dominus octavâ die à Nativitate sua, hoc est, primâ die mensis Januarii, quam olim mille prophanis ritibus, epularum scilicet luxu, Spectaculorum infantiâ, & aliis id genus abominandis superstitionibus celebrare, seu potius contaminare, solebant Ethnici, fuit, juxta præceptum Legis Mosaicæ, circumcissus, sanguinisque sui primitias Deo Patri obtulit, velut artham & pignus totius pretii, quod in ara Crucis pro omnium hominum, maximeque Fidelium, redemptione persolaturus erat totum suum sanguinem fundens. De Ministro Circumcisionis Christi, & de cultro, quo circumcissus est, an scilicet ferreus, lapideusve fuerit? Silet Scriptura Sacra, nec nos ea curiosius inquirere debemus, quæ Deus in Sacris Litteris religiosi silentii sipario obtexit. Hoc unum certissimè constat, Divino Infanti Augustissimum nomen JESU, Angelo prænunciante, fuisse in Circumcisione inditum, quod quidem ineffabile Nomen, ut docet *S. Thomas* 3. p. q. 37. art. 2. idem sonat ac Salvator. Undè, in veteri Lege quidam eodem nomine fuerunt donati propter aliquam temporalem & particularem salutem, quam attulerunt. Sic JESUS appellatus est filius Nave, qui Moyse successit, & populum Israeliticum à Moyse ex Ægypto liberatum, in Terram Promissionis deduxit. Eodem etiam nomine fuerunt olim insigniti *Iosedech* Sacerdotis filius, & *Sirach*, qui Christi Servatoris typum gesserunt. At, longè potiori ratione hoc nomen JESU fuit Christo Domino impositum, quippè qui ut omnium hominum Salvator sedentibus in umbra mortis, & durissimis peccatis, ac Diaboli vinculis obstrictis cunctis gentibus lucem, libertatem & salutem erat allaturus. Complectitur autem hoc nomen JESU omnia nomina, quibus Messias à Prophetis prænunciabatur nominandus, *Isaïa* cap. 7. *Et vocabitur nomen ejus Emmanuel*. Et cap. 8. *Vocabitur nomen ejus, & cetera*, spolia detrahens, festina prædari. Et cap. 9. *Vocabitur nomen ejus Admirabilis, Consiliarius, Deus, Fortis, Pater futuri seculi, Princeps pacis*. Denique, *Zacchariæ* cap. 9. *Ecce Vir, Oriens nomen ejus*. Cum enim hæc omnia nomina, quæ à Prophetis prædicta sunt Filio Dei divinitus imponenda, salutem, quam nobis daturus erat, aliqua ex parte attingerent, comprehenduntur in hoc nomine JESU, quod universæ salutis vim, causam, rationemque complectitur; Propter quod, inquit Apostolus ad Philippen- ses cap. 2. *Deus dedit illi, seu Christo, nomen, quod est super omne nomen,*
ut

ut in nomine JESU omne genuflectatur. Legi potest super hac re S. Bernardus Serm. 2. de Circumcisione Domini, & Serm. 15. in Cantica, ubi in explicando sacratissimo Nomine JESU cor suum effundit, totisque ingenii, & eloquentiæ suæ viribus omnes ad amabilißimi illius nominis timorem simul & amorem efficacissimè adhortatur. Hic dumtaxat paucis explicabo cur Christus Dominus voluerit circumcidi, offerri in Templo, & alias, quamdiu vixit, Legis Mosaicæ observare caeremonias.

DICO ITAQUE: Conveniens fuisse Christum circumcidi, & offerri in Templo.

Prob. primò ex causis, propter quas Christus circumcidi voluit, quas inter S. Epiphanius hæresi 30. quæ est Ebionitarum, istas recenset: quod si, inquit, nobis obiciant, cur igitur circumciscus est Christus? ita à nobis audient. multis enim de causis id sustinuit. Primùm, ut se carnem reverè induisse monstraret, propter Manichæum, hæterosque qui similitudine quadam, ac specie dumtaxat apparuisse docuerunt. Deinde, ut corpus divinitati consubstantiale non esse demonstraret, ut Appollinaris existimat: nec è Cælo delatum in terras, qui Valantini error fuit. Tum ut ejus olim circumcisionis Auctor fuerat, eam ad adventum usque suum observatam fuisse meritò comprobaret, atque ut omnem Judæis excusationem eriperet. Nisi enim circumciscus foret, hoc ad sui purificationem asserre potuissent: nos Christum præputio præditum probare nequivimus. Præterea verò, eum oportebat, qui Abrahamo circumcidendi sui mandatum ediderat, ut ad veri & aspectum fugientis adumbrandum imaginem apparens illud signum & aspectabile præferret, ratum illud in sua Circumcisione facere. Circumcisionem denique spontè subiit, ut eà perfunctus nihil jam esse necessariam ostenderet, sed aliam, longè præstantiorem, scilicet Circumcisionem cordis. Hastenus S. Epiphanius, cujus rationibus, tres alias cur Christus circumcidi voluerit, adjungit Doctor Angelicus 3. p. q. 37. art. 1. Prima est, ut obediendi virtutem nobis suo commendaret exemplo, sicque promptius, ac libentius colla suavisimo ipsius jugo submitteremus. Altera, ut ipse qui in similitudinem carnis peccati advenerat, remedium, quo caro peccati mundari confueverat, non respuerit. Denique, ut legis omnis in se sustinens Christus, alios à legis onere liberaret, legibus omnibus licet superior, legi tamen Circumcisionis parere voluit, juxta illud ad Galatas cap. 3. *Misit Deus Filium suum factum sub lege, ut eos, qui sub lege erant, redimeret.* Voluit etiam Christus adimplere Legem, quæ lata est Exodi cap. 13. de presentatione Primogeniti in Templo, ejusque redemptione, tum ut oblatione pauperum, quam pro se exhiberi voluit, paupertatem & humilitatem, nos edoceret; tum quia etiam suam Messie & Redemptoria dignitatem prædictionibus Simeonis, & Anne comprobare debebat. Refert enim sacer Evangelista Lucas, quòd Simeon, longævus senex, & Spiritu Sancto plenus, divinum huac Infantem, quem pia Mater quadragesimo à par-

tu die in Templum Hierosolymitanum inferebat, in ulnis suis excepit, atque supremo isto Canto, veluti cygneam quandam cantionem promens, ait: *Nunc dimittis servum tuum Domine* &c. quasi diceret: Domine, nunc impleta est votorum meorum summa, eò quòd videtis Filium tuum Christum in terris natum, qui felicem, diùque optatam pacem inter Divinam Majestatem & homines conciliaturus advenit. *Anna* verò, venerabilis anus, Phanuelis filia, de Tribu Aser, prophetiæ dono illustris, in divinas laudes palam itidem effusa declaravit, puerum JESUM esse Messiam, & humanæ salutis Auctorem à Deo promissum: *Constebatur Domino*, inquit S. Lucas, *& loquebatur de illo omnibus, qui expectabant redemptionem Israel*. His de causis voluit Christus præsentari in Templo, quamvis huic legi non esset obnoxius.

Prob. secundò: Si Christus non fuisset circumcisis, suum non potuisset obire ministerium, nec uti consuetudine Judæorum, nec docere in Templo, nec sacrorum fieri particeps; constat enim incircumcisos Templi atriis interioribus & sacris semper fuisse à Judæis exclusos. Ut igitur Christus suum apud Judæos ministerium exerceret, seque verum esse Messiam verbis & signis demonstraret, circumcisci debuit; Circumcisione autem factus est Judæus, idest, debitor universæ legis faciendæ, sicut ait Apostolus ad Galat. cap. 5. *Testificor autem rursus omni homini circumcidenti se, quoniam debitor est universæ legis faciendæ*.

Prob. ultimò: Conveniens fuit, ut Christus eas observaret cæremonias, quæ erant bonæ, institutæ, ac præceptæ à Deo: atqui circumcisio, sicut & aliæ Legis Mosaicæ cæremoniæ erant bonæ, institutæ & præceptæ à Deo, ergo &c. Prob. minor, & primò: Circumcisio à Deo instituta est Genes. cap. 17. ejus præceptum Abrahamo datum, & ab eo executioni mandatum in se ipso, in Ismaele filio, & in servis omnibus. Lex etiam Circumcisionis renovata est Levitici cap. 12. Secundò, aliæ cæremoniæ, quæ Lege Mosaicâ continentur, fuerunt etiam à Deo præceptæ, nam Deuteronomii cap. 5. Deus his verbis Moysen compellat: *Tu vero hic sta mecum, & loquar tibi omnia mandata mea, & cæremonias atque judicia, quæ docebis eos, ut faciant ea in terra, quam dabo illis in possessionem. Custodite igitur & facite, quæ præcipit Dominus Deus vobis: non declinabitis neque ad dexteram, neque ad sinistram*. Idem repetit Moyses cap. 6. ejusdem libri, & cap. ultimo Levitici. Ex quibus Scripturæ Sacræ locis falsi convincitur Cornelius Tacitus, qui initio lib. 5. Historiarum scribit: Judæorum ritus non à Deo fuisse institutos, sed à Moyse, qui, ut sibi imposterum gentem Judaicam firmaret, novos ritus, contrariosque cæteris mortalibus indidit. In hoc, inquam, falsi convincitur Cornelius Tacitus, primò, quia ex his laudatis Scripturæ sacræ testimoniis certò constat, non Moysem, sed ipsummet Deum instituisse ritus & cæremonias Judæorum, tum ad abolitionem idololatriæ, & ad conservandam divinorum beneficiorum memoriam, tum ad Christum, ejusque

my-

myſteria delineanda, tūn denique propter alias rationes, quas perdoctè expendit *Angelicus Doct̃or* 1. 2. q. 102. art. 2. Præterea, hic Auſtor ſibi omnem omnino fidem abrogat, narrans initio citati libri prodigioſa de Judæis commenta. Ait quippè: Judæos dici quaſi *idæos ab Ida Cretæ Monte*, eos Hieroſolymo, ac Iuda, Ducibus, in proximas Terras exoneratos, Solymos, carminibus Homeri celebratam gentem, conditè Urbi Hieroſolymæ nomen è ſuo feciſſe: fortuitum iter *Ægypto* ej. Etos incepiſſe, gregis aſinorum ſylveſtrium ductu è rupe nemore opaca Moſem largas aquarum venas aperuiſſe: eos ſex dierum iter emenſos, ſeptimò, pulſis cultoribus, obtinuiſſe Terras, in quibus Urbs & Templum diruta ſunt; effigiem animalis, aſini videlicet, quo monſtrante errorem ſitumque depulerint, ab iis penètrali fuiſſe ſacratam. Sue idè eos abſtinere, memoria cladis, quòd ipſos ſcabies quondam turpaverit, cui id animal obnoxium; longam olim famem crebris adhuc jejuniis fateri: raptarum frugum argumentum, panem judaicum, nullo fermento detineri. Septimo die otium placuiſſe, quia is finem laborum tulerit, dein blandiente inertia ſeptimum quoque annum ignavia datum honorem cum, ſecundùm alios, haberi Saturno: cætera inſtituta ſiniſtra: ſeda pravitate valuiſſe. Hæc & alia hujusmodi commenta de Judæis refert *Cornelius Tacitus*, Romanæ Hiſtoriæ Scriptor, quæ liquidò probant, eum in Hiſtoria Judæorum peregrinum & hoſpitem omnino fuiſſe, ac ſubindè nullam mereri fidem, dum rituum, ac cæremoniarum Judæorum inſtitutionem non Deo, ſed Moyſi acceptam refert.

DILUUNTUR OBJECTIONES.

Arguitur primò: Chriſtus non debuit obſervare illas cæremonias: quæ non erant bonæ: atqui cæremoniæ Legis Moſaicæ non erant bonæ; ergo &c. Prob. min. ex cap. 20. Ezechielis, ubi poſtquàm Deus redarguit contumaciam Judæorum, qui ſpreverant, & violaverant Leges morales, quas ipſis ex *Ægypto* recens egreſſus dederat, & in ſuperſtitiones *Ægyptiacas* relapſi erant, ait: *Ergo & ego dedi eis præcepta non bona, & judicia in quibus non vivent, idèſt, Leges cæremoniales.* Præterea, Apoſtolus ad Galat. cap. 4. appellat cæremonias veteris Legis, *elementa, infirma & egena*, ad Roman. cap. 4. *Lex*, inquit, *iram operatur.* 2. ad Corint. cap. 4. *littera occidit*: Et denique ad Hebræos cap. 9. *Reprobatio quidem fit præcedentis mandati, propter infirmitatem ejus, & inutilitatem: nihil enim ad perfectum adduxit lex.* Ergo cæremoniæ veteris Legis non erant bonæ. Hinc *S. Auguſtinus*, pluribus in locis diſputans contra Pelagianos, docet tantùm abeſſe, ut Lex vetus homines adjuverit, quin potiùs fecerit reos, ac prævaricatores.

Reſpondeo cum *S. Auguſtino* Epist. 82. aliàs 19. præcepta illa veterum Sacramentorum, nec bona eſſe, quia non eis homines juſtificantur; nec tamen mala, quia divinitùs præcepta ſunt, tempori perſoniſque con-

congruentia; unde dicit propheta, Deum illi populo dedisse præcepta non bona, forte enim propterea non dixit mala, sed tantum non bona, id est, non talia, ut illis homines boni fiant, aut sine illis boni non fiant. Hæc & alia ejusmodi habet Sanctus Augustinus, ex quibus facile explicantur mox adducta Scripturæ Sacræ testimonia. Nam, quando Ezechiel præcepta veteris Legis cæremonialia appellat *non bona*, sensus non est cæremonias veteris Legis fuisse malas, & inutiles, sed solum eas in se non continuisse vim mundandi à peccato, seu homines justificandi: alioquin *si per Legem justitia, ergo gratis Christus mortuus est*, inquit Apostolus cap. 2. Epist. ad Galat. Similiter, Apostolus locis in objectione laudatis legem non damnat, sed vitium dumtaxat perstringit hominum, qui vel perfectioni legis non respondent, vel qui lege abutuntur contra scopum, & finem legis, vel qui justificationem in lege quaerunt, quam in ea invenire minime possunt, vel qui non distinguunt id quod temporaneum esse debuit in Lege, adeoque abrogandum, ab eo, quod in ea debuit esse perpetuum. Hanc esse genuinam Apostoli mentem patet ex his, quæ habet cap. 7. Epist. ad Rom. ubi expressè asserit, veterem Legem esse Sanctam: *Itaque, inquit, Lex sancta, & mandatum sanctum, & justum & bonum*. In eodem sensu intelligendus venit Sanctus Augustinus, dum disputat contra Pelagianos. Non negat quippè Sanctus ille Doctor, veterem Legem absolutè, & secundum se spectatam esse bonam; sed solum docet veterem Legem comparatè ad Legem Evangelicam esse infirmam, & imperfectam. Lex siquidem Evangelica est Lex perfectè libertatis, quæ justificat, utpotè cum sit data à Christo gratiam medicinalem conferente, & in tabulis cordis inscripta; at verò Lex vetus, sicut definitum est contra Pelagium in Synodo Diospolitana, non liberabat homines à servitute timoris, quoniam Legem servabant, in timore serviebant, & ad ejus obsequium formidine pœnæ ferebantur; nec dabat illa Lex gratiam, ut impleretur amore; quia per eam non dabatur Spiritus Sanctus, qui est principium amoris: *Agnosceamus hæresim vestram, definitum enim Pelagius, quod non ex Fide Christi antiqui vixerunt justii, inquit S. Augustinus lib. 2. Operis imperfecti contra Julianum*. Uno verbo, Lex vetus præcipiebat tantum, non promittebat, jubebat, non ex se juvabat, peccatum puniebat, non ex se tollebat, exigebat, non dabat, onerabat, non roborabat, multaque propter Hebræorum cordis duritiem tolerabat, quæ erant imperfecta, sicut libellum repudii, polygamiam, pœnam talionis, &c. At Lex Evangelica, & præcipit, & promittit, & jubet, & roborat, exigit, & dat quod exigit, sed spiritum non servitutis in timore, sed adoptionis filiorum, ut ait Apostolus cap. 8. Epist. ad Rom. Hinc, S. Thomas 1. 2. quæst. 107. art. 1. *Lex, inquit, vetus dicitur cohibere manum, non animum; quia qui timore pœnæ ab aliquo peccato abstinet, non simpliciter ejus voluntas à peccato recedit, sicut recedit voluntas ejus, qui amore justitia abstinet à peccato; & propter hoc Lex nova, quæ est Lex amoris, dicitur ani-*

mum

num cohibere. Hinc patet discrimen, quod intercedit Iudæos inter & Christianos. Iudæi Lege gravantur, & illius amore non illicijuntur, Christiani verò eâ delectantur, & ipsâ ejus equitate ad illam servandam per charitatem ducuntur. Unde ait Apostolus ad Roman. cap. 6. *Peccatum vobis non dominabitur: non enim estis sub Lege; sed sub gratia.* Hinc S. Augustinus cap. 17. libri, contra Adimantum: *Hæc est, inquit, brevissima, & apertissima differentia duorum Testamentorum, timor, & amor; illud ad hominem veterem, hoc ad novum hominem pertinet.* Cum igitur nova Lex sit lex amoris, mirari vehementer subit, quâ ratione, quidam Theologi necessitatem amoris Dei super omnia dilecti in Sacramento Pœnitentiæ ad consequendam remissionem peccatorum inficiuntur, velintque, Christianos à præcepto diligendi Deum summè necessario eximere. Cum tamen ratio dicat, natura clamet, & Sancti Patres perpetuò doceant, ac ubique inculcent, omnibus omnino hominibus incumbere obligationem diligendi Deum, illudque præceptum, *Diliges Dominum tuum ex toto corde tuo* &c. esse omnium præceptorum maximum, Scripturarum compendium, Evangelii Summam, Christianæ perfectionis regulam, solidæ pietatis principium, & cunctarum formam virtutum.

Arguitur secundo: Circumcisio non est instituta à Deo, sed ex Ethnicorum superstitione ad Iudæos fuit derivata; ergò non fuit conveniens, ut Christus eam observaret. Prob. ant. ex testimoniis *Herodoti, & Diodori Siculi.* Herodotus lib. 2. cap. 104. hæc habet: *Soli hominum Colchi, & Aegyptii, & Aethyopes ab initio statim pudenda circumcidunt.* Nam & Phœnices, & Syrii, qui sunt in Palæstina, didicisse id ab Aegyptiis, & ipsi consueverunt. Diodorus lib. 1. Biblioth. pag. 17. postquam Iudæos, & Colchos ab Aegypto propagatos asseruisset, continuo subdit: *Ideoque gentibus illis ex antiqua traditione in usu est, ut circumcidant statim à partu pueros ritu ab Aegyptiis derivato.* Præterea, non alia potest asserri ratio cur Aegyptii, & Hebræi, divisi licet inter se, & Regionibus, studiis, linguis, legibus, cultus objectis toto Cælo ab invicem separati, in Circumcisionis tamen ritu non discreparent, nisi quia Israelitæ, qui per multas annorum vices cum Aegyptiis vixerunt, Circumcisionis ritum, ab illis didicerunt, & acceperunt. Nec sanè verosimile est, Aegyptios hunc ritum ab Hebræis accipere voluisse, cum Aegyptii longè ante Moysis tempora cæremonias suas, quâ Sacras, quâ Civiles, habuerint, quarum, teste Herodoto, tenacissimi erant, aliarumque gentium, potissimum, gentis Israeliticæ, sanguine servili, ut aiebant, prognatæ, ritus, & mores aspernarentur. Probabilius igitur est, Iudæos ab Aegyptiis Circumcisionem accepisse, ac subindè hunc ritum ex Ethnicorum superstitionibus ad ipsos fuisse derivatum.

Respondet: nullam omnino fidem habendam esse prophanis illis Auctoribus, *Herodoto, & Diodoro*, in his, quæ de Circumcisionis origine

scripserunt. Primò, quia Sacer, & primus omnium gentium Scriptor Moyses testatur *Genesis* cap. 17. Deum Abrahamo, & Hebræis ex eo oriundis Circumcisionis Auctorem fuisse. Secundò, quia non est credibile, Deum ex Dæmonis officina, seu ex Ethnicorum superstitionibus, ritus, & cæremonias, quibus ab Israelitis coli voluit, fuisse mutuatum. Tertiò, Deus *Deuteronomii* cap. 12. & *Levistici* cap. 17. districtè Israelitis prohibet, ne imitentur, aut requirant cæremonias gentium, neve minuunt, aut addant quidquam præceptis, quæ ipsis dederat. Denique, profani illi Auctores in Historia, & ritibus Iudæorum non fuerunt versati, multique sæculis Moyse recentiores fuerunt. *Herodotus* siquidem floruit dumtaxat temporibus Darii Hystaspis, Xerxis, & Artaxerxis Longimani, Persarum Regum. *Diodorus* verò Siculus ævo Iulii Cæsaris, & Augusti Imperatoris vixit. Quapropter, etsi illi Scriptores de ritibus gentium, de quibus scribent, suâ ætate frequentatis, testes idonei esse possint, audiri tamen minimè debent, quando de ritibus ante-Moyseis temporibus usurpatis tenent sermonem. Nec quemquam movere debet ea affinitas, quæ est Hebræos inter & Ægyptios in ritu Circumcisionis peragendo; nam illa affinitas indè profecta est, quòd Ægyptii Circumcisionem, sicut & quosdam alios ritus Hebræorum sequendos, & in Sacris suis retinendos permoti sunt, tum societate, quam habuerunt cum Abrahamo, Iosepho, & Moyse, quos in summo pretio, & honore habuerunt, tum etiam religionis Iudaicæ innumeris miraculis confirmatæ longè latèque divulgatâ famâ, tum denique rituum Iudaicorum splendore, pompâ, frequentique nationis utriusque commercio, præsertim Salomonis temporibus. Præterquamquòd etiam dici posset, Circumcisionem Iudaicam in multis discrepasse à Circumcisione, quam usurpabant Ægyptii. Nam primò solenne erat Ægyptiis & fœminas circumcidere, sicut docet *Strabo* lib. 17. Hebræi verò masculos tantum ex Lege, & more circumcidebant. Secundò, Iudæi die octavo circumcidere solent; Ægyptii autem appetente anno decimo quarto ut plurimum circumcidebantur, sicut refert *S. Ambrosius* lib. 2. de Abraham cap. 11. Tertiò, apud Ægyptios soli Sacerdotes circumcidi solebant, teste *S. Epiphanius* hæresi 30. quæ est *Ebionatarum*; at Iudæis masculos omnes ad unum circumcidere præceptum erat. Quartò, Ægyptii ipsi Sacerdotes solum majoris puritatis, & munditiei corporeæ gratiâ, teste *Herodoto*, circumcidebantur; sed Iudæi circumcidebantur religionis causâ, ut scilicet morem gererent Legis Divinæ præcepto, & ut ab aliis gentibus discernerentur. Denique, Ægyptiis, aliisque gentibus Circumcisio erat superstitionosa cæremonia, quâ Dæmoni devovebantur infantuli; at è contra Iudæi suos infantes recens natos circumcidebant, ut eos, in ipsa quasi prælucente vitæ Aurora, supremo Numini consecrarent. Ex quibus manifestò patet, tam falsum esse, quàm quod maximè, novum *Marshami*, & *Spenceri* commentum asserptum, Circumcisionem, & alios ritus, in veteri, seu Mo-

Mosaica Lege contentos, ex Ethnorum superstitionibus ad Hebræos fuisse derivatos, videlicet *Circumcisionem* ex Æthiopum, & Colchorum moribus, *Tabernaculum* ex prophano Molochi cultu, *Arcam* ex Ethnorum Cistis, *Cherubinos* ex Ægyptiacis Simulachris, *Templum Hierosolymitanum* ex ruditate gentium originem duxisse. Quod quidem commentum ex his, quæ diximus, abundè confutatum manet.

Arguitur tertio: Circumcisio in veteri Lege erat ordinata in remedium peccati originalis, sicut, post SS. Augustinum, & Thomam, duo Ecclesiæ columnæ, docent Theologi: atqui Christus non contraxit peccatum originale; ergo non fuit conveniens, ut Circumcisionis Legem subiret.

Præterea, Lex, quæ erat in veteri Testamento de purificatione Puerperæ, & de præsentatione Primogeniti in Templo, ejusque redemptione per oblationem factâ, lata dumtaxat fuit pro mulieribus, quæ post partum indigent purificari, & pro pueris, qui maculantur maculâ Matris: atqui Beata Virgo purificatione non indiguit, & Christus nullâ maculâ Matris fuit maculatus; ergo non fuit conveniens, ut Christus à Beata Virgine præsentaretur in Templo, & pro ipso sacrificii ad expiationem peccati Lege destinati exhiberetur oblatio.

Ad primum respondeo cum *S. Thoma* 3. part. quæst. 37. art. 1. ad 3. quòd sicut Christus, nullum in se habens peccatum, propriâ voluntate mortem nostram suscepit, quæ est effectus peccati, ut nos liberaret, ac peccato mori spiritualiter faceret; ita etiam & Circumcisionem, quæ est remedium originalis peccati, ultrò suscepit, ut nos à Legis jugo eximeret, ut in nobis spirituale Circumcisionem efficeret, ut postremò suscipiendo figuram, impleret veritatem. Magnum, & mirabile Sacramentum! inquit *S. Bernardus* Serm. 1. de Circumcisione, circumciditur Puer, & vocatur Jesus. Quid sibi vult ista connexio? Circumcisio nempe magis salvandi, quàm Salvatoris esse videtur, & Salvatorem circumcidere potius decet, quàm circumcidi. Sed agnosce mediatorem Dei, & hominum, qui ab ipso Nativitatis suæ exordio divinis humana sociat, ima summis. Nascitur ex muliere, sed cui sæcunditatis fructus sic accedat, ut non decidat flos virginitalis. Pannis involvitur, sed panni ipsi Angelicis laudibus honorantur. Absconditur in Præsepio, sed proditur radiante Stella de Cælo. Sic & Circumcisio veritatem suscepit probat humanitatis, & Nomen, quod est super omne nomen, gloriam indicat Majestatis. Circumciditur tanquàm verus Abraham filius, Iesus vocatur, tanquàm filius Dei. Hactenus Mellissimus ille Doctor.

Ad secundum respondeo: quòd sicut Christus Dominus, licet non esset subditus huic Legi, quæ habetur *Leviticæ* cap. 12. de Præsentatione Primogenitorum in Templo, & de oblatione sacri ficii ad expiationem peccati, hanc tamen Legem, propter rationes superius adductas, propriâ voluntate subivit, sic etiam Beata Virgo, quamvis non esset huic Legi

de purificatione puerperæ obnoxia, quippè quæ, ut suprà probavimus, concepit & peperit sine ulla suæ virginitatis iactura, sine corruptione, sine dolore, sine immunditiei partum cæterarum mulierum vulgò consequentibus, purificationis tamen Legem subiit Virgo purissima, ut obedientiæ, & humilitatis præberet exemplum, ne locum daret scandalo, quod passi fuissent hi, qui conceptus, & partus ejus *Mysterium* ignorabant, & potissimum ut imitaretur exemplum Filii sui, nam, ut docet *Sanctus Thomas* par. 3. quæst. 37. art. 4. sicut plenitudo gratiæ à Christo derivatur, ita decuit ut Mater humilitati Filii conformaretur: humilibus enim Deus dat gratiam. His de causis paruit Beata Virgo legi de purificatione puerperæ, quamvis ipso Sole mundior purificatione non egeret. Hinc meritò ab *Alexandro Octavo*, Romano Pontifice, proscripta fuit hæc propositio: *Oblatio in Templo, quæ fiebat à Beata Maria Virgine in die Purificationis suæ per duos pullos columbarum, unum in holocaustum, alterum pro peccatis, sufficienter testatur, quòd indigneret Purificatione, & quòd filius, qui offerebatur, etiam macula Matris maculatus esset secundum verba Legis.* Hanc Propositionem jure optimo fuisse proscriptam, liquidò probat communis sententia SS. Patrum, qui *Mariam* Virginem à Lege, quæ ad mulieres parturientes spectat, liberam omninò fuisse docent. His enim verbis cap. 12. libri *Leviticæ* concepta est hæc Lex: *Mulier, si suscepto semine, pepererit masculum, immunda erit septem diebus, iuxta dies separationis menstruæ. Et die octavo circumcidetur infantulus: ipsa verò triginta tribus diebus manebit in sanguine purificationis suæ. Omne Sanctum non tanget, nec ingreditur in sanctuarium, donec impleantur dies Purificationis suæ. Sin autem faminam pepererit, immunda erit duabus hebdomadibus juxta ritum fluxus menstrui, & sexaginta diebus manebit in sanguine Purificationis suæ.* Ab hac Lege liberam fuisse Virginem *Mariam* docent Sancti Patres, primò, quia pro mulieribus, quæ suscepto virili semine peperissent, lata est illa Lex; at Virgò *Deipara* absque suscepto semine peperit, eà itaque Lege soluta erat. Secundò, quia immunditia illa legalis, quæ à parturientibus contrahebatur, quæque subindè ex Legis præscripto purganda erat, originem habebat ex fluxu sanguinis menstrui, qui locum non habuit in Virgine *Maria*, utpotè quæ sola *Spiritus Sancti* operatione concepit. Nulla igitur in *Maria* Virgine fuit necessitas purgationis, præscriptæ *Leviticæ* cap. 12. Nec etiam *Iesus Christus*, Virginis *Mariæ* Filius, Legi de Primogenitis, Deo sistendis consecratusque, subdebatur. Sic enim habet illa Lex: *Sanctifica mihi omne primogenitum, quod aperit vulvam in filiis Israel, tam de hominibus, quam de jumentis.* Exodi cap. 13. Christus autem nascendo vulvam maternam non aperuit, sed, ut superius ostendimus, obieratis pudoris Virginei claustris, per penetrationem citrà ullam maculam exivit ex Matris utero. Eà itaque Lege de Primogenitis Deo sistendis atque consecrandis erat penitus exemptus *Iesus Christus*, *Mariæ* Filius,

Arguitur quartò: Accedente veritate cessare debet figura, sicut exoriente Sole evanescunt, & dissipantur umbræ: sed Circumcisio fuit à Deo Abrahamo præcepta in signum fæderis, quod erat de semine nascituro, ut legitur *Genesis cap. 17.* & hoc fœdus fuit in Christi Nativitate completum; ergò in Nativitate Christi cessare debuit Circumcisio, ac subindè conveniens non fuit ut Christus circumcideretur.

Respondeo cum S. Thoma, quòd Circumcisio, per abscissionem carnalis pelliculæ in membro genitali facta, significabat expoliationem vetustæ generationis, à qua quidem vetustate liberamur per passionem Christi; & ideo quia veritas hujus figuræ non fuit plenè impleta in Nativitate Christi, sed dumtaxat in ejus passione, debuit Christus tanquam filius Abraham circumcidi. At, tempore passionis Christi Circumcisio, sicut & aliæ veteris Legis cæremoniæ fuerunt mortuæ, idest, antiquatæ, & abrogatæ, atque post sufficientem Legis Evangelicæ promulgationem mortifere evaserunt, ita ut lethaliè peccarent, qui eas vellent observare. Ita docet S. Thomas 1. 2. qu. 103. art. 1. ad 7.

Arguitur ultimò: Omnis Christi actio, nostra est instructio: undè dicitur *Isaïas cap. 3. Exemplum dedi vobis, ut quemadmodum ego feci, ita & vos faciatis*: atqui nunc Christianis nefas est circumcidi; dicit enim Apostolus ad Galat. cap. 5. *Si circumcidamini, Christus vobis nihil proderit*; ergò non fuit conveniens ut Christus circumcideretur.

Respondeo: Christum fuisse circumciscum eo tempore, quo adhuc vivebat, & sub præcepto erat Judæorum Circumcisio; nunc autem carnalem Judæorum Circumcisionem non esse ampliùs sub præcepto, sed potiùs Circumcisionem spiritualem, quæ per Christum circumciscimus: ait enim Apostolus ad Coloss. cap. 2. *in quo, seu Christo, Circumciscitis Circumcisione non manu facta, in expoliatione corporis carnis, sed in Circumcisione Domini Nostri Iesu Christi.* Placet hanc responssionem egregio confirmare testimonio S. Ambrosii lib. 1. de Abrahamo cap. 4. ubi hæc habet: plerosque moveri scio: si enim bona est Circumcisio, hodièque teneri debuit: si inutilis, mandari non debuit, divino præsertim oraculo. Sed cum Apostolus Paulus dixerit: *Quia Abraham signum accepit Circumcisionis*: utique signum non ipsa res, sed alterius rei est, hoc est, non veritas, sed indicium veritatis. Denique, ipse exposuit, & expressit dicens: *Signum accepit Circumcisionis signaculum Iustitiæ, & Fidei.* Undè non incongruè intelligimus, quia Circumcisio corporalis signum Circumcisionis est spiritualis; ergo signum manet, donec veniat veritas. Advenit Dominus Iesus, qui ait: *Ego sum via, veritas, & vita*, quia novam partem exigam corporis in signo, sed totum circumcidit hominem in veritate, signum detraxit, veritatem induxit; quia posteaquam venit quod perfectum est, quod ex parte erat, evacuatum est; & ideo cessavit Circumcisio partis, ubi refulsit Circumcisio universitatis. Jam enim non ex parte, sed totus homo salvatur in corpore, salvatur in anima. Ha-

clenus

ctenus *S. Ambrosius*, ex cujus verbis liquet, Iudæos accepisse quidem à Deo ritum externæ, & carnalis Circumcisionis, Christianos verò accepisse à Christo præceptum spiritualis Circumcisionis, juxta illud ad Roman. cap. 2. *Neque que in manifesto in Carne est Circumcisio: sed qui in abscondito Judæus est, & Circumcisio cordis in spiritu, non littera: cujus laus non ex hominibus, sed ex Deo est.*

QUÆRES PRIMÒ: Utrum etiamnum extet præputium, quod in Circumcisione à Sanctissimo Christi corpore fuit præcisum?

Respondeo: Esse quosdam Historicos, qui narrant, præputium Christi Domini fuisse ab Angelo delatum ad Carolum Magnum, qui illud primò Aquisgranî in Ecclesia Sanctæ Mariæ honorificè collocavit, ut Christianorum venerationi pateret, dein, Carolum transtulit, ac tandem Romam fuisse asportatum, ubi in Lateranensi Templo, in Sancto Sanctorum, loco sic appellato, religiosissimè asservatur. Sunt tamen, nonnulli Historici, qui præputium Christi Domini Aniciî in Arvernens sollicitè servari, magnâque in veneratione haberi scribunt. Quin etiam Antuerpienses, teste *Bollando Tom. 1. de Actis Sanctorum, pag. 3. gloriantur*, quinque fermè sæculis Sacrosanctum Christi præputium Hierosolymis Antuerpiam ab *Henrico Næfio*, Regii Sacelli Præfecto, transmissum, regnante in Terra Sancta Illustrissimo Principe *Godefrido de Buillon*, inter alias Sanctorum Reliquias apud se fuisse asservatum, quod tamen sub annum 1556. Templis, Sacrariis, ac Lipsanothecis immani Calvinistarum furore directis, deperditum est. Ut ut sit, communiter censent Theologi, membranam, seu pelliculam à sacro Christi corpore abscissam, in terris, ob Fidelium devotionem, tanquam sacrum pignus, & perenne divini amoris monumentum, fuisse relictam & etiamnum asservari. Legi potest super hac re *Sylvius Comment. in 3. p. Sancti Thomæ, q. 54. art. 2.*

QUÆRES SECUNDÒ: Nàm antiqua sit in Ecclesia Festivitas Circumcisionis Christi Domini, quæ kalendis mensis Januarii celebratur?

Respondeo: Antiquissimam esse in Ecclesia Circumcisionis Christi Festivitatem. De ea quippè apertam mentionem facit Canon. 17. Concilii secundi Turonensis celebrati anno Christi 567. Observat autem doctissimus *P. Thomassinus lib. 2. de Festis cap. 8.* huicce Festivitati antiquitus publicum fuisse annexum jejunium, eò quòd Pagani in honorem Dei sui *Jani* hac die, seu kalendis Januarii, gulæ, vel luxuriæ fræna laxarent, ebrietatibus, & sacrilegis superstitionibus insanirent. Alii siquidem tunicas muliebres induebant, pellibus pecudum vestiebantur, belluarum capita, aliatque hujusmodi monstruosas figuras assumebant. Alii, in honorem Deæ, *Strenne*, aut *Strenua* dictæ, diabolicas strenas, & ab aliis recipiebant, & ipsi aliis offerebant, sicut legitur in Sermone *Faustini*, Episcopi, in kalendis Januarii habito, & ex vetusto Codice descripto à *Patre Francisco Chiffletio*, Societ. Jesu, apud *Bollandum Tom. 1. mensis Januarii*

uarii pag. 3. Propter illas igitur nefandas Ethaicorum superstitiones, publicum kalendis Januarii fuit ab Ecclesia indictum jejunium, tùm ut, exorata divinâ clementiâ, Ethnici ad meliorem frugem adduci possent, tùm etiam ut Christiani pietatis operibus vacantes ab illis diabolicis ritibus omninò abhorrent. Hinc Sancti Patres, quâ voce, quâ scripto sacrilegas illas superstitiones magno animi estu sunt infectati, & Christianos, ut ab illis penitus abstinerent, sæpius sunt adhortati. Sanctus Augustinus Serm. 7. in Appendice Sirmundi sic alloquitur Christianum: *Atturus es celebrationem Strenarum sicut Paganus, lusus alea, & inebriaturus te? Quomodo aliud credis, aliud speras, aliud amas? Dant illi Strenas, date vos elemosynas, advocantur illi cantionibus luxuriarum, advocate vos Sermonibus Scripturarum, currunt illi ad theatrum, vos ad Ecclesiam, inebriantur illi, vos jejunate.* Et in Psalm. 98. *Per istos autem dies,* inquit Aquilinus ille Doctor, *ad hoc jejunamus, ut quandò ipsi, seu Ethnici, letantur, nos pro ipsis gemamus.* Similes adhortationes kalendis Januarii adhibent Sancti Patres, Chrysologus Serm. 155. & Maximus homilia in kalend. Januarii. Denique, Concilium Turonense secundum, can. 23. Altfiodorense, celebratum anno Christi 614. can. 1. & Concil. Romanum sub Zacharia, Summo Pontifice, coactum anno Christi 742. districtè vetuerunt, ne Christiani has sacrilegas Paganorum superstitiones kalendis Januarii observarent. Quibus legibus à Conciliis sapientissimè conditis, & Sanctorum Patrum adhortationibus utinàm obtemperarent Christiani, quorum benè multi Bachanalium, ut vocant, temporibus, luxui, epulis, Spectaculis, & choreis passim indulgent, atque per vicos larvati circumcursantes, Paganorum instar, etiamnùm insanire solent.

QUÆRES TERTIO: *An Simeon, Sanctus ille senex, qui Puerum oblatum in Templo suis in nris excepit, fuerit Sacerdotio insignitus, & luminibus orbatus?*

Respondeo: Simeonem non fuisse Sacerdotem, sed Laicum. Tùm quia si Simeon fuisset reverà Sacerdotio inauguratus, procul omni dubio Sanctus Lucas, qui tanti viri texuit elogium, illius Sacerdotium non tacuisset, sed illud potiùs ad maiorem ei dignitatem conciliandam commendasset. Tùm quia etiam, Euthymius in suis in quatuor Evangelia, Commentariis cap. 3. De Simeone; & Theophylactus Enarratione in cap. 2. Lucæ, Simeonem Laicum fuisse tradunt. Adeat Lector, si plura desideret, Leonem Allatum in Diatriba de Simeonibus. Quòd verò Simeonis cecitatem spectat, sunt nonnulli, qui existimant, Sanctum illum senem fuisse luminibus orbatum, atque ex ipso pueri Jesu contactu visum recepisse; sed quia id nullâ Scripturæ, aut veterum nititur auctoritate, merito aliis fabulis, quas recentiores Græculi obtrudunt, accenseri debet. Nec enim credibile est, Evangelistas, & antiquos Ecclesiæ Patres voluisse tam grande miraculum, quod ad Christi, & Simeonis gloriam cede.

cederet maximè, alto transmittere silentio; cùm tamen illius prodigii, quo *Zacharias*, nato ac circumciso filio suo *Joanne Baptista*, loquendi facultatem actutùm recuperavit, disertam mentionem eo potissimum nomine fecerint, quòd id ad utriusque gloriam celebrandam plurimum conducere posset. Ejusdem planè saturnæ est altera, quam nonnulli jactant, malè confuta fabula, de *Maria* Virgine purgationis officium implente. Ajunt quippè, *Mariam*, Virginem, dùm in Templum quadregesimo post partum die venisset, noluisse eo in loco versari, qui mulieribus, Virum in conceptione proles passis, erat ad orandum destinatus, sed alio in loco perstitisse, in quo Virgines ad precandum convenire solebant. Quo insolenti agendi modo cùm offenderentur Judæi, eamque loco extrudere tentassent, *Zachariam*, Patrem *Joannis Baptiste*, Sacerdotis vices agentem, qui eam & Dei Matrem & Virginem esse probè sciebat, ludæorum conatibus intercessisse, eamquæ in loco virginum manere ac precari jussisse. Quò factum est, ut à Judæis per livorem atque invidiam *Zacharias* Templum inter & Altare fuerit occisus, & idcirco à Domino dictum sit: *Veniet super vos omnis sanguis justus, qui effusus est super terram à sanguine Abel justì ad sanguinem Zachariæ, filii Barachie, quem occidistis inter Templum & Altare*, Matthæi cap. 23. v. 35. Verùm, facili diffatur hæc malè confarcinata fabula, quæ ex *Apocryphorum* somniis derivata, uti admonet S. *Hieronymus* in cap. 24. Matthæi, eadem facilitate contemnitur, quâ profertur, Quis enim credat, *Mariam* Virginem, quæ, juxta Legis præscriptum, purgationis officio, quo, ut superius ostendimus, minime obstringebatur, eo solo fine defungi voluit, ut modestiæ & humilitatis præberet exemplum, & ut Virginei partus Mysterium, quod in ea peractum erat, ad certum saltem tempus, ita volente Deo, maneret occultum, voluisse tamen seipsam palàm in Templo Virginem prodere, Virginum Stationem, etiam cum ludæorum scandalo, affectare, ambire, occupare, atque Virgineæ fecunditatis Mysterium, necdùm mortalibus referatum, propalare omnibus ludæis ad Templum undique confluentibus? Quis etiam in animum suum inducere poterit, *Zachariam*, Patrem *Joannis Baptiste*, pro tuendâ, probandâque Virginitate *Mariæ*, ferro ludæorum subisse Martyrium, ex quo confestim ludæis patuisset Virgineæ fecunditatis, seu Divinæ Incarnationis Mysterium, quod tamen Deus, ut mox diximus, ipsis nondùm innotescere volebat? Apagæ itaque fabulam, quam somniculosa fortassis finxit anus.

QUÆRES ULTIMO : à quo tempore creperit in Ecclesia celebrari Purificationis Beatæ Mariæ Virginis Festivitas, & quibus de causis fuerit instituta?

Respondeo : Duplicem circà exordium Festivitatis Purificationis Beatæ Mariæ Virginis extare sententiam. Prima est Cardinalis *Baronii*, qui in Notationibus ad Martyrologium Romanum asserit, hanc Festivitatem

tatem de Purificatione Mariæ Virginis, quam Græci *Hypapantem*, idest, occursum Domini, appellant, sub *Iustiniano* Imperatore anno Christi 541. in Oriente celebrari cœptam esse, testemque adducit *Nicephorum Callixtum*, qui lib. 17. Hist. Eccles. cap. 28. ait: *Imperatorem Iustinianum instituisse tum primum toto terrarum Orbe, Festo die celebrari Hypapantem, idest, occursum Domini.* Addit etiam *Baronius*, nullum Sanctorum Patrum, qui antè Iustinianum Imperatorem vixerunt, Sermonem in Festo die occursum Domini aut habuisse, aut saltem scriptum reliquisse. Idem testatur doctissimus *Pater Themassius* lib. 2. de Festis cap. 11. Altera sententia est *Bollandi*, qui Tom. 1. de Actis Sanctorum pag. 270. existimat, ab ipsis Apostolorum temporibus arcessendam esse Purificationis Mariæ Virginis Festivitatis originem, nec contrarium ex citato à *Baronio Nicephori* testimonio evinci posse. *Nicephorus* namque ait, Imperatorem Iustinianum instituisse, ut toto terrarum Orbe *Hypapantis* Festivitas celebraretur, sicut *Imperator Iustinus de Sancta Christi Nativitate fecerat*. Porro certum est, Festum Nativitatis Christi non cœpisse celebrari sub Iustino Imperatore, sed in primis Ecclesiæ sæculis fuisse jugiter celebratum, ergo similiter quandò *Nicephorus* dicit, Imperat. Iustinianum instituisse, ut toto terrarum Orbe *Hypapantis*, seu Purificationis Mariæ Virginis, Festivitas celebraretur, sensus non est, hanc Festivitatem tum primum ab Imp. Iustiniano fuisse institutam, sed solum hunc Imperatorem, sevariore aliquâ Sanctione decrevisse, ut hæc Festivitas majori, quam antehac, veneratione in toto Orbe celebraretur, sicut *Iustinus de Sancta Christi Nativitate fecerat*. Præterea, ostendit *Bollandus*, Purificationis Mariæ Virginis Festivitatem in Palæstina, Phœnicia, Syria, atque Asia, reliquâ, primis Ecclesiæ sæculis viguisse, multosque Sanctos Patres, præsertim *Methodium*, *Gregorium Nissenum*, *Amphilochium*, utrumque *Cyrellum*, *Alexandrinum* scilicet & *Hierosolymitanum*, *Sophronium*, & *Chrysostomum* in Festivitate Purificationis Mariæ Virginis Sermones, & Homilias ad populum habuisse. Utriusque Auctoris, *Baronii* videlicet & *Bollandi*, sententias hic consultò propono, ut prudens Lector eam eligat, quam probabiliorem esse judicabit.

Quòd autem spectat causas, propter quas instituta est hæc Purificationis Mariæ Virginis Festivitas, duæ vulgò afferri solent. Prima traditur à *Baronio* loco mox citato, ubi hæc habet: *Constat, Gelasium, Romanum Pontificem, qui annis triginta antè Iustiniani tempora Romanæ Ecclesiæ præfuit, hujus diei celebrandæ in Occidentali Ecclesia aperuisse viam, dum Lupercalia mense Februario agi solita (ut scribit Varro lib. 5. de lingua Latina) Romæ ad ea tempora permanentia Legibus Ecclesiasticis abrogat. Jure itaque opinamur, abrogatis Lupercalibus Romæ, sicut in multis accidit, ejusmodi fuisse solemnitatem introducendam, quam paulò post Iustiniani temporibus Orientalis Ecclesia eâ occasione recepit. Hactenus Baronius, qui censet abolitionem Lupercalium, seu Festi Dei*

pastorum, à Gelasio, Romano Pontifice, factam, instituendæ Festivitati Purificationis Mariæ Virginis locum, & occasionem dedisse.

Alteram causam institutæ hujusce solemnitatis de Purificatione Mariæ Virginis profert S. Ildephonsus, Episcopus Toletanus, Serm. 1. de hacce Festivitate, ubi sic loquitur: *Agitur autem hæc Festivitas mense Februario, quem Romani adhuc Pagani à Februo, idest, Plutone, sic vocaverunt: quem potentissimum purgationis credebant, februare enim purgare dicimus. Quo mcuse lustrabatur Civitas. Cum enim Romani omnes gentes sibi subjugassent, tributum eis imposuerunt eo tenore, ut quinto quoque anno idem tributum solveretur, quo expleto, & censu persoluto, ab omni populo, ut dictum est, Civitas lustrabatur, & diis manibus sacrificia offerrebant, quorum auxilio, & virtute totum Orbem se subjugasse putabant. Quam lustrandi occasionem congruè, & religiose Christiana mutavit religio, cum eodem mensis, hoc est, iodierna die, in honorem Sanctæ Dei Genitricis, & perpetuæ Virginis Mariæ, non solum Clerus, sed & omnis plebs Ecclesiarum loca cum cereis, & diversis hymnis lustrantibus circummeant, non jam in memoriam terreni Imperii quinquennem, sed ob recordationem Cælestis Regni perennem.* Hactenus Sanctus Ildephonsus. His similia habent Sanctus Eligius, Episcopus Noviodunensis, homil. 2. de Purificatione Sanctæ Mariæ; & Ven. Beda Tom. 2. tract. de ratione temporum cap. 10.

His duabus de causis institutam fuisse Purificationis Mariæ Festivitatem asserunt illi Auctores, qui hujus Festivitatis originem cum Baronio referunt ad sextum sæculum. Sed Bollandus, qui putat, Festum Purificationis Mariæ ab ipsis Apostolorum temporibus fuisse in Ecclesia institutum, & celebratum, hujusmodi causas, quas ex Baronio, & S. Ildephonso adduximus, non admittit, censetque, hujus Festi institutionem nec Gelasio Papæ, nec Justiniano Imperatori, sed ipsis Apostolis acceptam referri debere, juxta regulam, quam proponit Sanctus Augustinus lib. 4. de Baptismo cap. 24. *Id, quod universa tenet Ecclesia, nec Concilii institutum, sed semper retentum est, non nisi auctoritate Apostolica traditum, certissime creditur.* Hæc Bollandi opinio de institutione Festivitatis Beatæ Mariæ si Lectori non arrideat, aliam pervulgatam, quam docet Baronius, amplecti poterit, nam cum de illius Festivitatis institutione sileat Scriptura, & in antiquis Ecclesiæ monumentis, ac definitionibus expressa illius non fiat mentio, integrum est Lectori Baronii, aut Bollandi propugnare sententiam.

ET ANNIS, CHRISTI.
HYMNUS

227

P R O S A,

*Christo nato, & Circumciso
patienti.*

*Quæ in quibusdam Ecclesiis inter
Missarum solennia canitur in
die Purificationis Beatæ
Mariæ Virginis.*

FAs, Christe, mæstis plangere
Tuos dolores cantibus
Quos vitæ ab ipso limine
Ad usque mortem passus es,

AVe plena gratia;
Cujus inter brachia
Se litat Deo Deus.

Castæ parentis in sinu
Inclusus ardebas pati,
Æternus ut discas mori,
Mortale corpus induis.

Fas me Templum visere
Tibi fas occurrere,
Amor, ô Jesu, meus.

Vix natus, imbellis puer
Acuta sentis frigora,
En vile pro molli thoro
Fœnum tibi supponitur.

Est in Templo Dominus
Angeli stant comitibus
Nil in Cælis amplius.

Amore te facis reum,
Fers spontè pœnas innocens,
Nec eximis te Legibus,
Supremus ipse Legifer.

Habet Deum hominem,
Et parentem Virginem
Cælo Templum ditius.

Qui primus excisâ cruor
E parte stillat corporis
Membris micans ex omnibus
Torrentis instar, prœruet.

Spirant Sacra gaudium;
Manè Sacrificium
Plausus inter redditur.

Qui mucro lactentes necat,
Idem tuum pectus fodit,
Et quo cadebant parvuli,
Hoc tu cadebas vulnere.

Vespertinum fletibus,
Et amaris questibus
In Cruce miscebitur.

Exul Deus, promptâ fugâ
Tuæ salutis consulis,
Intras Pharos verax Deus
Mixtus Deis mendacibus.

Hæc jam est oblatio,
Cujus omnes pretio
Deo restituimur.

Jam nos tibi dediti,
Tibi, Deus, subditi,
Vivimus, & morimur.

Nunc dimitte famulos:
Nihil tenet hic oculos
Da te palam cernere.
Si jubes hic vivere
Da cum Jesu crescere,
Da per hunc resurgere.

X x 2

HY.

D E M Y S T E R I I S H Y M N U S

*De Oblatione Jesu Christi in Templo, seu Purificatione
Beatæ Mariæ Virginis.*

S Tupete gentes: sit Deus hostia,
Se spontè Legi Legifer obligat;
Orbis Redemptor nunc redemptus;
Seque piat sine labe Mater.

De more Matrum, Virgo puerpera
Templo statutos abstinuit dies:
Intrare Sanctum quid pavebas,
Facta Dei priùs ipsa Templum?

Ara sub una se vovet hostia
Triplex; honorem Virgineum immolat:
Virgo Sacerdos, parva mollis
Membra puer, seniorque vitam.

Eheu! quot enses transadigent tuum
Pectus? quot altis nata doloribus,
O Virgo! quem gestas in ulnis,
Imbuet hic sacer Agnus aram.

Christus futuro, corpus adhuc tener,
Præluit infans victima funeri:
Crescet; profuso Vir cruore
Omne scelus moriens piabit.

Templi Sacratas pande, Sion, fores;
Christus Sacerdos intrat & hostia:
Cedant inanes veritati,
Quæ se animis aperit, Figuræ.

Non immolandi jam pecudum greges;
Fumabit ater non cruor ampliùs:
En ipse placando parenti
Ipse suis Deus astat aris.

Virgo latentis conscia numinis,
Dimissa vultus, quem peperit Deum,
Gestabat ulnis, pauperumque
Munera fert, teneras volucres.

Hic omnis Ætas, omnis & assistit
Sexus, propinquo numine plenior:
Christum anhelantis tot annos
Nunc fidei pretium reportant.

Testes tot inter, magnanimo, Deus,
Tibi litabat fida silentio,
Verbi silentis muta Mater:
Quanta animo reticebat, alto!

Fumant Sabæis Templâ vaporibus;
Nos Sacra poscunt; jam præit hostia;
Sequamur omnes, & lubente
Puri animo simul immolemur!

Lumen ministret splendidior Fides;
Ministret ignes flammea Charitas;
Spes thura, nec desint odores,
Quos operum bona fama fundat.

Vitæ nocentis, quid trahimus moras?
Sit fas beato sub Sene nos mori;
Ut quem sub aris immolatum
Vidimus, hoc etiam fruamur.



DISSERTATIO DECIMA

Quoto anno ætatis suæ Chriſtus Dominus fuerit baptizatus?

Observandum est primò ad majorem celebris istius difficultatis elucidationem, distingui debere duplicem Epocham Imperii Tiberii (quo imperante baptizatus est Chriſtus Dominus.) Aliud siquidem est Imperium Tiberii, quod dicitur *Augustæum*, & aliud est Imperium Tiberii, quod dicitur *Proconsulare*. Epochæ Imperii Augustæi Tiberii sumitur ab obitu Imperatoris Augusti, quandò videlicet Tiberius, mortuo Imperatore Augusto, rerum potitus est, seu solus Imperii habenas moderari cæpit. Mortuus est autem Imperator Augustus Nolæ anno decimo quarto *Æræ* vulgaris, seu anno Urbis Romæ conditæ 767. *Pompejo*, & *Apulejo* Consulibus, die 19. mensis sextilis, seu Augusti, postquàm regnasset annis 57. quinque mensibus, & 4. diebus. Eodem igitur anno, quo vitâ functus est Imperator Augustus, cæpit Imperium Tiberii, quod vulgò dicitur *Augustæum*. Epochæ Imperii Tiberii, quod dicitur *Proconsulare*, juxta sententiam, quæ mihi videtur probabilior, auspiciatur die 28. mensis Augusti anni quinquagesimi quarti Imperii Augusti, seu anni decimi *Æræ* vulgaris, Urbis Romæ conditæ 763. *L. Cornelio Dolabella*, & *C. Iunio Silano* Consulibus. Id colligo ex testimoniis Historicorum, qui *Annales Romanorum* scripsere. Nam primò: *Suetonius* cap. 21. de Tiberio hæc habet: *Dedicavit ædem Concordiæ, ac non multò post (lege per Consules latâ ut provincias cum Augusto communiter administraret, simulque censum ageret) condito lustro in Il'yricum profectus est. Ædem Concordiæ dedicavit Tiberius mense Januario, seu 17. kalendas Februarii anni quinquagesimi quarti Imperii Augusti, seu anni decimi Æræ vulgaris, & Urbis Romæ conditæ 753. teste Ovidio lib. 1. Fastorum. Cum igitur affirmet Suetonius, non multò post illam dedicationem, Lege per Consules latâ Tiberium æquali potestate Provincias cum Augusto administrare cæpisse, argumento est, Tiberium eodem anno, hoc est, quinquagesimo quarto Imperii Augusti, & anno decimo Æræ vulgaris, fuisse ab Imperatore Augusto adscitum in consortium Imperii. Secundò, *Cornelius Tacitus* lib. 1. *Annalium* cap. 1. ait, Tiberium ab Augusto adsumptum fuisse Collegam Imperii, & Consortem Tribunitiæ potestatis, atque ab eo per omnes exercitus ostentatum. Tertiò, *Dio Cassius* lib. 56. hæc de Tiberio scribit: *Tiberius ædem Concordiæ sacravit inscripto suo, & fratris Drusi vitâ pridem functi nominibus. Et deindè agens de rebus gestis* sub*

sub *M. Emilio Lepido*, & *Statilio Tauro* Consulibus: *Tiberius*, inquit, & *Germanicus*, cui *Proconsulare erat Imperium, impressionem in Germaniam fecerunt*. Constat autem, *Emilium Lepidum*, & *Statilium Taurum* fuisse Consules anno quinquagesimo quinto Imperii Augusti, seu anno undecimo *Æræ* vulgaris, & *Urbis Romæ* conditæ 764. Undè manifestò sequitur, *Tiberium* anno superiori, seu quinto kal. Sept. anni decimi *Æræ* vulgaris, Imperii verò Augusti quinquagesimi quarti, factum fuisse consortem, & collegam Imperii. Nec enim *Dio* appellaret *Tiberium Proconsulem* initio anni *Æræ* vulgaris undecimi, si quinto tantum kal. Septemb. ejusdem anni proconsulare Imperium accepisset, eò magis quòd expeditio in Germaniam à *Tiberio* anno undecimo *Æræ* vulgaris finita fuit nono kal. Octobris, in quam diem Natale Imperii Augusti incidit, sicut optimè observat doctissimus *Pagius* in Dissertatione hyppatica, idest, de Consulibus Cæsareis. Quintò: *Vellejus Paterculus* lib. 2. cap. 121. de *Tiberio* scribit, *Senatum, Populumque Romanum, postulante patre ejus (Augusto) ut æquum ei jus in omnibus Provinciis, exercitibusque esset, quàm erat ipsi, Decreto fuisse complexum*. Denique, *Plinius* lib. 14. cap. ult. & *Suetonius* cap. 42. *Tiberium Principem* appellant, quandò *Pisonem* in potatione cum ipso pernoctantem ad Præfecturam *Urbis Romæ* delegit. Hic autem *Piso*, teste *Cornelio Tacito* lib. 6. *Annal.* cap. 2. viginti per annos pariter probatus obiit *C. N. Domitio*, & *Scriboniano Consulibus*. Hi autem fuerunt Consules anno *Æræ* vulgaris trigesimo secundo, & *Urbis Romæ* conditæ 785. ex quo annorum numero si viginti eximas annos, comperies *Tiberium* jam anno duodecimo *Æræ* vulgaris, & *Urbis Romæ* conditæ 766. *Principem*, seu Imperii consortem, & collegam fuisse. Suspiciatur quidem *Iustus Lipsius* in suis ad sextum *Taciti* librum Annotationibus, mendum inesse huic *Taciti* loco ex *Notis geminatis*, & pro *decem* irrepsisse *viginti*, sed hanc meram, & ipanem esse conjecturam ostendit doctissimus *Pagius* in *Critica Annalium Baronii* ex lectione omnium codicum *Cornelii Taciti*.

Ex his ergo clarissimis *Romæ Historiæ* Scriptorum testimoniis, quibus nemo fidem derogare potest, colligo, *Tiberium* fuisse consortem, & Collegam Imperii renunciatum anno Imperii Augusti quinquagesimo quarto, seu anno *Æræ* vulgaris decimo, non verò undecimo, ut *Marcus Antonius Capellus* in Dissertat. de anno Passionis Christi cap. 5. & *Henschenius* in Expositione veterum Catalogorum Pontificum arbitrati sunt; neque etiam anno duodecimo *Æræ* vulgaris, sicut sentiunt *Peta-vius* lib. 2. de Doct. temp. cap. 7. *Vferius* in *Annal. veteris Testamenti*, & *Tilmontius* Not. 4. in *Hist. Imper.* Nec sanè video quâ ratione doctissimus *Pagius* ab hac certissima Imperii Proconsularis *Tiberii* Epochâ, quam in sua Dissertatione hyppatica multis stabilierat argumentis, postea in sua *Critica Annalium Baronii* recefferit, & exordium Imperii Proconsularis *Tiberi* retulerit ad annum quinquagesimum quintum Imperii Augusti, seu ad annum undecimum *Æræ* vulgaris. Ob-

Observandum secundò, quosdam esse etiam primi subsellii Chronologos, qui docent, Christum natum esse die 25. mensis Decembris anni quadragesimi Imperii Augusti, eumque ad Baptismum accessisse, die 6. Januarii anni decimi sexti Imperii *Augustei* Tiberii, ex quo inferunt, Christum baptizatum fuisse anno ætatis suæ trigésimo quarto ineunte, nam ab anno quadragesimo Imperii Augusti usque ad annum decimum sextum Imperii *Augustei* Tiberii totidem anni intercesserunt, sicut fatentur omnes ad unum Chronologi. Verùm, hæc conjectura, quæ prima fronte plausibilis, & ad persuadendum efficax esse videtur, nihilofecius faciliè admodum solvi potest, si semel admittatur duplex Imperii Tiberii Epochà, videlicet Epochà ejus Imperii *Augustei*, quod, ut mox exposuimus, auspiciatur anno decimo quarto *Æræ* vulgaris, hoc est, immediatè post obitum Imperatoris Augusti, & Epochà illius Imperii *Proconsularis*, quod exordium habuit die 28. mensis Augusti anni quinquagesimi quarti Imperii Augusti, seu anni decimi *Æræ* vulgaris. Admissà autem semel geminà Imperii Tiberii Epochà, dicendum est, Christum non fuisse baptizatum die 6. Januarii anni decimi sexti Imperii *Augustei* Tiberii, (alioqui Christus fuisset baptizatus anno ineunte trigésimo quarto ætatis suæ, ut volunt illi Chronologi) sed dicendum est, Christum fuisse baptizatum die sextà Januarii anni decimi sexti Imperii *Proconsularis* Tiberii, qui annus Imperii *Proconsularis* Tiberii concurrit cum anno trigésimo ineunte ætatis Christi, sicut hoc argumento breviter demonstro. Christus natus est anno quadragesimo Imperii Augusti, quadriennio solido antè *Æram* vulgarem, Tiberius autem Imperium *Proconsulare* obtinuit, seu Imperii *Consors*, & Collega ab Augusto Imperatore fuit declaratus die 28. mensis Augusti anni decimi *Æræ* vulgaris, ut antè diximus, undè sequitur die 28. mensis Augusti anni ejusdem *Æræ* vulgaris vigésimi quinti cæpisse annum decimum sextum Imperii *Proconsularis* Tiberii. Cùm igitur Christus, juxta probabiliorem Chronologorum, quam sequor, sententiam, accesserit ad Baptismum die 6. Januarii anni decimi sexti Imperii *Proconsularis* Tiberii, Sole clarius est, ipsum fuisse baptizatum ineunte anno vigésimo sexto *Æræ* vulgaris, cui anno *Æræ* vulgaris vigésimo sexto si addas quadriennium solidum, quo, ut superius probatum est, Natale Christi antevertit exordium *Æræ* vulgaris, comperies Christum fuisse baptizatum anno ineunte ætatis suæ trigésimo, quæ quidem omnia tibi ob oculos ponet series illa Imperatorum, & Consulum Romanorum, quam sub finem istius Dissertationis exhibebo à primo anno *Æræ* Christianæ, seu *Dionysianæ*, usque ad annum ejusdem *Æræ* Christianæ vigésimum sextum, seu ad annum usque decimum sextum *Proconsularis* Imperii Tiberii, quo anno censeo, Christum Dominum fuisse baptizatum. Hæc autem sententia, quæ mihi præ cæteris magis probatur, sicut constabit ex his, quæ deinceps dicturus sum, Scripturæ Sacræ, Conciliorum, &

San-

Sanctorumve Patrum nititur testimoniis, eique suffragatur perpetua traditio Ecclesiastica. His itaque prælibatis.

D I C O: *Christum fuisse baptizatum anno ætatis sue ineunte trigésimo, anno decimo sexto Imperii Proconsularis Tiberii, anno vigésimo sexto æræ vulgaris, anno Juliano septuagésimo primo, anno Urbis Romæ conditæ septingentesimo septuagésimo nono, anno secundo Olympiadis ducentésimæ primæ, anno periodi Julianæ quater millesimo septingentesimo trigésimo nono, Consulibus C.N. Lentulo Getulico, & C. Calvisio Sabino.*

Probatur primò auctoritate Scripturæ Sacræ, *Lucæ cap. 3.* Cum autem baptisaretur omnis populus, & Iesu baptisato, & orante, apertum est Cælum: & descendit Spiritus Sanctus corporali specie sicut columba in ipsum & vox de Cælo facta est: Hic est Filius meus dilectus, in te complacui mihi; & ipse Iesus erat incipiens quasi annorum triginta. Quæ quidem Sancti *Lucæ* verba adeò perspicua sunt, ut illi, qui, ultrà trigésimum Christi annum, Baptisma ipsius differunt, apertè verbis Evangelistæ vim inferre videantur. Certè, velint nolint, inficias ire non possunt adversarii, sententiam nostram magis congruere verbis Sancti *Lucæ*. Nam, si Christus, uti asserimus, anno ineunte ætatis suæ trigésimo fuit in Jordane baptisatus, congrua, & apposita erit Evangelistæ locutio: *Et ipse Iesus erat incipiens quasi annorum triginta;* at, si Christus, quando accessit ad Baptismum, jam trigésimum explevisset annum, vel, ut alii volunt, trigésimum tertium; incongruum planè, & inusitatum loquendi modum usurpasset sacer Evangelista, ut nemo non videt.

Respondent primò adversarii: hæc *S. Lucæ* verba: *Et Iesus erat incipiens quasi triginta annorum*, esse referenda non ad annum ætatis Christi, quando accessit ad Baptismum, sed ad ministerium Christi, qui tunc quasi incipiebat palàm prodire, & Messiam agere, ut notarunt Sanctus Iustinus in Dialogo cum Tryphone, Origenes, Beda, Euthymius, & alii.

Sed hæc responsio non juvat, sed potiùs adversariorum sententiam penitus evertit. Constat enim ex tribus Evangelistis *Matthæo*, *Marco*, & *Lucæ*, Christum prædicationis ministerio eo dumtaxat anno incumbere cœpisse, quo fuit à Joanne in Jordane baptisatus, si ergo Christus, fatentibus ipsismet adversariis, ineunte tantùm anno ætatis suæ trigésimo prædicationis ministerium exorsus est, sequitur, illum eodem itidem anno fuisse baptisatum.

Respondent secundò: Illam particulam, *quasi*, quâ utitur Evangelista *Lucas*, non determinare quotum annum ageret Christus, quando baptisatus est, quia, inquirunt, particula illa, *quasi*, semper permittit libertatem aliquid addendi, præsertim dùm præfigitur numeris rotundis, alioquin frustra apponeretur. Sic ex. gr. apud *Matth. cap. 17.* & apud *Marcum cap. 9.* legitur, Christum post diem sex, ab instituto scilicet Sermone, esse transfiguratum; *Lucas* tamen cap. 9. refert, id factum esse,

post *ferè dies octo*. Non cogit itaque illa particula *quasi*, quam adhibet *Sanctus Lucas*, ut Iesum annos præcisè triginta, & non paulò plures, natum fuisse credamus, quandò in Iordane fuit à Joanne baptisatus.

Verùm, nutat illa responsio, nam *Sanctus Lucas* non solum dicit, Christum fuisse *quasi* triginta annorum, quandò baptisatus est (si enim hoc tantummodò diceret, particula illa, *quasi*, quæ utitur, aliquam permitteret libertatem addendi unum, aut alterum annum numero rotundo triginta annorum, quem ibi sacer Evangelista assignat ætatis Christi) at, *Sanctus Lucas* dicit, quòd Christus erat incipiens *quasi* triginta annorum, quandò fuit baptisatus, ubi *incipiens* determinat ætatem Christi, dùm accessit ad Baptismum ad annum trigessimum, eumdemque incipientem, ac subindè excludit libertatem addendi aliquot annos numero rotundo triginta annorum ætatis Christi à sacro Evangelistæ, præfixo. Præterquàm quòd, etiamsi hæc particula, *quasi*, quam *Sanctus Lucas* usurpat, libertatem permitteret non nihil addendi numero rotundo triginta annorum, indè tamen evinci nequaquàm posset, Christum fuisse baptisatum anno ætatis suæ trigésimo quarto, sicut autumat nonnulli recentiores Chronologi, tantam siquidem latitudinem pati haud possunt hæc *S. Lucæ* verba, erat Iesus incipiens *quasi* triginta annorum. Quapropter, ut cordatè fatear, non video, quo pacto cum illis *S. Lucæ* verbis, quibus nullam noctem, nullam inesse obscuritatem puto, conciliari possit horum Auctorum sententia, qui docent, Christum, anno ineunte ætatis suæ trigésimo quarto, fuisse baptisatum.

Probatur secundò auctoritate Conciliorum, & SS. Patrum. Concilium Neocesariense celebratum anno 314. sanxit Canone 11. ut nullus ordinetur Presbyter antè annos triginta, etiamsi fuerit homo valdè dignus, quia Dominus Iesus Christus in anno trigésimo & baptisatus est, & cæpit docere. Idem unanimi consensu. tradunt SS. Patres, Iustinus in Dialogo cum Tryphone, Judæo, Clemens Alexandrinus lib. 1. Stromatum, Irenæus lib. 2. de Hæresibus cap. 28. Eusebius Cæsariensis lib. 1. Histor. Ecclesiæ cap. 10. Chrysostomus Homiliâ super hæc verba: Exiit edictum à Cæsare Augusto; Augustinus, qui etiam affirmat, se Evangelicâ auctoritatè tenere Christum fuisse baptisatum anno ætatis suæ trigésimæ: Hieronymus in cap. 1. Ezechielis, ubi hæc habet: Illud quoque intelligendum, quòd trigésimo ætatis suæ anno Dominus ad Baptisma venerit in quarto mense, qui apud nos vocatur Ianuarius, & est in annis primus exordio, præter Nisæm mensem novæm, in quo Pascha celebratur. Apud Orientales enim populos post collectionem frugum, & torcularia, quandò decime deferbantur in templum, October erat. primus mensis, & Ianuarius quartus. Quintum autem diem mensis adjungit, ut significet Baptisma, in quo aperti sunt Christo Cæli; & Epiphaniarum dies hucusque venerabilis est. Non, ut quidam putant, natalis in carne, tunc enim absconditus est, & non apparuit: quod huic tempori congruit, quandò dictum est: Hic est Filius

lius meus dilectus, in quo mihi complacui. Denique, *S. Thomas*, qui à traditione *SS. Patrum* ne latum quidem unguem unquam descivit, 3. p. q. 39. art. 3. probat, Christum fuisse convenienter baptisatum anno ætatis suæ trigésimo: *Quia, inquit, Christus baptisabatur quasi ex tunc incipiens docere, & prædicare, ad quod requiritur perfecta ætas, qualis est triginta annorum: undè legitur Genes. cap. 41. quòd triginta annorum erat Ioseph, quandò accepit regimen Egypti: similiter etiam 2. Reg. cap. 5. legitur de David, quòd triginta annorum erat cum regnare capisset. Ezechiel etiam in trigésimo anno capit prophetare, ut habetur Ezech. cap. 1.* Hactenus *S. Thomas*.

DILUUNTUR OBJECTIONES

Arguitur primò: Epocha Imperii *Proconsularis* Tiberii est planè commentitia; ergo falsum est, Christum fuisse baptisatum anno decimo sexto Imperii *Proconsularis* Tiberii. Prob. ant. tam Latini, quàm Græci, Romanæ Historiæ Scriptores, annos Tiberii numerarunt ab obitu Imperatoris Augusti, scilicet *Suetonius* in *Octavio*, *Cornelius Tacitus* in suis Annalibus, *Victor* uterque, *Dio Cassius* lib. 58. *Iosephus* lib. 2. de Bello Iudaico cap. 8. & multi alii. Qui ergo verissimile est, *S. Lucam*, repudiata vulgata, publicaque Imperii Tiberii Epochâ, quæ ab omnibus id ætatis Historicis summo consensu usurpata omnem Imperii Orbem impleverat, sequi voluisse aliam Imperii Tiberii Epocham obscuram, ignotam, & antè se à nullo prorsus adhibitam, qualis est illa Imperii *Proconsularis* Tiberii Epochâ, recens à Chronologis excogitata?

Respondeo: Nec fictitiam, nec obscuram, ignotamve fuisse Imperii *Proconsularis* Tiberii Epocham. Primò, quia Historiæ Romanæ Scriptores, quorum testimonia superius laudavi, disertè profitentur Tiberium ante obitum Augusti fuisse ab ipso in consortium Imperii adsumptum. Quid ergo vetat, quominus Imperii Tiberii exordium arcesamus ab eo tempore, quo factus est ab Augusto consors & Collega Imperii? Nam si inter Historiæ Romanæ Scriptores nonnulli sunt, qui Augusti Imperium ordiuntur ab illo anno, quo Iulius Cæsar ejus avunculus in Senatu est occisus, alii ab ejus primo Consulatu, quem anno sequenti iniit, alii denique à victoria Actiaca, in qua Antonium, & Cleopatram devicit, quorsum similiter Tiberio non poterit duplex Imperii tribui initium, unum videlicet, ab obitu Augusti, alterum verò ab eo anno, quo consors & collega Imperii fuit declaratus? Secundò, hanc Imperii *Proconsularis* Tiberii Epocham olim non fuisse ignotam, ex eo maximè colligitur, quòd *Clemens Alexandrinus* lib. 1. Stromatum versus finem annos Imperatorum recensens, primùm Tiberio tribuit annos Imperii viginti duos, & aliquot menses, deindè, secundum aliorum Historicorum calculum, tribuit illi viginti sex Imperii annos, cum sex mensibus

sibus & diebus novemdecim, ex quo evidenter apparet: duplicem antiquitū fuisse Tiberii Imperii Epocham, quā ante *Clementem Alexandrinum* utebantur passim Scriptores: unam annorum 22. & aliquot mensium, quot videlicet Tiberius solus imperavit ab obitu Augusti, & aliam Epocham annorum 26. quot nimirum imperavit Tiberius ab anno, quo ab Augusto factus est consors & collega Imperii. Tertio, *S. Lucas* cap. 3. postquam præmisit, anno quinto decimo Imperii Tiberii Cæsaris factum esse Verbum Domini super Joannem, Zachariæ filium, in deserto: subdit infra, quod *Iesus erat incipiens quasi annorum triginta*, quando anno sequenti, seu decimo sexto Imperii Tiberii accessit ad Baptismum. Ex quo sic argumentum conficio: Christus, juxta *S. Lucam*, baptisatus est anno ineunte ætatis suæ trigésimo: atqui annus decimus sextus Imperii Tiberii ab obitu Augusti non concurrat cum anno ætatis Christi trigésimo, sed trigésimo quarto, ergo Christus, juxta *S. Lucam*, non fuit baptisatus anno decimo sexto Imperii Tiberii ab obitu Augusti, sed potius anno Tiberii Imperii *Proconsularis* decimo sexto, qui reverà concurrat cum anno *Æræ* vulgaris vigésimo sexto, & cum anno ineunte ætatis Christi trigésimo. Patet itaque, *S. Lucam*, in describenda Historia Christi, & in condendis Ecclesiæ nascentis Annalibus, sequutum fuisse Tiberii Imperii *Proconsularis* Epocham, non verò Epocham illius Imperii *Augustæi*, id est, ab obitu Augusti.

Id etiam luculentè confirmari potest ex traditione, quæ olim obtinuit apud antiquos Ecclesiæ Patres, *Tertullianum*, *Lactantium*, *Augustinum*, *Hieronymum*, *Severum Sulpitium*, aliosque penè innumeros, quorum testimonia citat *Bollandus* in Diatriba præliminari Tomi primi mensis Aprilis. Ea itaque apud antiquos Patres vigeat traditio, Christum mortuum esse anno vigésimo nono *Æræ* vulgaris, seu anno decimo sexto Imperii Tiberii ab obitu Augusti, duobus Geminis Consulibus. Hæc autem Epochæ de morte Christi huic anno præfixa, adeò certè antiquis Patribus, & Ecclesiasticis Scriptoribus visa est, ut nonnulli inter eos maluerint totum vitæ Christi cursum triginta annis circumscribere, quàm ab illa Epochæ de morte Christi sub duobus Geminis Consulibus, ne latum quidem unguem desciscere. Porro, si annus decimus quintus Imperii Tiberii, quo *S. Lucas* dicit: *Factum fuisse Verbum Domini super Joannem in deserto*, esset annus decimus quintus Imperii Tiberii ab obitu Augusti, sicut contendunt adversarii, in manifestum errorem impегissent omnes illi antiqui, dum Christi obitum consignarunt anno decimo sexto Imperii Tiberii ab obitu Augusti, seu anno vigésimo nono *Æræ* vulgaris, duobus Geminis Consulibus; mortem siquidem Christi illigassent huic anno, qui immediatè secutus est annum, quo *Joannes Baptista* suum auspiciatus est Ministerium, seu mortem Christi illigassent anno decimo sexto Imperii Tiberii ab obitu Augusti, in quem annum incidit Consulatus duorum *Geminorum*, porro, absurdum est, & à veritate

ritate Historiarum penitus alienum asserere, Christum Dominum vixisse, unum dumtaxat annum, postquam *Ioannes Baptista* suum fuit exorsus ministerium, eumque mortuum esse anno decimo sexto Imperii *Tiberii* ab obitu *Augusti*, maxime cum certum sit ex Scriptura Sacra, sicut ostendimus in Paragrapho secundo Dissertationis decimę quintę, Christum Dominum quatuor celebrasse Paschata, postquam in Iordane à *Ioanne* fuisset baptizatus. Ut igitur à tam gravi errore vindicentur illi antiqui Patres, quibus longè melius quàm nobis explorata fuit traditio Ecclesię, necesse est ut dicamus, illos non alià ratione obitum Christi consignasse anno decimo sexto Imperatoris *Tiberii* ab obitu *Augusti*, seu anno *Ærę* vulgaris vigesimo nono, sub Consulatu duorum Geminorum, nisi quia compertum habebant, *S. Lucam* *Tiberii* Imperii Proconsularis Epocham fuisse secutum, ac subindè annum illum decimum quintum, quo, ut scribit *S. Lucas* cap. 3. ministerium suum *Ioannes* orsus est, non esse annum decimum quintum *Tiberii* Imperii ab obitu *Augusti*, sed potiùs annum decimum quintum *Tiberii* Imperii Proconsularis. Nisi hunc in modum exponantur antiqui Patres, & Scriptores Ecclesiastici, haud dubiè cum *S. Luca* adversà fronte pugnare invenientur, & ab errore, in consignando anno mortis Christi, liberari non poterunt. Plura hac de re legi possunt apud *Georgium Herovartum* in sua nova, & veteri Chronologia, apud *Paulum Pezron* in suis vindiciis Antiquitatis temporum, & in sua *Historia Evangelicà*, apud *Bollandum* in Diatriba præliminari in Catalogo veteres Romanorum Pontificum ad Tom. 1. Aprilis, apud *Pagium* in Critica Baronii, & denique apud *Schellstratum* in lib. 1. de Antiq. Eccl. illust.

Arguitur secundo: Ex pluribus momentis evinci potest, *Tiberium*, vivente adhuc *Augusto*, non fuisse Imperatorem consalutatam, ergo admitti non debet hæc *Tiberii* Imperii Proconsularis Epochæ. Prob. ant. Primò, quia si *Tiberius*, vivente adhuc *Augusto*, fuisset Imperator salutatatus, procul dubio *Livia*, Mater *Tiberii*, non fuisset post excessum *Augusti* tantoperè sollicita pro *Tiberio*; narrat quippe *Tacitus* lib. 1. *Annalium* cap. 5. quòd, *Tiberio* absente, acribus custodiis domum, & vias sepelit, *Livia*, donec *Tiberius* advenisset, ac tum simul excessisse *Augustum*, & rerum potiri *Neronem* fama tulit. Nulla profectò *Liviæ* post obitum *Augusti* timendi causa fuisset, si *Tiberius*, vivente adhuc *Augusto*, Imperium jam fuisset adeptus. Secundo, si *Tiberius*, superstite adhuc *Augusto*, Confors & Collega Imperii esset factus, necesse non fuisset, ut post obitum *Augusti* Senatus sollicitaret *Tiberium* ad Imperium suscipiendum, sicut refert *Suetonius* in *Tiberio*, ubi ait, quòd *Tiberius* quasi cōstitutus; & querens miseriam & onerosam servitutem recepit Imperium. *Cornelius* etiam *Tacitus* lib. 1. *Annalium* scribit, *Tiberium*, de Imperii magnitudine differentem, modestè affirmasse: *Solam Divi Augusti mentem tantę molis capacem: se in partem curarum ab illo vocatum experien-*

do didicisse, quàm arduum, quàm subiectum fortunæ regendi cuncta onus; proinde in Civitate tot illustribus viris subnixæ, non ad unum omnia deferrent; plures facilius munia Reipublicæ societatis laboribus exsecuturos. Idem de Tiberio affirmat *Vellejus Paternulus* lib. 2. Denique, si Tiberius, vivente adhuc Augusto, Imperator est salutatus, quare igitur post obitum Augusti Consules *Sextus Pompejus*, & *Sextus Apulejus* dicuntur primi, qui in verba Tiberii juraverint, teste *Cornelio Tacito* lib. 1. *Annal.* cap. 7. Quare etiam Principatus, quem post mortem Augusti iniit Tiberius, à *Tacito* lib. 1. *Annal.* cap. 6. *Novus Principatus* appellatur? *Primum facinus*, inquit *Tacitus*, *novi Principatus fuit*, posthumus *Agrippæ* cædes: quem ignarum inermemque, quamvis firmatus animo *Centurio* agrè consecit. Ex his ergo apparet: Tiberium, superstitè adhuc Augusto, Imperium non fuisse adeptum.

Respondeo: vanas & inanes prorsus esse illas conjecturas, quæ petuntur ex sollicitudine *Liviæ* post obitum Augusti, ex cunctatione Tiberii, ejusque in speciem in Senatu Imperii detestatione: nam primò, nemini mirum videri debet, quòd *Liviæ*, Mater Tiberii, paululum temporis celaverit mortem Augusti, metueritque ne Tiberius summam rerum potiretur. Nec etià mirum, quòd Tiberius in Senatu dissimulare ac tergiversari visus sit in suscipiendis habenis Imperii: nam probè sciebant *Liviæ* & *Tiberius*, Germanicum non solum legiones, & immensa sociorum auxilia in manu & potestate habere, verum etiam totius populi Romani favorem & benevolentiam sibi arctissime devinxisse, adeò ut fuerint, qui promptos se se ostentavere, si Germanicus vellet Imperium, ut inquit *Tacitus* lib. 1. *Annal.* quod & *Vellejus Paternulus* lib. 2. confirmat. Hinc metus Tiberii, hinc sollicitudo *Liviæ*, undè in tali oratione Tiberii plus dignitatis, teste *Tacito*, quàm fidei erat. Sed præstat auscultare *Suetonium*, qui in Tiberio cap. 25. Tiberianæ dissimulationis causam his verbis detegit. Cunctandi causa erat metus undique imminentium discriminum; ut sapè *Lupus* se auribus tenere diceret, Tiberius, nam & servus *Agrippæ*, *Clemens* nomine, non contemnendam manum in ultionem Domini comparat: & *L. Scribonius Libo* vir nobilis res novas clam moliebatur, & duplex seditio militum in *Illyrico* & in *Germania* exorta est. Quidam etiam Principem detestabant non à se datum summamque vi Germanicum, qui tum his præerat, ad capeffendam Rempublicam perurgebant, quanquam obfirmatè resistentem. simulavit Tiberius valetudinem, quò æquiore animo Germanicus celerem successionem, vel certè societatem opperiretur. Quæ postrema *Suetonii* verba, vel certè societatem opperiretur, notatu dignissima sunt, ait *Cl. Pagius* in *Critica Baronii*, nam si nullus antehàc in societatem Imperii fuisset assumptus, vana profeò & ridicula fuisset hæc Tiberii simulatio. Quàm peritus artis fingendi ac dissimulandi esset Tiberius, apertè ostendit doctissimus *Cardinalis Norisius* in *Cenotaphiis Pisani* Dissertatione 2. cap. 15.

pag. 265. ubi loquendo de morte *Lucii*, qui filius erat *Julie*, Imperatoris *Augusti* filia, quamque postea *Tiberius* in uxorem duxit, hæc habet : *Augustus* ægrè & acerbè tulit *Cæsaris*, filii (seu *Lucii*) mortem, quod uni tantum *Cajo*, alteri *Julie* filio, spes successionis niteretur. *Tiberius* *Lucium* *Privignum*, immaturo fato sublatum, *Lyrico* carmine deslevit, cui titulum dedit : Conquestio de *Lucii* *Cæsaris* morte : teste *Suetonio* cap. 70. de *Vita* *Tiberii*. *Crocodili* lacrymas dixeris; etenim æmulo Imperii, cui inhiabat, extincto, altero tantum gradu à supremo rei Romanæ fastigio se distare latabatur, quamvis in speciem dolorem, ob mortem *Cæsaris*, præ se ferret. Eandem quoque dissimulandi artem apprimè callebat *Livia*, Mater *Tiberii*, & *Augusti* Imperat. uxor. Ea quippè apud plerosque in suspicionem venit maturatæ *Cæsaribus* *Lucio*, & *Cajo* mortis, teste *Dione* apud *Zonaram*, idemque testatur *Tacitus* lib. 1. ubi de utroque *Cæsare* *Lucio*, & *Cajo* loquens, ait : *Mors* fato prope, vel novercæ *Livie* dolus abstulit. Et tamen callidissima illa mulier, totaque ad dissimulandum composita, quamvis duos illos *Cæsares* in juventutis flore per occultas insidias è medio sustulisset, maximam erga illos demortuos misericordiam, & tristitiam de eorum morte conceptam publicè simulabat, sicut refert idem *Tacitus* lib. 4. propè finem, ubi hæc de *Livia*, Matre *Tiberii*, narrat : *Quæ*, seu *Livia*, *florantes* privignos, videlicet *Lucium*, & *Cajum*, cum per occultum subvertisset, misericordiam erga illos palàm ostentabat.

Detestà germanà *Tiberianæ* tergiversationis causà, concidit & in auras evanescit puerilis illa declamatio, quam novis tibiis decantat *Samuel Basnagius* in suis Exercitationibus Historico-Criticis, ut *Tiberii* Imperii Proconsularis Epocham evertat. Si *Tiberius*, inquit *Basnagius*, verè Imperii Collega fuisset, eò loci res ejus erant in Imperio Romano, quo hodiè in Imperio Germanico est status Regis Romanorum. Fingemus ne animo & cogitatione, Electores, Principesque Imperii, post defunctum *Cæsarem*, precibus adire Regem Romanorum, in questus, lachrymas, vota effundi ad Deum, ad effigiem defuncti, ad genua ipsius manus tendere, ut decessoris thronum, munusque occupet? An non preces illæ Senatus versæ ad *Tiberium* apertè indicant, *Tiberium* non fuisse verè Imperii Collegam, quo titulo, mox defuncto decessore, nullius ope, sed vi solâ dignitatis olim adjunctæ ad Imperium *Augustæum* ascendisset. Hactenùs *Basnagius*, cujus declamationi nihil ponderis, sed inanistantum verborum sonitus inest. Nam ideò necesse non est, ut Electores, Principesque Imperii, post defunctum *Cæsarem*, adeant Regem Romanorum, eumque ad thronum decessoris ascendendum sollicitent, quia ille, qui semel Romanorum Rex electus est, non detrectat, post obitum *Cæsaris*, suscipere Imperium; at si quis Romanorum Rex electus vellet post mortem *Cæsaris* abdicare se Imperio, diceretque se Imperialis dignitatis oneri ferendo parem non esse, procul dubio Electores, Principesque Imperii ipsum adirent, & quâ precibus, quâ

quâ consiliis ipsum sollicitarent ad Imperium capeffendum. Sic similiter Senatus Romanus, Tiberio addictus, eum ad Reipublicæ Imperium, post obitum Augusti, suscipiendum sollicitavit, vel quia Tiberius visus est post obitum Augusti, præ nimia modestia, quam tamen in speciem tantummodò affectabat, abdicare se Imperio, quod jam vivente Augusto fuerat adeptus, vel quia propter favorem ac suffragia Populi Romani, quæ sibi, ob ingentem morum probitatem, promeritus fuerat *Germanicus*, consultò dissimulabat tanto in discrimine rerum suscipere Imperium; vel quia denique Tiberius imitandum sibi proposuit exemplum *Augusti*, qui, ut narrant Historici, quò magis firmaret Imperium sibi omnium, suffragiis adjudicatum, illud ægrè se suscipere simulavit, & tantum in decennium assumpsit, quo exacto, accedente denuò Senatus, Populique Romani consensu, in quinquennium prorogavit, denique in plura rursus decennia tenuit. Ex quo, ut tradit *Dio lib. 53. Quinquennalia, decennalia, quindecennalia, vicennalia* Imperatorum originem habuerunt, de quibus accuratè disserit *Pagius* in sua Dissertatione hypatica.

Quòd spectat novum Principatum, quem Tiberio post obitum Augusti tribuit *Cornelius Tacitus*, dico: novum illum Principatum non officere priori Principatui, quem, vivente adhuc Augusto, obtinuit Tiberius. Nam cum Tiberius post obitum Augusti solus Imperium moderari cœperit, potuit *Cornelius Tacitus* novam ab obitu Augusti Epocham Principatus Tiberii inire, non secus ac quidam Historiæ Romanæ Scriptores novam Imperii Augusti Epocham inchoarunt à pugna Actiaca, quamvis constet, Augustum ante pugnam Actiacam Imperium suscepisse. Hinc, quando *Cornelius Tacitus* ait: Sextum Pompejum, & Sextum Apulejum, (qui fuerunt Consules anno *Æræ vulgaris* decimo quarto) primos fuisse, qui in verba Tiberii jurarunt, nihil aliud vult, quàm prædictos Consules primos fuisse, qui, ineunte novo Principatu Tiberii ab obitu Augusti, jurarunt in verba Tiberii, quod sanè non impedit, quominus alii Consules in priori Principatu Tiberii, quando videlicet ab Augusto in consortium Imperii addictus est, in illius verba jurarint.

Arguitur tertio: si Tiberius, vivente adhuc Augusto, fuisset Imperator consalutatus, sequeretur, Augustum, & Tiberium Rempublicam simul gubernasse: atqui id apertè Historiæ repugnat; *Spartianus* siquidem in *Hadriano* loquens de *M. Aurelio*, & *L. Vero* hæc habet: *Hi sunt, qui postea duo pariter Augusti Primi Rempublicam gubernarunt.* Si ergò, telle *Spartiano*, *M. Aurelius*, & *L. Verus*, qui longè post Augustum, & Tiberium imperarunt, duo Augusti, seu duo primi Imperatores fuerunt, qui Rempublicam simul gubernarunt, nullo pacto dici potest, Augustum, & Tiberium simul Rempublicam administrasse.

Respondeo: hoc *Spartiani* testimonium sententiæ nostræ, ne levitèr quidè adversari. Nam licèt asseramus, Tiberium, vivente adhuc Augusto, fuisse consortem Imperii, Principem, & Imperatorem consaluta-

lutatum, non tamen dicimus Tiberium, vivente adhuc Augusto, dignitatem Augustæam fuisse adeptum; constat siquidem Tiberium in Urbe, Imperii capite, se Augusto inferiorem gessisse, ac minori præditum, fuisse autoritate, etsi extrâ Urbem, seu Romam, in Provinciis, & in exercitibus pari dignitate polleret, ac ipse Imperator Augustus. Quamvis igitur Tiberius, superstite adhuc Augusto, reverà extiterit consors, & Collega Imperii, dici tamen non potest, Augustum & Tiberium, tanquam duos pariter Augustos, Rempublicam gubernasse.

Arguitur quartò: idèò maximè Tiberius, vivente adhuc Augusto, fuisset Imperator con salutus, quia Tribunitiâ potestate, & Imperio proconsulari donatus est, dum adhuc in vivis esset Augustus: atqui indè minimè evincitur Tiberium, superstite adhuc Augusto, fuisse reverà Imperatorem; ergò Tiberius, vivente adhuc Augusto, non fuit Imperator consalutus. Prob. min. primò, quia *Germanico*, Drusi filio, proconsulare Imperium, postulante Tiberio, Senatus detulit, ut Auctor est *Tacitus* lib. 1. *Annal.* & tamen nemo dixerit, Germanicum, vi illius Imperii proconsularis, fuisse Imperatorem. Secundò, *Vipsanius Agrippa* Tribunitiam potestatem obtinuit, sicut testatur *Dio Cassius* lib. 54. & tamen Agrippa nunquam Imperator fuit, neque propter illam Tribunitiam potestatem Imperatorum Romanorum albo accensetur. Denique, verè consors, & Collega Imperii ille dicitur, qui non solum in Provinciis, sed & in Italia, immò in Urbe, Imperii capite, munus exercet eminentissimum, non precario quidem, sed perpetuo jure, & cui competit facultas deligendi viros ad capeffendas, tam in Urbe, quam extrâ Urbem, dignitates, cum igitur Tiberius, superstite adhuc Augusto, supremam in Urbe non obtinuerit potestatem, sequitur, illum, vivente adhuc Augusto, non fuisse verè consortem, & Collegam Imperii.

Respondeo ad singula illa momenta, & ad primum dico: maximum esse discrimen inter Imperium proconsulare, quod Germanico, postulante Tiberio, concessum est à Senatu, & Imperium proconsulare, quod, vivente adhuc Augusto, fuit Tiberio adjudicatum. Nam Imperium, proconsulare, quod Senatus concessit Germanico, fuit limitatum, & ad certas quasdam Provincias coarctatum, ut scribit *Tacitus* lib. 2. *Annal.* ubi asserit, Germanico fuisse à Senatu permissas Provincias, quæ *Mari dividuntur*. At verò, Tiberius, vivente Augusto, obtinuit à Senatu Imperium proconsulare nullis extrâ Urbem Romam limitibus circumscriptum, quò fit, ut Tiberius, superstite Augusto, verè fuerit Collega Imperii, & Imperatoris prænomine insignitus, sic enim appellatur à *Vellejo Paterculo* lib. 2. ubi, postquam sermonem habuit de rebus à Tiberio anno decimo *Æræ* vulgaris gestis, hæc habet: *Eadem, & virtus, & fortuna subsequenti tempore ingressa animam Imperatoris Tiberii fuit, quæ initio fuerat.*

Ad secundum, dico: Agrippæ ad quinquennium dumtaxat delatam

esse Tribunitiam potestatem, teste Dione, sed nunquam ipsi à Senatu concessum esse Imperium proconsulare, quale fuit Tiberio, unà cum potestate Tribunitia, concessum, supersiste adhuc Augusto. Quapropter, licet Agrippa, Tribunitia potestate decoratus, non fuerit Imperator appellatus, Tiberius tamen, qui Imperium proconsulare nullis extra Urbem limitibus definitum unà cum potestate Tribunitia, vivente adhuc Augusto, obtinuit, verè dictus est Imperator, seu consors, & Collega Imperii.

Ad ultimum, dico: id discriminis fuisse inter Imperatorem, qui Augustam dignitatem erat adeptus, seu qui *Augustus* dicebatur, & Imperatorem, qui necdum *Augustus* appellabatur, licet reverà esset consors, & Collega Imperii declaratus; quòd Imperator, qui *Augustus* dicebatur, supremam tam extra Urbem, quam in Urbe, Imperii capite, potestate præditus esset; Imperator verò, qui necdum Augustam dignitatem erat adeptus, seu qui nondum *Augustus* dicebatur, summam quidem extra Urbem Provincias administrandi potestate polleret, inferiorem, tamen in Urbe, Imperii capite, auctoritatem obtineret. Cum igitur Tiberius, vivente adhuc Augusto, dignitatem Augustam non habuerit, idest, *Augustus* non fuerit appellatus, sed solum vi potestatis tribunitiæ, & Imperii proconsularis sibi à Senatu delati, nullisque extra Urbem limitibus definiti, simpliciter Imperator diceretur, seu consors, & Collega Imperii haberetur; mirum nemini videri debet, quòd Tiberius, supersiste Augusto, supremam in Urbe potestatem non obtinuerit. Plura de potestate Imperii *Proconsularis* (quale, vivente Augusto, fuit Tiberio concessum, & de potestate Imperii dicti *Augusti*) legi possunt apud *Pagium*, *Schellstratum*, & *Pezronum*, qui utriusque potestatis discrimen in suis lucubrationibus ita perdoctè exposuerunt, ut aliis, quibus de eo agendum esset, amplissimum otium fecerint.

Arguitur quinto: *Pilatus* administrabat *Judæam*, quando *Ioannes Baptista* munere suo fungi cæpit, dicit enim *S. Lucas* cap. 3. *Anno quinto decimo Imperii Tiberii Cæsaris, procurante Pontio Pilato Judæam. . . . factum est verbum Domini, super Joannem*, Atqui *Pilatus* anno decimo quinto Imperii proconsularis Tiberii, nondum *Judæam* administrabat; ergò *S. Lucas* secutus non est Epocham Tiberii Imperii proconsularis. Probat. min. annus decimus quintus Imperii proconsularis Tiberii concurret cum anno vigesimo quinto *Æræ* vulgaris; atqui *Pilatus* *Judæam* nondum anno vigesimo quinto, immò, nec anno vigesimo sexto *Æræ* vulgaris administrabat; ergò *Pilatus* anno decimo quinto Imperii proconsularis Tiberii *Judæam* nondum administrabat. Prob. min. *Pilatus*, teste *Iosepho* lib. 18. *Antiq. cap. 5.* postquam successit *Valerio Grato*, *Judæam* decem annis administravit, quibus exactis, *Romam*, jubente *Vitellio*, profectus est responsurus apud *Tiberium* ad crimina ipsi à *Judeis* objectæ, id autem contigit anno *Æræ* vulgaris trigesimo sexto, nam

nam Tiberius, dum Romam Pilatus pervenit, jam è vivis exceſſerat; conſtat autem Tiberium obiſſe die 16. menſis Martii anni *Æræ* vulgaris trigelimi ſeptimi. Cum igitur Pilatus per decem annos, ut ait Iosephus, Iudæam adminiſtraverit, eaque ceſſerit anno *Æræ* vulgaris trigelimo ſexto, neceſſe eſt, ut Pilatus Iudæam adminiſtrare cœperit anno vigelimo ſeptimo *Æræ* vulgaris, alioquin, ſi Pilatus Iudæam adminiſtrare cœpiſſet anno vigelimo quinto *Æræ* vulgaris, eam non per decem, ſed per duodecim annos adminiſtraſſet, quod ſanè veritati Hiſtoriz apertè repugnat.

Reſpondeo: Pilatum, Imp. proconſularis Tiberii anno decimo quinto, qui concurret cum anno vigelimo quinto *Æræ* vulgaris, Iudæam adminiſtrare cœpiſſe, idque evinci poſſe ex Iosepho, qui, poſtquam, lib. 18. Antiq. cap. 5. dixit, Pilatum, jubente Vitellio, Romam fuiſſe proſectum, ut coràm Tiberio ad objecta ſibi per Iudæos crimina reſponderet, conſeſſim ſubdit cap. 6. *Vitellium* in Iudæam proſectum perveniſſe Hieroſolyma in ipſa Feſtivate Paſchali, ubi à Iudæis honorificentiſſimè exceptus, quò gratiam eis referret, ultro remiſit totum vectigal fructuum venalium, & ſtolam cum ornatu Pontiſificio permixit in Templo aſſervari à Sacerdotibus, quæ priùs à Romano Turris Antoniz Præſecto cuſtodiebatur. Ex quo Iosephi teſtimonio colligitur, Vitellium, poſtquam juſſiſſet Pilatum Romam proſiciſci, ejuſque loco ad Iudæam procurandam Marcellum miſiſſet, Hieroſolyma veniſſe in Feſtivate Paſchali. Porro, Vitellius (ut probabiliùs cenſet *Jeſſerius* in ſuis Annalibus) Hieroſolyma venit anno trigelimo quinto *Æræ* Chriſtianæ; Si quidem, poſtquam anno trigelimo quarto *Æræ* vulgaris Conſulatum, geſſiſſet, miſſus eſt à Tiberio anno ſequenti, ſeu trigelimo quinto *Æræ* vulgaris, Proconſul in Syriam, & eodem anno acceſſit Hieroſolyma in Feſtivate Paſchali. Hoc igitur anno trigelimo quinto *Æræ* vulgaris, antequàm Hieroſolyma in Feſtivate Paſchali veniſſet *Vitellius*, jam *Pilatus*, juxtà *Iosephum*, Iudæa exceſſerat, ac ſubindè cum in Iudæa adminiſtranda, teſte eodem Iosepho, decem exegerit annos, neceſſum eſt, ut Pilatus Iudæam adminiſtrare cœperit anno Imperii proconſularis Tiberii decimo quinto, qui concurret cum anno *Æræ* vulgaris vigelimo quinto. Nulli autem mirum videri debet, quòd Pilatus, qui ante Paſcha anni trigelimi quinti *Æræ* vulgaris juſſus erat à Vitellio Romam proſiciſci, non hùc tamen pervenerit niſi poſt Paſcha anni ejusdem *Æræ* vulgaris trigelimi ſeptimi, & poſt obitum Tiberii: nulli, inquam, id mirum videri debet; potuit enim Pilatus malè ſibi conſcius moras conſultò neſſere degens in aliqua Urbe Syriæ, in eam ſpem erectus fore ut cunctando res ſuas acciſas in melius promov eret, vel fortè adverſis ventis impeditus eſt, ne navigationem ſulciperet, ſuamque maturaret profectionem. His de cauſis Pilatus tardiùs Romam adven-
tavit.

Ex dictis Lector advertere debet, doctrinam antiquorum Ecclesiæ Patrum asserentium, Christum fuisse baptisatum anno duodecimo Imperii Tiberii, & mortuum anno decimo quinto ejusdem Imperii, nullam omnino mereri animadversionem, sed potius Scripturæ Sacræ consentaneam esse. Enim verò, annus Imperii Tiberii duodecimus, quo antiqui illi Patres docent, Christum esse baptisatum, non est annus Tiberii, Imperii proconsularis duodecimus, sed est annus Tiberii Imperii Augustæi, seu ab obitu Augusti duodecimus, qui concurret cum anno Tiberii Imperii proconsularis decimo sexto, & Æræ vulgaris vigesimo sexto, quo anno, ut suprà ex S. Luca probatum est, Christus reverà fuit baptisatus. Similiter, annus decimus quintus Imperii Tiberii, quò Christum in Crucem actum esse affirmant antiqui illi Patres, non est annus Imperii proconsularis decimus quintus, quo *Minius Agrippa*, & *Cornelius Lentulus* processere Consules, sed est annus Tiberii Imperii Augustæi, seu ab obitu Augusti decimus quintus, qui connectitur cum anno decimo nono Tiberii proconsularis, & Æræ vulgaris vigesimo nono, sub Consulatu duorum Geminorum, quo anno Christum verè fuisse Cruci affixum, infrà in Dissertatione decima quinta commonstrobo. Id Lector obiter advertere debet contra quosdam recentiores Chronologos, qui liberius, quàm par esset, asserunt, antiquos Patres, consignando anno Baptismi, sicut & mortis Christi, errasse, eosque ex Cyclorum ingnorantià non esse locutos ad regulam veræ, ac germanæ Chronologiæ tam Sacræ, quàm Prophætæ.

QUÆRES PRIMÒ: *Quantum temporis effluerit à Ioannis Baptistæ Ministerio, usque ad Baptismum Christi?*

Respondeo: Probabilius esse à Ioannis Baptistæ ministerio, usque ad Christi Baptismum, integrum fermè annum interfluxisse. Primò, quia ministerium Ioannis, ante Baptismum & prædicationem Christi, non parvum spatium duravit, ut indicant hæc Pauli verba Actorum, cap. 13. v. 25. *Cum impleret Ioannes cursum suum dicebat: quem me arbitramini esse, non is ego sum, sed ecce venit post me cuius non sum dignus calcæamenta pedum solvere.* Secundò, Christus ad Baptismum prius non accessit, quàm omnis populus à Joanne esset baptizatus, sicut narrat S. Lucas cap. 3. Joanni autem integri fermè anni spatio opus fuit ad baptizandam totam plebem, quam prius vitæ suæ sanctitate ad salutarem poenitentiam provocare, suisque sermonibus ad suscipiendum Baptismum disponere, ac præparare debuit. Standum est igitur sententiæ peritorum hujus temporis Chronologorum, qui docent, Joannem Baptistam anno decimo quinto Tiberii Imperii proconsularis suum exorsum fuisse ministerium, juxtà illud Lucæ cap. 3. *Anno quinto decimo Imperii Tiberii Caesaris, factum est verbum Domini super Joannem Zachariæ filium in deserto*, anno verò sequenti, seu decimo sexto Imperii proconsularis Tiberii, Christum fuisse in Jordane à Joanne baptizatum.

Hinc

Hinc merito repudiari debet sententia *Sethi Calvisii* in sua Introductione ad Chronologiam cap. 49. & *P. Bernardi Lamy* in sua Harmonia in Evangelia, asserentium, Christum Dominum fuisse baptizatum anno decimo quinto Tiberii Imperatoris. Enim verò, si Christus baptizatus esset anno decimo quinto Imperii Tiberii, & mortuus anno ejusdem Imperatoris decimo nono, Christus post susceptum Baptisma, quinque celebrasset Paschata, ut patet ex calculo annorum, qui effluerunt ab anno decimo quinto Imperii Tiberii, usque ad ejus annum decimum nonum: atqui tamen Christus, ut infra ex Scriptura Sacra ostensurus sum, post susceptum Baptisma, non quinque, sed quatuor tantummodò peregit Paschata; stare ergò nequit sententia *Sethi Calvisii*, & *Bernardi Lamy*, qui Baptismum Christi conignant annò decimo quinto Imperii Tiberii ab obitu *Augusti*.

Praterèa, non sibi constat *Bernardus Lamy*, ait enim, Christum, post susceptum Baptisma, per duos dumtaxat annos, & sex circiter menses suum obisse ministerium, & Cruci deindè fuisse affixum. Ex quo infert, Christum, post susceptum Baptisma, tria tantùm peregisse Paschata. Quæro igitur ab illo Auctore, quo pacto hæc duo in ejus sententia conciliari possint? Primò, quòd Christus fuerit baptizatus anno decimo quinto Imperii Tiberii, & mortuus anno decimo-nono ejusdem Imp. Et secundò, quòd Christus, post susceptum Baptisma, compleverit suum ministerium spatio duorum annorum, & sex mensium? Hæc quippè duo, quæ docet ille Auctor, secum invicem pugnantes, nullà ratione, meà quidem sententià, conciliari possunt. Nam, si Christus baptizatus est anno decimo quinto Imperii Tiberii, & mortuus anno ejusdem Imperatoris decimo nono, impossibile omninò est ut Christus, post susceptum Baptisma, compleverit suum ministerium spatio duorum annorum, & sex mensium. Ab anno si quidem decimo quinto Imperii Tiberii, (quo *Bernardus Lamy* supponit Christum fuisse baptizatum,) usque ad annum decimum nonum Imp. Tiberii (cui idem Auctor illigat mortem Christi) non duo tantùm anni & sex interfuxerunt menses, sed quatuor integri recensentur anni, & aliquot menses. Manifesta ergò contradictione se se involvit *Bernardus Lamy*, aut saltem secum ipse non satis consentit, dum ex una parte affirmat, Christum fuisse baptizatum anno decimo quinto Imperii Tiberii, & mortuum anno ejusdem Imp. decimo nono, & ex alia parte asserit, Christum, post susceptum Baptisma, spatio duorum annorum, & sex mensium suum complevisse ministerium, atque post tria celebrata Paschata in Crucem actum esse.

QUÆRES SECUNDÒ: An reverà Christus fuerit baptizatus die sexta Januarii?

Respondeo: Christum, juxtà perantiquam, & constantem Sanctorum Patrum sententiam, fuisse baptizatum die sextà Januarii, idque proferri, & singulis annis canere Ecclesiam die sextà Januarii, quæ hac potissi-

tilimùm de causa ab antiquis *disceptata* dicta est, quòd in Baptismo Christi Sanctissima Trinitas specie quàdam sensibili innotescere voluerit. Cùm igitur Ecclesia memoriam Baptismi Christi singulis annis die sextâ Januarii recolere soleat, nullus dubito, quin hac die Christus fuerit à Joanne baptizatus, alioquin Ecclesia celebritati hujusce Mysteriorum aliam destinasset diem, maxime cùm (teste doctissimo *Tilmontio* Nota 16. Documentorum pro Hist. Eccl. tom. 1.) diei Baptismi Christi facilius, & certius notitiam habere potuerit Ecclesia, quàm ipsius ortus. Unus inter Sanctos Patres *Epiphanius* censet, in Alogorum hæresi, Christum fuisse baptizatum die duodecima mensis Ægyptiorum, dicti *Athyr*, cujus dies duodecima respondet diei octavæ mensis Novembris; Sed hæc Sancti Epiphanii sententia, nunc penitus exolevit, eamque perperam *P. Bernardus Lamy*, vir cæteroquin doctissimus, in suo Apparatu Chronologico, pagina 207. Ecclesiæ traditioni præponendam esse duxit, sic enim loquitur: Igitur cùm non omnino videatur repudianda opinio Sancti Epiphanii, & multa concurrant, quibus conjecturam facimus, non multò post dies Festos Expiationis & Tabernaculorum collatum Baptismum Christo à Joanne in populi Iudaici concursu, ultrò statuerem pro die hujus Baptismi diem octavam Novembris, quoniam dies aliqua statuenda est. Rejectâ itaque illius Auctoris conjecturâ, quæ Ecclesiæ, & Sanctorum Patrum traditioni adversatur, dicendum est, Christum fuisse à Joanne in Jordane baptizatum die sextâ Januarii anni Tiberii Imperii proconsularis decimi sexti.

Series Imperatorum & Consulum Romanorum ab Anno primo Æræ Christianæ, usque ad annum ejusdem Æræ Christianæ vigesimum sextum, quo Christus Dominus, anno ætatis sue ineunte trigésimo, die 6. mensis Januarii fuit in Jordane à Joanne baptizatus.

A Nno Urbis conditæ 754. Anno primo Olympiadis 195. Anno Juliano quadragesimo sexto. Anno periodi Julianæ 4714. Anno Imperii Cæsariani Cæsaris Augusti quadragesimo quinto. Consules fuerunt Cæsar Cæsar, & L. *Emilius Paulus*. Eodem anno Kalendis mensis Januarii capit primus annus Æræ Christianæ, seu *Vulgaris & Dionysianæ*, juxta quam Ecclesia Latina computat annos Christi, numerando videlicet ab ejus Natali usque ad præsentem annum, quem decurrimus, annos 1724.

Verum, hæc *Æra Christiana*, seu *Dionysiana*, sicut jam observavimus in Dissertatione sexta, non est accurata, nec potest designare *verum* & *proprium* Natale Christi, quia, ut ibidem latè ostendimus, Christus Dominus natus est die 25. mensis Decembris anni Urbis conditæ 749. Consulibus *Augusto Cesare XII. & L. Cornelio Sulla*. Ex quo palàm sequitur, verum ac proprium Natale Christi Domini præcessisse annum primum *Æræ Christianæ* quadriennio solido & octo diebus, ac subindè, Christum Dominum anno Urbis conditæ 754. quo Kalendis Januarii cæpit annus primus *Æræ Christianæ*, non incepisse annum primum ætatis suæ, sicut supponit *Æra Christiana*, seu *Dionysiana*, quæ in usu est in Ecclesia Latina, sed inchoasse annum quintum ætatis suæ, quem complevit die 25. mensis Decembris ejusdem anni Urbis conditæ 754. sub Consulatu *Caii Cæsaris, & L. Emilii Paulii*. Quò fit, ut *Æra Christiana*, seu *Dionysiana*, quadriennio solido, & octo diebus posterior sit vero, & proprio Natali Christi Domini.

Anno Urbis conditæ 755. Anno secundo Olympiadis 195. Anno Juliano quadragesimo septimo. Anno periodi Julianæ 4715. Anno Imperii Octavianii Cæsaris Augusti quadragesimo sexto. Anno secundo Æræ Christianæ. Consules fuerunt P. Vicinius, & P. Alfenus. Eodem anno Christus Dominus, juxta suum verum & proprium Natale, decurrebat annum ætatis suæ sextum.

Anno Urbis conditæ 756. Anno tertio Olympiadis 195. Anno Juliano quadragesimo octavo. Anno periodi Julianæ 4716. Anno Imperii Octavianii Cæsaris Augusti quadragesimo septimo. Anno tertio Æræ Christianæ. Consules fuerunt L. Ælius Lamia, & M. Servilius. Eodem anno Christus Dominus, juxta suum verum & proprium Natale, decurrebat annum ætatis suæ septimum.

Anno Urbis conditæ 757. Anno quarto Olympiadis 195. Anno Juliano quadragesimo nono. Anno periodi Julianæ 4717. Anno Imperii Octavianii Augusti quadragesimo octavo. Anno quarto Æræ Christianæ. Consules fuerunt Sextus Ælius Catus, & C. Sentius Saturninus. Eodem anno Christus Dominus, juxta suum verum & proprium Natale, decurrebat annum ætatis suæ octavum.

Anno Urbis conditæ 758. Anno primo Olympiadis 196. Anno Juliano quinquagesimo. Anno periodi Julianæ 4718. Anno Imperii Octavianii Augusti quadragesimo nono. Anno quinto Æræ Christianæ. Consules fuerunt L. Valerius Messalla Volusus, & Ch. Cornelius Cinna Magnus. Eodem anno Christus Dominus, juxta suum verum & proprium Natale, decurrebat annum ætatis suæ nonum.

Anno Urbis conditæ 759. Anno secundo Olympiadis 196. Anno Juliano quinquagesimo primo. Anno periodi Julianæ 4719. Anno Imperii Octavianii Augusti quinquagesimo. Anno sexto Æræ Christianæ. Consules fuerunt M. Æmilius Lepidus, & L. Arruntius. Eodem anno Christus Domi-

nus, juxta suum verum & proprium Natale, decurrebat annum ætatis suæ decimum.

Anno Urbis conditæ 760. Anno tertio Olympiadis 196. Anno Juliano quinquagesimo secundo. Anno periodi Julianæ 4720. Anno Imperii Octavianus Augusti quinquagesimo primo. Anno septimo Æræ Christianæ. Consules fuerunt A. Licinius Nerva Silianus, & Q. Cæcilius Metellus Creticus Silanus. Eodem anno Christus Dominus, juxta suum verum & proprium Natale, decurrebat annum ætatis suæ undecimum.

Anno Urbis conditæ 761. Anno quarto Olympiadis 196. Anno Juliano quinquagesimo tertio. Anno periodi Julianæ 4721. Anno Imperii Octavianus Augusti quinquagesimo secundo. Anno octavo Æræ Christianæ. Consules fuerunt Furius Camillus, & Sextus Nonius Quintilianus. Eodem anno Christus Dominus, juxta suum verum & proprium Natale, decurrebat annum ætatis suæ duodecimum.

Anno Urbis conditæ 762. Anno primo Olympiadis 197. Anno Juliano quinquagesimo quarto. Anno periodi Julianæ 4722. Anno Imperii Octavianus Augusti quinquagesimo tertio. Anno nono Æræ Christianæ. Consules fuerunt Q. Sulpicius Camerinus, & C. Popæus Sabinus. Eodem anno Christus Dominus, juxta suum verum & proprium Natale, decurrebat annum ætatis suæ decimum tertium.

Anno Urbis conditæ 763. Anno secundo Olympiadis 197. Anno Juliano quinquagesimo quinto. Anno periodi Julianæ 4723. Anno Imperii Octavianus Augusti quinquagesimo quarto. Anno decimo Æræ Christianæ. Consules fuerunt P. Cornelius Dolabella, & C. Iunius Silanus. Hoc anno Christus Dominus, juxta suum verum & proprium Natale, decurrebat annum ætatis suæ decimum quartum. Eodem anno Tiberius ab Octaviano Cæsare Augusto, Imperatore, 5. Kalendas Septembris, hoc est, die 28. mensis Augusti, renuntiatus est Imperii Collegæ, seu Imperio Proconsulari donatus est. Quò fit, ut antiqui Ecclesiæ Patres, sicut ostendimus in hac Dissertatione decimâ, annos Imperii Tiberii non numerent ab Imperio Tiberii Augusteo, seu ab illo Imperio, quod Tiberius, mortuo Augusto Imperatore, obtinuit, solusque imperare cæpit; sed annos Imperii Tiberii deducant ab ejus Imperio Proconsulari, ad quod hoc anno Urbis conditæ 763. ab Augusto, Imperatore, provectus est. Eandem Epocham Imperii Tiberii, petitam ab Imperio Proconsulari, quo Tiberius hoc anno præditus fuit, secutum fuisse S. Lucam, in eadem Dissertatione demonstravimus. Quapropter, quando dicimus post S. Lucam, Christum Dominum fuisse baptisatum anno decimo sexto Imperii Tiberii, id minimè intelligendum est de anno decimo sexto Imperii Tiberii, quod dicitur Augusteum, seu illius Imperii, quod Tiberius, demortuo Augusto, Imperatore, adeptus est, solusque summâ rerum potitus est; sed hoc intelligendum est de anno decimo sexto Imperii Proconsularis Tiberii, adeò ut sensus sit, Christum Dominum fuisse baptisatum

tum anno decimo sexto Imperii Proconsularis Tiberii, cujus exordium peti debet ab hoc anno Urbis conditæ 763. quo Tiberius, sicut in ista Dissertatione decimâ latè probavimus, consors & Collega Imperii fuit ab Imperatore Augusto renuntiatus. Annus itaque Imperii Proconsularis Tiberii primus copulari debet cum anno Urbis conditæ 763. & cum anno Imperii Octaviani Augusti quinquagesimo quarto.

Anno Urbis conditæ 764. Anno tertio Olympiadis 197. Anno Iuliano quinquagesimo sexto. Anno periodi Iulianæ 4724. Anno Imperii Octaviani Augusti quinquagesimo quinto. Anno undecimo Æræ Christianæ. Anno secundo Imperii Proconsularis Tiberii. Consules fuerunt M. Æmilius Lepidus, & T. Statilius Taurus. Eodem anno Christus Dominus, iuxta suum verum & proprium Natale, decurrebat annum ætatis suæ decimum quintum. Tiberius verò die 28. mensis Augusti ejusdem anni complevit annum primum Imperii sui Proconsularis, & iniit annum secundum.

Anno Urbis conditæ 765. Anno quarto Olympiadis 197. Anno Iuliano quinquagesimo septimo. Anno periodi Iulianæ 4725. Anno Imperii Octaviani Augusti quinquagesimo sexto. Anno duodecimo Æræ Christianæ. Anno secundo Imperii Proconsularis Tiberii. Consules fuerunt Germanicus Cæsar, & C. Fonteius Capito. Eodem anno Christus Dominus, iuxta suum verum & proprium Natale, decurrebat annum ætatis suæ decimum sextum. Tiberius verò die 28. mensis Augusti ejusdem anni complevit annum secundum Imperii sui Proconsularis, & incepit annum tertium.

Anno Urbis conditæ 766. Anno primo Olympiadis 198. Anno Iuliano quinquagesimo octavo. Anno periodi Iulianæ 4726. Anno Imperii Octaviani Augusti quinquagesimo septimo. Anno Æræ Christianæ decimo tertio. Consules fuerunt C. Silius, & L. Munacius Plancus. Hoc anno Tiberius die 28. Augusti complevit annum tertium Imperii sui Proconsularis, & inchoavit annum quartum. Christus verò eodem anno, iuxta suum verum & proprium Natale, decurrebat annum ætatis suæ decimum septimum.

Anno Urbis conditæ 767. Anno secundo Olympiadis 198. Anno Iuliano quinquagesimo nono. Anno periodi Iulianæ 4727. Anno primo Imperii Augusti Tiberii, seu post obitum Imperii Augusti. Anno Æræ Christianæ decimo quarto. Consules fuerunt Sextus Pompejus, & Sextus Appulejus. Hoc anno mortuus est Imperator Octavianus Augustus, cuique successit Tiberius, qui proinde suum Imperium Augustæum, hoc est, ab obitu Augusti, auspicatus est. At, Imperii sui Proconsularis annum quartum complevit Tiberius die vigesimâ octavâ mensis Augusti ejusdem anni, & annum quintum sui Imperii Proconsularis inchoavit. Christus verò Dominus eodem anno, iuxta suum verum & proprium Natale, decurrebat annum ætatis suæ decimum octavum.

Anno Urbis conditæ 768. Anno tertio Olympiadis 198. Anno Iuliano sexagesimo. Anno periodi Iulianæ 4728. Anno secundo Augustei Imperii Tiberii. Anno Æræ Christianæ decimo quinto. Consules fuerunt Drusus Cæsar, & C. Norbanus Flaccus. Die 28. mensis Augusti ejusdem anni Tiberius complevit annum quintum Imperii sui Proconsularis, & sextum inchoavit. Christus autem Dominus, eodem anno, iuxta suum verum, & proprium Natale, decurrebat annum ætatis suæ decimum nonum.

Anno Urbis conditæ 769. Anno quarto Olympiadis 198. Anno Iuliano sexagesimo primo. Anno periodi Iulianæ 4729. Anno tertio Augustei Imperii Tiberii. Anno Æræ Christianæ decimo sexto. Consules fuerunt T. Statilius Sisenna Taurus, & L. Scribonius Libo. Die 28. mensis Augusti ejusdem anni Tiberius complevit annum sextum Imperii sui Proconsularis, & septimum inchoavit. Christus autem Dominus, eodem anno, juxta suum verum & proprium Natale, decurrebat annum ætatis suæ vigesimum.

Anno Urbis conditæ 770. Anno primo Olympiadis 199. Anno Iuliano sexagesimo secundo. Anno periodi Iulianæ 4730. Anno quarto Augustei Imperii Tiberii. Anno Æræ Christianæ decimo septimo. Consules fuerunt C. Cælius Rufus, & L. Pomponius Flaccus. Die 28. mensis Augusti ejusdem anni Tiberius complevit annum septimum Imperii sui Proconsularis, & octavum inchoavit. Christus autem Dominus, eodem anno, juxta suum verum & proprium Natale, decurrebat annum ætatis suæ vigesimum primum.

Anno Urbis conditæ 771. Anno secundo Olympiadis 199. Anno Iuliano sexagesimo tertio. Anno periodi Iulianæ 4731. Anno quinto Imperii Augustei Tiberii. Anno Æræ Christianæ decimo octavo. Consules fuerunt Tiberius Augustus III. & Germanicus II. Die 28. mensis Augusti ejusdem anni Tiberius complevit annum octavum Imperii sui Proconsularis, & nonum incepit. Christus autem Dominus, eodem anno, juxta suum verum & proprium Natale, decurrebat annum ætatis suæ vigesimum secundum.

Anno Urbis conditæ 772. Anno tertio Olympiadis 199. Anno Iuliano sexagesimo quarto. Anno periodi Iulianæ 4732. Anno sexto Augustei Imperii Tiberii. Anno Æræ Christianæ decimo nono. Consules fuerunt M. Iulius Silanus, & C. Norbanus Balbus. Die 28. mensis Augusti ejusdem anni Tiberius complevit annum nonum Imperii sui Proconsularis, & decimum inchoavit. Christus verò Dominus, eodem anno, juxta suum verum & proprium Natale, decurrebat annum ætatis suæ vigesimum tertium.

Anno Urbis conditæ 773. Anno quarto Olympiadis 199. Anno Iuliano sexagesimo quinto. Anno periodi Iulianæ 4733. Anno septimo Augustei Imperii Tiberii. Anno Æræ Christianæ vigesimo. Consules fuerunt
M. Aure-

M. Aurelius Messala, & M. Aurelius Cotta. Die 18. mensis Augusti ejusdem anni Tiberius complevit annum decimum Imperii sui Proconsularis, & undecimum inchoavit. Christus autem Dominus, eodem anno, juxta suum verum & proprium Natale, decurrebat annum ætatis suæ vigesimum quartum.

Anno Urbis conditæ 774. Anno primo Olympiadis 200. Anno Juliano sexagesimo sexto. Anno periodi Julianæ 4734. Anno octavo Augusti Imperii Tiberii. Anno Æræ Christianæ vigesimo primo. Consules fuerunt Tiberius Augustus IV. & Drusus Cæsar II. Die 18. mensis Augusti ejusdem anni Tiberius complevit annum undecimum sui Imperii Proconsularis, & duodecimum inchoavit. Christus verò Dominus, eodem anno, juxta suum verum & proprium Natale, decurrebat annum ætatis suæ vigesimum quintum.

Anno Urbis conditæ 775. Anno secundo Olympiadis 200. Anno Juliano sexagesimo septimo. Anno periodi Julianæ 4735. Anno nono Augusti Imperii Tiberii. Anno Æræ Christianæ vigesimo secundo. Consules fuerunt C. Sulpicius Galba, & D. Haterius Agrippa. Die 18. mensis Augusti ejusdem anni Tiberius complevit annum duodecimum Imperii sui Proconsularis, & decimum tertium inchoavit. Christus autem Dominus, eodem anno juxta suum verum & proprium Natale, decurrebat annum ætatis suæ vigesimum sextum.

Anno Urbis conditæ 776. Anno tertio Olympiadis 200. Anno Juliano sexagesimo octavo. Periodi Julianæ 4736. Anno decimo Augusti Imperii Tiberii. Æræ Christianæ vigesimo tertio. Consules fuerunt Asinius Pollio, & C. Antistius Vetus. Die 18. mensis Augusti ejusdem anni Tiberius complevit annum decimum tertium Imperii Proconsularis, & decimum quartum inchoavit. Christus verò Dominus, eodem anno, juxta suum verum & proprium Natale, decurrebat annum ætatis suæ vigesimum septimum.

Anno Urbis conditæ 777. Anno quarto Olympiadis 200. Anno Juliano sexagesimo nono. Periodi Julianæ 4737. Anno undecimo Augusti Imperii Tiberii. Anno Æræ Christianæ vigesimo quarto. Consules fuerunt Cornelius Cethegus, & L. Vissellius Varro. Die 18. mensis Augusti ejusdem anni Tiberius complevit annum decimum quartum sui Imperii Proconsularis, & decimum quintum incepit. Christus autem Dominus, eodem anno, juxta suum verum & proprium Natale, decurrebat annum ætatis suæ vigesimum octavum.

Anno Urbis conditæ 778. Anno primo Olympiadis 201. Anno Juliano septuagesimo. Anno periodi Julianæ 4738. Anno duodecimo Augusti Imperii Tiberii. Anno Æræ Christianæ vigesimo quinto. Consules fuerunt M. Asinius Agrippa, & Cossus Cornelius Lentulus. Die 18. mensis Augusti ejusdem anni Tiberius complevit annum decimum quintum Imperii sui Proconsularis, de quo intelligendus est Evangelista Lucas, dum ait

cap. 3. Anno decimo quinto Imperii Tiberii, factum & verbum Domini ad Ioannem. Eodem anno Christus Dominus, iuxta suum verum & proprium Natale, decurrebat annum ætatis suæ vigesimum nonum, quem complevit die vigesimâ quintâ mensis Decembris eiusdem anni.

Anno Urbis conditæ 779. Anno secundo Olympiadis 201. Anno Juliano septuagesimo primo. Anno periodi Julianæ 4739. anno decimo tertio Augustæ Imperii Tiberii. Anno Æræ Christianæ vigesimo sexto. Consules fuerunt Lentulus Getulicus, & C. Calvisius. Hoc anno Tiberius decurrebat annum decimum sextum sui Imperii Proconsularis, & die 6. mensis Ianuarii eiusdem anni Christus Dominus, iuxta suum verum & proprium Natale, incipiens annum ætatis suæ trigessimum, fuit à Joanne in Iordane baptisatus.

Habes nunc seriem Imperatorum & Consulum Romanorum ab anno primo Æræ Christianæ usque ad annum eiusdem Æræ Christianæ vigesimum sextum, seu ad annum usque decimum sextum Proconsularis Imperii Tiberii, quo Christus Dominus, iuxta suum verum & proprium Natale, anno ineunte ætatis suæ trigesimo, baptisatus est in Iordane, sicut sat superque ostendimus in ista Dissertatione decimâ. Quot annos autem post Baptismum vixerit Christus Dominus, & quoto anno ætatis suæ mortuus sit? copiosè expendemus in Paragrapho secundo Dissertationis decimæ quintæ, ubi, maioris explicationis ergo, texemus seriem annorum Proconsularis Imperii Tiberii, & Consulum Romanorum ab anno Æræ Christianæ vigesimo sexto, quo baptisatus est Christus Dominus, usque ad annum eiusdem Æræ Christianæ vigesimum nonum, seu ad annum usque decimum nonum Proconsularis Imperii Tiberii, quo Christum Dominum, anno ætatis suæ ineunte trigesimo tertio, mortuum esse, multis momentis adstruere satagemus.

DISSERTATIO UNDECIMA

De Circumstantiis Baptismi Christi, & de illius vitâ ante Baptismum.

CUm appeteret tempus, quo veteris Legis ceremoniæ essent abrogandæ, figuræ tollendæ, umbræ dissipandæ, Synagoga sepienda, totumque genus humanum per doctrinam Christi innovandum; præmissus est Joannes Baptista, Christi Prodromus, qui, ut elegantè ait *Tertullianus* libro 4. contrâ Marcionem cap. 33. fuit Limes quidam constitutus inter vetera, & nova, ad quem desineret Iudaismus, & à quo inciperet Christianismus. Hic est ille *Joannes Baptista*, qui, statim ac audivit Salutationem Mariæ Virginis, exultavit in utero Matris suæ *Elizabeth*, ibidemque confestim repletus Spiritu Sancto
ade-

adeptus est cumulatissimam, uberrimamque Sanctitatem, in gratia habitabilis, virtutum, atque Donorum infusione positam, sicut docent SS. Patres, sed omnium disertissime S. Petrus Damiani Serm. 1. de Ioanne Baptista, ubi hæc habet: *Neminem unquam mortalium intra materna viscera sanctificatum legimus, præter Joannem Baptistam & Ieremiam, sed longè minor Jeremia sanctificatio, quàm Ioannis. Ille quidem in utero Matris sanctificatus est, hic repletus Spiritu Sancto fuisse cognoscitur. Multò quippè excellentius est, Spiritu Sancto repleti, quàm sanctificari. Ibi enim sanctificatio emundationem, hic repletio inundationem signat. Denique, & Apostoli, qui manibus suis tractaverunt de Verbo Vitæ, cum Spiritum Sanctum accepissent de Salvatoris afflatu, vix à quinquagesimo à Resurrectione die ad illum gradum potuerunt pervenire, ut diceretur de eis: Repleti sunt omnes Spiritu Sancto. Et licet Spiritus Sanctus largiori tunc munere corda credentium repleverit; hoc tamen Ioannes legitur in utero affectus, quoddam Apostolica celsitudo tandem longiori permissione potuit obtinere. Hic igitur Christi Domini Præcursor Ioannes, Beatissimâ cælestium donorum copiâ, & omnigenâ virtutum suppellectili affatim instructus, ex Brema, ubi à puero austeram, & Angelicam vitam duxerat, egressus; in omnem Regionem Jordanis divino monitu venit, ibique salutaris penitentiz Baptismo certatim confluentes populos baptizare cæpit, tum ut occasione Baptismatis, quod conferebat, Christum verum Messiam turbis, undequaque ad Jordanem concurrentibus, nunciaret, quam causam ipsemet Ioannes reddit, dicens: *Ut manifestetur, scilicet Christus, propterea veni ego in aqua baptizans. Tum etiam ut suo Baptisma Ioannes assuefaceret homines Baptismo Christi, & Judæos terrenis cupiditatibus deditos ad pœnitentiam, & ad Evangelicam gratiam suscipiendam præpararet. Ioannes, inquit Iosephus libri 18. Antiq. cap. 10. Præcipiebat Judæis, virtuti operam dare, Justitiam colere, in Deum servare pietatem, & per Baptismum in unum coire. Tum demùm enim Baptisma acceptabile fore, si non solum ad ablunda peccata sumatur, verum etiam ad castimoniam corporis, atque ad animæ Justitiam, purificationemque servetur, omniumque pariter virtutum, velut signaculum, & custodia quædam fidelis habeatur. Postquàm autem Ioannes omnem populum baptisasset, Christus relicta Galilæa, seu Civitate Nazareth, ubi hæcenus delituerat, venit ad ripam Jordanis, ibique, ut omnes modestiz, ac iustitiz numeros impleret, cum peccatoribus sanctus, cum fontibus insons, lavacro Ioannis fuit ablutus. Expediebat quippè, sicut docet Sanctus Thomas 3. part. quæst. 39. art. 1. ut Christus à Joanne baptizaretur; Primò, ut aquas tactu suæ mundissimæ carnis consecraret, & ut ablutæ aquæ per carnem Christi, quæ peccatum non cognovit, Baptismatis vim haberent: Nunquam enim aqua Baptismi, inquit Sanctus Chrysostomus Homil. 2. in Joannem, purgare peccata credentium posset, nisi tactu Dominici Corporis fuisset sanctificata. Secundò, Christus à Joanne baptizari voluit, ut eo humilitatis**

tatis exemplo, quod præbebat, nos hortaretur ad illud Baptisma suscipiendum, quod iussurus erat præcepto, neminemque puderet tingi penitentiae lavacro, postquam ipse impollutus, à peccatoribus segregatus, inter pollutos ad Joannem coeuntes permisceri, & iisdem aquis ablui non detrectavit. Quid enim tam divinum ad populos provocandos, quam ut nemo refugiat lavacrum gratiæ, quando Christus lavacrum penitentiae non refugit? Nemo se dicat exfortem esse peccati, quando Christus venit ad remedium peccatorum. Si pro nobis Christus lavit, immò nos in Corpore suo lavit: quanto magis nos nostra delicta lavare debemus, ait S. Ambrosius libro 2. in Luc. Idem docet S. Augustinus Tractatu 4. in Evang. Ioannis, ubi sic inducit Christum Dominum loquentem: *Quantum te extendis? Quantum te extollis? Quanta gloria tua? Quanta gratia tua? Major potest esse quam mea? Si ergo veni ad servum, tu dedignaris venire ad Dominum? Si ego suscepi Baptismum servi, tu dedignaris à Domino baptisari?* His de causis Baptismo Ioannis initiari voluit Christus, non verò ad emundationem spirituales, vel ad characterem suscipiendum; fuit enim à momento Conceptionis suæ omnigenâ gratiâ plenissimè donatus, perfectissimus Sacerdos, & militiæ Christianæ Rex, omniumque caput. Baptisari vis, Domine Iesu, inquit S. Bernardus Sermone 1. de Epiphania, *Ad quid enim, aut quid tibi opus fuit Baptismate? Numquid sano opus est medicina, ac mundatione mundo? Vnde tibi peccatum, ut Baptisma sit necessarium? Numquid à Patre? At Patrem quidem habes, sed Deum, & aequalis es illi, Deus de Deo, lumen de lumine. Nam in Deum peccatum cadere non posse, quis nesciat? An verò de Matre? Nam & Matrem habes, sed Virgo est. Quod ergo peccatum ex ea trahere potuisti, quæ te sine iniquitate concepit, salva integritate peperit? Quam maculam habere potes sine macula?* Ego, inquit Ioannes, à te debeo baptisari, & tu venis ad me? Magna utraque humilitas, sed nulla comparatio. Quomodò enim non humiliaretur homo coram humili Deo? Sine modò (inquit Dominus) decet enim sic nos implere omnem iustitiam. Acquivit Joannes & obediit. Baptisavit agnum Dei, & aquas lavit. Nos abluti sumus, non ille, quia nobis lavandis aquæ cognoscuntur ablute. Denique, in Jordane Christus baptisari voluit ut inde intelligeremus, quòd, sicut per transitum Jordanis filii Israel in Terram promissionis sunt ingressi, ita & nos per Baptismum in veram Terram promissionis introducimur, nobisque per illum Regni Cœlestis janua referatur.

Sunt nonnulli periti hujus temporis Critici, qui autumant, mendosam esse nostram Editionem vulgatam in capite primo Evangelii Sancti Joannis, ubi ista verba leguntur: *Hæc in Bethania facta sunt trans Jordanem, ubi erat Joannes baptizans.* Volunt enim, non Bethania, sed Bethabara esse legendum, quia, inquit, Bethania neque trans Jordanem est, neque in deserto Iudææ, sed vicina Hierosolymis, neque ad aquas sita est, ut commoda ibi baptisandi opportunitas haberetur. *Bethabara*

bara verò est locus ad trajectum Jordanis, seu in citeriore Jordanis ripa respectu Hierosolymæ, in Tribu Ephraim, ibi primum baptisabat Ioannes, nam postea baptisavit in *Salim* in deserto. Verum, quamvis hanc Criticorum conjecturam approbent *Origenes*, *S. Ioannes Chrysostomus*, *S. Epiphanius*, *S. Hieronymus*, *Euthymius*, *Theophilactus*, multique alii Scripturæ Sacræ Interpretes; ipse tamen cum *S. Thoma* arbitror, non esse sollicitandam Editionis vulgatæ lectionem, sic enim sentire videtur *Sanctus Thomas* Comment. in cap. 1. Ioannis lect. 14. ubi hæc habet: *Cum Bethania sit in Monte Oliveti, quod est iuxta Hierusalem, quomodo dicit Evangelista, quod facta sunt trans Iordanem, quimultum distat ab Hierusalem? Sed dicendum secundum Origenem & Chrysostomum, quod non debet dici Bethania, sed Bethabara, quæ est quædam Villa ultra Iordanem, & hoc quod dicit, Bethania, corruptum est. Sed quia tunc libri Græci, quam Latini habent, Bethania, ideo dicendum est aliter, quod est duplex Bethania: una, quæ est propè Hierusalem in Monte Oliveti: alia trans Iordanem, ubi erat Ioannes baptisans. Hæc enus *S. Thomas*, qui licet duplicem insinuet responsionem, in posteriorem tamen, quæ stat pro Editionis vulgatæ lectione, magis propendere videtur.*

Bochartus par. 1. Libri, cui titulus est: *Phaleg* cap. 7. parag. 10. refert, extare Cappellam Divo Ioanni Baptistæ dicatam, & ab Urbe Iericho duabus dumtaxat Gallicis leucis distantem, ubi creditur, Christum fuisse baptisatum. Sed hæc popularis, quæ invaluit, traditio, & de cuius origine non certò constat, ad persuadendum efficax esse non potest. Nobis ergo abundè sufficiat scire, Christum fuisse baptisatum in Iordane, & eà de causâ multos antiquitus Christianos, pietatis ergò, accessisse, ut in aquis Iordanis corpora sua abluerent, multos etiam in iisdem aquis aut baptisatos fuisse, aut baptizari vehementer cupisse, sicut refert *Eusebius* de *Constantino* Imperatore, qui Baptismum in Jordane suscipere statuerat, morte tamen præventus, voti sui compos non fuit, sed sub finem vitæ suæ in Suburbii Nicomedie baptisatus est, sicut ex eodem *Eusebio* exscribunt *Socrates*, *Sozomenus*, *Theodoretus*, *Evagrius*, *Rufinus*, *Ambrosius*, & *Hieronymus*. Quod non assertivè, sed Historicè dumtaxat dictum velim. Scio quippè, Romæ, ubi hæc scribo, contrariam de loco Baptismi *Constantini Magni*, Imperatoris, vigere traditionem, quam oppugnare vel labefactare nec possum, nec debeo. His, quæ ad Historiam pertinent, prælibatis, nunc præcipuas circumstantias Baptismi Christi, quæ à Sacris Evangelistis *Matth. cap. 3.* & *Luca cap. 3.* accuratè describuntur, exponendas aggredior. Prima est, quod, Iesu baptisato, & orante, apertum sit Cælum. Altera, quod Spiritus Sanctus in specie Columbæ descenderit super ipsum. Poltrema, quod audita sit vox Patris, dicentis: *Tu es Filius meus dilectus, in te complacui mihi.*

ILICO ITAQUE PRIMò: Conveniens fuisse, ut, Christo baptisato, & orante, aperirentur Cæli. Tri-

Triplicem hujusce apertionis Cœlorum congruentiam assertit *Dor Angelicus* 3. p. q. 39. art. 5. Expediebat enim primò, ut, dum Christus baptisabatur, Cœli aperirentur ad significandum effectum Baptismi, quem ipse in nova Lege instituebat, & cujus effectus est Regni Cœlestis apertio, quæ sit beneficio & applicatione meritorum Christi. Secundò, conveniens fuit, ut Christo baptisato & orante aperirentur Cœli, ad designandam dispositionem, quæ baptisandis inesse debet, seu fidem, quam Ecclesia habet de rebus cœlestibus, quæ sensum & omnem humanam rationem excedunt. Hæc autem fides, semper comitari debet Baptismum, qui ideò à S. Augustino Epist. 98. aliàs 23. ad Bonifacium, *Sacramentum Fidei* appellatur. Denique, baptisato Christo & orante, aperti sunt Cœli, ut inde offenderetur, quòd jugis oratio homini post Baptismum ad introitum Regni cœlestis est prorsus necessaria. Quamvis enim per Baptismum remittantur, ac penitus deleantur peccata, non verò radantur tantùm, aut tegantur, sicut contendunt Calvinistæ & Lutherani, alique hujus furfuris heterodoxi; remanet tamen peccati fomes medullitùs, & in omnium animis sensibusque penititùs infixus, qui, velimus nolimus, tanquàm domesticus, & implacabilis hostis intestinum excitat bellum, Mundus etiam & dæmones nos oppugnant exterius, nullumque lapidem non movent, ut gratiæ, quam percepimus in Baptismo, jacturam faciamus, quò sit, ut ad tot hostes profligandos, totquæ amovenda salutis discrimina, necessariò opus habeamus continuà post Baptismum oratione, ne, nostris viribus confisi, ingruentibus tentationibus succumbamus; oratio quippè, ut docent Sancti Patres, est via ad Cœlum, clavis Regni cœlestis, & gratiarum, per quas tentationes vincimus, conciliatrix. *Ascendit oratio, & descendit misratio.*

Cæterùm, quo pacto Cœli, baptisato & orante Christo, fuerint aperti, non convenit inter Theologos. Alii, secuti S. Hieronymum, in cap. 1. Ezechiel. & Auctorem Operis imperfecti in Matthæum, putant hanc apertionem Cœlorum non fuisse realem, sed apparentem tantùm, & imaginariam, qualis fuit apertio Cœlorum, quam viderunt Ezechiel cap. 1. & Sanctus Stephanus, dum dixit: *Ecce video Cœlos apertos.* Alii, quorum mihi magis probatur sententia, existimant, eo in sensu, baptisato Christo, fuisse Cœlos apertos, quòd apparuerit claritas magna & insolita ad modum hiatus, sicut solet in coruscationibus apparere; quæ claritas subito perstrinxit omnium adstantium oculos. Quod quidem eo potissimùm sine factum est, ut Columba Spiritum Sanctum referens, & vox Patris non aliundè, quàm è Cœlis proficisci viderentur, sicque omnes, qui aderant, in Christum tanquàm verum Messiam crederent. In hoc igitur sensu Cœli, baptisato Christo & orante, sunt aperti, non verò per realem partium continuarum distractionem ac separationem; tum quia Cœli, ut docet *Sanctus Thomas*, sunt impassibiles, & alterationi æquè ac corruptioni nullatenus obnoxii, insuper & solidi sunt, juxta

juxta illud *Job* cap. 37. *Celi quasi are fusi*, seu solidissimi sunt; tùm quia etiam quamvis Cœli, non obstante eorum soliditate, potuissent per miraculum, seu Divinâ Omnipotentia diffindi & aperiri, id tamen neque necessarium erat, quemadmodum, post *S. Thomam*, docent omnes Theologi.

DICO SECUNDO: *Conveniens fuisse, ut Spiritus Sanctus in Christum baptisatum illaberetur in specie Columbæ.*

Hanc assertionem *Sanctus Thomas* 3. p. q. 39. art. 6. in responsione ad quartam objectionem eruditè probat quadruplici ratione. Prima, petitur ex natura Columbæ, quæ est animal simplex, mansuetum, domesticum, astutiâ & dolo carens; undè *Matth.* cap. 10. dicitur: *Estote simplices sicut Columbæ.* In specie igitur Columbæ Spiritus Sanctus in Christum baptisatum illapsus est ad designandam dispositionem, quæ prærequiritur in baptisandis, ut videlicet, semotâ omni fictione, cum fidei simplicitate & candore morum ad Baptismum accedant, quia, ut dicitur *Sapientiæ* cap. 2. *Spiritus Sanctus disciplinæ effugiet fictum.*

Alterâ *S. Thomæ* ratio desumitur ex proprietatibus Columbæ, quibus adumbrantur septem Dona Spiritus Sancti. Nam primò, Columba secus fluentia habitat, ut indè, viso accipitre, mergat se, & evadat: quod pertinet ad donum sapientiæ, quo Sancti secus fluentia Scripturæ Divinæ resident, ut insaufos diaboli incurfus evadant. Secundò, columba meliora grana seligit: quod pertinet ad donum scientiæ, cuius ope Sancti sententias sanas, quibus salubritèr pascantur, seligunt. Tertiò, columba alienos natrit pullos: quod pertinet ad donum consilii, quo Sancti eos, qui fuerunt antea pulli, idèst, imitatores & filii diaboli, doctrinâ nutriant, & exemplo. Quartò, columba non lacerat rostro: quod pertinet ad donum intellectus, quo Sancti bonas sententias lacerando non pervertunt, sed potiùs vindicant ab Hæreticorum corruptelis. Quintò, columba felle caret: quod pertinet ad donum pietatis, quo Sancti, ab ira, & vindicta alieni, benè precantur malè precantibus, benè merentur de malè merentibus. Sextò, columba in cavernis petræ nidificat: quod pertinet ad fortitudinis donum, quo Sancti in plagis Christi, qui 1. ad *Corint.* cap. 10. dicitur *Petra mystica*, nidum ponunt, idèst, totius spei, ac fiduciæ suæ Sacram., ut ajunt, anchoram figunt. Denique, columba gemitum pro cantu habet: quod pertinet ad donum timoris, quo Sancti delectantur in gemitu pro peccatis, Deumque justum vindicem non formidine pœnæ, sed virtutis amore reverentur. Hæ columbæ proprietates istis versibus sunt comprehensæ:

Est sine felle, gemit, rostro non lædit, & ungues

Possidet innocuos, granaque pura legit.

Gaudet aquis, quæritque greges, celerique volatu

Tuta petit, fetus educat alterius.

Masculus ipse fovet fetus, ac incubat ovis.

Conjugii servant fœdera casta simul.

Tertia ratio, quæ probat *Sanctus Thomas* conveniens fuisse ut Spiritus Sanctus in specie columbæ appareret in Baptismate Christi, sumitur ex proprio, ac singulari Baptismi effectu, qui consistit in remissione peccatorum, & in reconciliatione cum Deo. Ad quem Baptismi effectum significandum apparuit columba, quæ ut ait *Tertullianus* libri contra *Valentinum* cap. 2. à principio divine pacis est præco. Idem docent Sancti Patres, quos inter *Chrysostomus*, & *Hieronymus* hic laudare sufficiet. Præterea, inquit *Chrysostomus* Hom. 12. in *Matth.* Columba cernitur, nequaquam olivæ rami ferens, sed omnium malorum liberatorem nobis evidenter ostendens, spemque suggerens prosperorum. Non enim ex Arca unum educit hominem: sed postquam apparuit, universum prorsus Orbem attollit in Cælum, quæ certè pro olivæ ramo, omni generi humano adoptionem detulit filiorum. *Hieronymus* verò adversus *Luciferianos* hæc habet: Emitteretur de Arca Corvus, & non rediit; & postea pacem terræ columba nuntiat, ita & in Baptismate, Ecclesia teterrimo alite expulso, idest, Diabolo, pacem terræ columba Spiritus Sancti nuntiat.

Quarta denique Sancti Thomæ ratio ducitur ex communi effectu Baptismi, qui est conjunctio Ecclesiasticæ unitatis, ad quem quidem Baptismi effectum indicandum convenienter Spiritus Sanctus demonstratus est in specie columbæ, quæ est animal amicitie societatisque capax. Hinc *Sanctus Cyprianus* in libro de Unitate Ecclesiæ appositi, & eleganter ait: In domo Dei, in Ecclesia Christi unanimes habitant, concordantes, & simplices perseverant. Idcirco & in columba venit Spiritus Sanctus. Simplex animal & letum est; non felle amarum, non morsibus sævum, non unguinum laceratione violentum, hospitium humanæ diligere, unius domus consortium nosse; cum generant simul filios edere; cum commœant volatibus invicem coherere; communi conversatione vitam suam degere; oris osculo concordiam pacis agnoscere; legem circa omnia unanimiatis implere. Hæc est in Ecclesia noscenda simplicitas; hæc charitas obtinenda, ut columbas dilectio fraternitatis imitetur, ut mansuetudo & lenitas agnis & ovibus coæquetur.

DE LEBUS PRIMIS: Fides docet, Christum à principio conceptionis suæ plenitudinem gratiæ, per quam Spiritus Sanctus habitat in nobis, accepisse. Non fuit ergo conveniens, ut Spiritus Sanctus in Christum baptismatum descenderet.

Respondeo, cum Sancto Thoma 3. part. quæst. 39. art. 6. Omnia, quæ in Baptismo Christi peracta sunt, pertinere ad mysterium eorum, qui deinceps Baptismo Christi initiandi erant; omnes autem, qui Baptismo Christi baptizantur, Spiritum Sanctum recipiunt, nisi fide accedant, iuxta illud *Matth. cap. 3.* Ipse vos baptisabit in Spiritu Sancto: conveniens igitur fuit ut Spiritus Sanctus super Christum in Jordane baptismatum illaberetur, quia tum temporis Christus corpus suum, idest, Ecclesiam, præfigurabat, in qua baptizati recipiunt Spiritum Sanctum. Huic respon-

fioni suffragantur Sancti Patres, *Athanasius* Oratione 2. contrà *Ariano*. : *An ignoratis*, inquit quòd Templum Dei sitis, ac Spiritus Dei habitet in vobis. Cùm enim Dominus in *Jordane* lavaretur, nos illi ipsi eramus, qui in Domino, & à Domino lavabamur, & cùm ille reciperet Spiritum Sanctum, nos illi ipsi eramus, qui per Dominum spiritus ipsius capaces reddebamur. Similia habet *augustinus* lib. 15. de Civit. Dei cap. 26. Dominus ipse *Jesus* Spiritum Sanctum non solùm dedit ut Deus, sed etiam accepit ut homo, propterea dictus est plenus gratia. Et manifestius de illo scriptum est in *Actibus Apostolorum*, quoniam unxit eum Deus Spiritu Sancto, non, utique oleo visibili, sed dono gratia, quod visibili significatur unguento, quo baptisatos ungit Ecclesia. Nec sanè tunc unctus est Christus Spiritu Sancto, quando super eum baptisatum velut columba descendit. Tunc enim corpus suum, idest, Ecclesiam suam præfigurare dignatus est, in qua præcipue baptisati accipiunt Spiritum Sanctum. Sed de ista mystica unctione, tunc intelligendus est unctus, quando verbum Dei caro factum est. Hactenus Sanctus *augustinus*. Addo etiam, Spiritum Sanctum triplici de causa in *Jesum* baptisatum sub signo sensibili descendisse. Primò, propter Joannem, ut eo indicio Christum dignosceret, quem antea ex vultu non noverat, & de illo testimonium perhibere posset. Secundò, propter ipsummet *Jesum*, ut hoc Spiritus Sancti illapsu coràm omnibus Sacerdos, Rex, & Propheta significaretur, atque in eo impletas esse prophetias palàm declararetur. Tertiò, ut myterium Trinitatis, quod in veteri Lege fuerat obscurius revelatum, & quasi involucris occultatum, initio novæ Legis manifestius panderetur.

DICES SECUNDÒ: Si Spiritus Sanctus in Christum baptisatum reverà, & sub specie sensibili illapsus fuisset, Joannes, qui Christum baptisavit, & tanti prodigii testis oculatus fuit, dubitare deinceps non potuisset, an Christus, quem baptisaverat, verus esset Messias? Atqui tamen Joannes dubitavit, an Christus, quem baptisaverat, verus esset Messias? nam, post Baptismum Christi, Joannes, ab *Herode Tetrarcha Galilææ* detrusus in carcerem, duos è discipulis suis misit ad *Jesum*, ut interrogarent eum, an esset Messias? *Joannes autem*, inquit *Matthæus* cap. 11. Cùm audisset in vinculis opera Christi, mittens duos de discipulis suis, ait illi: tu es, qui venturus es, an alium expectamus? Verosimile igitur non est, in Christum baptisatum reverà, & sub signo sensibili Spiritum Sanctum descendisse.

Respondeo: Joannem, postquàm Christum Dominum baptisasset, pro comperto semper habuisse illum esse verum Messiam, & filium Dei. Primò, quia Joannes viderat descendentem in Christum, dum baptisaretur, Spiritum Sanctum. Unde ipse dicit *Joannis* cap. 1. Et ego nesciebam eum, sed qui me misit baptisare in aqua, ille mihi dixit: super quem videris Spiritum Sanctum descendentem, & manentem super eum, hic est qui baptisat in Spiritu Sancto. Et ego vidi, & testimonium perhibui quia

hic est filius Dei. Secundò, Joannes missis ad se à Synedrio Sacerdotibus respondit, se nequaquam eum esse, quem putabant, sed alium jam venisse se ipso multò digniorem, ac priorem, qui verus erat Messias ab omnibus expectatus, & cujus dignus non erat, qui corrigiam calceamentorum solveret. Tertiò, Joannes, Jesum præsentem digito demonstrans, denunciavit ipsum esse, qui à se promissus fuerat, eumque agnum Dei palàm nuncupavit. Denique, cum discipuli Joannis ægrè ferrent, & quererentur apud ipsum, quòd plures ad Iesum confluerent, hinc occasionem sumpsit Joannes commendandi, & extollendi Iesum, se ipso longè superiorem, & quem proinde necesse erat crescere, se autem minui. Certissimè igitur Joannes cognovit Jesum esse verum Messiam, & filium Dei. Quapropter, quandò Joannes carcere deindè detentus duos è discipulis suis misit ad Christum, ut interrogarent eum, an esset Messias? voluit dumtaxat hac instructà legatione Joannes, ut discipuli sui, qui ægrè ab illo divelli poterant, quique fluctuantes adduci necdùm potuerant, ut crederent Iesum esse verum Messiam, omne, ad Christi adspèctum, deponerent dubium, & visis miraculis, quæ Christus operabatur, atque audità cœlesti, quam prædicabat, doctrinà, sensuum tandem suorum testimonio convicti agnoscerent illum esse verum Messiam, quem toties illis indigitaverat. Hęc itaque interrogatio nomine Joannis Baptistæ ab ipsius discipulis Christo Domino facta, *tu es, qui venturus es, an alium expectamus?* nullam de Messie dignitate, Christi que divinitate ignorantiam, aut dubitationem arguit in Joanne, qui potius utramque in Christo probè perspectam habebat; sed solum contrariam ostendit discipulorum Joannis dubitantium dispositionem, quam ut facilius ex eorum animis eveleret Joannes, se ei hoc pacto accommodare voluit. Non secus ac ex.gr. quandò Christus interrogavit discipulos, euntes in castellum Emmaus, dicendo: *qui sunt hi Sermones, quos confertis ad invicem ambulantes, & estis tristes?* Lucæ cap. 24. Et similiter, quandò Magdalenam interrogavit, *mulier quid ploras? quem quæris?* Joannis cap. 20. Hęc, inquam, & hujusmodi interrogationes, quæ passim in Scriptura Sacra occurrunt à Christo Domino factæ, non arguunt in Christo ignorantiam rerum, quas percontabatur (fides quippè docet eum fuisse omniscium, nihilque illum latuisse,) sed solum innuunt istiusmodi interrogationes, Christum identidem suum sermonem inflectere voluisse ad captum eorum, quos alloquebatur, & qui infinità ipsum scientià pollere, necdùm satis exploratum habebant.

DICES TERTIÒ: Columba, quæ apparuit in Baptismo Christi, non fuit vera columba, sed solum figura, & effigies columbæ; ergo Spiritus Sanctus non apparuit in veritate, sed tantum in similitudine columbæ. Prob. ant. Primò, quia Sacri Evangelistæ non dicunt columbam descendisse in Christum, sed *tanquam* columbam, vel *in specie columbæ* Spiritum Sanctum descendisse. Syriaca versio habet: *juxta similitu-*

litudinem corporis columbæ . Arabica versio , in similitudine columbæ . Æthyopica , in corpore tanquàm in specie columbæ . Præterea , Sancti Patres , Tertullianus libri de Baptismo c.8. Iustinus in Dialogo cum Tryphone , Judæo , Irenæus lib.3. cap.19. Epiphanius hæresi 62. Hilarius in Matth. Can.2. Augustinus lib.2. de Trinit. cap.5. Ambrosius lib.1. de Sacramentis cap.5. & alii asserunt , speciem tantum , seu figuram & effigiem columbæ apparuisse , hoc est , non columbam , sed quasi columbam super Christum baptisatum descendisse ; non ergo in vera columba Spiritus Sanctus descendit in Iesum baptisatum .

Respondeo : Sacros Evangelistas , & Sanctos Patres , dùm dicunt , Spiritum Sanctum in specie , seu similitudine columbæ , in Christum baptisatum descendisse , non excludere veritatem columbæ , sed innuere dumtaxat velle , Spiritum Sanctum non apparuisse in specie suæ substantiæ , quæ invisibilis est , vel non assumpsisse columbam in unitatem personæ . Quòd autem hæc vera ac genuina sit Scripturæ , & Sanctorum Patrum mens , liquet ex disertis *Chrysostomi* , & *Augustini* testimoniis , Sanctus *Chrysostomus* homilia 12. in Matth. hæc habet : *Homini quidem naturam suscepit Dei filius , sed columbæ naturam non suscepit spiritus . Proinde non dixit Evangelista , Spiritum Sanctum in natura columbæ , sed in specie columbæ descendisse . Idem ferme legitur apud Sanctum Augustinum lib.2. de Trinitate cap.6. Non sic est assumpta creatura illa , in qua appareret Spiritus Sanctus , sicut assumpta est caro illa , & humana forma ex Virgine Maria . Neque enim columbam beatificavit Spiritus Sanctus , sibi que & personæ suæ in unitatem habitumque conjunxit in æternum , sed apparuit columba , sicut opportunè apparere debuit , creatura serviente Creatori , &c. Denique , S. Thomas 3. part. quæst. 39. art. 7. ut probet Spiritum Sanctum in vera columba apparuisse , adducit auctoritatem Sancti Augustini , qui in libro de Agone Christiano , sic loquitur : sicut non oportebat ut homines falleret filius Dei (corpus videlicet non verum , sed phantasticum assumendo) sic etiam non oportebat , ut falleret Spiritus Sanctus ; sed omnipotenti Deo , qui universam creaturam ex nihilo fabricavit , non erat difficile verum corpus columbæ sine aliarum columbarum ministerio figurare , sicut non fuit ei difficile verum corpus in utero Mariæ sine virili semine fabricare ; cum creatura corporea , & in visceribus feminæ ad formandum hominem , & in ipso Mûndo ad formandam columbam Imperio Domini voluntatique serviret . Hactenus S. Augustinus , cujus auctoritatem aliqui recentiores bifariam eludere tentant . Alii enim , ut *Pamelius* , negant librum illum de Agone Christiano esse germanum Sancti Augustini factum . Alii , ut *Maldonatus* , hunc librum pro genuino quidem agnoscunt , contendunt tamen , ab *Augustino* asseri dumtaxat , verum apparuisse corpus , sed non veram columbam . Verum , utraque claudicat conjectura . Prima quidem , quia librum de Agone Christiano germanum esse S. Augustini Opus constat ex stylo , ex Possidii Indiculo , ex ipsomet*

S. Augustino, qui hunc librum à se exaratam ultrò profitetur lib. 2. *Tract. cap. 3.* & denique ex editione Operum *Sancti Augustini*, tam à Doctores Lovaniensibus, quàm à Patribus Benedictinis Congregationis *Sac. Mauri* adornatâ. Altera verò conjectura abludit penitus à mente *Sancti Augustini*, quippè qui columbam illam, in qua apparuit Spiritus Sanctus, non solum appellat *verum corpus*, sed etiam *verum corpus columbæ*. Standum igitur est sententiæ *S. Thomæ*, qui post *Sanctum Augustinum* docet, veram fuisse columbam, in qua apparuit Spiritus Sanctus, cui *Angelici Doctores*, sententiæ, sicut scribit noster *Sixtus Senensis* lib. 6. *Biblioth. Annot. 13.* patrocinantur omnes fermè Theologi. Cæterum, si quis querat ex quibus principiis conflata fuerit illa columba, sub cujus specie Spiritus Sanctus apparuit? quodnam principium motus illius, an intrinsecum, an extrinsecum? an resoluta fuerit in aliam materiam? an verò annihilata? confestim respondebo, in his, & aliis id genus magis curiosis, quàm utilibus, quæstionibus, de quibus Scriptura silet, non esse argutandum, sed abundè sufficere ut sciamus, Deo non defuisse potentiam creandi, movendi, & annihilandi illam columbam à se formatam ad significandam Spiritus Sancti præsentiam. Satis igitur dictum sit de columba, in qua Spiritus Sanctus, idè in Baptismate Christi apparere voluit, quia, ut observat *S. Thomas*, post *S. Augustinum* tractatu sexto in *Joannem*; *Duobus modis ostendit Dominus visibilitè Spiritum Sanctum, per columbam super Dominum baptisatum, & per ignem super discipulos congregatos: ibi simplicitas, hic fervor ostenditur: ergò ne Spiritu Sancti-ficati dolum habeant, in columba monstratus est: ne simplicitas frigida remaneat, in igne demonstratus est.*

DICO ULTIMO: Convenientèr, Christo Domino baptisato, auditam esse vocem Patris dicentis: tu es filius meus dilectus, in te complacui mihi.

Probatur tribus rationibus. Primò, quia hæc vox Patris, quæ omnium adstantium auribus insonuit, Christo Domino auctoritatem asseruit, ejusque originem, vocationem, & doctrinam, quâ totum Orbem innovare debebat, approbavit. Iudæis namque expectatione, dubitationeque suspensis, & ut inquit *S. Lucas* cap. 3. *Cogitantibus omnibus in cordibus suis ne forte ipse, idèst, Joannes, esset Christus*, congruum erat, ut Pater Æternus hanc Iudæorum dubitationem dispelleret, & signo aliquo sensibili, seu voce è Cælo dilapsâ, demonstraret non Joannem, sed Iesum esse Christum, hoc est, Messiam jam prius expectatum & filium suum unicè dilectum, quem in mundum mittebat, ut per ipsum genus humanum repararet. Eadem de causâ voluit Deus ut Joannes nulla, dum vixit, ederet miracula, ne Iudæi, quos austera Joannis disciplina, admirabilis vitæ ratio, & baptisandi, quoungebatur, officium in admirationem rapiebant, eum pro Messia pertinaciùs haberent. Et è contrâ voluit Deus ut Christus, quem in Baptismo filium suum

suum palam declaravit, miraculis inclaresceret, ut tot tantisque gloriæ gradibus, Ioannis, à quo Iudæi ægrè diuellerantur, gloriam obicura-
ret; quod deinde reverà factum est, nam legitur *Joannis cap. 10.* quod
multi venerunt ad eum, idest, Christum Dominum, & dicebant, *Ioan-
nes quidem signum fecit nullum, omnia autem quæcumque dixit Ioannes
de hoc vera erant. Et multi crediderunt in eum.*

Secundò, Baptisma Christi, ut inquit *Sanctus Thomas 3. part.
quæst. 39. art. 8.* fuit exemplar Baptismi, quo nunc initiantur Fideles, Ba-
ptismus autem, quo nunc baptisantur fideles, perficitur, ac consecra-
tur in virtute, & invocatione Sanctæ Trinitatis, congruum igitur erat,
ut in Baptismo Christi non solum filius, scilicet Christus Dominus, in
humana natura baptisaretur, & Spiritus Sanctus in columbæ specie ap-
pareret, & mitteretur, sed etiam ut Pater Æternus non quidem mittere-
tur, sed in voce audiretur, sicque in Baptismo Christi totius Sanctæ Tri-
adis Mysterium demonstraretur. Hanc rationem eleganter prosequitur
Sanctus Hilarius cap. 2. in Matth. Filius Dei, inquit, *auditu conspectuque
monstratur, plebique insidæ, & Prophetis inobedienti testimonium de Do-
mino suo mittitur, & contemplationis, & vocis, ac simul, ut ex eis, quæ
consummabantur in Christo, cognosceremus, post aquæ lavacrum, & de
Cælestibus portis Sanctum in nos Spiritum involare, & Cælestis nos gloriæ
unctione perfundi, & paternæ vocis adoptione Dei filios fieri; cum ita
dispositi in nos Sacramenti imaginem ipsis rerum effectibus veritas præfigu-
raverit.*

Denique, ad declarandam Christi divinitatem hæc vox Patris in-
tonuit: *tu es filius meus dilectus*, non adoptivus, sed proprius, quem à
me non separat Deitas, non dividit potestas, non discernit æternitas, quem
unicè diligo, & per quem reconciliatus sum Mundo: *Pater diligit filium,
sed quomodò Pater filium, non quomodò Dominus servum; quomodò unicum,
non quomodò adoptatum*, inquit *S. Augustinus tractatu 14. in Ioannem.*
Hoc unicum Patris Æterni testimonium, antehàc inauditum, abundè
sufficit ad adstruendam Christi divinitatem contrà Arianos, in Socinia-
nis nostri temporis redivivos, & ad demonstrandum, ipsum esse filium
Dei naturalem, non adoptivum, sicut definitum est in Concilio Fran-
cofordiensi adversus duos Episcopos, videlicet *Felicem Urgelitanum,*
& *Elipandum Toletanum.*

Expositis Baptismi Christi circumstantiis, quæ à Sacris Evangelistis
referuntur, nunc præstat ut pauca dicam de vita, quam egit Christus ante
Baptismum, *Pauca dixi*, quia nihil de Christo Domino, post ejus ex-
cessum ab Ægypto, usque ad annum ætatis trigesimum, sacris litteris
proditum est, nisi quòd divinus ille Puer, annos natus duodecim, inven-
tus sit à parentibus in templo sedens in medio Doctorum, audiens & in-
terrogans eos, ita ut stuperent omnes, qui eum audiebant super pruden-
tiâ, & responsis ejus. Cætera autem, quæ Christus in infantia, pueritia,
ado-

adolescencia & juventute sua peregit, alto & sacro silentio Evangelistæ obtexerunt, quia non curiositati nostræ, sed utilitati, non vanitati, sed necessitati consulere voluerunt; undè ea solùm litteris prodiderunt, quæ Christus Dominus triennio prædicationis suæ pro salute nostra operatus est, & quæ fidem nostram alere, & roborare possunt. Quapropter, si quis curiositate ductus percontari, aut scire aveat quid Christus in infantia, & adolescentia sua peregerit? hoc unum ipsi respondere possum; erat *subditus parentibus suis*, nihilque nisi commune, & ordinarium in puerili disciplina, vita, victu & conversatione sua gessit, ut hoc pacto verum se hominem esse magis comprobaret, nobisque summæ humilitatis suppeditaret exemplum. Hic autem, ut candidè fatear, occurrat non prætereunda difficultas, quæ haud leve Scripturæ Sacræ Interpretibus facessit negotium. Ait quippè S. Lucas cap. 2. v. 41. Evangelii, *Mariam, & Iosephum*, conjuges Sanctissimos, Nazarethi in Galilæa, Domicilium habentes, quotannis unà cum puero Iesu Hierosolymam ire solitos esse: *Ibant*, inquit ille Evangelistæ, *Parentes ejus per singulos annos in Ierusalem in die solemni Paschæ*. Porro, vix credibile est, *Mariam, & Iosephum* voluisse, regnante in Judæa *Archelao*, qui Patris sui *Herodis* crudelitatis, non minùs quàm potestatis & auctoritatis heres erat, puerum *Iesum* quotannis in die solemni Paschæ adducere Hierosolymam, Regiam Sedem ejusdem *Archelai*, qui faciliè puerum *Iesum* comprehensum tenere, mortique tradere potuisset. Observat siquidem, loco mox à me laudato, S. Lucas, Iosephum in Ægypto, postquàm ab Angelo suscepisset mandatum, ut unà cum puero *Iesu*, Virgineque Dei-parâ, in terram Israel reverteretur, velletque ire in Iudæam, quæ Israelis potissima pars erat, protinùs mutasse consiliùm, ac timuisse illò ire, statim ac rescivisset, *Archelaum* illuc regnare post mortem patris sui *Herodis*, eumque denuò ab Angelo monitum in Galilæam secessisse. Si igitur *Iosephus* non multò post Natale Christi in Iudæam venire renuit, eò quòd in ea regnaret *Archelaus*, quòd credibile erit, eum singulis annis, cum puero *Iesu*, & Virgine Dei-parâ, voluisse è Galilæa, in quam se se receperat, venire in Iudæam, ipsamque Hierosolymam, Regiam *Archelai* Sedem, maximè cùm id temporis idem immineret periculum ex parte Regis *Archelai*, qui (sicut in Dissertatione sexta ostendimus ex Flavio Iosepho, nobili Iudæorum Historico, lib. 17. *Antiquitatum Judaicarum* cap. 15.) decem annis ab obitu patris sui *Herodis* regnavit in Iudæa?

Ad hanc difficultatem breviter respondeo cum S. Augustino lib. 2. de Consensu Evangelistarum cap. 10. *Mariam, & Iosephum*, parentes pueri *Iesu*, ita timuisse habitationem in Hierusalem (propter *Archelaum* ibi regnantem) ut tamen propter Dei timorem Festivitatem solemnem non prætermitterent, in qua latere facillimè possent. Neque enim incredibile est, captatis temporibus opportunis, vel dierum, vel horarum, accedere homi-

homines ad ea loca, in quibus formidant. Quibus verbis aperte innuit S. *Augustinus*, Iosephum, ex Ægypto revertentem, timuisse quidem in Iudæam, propter *Archelaum* ibi regnantem, ire, ut in ea sedem suam fingeret, certumque domicilium haberet; sic enim à Rege *Archelao* fuisset nullo negotio deprehensus: non tamen timuisse ad paucos dies per singulos annos Hierosolymis hospitari, recurrente præsertim Festivitate Paschali, ad quam undique tanta Iudæorum confluerebat multitudo, ut *Maria*, & *Iosephus* cum sacra prole facile per brevem illam temporis moram latitare possent. Anno autem, quo *Iesus Christus*, annorum duodecim factus, venit in Templum, seque Doctoribus noscendum dedit, omne fuit sublatum periculum, quia tunc Rex *Archelaus*, qui vitæ Iesu Christi insidias struere potuisset, jam ab *Augusto*, Cæsare, in exilium fuerat ablegatus. Eliquatâ istâ difficultate, alia movetur quæstio, videlicet de Arte, quam exercuit Christus Dominus, seu de illo vivendi Instituto, quod sectatus est per totum illud temporis intervallum, quo privatam vitam duxit: quâ in re non convenit inter Theologos, & Scripturæ Sacræ Interpretes. Placet non nullis, Christum per id temporis instar religiosi viri altissimæ rerum divinarum contemplationi, orationibus, jejuniis, aliisque id genus spiritualibus rebus vacasse, nullam verò artem Mechanicam, unde capteret necessaria vitæ, exercuisse. Sed hæc sententia, quam *Paulus Brugenfis* Episcopus, in cap. 6. *Marci*, propugnat, meritò ab aliis Scripturæ Sacræ Interpretibus improbatur. Equis enim, amabo, dicat, Christum per triginta circiter annos otio indulgere voluisse, ut totum se meditationi, & rerum divinarum contemplationi dederet? Quapropter, alii censent: Christum per totum illud temporis spatium nulli arti Mechanicæ operam dedisse, sed ostiatim, mendicando subsidia vitæ necessaria accepisse. Verùm, hæc sententia, nullâ probabili ratione nititur, nam quamvis Christus, majoris humilitatis ergò, ostiatim aliquandò mendicare voluerit, falsum tamen est, eum mendicitatis statum fuisse amplexum, & continuò ad victum sibi quotidianum parandum ostiatim stipem collegisse. Nec certè Christus magis ante Baptismum statum mendicitatis amplexus est, quàm post susceptum Baptisma, nemo autem dixerit, Christum post susceptum Baptisma mendicitatis statum fuisse amplexum. Legimus quippè *Ioannis* c. 3. Discipulos Christi ivisse in Civitatem non ut mendicarent, sed ut cibos emerent. Et *Ioannis* cap. 13. dicitur: Christum iussisse Iudæ habenti loculos, ut egenis aliquid daret. Christus ergò loculos possidebat, jusque propriè dictum in pecunias, quæ in his loculis asservabantur, habebat; alioquin eas injustè possedisset, iniuste expendisset, atque ex bonis alienis, & iniuste possessis eleemosynam erogasset, quod sanè citrà hæresim dici haud potest. Hinc meritò Summus Pontifex *Ioannes* XXII. anno 1323. cum *Michael Cæsenas*, & *Okamus*, aliique Minoritæ pertinaciter contenderent, Christum, & Apostolos, nec in speciali, nec in communi

aliqua bona habuisse, sed omni planè caruisse dominio, hanc Minoritarum doctrinam ceu erroneam, & hæreticam confixit, ut videre est apud *Odoricum Raynaldum* in *Annalibus Ecclesiæ* ad annum 1223. Cùm igitur Christus post susceptum Baptisma mendicitatis statum professus non fuerit, verosimile non est, Christum per 30. ferme annos, antequàm ad Baptismum accederet, semper ostiatim victum sibi quotidianum parasse, & citrà ullum operis mechanici exercitium mendicando vitam otiosam duxisse. Reiectis itaque illis sententiis, ipse probabilius esse arbitror: Christum Dominum, usque dum adolefceret, & ad annum ætatis suæ trigessimum perveniret, artem fabrilem exercuisse. *Hinc habemus*, ait nos-
ter *Caietanus*, unde satis fiat curiosis, quærentibus quid fecerit Christus ad trigessimum usque ætatis annum? vacabat enim fabrilis exercitio. Id non obscurè colligi posse videtur ex illis interrogationibus Iudeorum invidiæ, & malevolentix plenis, quæ in Scriptura referuntur: an non hic est filius Fabri? an non hic est ille Faber? unde illi hæc scientia, qui litteras non didicit? Scilicet indignabantur Iudæi, & griseque oculis videbant, per illas Christi manus signa & miracula patrari, quas antea opera dumtaxat fabrilia ad quotidianum victum quæritandum, tractasse norant. Huic sententiæ patrocinantur benè multi Sancti Patres, qui docent Christum fabrilem artem exercuisse, quamvis apud illos incertum sit, an Christus fuerit faber lignarius, an ferrarius? quia *W. Faber* indifferenter significat operarium, sive in ligno, sive in ferro, sive in auro, aut in argento, aut in lapide. Venerabilis *Beda*, post Sanctum Hilarium, existimat: Christum fuisse fabrum ferrarium, & alludit ad opera fabri ferrarii per aquam, ventum & ignem operantis, sicut operatur Christus salutem nostram per aquam Baptismi, & ignem Spiritus Sancti. Certius tamen videtur ex communi traditione Sanctorum Patrum, Christum fuisse fabrum lignarium, sic enim loquitur *S. Iustinus* in *Dialogo* cum *Tryphone*, Iudæo: *cùmque venisset Iesus ad Iordanem ut tunc putabatur Iosephi materiarii Fabri filius, ipse quoque obscurus, ut Scripturæ prædixerant & pro Fabro habitus; solebat enim, dum inter homines ageret, aratra fabricare atque iuga; ut per has figuras iustitiam doceret, & reipsa fugam otii.* Idem docent *S. Chrysostomus* *Hom.* 30. in *cap.* 13. *Matth. Sanctus Basilii* in *Asceticis*, Auctor Operis imperfecti in *Matth. Sanctus Thomas* in *Matth. Lyranus*, & alii. Præterea, verosimile est, Christum exercuisse eandem artem fabrilem, quam exercebat *S. Iosephus*, testantur autem multi Sancti Patres, ut videre est apud *Bollandum* ad diem 19. mensis Martii, Iosephum fuisse fabrum lignarium, in eadem igitur arte lignaria laboranti Iosepho ministrabat Christus. Denique, hanc sententiam fuisse antiquitus receptam patet ex illa historia, quam refert *Sozomenus* lib. 6. *Hist. Eccles.* cap. 23. videlicet Antiochiæ vir quidam erat probus, & qui diù pueris informandis operam impenderat utilem; à quo *Libanius*, Sophista, id ætatis Ethnicus, & Imperatoris Iuliani Apostatæ fami-

familiaris, cùm per sarcasum postulasset, quid rerum tunc ageret fabri filius? idest, Christus, è vestigio respondit ille. divinâ gratiâ impulsus, Sandapilam tunc concinnare totius hujus Mundi fabricatorem Iuliano Imperatori foras deportando. Cujus dicti veritatem non multò post comprobavit eventus; nam Iulianus Imperator in illa expeditione, quam contra Persas tùm temporis moliebatur, ictus sagittâ divinitùs in ipsum directâ, animam, multis, horrendisque sceleribus foetidâ, expuit.

QUÆRES PRIMÒ: Utrùm Anna, & Caiphas simul Pontificatum gesserint anno, quo Ioannes suum cepit obire ministerium, seu, quo pacto intelligi debeant hæc S. Lucæ verba cap. 3. Anno decimo quinto Imperii Tiberii Caesaris . . . sub Principibus Sacerdotum Anna, & Caipha, factum est verbum Domini, super Ioannem in deserto?

Respondeo tres esse, circa hunc Sancti Lucæ locum, Theologorum, atque Scripturæ Sacræ Interpretum sententias. Prima est eorum, qui asserunt, Annam, & Caipham eodem anno, quo Ioannes suum orsus est ministerium, Pontificali simul dignitate ornatos fuisse, eaque alternatim esse defunctos. Sed hæc sententia, parum probabilitatis habet, quia apud Iudæos unus tantum erat Summus Sacerdos, quo mortuo, vel amoto, alter in eius locum sufficiebatur, à qua quidem patriâ, & avità consuetudine verosimile non est Iudæos unquam recessisse, duosque simul Summo Sacerdotio inaugurare voluisse. Altera sententia eorum est, qui dicunt, Caipham, anno, quo Ioannes suum inivit ministerium, fuisse Summum Sacerdotem, Annam, verò fuisse ejus Vicarium. Sed hæc sententia falsi convincitur. Primò, quia S. Lucas Annam præponit Caiphae, tùm cap. 3. sui Evangelii, ubi hæc habet: *sub Principibus Sacerdotum Anna, & Caipha*. Tùm etiam cap. 4. Actuum Apostolorum: *Et Annas, Princeps Sacerdotum, & Caiphas, & Ioannes, & Alexander, & quotquot erant de genere Sacerdotali*. Porro, si Annas fuisset dumtaxat Vicarius Caiphae, procul dubio S. Lucas, qui in recensendis dignitatibus ordinem accuratè servat, nunquam Annam præposuisset Caiphae, fuisset enim præposterus ille ordo. Secundò, Sanctus Lucas appellat Annam *Principem Sacerdotum*, quæ certè nuncupatio non indigitat Vicarium Sacerdotis, sed potius designat eum, qui totius ordinis, & classis Sacerdotalis Princeps est, & caput. Denique, ut optimè ait doctissimus *Valesius* in suis Notis in lib. 1. Hist. Eccl. Eusebii pag. 18. nunquam Iosephus, qui in suis Antiquitatum libris universos Iudæorum Pontifices summâ diligentia persequitur, perpetuos illos Vicarios Summorum Sacerdotum commemoravit, sed unius dumtaxat meminit lib. 17. cap. 8. qui appellabatur *Iosephus*, Ellemi filius, & qui in spatium unius tantum diei creatus est Pontifex, ut vice Mathiæ Pontificis, qui nocturnam pollutionem passus fuerat; Sacra faceret. Ex quo apparet, nullos tum temporis extitisse perpetuos Summi Sacerdotis Vicarios, nam, si Mathias, qui erat Summus Sacerdos, Vicarium ejusmodi habuisset, nihil opus fuisset, ob nocturnam illam pollutionem

lutionem, subito illi Vicarium constituere. Missis itaque duabus illis prioribus sententiis, tertia, quæ mihi magis probatur, eorum est, qui doceant, non eos solos dictos esse Principes Sacerdotum, qui Summo Sacerdotio apud Iudeos fungebantur, sed etiam illos, qui olim Summo Sacerdotio defuncti, postea destituti erant, & exautorati. *Iosephus* autem lib. 18. Antiq. cap. 3. recenset inter Summos Sacerdotes Iudeorum *Ananum*, quem anno trigesimo octavo, postquam *Antonius* in pugna Actiaca fuerat à Cæsare Augusto superatus, hoc est anno à condita Roma 760. Christi vero undecimo anno, & *Æræ* vulgaris septimo, *A. Licinio Nerva Sylano*, & *Q. Cæcilio Metello* Consulibus, *Quirinius*, post secundum populi Censum, qui magnos in Iudæa excitavit tumultus, remoto *Ioazaro*, Summum Sacerdotem constituit. Et hic *Ananus* non alter videtur ab eo, quem Sanctus Lucas appellat *Annam*, qui per quindecim, aut sexdecim annos Pontificatum gessit, sectâ Saducæus, socerque *Caiphæ*. Quamvis ergo anno, quo Ioannes suum auspicatus est ministerium, *Ananus*, seu *Anna*, non esset amplius Summus Sacerdos, sed solum *Caiphæ*, jure tamen optimo S. Lucas *Annam* appellat Principem Sacerdotum, tum quia *Anna* titulum Summi Sacerdotis semper retinuit, tum quia etiam apud Iudeos in maximo honore habebatur, non solum quia ipse diu Pontificatum gesserat, sed etiam quia, ut testatur *Iosephus*, quinque ejus filii videlicet *Eleazar*, *Ionathas*, *Theophilus*, *Matthias*, & *Ananus* eadem Pontificali dignitate fuerunt ornati.

QUÆRESSE CUNDÒ: Verum Baptismus Joannis conferret gratiam sanctificantem?

Respondeo cum S. Thoma: hoc discrimen intercedere Baptismum Joannis inter & Baptismum Christi, quod Baptismus Joannis, licet esset à Deo quantum ad ritum, non tamen erat à Deo quantum ad effectum internum, quia nec characterem, nec gratiam sanctificantem producebat, sicut producit in nova Lege Baptismus Christi; nec erat institutus Baptismus Joannis in remedium peccati, sive originalis, sive actualis, sed solum erat prolusorius, rudimentarius, seu præparatorius ad Baptismum Christi, quatenus inculcabat poenitentiam, & homines erudiebat per doctrinam, quæ ad Fidem Christi baptisatos quasi manu ducebat: *Joannes baptizavit Baptismo poenitentiae populum dicens: in eum, qui venturus esset post ipsum, ut crederent, hoc est, in Jesum*. Non quod Joannes, ut quibusdam perperam visum est, hac inter baptisandum formâ uteretur, baptizo vos in nomine Messie venturi, sed quod Joannes, prædicando Baptismum poenitentiae, suos permoveret discipulos, ut in Jesum, seu verum Messiam, crederent: Hinc, juxta SS. Patres, potissimum *Hieronymum*, & *Bedam*, confessio peccatorum, de qua *Matth. cap. 3.* & *Marci cap. 1.* fit mentio, in Baptismate Joannis non fiebat ad remissionem peccatorum per Baptismum Joannis conferendam, sed per poenitentiam convenientem exhibendam, & per Baptismum Christi, ad quem poenitentia illa præ-

præparabat, obtinendam. Ita docent *Tertullianus* libri de Baptismo cap. 10. *S. Augustinus* Serm. 37. & *S. Chrysologus* Serm. 137. ubi hæc habet: *Per Baptisma Joannis purificabatur homo ad penitentiam, non promovebatur ad gratiam; at verò Christi Baptisma sic regenerat, sic immutat, sic hominem reddit ex vetere novum, ut præterit a nesciat, non recordetur antiqua, qui de terreno cælestis jam cælestia possidet & divina.* Idem statuit Concilium Tridentinum Sess. 7. Can. 1. ubi anathemate ferit eum, qui dixerit, *Baptismum Joannis eandem habuisse vim cum Baptismo Christi.* Omnes denique Theologi, post Sanctos Patres, constanter docent, Baptismum Joannis, nec characterem, nec gratiam sanctificantem produxisse, ac subindè fuisse necesse, ut illi, qui Joannis Baptismate erant abluti, denuò Sacro Baptismatis Christi lavacro tingerentur, quò consequeretur remissionem peccatorum. *Qui baptisati sunt Baptismate Joannis, oportebat ut baptisarentur Baptismo Christi,* inquit *S. Augustinus* Tract. 5. in Joannem, & *S. Thomas* 3. part. quæst. 38. art. 6. improbat opinionem Magistri Sententiarum, qui lib. 2. Sent. Dist. 2. docet, illos, qui spem non posuerant in Baptismo Joannis, & in Patrem, Filium, & Spiritum Sanctum credebant, non fuisse deindè baptisatos Baptismate Christi, sed impositione tantum manuum super eos ab Apostolis factà Spiritum Sanctum recepisse. Quæ sententia toti retrò antiquitati, & SS. Patrum doctrinæ adversatur.

QUÆRES TERTIO: *Cur parvuli recedens nati in Ecclesia baptisentur, cum tamen Christus Dominus anno dumtaxat incunte ætatis trigésimo fuerit baptisatus?*

Respondeo cum *S. Thoma*: tres posse asserri rationes, cur Christus anno ætatis suæ trigésimo ad Baptismum accesserit; Primo, quia Christus purgatione non indigebat, quippè qui peccati originalis omnino expertus, nec ullum proindè ipsi ex Baptismi dilatione periculum imminerebat. At parvuli, si ex hac vita citrà Baptismum præmaturà morte abripiantur, cum sint peccato originali obstricti, pœnam damni incurrunt, immò pœnam sensus, mitissimam tamen, subeunt, ut sentiunt celeberrimi hujus temporis Theologi. Undè non mirum, si pia Mater Ecclesia hoc salutare & necessario remedio parvulis, statim ac ex utero materno in lucem prodierunt, suppetias ferat, eosque per Baptismum regeneret in Christo ob imminens mortis periculum. Qua de causa etiam adulti, juxtà antiquam Ecclesiæ disciplinam, irregularitatis pœnæ olim subijciebantur, quando, ut liberiùs suis inservirent cupiditatibus, Baptismi fani suscipere non curabant, & infirmi in lecto decumbentes baptisabantur, & ideo *Clinici* appellati, in quem tum temporis in Ecclesia gliscentem abusum Sancti Patres, præsertim *Basilius*, *Gregorius Nissenus*, & *Gregorius Nazianzenus* calamum strinxerunt. Secundo, Christus anno dumtaxat ætatis suæ trigésimo baptisari voluit, quia immediatè post Baptismum, docendi & prædicandi officio incumbere, multisque miraculis, ac prodigiis

giis doctrinam suam confirmare debebat; conveniens autem non erat ut Christus in infantia, & adolescentia sua doceret & miracula patraret, sed solum in matura & perfecta ætate, ne videlicet homines prodigiorum, quæ Christus in juvenili ætate edidisset, novitate & magnitudine percussis, dubitassent de veritate ipsius humanitatis. Denique, Christus raro exemplo, idest, silentio suo triginta circiter annorum ante Baptismum demonstrare voluit, neminem ad publicas Ecclesiastici muneris functiones, ad Verbum Dei prædicandum, & ad regimen animarum præsumptione prælationis, vel captandorum pinguum Sacerdotiorum pruritu profligare, & involare debere, sed expedire potius, ut hi, qui prædicationis officio incumbere, vel ad regimen animarum admoventi exoptant, prius discipuli poenitentiarum fiant, quam Doctores, & diuturnâ præparatione in latebris, in sacro secessu Deo probati, vitam absconditam Christi imitentur, modestiam & paupertatem in habitu, parsimoniam & frugalitatem in victu servando, nec solum tempus legitimum, & maturam ætatem expectent, sed Dei voluntatem iugi Scripturæ Sacræ lectione, carnis maceratione, ferventibus orationibus, bonorum operum, & virtutum exercitio exquirant, ut à Deo vocati tanquam Aaron, & à rerum terrenarum amore purgati, se se deinceps in aliorum salutem impendant, atque demandatâ sibi in Ecclesia docendi, ac prædicandi provinciâ, eo, quo par est, zelo, & animarum fructu perfungantur. Nemo enim, inquit egregie Tertullianus ad Martyres, miles ad bellum cum deliciis venit, non de cubiculo ad aciem procedit, sed de popilionibus expeditis, & substrictis, ubi omnis durities, imbonitas, & insuavitas consistit.

QUÆRES ULTIMO: Utrum omnes Apostoli baptisati fuerint Baptismo Christi?

Respondeo cum S. Augustino Epist. 265. aliâs 108. ad Seleucianam probabilius esse, omnes Apostolos Baptismo Christi fuisse baptisatos; tum ut reciperent characterem, quem Baptismus Ioannis imprimere non poterat, tum ut aliis prærent exemplo, essentque forma gregis. Quapropter, hæc verba Ioannis cap. 4. *Quamquam Iesus non baptisaret, sed discipuli ejus, non sunt tam strictè accipienda, ut prorsus neminem baptisaverit Christus, sed vel intelligi debent de Ministro ordinario, vel de publico Baptismo, qualis erat ille Ioannis Præcurforis Domini; quod certe non impedit, quominus extra ordinem Apostolos, & Discipulos suis manibus baptisaverit Christus Dominus. Scio, circumferri librum sub titulo Luminis, qui clarissimo nomine Sancti Evodii, in Sede Antiochena Sancti Petri successoris immediati, insignitur, in quo traditur, quod Christus manibus suis Petrum tantum baptisavit, Petrus verò Andream, & filios Zebedæi, si denique reliquos Apostolos. Septuaginta autem Discipulos Petrus, & Ioannes, Theologus dictus, baptizantur. In quam sententiam ivit Eminentissimus Annalium parens Baronius. Sed neminem hic liber movere debet, quia optimo jure à peritis hujus temporis Criticis S. Evodio*

dio abjudicatur, quippe qui fabulis, & ineptiis scatet. Certè, ipsemet Baro-
nius ad annum Christi 71. hunc librum, qui sub ementito S. Evodii no-
mine prostat, nulli antiquorum innotuisse fatetur.

H Y M N U S

De Vita Jesu Christi ante Baptismum.

D ivine crescebas Puer Crescendo discebas pati, Hæc destinata tunc erant Mortis tuæ præludia..	Tremenda cujus præpetes Mandata portant Spiritus, Cui pronus Orbis subditur, Se spontè Fabro subjicit..
--	--

Satus Deo, volens tegi, Elegit obscurum Patrem, Qui fecit æternas domos, Domo latet sub paupere..	Cælum, quæ manus sustinent, Fabrile contrectant opus, Supremus astrorum faber Fit ipse vilis artifex..
--	---

H Y M N U S

*In laudem Sancti Joannis Baptista, qui, postquam Jesum
Christum baptisasset, ab impio Rege Herode
jussus est decollari.*

Ecce saltantis pretium puellæ
 Fertur in disco caput amputatum:
 Hæc cruentatis nova proferuntur
 Fercula mensis..

Quæ rudes Silvæ populos docebat,
 Quæ suâ Reges tremit facit aula,
 Illa Vox eheu! gladio resecta
 Muta silebit..

Occidit Vates, & adhuc timetur:
 Vox silet Verbi, cruor ille clamat,
 Atque fraterni temerata damnat
 Fœdera læti..

Nube sub densâ jubar involutum
 Venerat cæcis aperire terris,

Sole

D E M Y S T E R I I S

Sole jam pleno , velut umbra , cessit
Lucifer Orbe .

Omnibus manat cruor ecce Venis ,
Hinc sitim longam satia , Tyranne ,
Et cibos inter , paterasque , puro
Sanguine liba .

Ut caput vidit dapibus sub ipsis
Tristè fumanti fluitare tabo ,
Hæsit , impastis fremuitque mensis
Funeris auctor .

Palluit Cælum , trepidavit aula ,
Ipsa se se horret feritas Tyranni ;
Sola saltatrix ovat , execrandi
Conscia facti .

Non tamen frontis gravitas verendæ
Cessit immiti violata ferro ,
Dura mitescit placido sub ore
Mortis imago .

Qui suo nascens Domino præibat ,
Morte crudeli prior immolatus
Ille , mox diro notat immolandum
Funere Christum .



DISSERTATIO DUODECIMA

De Tentatione Christi in deserto, & de illius vita post Baptismum.

CH R I S T U S Dominus, post Baptisma susceptum, nulla interposita morâ, ducente, & impellente Spiritu Sancto, secessit in desertum, in quo nihil nisi caudices, saxa, rupes, & feræ erant, ut, post jejunium 40. dierum, & totidem noctium, tentaretur à diabolo. Cujus tentationis causas, locum, & ordinem hic breviter, juxta doctrinam *Angelici Preceptoris* 3. p. q. 41. expendam, deinde, quodnam vitæ genus post Baptismum Christus fuerit amplexus, exponam.

DICO ITAQUE PRIMÒ: Christum convenienter fuisse à diabolo tentatum in deserto post jejunium quadraginta dierum, & totidem noctium.

Probatur prima pars, recensendo causas, propter quas Christus tentari voluit. Primò, Christus tentari voluit, ut hoc indicio constaret Christum esse verum hominem, nobis per omnia similem, excepto peccato. Secundò, ut nobis contra ingruentes tentationes præsentissimum suppeditaret auxilium, undè S. Gregorius Magnus ait: *Non est indignum Redemptori nostro, quòd tentari voluit, qui venerat occidi. Iustum quippè erat, ut sic tentationes nostras suis tentationibus vinceret, sicut mortem nostram venerat sua morte superare.* Ex quibus Sancti Gregorii verbis patet, hanc tentationem nec Christo indignam, nec ejus sanctitati, ac majestati fuisse indecoram. Christus enim voluntariè ei se subdidit, non ad consensum, sed ad luctam & victoriam, perindè ac fami, siti, defatigationi, & morti obnoxius esse voluit, ut diabolum superaret, & destruere regnum & opera ejus. Nec honor ex illo congressu diabolo accessit, sed perpetua potiùs confusio & ignominia, ob insignem Domini victoriam. Ineptè ergo ex tentatione Christi suam hæresim tueri conabantur sive Ebionitæ, eorumque sectatores Paulus Samosatenus, atque Photinus, qui nihil in Christo præter hominem esse assercebant, sive Ariani, qui divinam in ipso naturam nolebant confiteri, cum potiùs ex triumpho, quem Christus in hac tentatione reportavit, ex ministerio Angelorum, ex libera voluntate, quâ se diabolo tentandum permisit, fateri debuissent, in Christo aliquid præter hominem, & super hominem fuisse, & hoc ipsum esse Deum. Tertio, tentatus est Christus propter nostram cautionem, ut nullus, quantâcumque sanctitate emineat, securum se putet ac immunem à tentatione. Et eâ de causâ Christus confestim

post Baptismum tentari voluit, quia, sicut S. Hilarius dicit cap. 3. in Matthæum: *In sanctificationis nobis maxime diaboli tentamenta grassantur, quia victoria magis est ei exoptata de sanctis.* Idem docet S. Leo, Papa, Serm. 3. de Quadragesima cap. 2. his verbis: *Nemo se fallat, nemo se decipat, neque ita quisquam de cordis sui puritate confidat, ut putet, se nullis tentationum periculis subjacere; cum pervigil ille tentator eos acriter pulset insidiis, quos maxime viderit abstinere a peccato. Nam a quo dolos suos contineat, qui ipsum quoque Dominum majestatis ausus est caliditatis sue fraude tentare? Viderat superbiam suam Baptisati Domini Iesus humilitate calcata: intellexerat, quadraginta dierum jejunio omnem cupiditatem carnis exclusam, & tamen non desperavit de artibus sue malitiæ spiritualis improbitas, tantumque sibi de naturæ nostræ mutabilitate promisit, ut quem verum experiebatur hominem, præsumeret posse fieri peccatorem. Si ergo ab ipso Domino & Salvatore nostro deceptionum suarum diabolus non revocavit insidias; quantum magis fragilitatem nostram impugnare præsumit, quos exinde vehementiori odio, & invidia senviore persequitur, ex quo ei in Baptismo renunciavimus, & ab illa, cui dominabatur origine, in novam creaturam divinâ regeneratione transivimus?* Quartò, tentatus est Christus, ut suo instrueret exemplo, qualiter diaboli tentationes vincamus. Hinc S. Augustinus lib. 4. de Trinit. cap. 13. ait: *Christum diabolo tentandum se præbuisse, ut ad superandas tentationes ejus mediator esset non solum per adjutorium, verum etiam per exemplum.* Quam in rem appositè exclamat Sermone 18. S. Gaudentius, Brilianus Episcopus, *O ineffabilis Christi patientia, quæ idcirco ter tentari permisit, ut suscepto homini artem præliandi, atque vincendi in semetipso demonstraret.* Denique, Christus tentari voluit, ut nobis fiduciam de sua misericordia largiretur, legimus quippè cap. 4. Epist. ad Hebræos: *Non habemus Pontificem, qui non possit compati infirmitatibus nostris: tentatum autem per omnia pro similitudine absque peccato.* Alias causas, sed morales, tentationis Christi adducit Sanctus Chrysostomus Homil. 13. in cap. 4. Matth. ubi hæc habet: *Certamen vult Christus suscipere contra diabolum, in eum finem, ut qui Baptismo regeneratur, si post Baptismum susceptum majores sufferat tentationes, nequaquam attonitus perturbetur, ac si præter expectationem acciderent; sed duratus obsistat, & omnia viriliter sustineat, eò quod ita consequenter solet fieri. In eum finem accepisti arma, non ut otieris, sed ut pugnes. Quocirca, ingruentes non repellit tentationes Deus, idque in eum finem, ut in primis intelligas multò te factum quam fueras fortiozem. Tum ut moderationem exerceas, neque efferaris magnitudine donorum: nam coarctant, & in gyrum tentationes redigunt. Tertio, ut malus ille demon, qui hæsit in ambiguo an defeceris ab ipsius imperio, tentationum exploratione edoctus, sciat quod illum penitus dereliqueris. Quarto, in eum finem, ut valentior reddaris, & ferro quovismque magis obduratus. Quintò, ut plena fide tibi constet, quam ingentes tibi*

thesauri concedantur. Hactenus Sanctus Chrysostomus.

Alteram quòd spectat assertionis partem, de loco, seu Deserto, in quo Christus Dominus fuit à diabolo tentatus, probat S. Thomas art. 2. quæstionis citatz, Desertum, tanquàm locum & palæstram certaminis, convenientèr à Christo Domino fuisse delectum. Nec enim diabolus Christum aggredi ausus fuisset, nisi spontè se se tentandum exhibuisset, sicut spontè membris ejus se se exhibuit occidendum. Eo sine Christus secessit in Desertum, quia solenne est diabolo magis tentare hominem solitarium, sic Evam tentavit à principio, eam sine viro inveniens, sic Cainum, & Iosephi fratres in solitudine stravit. Unde Eccles. cap. 4. dicitur: *Vt soli, quia cum ceciderit non habet sublevantem se. Sanctus Ambrosius lib. 4. in Lucam docet: Christum triplici de causa, hoc est, consilio, mysterio, & exemplo, Desertum adiisse; consilio quidem, ut diabolum ad certamen provocaret; mysterio, ut Adam de exilio liberaret exemplo, ut ostenderet nobis, diabolum ad meliora tendentibus invidere; & tunc magis esse cavendum, ne mysterii gratiam deferat mentis infirmitas.*

Richardus Montacutus par. 2. Originum Eccles. existimat, illud Desertum, in quo à diabolo tentatus fuit Christus Dominus, esse idem Desertum, in quo Israelitæ per quadraginta annos peregrinati sunt, tentantes Deum, & murmurantes contra ipsius dispensationem sanctam; Maldonates putat, idem fuisse Desertum, in quo Joannes enutritus legitur. Denique, nonnulli Historici, secuti *Adrichomium, Brocardum, Arandam, & alios Terræ Sanctæ exploratores*, dicunt, Desertum, in quo Christus tentatus est, dictum esse *Quarantanam* ab hac Christi quadraginta dierum mansionem, quòd quidem Desertum inter Jericho & Ierusalem interjacet. Sed ut ingenuè fatear, hæc meræ sunt coniecturæ, à quibus viri graves abstinere debent. Nemini quippè licet curiosius scrutari, quæ Scriptura Sacra silentio tecta esse voluit; nisi hac fibulâ coerceatur curiositas humana, semper habebit inquirendi, & ariolandi locum.

Tertia denique assertionis pars, videlicet quòd fuerit conveniens ut Christus præmitteret, ante tentationem, jejunium quadraginta dierum, & totidem noctium, probatur primò: quia Christus nobis exemplo præire voluit, nam, cum omnium interfit contra tentationes se tueri, per hoc, quod ante tentationem futuram jejunavit Christus, docuit, quòd per jejunium contra tentationes nos armari oportet; & ideò Apostolus 2. ad Corint. cap. 6. jejunium inter arma justitiæ commemorat. Secundò, ut ostenderet, quòd, post susceptum Baptisma, non delictis ac temulentis, non mensæ epulis onustis, sed ieiunio animum debemus intendere. Propterea, inquit Sanctus Chrysostomus Homilià 13. in Matth. Dominus jejunavit, non quòd indigeret, sed ut nos doceret, quibus peccata ante Baptisma dominatio ventris intulerat. Ut enim aliquis ægrotum, quem ad sanitatem reduxit, jubet illa non facere, ex quibus ille morbus contigerat:

D d d 2 ita

ita etiam post Baptisma jejunium contra edacitatis vitium induxit . Nam , & Adam de Paradiso intemperantia ventris eiecit , & diluvium commovit , & fulmina in sodomitas ipsa traxit .

Tertiò , sicut Moyses in Deserto quadraginta diebus , & totidem noctibus absque cibo transactis , promulgandam Hebræis Legem à Deo accepit , ita Christus parem inedia suslinens , solo usus Numinis colloquio , precibus ac ieiuniis vacans , & præsentia Spiritus Sancti consecratus , solitudine egressus cælestem Mundo intulit Legem , eaque imbuit homines . Quartò , Christus post ieiunium tentari voluit , quia secuta esuries diabolus , famis specie lactatum , ad eum aggrediendum audacior rem reddidit , unde fames Domini pia fraus fuit , quæ diabolus ad certandum attraxit , nec repulsi accedentem , inquit ibidem *Sanctus Chrysostomus* , sed , cum eum suscepisset ad luctum , & semel & iterum , & tertiò cum facilitate , quæ eum decebat , elisit , ac prostravit . Ultimam rationem , addit *S. Thomas* , cur Christus statim post susceptum Baptisma ieiunaverit , vitæque austeritatem assumpserit ? quia , ait Sanctus ille Doctor , nullus debet assumere prædicationis officium , nisi prius fuerit purgatus & in virtute perfectus , quemadmodum dicitur de Christo *Athanasium* cap. i. *Capit Jesus facere , & docere* . Et ideo Christus confestim post Baptismum ieiunavit , & austeritatem vitæ assumpsit , ut doceret , nos post carnem edomitam oportere prædicationis officio incumbere , iuxta illud Apostoli : *Castigo corpus meum , & in servitutem redigo , ne fortè cum aliis prædicabero , ipse reprobos efficiar* . Cæterum , quæ ratione Christus quadraginta dierum , & totidem noctium potuerit ferre ieiunium , quæve ratione ipsius corpus per hoc diuturnum temporis intervallum fuerit nutritum ? an per intensionem virtutis nutritivæ prioris cibi ? an per suspensionem actionis caloris naturalis ? an per corroborationem humidi radicalis ? an per retentionem appetitus ? Has & similes umbratiles quæstiones , de quibus silet Scriptura Sacra , otiosis hominibus , qui vento paſcuntur , ventilandas ac discutiendas permitto .

DICO SECUNDÒ : *Christum trinâ tentatione convenienti ordine fuisse à diabolo tentatum* .

Probatur ratione *S. Thomæ* art. 4. suprà laudatæ quæstionis . Diabolus hominem spiritualem non statim tentat de gravibus peccatis , sed pedetentim incipit à levioribus , ut postmodum ad graviora perducatur . Sic se gessit diabolus in tentatione Adami , primò namque ligni vetiti esum ipsi suasit his verbis : *Cur præcepit vobis Deus , ut non comederetis de omni ligno Paradisi ?* Secundo , ad inanem gloriam eum perduxit , dicens : *Aperientur oculi vestri* . Tertiò , ad extremam superbiam tentationem perduxit , dum dixit : *Eritis sicut Dii , scientes bonum & malum* . Eundem etiam tentandi ordinem erga Christum , qui Adami culpam luiturus venerat , servavit diabolus : *Cibo Adam pellexerat , & de Paradisi gloria in peccati locum , idest , in regimen vetita arboris deduxerat* . Tertiò , Divini

Nu-

Numinis ambitione corruperat, Diis futurum similem pollicendo. Igitur adversus Dominum tota jam sæculi potestate pugnatur, & Creatori suo possessio ejus universitatis assertur: ut tenens ordinem fraudis antiquæ, quem nec cibo pellegerat, nec loco moverat, nunc vel ambitione corrumpere. Ait *Sanctus Hilarius* cap. 3. in *Matth.* Primò itaque diabolus tentavit Christum, de eo quod appetunt quantumcùmque spirituales viri, scilicet de sustentatione corporalis naturæ per cibum. *Si Filius Dei es, dis ut lapides isti panes fiant*, quibus vires tuas refoillare, & famem cruciantem sedare possis. Gravis procul dubio erat tentatio illa, quæ Christo dæmon suggerebat, ut de Dei providentia, & amore diffusus, miraculum, ipso hortatore, ederet, conversisque citrà necessitatem in panes lapidibus, maiori, quàm par erat, quantitate, aut voluptate (si fieri posset) famelicus sumeret, sicque concupiscentiæ carnis, & peccato gulæ irretiretur. Quamvis enim, ut optimè observat *Sanctus Thomas*, uti necessariis ad sustentationem vitæ non sit peccatum gulæ, quando tamen ex desiderio huius sustentationis homo aliquid inordinatum facit, ad vitium gulæ pertinere potest: est autem inordinatum, quod aliquis, ubi suppetere possunt humana subsidia, pro solo corpore sustentando cibum miraculosè quærere velit. Cùm igitur Christus ad subveniendum fami aliter quàm miracula faciendo sibi providere potuisset, idèò putabat diabolus peccaturum Christum, si ad sedandam famem miracula patrare præsumpsisset. Sed Christus hanc pravam tentatoris suggestionem è vestigio repulit dicens: *Scriptum est: non in solo pane vivit homo, sed in omni verbo, quod procedit de ore Dei.* Poterat quidem Christus, si voluisset, facili negotio de lapidibus panes facere, sicut postèa aquam in vinum convertit in nuptiis, sed non fecit, ut voluntatem, artesque Sathanæ contemneret, & quia, ut inquit *Sanctus Hieronymus*: *Propositum erat ei, humilitate diabolum vincere, non potentia.*

Quæret hic fortasse aliquis, cur diabolus tentaverit Christum, quem Deum esse non ignorabat? sed huic Quæsito cum *S. Thoma Responsio*: Diabolus non pro certo cognovisse Christum esse Deum propter signa infirmitatis humanæ, quæ in ipso videbat, unde Christum aggressurus dixit: *Si Filius Dei es*: quæ verba exponens *Ambrosius* lib. 4. in *Lucam* ait: *quid sibi vult talis sermonis exorsus, nisi quia cognoverat, Diabolus, Dei filium esse venturum, sed venisse per hanc infirmitatem corporis non putabat.* Diabolus ergò explorare volens, an reverà Christus esset filius Dei? eum tentare ausus fuit.

Post primæ illius tentationis insultum, processit secundò Diabolus ad id, in quo spirituales viri quandòque deficiunt, ut scilicet illecebrosæ gloriolæ gultu inescati aliqua ad ostentationem operentur. Translulit enim Christum Diabolus in Sanctam Civitatem, seu Hierosolymam, & statuit eum super pinnaaculum templi, & dixit ei: *Si filius Dei es, mitte te deorsum: scriptum est enim: quia Angelis suis mandavit de te,*
 & in

Et in manibus tollent te, ne forte offendas ad lapidem pedem tuum. Sed hoc à spiritu mendacii vibratum jactantiæ telum confestim propulsavit Christus, dicens: Rursus scriptum est: non tentabis Dominum Deum tuum. Si quis autem quærat cur Diabolus, ut Christum ad inanem gloriam provocaret, hæc verba usurparit: Si filius Dei es, mitte te deorsum, cum potius mittere se deorsum signum sit humilitatis? Ad hanc quæstionem respondebo cum S. Augustino lib. 2. de Serm. Domini in monte cap. 19. Non in solo nitore atque pompa, sed etiam in ipsis sordibus luctuosus esse posse jactantiam. Et ad illud significandum Christo Diabolus tuasisset, ut mitteret se deorsum. Nam hoc ipso perniciosior est ambitio, quod, teste S. Ambrosio lib. 4. in Lucam; Blanda quedam est conciliatricula dignitatum, & sæpè quos vitia nulla delectant, quos nulla potuit movere luxuria, nulla avaritia subvertere, facit ambitio criminosos. Habet enim forenses gratiam domesticum scelus: & ut dominetur aliis, prius servit. Curvatur obsequio, ut honore donetur, & dum vult esse sublimior, simulata humilitate fit vilior, legibus enim imperat, sibi servit. Dicitur etiam potest, Diabolum hisce verbis, mitte te deorsum, voluisse Christo Domino persuadere, ut à Templi culmine, sive è loco eminentiori turris vestibulo templi inædificatæ, se se præcipitem daret, quod si fecisset Christus, inter templum & altare Sacerdotum delapsus fuisset, magnamque sibi, ob tam insigne miraculum, coram ingenti populo, qui ad Sacra in templum Domini confluebat, perpetratum, gloriam comparasset; & hic erat scopus, in quem Diabolus tentando Christum collimabat.

Post fractam secundæ illius tentationis machinationem, Diabolus processit tandem ad id, quod non est spiritualium virorum, sed dumtaxat carnalium, ut videlicet divitias & gloriam mundi concupiscant usque ad contemptum Dei. Assumpsit quippè Diabolus iterum Christum Dominum, ut ait Matth. cap. 4. In montem excelsum valde, & ostendit ei omnia regna mundi, & gloriam eorum, & dixit ei: hæc omnia tibi dabo, si cadens adoraveris me. Quæ verba arrogantis plena ubi primum audisset Christus, sibi ampliùs temperare haud potuit, sed gloriæ Dei nihil antiquius habens, superbum illum tentatorem, Dei gloriam ac cultum sibi præposterè vendicantem, procul à se facessere jussit, dicens: Vade, Satana, scriptum est enim: Dominum tuum adorabis, & illi soli servies. Quo in responso obiter Lector observet cum S. Thoma, quòd Christus Dominus ad duas priores tentationes, in quibus Diabolus nihil adversus Deum dicebat, pacifico, tranquilloque animo respondit per Scripturam Sacram, cujus lectio ad vincendas tentationes maxime juvat; at, cum superbus ille tentator, effractis debita Deo reverentiæ claustris, eo prorupit audacis, ut gloriam Dei sibi ascisceret & adorari vellet, acutum Christus cum zelo, & indignatione eum procul à se ablegavit, ut Christi discamus exemplo, inquit Angelicus præceptor, nostras qui-

quidem injurias equanimiter sustinere, Dei autem injurias, nec usque ad auditum ferre. Audito nomine Dei victus, fugatusque recessit Diabolus, usque ad tempus, sicut notat S. Lucas, quia postea non tentaturus, sed palam pugnaturus accessit, tempore scilicet passionis Christi, quando videlicet Judæos instigavit, & armavit ad Christum occidendum, vel etiam post ipsius passionem, dum tot turbines, & procellas contra nascentem Christi Ecclesiam excitavit.

Circà hanc ultimam Christitentationem duo hic occurrunt discutienda Dubia. Primum est, quo pacto Diabolus Christum in montem excelsum valde transulerit? visibiliter, an invisibiliter? terrestri itinere, an per aera? Alterum Dubium est, quomodo Diabolus in monte illo excelsso ostenderit Christo omnia regna mundi? cum nullus sit mons adeo altus, in quo regnorum omnium latitudo prospici possit, sive ob tumorem terræ, sive ob oculorum imbecillitatem, quorum acies eò usque se se porrigere minimè potest.

Utrique Dubio breviter facio satis, & ad primum dico: Christum Dominum, ut omnes Satanæ impetus experiretur, non invitum, non reluctantem, sed volentem, & semetipsum exinaniem, arreptum fuisse à Demone tam in Sanctam Civitatem, quam in montem excelsum, reverà, actu & locali motu. De modo autem, visibiliter, an invisibiliter, an terrestri itinere ductus, aut per aera à Diabolo fuerit Christus deportatus? silet omninò Scriptura Sacra. Et quidem ipse probabiliùs existimaverim, translationem illam localem fuisse, sed invisibilem, nemine conscio, sive pedibus sive per aera translatus eò venerit Christus. *Diabolus quantum ad se sic Christum assumebat in pinnaculum templi, ut ab omnibus videretur; ipse autem, nesciente Diabolo, sic agebat ut à nemine videretur,* inquit *S. Chrysostomus*, citatus à *S. Thoma*. Neque etiam illis assentiri possum, qui fingunt Christum insedis Diabolo, tanquam equo, cum longè verosimilius sit Christum à Diabolo fuisse translatum, vel eo modo, quo Propheta *Abacuc* de Judæa translatus est in Chaldaeam, & *Philippus Diaconus*, postquam eunuchum Candacis Reginae baptizarat, delatus est in Azotum, vel tandem, sicut putat noster *Cajetanus*, eo modo, quo ipsemet Christus, teste Scriptura Sacra, *assumpsit Petrum, Joannem, & Jacobum in montem Thabor.*

Ad alterum Dubium dico: Diabolum in monte excelsso ostendisse Christo omnia regna mundi, totum sumendum pro majori parte, quatenùs videlicet partem illorum ostendit, & id quod maximè eximium, in illis est, vel quatenùs, partibus Orbis Christo monstratis, edisseruit tentator callidus, quæ singularum gloria esset, qui splendor, quæ opulentia. *Nec enim,* inquit *S. Thomas 3. part. quæst. 41. art. 4. ad 7. est intelligendum quòd Christus videret ipsa regna, vel Civitates eorum, vel populos, vel aurum, vel argentum; sed partes terræ, in quibus unum quodque Regnum, vel Civitas posita est, Diabolus Christo demonstrabat,*

& uniuscuiusque Regni honores, & statum verbis exponebat. Sic Moyſi oſtenſa legitur tota terra Iſraelis ex monte, *Deuteron. cap. 34.* ex quo tamen non patuit illi proſpectus in ſingulas, ſed in aliquas dumtaxat illius terræ partes; ſic etiam tota Judæa, & tota regio circumjacens Jordani ad Joannem egreſſa dicitur, quamvis pars ad illum tantummodo confluxerit.

Hactenus expoſuimus trinam Chriſti tentationem juxta ordinem, quo eam *S. Matheus cap. 4.* refert, nam totam Chriſti Domini tentationem compendiò dumtaxat attigit *S. Marcus*, hanc verò generatim, primò tractavit, dein, ſigillatim deſcripſit *S. Lucas*, & duas poſtremas tentationes retulit ordine inverſo, quod tamen Evangelicæ veritati non officiit. Nihil quippè refert, ut inquit *Sanctus Auguſtinus* lib. 2. de conſenſu Evangelistarum cap. 16. *Quo narrentur ordine, cum omnia facta eſſe maniſeſtum ſit.* Præter quàm quòd etiam dici poteſt, Deum hanc Evangelistarum, in trina Chriſti tentatione referendâ, diverſitatem permiſſiſſe, ut oſtenderet Sacros Evangelistas non ex compaſſo collatis capitibus ſcripſiſſe, vel alios narrationes aliorum exſcripſiſſe. Cæterùm, advertat Lector, trinam tentationem, quâ Chriſtum Diabolus adortus eſt, fuiſſe verè realem, & non imaginariam. Nam primò, ſi hæc trina Chriſti tentatio non fuiſſet realis, ſed tantùm imaginaria, ſequeretur, victoriam, quam Chriſtus de tentatore reportavit, fuiſſe itidè imaginariam, quod citrà ſummam abſurditatem dici non poteſt. Secundò, ſi trina illa tentatio fuiſſet purè imaginaria, Chriſtus non fuiſſet propriè tentatus; ille quippè tentari propriè dicitur, qui ſui juris eſt, & judicio ſicut & libertate voluntatis uti poteſt, at in viſione, ſicut & in omni re, quæ in mera imaginatione conſiſtit, nec judicii, nec voluntatis locus eſſe poteſt. Tertiò, ſicut externis, & realibus tentationibus ſæpiſſimè à Diabolo urgemur, ita Chriſtus, etſi innocens, & impeccabilis, externis & realibus tentationibus obnoxium ſe præbere voluit ad conſolationem & exemplum fidelium. Denique, Scriptura Sacra iter Chriſti in Deſertum, illius jejunium, trinamque tentationem, eodem orationis filo recitat tanquàm aliquid externum, & reale, negari igitur non poteſt trinam Chriſti tentationem realem, atque externam fuiſſe.

Supereſt nunc, ut de Chriſti poſt ſuſceptum baptiſma converſatione, ſeu de eo vitæ genere, quod Chriſtus per triennium docendo, & prædicando ſeſtatus eſt, paululùm diſſeramus.

DICO ITAQUE ULTIMO: *Chriſtum poſt ſuſceptum baptiſma converſatum eſſe cum hominibus, vitam non auſteram, ſed communem, pauperem tamen ducendo, & omnia veteris legis præcepta adamuſſim obſervando.*

Hanc Aſſertionem, quantùm ad omnes ſui partes, latè probat *Sanctus Thomas* 3. p. q. 40. art. 1. 2. 3. & 4. cujus doctrinam, ut brevitati con-

confusam, summatim delibabo. In primis, ostendit Angelicus Doctor conveniens fuisse, ut Christus post susceptum Baptisma conversaretur cum hominibus. Primò, quia Christus venit in mundum, ut salubribus præceptis homines informaret ad innocentiam, eisque per inextricabiles tenebras oberrantibus, operibus, factisque præsentibus, iustitiæ, & immortalitatis consequendæ viam panderet, & peccatores salvos faceret, sicut legitur *Joannis* cap. 18. *Lucæ* cap. 4. Primæ ad *Timoth.* cap. 1. & alibi passim. Secundò, Christus non poterat convenientiori modo promoverè salutem hominum, quàm prædicando, ac iustè, & innocenter inter homines conversando, sic enim Divinitatem suam doctrinâ, & miraculis manifestavit, Judæis adventum suum Prophetarum oraculis Sole clariùs comprobavit, Publicanos mirâ comitate, & suavitate morum ad meliorem frugem convertit, & supercilium damnans Phariseorum, qui sanctitatis obtentu peccatorum consortia vitabant, ignaros Evangelicâ luce illustravit, superstitiosos ad veram pietatem, impios ad resipicientiam, & fidem adduxit, omnibusque fiduciam fecit ad ipsum accedendi. Denique, Christus post Baptismum cum hominibus conversari voluit, ut Evangelii prædicatores, & conscientiarum moderatores exemplo suo doceret, quo pacto ergà peccatores sese gerere debeant, & quærere oves, quæ perierunt, errantes in ovile revocare, magis eggras, & tantùm non desperatas, majori sollicitudine, vigilantia, ac charitate curare, ne similes sint Pastoribus Israel, quibus Deus Ezechielis cap. 34. minas intentat his verbis: *Væ vobis Pastoribus Israel, quod infirmum fuit non consolidastis; & quod egrotum non sanastis; quod confractum est non alligastis; & quod abiectum est non reduxistis; & quod perierat non quæstistis: sed potius imitentur exemplum boni Pastoris, qui deperditam ovem sedulò quærit; vel Medici, qui ad egrotum accedit.* His de causis Christus Dominus, post susceptum Baptisma, per triennium docendo, prædicando, cum hominibus conversari voluit; & hoc prædixerant Prophetæ, *Baruc* cap. 3. *Post hæc in terris visus est, & cum hominibus conversatus est; & Daniel* cap. 9. *Confirmabit autem pactum multis hebdomada una.*

Verùm, quia sæpè sæpiùs usu venire solet, ut in societate, & colloquiis hominum inanis obrepit gloriæ cupido, intepescat orandi fervor, & exolescat quidquid suavitatis antehæc percipiebatur ex rebus ad conjunctionem cum Deo, & ad proprium, atque aliorum profectum, spiritualem spectantibus; ideo Christus Dominus sese interdùm à turba hominum subtraxit, & in solitudinem secessit, ut ejus exemplo discerent divini verbi Præcones non frequenter prodire in publicum, ubi animus ab interiori virtutis solidæ studio ad externarum occupationum illecebras sensim sine sensu defluere solet, sed potius turbam hominum, relinquere, atque in solitudinem sese colligere assuescerent; idque triplici de causa, primò, propter moderatam quietem; secundò, propter

orationem, denique, propter salutem animæ, ne videlicet appetitus laudis, ac profanæ sæculi affectiones blandè irrepant in animam, & internum hominis statum rerum terrenarum tumultu perturbent, spiritumque opprimant. Elegit autem Christus conversando cum hominibus vitam activam, & quamvis vita contemplativa, sicut docet *Sanctus Thomas* 2. 2. qu. 182. artic. 4. & q. 188. art. 6. simpliciter sit perfectior vitæ activæ, quæ occupatur circa corporales actus, vita tamen activa, secundum quam aliquis prædicando, & docendo, contemplata aliis tradit, perfectior est vitæ, quæ tantum est contemplativa, quia talis vita præsupponit abundantiam contemplationis. *Et ideo*, inquit Angelicus Doctor 3. p. q. 40. art. 1. ad 2. *Christus talem vitam elegit*. Suus tamen honor vitæ contemplativæ, & purè solitariæ asserendus est. *Solitudo* quippè, ut ait *S. Basilii* in lib. de laud. Eremitæ, *caelestis doctrinæ schola est, mundi persequentis felix effugium, laborantium requies, merentium consolatio, ab æstu sæculi refrigerium, peccandi repugnum, secluso corporum, libertas animarum, &c.* Hæc, & alia id genus vitæ contemplativæ, & purè solitariæ encomia legi possunt apud Sanctos Patres, & præsertim *S. Hieronymum* in Epist. 1. ad Heliodorum.

In vita activa, quam Christus amplexus est post Baptismum, tria occurrunt observatione digna, quæ hic breviter expono. Primum est, quod Christus Dominus à veteris, seu Mosaicæ legis præceptis ne latum quidem unguem unquam descivit, sed ea jugiter observavit. Quæ in re falsi convincuntur Judæi, qui blaterant, Christum sprevisse, pervertisse, ac penitus destruxisse legem; cum potius Christus de semetipso testetur *Matth. cap. 5. Nolite putare quoniam veni solvere legem, & Prophetas; non veni solvere, sed adimplere*. Immo, ibidem disertis verbis asserit Christus, futurum citius, ut fractus illabatur Orbis, quam ut minimus legis apex irritus cadat, seu non impleatur, aut non observetur: *Amen quippè dico vobis, donec transeat Cælum, & terra, jota unum, aut unus apex non præteribit à lege, donec omnia fiant*. Præterea, Christus, juxta legem Moysis, circumciscus est, in Templo fuit oblatu, in diem festum Paschæ singulis annis Hierosolymam ascendit, caeremonias, & figuras, quibus erat adumbratus, implevit, gratiam, per quam vetus lex impleri posset, nobis attulit, omnia denique veteris legis oracula, quibus Prophetæ Messiae originem, locum, tempus natiuitatis, officium, doctrinam, miracula, actiones, passionem, exinanitionem, & exaltationem prædixerunt, in se sustinuit, & exequutus est. Quæ fronte ergo audent obstinati Judæi Christum transgressionis legis insimulare, cujus potius vita nihil aliud fuit, quam legis observantiæ, perfectæ in Deum, & proximum charitatis, modestiæ, tolerantæ, clementiæ, & mansuetudinis absolutissimum exemplar, morum disciplina, vitiorum censura, & perpetuus sibi que semper constans virtutum omnium concentus. Hinc Christus, suæ innocentæ securus, ad acer-

bisſi norum etiam hoſtium ſuorum teſtimonium ſuper hac re provocare haudquaquam reformidavit, dicens *Joannis* cap. 8. *Quis ex vobis arguet me de peccato.*

Alterum, quod in vita, quam Chriſtus egit poſt Baptiſmum, Lector obſervare debet, eſt ea agendi ratio popularis, & communis, quâ Chriſtus converſatus eſt cum hominibus, ſicut colligitur ex Scriptura Sacra *Matth.* cap. 11. *Venit Joannes neque manducans, neque bibens, & dicunt: demonium habet. Venit Filius hominis manducans, & bibens, & dicunt: ecce homo vorax, & potator vini, publicanorum, & peccatorum amicus.* Scilicet, Joannes Baptiſta fuerat miſſus à Deo, ut aſtremo vitæ genere, & pœnitentiæ prædicatione, velut lugubri carmine, Judæos ad plangenda peccata, & mores in melius emendandos provocaret, ſed ſurdis cecinit Joannes, nec ejus aſtremam, ac duram vitæ rationem ullo pacto ferre potuerunt Judæi. Venit ergo Chriſtus manducans, & bibens, ideſt, promiſcuo cibo, & potu, more cæterorum hominum, uſus, & cum iſtis popularitèr converſatus, omnibuſque omnia factus, ut ſua morum facilitate illos ad veræ pœnitentiæ callem revocaret; ſed Judæi, ſaxa in cordibus geſtantes, ad lætorem Chriſti cantum obſcuderunt, illius comitatem, ac popularem agendi rationem in calumniam, & contumeliam verterunt, iplumque paſſim traduxerunt tanquàm hominem voracem, & vini potatorem, qui conviviis & vino indulgeret, Publicanorum & peccatorum amicum, perditum hominem, & ganeonum ſocium, ſicque per deplorandam cæcitatem Judæi nec aſtremâ Joannis, nec populari Chriſti vivendi ratione ad pœnitentiam adduci potuerunt, omnemque diligentiam, quam ad eorum converſionem, & ſalutem procurandam adhibuit Deus, ſuo vitio, & contumaciâ inutilem planè reddiderunt.

Aliam rationem adducit *Sanctus Thomas*, cur Chriſtus, qui in Deſerto quadraginta diebus, & totidè m noctibus jejunando vitam aſtremam duxerat, deindè, inter homines converſando communem vitam, egerit. Inquit enim Angelicus ille Doctòr, cum utraque vita, aſtrema ſcilicèt, & communis, licita, & laudabilis ſit, voluit Chriſtus Dominus hominibus utriuſque vitæ præbere exemplum: *prioris* quidem, conſtitutus in deſerto, dum jejunavit, licèt non indigens jejunio: *poſterioris* autem, poſtquàm è Deſerto egreſſus cœleſtem doctrinam, quâ homines imbuere debebat, prædicare cœpit. Obſervat etiam *Sanctus Thomas*, poſt *Sanctum Chryſoſtomum*, quadantenus neceſſarium fuiſſe Joanni Baptiſtæ ut vitam aſtremam duceret, non autem Chriſto, ut peccatores converteret, quia Chriſtus, inquit Sanctus ille Doctòr, à miraculis, quibus in dies inclareſcebat, teſtimonium habebat; Joannes verò innocentis dumtaxat vitæ, morumque integritate commendatus benè apud Judæos audiebat. Dimiſit ergo Chriſtus Joannem jejunio, & vitæ aſtèritate fulgere, & contrariâ ipſe inceſſit viâ, ad menſam videlicèt

intrans Publicanorum, manducans, & bibens cum peccatoribus. Unde obiter advertant Divini Verbi præcones, quibus non est concessa gratia miraculorum, quod, si animarum saluti cum fructu incumbere velint, austerum Sancti Joannis Baptistæ vivendi modum pro viribus imitandum sibi proponere debeant, à frequentibus mulierum colloquiis, spectaculis, conviviis, lusuibus, aliisque id genus vitæ humanæ delitiis, quibus homines emolliri solent, penitus abstinendo, nihil delicatum in victu, & vestitu sectando. Difficillimum quippè est, juxta Sanctorum Patrum doctrinam, ut ille præcepta vitæ Christianæ, quæ, teste *Sancto Augustino*, crux est, atque martyrium, aliis persuadere, & instillare possit, qui mundanis adhuc titillatur oblectamentis, curiosis nugis pacitur, & auram popularem vanâ eloquentiâ, vel humanis conceptibus, ingeniosis quidem in speciem, sed sterilibus, & exsuccis, sibi inter concionandum conciliare conatur.

Ultimum denique, quod Lector in vita Christi post Baptismum observare debet, est illa voluntaria paupertas, cui sese addixit Servator noster, ita ut nec diverforium, nec humile tuguriolum habuerit, ubi reclinaret caput suum, sicut dicitur *Matthæi* cap. 8. Huic autem voluntariæ paupertati se subdidit Christus Dominus, tum ad instructionem nostram, tum ad suæ virtutis, ac divinitatis veritatem comprobendam. Enim verò, congruebat primò, ut sic exemplo suo Christus edoceret Prædicatores Evangelii, qui, antequàm sibi alios instruendi demandatam provinciam suscipiant, bonis temporalibus nuncium remittere debent, quò nimirum omni cupiditate divitiarum possidendi semel expediti, toti à Deo unice pendeant, toti Evangelii prædicationi insistant, & exemplo contemptus rerum terrenarum omnes ad Christum, multò facilius trahant. Alioquin, si Evangelii Prædicatores divitiarum possiderent, cupiditati eorum prædicationi adscribi posset, si *Discipuli Christi*, inquit *Sanctus Hieronymus* in *Matthæum*, divitias habuissent, viderentur non causâ salutis hominum, sed causâ lucri prædicare. Secundò, consentaneum omninò erat ut Christus divinitatem suam demonstraret per voluntariam paupertatem, quam elegit, nam si Christus divitiis, & opibus fuisset instructus, non ejus divinitati, sed potentia sæculari, quâ fuisset donatus, totius Orbis innovationem tribuissent mortales; at, dum Christus pauper, humilis, & abjectus, nullâ vi, & potestate armorum fretus, nec Oratorum eloquentiâ usus, nec Principum, sed pauperum Discipulorum ministerium adhibens, totum Orbem sibi virtute miraculorum subegit, idololatriam tot annorum diuturnitate roboratam extirpavit, omnesque nationes triumphantis Crucis jugo subdidit, nemo est, qui statim non videat, hæc omnia Divinæ Potentiæ esse miracula, quibus, ratio, & potentia humana cedere debent. Abeant ergo occæcati Judæi, & de fictitio illo Regno terreno, quod suo Messia tribuunt, inani expectatione, & vanissimâ, quantum voluerint, exultatione

ne bacherentur, nos verò Prophetarum oraculis fulti, Regnum quidem Messie vindicamus non terrenum, & temporaneum, sed spirituale, & æternum, sicut ex his, quæ supra diximus, liquidò constat.

Antequàm huic Dissertationi finem imponam, necessum est, ut faciam satis objectioni, sæpiùs à recutitis, seu Judæis, decantatæ, quæ Christum Dominum legis Mosaicæ transgressorem fuisse, plenis, ac crepantibus buccis allatrare solent.

Arguunt itaque sic Judæi: Ille homo non est à Deo, qui legem de Sabbati observatione violavit, atqui Christus legem de Sabbati observatione impunè violavit, ergo Christus non fuit homo missus à Deo, nec proinde verus Messias. Probant minorem ex cap. 12. *Matthæi*, ubi legitur, Christum, per Sata ambulantiem, permisisse discipulis suis, ut in die Sabbati spicas vellerent, confricarent, iisque manu contritis vescerentur, quod tamen in Sabbato fieri vetitum erat. Legitur etiam, ibidem, Christum sanasse in Sabbato hominem manum aridam habentem, & denique *Joannis* cap. 5. dicitur: paralyticum in Sabbato fuisse à Christo sanatum, Christus ergo legem de observatione Sabbati violavit.

Respondeo: Illam objectionem, quam etiamnum Judæi, crambis instar recoctæ, obtrudunt, jam à Christo Domino fuisse abundè solutam, *Matthæi* cap. 12. ubi suam, suorumque innocentiam circa Sabbati observationem ab impacta sibi calumnia quadruplici ratione vindicavit. In primis, ostendit Christus Dominus, Discipulos suos violati Sabbati reos censerì non debere eò quòd spicas vulsissent, & fricuisent Sabbato, quia id, compellente necessitate, seu ad levandam urgentem famem, fecerunt. Undè, sicut David non fuit Legis transgressor, quando propter famem, quæ premebatur, necessitatem, comedit panes sanctos ab *Achimelech* Sacerdote acceptos, quos, edere ei non licebat, ut legitur 1. *Reg.* cap. 21. ità Discipulis Christi vitio verti non debet, quòd, necessitate stimulantis famis compulsi, spicas Sabbato confricuerunt, ut paucarum spicarum vulsione, & confricatione vitam suam incolumem servarent, famemque sedarent; *Sabbatum enim propter hominem factum est, & non homo propter Sabbatum*, ut dicitur *Marci* cap. 2.

Deinde, sicut Sacerdotes in veteri Lege excusabantur à crimine violandi Sabbatum, etiam si in Templo opera exercerent, quæ Sabbatum in speciem violare videbantur (opera enim, quæ exercebant, famulæ erant, scilicet comportatio lignorum, mactatio, & excoctio victimarum, ignis accensio, circumcisio, & alia id genus) ità à crimine violandi Sabbatum itidem excusari debent Discipuli Christi, quippè qui velando, & manibus comprimendo spicas, ut suam sedarent famem, iniunctum sibi prædicandi Regnum Dei ministerium exhibuerunt Christo Domino, qui maior, sanctior, ac longè dignior erat ipso Templo, utpotè Templi Dominus: *Dico autem vobis, quia Templo maior est hic.*

Ter-

Tertiò : à crimine violandi Sabbatum excusantur Discipuli Christi , quia Lex , quæ misericordiam , & charitatem præcipit , præponi debet Legi , quæ purè ritualis est , & cultui externa , dicit enim Deus per *Oseam* Prophetam : *misericordiam volo , non sacrificium* . Porro , Lex servandi Sabbatum ritualis dumtaxat est , sacrum autem salutis animarum , & prædicationis verbi Divini ministerium pertinet ad Legem , quæ charitatem , & misericordiam præcipit ; rectè itaque se gesserunt Discipuli Christi , dum , spicarum confricatione in Sabbato , famem , quæ laborabant , sedarunt , ne dimitterent , aut interromperent ministerium sacrum , cui erant addicti .

Quartò : a crimine violandi Sabbatum excusantur Discipuli Christi propter legitimam dispensationem , quam acceperunt à Christo , qui Dominus est Sabbati , atque supremus conditor Legis , utpotè naturà Deus , summà potestate præditus , *Dominus enim est filius hominis etiam Sabbati* .

His quatuor rationibus Christus *Matth. cap. 12.* Discipulorum suorum innocentiam , quam Iudæi falso crimine appetebant , tuitus est , sed non minus efficacitè Iudæorum malignitatem cõarguit , ipsosque pudore suffusos silere cõegit , quandò in Sabbato sanavit hominem manum aridam habentem . Enim verò , cùm Scribæ , & Pharisei , non ut discerent , sed ut Christo calumniam struerent , ipsum his verbis interrogassent : *Si licet Sabbatis curare ?* Christus , ut eorum malitiam retunderet , immutatà quæstione , ait illis : *Interrogo vos , si licet Sabbatis benefacere , an male ? animam salvam facere , an perdere ?* Illis autem ad incitas redactis , adeoque tacentibus , nec hircere , aut quidquam mullitare ausis , Christus Dominus fas esse Sabbato hominem curare confirmavit istà familiari ovis similitudine , *quis erit ex vobis homo , qui habeat ovem unam , & si ceciderit hæc Sabbatis in foveam , nonne tenebit , & levabit eam ? Quanto magis melior est homo ove ? Itaque licet Sabbatis benefacere* . *Matth. cap. 12.* Quasi diceret Christus , inquit *S. Hieronymus : Si vos , ô Iudæi , Sabbato ovem , & aliud quodlibet animal in foveam decedens eripere festinatis , non animali , sed vestræ avaritiæ consulentes ; quanto magis hominem , qui multò melior est ove , debet liberare ?*

Observat etiam *Sanctus Thomas 3.p. q. 40. art. 4. ad 1.* Christum Dominum cap. 5. *Ioannis* , alio pacto à transgressionem Legis sese excusasse . Nam , cùm Iudæi religionis prætextu suæ adversus Iesum invidiæ , ac malignitati obtenderent , eò quòd paralyticum in Sabbato curasset , ad eorum iniustas , & temerarias cohibendas querimonias respondit Christus : *Pater meus usque modò operatur , & ego operor* . Quà responsione ostendit Christus , præcepto de sanctificatione Sabbati non interdicti opus divinum , sed opus dumtaxat humanum . Nam , quàmvis Deus die septimo à novis condendis creaturis cessaverit , semper tamen operatur in earum conservatione , eas videlicet regendo , animas creando , illuminando , perficien-

ficiendo, miracula patrando, aliaque animantia continentèr in vitam educendo, si ergo opera divina præcepto de sanctificatione Sabbati non sunt interdicta, nec quoque miracula, quæ edebat Christus in Sabbato, erant prohibita, utpotè opera divina. Non solvit itaque Christus Sabbathum, quando miraculosè paralytico sanitatem restituit.

Hæc, & alia huiusmodi, si liberis, & attentis animis perpenderent Iudæi, abstinerent procul omni dubio ab illis blasphemis, quas quotidie evomunt in Christum Salvatorem nostrum, quem odio, & livore cæcati, tanquàm verum Messiam agnoscere detrectant. Sed illis meliorem mentem precemur, ut ipsis tandem aliquandò fulgeat illuminatio Evangelii gloriæ Christi, & sublato velamine, quod, teste Apostolo 2. ad Cor. cap. 3. positum est super corda eorum, agnoscant Christum Dominum, Prophetarum oraculis prædictum, à Patriarchis expectatum, multi prodigiis demonstratum, ac toto in Orbe adoratum.

DISSERTATIO DECIMATERTIA

De Doctrina Christi Domini.

DEus, ut absolutissimus generis humani esset Magister, humanam carnem induere debuit, inquit *Lactantius* libro 4. Divin. Instit. cap. 24. Nam, si veniat ad homines ut Deus, præterquam quòd mortales oculi claritatem Majestatis ejus conspicerent, ac sustinere non possunt, ipse certè Deus virtutem suo exemplo docere haud poterit, quia expers corporis non faciet, quæ docebit: ac per hoc doctrina ejus perfecta non erit. Ut igitur Deus mortales docendo, virtutum quoque illis præberet exempla, homo factus est; suamque doctrinam per omnem terram verbis, & exemplis seminavit, & ea, quæ præcipiendo docuit, faciendo confirmavit. *Spiritus Domini super me, eò quòd unxerit Dominus me: ad annuncian- dum mansuetis nisi me, ut mederer contritis corde, & predicarem captivis indulgentiam, & clausis apertionem: ut predicarem annuum placabilem Domino, & diem ultionis Deo nostro, ut consolarer omnes lugentes.* *Isaia* cap. 61. De hac itaque nostri, & absolutissimi generis humani Magistri doctrinam in hac Dissertatione verba facturum, quatuor difficultates paucis examinandas aggredior. Prima est, an doctrina Christi sit quæcumque alià doctrinam excellentior? Altera, utrùm conveniens fuerit, ut Christus Dominus per se ipsum doceret Iudæos, non obstante offensione Scribarum, & Phariseorum? Tertia, nùm Christus debuerit doctrinam suam scripto tradere, seu litteris consignare? Postrema, utrùm Epistola Christi ad *Abgarum*, Regem Edessenorum, & vicissim Epistola *Abgari* ad Christum, sint genuinæ, aut spurix, & supposititiz. Quibus difficultatibus ut sigillatim faciam satis

Dico

DICO PRIMÒ: *Doctrinam Christi excellentiorem esse quâcumque aliâ doctrinâ.*

Probatur ex caracteribus, quibus doctrina Christi præ cæteris aliis insignitur. Primò, doctrina Christi, tota quanta est, cœlestis, ac divina est, non ad humanam aucupandam gloriam studio comparata. Unde Christus, qui è sinu Patris æterni omnis veritatis cognitionem velut è plenissimo fonte hausit, ait *Ioannis cap. 7. Doctrina mea non est mea, sed ejus, qui misit me.* Et hac de causa Pater æternus, ut ostenderet, doctrinam Christi non humanam, sed planè cœlestem, ac divinam esse, bis eam voce sensibili comprobavit, primùm ad Jordanem in Baptismo, dein, in monte Thabor in Transfiguratione, dicens: *Hic est Filius meus dilectus, in quo mihi complacui, ipsum audite.* Quasi diceret: Audite Doctorem, & Legislatorem omnibus datum, quem Legis mysteria prænunciant, quem Prophetarum ora cecinerunt, solus hic è Cælo profectus est Doctor, solus certa docere potuit, cum sit veritas, vita, æque æterna sapientia, solus salutaria docuit unicus humanæ salutis Auctor, solus absolute præstitit quidquid docuit, solus exhibere potest quidquid promissit, solus denique omnia perfectæ virtutis vel præcepta, vel exempla, quæ per partes alia ab aliis prodita fuerant, tradidit, docuit, & expressit. Secundò, doctrina Christi digito Dei inscripta est in cordibus nostris, nec nos multitudinæ onerat præceptorum, sed eò unice tendit, ut Deum toto corde, totâ mente, totisque viribus diligamus, & proximum sicut nos ipsos. *Hæc est, inquit Christus, Lex, & Propheta;* ad discrimen veteris Legis, seu doctrinæ, quam Deus Israelitis in Tabulis exarata tradidit, quæ multiplices, ac duras Leges complectebatur: *Dabo Legem meam in visceribus eorum, & in corde eorum scribam eam, & erunt ipsi in Deum, & erunt mihi in populum, & non docebit ultra vir proximum, & vir fratrem suum, dicens: Cognosce Deum; omnes enim cognoscent me à minimo eorum usque ad maximum.* *Jeremix cap. 31. v. 33. & 34.* Tertiò, doctrina Christi vera est, nulli prorsus errori obnoxia, simplex, facilis, & expedita, omnibus ex æquo sese accommodat, lacte parvulos alit, donec tacitis auctibus grandescant in Christo, robustos solido cibo pascit, & ita non deest infimis, ut summis sit etiam admirabilis; quò fit, ut doctrina Christi longè latèque discrepet à doctrina Philosophorum, quæ multis erroribus scatet, totque implexis involvitur difficultatibus, ut nonnisi post diuturnum tempus animus, non dico exercendæ, & penetrandæ eorum disciplinæ, sed & capiendæ idoneus esse possit. Quartò, doctrina Christi sanctitatem habet à suo Legislatore, scilicet Christo Domino, qui eam præstanti virtute firmavit, & ad illam sequendam mortales dictis stimulavit, & factis; quâ sanctitate omninò caruit doctrina Philosophorum, qui non eodem modo vixerunt, quo docuerunt esse vivendum, sed victi cupiditatibus, quas vinci prædicabant oportere, doctrinæ suæ fidem derogarunt. Quintò, doctrina Christi

sti carnalibus cupiditatibus, & sensibus opposita est, carnique, ac sanguini indicit bellum, docet siquidem nos brevitatem vite, fallaciam, & incertitudinem divitiarum, miserum exitum vite libidinosæ, ad modestiam, humilitatem, odium & contemptum Mundi omnes hortatur, invitat, & animat; totaque è diametro opponitur ei, quam impostor Mahumetus invenit, doctrinæ, quæ impia est, flagitiosa, non sibi constans, sensibusque maximè indulgens. Permittit quippè hujus impostoris doctrina, ut effrænem suam quisque exsatiaret libidinem, & cupiditatibus suis laxet habenas, multiplicando coniugia, totque alendo uxores, quot alere potest. Undè non mirum, si ille impostor hanc doctrinam sensibus adèò commodam, & post mortem etiam carnales promittentem delicias, vi armorum, & voluptatis illecebris latissimè propagaverit, atque benè multos, quorum natura ad vitia proclivis erat, inanibus promissis lætaret, atque seduxerit. Sextò, doctrina Christi sensibus licèt invisa sit, & rationi, propter mysteria, quæ credenda proponit, omninò impervia, attamen absque armis, absque eloquentia, absque ullo humano subsidio, & voluptatis illicio, per simplices Discipulos prædicata altas ubique radices egit, tot inter persecutiones, quibus eam exagitarunt Tyranni, irrigata sanguine Martyrum crevit, & tandem de errore triumphans summos Orbis Principes, Philosophos, Oratores, omnesque gentes, tenebris idololatriæ immerfas, gratiæ spiritualis luce illustravit. *Numero exigui*, inquit Augustinus Epist. 137. aliàs 3. ad Volusianum, *per Mundum disseminantur, populos facilitate mirabili convertunt, inter inimicos augentur, persecutionibus crescunt, per afflictionem angustias usque in terrarum extrema dilatantur. Ex imperitissimis, ex abjectissimis, ex paucissimis illuminantur, nobilitantur, multiplicantur, præclarissima ingenia, cultissima eloquia, mirabilesque peritias acutorum, facundorum, atque Doctorum subjungant Christo, & ad prædicandum viam pietatis, salutisque convertunt.* Septimò, Christus veritatem doctrinæ suæ non solum Prophetarum oraculis, & adimpletione omnium figurarum, quibus in veteri Lege fuerat adumbratus, plenissimè confirmavit, sed etiam multis, iisque stupendis prodigiis sæpissimè comprobavit, quæ certè prodigia in confirmationem doctrinæ suæ, si falsa fuisset, Christus edere non potuisset, quia Deus, qui nec falli, nec fallere potest, permittere non potest, ut in confirmationem falsæ doctrinæ vera miracula fiant. Octavò, Christus, non obstante rabie Iudeorum, qui calumniis, acerbis suppliciis, diræque morte in ipsum atrociter sæverunt, doctrinam suam constanti semper animo propugnavit, & post ipsius mortem Apostoli eandem doctrinam, à Magistro acceptam, per totum Orbem promulgarunt, nullum indè præmium sperantes, quàm persecutiones, exilia, contumelias, cruces, & tormenta. Quis autem credat, Christum, & Apostolos pro falsâ doctrina probrosam mortem oppetere voluisse? Denique, doctrina Christi non fuit occulta: *Ego*, inquit Christus, *Iohannis*

cap. 18. palam locutus sum Mundo, Ego semper docui in Synagoga, in Templo, quod omnes Iudæi conveniunt, & in occulto locutus sum nihil, ad discrimen factionum, & seditionum Auctorum, vel Hæreticorum, qui pravam suam doctrinam non audent statim propalare, sed sibi male concilii per cuniculos, per occultas mille nocendi artes eam disseminare satagunt, ne errores, quos simplicibus instillare moliantur, confestim deprehendantur, & refellantur; vel etiam, ut inquit S. Thomas, ad differentiam Invidorum, qui doctrinam suam, alioquin bonam, cum cæteris communicare nolunt, quia cæteris doctiores audire volunt, quod in Christo locum non habet, de quo Sapientiæ cap. 7. dicitur: *Quam sine fictione didici, & sine invidia communico, & honestatem illius non abscondo.* Observat tamen S. Thomas 3. p. q. 42. art. 3. Christum turbis quædam in occulto fuisse locutum quantum ad modum docendi, dum videlicet ad annuncianda spiritualia Mysteria parabolis, & similitudinibus usus est, ut hoc pacto rudium hominum infantiam, ac balbutiem erudiret, & erudiendo emendaret, occultans in his parabolis spiritualis intelligentiæ medullam, quæ est cibibus grandium: Sic loquitur Christus, ut altitudine superbos irrideat, profunditate attentos terreat, veritate magnos pasciat, affabilitate parvulos nutriet, inquit S. Augustinus lib. 5. de Genesi ad litteram cap. 3. Ex his ergo characteribus, quibus nobilitatur doctrina Christi, patet, eam auctoritate, sanctitate, veritate, & sublimitate cæteris aliis doctrinis antecellere. Quæ cum ita sint, pudendum sanè, quod multi Christiani Theatra, & Spectacula frequenter adeant, fabulas, & res ludicas à scenicis hominibus, & mimis, arrectis auribus audituri, librosque non solum inutiles, sed etiam saluti noxios summâ cum oblatione legant, Evangelii verò lectionem, in qua cœlestis Christi continetur doctrina, omnino prætermittant. In hunc abusum totis eloquentiæ suæ viribus inveci sunt Sancti Patres, præsertim S. Chrysostomus hom. 2. in Matthæum, ubi frivolas quorundam excusationes refellit: Non sum (inquit) ego Monachus, uxorem habeo, & filios, & curam domus gero. Hoc est, quod omnia quasi una quadam peste corrumpit, quoniam lectionem Divinarum Scripturarum ad solos putatis Monachos pertinere, cum multò magis vobis, quàm illis sit necessaria. Qui enim versantur in mœdo, & vulnera quotidie accipiunt, magis indigent medicamine. Itaque multò est gravius, atque deterius, rem superfluum esse Legem Dei putare, quàm illam omnino non legere. Hæc enim verba sunt, quæ de diabolica prorsus meditatione promuntur.

D I C E S: Apostolus Paulus 1. ad Corinth. cap. 1. vocat prædicationem Evangelii stultitiam, non ergo doctrina Christi, quæ in Evangelio continetur, sublimitate, & sapientiâ superat Philosophorum doctrinam. Præterea, Matth. cap. 13. Prædicatio Evangelii comparatur grano sinapis, quod minimum est omnibus seminibus, quem locum exponens Sanctus Hieronymus, hæc habet: *Confer huiusmodi doctrinam dogmatibus Philo-*
sopho-

sophorum, & libris eorum, & splendori eloquentiæ, & compositioni Sermonum: & videbis quāto minor sit ceteris seminibus seminis Evangelii.

Respondeo ad utrumque argumentum, & ad primum dico: Prædicationem Evangelii appellari ab Apostolo *stultitiam* comparatè ad homines carnales, non secus ac prædicationis Christi crucifixi Judæis quidem, scandalum est, & gentibus stultitia; ipsis autem electis Judæis, gentibusque, Dei virtus est, & sapientia, nam id quod stultum est Dei, sapientius est hominibus, ut ait ibidem Apostolus. Invisibilium amore visibilia contemnere stultum est viris carnalibus, & durum incipientibus; at progressis aliquantulum, & demum perfectis ea est tota sapientiæ perfectio, suavitas, & beatitudo. Carnalibus adhuc populis Apostolus, ut ipsemet testatur, non statim sublimem sapientiam ingererat, sed simplicem doctrinam, instar lactis, propinabat, at semel purgatis, & spiritualibus effectis perfectam sapientiam proponebat, undè idem Apostolus alibi dicit, se loqui sapientiam in mysterio, nempe inter perfectos.

Ad alterum argumentum respondeo: Prædicationem Evangelii, seu doctrinæ Christi, comparari grano sinapis, quod minimum est omnibus seminibus, quia doctrina Evangelica, si cum doctrinis sæcularibus, hoc est, Philosophorum, & Oratorum conferatur, minima in speciem propter verborum simplicitatem apparebit, quamvis reverà ad persuadendum, vel convincendum sit illis longè efficacior, sublimior, atque potentior. Quæ enim, amabo, sæcularis doctrina conferri potest cum Christi doctrina, quæ, ut modò dicebamus, totum Orbem immutavit in melius, & quod Philosophis ne in mentem quidem venerat ut suaderent hominibus servare castitatem, cupides extinguere, abdicare nuptias, vitæ mortalis pertædescere, benè mereri de malè merentibus, persecutionem, calumniam, maledicta, mortem ipsam pro religione, pro iustitia pati, id doctrina Christi hominibus, id adolescentulis, id pueris, & puellis persuasit; exindè enim castra Virginum, & examina Martyrum de morte, de voluptate, de natura ipsa triumpharunt. Hinc eleganter Lactantius ait lib. 3. Divin. Inst. cap. 26. *Sola hæc efficit doctrina cælestis, quia sola sapientia est. Illi, Philosophi, scilicet persuadere cuiquam poterunt, qui nihil persuadent etiam sibi? Aut cujusquam cupiditates oppriment, iram temperabunt, libidinem coercerunt: cum & ipsi cedant vitiis, & fateantur plus valere naturam? Dei autem præcepta, quia & simplicia, & vera sunt, quantum valeant in animis hominum quotidiana experientia demonstrant.*

DICO SECUNDÒ: Conveniens fuisse ut Christus per seipsum doceret Judæos, & apud illos prædicaret, non obstante offensione Scribesarum, & Phariseorum.

Probatur quadruplici ratione, quam affert Angelicus Doctor 3. p. q. 42. art. 1. Primò, quia Christus, per semetipsum docendo Judæos,

luculenter ostendit , per suum adventum impleri omnes promissiones antiquitatis factas Judæis , non autem gentibus , quâ de causa dicit ipse Christus *Matth. cap. 15. Non sum missus nisi ad oves, quæ perierunt domus Israel, quæ verba exponens S. Augustinus Tractatu 47. in Joannem, hæc habet: Quid est: Non sum missus nisi ad oves, quæ perierunt domus Israel, nisi quia præsentiam suam corporalem non exhibuit nisi populo Israel? Ad gentes non perrexit ipse, ut qui, seu Iudæi, contemnebant, majus judicium sumerent, quia & præsentia illis est exhibita. Ipse Dominus ibi fuit, ibi Matrem elegit, ibi concipi, nasci, ibi sanguinem fundere voluit, ibi sunt vestigia ejus, modò adorantur, ubi novissimè stetit, undè ascendit in Cælum: ad gentes autem misit. Hinc Apostolus ad Romanos cap. 15. Christum appellat *Ministram Circumcisionis*, idest, Apostolum, & Prædicatorem Israelitarum, propter veritatem Dei ad confirmandas promissiones Patrum. Ut ergò Christus probaret Judæis, se esse Messiam ipsis à Deo promissum, eos per semetipsum edocere, atque apud illos prædicare voluit. Secundò, Christus docendo, & prædicando solum apud Judæos, servavit ordinem primogenito populo, seu Israelitico, debitum, ut impleretur vaticinium *Isaiæ cap. ultimo: Mittam ex eis, qui salvi fuerint, videlicet ex Iudæis, ad gentes, & annuntiabunt gloriam meam gentibus*. Tertiò, Christus, docendo per semetipsum Judæos, omnem illis pæripuit calumniandi materiam, fecitque ne justam excusationem haberent, dicentes, se ideò rejecisse Dominum, quod gentibus incircumcisis prædicaret. Apud solos itaque Judæos prædicavit. Christus Dominus, districtèque prohibuit Apostolis suis, ne abirent versùs gentes prædicandi causâ, ut quantam Judæorum curam gereret, ipse demonstraret, & sic ora ipsorum obstrueret, & ad doctrinam Apostolorum prepararet, inquit *S. Chrysostomus Hom. 33. in Matth. Denique, Christus gentes non per semetipsum docere, sed tantum post passionem suam Apostolorum ministerio luce Evangelicâ illustrare voluit, ut ostenderet, se per Crucis victoriam promeritum fuisse potestatem, & dominium in omnes gentes, sicut ipsemet testatur Matth. cap. ult. Data est mihi omnis potestas in Cælo, & in terra: Euntes ergò docete omnes gentes &c. quasi diceret: Ite nunc non in Iudæam solum, sicut prius vobis præceperam, sed in Mundum universum, docete omnes gentes, institute in doctrina fidei, quam à me accepistis, non Judæos tantum, sed omnium gentium homines.**

Advertendum est tamen cum *S. Thoma*, quòd, sicut Christus non debuit à principio doctrinam suam promiscuè gentibus communicare, ut nimirum Iudæis, tantquam populo primogenito, debitus ordo servaretur; ità etiam non debuit gentes, omninò repellere, ne spes salutis eis præcluderetur. Quocirca, Christus ad misericordiam semper propensus, & hominum salutis sitientissimus, inter gentiles Samaritanam, & Chananzam, ut legitur *Joannis cap. 4. & Matth. cap. 15. & alios* nonnul-

nonnullos propter excellentiam fidei, & devotionis eorum admisit, suæque doctrinæ luce illustravit.

DICES PRIMÒ *Isaias* cap. 49. prædixit, Messiam, seu Christum, fore lucem gentium: *Parum est ut sis mihi servus ad suscitandas tribus Jacob, & facies Israel convertendas. Ecce dedi te in lucem gentium, ut sis salus mea usque ad extremum terræ.* Simeon etiam, venerandus ille senex, qui expectabat redemptionem Israel, Christum Dominum in suis ulnis gestans in Templo appellavit *Lumen ad revelationem gentium.* Sed Christus lumen, & salutem præbuit per suam doctrinam, debuit ergo, juxta Prophetarum oracula, non solum apud Judæos, sed etiam apud gentes prædicare.

Respondeo cum *S. Thoma*: Christum fuisse in lumen, & salutem gentium, quando post passionem suam Discipulos suos ad prædicandum gentibus misit. Nec enim minoris, sed potius majoris potestatis est facere aliquid per alios, quàm per seipsum, & in hoc maximè divina Christi potestas illuxit, quòd Discipulis suis tantam contulit virtutem, ut illorum prædicatione idolorum cultores, & barbaræ gentes, quæ nihil de Christo audierant, ipsius fidem amplexi sint, ejusque religioni colla submiserint.

DICES SECUNDÒ: Christus apud illos prædicare non debebat, quibus illius prædicatio scandalo & offensionem erat, atqui prædicatio Christi Scribis & Phariseis, qui apud Judæos in magno honore habebantur, scandalo & offensionem erat, teste Evangelista *Matthæo*, qui cap. 15. refert, Discipulos Christi dixisse ei: *Scis, quia Pharisei, audito hoc verbo, scandalizati sunt?* Non igitur expediebat, ut Christus prædicaret Judæis propter offensionem Scribarum & Phariseorum.

Respondeo cum eodem Doctore Angelico: Christum, dum publice Scribas, & Phariseos cõarguebat, non impedisse, sed magis promovisse effectum doctrinæ suæ, primò, quia, ut ait *S. Petrus* 1. suæ Epistolæ cap. 2. prædixit *Isaias*, Christum fore lapidem offensionis, & petram scandali *his, qui offendant verbo, nec credunt in quo positi sunt*, quales profectò fuerunt Scribæ, & Pharisei, qui iram in Christum stimulari, & invidia depravari, quòd, confluentes ad eum populo, contemni, ac deferi se videbant, Christi doctrinæ repugnabant, eum acriter infestabantur, conviciis proscindendo, incessendo dicteris, doctrinam cavillando, fodicando actiones, miracula eludendo. Quapropter, non debuit Christus, propter illorum offensionem, à suscepto docendi, & prædicandi munere abstinere. Secundò, per objurgationes Christi, hypocrisis, & vitia Phariseorum, atque Scribarum populo innotescerent, sicque populus minùs avertebatur à doctrina Christi, quam apertè aperte oppugnabant Scribæ, & Pharisei. Hinc Christus admonitus à suis Discipulis, quòd Pharisei verbis ejus fuissent offensi, respondit: *Sinite illos, ceci sunt, & duces cecorum: cecus autem si ceco ducatur præ-*
flet,

stet, anbo in foveam cadent. Quà responsione ostendit Christus, discipulos suos sollicitos esse non debuisse de offensione Scribarum, & Phariseorum, quia veritate offendeantur, suisque superstitiosis traditionibus addicti, gratiæ mysteria pro nihilo habebant, & plebem à via salutis abducebant. Eà de causâ Christus Dominus Scribas & Phariseos sæpe objurgavit, ita tamen ut iustissimas illas objurgationes Christo non ira exprimeret, sed zelus gloriæ Dei, desiderium conversionis Judæorum, ignis non peregrinus, sed sacer, atque iustissimis de causis accensus; expediebat enim, ut Christus illis hypocritis, qui sanctitatis famam apud homines captabant, larvam detraheret, artemque detegeret illorum Doctorum, qui per illam externam pietatis & sanctimoniam speciem in animos miseræ plebis invadebant. Undè *Sanctus Thomas* 3. p. q. 42. art. 2. docet, quòd salus multitudinis præferenda est paci quorumcumque singularium hominum: & ideo quandò aliqui suâ perversitate, salutem multitudinis præpediunt, non est timenda eorum offensio à Prædicatore, vel Doctore, ut multitudinis saluti provideat. Hac regulâ *Sancti Thomæ* verè aureâ damnantur illi, qui artem artium regimen animarum, Angelicis humeris formidandum, in se suscipiunt, & tamen languescunt, & concidunt animis ob pericula mundi, legem Christi emolliunt, ut se se ad omnium mores accommodent, Magnatum præferunt & nobilium, qui lucentem veritatem amant, oderunt redarguentem, qui denique turpi vitiorum conniventia muneris zelo vigori debito defunt sive in proponendâ, sive in asserendâ atque vindicandâ doctrinæ moralis Christi integritate, quâ nihil antiquius habere deberent. Hos & similes mutos ministros, qui dicunt malum bonum, & bonum malum, consuentes pulvillos sub cubitis hominum, grave proculdubio manet supplicium, jureque optimo laxi illi animarum Rectores his animarum Medicis annumerari debent, de quibus Deus conqueritur *Jeremie* cap. 6. dicens: *Curabant contritionem filie populi mei, cum ignominia, dicentes: Pax, pax; & non erat pax; quia, ut inquit Sanctus Cyprianus Tract. de lapsis: Non concedit pacem ista facilitas, sed tollit: nec communionem tribuit, sed impedit salutem.* Quamvis ergo ægrè ferant, & vociferentur plurimi adversus ea, quæ juxta disciplinam Ecclesiæ, juxta Canonum Sanctiones, juxta Christi & Sanctorum exempla ad morum correctionem peraguntur, non cedendum clamoribus, sed, ad exemplum Christi Domini, semper veritati insistendum est, omnesque Evangelici Sacerdotes his, qui salutis viam mollibus, ac flexibilibus regulis laxare, & complanare volunt, intrepidè, & magnâ voce dicere debent cum *Mathathia* Sacerdote lib. 1. Mach. cap. 2. *Propitius sit nobis Deus, non est nobis utile relinquere legem, & iustitias Dei, ut eamus viâ alterâ.*

DICO TERTIO: *Christum non debuisse doctrinam suam scripto tradere, seu litteris consignare.*

Probatur tribus rationibus *Sancti Thomæ* 3. p. q. 42. art. 4. Prima ratio

ratio petitur ex excellentia doctrinæ Christi, cui debetur modus excellentior, ut scilicet verbo tradita in tabulis cordis imprimatur, non in tabulis lapideis inscribatur, sicut lex vetus, quæ cum daretur in figuris, convenienter litteris fuit exarata, doctrina autem Christi, quæ est lex spiritus vitæ, scribi debuit non atramento, sed spiritu Dei vivi, non in tabulis lapideis, sed in tabulis cordis carnalibus, ut ait Apostolus 2. ad Corinth. cap. 3.

Secunda ratio desumitur ex conditione hominum, qui ita sunt à natura comparati, ut, si Christus doctrinam suam scripto mandasset, credidissent, quod nihil altius ejus doctrina complecteretur, quàm quod ea Scriptura contineret; cum tamen doctrina Christi tantæ sublimitatis sit, ut litteris comprehendi non possit, juxta illud Joannis cap. ult. *Sunt & alia multa, quæ fecit Jesus, quæ si scriberentur per singula, nec ipsum arbitror mundum capere posse eos, qui scribendi sunt, libros.* Id est, ut explicat Sanctus Augustinus Tractatu 124. in Joannem, non spatio locorum credendum est mundum capere non posse, sed capacitate legentium comprehendi fortasse non possent.

Tertia denique ratio petitur ex ordinatione communis Providentiæ Divinæ, quæ efficit ut suprema non immediatè ad inferiora, sed tantùm mediatè, id est, per quædam media perveniant, congruebat igitur, ut Christus immediatè doceret Apostolos, & deinceps Apostoli alios, quæ verbo, quæ scripto imbuerent doctrinâ Christi, alioquin, si doctrinam suam litteris mandasset Christus Dominus, confestim ad omnes omnino pervenisset, quod à solito Providentiæ Divinæ ordine est alienum.

Hæc Sancti Thomæ doctrina egregiè confirmatur ex his, quæ habet Sanctus Augustinus lib. 1. de Consensu Evangelistarum cap. 7. & aliis sequentibus, ibi enim primò disertè asserit Sanctus ille Doctor, Christum nihil litteris mandasse, hæc sunt ipsius verba: *Sed illud prius discutiendum est, quod solet nonnullos movere, cur ipse Dominus nihil scripserit, ut aliis de ipso scribentibus necesse sit credere? hoc enim illi, & maxime pagani, quarunt, qui Christum culpares, aut blasphemare non audent, eique tribuunt excellentissimam quamdam sapientiam sed tamen, tanquàm homini: discipulos verò ejus dicunt Magistro suo ampliùs tribuisse, quàm erat; ut eum Filium Dei dicerent, & Verbum Dei, per quod facta sunt omnia.* Præterea, Sanctus Augustinus refellit ibidem aliquos Gentiles, qui temerè effutiebant, quosdam à Christo Domino scriptos esse libros, continentes magicas artes, quarum ope dictitabant, miracula, quorum fama percrebuerat, ab ipso fuisse patrata: *Et illi tamen, qui Christi libros tales se legisse affirmant, nulla talia faciunt, qualia illum libris talibus fecisse mirantur.* Divino enim judicio sic errant, ut eosdem libros ad Petrum & Paulum dicant tanquam epistolari titulo prænotatos, è quòd in plurimis locis eos cum Christo pictos viderunt: nec mirum, si d

pin-

pingentibus decepti sunt : toto enim tempore , quo Christus in carne mortali cum suis discipulis vixit , nondum erat Papius discipulus ejus . Ex quibus Sancti Augustini verbis clarè constat , Christum Dominum scripto doctrinam suam non tradidisse .

DICES PRIMÒ : Sanctus Augustinus loco mox laudato , asserit : Gentiles sic fuisse affectos , ut doctrinæ Christi credidissent , si ipse met eam litteris consignasset : cum ergo , *querunt* , inquit Sanctus ille Doctor , *quare ipse , idest Christus , non scripserit , videntur parati fuisse hoc de illo credere , quod de se ipse scripsisset , non quod alii de illo pro suo arbitrio prædicarent .* Debuisset ergo Christus ad facilius promovendam salutem Gentilium litteris doctrinam suam consignare .

Respondeo primò cum Sancto Thoma : illos , qui Apostolis de Christo scribentibus fidem adhibere noluerunt , nec ipsi Christo de se scribenti credituros , quippè qui opinabantur , eum magicis artibus miracula edidisse .

Respondeo secundò : Futilem esse hanc Gentilium excusationem , *Christus enim , ut ait S. Augustinus lib. 1. de Consensu Evang. cap. 35. omnibus discipulis suis tanquam membris corporis sui caput est : itaque cum illi scripserunt , quæ ille ostendit & dixit , nequaquam dicendum est , quòd ipse non scripserit ; quandò quidè membra ejus id operata sunt , quòd distante capite cognoverunt : quidquid enim ille de suis fratribus & discipulis nos legere voluit , hoc scribendum illis tanquam suis manibus imperavit .* Hoc unitatis consortium , & in diversis membris concordiam membrorum sub uno capite ministerium quisquis intellexerit , non aliter accipiet , quod narrantibus discipulis Christi in Evangelio legerit , quam si ipsam manum Domini , quam in proprio corpore gestabat , scribentem conspexerit .

Respondeo tertio : Gentiles prudenter in dubium revocare non potuisse ea , quæ de Christo Domino Sacri Evangelistæ memoriæ prodiderunt . Primò , quia quatuor Evangelistæ , *Matthæus , Marcus , Lucas , & Joannes* fuerunt viri sancti , aperti , candidi , veritatis cultores , & testes locupletissimi , utpotè oculati , quorum nec judicium , nec fides laborare , aut vacillare potest . Secundò , quia à vana gloria fuerunt omninò alieni , nihil ex occulto , nihil ex insidiis narrantes , sicut patet ex eorum styli , orationisque simplicitate . Tertiò , quia ea referunt , quæ palàm à Christo Domino edita sunt , hoc est , inspectantibus Gentilibus , ac Judæis , quorum testimonio argui , convincique potuissent mendacii , si hæc , quæ de Christo litteris mandarunt , falsa , aut de industria ab illis fuissent conficta . Quartò , quia Evangelistarum , in describendis his , quæ ad vitam & doctrinam Christi spectant , candorem & ingenuitatem monstrat etiam historia illorum temporum , exarata sive à *Josepho* Judæo , sive à *Cornelio Tacito , Suetonio , Phlegonte* , aliisque Echnicis Scriptoribus , ut disertè ostendit clarissimus *Daniel Huetius*
Abrin-

Abrincensis Episcopus in sua Demonstratione Evangelica. Quintò, quia ipsimet Evangelistæ miracula patrarunt in confirmationem testimonii, quod Christo reddiderunt; porro, Deus, qui prima & summa veritas est, testimonium perhibere non potest falsitati, nec falsam doctrinam, miraculis, quasi auctoritatis suæ sigillis, obsignare. Sextò, quia Sacri Evangelistæ pro veritate eorum, quæ narraverunt, exilia, cruces, tormenta, mortem ipsam impavidi oppetierunt, & de errore triumpharunt. Illud mirabilis, ait Chrysostomus Hom. 4. in Acta Apostolorum, quod Apostoli nudo corpore consistebant adversus armatos, adversus Principes; qui publicum jus in ipsos habebant, imperiti, elingues, ac simplices idiotæ adversus impostores, & circumventores, adversus sophistarum, Rhetorum, ac Philosophorum turbam, qui in academia Platonis, & Aristotelis deambulationibus exercitati depugnant, & in Stoicorum porticibus fuerant occupati. Hos ita superavit Petrus, quasi cum mutis piscibus certamen fuisset. Hanc rationem latè, & eleganter prosequitur Eusebius lib. 3. Demonstr. Evangelicæ cap. 7. Septimò; quia Evangelistæ, & Sacri Scriptores Leges, ac præcepta tradiderunt rectè vivendi, amandi Deum, illique unicè adhærendi. Quod quidem argumento est, eos iacter scribendum Spiritu Sancto fuisse afflatos; Nec enim est ab homine, sed super hominem, quod hominem facit bonè vivere, nec solum hominem, sed etiam quamlibet potestatem cælestem, inquit Sanctus Augustinus lib. 20. de Civit. Dei cap. 25. Octavò, quia credibile non est, universum, quà latè patet, Orbem iis omnibus, quæ sacri Evangelistæ litteris mandarunt, fidem adhibere potuisse, si ipsi datà operâ mendacia, & fabulas pro veritate obtrussissent. Denique, mirabilis ille concentus, qui reperitur tam inter vetus Testamentum, & quatuor Evangelia, quàm inter Prophetarum oracula, & exploratissimam rerum post gestarum historiam ab Evangelistis monumentis consignatam, non potest esse solers, subtilisque fictarum, & commentitiarum fabularum in ordinem, distributio, sed potius suspici debet tanquam sapientissimum supremi Numinis opus, nam ut non contemnerentur, neque fabulosa ducerentur, quæ Apostoli annunciabant, demonstrabantur hæc à Prophetis antè fuisse prædicta, ait Sanctus Augustinus lib. 12. contra Faustum cap. 45. Ex his ergo momentis liquidò patet, Gentiles non potuisse prudenter dubitare de his, quæ sacri Evangelistæ, alique Apostoli de Christo Domino conscripserunt.

DICES SECUNDÒ: Certò non constat, an quatuor Evangelia, Matthæi videlicet, Marci, Lucæ, & Joannis, in quibus vita, & doctrina Christi continentur, sint genuina, aut spuria; sincera, aut corrupta? Nulla ergo fides ex his quatuor Evangeliiis vitæ & doctrinæ Christi conciliari potest. Prob. ant. Multa olim fuerunt Evangelia. Basilides quippè suum habuit Evangelium, habuit Apelles, habuit & Tatianus, legebatur etiam ab Gnosticis Evangelium secundum Philippum, ab

Ebionitis, & Encratitis, secundum Hebræos: à Manichæis, secundum Thomam. Nec defuerunt etiam, qui probaverunt Evangelia Petri, Andree, Bartholomæi, Judæ, seu Thaddæi, Jacobi junioris, Matthiæ, Barnabæ, Nicodemi, sicut & illa, quæ secundum Ægyptios erant, & secundum duodecim Apostolos. Si ergo prædicta Evangelia Apostolis falso olim adscripta, tanquam spuria impræsentiarum repudiantur, quo pacto probari poterit, genuina esse Evangelia Matthæi, Marci, Lucæ, & Joannis, & ab illis fuisse exarata? *Multa à majoribus vestris, aiebat Faustus Manichæus, eloquiis Domini inserta verba sunt, quæ nomine signata ipsius, cum ejus fide non congruunt: præsertim quia, ut jam sæpè probatum à nobis est, nec ab ipso hæc sunt, nec ab ejus Apostolis scripta: sed multa post eorum assumptionem à nescio quibus, & ipsis inter se non concordantibus, semijudæis per famas, opinionesque compta sunt: qui tamen omnia eadem in Apostolorum Domini conferentes nomina, vel eorum, qui secuti Apostolos viderentur, errores ac mendacia sua secundum eos se scripsisse mentiti sunt.* Certò igitur non constat, Evangelia Matthæi, Marci, Lucæ, & Joannis esse sincera, & ab illis exarata, quorum sunt nominibus inscripta.

Respondeo: certò certius esse, quatuor Evangelia Matthæi videlicet, Marci, Lucæ, & Joannis mentita, & adulterina non esse, sed genuina & sincera. Primò, quia Ecclesia Catholica toto Orbe diffusa, cui ex officio incumbit vera Evangelia à spuriis secernere, hæc quatuor Evangelia pro veris, sinceris, & indubitatis semper habuit, eaque, omni adhibita diligentia, facta rectaque jugiter conservavit; alia verò Evangelia, quæ Apostolorum nominibus insignita olim circumferebantur, ad apocryphorum classem ablegavit. Ad Ecclesiam autem spectat non tantum emergentes Scripturæ Sacræ dirimere controversias, sed etiam ex traditione, quæ Scripturarum vindex est, libros sacros genuinos & veros, à falsis, dubiis, & spuriis indeficienti criterio secernere: *Evangelio non crederem, inquit Augustinus, nisi Ecclesiæ me moveret auctoritas.* Cum igitur Ecclesia Catholica rejectis aliis pseudo-Evangeliis, quæ hæretici sub speciosis Apostolorum nominibus cuderant, hæc quatuor dumtaxat Evangelia infallibili suo judicio vera & sincera esse pronuntiaverit, nullum planè viro prudenti de eorum veritate, atque integritate potest suboriri dubium, alioquin *si Ecclesiam non audierit, sit tibi sicut Ethnicus, & Publicanus,* inquit Christus Dominus Matth. cap. 18. Secundò, continua omnium sæculorum series, quæ quatuor illis Evangelis ab ipso nascentis Ecclesiæ exordio sacram ac divinam asserit auctoritatem, Sole clariùs ostendit ea esse genuina, & ab illis scripta, quorum referunt nomina, sicut *Sanctus Augustinus lib. 33. contra Faustum cap. 6. solidè demonstrat his verbis: Platonis, Aristotelis, Ciceronis, Varroni, aliorumque ejusmodi Auctorum libros, undè noverunt homines, quod ipsorum sint, nisi eadem temporum sibimet succedentium contestatio*

ne continua? Multi multa de litteris Ecclesiasticis conscripserunt, non quidem auctoritate canonica, sed aliquo adjuvandi studio, siue discendi. Unde constat quid cuius sit, nisi quia his temporibus, quibus ea quisque scripsit, quibus potuit, insinnavit, atque edidit, & inde ad alios atque alios continuata notitia, latinisque firmata ad posteros, etiam usque ad nostra tempora pervenerunt, ita ut interrogati cuiusque liber sit, non hystemus quid respondere debeamus? que cum ita sint, quis tandem tanto furore cecatur, nisi demoniorum mendaciloquorum malicia, atque fallacia, consentiendo submersus sit, qui dicat, hoc mereri non potuisse Apostolorum Ecclesiam, tam fidam, tam numerosam fratrum concordiam, ut eorum scripta fideliter ad posteros trajicerent, cum eorum cathedras usque ad presentes Episcopos certissima successione servarint, cum hoc qualiumcumque hominum scriptis, siue extra Ecclesiam, siue in ipsa Ecclesia, tanta facilitate proveniat.

DICO ULTIMO: Epistolam Abgari, Regis Edessenorum, ad Christum, & Epistolam Christi ad eundem Abgarum, esse Epistolas supposititias, & apocryphas.

Antequam momenta, quibus nostra probatur Assertio, producam in medium, non pigebit geminas Abgari, Regis Edesse, quæ pars est Syrix Superioris, & Christi Domini Epistolas hic inferere, ut Lector facilius percipere possit, ejusmodi Epistolas spurias planè & commentitias esse. Supplicem Abgari, Regis, ad Christum Epistolam, ex Edessenæ Civitatis Tabulario erutam, atque è Syriaco exemplo Græcè à se redditam, exhibet Eusebius, Episcopus Cæsariensis, lib. 1. Hist. Eccles. cap. 13. quæ quidem Latine sic habet ex Versione Christophorsoni.

Abgarus Princeps Edesse, Jesu Servatori propitio, qui in confinibus Hierusalem in carne apparuit, salutem.

Insignes illas virtutes, & curationes, quæ abs te siue medicamentis, & sine herbis factæ sunt, auditione accepi. Cacos enim, ut fama est, videre efficis, claudos ambulare, leprosos mundas, spiritus immundos, & Demones ejicis; eos etiam, qui diuturnis morbis pressi sunt, sanas; mortuos denique ad vitam revocas. Quæ quidem, cum de te audivissem, de duobus hisce verum esse cogitabam: te aut Deum esse, & è Cali fastigio delapsam, aut Dei Filium saltem, qui ista tam stupenda edas miracula. Quapropter, hæc ad te scripsi magnopere precatus, ut laborem ad me accedendi suscipere, huncque, quo crucior, morbum curare non graveris. Etenim audio, Judæos tibi obstrepere malevolè, & velle libenter te aliquo magno malo afficere. Est mihi Civitas perexigua quidem, sed ornata sanè & illustris, quæ utrique nostrum rerum necessariarum suppeditabit satis.

Rescriptum Jesu Christi ad hanc Abgari, Regis, Epistolam, ex eodem Tabulario ab Eusebio erutum, sic latine à Christophorsono redditur:

Abgare, beatus es, qui, cum non videris me, in me tamen credidisti. De me enim scriptis produrum est, eos, qui me viderunt, in me non credere.

ut hi, qui me non viderunt, credant, & vitam consequantur. Quod scribis ad me, te velle, ut ad te veniam: eas res, quarum gratia sum missus, debeo hic necessariò obire; quas cum plenè perfecero, ad eum recipi, qui me misit. Quò simul ac assumptus fuero, aliquem ex Discipulis meis mittam ad te, qui morbo, quo tantoperè torqueris, faciat medicinam, & vitam tibi, tuisque impertiat.

Geminas istas Epistolas, seu *Abgari*, Regis Edessenæ, ad Christum Dominum, & vicissim Christi ad eundem Regem *Abgarum*, ut spurias ac supposititias esse evincant multi hujus temporis periti Critici, argumentum desumunt ex annorum Nota, quæ huic præfigitur Historiæ ex Edessenorum Tabulis descriptæ, in qua sit mentio de utraque Epistola, & de Legatione *Abgari*, Regis Edessenorum, ad Christum. *Eusebius* quippè lib. I. Histor. Ecclesiast. cap. 13. scribit: Thaddæum, unum è septuaginta Discipulis, post Ascensionem Christi Domini fuisse ad *Abgarum*, Regem Edessenorum, missum anno trecentesimo quadragesimo *Æræ Edessenorum*, sic enim, teste doctissimo *Henrico Valesio* in suis Notis in Histor. Ecclesiast. *Eusebii*, legitur in antiquis, & sinceris manuscriptis *Eusebii*, non verò anno quadragesimo tertio, ut habetur in vitiosis, & interpolatis quibusdam vulgaribus *Eusebii* editionibus, quibus deceptus est *Baronius*. Hac autem semel suppositâ Notâ Chronologicâ, quæ huic præfigitur Historiæ de Legatione *Abgari*, Regis Edessenorum, ad Christum, sic argumentum conficiunt moderni illi Critici, annus trecentissimus quadragesimus *Æræ Edessenorum* concurrat, ut fatentur omnes Chronologi, cum anno primo Olympiadis ducentessimæ secundæ, seu cum anno decimo quinto Imperii Tiberii ab obitu Augusti, & cum anno vigesimo nono *Æræ* vulgaris, quo anno *Joannes Baptista* ministerium suum obire cæpit, sicut scribit *Sanctus Lucas* cap. 3. Atqui anno decimo quinto Tiberii Imperii ab obitu Augusti Christum fama ubique non loquebatur, siquidem hoc anno ad Baptismum, necdùm accesserat, nec miraculis inclaruerat; non potuit ergo *Abgarus*, Rex Edessenorum, ad Christum hoc anno scribere illam epistolam, in qua ait, se notitiam habere illorum miraculorum, quæ in tota Judæa patrabat Christus Dominus, & persecutionum, quas in ipsum Judæi commovebant. Ex ea itaque notâ Chronologicâ colligunt moderni illi Critici, supposititiam esse Epistolam *Abgari*, Regis Edessenorum, ad Christum.

Verùm, ut ingenuè fatear, hoc argumentum, ex ea Nota Chronologica petitum, nihil apud me ponderis habet, immò exiti uno, Christum anno trecentesimo quadragesimo *Æræ Edessenorum* non solum inclaruisse miraculis, sed etiam illum hoc anno in Cruce passum ac mortuum fuisse. Enim verò, Cardinalis *Norisus*, Chronologorum hujus temporis facile Princeps, in libro, quem edidit de anno & Epochis Syro-Macedonum, multis argumentis contra *P. Harduinum*, Soc. J. Scriptorem, evincit, *Æram Edessenorum*, non secus ac *Æram Seleucidarum*, initium, ha-

habuisse anno primo Olymp. centesimę decimę septimę , Urbis Romę conditę quadragesimo quadragesimo secundo , ante Æram vulgarem trecentesimo duodecimo, ex quo, facta accuratâ annorum supputatione, palam sequitur, annum trecentessimum quadragesimum Ærę Edessenorum concurrere cum anno primo Olympiadis ducentesimę secundę , seu cum anno decimo quinto Imperii Tiberii ab obitu Augusti , & cum anno vigesimo nono Ærę vulgaris , qui duobus Geminis Consulibus est insignitus, in quem annum incidisse mortem Christi, in Dissertatione decima quinta , juxta veterum Sanctorum Patrum doctrinam, plenissimę commonstrabo . Falluntur ergo moderni illi Critici, dum putant , Christum anno trecentesimo quadragesimo Ærę Edessenorum, necdum inclaruisse miraculis, nec ad Baptismum accessisse ; falluntur, inquam , quia Christus hoc anno non solum in ore famę , omniumque gentium commendatione versabatur , sed etiam eodem anno mortuus est . Potuisset autem Abgarus Rex Edessenorum , jam ad se perlata fama Christi ex tot, tantisque collectâ miraculis, ad eum, paulo antequam in Crucem ageretur, epistolam scribere . Quod spectat auctoritatem, *Sancti Luca*, referentis exordium ministerii Joannis ad annum decimum quintum Imperii Tiberii, videnda sunt , quę diximus in Dissertatione decima, in qua huic difficultati abundę fecimus satis . Miso itaque illo argumento, quod ex hac nota Chronologica desumunt periti hujus ætatis Critici, nunc brevier aliis momentis probandum suscipio, utrumque epistolam videlicet Abgari ad Christum , & vicissim Christi ad Abgarum, esse spuriam, ac supposititiam .

Primo , quia utriusque Epistolę, illiusque tam honorificę Christo legationis, à Rege Edessenorum decretę , ne levissima quidem apud Sacros Evangelistas, Sanctos Patres , & Scriptores Ecclesiasticos, Eusebii ævo superiores, habetur mentio , quamvis in epistola Abgari ad Christum extet luculentissimum de ipsius Divinitate testimonium, sic enim scriptum legimus : *Quę quidem cum de te audivissem , de duobus hisce alterum verum esse cogitabam, te, aut Deum esse, & è calig. stigio delapsum, aut Dei Filium , qui tam stupenda edas miracula.* Credibile autem non est, sacros Evangelistas, qui dicta gesta que Christi fideliter referunt, hanc perhonorificam ad Christum legationem silentio prætermittere voluisse, nec etiam verosimile est, Sanctos Patres, qui ad probandam contra Arianos Christi divinitatem immensa non minus mole , quàm eruditione volumina ediderunt , & Concilia generalia Nicœnum, & Sardicense, quę ad profigandos illos hæreticos fuere cōacta , tam disertum de Divinitate Christi testimonium , quod ad Arianorum ora obstruenda satis superque sufficere potuisset , alto itidem silentio obruere voluisse . Cum igitur nec sacri Evangelistę illius legationis ad Christum meminerint, nec Sancti Patres disputantes contra Arianos , nec Concilia ad præfocandam eorum hæresim indicta , ejusmodi de Divinitate Christi testimonium

nium unquam laudant; perspicuum est, hanc Epistolam Abgari ad Christum non germanam, sed apocrypham esse.

Secundò: in epistola, quæ Christo ad Abgarum tribuitur, citantur verba deprompta è Ioannis Evangelio, quod tamen nonnisi post plures annos ab obitu Christi conditum est: *Abgare*, inquit in ea epistola Christus, *beatus es, qui cum non videris me, in me credidisti. De me enim scriptis proditum est, eos, qui me viderunt, in me non credere: ut hi, qui me non viderunt, credant, & vitam consequantur.* Quis autem, amabo, non videt, Auctorem illius epistolæ alludere voluisse ad hæc verba, quæ leguntur *Joannis* cap. 10. *Beati, qui non viderunt, & crediderunt.* Unde quilibet in Critices disciplina tantisper exercitatus facili negotio colligere potest, hanc epistolam à Christo Domino non fuisse exaratam.

Tertiò, in eadem epistola, quæ Christo tribuitur, legimus, Christum post honorificam illam legationem, & cognitam Abgari, Regis Edessenorum, fidem, simulque gravem, quæ laborabat, ægritudinem, distulisse beneficium postulatae salutis post suum in Cælos ascensum. Porro credibile non est, Christum, qui tot beneficiis erat in omnes liberalis, qui solo Imperio morbos omnes sanabat, & ad miserorum preces nunquam non respondebat, distulisse usque ad ascensum suum sanitatem illius Regis, qui tam benignè colloquia ejus amlebat, ærariumque suum, ac potentiam unà cum ipso partiri peroptabat, ac dumtaxat post Christi in Cælos ascensum missum fuisse Thaddæum, qui fidem Christi liberaret, & pertinacem Regis Edessenorum morbum dispelleret, & sanaret. Hic profectò agendi modus non solum potentia Christi, sed ejus etiam prudentiæ & charitati contrarius esse videtur.

Quartò, historia ex Edessenis Tabulis descripta, quæ utramque memorat epistolam, narrat benè multa de professione Thaddæi, de illius ad Edessam appulsu, de illius prædicatione, & colloquiis cum Rege, quæ non sibi cohærent, sed fabulis accenseri debent, sicut fatentur eruditi hujus temporis Critici, potissimum noster *Natalis Alexandre* Tom. 1. Hist. Eccles. & *Elias du Pin* Tom. 1. Bibliothecæ Script. Ecclesiasticorum, quos Lector consulere potest.

Quintò, si hæc epistola Christi ad Abgarum genuina esset, eam in Canone receperet Ecclesia, ac divinam ipsi vindicasset autoritatem. Ecclesia autem hanc epistolam, Christi nomine insignitam, nunquam in Sac. Canone reposit, nec ei Divinam asseruit autoritatem.

Sextò, Sancti Patres, præsertim *Augustinus* & *Thomas*, disertè docent, sicut supra ostensum est, Christum Dominum nihil omnino litteris mandasse, quod sanè non docuissent illi Patres in traditione & antiquitate Ecclesiæ veratissimi, si hanc epistolam Christi ad Abgarum ut germanum illius factum agnovissent.

Septimò denique, utramque epistolam apocrypham esse declaravit *Gelasius* Papa in Concilio LXX. Episcoporum Romæ habito anno Christi

Christi 494. ut videre est apud *Gratianum* Distinct. 15. Canone *Sancta Romana Ecclesia*, ibi quippè hæc verba leguntur: *Epistola Iesus ad Abgarum Regem Apochrypha. Epistola Abgari ad Iesum Apochrypha*. Constat itaque ex hoc iudicio Romani Pontificis, qui accuratissimo Criterio libros falsos, dubios, & spurios secrevit à veris, certis, & genuinis, utramque epistolam, videlicet Abgari, Regis Edessenorum, ad Christum, & vicissim Christi ad Abgarum, supposititiam esse & apochrypham.

DICES PRIMò: Non convenit inter peritos huius temporis Criticos, illud Decretum, quod legitur apud *Gratianum* Distinct. 15. Canone *Sancta Romana Ecclesia*, fuisse editum à *Gelasio*, Romano Pontifice. *Guillelmus Cave* in Historia sua litteraria Tom. 1. pag. 265. asserit, illud Decretum, quod circumfertur sub nomine *Gelasii* Papæ, fictum & supposititium esse, ac ejusdem farinae cum epistolis primorum Pontificum à *Clemente* Papa usque ad *Siricium*, ex ejusdem insignis impostoris *Isidori* mercatoris officina prodierit; in quam sententiam ire videtur *Ernestus Grubius* in Notis ad Spicilegium Patrum, & Hæreticorum primi sæculi pag. 319. Ex eo igitur Decreto, quod falsò tribuitur *Gelasio* Papæ, probari non potest, epistolas Abgari ad Christum, & Christi ad Abgarum, esse apocryphas & supposititias.

Respondeo: *Guillelmi Cave*, & similium intemperantioris Critices virorum, de Decreto *Gelasii* Papæ, dubitantium, judicia flocci fieri debere, maxime cum illud Decretum à *Gelasio* Papa conditum fuisse uno ore fateantur omnes viri eruditi. Certè negari non potest, hoc Decretum sub *Gelasii* nomine passim sæculo nono fuisse laudatum. Nam eidem Pontifici disertissimè illud Decretum adjudicarunt *Hincmarus*, Remensis Archiepiscopus, in Tomo 2. suorum Operum pag. 474. *Nicolaus primus* in epistola 42. quæ est ad Episcopos Gallie in Concilio 7. Romano apud *Labbeum* Tomo 8. *Lupus* item, Ferrariensis Abbas, in Epist. 28. ad *Carolus Calvum*, & in fine libelli de tribus quæstionibus. Idem censent *Baronius* ad annum Christi 494. *Philippus Labbeus*, & *Gabriel Cossartius* Tomo 4. Conciliorum Col. 1260. ubi laudant vetustissimum Codicem suum MS. & alium *Christophori Iustelli* Col. 1361. clarissimus etiam *Pagius*, Annalium Ecclesie eximius illustrator, postquam ad annum Christi 494. hoc Decretum *Gelasio* Papæ vindicavit, eruditè observat, *Hormisdam*, Papam, ut petitioni *Possefforis*, Episcopi Africæ, faceret satis, tam ad eum, quam ad Legatos suos, Decretum *Gelasii* decessoris sui misisse, ut illud ab omnibus religiose observaretur, tuncque illud Decretum in varia exemplaria per *Fausti*, Episcopi Rejenensis, adversarios transcriptum, latius per Europam, Africam, & Orientem fuisse disseminatum, & quia ab *Hormisdæ* Papa fuerat missum, ejusque nomine vulgatum, eidem *Hormisdæ* Papæ progressu temporis fuisse à nonnullis sciolis imprudenter adscriptum. Hinc falsam illius Decreti inscriptionis sub nomine *Hormisdæ*, Papæ, originem prodierit ætumat clarissimus *Pagius*.
His

His jam citatis Auctoribus, qui prædictum Decretum *Gelasio* Papæ adjudicant, addi meritò debet *Petrus Franciscus Chiffletius*, qui aliquandò cum dubitasset, num verè hoc Decretum *Gelasio*, Papæ, esset adscribendum, re tamen deindè maturiùs examinatà, ultrò falsus est in Notis ad *Vigilium Tapensem* pag. 157. se mutasse sententiam, postquam antiquos legisset Codices, in quibus hoc Decretum editum notatur à *Gelasio*, Papa, in Synodo Romana LXX. Episcoporum, *Asterio*, & *Præsidio* Consulibus, qui est annus Christi 494. *Gelasii*, Papæ, tertius, ante *Hormisdæ* Pontificatus initium vigesimus. Ex his ergò, & aliis id genus momentis, quibus brevitatis causà supersedeo, refellitur præpostera *Guillelmi Cave*, & aliorum de Decreto *Gelasii* Papæ dubitatio.

DICES SECUNDÒ: *Eusebius Casariensis*, antiquissimorum monumentorum venator diligentissimus, lib. 1. Hist. Eccles. cap. 13. & *S. Ephrem*, Syrus, & Ecclesiæ Edessenæ Diaconus, in suo Testamento, has epistolas Abgari ad Christum, & Christi ad Abgarum tanquam sincereas & genuinas agnoscunt, quibus assentiuntur multi Patres, & Scriptores Ecclesiastici, non debent ergò prædictæ Epistolæ rejici tanquam apocryphæ & supposititiæ.

Respondeo: quòd, licèt non negem, admirandam fuisse *Eusebii Casariensis* in concinnanda Historia Ecclesiastica diligentiam, magnum laborem, variam & penè incredibilem lectionem, ac grave prorsus in lectionis varietate iudicium; facilè tamen mihi persuadeo, illum, in hoc facto Historico de Epistolis Abgari ad Christum, & Christi ad Abgarum, fuisse deceptum, eò quòd non satis expenderit, justique ponderibus libravit illas Epistolas, quæ ex Tabulis Edessenæ Ecclesiæ descriptæ ad eum missæ fuerant. In his siquidem Ecclesiarum describendis & referendis monumentis Historicum in errorem aliquandò labi posse nemo prudens inficias iverit. Addo etiam, *Gelasium*, Papam, in suo mox memorato Decreto Historiam Ecclesiasticam ab *Eusebio Casariensi* adornatam inter Opera apocrypha recensere, non quòd voluerit sagacissimus ille Pontifex omnem omnino Historiæ Ecclesiasticæ *Eusebii* fidem detrahere, sed quòd *Eusebius* in sua Historia Ecclesiastica quædam facta narret, quæ interdum veritati Historiæ parùm consentanea esse videntur, quod etiam lubenter fatentur cordati hujus temporis Critici. Nec enim credere debemus, ut optimè ait noster *Melchior Canus* lib. 11. de locis Theol. cap. 6. omnia, quæ magni Auctores scripserint, undique esse perfecta. Nam & labuntur aliquandò, & oneri cedunt, & inserviunt ingeniorum suorum voluptati, vulgoque interdum etiam indulgent, nec semper intendunt animum, & non nunquam fatigantur, adeò ut *Ciceroni* *Demosthenes* Dormitare, *Horatio* verò *Homerus* quandòque videatur. Summi enim sunt homines, homines tamen. Non igitur mirum, si *Eusebius*, vir alioquin omnigenâ litteraturâ præditus, & extrâ omnem ingenii aleam positus, suos habuerit navos, cum nihil sit ex omni parte bea-
tum =

tum, nec aliquod opus humanum, tam felix, cui non sint suæ additæ pestes. *Eusebio* autem in hoc factio Historico nullam fidem conciliare potest auctoritas *Sancti Ephremi Syri*, quippè qui cùm Syrus esset, & Ecclesiæ Edessenzæ Diaconus, facile adduci potuit, ut crederet has Epistolæ genuinas esse, quas ad commendationem gentis & Ecclesiæ suæ plurimum juvare, & conducere posse intelligebat. Denique, ab aliis Scriptoribus, qui *Eusebio* fuere posteriores, in hoc factio historico discedere nobis religio esse non debet, quia in hac factio narratione non accuratos, sed potiùs negligentes se se præbuerunt, ac subindè illis annumerari debent, qui, ut ait *Seneca* lib. 7. Natural. Quæst. cap. 16. *Incredibilium relatu commendationem parant, & Lectorem aliud acturum, si per quotidiana duceretur, miraculo excitant; quidam creduli, quidam negligentes sunt: quibusdam etiam mendacium obrepit, &c.* Unum omnibus illis Scriptoribus opponimus iudicium *Gelasii Papæ*, qui tam Sacrorum, quàm Ecclesiasticorum Librorum examen ad severioris Criticæ normam exegit in Decreto à se edito, quod probatur omnibus fermè hujus temporis Criticæ disciplinæ peritis, quibus inest veritatis amor cum eruditione conjunctus.

Advertat Lector in fine hujus Dissertationis, Christum Dominum, quò faciliùs doctrina, quæ totum Orbem innovare debebat, omnibus gentibus ab Apostolis annunciari posset, voluisse ut tempore adventus sui totus Orbis esset in pace compositus, & omnes homines sub uno terrarum viverent Imperio. Et verè, inquit *S. Ambrosius* Enarratione in Psalmum 45. *Antequàm Romanum diffunderetur Imperium, non solum singularum Urbium Reges adversum se præliabantur, sed etiam Romani Bellis frequentèr civilibus adterebantur. Pugnavit Marius adversus Cinnam, in utraque parte Romanus fusus est sanguis. Sylla insurrexit, & Mario Victori rursus civilia bella commovit. Lepidus, Sertoriusque rebelles se Romano Imperio præbuerunt. Caesar Pompejum est persecutus, & Galliarum furorem excitavit adversus arma Romana. Devicto Seniore Pompejo, Juniores in Hispaniarum partibus debellavit. Quid Triumviros loquar ex hostibus amicos, ex amicis rursus in hostiles tumultus esse progressos: Maria quoque Asiatico bello infecta sanguine Romanorum? unde factum est, ut tædio bellorum civilium, Julio Augusto Romanum deferretur Imperium; & ita prælia intestina sedata sunt. Hoc autem ed profecit, ut rectè per totum Orbem Apostoli mitterentur, dicente Domino Jesu: Euntes docete omnes gentes. Illis quidem interclusa barbaricis montibus regna patuerunt, ut Thome India, Mattheo Persia. Sed tamen quò plura obirent spatia terrarum, in exortu Ecclesiæ potestatem Romani Imperii toto Orbe diffudit, & dissidentium mentes, terrarumque divorcia donata pace composuit. Didicerunt omnes homines sub uno terrarum Imperio viventes, unius Dei Omnipotentis Imperium fideli eloquio confiteri.*

Quandò plurima nox mentibus incubat,
Hi plenum revehunt diem.

Firmant instabiles, & dubios regunt,
Monstrant tuta procul litora naufragis:
Nobis, qui vehimur cæca per æquora,
Lucent perpetuæ faces.

Quæ dixere tuis consona vocibus,
Nostris illa, Deus, cordibus imprimas;
Quos terris colimus, quos sequimur Duces;
Fac nos moribus assequi.

Sit suprema tibi gloria, Veritas,
Quæ per Scripta Patrum quando foris sonas; * * *Si quandò velis*
Nullo vocis egens, corda doces, sono, *Deus.*
Et te mentibus inferis.

ALTER HYMNUS

In laudem Ecclesiæ Doctorum:

VOs succensa Deo splendida lumina:
Vos Sal, nos homines, quo sapimus Deum;
Ævum, puri animo, moribus integri,
Quo condimur in alterum.

Per vos Relligio, tutaque Veritas;
Per vos Virgineis fulget honoribus:
Per vos Christus amat pandere divites
Thesaurus sapientiæ.

Vestris unda fuit purâ canalibus;
Christi floret ager; munda nitet seges:
Lac aptum pueris, & solidum viris
Cauti sufficitis cibum.

Hi sunt, Summe Deus, qui tibi militant;
Hi sunt, qui stabiles ædificant domos:
Unæ docta cohors arma tenet manu,
Muros construit alterâ.

Vicistis Stygias vos quibus hærefes

Hæc nos accipimus tela superstites;

His pugnamus adhuc, nec dubio exitu

His armis quoque vincimus.

ALTER HYMNUS

*In laudem Evangelistarum, qui doctrinam &
Historiam Jesu Christi litteris
mandarunt.*

Christi perennes Nuntii.
Reteſta qui Cæleſtibus
Scriptis Dei Myſteria
Totum per Orbem ſpargit is

Olim ſub umbris condita,
Vates Sacri, quæ viderant,
Umbris procul cedentibus,
Vidiſtis hæc pleno die.

Humana quæ tulit Deus,
Divina quæ geſſit homo,
Seris legenda poſteris,
Diſtante ſcripſiſtis Deo.

Loco remotos, tempore,
Vos rexit idem Spiritus,
Et quiſque, pro ductu Dei,
Scribendo Chriſtum reddidit.

Nos ut doceret, induit
Vocis ſonos, Verbum Patris:
Veſtris adhuc in paginis
Nobis loqui non deſinit.

Sinæ ſub alto vertice,
Cælo tonante, Lex data;
Inter tubas & fulgura
Præſens minabatur Deus.

Nunc

Nunc, temperato Numine,
 Per vela carnis blandiâs
 Amat videri, languidis
 Se lumen aptans sensibus.

Insculpta saxo Lex vetus
 Præcepta, non vires dabât: *
 Inscripta cordi Lex nova,
 Quidquid jubet, dat exequi. *

* *Idest, ex se, sed dabat ex
 Fide & ex meritis in Je-
 sum Christum venturum.*

* *Idest, vel sufficienter, vel
 efficaciter.*

Scripsistis hanc fidâ manu,
 Hanc manu, voci consonis
 Hanc prædicastis moribus,
 Signastis hanc & sanguine.

Assilante divo Spiritu,
 Quæ verba vitæ traditis;
 Hæc ille nostris imprimat
 Delenda numquam cordibus.



DISSERTATIO DECIMAQUARTA

De Miraculis à Christo Domino editis .

Sanctus Thomas 3. part. quæst. 43. differit de Miraculis Christi in genere, & in sequenti quæstione de singulis speciebus miraculorum Christi. Ipse verò in duobus paragraphis compendiosè quoad ejus fieri poterit, complectar ea, quæ in his duabus quæstionibus docet *Angelicus Præceptor*. In primo paragrapho agam de Miraculis Christi in genere. In altero, de Transfiguratione, & de variis speciebus Miraculorum Christi.

PARAGRAPHUS PRIMUS

De Miraculis Christi in genere .

Circà Miracula Christi in genere tres moveri possunt difficultates, quas hic enucleandas suscipio. Primò, an Christus vera ediderit Miracula? Secundò, an ea divinà virtute patravit? Tertiò, an per ea, quæ Christus edidit Miracula, suam sufficientè Divinitatem comprobavit? ad quarum difficultatum pleniorè dilucidationem.

DICO PRIMÒ. Nulla ratione negari posse Christum Dominum vera edidisse Miracula.

Antequàm probetur hæc assertio, juvat in antecessum observare, triplici potissimùm de causâ conveniens fuisse, ut Christus ederet Miracula. Primò, quia Christus adimplere debebat oracula Prophetarum, qui prædixerunt, Messiam Miracula editurum, sic enim *Isaias* cap. 35. de Media vaticinatur: *Deus ipse veniet, & salvabit vos: tunc aperientur oculi cæcorum, & aures surdorum patebunt, tunc saliet sicut cæcus claudus, & aperta erit lingua mutorum.* Quod quidem *Isaie* vaticinium in se fuisse impletum ostendit Christus *Matth.* cap. 11. dicens discipulis *Joannis: Euntes renunciate Joanni, quæ audistis, & vidistis, cæci vident, claudi ambulant, leprosi mundantur, surdi audiunt, mortui resurgunt, pauperes Evangelizantur.* Secundò, oportebat ut Christus veritatem doctrinæ, quam prædicabat, Miraculis, tanquàm proprio Divinitatis sigillo, mudiret, palàmque omnibus fieret, Deum esse in eo per gratiam, non quidem adoptionis, sed unionis. In hanc rem dicebat ipse Christus *Joannis* cap. 5. *Opera, quæ dedit mihi Pater ut faciam, ipsa sunt, quæ testimonium perhibent de me.* Et *Joannis* cap. 10. *Si mihi non vultis credere, operibus credite.* Denique, Christus Miracula patrare debuit ut Judæi, qui præ cordis duritia credere nolebant his quæ arcanis & Divinis suis

suis litteris continebantur, saltèm per Miracula converterentur, vel si duriores saxis converti nollent, nullam haberent excusationem de peccato suo, hoc est, de peccato incredulitatis, *Si opera non fecissem in eis, quæ nemo alius fecit, peccatum non haberent*, inquit Christus Joannis cap. 15. Quasi diceret: si in conspectu Judæorum miracula non edidissem, quæ nemo alius homo edidit, tanta, tam multa, tam frequentia ad probationem missionis, ac divinitatis meæ, extra culpam fuissent non credendo me esse Christum, & verum Dei filium: *Nunc autem & viderunt, & oderunt me & Patrem meum*, idest, nunc autem, cùm miracula illa viderint, nullam causari possunt ignorantiam, quâ suæ incredulitatis peccatum excusent, sed odii in me ac Patrem meum convincuntur. Hæc præmissa observatione.

Probatum variis argumentis vera miracula à Christo Domino parata fuisse. Primò, ex Sacris Evangelistis, qui passim referunt, Christum Dominum, quæcumque iter faceret, ægros ac debiles, & omni morborum genere laborantes, uno verbo, unoque momento reddidisse, incolumes, adeò ut illi, qui omnibus membris capti erant, receptis actutùm viribus roborati, lectulos suos ipsi asportarent, in quibus fuerant paulò ante delati, claudis verò, ac pedum vitio afflicti, non modò gradiendi, sed etiam currendi dedisse facultatem, cæcorum oculos in pristinum restituisse aspectum, mutorum linguas in eloquium, ac sermonem solvisse, surdorum patefactis auribus insinuasse auditum, pollutos, aspersosque maculis repurgasse, mortuos velut è somno solutos ad vitam revocasse, tantamque in eo fuisse potestatem ut imperio suo cogeret ventos obsequi, maria servire, mortem cedere, inferos obedire. Secundò, ad rationem veri, & propriæ dicti miraculi quatuor potissimum requiruntur conditiones, in primis necesse est, ut sit opus creaturæ naturæ vires excedens. Deindè, ut effectus ejus pateat & sub sensum cadat, sicut mortuorum suscitatio. Tertiò, ut fiat in instanti, vel saltem celerius quàm per naturæ vires fieri potest. Quartò, ut talis mutatio fiat, quæ sit omni ex parte perfecta; has autem quatuor conditiones habuerunt Miracula Christi, ut patet in suscitatione Lazari; & in aliis hujusmodi prodigiis, quæ à Sacris Evangelistis referuntur, vera igitur fuerunt Miracula Christi. Tertiò, tanta fuit Miraculorum Christi evidentia, tanta magnitudo & multitudo, tanta excellentia & certitudo, ut, cùm Judæi ea inficiari non possent, magicis artibus à Christo Domino fieri calumniarentur, quam quidem Judæorum atrocem calumniam modò retundemus. Quartò, *Iosephus* inter Judæos magni nominis, & probatissimæ fidei Scriptor, lib. 18. Antiq. cap. 4. disertis verbis asserit, Christum mirabilem operum fuisse editorem: *Fuit, inquit, hoc tempore, Iesus vir sapiens: si tamen virum illum oportet dicere. Erat enim mirabilem operum effector, magister hominum, qui vera libenter amplèctuntur. Et plurimos quidem ex Judæis, plurimos etiam ex gentibus ad se-*
per-

pertraxit. Hic erat Christus: cùmque eum à primoribus gentis suæ accusatum Pilatus ad Crucem damnaſſet, ab eo diligendo non abſtiterunt, qui primam exeperant. Nam poſt tertium diem rediivus iſis apparuit: cùm dicini vates hæc aliæque quàm plurima admiranda de eo prædiſſent. Neque ad hanc diem deſicit denominatum ab eo Chriſtianorum genus. Ex quo teſtimonio, ab homine Judæo, magnique ponderis profeſſo, liquet Chriſtum vera Miracula edidiſſe. Si enim Iosephus Chriſtianus fuiſſet, ait S. Chryſoſtomus Homilia 5. in Acta Apoſtolorum: Eſſet fortæſſis ſermo ſuſpectus. Quia autem Judæus, & emulatoꝝ, qui poſt Evangelium floruit, quomodò non omnibus manifeſta ſunt quæ facta? Nec audiendi ſunt quidam intemperantioris Criticæ viri, qui hoc præclarum Joſephi de Chriſto teſtimonium in dubium præpoſtere vocant, illudque à priſcis Chriſtianis Hiſtoriæ Joſephi fuiſſe pio dolo aſſutum audaciùs aſſeverant; quos inter iniquior fuit Tanaquillus Faber, qui huic luculentifſimo Joſephi teſtimonio litem movere non contentus, dedità opẽrã illuſd pecuniari Diatribã anno 1655. editã conſutare aggreſſus eſt, quam deindẽ in primam Epiſtolarum partem tranſtulit Num. 44. Non inquam, audiendi ſunt malè feriat illi Critici, tum quia omnes Joſephi Codices ſive editi, ſive manuſcripti, ſive Græci, ſive Latini, mirè conſentiunt in retinendo laudato de Chriſto teſtimonio. Cl. Bernardus Monſaucon Benedicinus Congr. S. Mauri cap. 2. Diarii Italici ſcribit, ſe viſiſſe in Bibliotheca Ambroſiana Mediolanenſi Joſephi Operum Tomum ſecundum incipientem à libro 11. Membranaceum, habentem Hiſtoriam Chriſti, ſicut habent Codices editi. Tùm quia etiam Scriptores Eccleſiaſtici illud Joſephi de Chriſto teſtimonium, tanquam legitimum & genuinum, exhibent, videlicet Eusebius in 3. libro Demonſtr. Evang. cap. 7. & lib. 1. Hiſt. Eccl. cap. 11. Hieronymus in libro de Scriptoribus Eccl. Iſidorus Pelenſiora lib. 4. Epiſt. 225. Sozomenus lib. 1. Hiſt. Eccl. cap. 1. Nicephorus Calliſtus lib. 1. Hiſt. Eccl. cap. 39. & alii antiqui, à quibus illibatum ad noſtra uſque tempora propagatum eſt hoc Joſephi de Chriſto teſtimonium, ut multis probant argumentis Valeſius in Notis in Eusebium, Illuſt. Huetius in Demonſtr. Evangelica, & Tilmontius Not. 40. in ruinam Judæorum Tom. 1. Hiſtoriæ Imperatorum. Quæ igitur temeritas exagitare velle hoc Joſephi de Chriſto teſtimonium, cujus ſinceritatem nemo veterum negavit, nemo ipſorum vocavit in controverſiam? Sed ex ipſa ſerie Hiſtoriæ Joſephi revincuntur illi Critici, nam, cùm Iosephus in ſua Hiſtoria mentionem faciat Ioannis Baptiſtæ, & Iacobi, fratris Jeſu, non eſt verosimile, hunc Hiſtoricum alto ſilentio prætermittere voluiſſe geta, & Miracula Chriſti Domini, cujus fama longè latèque percrebuerat, multique in tota Iudæa motus excitati ſunt occasione ipſius doctri-næ, & cujus etiã vel ipſi meminerunt ejuſdem temporis Scriptores Gentiles, Cornelius Tacitus, Suetonius, Plinius, & alii, quos citavi in Diſſertatione primã Proluſoria ad huncce Tractatum. Quòd ſi quærant illi

illi Critici, cur igitur Iosephus ad Fidem Christi non accesserit? confestim respondebo: quodd sicut Philosophi gentiles: *Cum cognovissent Deum, non sicut Deum glorificaverunt, aut gratias egerunt: sed evanuerunt in cogitationibus suis, & obscuratum est insipiens cor eorum*, ut ait Apostolus ad Rom. cap. 1. sic Iosephus, licet cognoverit, Christum esse verum Messiam Prophetarum oraculis prædictum; evanuit tamen in cogitationibus suis, & per turpissimam adulationem oracula, per id temporis de Messia totius Orbis moderatore jactata, Imperatori Vespasiano accommodavit, ut videre est, in libro 7. de Bello Judaico. Sed satis hætenus dictum sit de hoc Iosephi testimonio, cui, si pervicaces Iudæi fidem adhibere nolint, certè negare non poterunt, Ethnicos Imperatores, licet ferro flammæque sævirent in Christianos, Christi tamen in veris edendis miraculis potentiam, virtutem, ac divinitatem cognovisse, ac paulò post ejus obitum divinis illum honoribus afficere voluisse. *Tiberius* quippe, ut refert *Tertullianus* Apolog. cap. 5. *Annuntiata sibi ex Syriæ Palæstina, quæ veritatem ejus, seu Christi, divinitatis revelaverant, detulit ad Senatum cum prerogativa suffragii sui*. Idem testantur *Eusebius* libro 2. *Histor. Eccles.* cap. 2. & *Orosius* libro 7. cap. 4. *Adrianus* etiam Imp. teste *Ælio Lampridio*, de condendis Christo Templis cogitavit. *Alexander Severus* Imperator Christum inter Deos recipere, & Templo donare voluit, habuitque in larario suo Christi effigiem, quam matutinis horis venerabatur. *M. Aurelius* in Litteris, quas scripsit ad Senatum Romanum, testatur, quòd, cum Romanorum exercitus acerrimum prælium cum Quadis iniisset, & in tantas difficultates incurrissent milites, ut vehementissimâ siti vexarentur, & ob eas res pugnare haud posset, ad preces Christianorum, quorum magnus erat in exercitu numerus, Christum Deum suum invocantium, confestim in Romanos frigidissima aqua, in hostes verò imminentes grando ignea cecidit, & ad perpetuam tanti prodigii memoriam voluit Imperator, ut hæc Christianorum legio deinceps *fulminatrix* appellaretur. Denique, Imp. *Julianus*, apostata & Christi insensibilissimus hostis, fassus est, ut videre est apud *S. Cyrillum* lib. 6. *Christum sanasse claudos, & cæcos aliquos, & Demone correptos adhibitis obtestationibus liberasse in viculis Bethsaida & Bethania*. Impietas ergo Iudæorum, vera Miracula à Christo Domino edita esse negantium, refellitur non solum ex locupletissimo testimonio Iosephi, Historici magni apud illos nominis, sed etiam ex ipsa confessione Ethnicorum Imperatorum, qui Christianam religionem multis persecutionibus vexarunt, quibus adungere possum *Sarracenos*, & *Mahumetanos*, qui, sicut testatur noster *Raymundus Martini* in suo Pugione Fidei part. 2. cap. 8. non solum prodigiis à Christo editis fidem adhibent, sed & suo *Alcoran* cap. 2. cui titulus est, *de Familia Anram*, multa Christi attingunt miracula, quæ non ex Sacris Evangelistis, sed ex libris Apocryphis hausta sunt. Ob hanc potentissimam patrandi miracula

virtutem, Iesu Christi fama per totam Syriam longè latèque celebrari cœpit sicut *Matthæus cap. 4.* Evangelii testatur his verbis: *Circuibat Iesus totam Galilæam docens in Synagogis, & prædicans Evangelium Regni; & sanans omnem languorem, & omnem infirmitatem in populo. Et abiit opinio ejus in totam Syriam, & obtulerunt ei omnes malè habentes, variis languoribus, & tormentis comprehensos, & qui demonia habebant, & lunaticos, & paralyticos, & curavit eos.*

DICO SECUNDÒ: Christum divina virtute miracula edidisse.

Probatur primò ratione *Sancti Thomæ 3. p. q. 43. art. 2.* Vera miracula, sicut ex. gr. suscitatio mortuorum, solà virtute divina fieri possunt, solus quippè Deus naturæ ordinem immutare potest, atqui Christus quadriduanum Lazarum suscitavit, cæci nati oculos aperuit, aliaque ejusmodi miracula solo nutu, & imperio suo patravit, quibus ostendit, se divinà pollere virtute, verumque Dei filium esse à Deo Patre missum in Mundum, ut hominum salutem promoveret. Hæc divina potestas, ut observat *Sanctus Hieronymus* in cap. 21. *Matth.* tum maxime emicuit in Christo, quandò Mercatores è Templo ejecit: *Plerique arbitrantur, inquit S. ille Doctor, maximum esse Signorum, quod Lazarus suscitatus est, quod cæcus ex utero lumen accepit, quod ad Jordanem vox audita sit Patris, quod transfiguratus in monte gloriam ostenderit triumphantis, mihi inter omnia signa, quæ fecit, hoc videtur mirabilius esse, quod unus homo, & eo tempore contemptibilis, & in tantum vilis, ut posset crucifigeretur, Scribis, & Phariseis contra se sevientibus, et videntibus lucra sua destrui, potuerit ad unius flagelli verbera tantam ejicere multitudinem, mensasque subvertere, et cathedras confringere, et alia facere, quæ infinitus non fecisset exercitus. Igneum quiddam, ac sydereum radiabat ex oculis ejus, et divinitatis majestas lucebat in facie.*

Probatur secundò alià ratione, quam *Sanctus Thomas* lib. 1. contra Gentes deprompsit ex *Sancto Augustino*, si Christus divinà virtute miracula non edidit, quomodò igitur sine magno miraculo Christus pauperulus, juvenis, ex gente omnibus exosâ, videlicet Judaicâ, oriundus, persecutionem, & probrosam mortem passus, à suis, ab Herode, à Pilato habitus ut fatuus, dicens se esse Deum, promittens crucem, mortem, omniaque supplicia sectatoribus suis, potuit absque miraculis post mortem suam per pauperes Discipulos, piscatores, indoctos, omnibus invisos, morti traditos, Mundo erroribus implicito, & in tenebris idololatriæ immerso suam doctrinam persuadere, & religionem suam longè latèque propagare? Hoc certè unum instar omnium miraculum esse debet, quod sola virtus divina potuit operari.

Respondent primò Iudæi, Christum in Beelzebub, principe dæmoniorum, dæmones expulisse, eumque artes magicas edoctum aliquandò miracula edidisse.

Verùm, hæc responsio multis argumentis convellitur. Primò, quia
Chri-

Christus dæmones expellere non potuisset, nisi eos virtute divinâ vicisset. Hinc legimus in Scriptura Sacra, quod sæpè Christus dæmones ex obsessorum corporibus invitos ejecerit, eorum astutiam retuderit, eosque spiritualibus armis domitos, ac subactos silere, sibi que cedere cœgerit. Secundò, nulla Christo, & Satanæ tam in opere, quàm in effectu fuit convenientia, seu affinitas. Satanæ quippè dispergere cupiebat, quos Christus colligebat, *in hoc apparuit filius Dei, ut dissolveret opera diaboli*, inquit *Sanctus Ioannes cap. 3.* Tertiò, Christus sapius coram innumerâ Iudæorum turbâ mortuos ad vitam revocavit, mare calcavit, procellas sedavit, aquam in Cana Galilææ, præsentibus convivis, inspectantibus famulis, in generosum vinum convertit; & ex quinque panibus quinque hominum millia in deserto satiavit: Quæro igitur, quid hæc potuerit ars magica moliri, quæ nihil veri, ac solidi ostentare potest, & cujus peritia nihil aliud, quàm ad circumscribendos oculos vallet? Potuit ne Christus quinque hominum millibus, totique Iudæorum turbæ persuadere se videri, quod non viderant, & se manducasse, quod non manducaverant? Potuit ne Christus persuadere Architricino, aliisque convivis in nuptiis, factis in Cana Galilææ, aquam fuisse conversam in vinum, si reverà non fuisset conversa? Quartò, si Christus artium, magicarum ope miracula edidit, ut effutiunt Iudæi, quorsùm igitur magiæ non est accusatus in judicio? Cur nefandi illius criminis non est convictus à Scribis, & Phariseis, qui nihil aliudè intentatum reliquerunt, ut Christum Servatorem nostrum atro carbone notarent, ac diris calumniis lacerarent? Denique, si Christus magicâ arte miracula patravit, quomodò igitur illius Discipuli post ejus obitum per Provincias dispersi, & fundamenta Ecclesiæ ubique ponentes, potuerunt in nomine Magistri sui magna, & penè incredibilia edere miracula? Quomodò etiam illis miraculis fidem præbere potuit universus Orbis, exceptis obstinatis Iudæis, qui miraculis Christi credere nolentes, à Deo deserti sunt, & nunc variis calamitatibus oppressi, in perpetuum captivi terris suis sunt exterminati? Sed hæc sufficiunt ad repellendam calumniam Iudæorum, qui magicis artibus accepta referunt miracula Christi.

Respondent secundò Iudæi: Christum pronuntiando nomen Dei, quod in Templo Hierosolymitano erat descriptum, miracula edidisse. Narrant siquidem Iudæi, ut videre est apud nostrum *Raymundum Martini* parte 2. Pug. fid. cap. 8. temporibus *Helene* Reginæ, quam universæ terræ Israeliticæ præfuisse ajunt, extitisse in Templo Hierosolymitano lapidem, cui olim Arca imponebatur, in eoque lapide descriptum fuisse nomen Dei propriis elementis expressum, cujus ea vis erat, ut quicumque illud didicisset, & memoriæ mandasset, par esset omnibus eliciendis prodigiis. Cum ergò pertimescerent Sapientes, ne quis eâ facultate abuteretur, canes æreos portæ custodes apposuisse, qui hac arte erant fabricati, ut si quis, memoriæ mandato Dei nomine, è Templo

egredi vellet, magnis eorum territus latratibus sacri nominis è vestigio oblivisceretur. Contigit autem, inquit Judæi, ut Christus quâdam die in Templum ingressus sacrum Dei nomen in membrana describeret, eamque vulneri cruri suo facto inferuerit; sicque egressus è Templo, sacrum Dei nomen, quod propter canum latratibus ex ipsius memoria effluerat, iterum ope membranæ, quam extraxit è cruce, suo, didicerit, illudque pronuntiando miracula ediderit.

Sed quàm malè confarcinata sit hæc Judæorum fabula, quilibet, si vel minimâ sagacitate sit præditus, confestim intelligere potest. Nam primò, Judæi nullum hujusce narratiunculæ testem proferunt, immò nec illius aliquod extat vestigium apud *Josephum*, in antiquitatibus Judæorum versatissimum, & in his describendis, quæ in Templo Hierosolymitano reperiebantur, auctorem diligentissimum. Secundò, *Helena* illa, quâ regnante, Judæi id contigisse ferunt, fuit Adiabenorum Regina, non verò Judæorum, sicut optimè observat *Cl. Josephus de Voisin* in suis Annotationibus ad cap. 8. Pugionis fidei. Tertio, in putidissimum Anachronismum lapsi sunt hujus fabulæ auctores, *Helena* namque, Adiabenorum Regina, proselyta dumtaxat fuit, hoc est, Judæorum religionem amplexa est sub *Claudio* Imperatore, sicut testatur *Josephus* lib. 20. Antiq. cap. 2. Quo tempore Christus in vivis non erat, quippe qui passus est sub *Tiberio* Imperatore. Quartò, quis credat, canes æreos è arte fabricari potuisse, ut si quis, memoriæ mandato sacro Dei nomine, è Templo exire vellet, eorum latratibus territus, sacri illius nominis protinus oblivisceretur? Hoc sanè commentum dignum est Judæorum ingenio, quo nullum unquam in cudendis fabulis, & formandis chimæris fuit fecundius, ac feracius. Quintò, impossibile est, Deum, qui est suprema veritas, permisisse ut Christus nomen Dei proferendo vera, patraret miracula in confirmationem doctrinæ, quam prædicabat, si falsa fuisset, ut impie contendunt Judæi. Denique, si reverà Judæis fuisset olim persuasum, sacrum Dei nomen memoriæ semel mandatum, & ab aliquo prolatum, vim habere edendi miracula, procul omni dubio aliqui inter ipsos sese illo juvassent temporibus Imperatorum *Vespasiani*, & *Titi*, dedissentque operam, ne caperentur, occiderentur, & in varias regiones captivi abducerentur, ne Hierusalem, Templumque augustissimum flammis absumerentur. Facessat ergo hæc infusa fabula, ad elevandam veritatem miraculorum Christi à Judæis excogitata.

D I C O U L T I M O ; *Christum per miracula, quæ edidit, sufficienter suam divinitatem comprobasse.*

Probat. Solus Deus propriâ suâ virtute miracula patrare potest, atqui Christus Dominus propriâ suâ virtute patravit miracula, ergo Christus miraculis, quæ edidit, sufficienter suam divinitatem comprobavit. Prob. minor, primò, ex ipsa specie operum, quæ omnem omnino excedebant creaturæ virtutis potestatem, undè cæcus illuminatus dicebat

cebat Joannis cap. 9. *A seculo non est auditum, quia aperuit quis oculos cæci nati: nisi hic esset a Deo, non poterat facere quidquam.* Secundo, ex modo faciendi, solo siquidem nutu, & imperio Christus sæpissimè miracula operabatur, hinc Lucæ cap. 6. dicitur, quòd *virtus de illo exibat, & sanabat omnes.* Tertiò, ex ipsa doctrina, quæ Christus se Deum dicebat, ac miraculis divinæ virtute factis Sole clariùs comprobabat, quod soli Christo eximium, ac singulare fuit. Nam, licet Apostoli, multique Sancti potestatem habuerint edendi miracula, his similia, quæ Christus patravit, scilicet dæmones eiciendi, curandi infirmos, mortuos suscitandi, immò & majora faciendi, ut Sanctus Petrus per solam sui umbram, juxta illud Christi cap. 14. Joannis: *Qui credit in me, opera, quæ Ego facio & ipse faciet, & majora horum faciet;* nunquàm tamen Apostoli, aut alii Sancti miracula patrarunt, ut probarent se Deo coæquales esse, aut divinam virtute pollere, sed potiùs miracula fecerunt, ut ostenderent, se esse servos Christi, sine quo nihil omninò boni agere poterant, & in cujus augustissimo Nomine miracula patrabant ad gloriam Dei promovendam, ad fidei confirmationem, ad nascentis Ecclesiæ incrementum, ad divinitatis Christi manifestationem, sicut Paulus, & Barnabas palàm attestati sunt Actuum cap. 14. Hinc Christus, postquam loco mox laudato, dixit Discipulis suis: *Qui credit in me, opera, quæ Ego facio & ipse faciet, & majora horum faciet,* illicò subdit: *Si quid petieritis me in nomine meo, hoc faciam,* ut ostendat, se unum esse cum Patre Deum, unam esse utriusque operationem, essentiam, & omnipotentiam. Quamvis ergò Apostoli, alique Sancti ediderint miracula quodam modo majora miraculis Christi, non fuerunt tamen æquales, aut majores Magistro Discipuli, domino servi, unigenito adoptati, homines Deo, quia Christus propriâ virtute edidit miracula, ut divinitas, quam in se agnosci, & ab omnibus coli volebat, toti mundo innotesceret: At verò Apostoli, alique Sancti non eo fine miracula patrarunt, ut ostenderent, se divinam præditos esse potestate, sed potiùs ut Christi Magistri sui divinitatem comprobarent, nec ea miracula propriâ virtute ediderunt, sed Christus per eos majora illa miracula facere dignatus est, qui dixit: *Sine me nihil potestis facere.* Unde S. Ambrosius lib. 3. de Fide cap. 4. ait: *Licet homines quoque suscitarent mortuos; non in sua tamen virtute fecerunt, sed in Christi nomine.* Aliud est rogare, aliud imperare: aliud mereri, aliud donare. Ex quo palàm sequitur, miracula, quibus Christus tam per se, quàm per Discipulos probavit doctrinam, quæ se Deum dicebat, esse illustratius divinitatis argumenta, quia Deus, qui nec falli, nec fallere, nec mendacius auctoritatem conciliare potest, nunquàm permisisset, ut Christus doctrinam, quæ se Deum, & æterno Patri coæqualem esse dicebat, miraculis confirmaret, nisi Christus fuisset verus Deus, & unigenitus Dei Patris Filius.

DILUUNTUR OBJECTIONES.

ARguitur primò: Si Christus divinâ virtute miracula edidisset, debuisset in pueritia sua miracula facere, fuit enim Christus, ut docent Theologi, à momento conceptionis suæ Deus & homo, ac subinde patrandi miracula divinâ potestate præditus, atqui Christus nullâ omninò miracula in infantia sua patravit, sed solum anno circiter trigésimo, vel trigésimo primo ætatis suæ, quando videlicet in nuptiis, in Cana Galilææ factis, convertit aquam in vinum, ut dicitur *Joannis* cap. 2. *Hoc fecit initium signorum Jhesus.* Hinc *S. Joannes Chrysostomus* Hom. XVI. in *Joannem* ait: *Constat, signa illa & miracula, quæ in Christi pueritia feruntur, vera non esse. Nam, si à puero miracula facere cepisset, non sanè Joannes eum ignorasset; nec reliqua multitudo indignisset Magistro, qui ipsum manifestaret. Nunc autem, inquit Joannes, propter hoc veni, ut manifestetur in Israel.* Ergò Christus virtute divinâ miracula non fecit.

Respondeo cum *S. Thoma* 3. p. quæst. 43. art. 3. Christum, licet à momento conceptionis suæ divinâ potestate patrandi miracula donatum, non debuisse in pueritia sua miracula facere, quia existimassent Judæi, phantasma esse incarnationem, & antè opportunum tempus Christum, morti tradidissent. Addit etiam Angelicus Doctor, id pertinere ad laudem Discipulorum Christi, qui eum sequuti sunt relictis omnibus, quæ possidebant, antequàm miraculis inclaruisset. Hinc meritò *Cardinalis Baronius* ad annum primum Christi ait, se lubenter silentio præterire, multa miracula, quæ in Christi infantia, seu in ejus itinere, ac in Ægypti mansionem facta perhibentur, tum quia firmâ carent auctoritate, tum quia putat ea fuisse hausta ex libro apochrypho *De infantia Salvatoris*, qui lege Ecclesiasticâ, seu Decreto Gelasii Papæ, est interdictus. Sunt nonnulli Scriptores, quibus, loco mox laudato, suffragatur Eminentissimus *Annalium Parens Baronius*, qui pueri Jesu in terram Ægypti accessu aliqua referunt patrata miracula, & præsertim falsorum Numinum Simulachra, quibus abundabat Ægyptus, Christo puero adventate, penitus corruisse, litteris consignarunt. Hos inter Scriptores, illius Facti historici testes, duo in primis proferuntur *Sozomenus*, & *Evagrius*, qui rem totam distinctè ac dilucidè memoriæ prodiderunt. *Sozomenus* siquidem Libro V. *Historiæ Ecclesiasticæ* cap. 21. hæc habet: *Memorant, Arborem esse, quæ Persis dicitur, Hermopoli, quod est oppidum Thebaidis, cujus fructus aut folium, aut particula aliqua corticis ægrotis admodum morbos à compluribus depulerit. Nam traditum est, Joseph, cum, propter Herodem, assumptis secum Christo & Mariâ Sanctâ Dei para, fuisset, venisse Hermopolim: atque simul, ut portæ appropinquavit, statim arborem, licet planè maximam, adventu Christi turbatam esse, atque ad solum usque se inflexisse, & Christum adorasse. Atque hæc quidem de hac arbo-*

arbore, sicut à multis audiui, commemorata sunt. Quæ quidem, si quid ego iudico, vel significabat, jam Christum in urbe adeste, vel, ut est verisimile, non modo arborem, quam incolæ propter magnitudinem, & pulchritudinem lege gentilitiâ venerabantur, Demone jam, qui ibi colebatur, ob Christum talium rerum everforem, qui in eo loco comparebat, perhorrescente, suâ sponte commotam esse: Verùm etiâ omnes Ægyptiorum Statuas, adventante tum Christo, juxta Prophetiam Isaie, concussas &c. Rem compendiosius Evagrius in Vitis Patrum lib. 2. cap. 7. narrat his verbis: Vidimus, inquit, & alium Sanctum Virum, nomine Apollonium, apud Thebaidam in finibus Hermopolis, ad quam civitatem Salvatorem, cum Maria, & Joseph, de Judææ finibus venisse tradunt secundam Prophetiam Isaie: Vidimus ergo ibi & Templum ipsum, in quod ingresso Salvatore, corruisse omnia Idola in terram, & comminuta esse memorabantur. Hactenus duo illi Scriptores, qui non solum istud in Ægypto de solo æquatis falsorum Numinum Simulachris Factum Historicum narrant, sed etiam innuunt, illud longè antè prænunciatum fuisse ab Isaia, videlicet cap. 19. ubi hic Propheta sic vaticinatur: Ecce Dominus ascendet super nubem levem, & ingreditur in Ægyptum, & commovebuntur Simulachra Ægypti à facie ejus, & cor Ægypti tabescet in medio ejus. Horum Scriptorum testimoniis convicti nonnulli, affirmare non dubitant, aliquot à puerulo Jesu, fugiente in Ægyptum, edita fuisse miracula. Verùm, cum ipse, spectatâ, ut par est, Historiæ Antiquitate, nonnisi antiquorum, probatæque fidei Authorum testimonia fulcipientia esse putem, assensum narratis hisce prodigiis præbere minimè possum. Primò, quia de his prodigiis à Christo, vix nato, patris nulla prorsus apud antiquos Patres & veteres Scriptores Ecclesiasticos habetur mentio. Secundò, si hæc Sozomeni, & Evagrii expendantur testimonia, liquebit, ejusmodi prodigia à puero Jesu, Ægyptum adventante, patrata, nullâ certâ atque indubiâ fide ab utroque Scriptore narrari, sed ex aliorum auditu, & ex obscura, quæ circumferebatur Traditione, cujus originem perspectam se non habuisse insinuant, dum dicunt: Memorant: Audivimus: tradunt: traditum est; corruisse omnia Idola in terram, & comminuta esse memorabantur. Quo certè loquendi modo ambo illi scriptores usi nequaquam fuissent, si hæc miracula, quæ à puero Jesu, veniente in Ægyptum, patrata memorant; novissent esse certa, atque ex antiqua & extra omnem dubitationis aleam positâ traditione hausta. Tertiò, Ægypti Idololatriam, falsorumque illius Numinum Fana ac Simulachra ad annum usque Christi Domini trecentessimum octuagesimum nonum perdurasse, fatetur ipsemet Baronius, qui Canapi, Isidis, Serapidis Tempia tunc demùm à Theodosio Imperatore everta ac diruta fuisse, latè in suis Ecclesiæ Annalibus describit. non igitur, Jesu Christo, ad fugiendam sævitiem Regis Herodis, in Ægyptum ingresso, Idola, seu Simulachra Ægyptiaca concussa in terram corruerunt. Quod autem Sozomenus

mennus & Evagrius de Prophetæ *Isaïæ* Oraculo innuunt, quasi hanc *Ægypti* Idolorum everfionem citato capite decimo nono prænuñciaverit, à vera, ac genuina illius Sacri Vatis mente alienum est. Duplex siquidem est hujus Oraculi *Isaïæ*, secundum Interpretes, sensus, unus videlicet nativus & proprius; alter figuratus, seu allegoricus. Priori sensu, qui nativus ac proprius est, hoc unum dumtaxat sibi vult Prophetæ *Isaïas*, Deum, præpotentem ultorem scelerum, exercitum *Assyriorum* propediem concitaturum, *Ægyptum*que ingressurum ac vastaturum Fana illius ac Delubra direpturum, diisque aureis & argenteis spoliaturum. Quod à *Sennacheribo*, & *Nabuchodonozore*, *Assyriorum* Regibus, ad litteram fuisse impletum, concors est omnium Interpretum sententia. Altero sensu, qui figuratus & allegoricus est, innuit tantum *Isaïas* Prophetæ, Deum in utero Virginis, tanquam in nube levi, Mundum hunc aliquando ingressurum, & Idololatriam, tot annorum diuturnitate roboratam, totque locis diffusam, profligatorum ac penitus extirpaturum. Hanc allegoricam istius loci *Isaïæ* Prophetæ interpretationem tradunt Patres & Scriptores Ecclesiastici, *Tertullianus* lib. contra *Judæos* cap. 9. ubi hæc habet: *Ægyptus* totus Orbis intelligitur superstitionis & maledictionis elogio; *S. Athanasius* in libro *De Incarnatione Verbi*; Autor *Homiliæ* 3. in diversa Evangelii loca apud *Originem*, sed præcipue *S. Hieronymus*, qui hunc *Isaïæ* locum sic interpretatur: *Juxta tropologiam ascendit Dominus supra nubem levem, Corpus Sanctæ Mariæ Virginis, quod nullo humani seminis pondere prægravatum est: vel certe Corpus suum, quod de Spiritu Sancto conceptum est, & ingressus est in Ægyptum hujus mundi, statimque omnia Ægypti Simulacra commota sunt, ita ut divinationes, & universa fraus Idololatriæ, quæ deceptum possidebat Orbem, se fractam esse sentiret, progressu nimirum temporis, & prædicationis Evangelicæ beneficio. Sive ergo spectetur prior istius Oraculi *Isaïæ* sensus, qui nativus ac proprius est, sive alterius sensus, qui figuratus & allegoricus est, habeatur ratio, nihil ex utroque sensu extundi poterit ad probandum, Jesum Christum edidisse in infantia sua miracula. Cæterum, quamvis ipse non admittam stupendam illam Idolorum everfionem, aliaque id genus prodigia, quæ à puerulo Jesu Christo, in *Ægyptum*, ad declinandam sævitiam *Herodis Regis*, fugiente, patrata esse dicuntur nonnulli, ultrò tamen profiteor, Jesum Christum suo in *Ægyptum* adventu viam stravisse non solum ad Idolorum, quibus abundabat *Ægyptus*, Idololatriæ Sedes, everfionem, verum etiam ad illam sublimiorem sanctitatem, pietatem, & Religionem sub finem sæculi tertii Ecclesiæ in *Ægyptum* invectam. Notum quippè est, exeunte tertio Ecclesiæ sæculo per Sanctissimos Duces ac Magistros, *Antonium*, atque *Pachomium*, innumera penè in *Ægypti* solitudines subisse examina Monachorum, & Anachoretarum, eaque deserta loca, quæ prius erant ferarum latibula, non minus quam Dæmonum receptacula, evasisse tandem, divinâ Christi*

ſi operante virtute, domicilia ac ſeminaria Sanctorum, ſicut *S. Chryſoſtomus* Homiliâ viii. in Matthæum teſtatur his verbis: *Paradiſo quovis omnem illam videbis Eremum digniorem factam eſſe, & innumerabiles Angelorum cætus in corporibus fulgere mortalibus, & populos Martyrum, & Choroſ Virginum. Eſt enim cernere totâ illa regione diſcuſſum exercitum Chriſti, & admirabilem illum regium gregem, virtutumque Cæleſtium converſationem in terris micantem. Non ita variis aſtrorum Choriſ Cælum refulget, ut Ægypti Eremus innumeris Monachorum ac Virginum diſtinguitur ac illuſtratur habitaculis. Si quis illam Ægyptum veterem novit, rebellem Deo, ac magnitudine ſuperſtitionum furentem, hic optime Chriſti poteſt noſſe virtutem, per quem facta eſt tam admiranda mutatio.*

Arguitur ſecundò: Si Chriſtus divinâ virtute miracula patraſſet, potuiſſet ubique locorum miracula facere, atqui Chriſtus non potuit in patria ſua edere miracula, dicitur enim *Marci* cap. 6. *Et non poterat ibi virtutem ullam facere; Chriſtus ergo virtute divinâ non edidit miracula.*

Reſpondeo cum *S. Thoma*: id, quod de Chriſto dicit *S. Marcus*: *Non poterat ibi virtutem ullam facere*, non eſſe referendum ad potentiam abſolutam, ſed ad id, quod poteſt congruenter fieri, itâ ut ſenſus ſit, non fuiſſe congruum, ut Chriſtus apud populares ſuos, ſeu Nazarenos, patraſſet miracula propter pertinaciam & incredulitatem eorum cum contemptu conjunctam, quâ ſe miraculis omninò indignos præſtabant. Peſtentibus enim & credentibus dumtaxat, non curioſis, & planè incredulis miracula concedere, ſeu in eorum gratiam edere ſolebat Chriſtus, ut fidem jam inchoatam in illis confirmaret. Nolebat igitur Chriſtus miracula facere apud ſuos Nazarenos, nec decebat ut priora ſpernentibus plura ingereret, unde ibidem ſubditur: *Et mirabatur propter incredulitatem eorum.* Addo etiam, quòd quando *S. Marcus* ait, Chriſtum in patria ſua non potuiſſe ullam virtutem facere, idem planè eſt ac ſi diceret, Chriſtum apud ſuos populares miracula non feciſſe propter incredulitatem eorum; nam juxta Hebraiſmum, Scripturæ Sacræ familiarem, fieri non poſſe dicitur, quod reverà non ſit, ut ex. gr. *Genetiſ* cap. 19. *Non potero facere quidquam, donec ingrediariſ illuc, id eſt, non faciam.* Et *Marci* cap. 9. *Si poteſ credere, omnia ſunt poſſibilia credenti.* Hoc eſt, ſi crediſ.

Arguitur tertio: Si Chriſtus divinâ virtute miracula edidiſſet, non opus habuiſſet in patrandis miraculis orationem præmittere; ſed ſolo nutu, atque imperio miracula feciſſet, atqui conſtat ex Scriptura Sacra, Chriſtum in patrandis miraculis orationem præmittere ſolitum eſſe, non igitur virtute divinâ edidit miracula.

Reſpondeo: Chriſtum non propter neceſſitatem ſuffragii, ſed propter exemplum, in patrandis miraculis orationem præmittere voluiſſe, ut confunderet Judeos, qui illum in Beelzebub, principe dæmoniorum,

expellere dzmones calumniabantur . Undè *Joannis* cap. 11. sic Christus Patrem suum alloquitur : *Pater gratias ago tibi, quoniam audisti me, Ego autem sciebam, quia semper me audis ; sed propter populum, qui circumstat, dixi, ut credant quia tu me misisti* . Præterea, Christum nullâ quandoque præmissâ oratione miracula edidisse constat exemplo illius viri leprosi, cui Christo dicenti : *Domine, si vis, potes me mundare*, statim respondit Christus : *Volo, mundare* . Non enim, ut observat *Sanctus Chrysostomus* homil. 26. in *Matthæum*, leprosus Christo dixit : *Si oraveris Deum, sed, si velis, potes me mundare* . Neque ait : *Domine munda me, sed ipsi cuncta commisit ; eumque conferendæ sanitatis dominum esse confessus est, atque in ipso constituit omnem auctoritatem* . Quid verò, inquis, si prava erat opinio leprosi ? Procul dubio illam destrui, istum verò corripere oportebat & corrigi . Putasne igitur hoc fecit ? Nequaquam, sed è regione totum, quod dixerat, & assensione prorsus, & operatione, confirmat ; & non dixit, *mundus esto ; sed, volo, mundus esto &c.* Denique, sic à minori ad majus argumentatur idem *Sanctus Pater* Serm. 11. Tom. 5. *Discipuli Christi solo verbo mortuos suscitabant* . Petrus nonne *Tabitham* verbo excitavit ? Paulus nonne suis vestibus multa signa fecit ? Disce quidpiam mirabilius istis : *Apostolorum umbra mortuos suscitabat, &c.* Quid ergo *Discipulorum umbra* mortuos excitabat, & *Magister precibus* egebat ut mortuum excitaret ? Patet itaque, Christum non orationis operâ, sed propriâ potestate, seu divinâ virtute miracula edidisse .

Arguitur quartò : Ethnicis multa miracula patrarunt, ergò Christus per miracula, quæ tam per se, quàm per Discipulos edidit, suam divinitatem sufficienter non probavit . Prob. ant. primò, exemplo *Apollonii Tyanæi*, cujus vitam, ac res gestas octo libris celebravit *Philostratus*, totque, ac tanta ab illo edita memoravit miracula, ut *Hierocles*, *Ægypti Præfectus*, indè occasionem arripuerit instituendæ comparationis *Apollonium* inter & *Jesum* in eo libro, quem *ἐξελαιον* inscripsit . Secundò, *Cornelius Tacitus* lib. 4. cap. 81. refert Imperatorem *Vespasianum* cuidam homini cæco per inquisitionem restituisse visum, & alium hominem, calcatâ ab Imperatore illius manu, fuisse curatum . Patet itaque ab Ethnicis fuisse edita miracula .

Respondeo : Hæc, & alia id genus prodigia, quæ ab Ethnicis facta produntur, fuisse vel simulata, ac magicis artibus tribuenda, vel conficta planè ab *Apollonio Tyanæo*, quem tantis laudibus extollit *Philostratus*, multis momentis evinci potest, miracula, quæ illi tribuuntur, meras præstigias fuisse . Primò, quia constat, *Apollonium Tyanæum* fuisse vaserrimum magum, qui eâ de causa ab Imperatore *Domitiano* captus est, & in carcerem detrusus : Eum magum fuisse testantur *Lucianus* in *Pseudomante*, & *Dio Cassius* lib. 77. Hist. Rom. ubi de *Antonio Caracalla* Imperatore hæc habet : *Magis & præstigiatoribus*

bus ita delectabatur, ut Apollonium Cappadocem, qui floruerat Domitiani temporibus laude & honore affecerit (hic præstigiator fuerat solers & magus). Idem de Apollonio Tyanæo judicium ferunt antiqui Scriptores Ecclesiastici, & in primis Lactantius lib. 5. Divin. Instit. cap. 5. ubi sic de Apollonio loquitur: Non potuit post mortem Deus credi, quia & hominem, & magum fuisse constabat, & ideo alieni nominis titulo affectavit Divinitatem, quia suo nec poterat, nec audebat. Noster verò, idest, Christus, & potuit Deus credi, quia magus non fuit, & creditus est, quia verus fuit. Secundò, ex ipsa Apollonii Historiæ lectione faciliè dignoscitur, Philostratum in hac conscribenda Historia eò potissimum collimasse, ut jam propagatam Christi Fidem, ac doctrinam deprimeret, de industria adscribendo Apollonio omnia fermè, quæ Scriptura Sacra Christo Domino tribuit. Philostratum imitatus est Hierocles, Ægypti Præfectus, qui in odium Christianæ Religionis duos libros, Philaletis nomine, edidit, in quibus Apollonium Tyanæum cum Christo Salvatore nostro comparat, quem impium & sacrilegum Auctorem his verbis merito perstringit Lactantius lib. 5. Inst. Divin. cap. 3. Cum igitur talia ignorantia suæ deliramenta fudisset, Hierocles, ausus est libros suos nefarios, ac Dei hostes prædictis annotare. O cæcumpetus! O mentem Cimneriis, ut ajunt, tenebris atriores! Discipulus hic fortassis Anaxagoræ fuerit, cui nives atramentum fuerunt: atqui eadem cecitas, & verofalsitatis, & mendacio veritatis nomen imponere. Videlicet homo subdolanus voluit lupum sub ovæ pelle celare, ut fallaci titulo posset irretire Lectorem. Tertiò, Philostratus centum & amplius annis fuit Apollonio Tyanæo recentior, adeoque res, ab eo gestas nonnisi ex alieno testimonio perspectas habere potuit; Apollonius quippè imperante Domitiano vixit, Philostratus verò imperante Severo; fatentur autem omnes periti Critici, incertissimas semper reputari debere Historias ab illis Auctoribus conscriptas, qui his de rebus scribunt, quæ pluribus ante eos sæculis contigerunt. Quartò, Philostratus testes Historiæ suæ laudat Damidem Assyrium, Maximum, Ægiensem, & Megarenem, qui omnes fide carent. Nam Damis, quem satis constat Scriptorem fuisse vaniloquum, & Græcæ fidei, suos de Apollonio Commentarios in lucem non edidit, sed per quemdam ejus familiarem cum Juliæ Severi Imperatoris uxori, innotuissent, hujus jussu recognovit eos Philostratus, qui, ut Apollonium Heroem suum magis apud Juliam commendaret, benè multa Damidi affinxit. Nec majorem meretur fidem Maximus Ægiensis, quippè qui pauca de Apollonio retulit, ea nimirum, quæ Apollonius egit cum Ægis versaretur. Megareni autem tertio testi fidem derogat ipse Philostratus, qui lib. 1. cap. 3. testatur: Megarenem multarum rerum, quæ vitam Apollonii spectant, notitiam non habuisse. Nullam ergo fidem merentur tres illi testes, quos Historiæ suæ laudat Philostratus. Denique, Apollonii Tyanæi Historiam, quam octo libris conclusit Philostratus, mendaciis & fabulis à

capite ad calcem scaterere demonstrant *Eusebius Cæsariensis* in lib. adversus Hieroclem, *Photius* in sua Bibliotheca Cod. 44. *Scaliger* in Eusebianis num. 278. *Baronius* Tom. 1. Annalium ad annum Christi 78. & *Daniel Huetius* Episcopus Abrincensis in Demonstr. Evang. propof. 9. pag. 163. & seq. ex quibus hæc pauca excerpti. Multum igitur errant, ut cum *Augustino* loquar Epist. 138. aliàs 5. ad Marcellinum, qui Prophetis Sanctis, miraculorum magnorum nobilitate præstantibus, magos comparant; quantò magis si eos comparent Christo, quem Prophetæ illi, quibus Magi quilibet nullo modo sunt comparandi, prænuntiaverunt esse venturum, & secundum carnem, quam sumpsit ex Virgine, & secundum divinitatem, quam nunquam separatur à Patre.

Ad alterum exemplum Imperatoris Vespasiani in objectione relatum, respondeo: hæc miracula non vera, sed simulata fuisse. Idque colligo primò ex eo quod Ægyptii, cum famâ accepissent, *Iosephum*, *Judæum* Vespasiano Imperatori quædam oracula de Messia totius Orbis Moderatore id temporis jactata accommodasse, ne ipsi in arte adulatoria cederent, Vespasianum Deum facere conati sunt, illi videlicet divinz virtutis assignando miracula. Secundò, *Cornelius Tacitus* asserit, Vespasianum, quandò illi simulati ægri, quos Ægyptii subornaverant, fuerunt ipsi oblati, confessum fuisse se vim non habere restituendi illis sanitatem: *Vespasianus*, inquit, primò irridere, & aspernari, &c. Subdit deindè idem Auctor, Vespasianum vocibus adulantium Ægyptiorum, apud quos tum temporis versabatur ille Imperator, in spem inducendum fuisse, se posse hominibus conferre sanitatem, tandem vocibus adulantium in spem induci. Denique, illorum hominum, qui Vespasiano sunt oblati, ægritudinem non veram, sed simulatam fuisse apertè ostendit *Cornelius Tacitus* ex ipsismet verbis Ægyptiorum, qui Imperatori Vespasiano dixerunt: *Huic non esse exesam vim luminis, & redituram si pellerentur obstantia, illi elapsos in prævum artus, si salubris vis adhibeatur, posse integrari*. Quis, amabo, non videt, ejusmodi homines, ab Ægyptiis Vespasiano oblatos, se ægros consultò sinxisse, eo fermè modo, quo multi etiamnùm pauperes ostiatim mendicantes, vel per vias effusi, varias mentiuntur ægritudines, seque claudos, & cæcos singulari dexteritate simulant, ut transeuntibus fucum faciant, & ampliorem ab illis corradant eleemosynam? sed frustrà jaciuntur retia ante oculos pennarum.

Arguitur ultimò: Multa in Alcorano referuntur miracula à Mahometo edita. Ibi quippè legitur, Mahometum cum Archangelo Gabriele ascendisse in Cælum. Illum à quadrupedibus, arboribus, avibus, & lapidibus fuisse saluatum: Transplantatas etiam ab ipso de loco in locum plurimas arbores, & alia hujusmodi stupenda ab ipso facta prodigia narrantur; atqui tamen Mahometus fuit insignis impostor, ergo ex miraculis, quæ Christus edidit, probari non potest illum fuisse Deum.

Re-

Respondeo: Maximum esse discrimen inter vera Christi miracula, & pseudo-miracula, quæ à Mahometo insigni impostore facta in Alcorano narrantur. Primò, quia Christus non in angulo, non in recessu, sed in propatulo, in compitis, in media turba, in festis, frequentique Judæorum foro miracula patravit, scilicet Lazarum quadriduanum è monumento ad vitam revocavit, & filium viduæ in Civitate Naim de ferebro mortuum jacentem excitavit. At Mahometus nonnisi clandestinè jactabat pseudo-miracula, quæ coram populo facere recusabat, nec unquam mortuum excitavit, vel sanavit ægrotum probabiliter moriturum, nec cæco dedit visum, nec claudogressum, nec leprosum mundavit. Secundò, miracula, quæ Christus patrabat, ordinabantur vel ad æternam salutem hominum procurandam, vel ad sanitatem, vitamque temporalem illis restituendam; at nullum in Alcorano legitur miraculum, quod Mahometus fecerit propter aliquod bonum cedens in proximi utilitatem, sed potius omnia miracula, quæ ab ipso edita narrantur, ad eummodum facta perhibentur, nempe vel ad malum aut futilem finem, vel ad superbiam, & vanæ gloriæ ostentationem. Denique, miracula, quæ in Alcorano à Mahometo facta referuntur, tot nœnias, fabulas, contradictiones, & mendacia crasso filo contexta exhibent, ut eorum falsitas, & impostura cordato ac sapienti viro solà narratione pateant, nullaque possint tergiversatione celari.

QUÆRES: Utrum in Ecclesia Catholica ad hanc usque ætatem concessum fuerit donum miraculorum?

Respondeo: in Catholica, seu Romana Ecclesia, à temporibus Apostolorum ad hanc usque ætatem semper extitisse viros, qui, doctrinâ & sanctitate conspicui, miraculorum dono præfulserunt. Fidem huic veritati faciunt Sancti Patres, testes oculati, *Irenæus* lib. 2. adversus Hæreses cap. 66. *Chrysostomus* Tom. 5. Serm. 67. *Hilarius* lib. in Constantium Imper. *Gregorius Nazianzenus* Orat. 18. *Augustinus* lib. 22. de Civit. Dei cap. 8. *Hieronymus* lib. contra Vigilantium, *Theodoretus* Orat. 8. adversus Græcos, & alii benè multi, qui referunt miracula, quæ ipsi propriis inspexerunt oculis, & quæ ad sepulchra, ac reliquias Sanctorum Martyrum suo tempore frequentè edebantur. Quæ miraculorum virtus ad pietatem Fidelium excitandam, & ad demonstrandam Christianæ Fidei, atque Ecclesiæ Catholicæ veritatem etiamnum pluribus in locis perseverat, in quibus ad ossa & sepulchra Martyrum dæmones mugiunt, ægri- tudines depelluntur, ac multa admirationum opera cernuntur. Scio, hæreticos miracula, quæ in Ecclesia Catholica à Viris Sanctis, & ad eorum sepulchra, vel reliquias eduntur, supercilioso fastidio velut anicularum nœnias aspernari; sed eorum revincitur pertinacitas ex verbis Christi Domini cap. ult. *Marci*, dicentis: *Signa autem eos, qui crediderint, hæc sequentur: In nomine meo dæmonia ejicient, linguis loquentur novis, serpentes tollent, & si mortiferum quid biberint non eis nocebit: super ægros*
ma.

manus imponent, & benè habebunt. Id pollicetur Christus, id testantur Acta Apostolorum, id Sancti Patres unanimi consensione per singulas singuli ætates commemorant, id Ecclesia in canonizatione Sanctorum, sæpius confirmat, id publica populorum vox clamat, & tamen hæretici credere nolunt, qui nulla unquam in confirmationem suæ doctrinæ miracula patrare potuerunt, vel si aliqua facere, aut fingere tentarunt, semper se se omnibus deridendos propinarunt, ut compertissimum est ex multis Historiæ Ecclesiasticæ monumentis. Sed non mirum, si fidei transage & oppugnatores, hæc fidei nostræ oracula, ac præsidia, hæc divinæ erga nos bonitatis & misericordiæ pignora abominentur, atque in sacra cimelia, quæ fidelium venerationi patent, ferro, ignibusque graffentur.

PARAGRAPHUS SECUNDUS

De Transfiguratione Christi, & de variis speciebus miraculorum, quæ ab ipso edita sunt.

INter omnia miracula, quæ patravit Christus Dominus, potissimum refulget ipsius Transfiguratio, in qua Divinitatem suam, & Sanctorum præmonstravit gloriam. *Assumpsit, inquit Matth. cap. 17. Iesus Petrum & Jacobum & Ioannem fratrem ejus, & duxit illos in montem excelsum seorsum: & transfiguratus est ante eos.* Quisnam fuerit ille mons, in quo Christus transfiguratus est? Non dicunt sacri Evangelistæ. Sunt aliqui Scripturæ Sacræ Interpretes, qui, ut videre est apud P. Bernardum Lamy in Appar. Geogr. cap. 12. existimant, Christum non fuisse transfiguratum in Monte Thabor, sed in monte excelsio propè Cæsaream Philippi, videlicet in isto monte, qui, teste Iosepho, altissimus ipsis fontibus Iordanis imminet, & ad cujus pedes sita erat Cæsarea. Verum probabilior, & quæ veteri traditione nititur, nunc eorum opinio invaluit, qui dicunt Christum fuisse transfiguratum in Monte Thabor, qui mons est in media Galilæa situs non procul à Nazareth, sic enim docet Sanctus Hieronymus in lib. de locis Hebraicis, & in Epitaphio Paulæ, ubi Sanctæ illius mulieris enarrans peregrinationes, hæc habet: *Scandebat Montem Thabor, in quo transfiguratus est Dominus.* De hac Christi Transfiguratione S. Thomas 3. par. q. 45. quatuor movet dubia. Primò, cur Christus fuerit transfiguratus? Secundò, an claritas Christi in Transfiguratione fuerit claritas gloriosa? Tertiò, utrùm testes Transfigurationis Christi fuerint convenienter adducti? Denique, utrùm convenienter auditum fuerit paternæ vocis testimonium? His quatuor dubiis, ut breviter faciam satis.

Ad primum resp. Christum his de causis fuisse transfiguratum. Primò, ut Apostolos, quibus ostendit gloriam suam, & deinde omnes
Fi.

Fideles, ex contemplatione perennis gaudii ad breve tempus delibata, in præliis militiæ Christianæ roboraret, in adversis confirmaret, in aspera ac difficili hujusce peregrinationis via, per quam ad Regnum Cælorum pervenire debebant, constantes redderet, quia, ut inquit Apollolus ad Rom. cap. 8. *Non sunt condignæ passionēs hujus temporis ad futuram gloriam, quæ revelabitur in nobis*. Præterea, ne tempore passionis, ubi tota naturæ humanæ Christi infirmitas apparere debebat, Apostolorum fides labefactaretur, voluit Christus præostensâ in Transfiguratione gloriâ suâ illos in fide solidare, *ut de cordibus Apostolorum Crucis scandalum tolleretur, & ne conturbaret eorum fidem voluntariæ humilitas passionis, quibus revelata esset absconditæ excellentiæ dignitatis*, ait Sanctus Leo Serm. 94. seu homilia de Transfiguratione. Transfiguratus autem dicitur Christus, non quod faciei mutaverit lineamenta, vel quod aliam formam induerit, sed quia *resplenduit facies ejus sicut Sol*, fulgore scilicet tum ex Divinitatis majestate, tum ex animæ beatitudine in faciem, totumque Christi Corpus dimanante, & candore per illius vestimenta coruscante. Fallitur ergo Origenes, qui in Tractatu 35. in Matthæum ex prisca traditione asserit in Christo duas fuisse formas, unam quidem, secundum quam omnes eum videbāt, alteram autem secundum quam transfiguratus est coram discipulis suis in monte, eumque iuxta geminam illam formam unicuique apparuisse secundum quod erat dignus. Fallitur, inquam, Origenes, primò, quia si Christus duas habuisset formas, secundum quas unicuique, prout dignus erat, apparuisset, procul omni dubio Judæi, qui Christum calumniandi omnem occasionem captabant, eum traduxissent tanquam alterum Proteum, qui, ut fabulantur Poetæ, se se in varias species ac formas pro suo nutu & arbitrio transformabat. Secundò, si Christus præter corporis formam, quæ omnium oculis patebat, aliam, habuisset formam gloriosâ claritate fulgentem, & hominum oculis imperviam, corpus ipsius nunquam caruisset dotibus corpori glorioso debitis, quod tamen adversatur perpetuæ traditioni Ecclesiæ, quæ docet Christi Corpus caruisse usque ad Resurrectionem dotibus Corpori glorioso debitis, quò impleretur per Passionem Christi Mysterium Redemptionis. Denique, Christum citrà ullam vel substantiæ, vel corporis mutationem fuisse transfiguratum, docent Sancti Patres, & præcipuè S. Hieronymus in cap. 17. Matth. ubi hæc habet: *Nemo putet Christum per hoc, quod transfiguratus dicitur, pristinam formam & faciem perdidisse, vel amisisse corporis veritatem, vel assumpsisse Corpus spirituale, vel æereum: sed quomodo transfiguratus sit Evangelista demonstrat, dicens: Resplenduit facies ejus sicut Sol, vestimenta autem facta sunt alba sicut nix: ubi splendor faciei ostenditur, & candor describitur vestium, non substantia tollitur, sed gloria demonstratur*.

Ad alterum Dubium respondeo: Claritatem, quam Christus ostendit in transfiguratione sua, fuisse claritatem gloriæ quantum ad essentiam,

tiam, sed non quantum ad modum, quod quidem probatur: Primò, auctoritate *S. Hieronymi*, qui in cap. 17. *Matthæi* sic loquitur: *Certè transformatus est Dominus in eam gloriam, qua venturus est postea in Regno suo.* Idem docet *S. Chrysostomus* Homil. 57. in *Matthæum*. Secundò, sicut claritas corporis gloriosi manat ab animâ donatâ visione beatificâ, itâ claritas corporis Christi in transfiguratione proficiscebatur ab ipsius anima, & à supposito divino ipsi hypostaticè unito. Enim verò quamvis gloria animæ Christi à momento conceptionis beatitudine perfusæ non redundaverit in corpus, itâ disponente Deo, ne impediretur Redemptionis Mysterium, nata tamen erat Anima Christi ad effundendam gloriam in corpus, sicut reverà quantum ad gloriæ claritatem accitit in transfiguratione, aliter tamen quàm in corpore glorioso, nam ad corpus gloriosum redundat claritas ab Anima instar qualitatis permanentis corpus afficientis, at in transfiguratione claritas gloriæ prorumpens è divinitate & Anima Christi, effusa est in ipsius corpus non per modum qualitatis immanentis, & afficientis ejus corpus, sed per modum passionis transeuntis, non secùs ac contigit Apostolo Paulo dum in suo raptu vidit essentiam Dei, ut explicat *S. Thomas* 2. 2. quæst. 75. art. 2. ad 2. Claritas ergò, quam Christus in sua Transfiguratione ostendit, orta est ex ipsius Anima, quæ licet à momento conceptionis semper beata, radios tamen suæ beatitudinis dispensatione divinâ in corpus suum non effudit, nisi in Transfiguratione, in qua Animæ Christi claritas gloriæ ad breve temporis intervallum in ejus corpus pro consolatione Apostolorum effluxit. Cæterùm, an hic splendor corporis Christi in transfiguratione fuerit miraculosus, nec ne? Difficultas est inter Theologos. Ipse cum *S. Thoma* probabilius censeo, fulgorem, quo in transfiguratione resplenduit Corpus Christi, fuisse planè miraculosum, quia licet illa coruscantis gloriæ claritas relata ad Animam Christi non esset miraculosa, sed naturalis, si quidem Anima Christi à momento conceptionis potita est beatitudine, cujus appendix est claritas gloriæ, attamen relata illa gloriæ claritas ad Corpus Christi erat miraculosa & minimè naturalis. Nam cum in transfiguratione, sicut mox diximus, claritas Animæ Christi non fuerit in corpus transfusa per modum dotis permanentis, sed per modum transeuntis, sequitur, Corpus Christi remansisse passibile & mortale, perindè ac nostrum, quòd autem Corpus passibile & mortale resplendeat sicut Sol, ingens sanè miraculum est. Utrumque ergò fuit miraculum, & Corpus Christi, stante ipsius Animæ beatitudine, non fulgere ab instanti conceptionis, & idem Corpus, non obstante illius passibilitate, fulgere in transfiguratione. Immo in transfiguratione duplex fuit miraculum, primùm, quia impediabatur gloriæ ab Anima Christi in corpus effusio per modum dotis permanentis sibi debitz. Alterum, quia, licet Deus totius naturæ Auctor constituisset, ut gloria Animæ Christi toto illius vitæ mortalis decursu non efflueret in corpus, eo videlicet sine ut

per

per dolores , & Passionem suam, Servator noster Christus expleret Redemptionis nostræ Mysterium , contrà tamen statutum illum ordinem, permisit Deus , ut in transfiguratione splendor gloriæ ex Anima Christi scaturiens promicaret in corpore, hoc est, non tantum faciem , sed etiam manus & pedes, cæteraque corporis membra pervaderet, immò & ipsius vellimenta penetraret .

Ad tertium Dubium respondeo : Conveniens fuisse ut *Moyfes* , & *Elias* , qui in veteri Lege præfulserunt , & tres Legis Evangelicæ Apostoli , *Petrus* , *Ioannes* , & *Iacobus* , essent testes transfigurationis Christi . Primò, quia cum dogma Fidei sit, nemini ab origine Mundi ad gloriam æternam aditum patere potuisse nisi per Christum, in quo est vera, salus & redemption nostra , congruum fuit ut in Christi transfiguratione, quæ æternæ beatitudinis stillicidium , delineatio & adumbratio fuit, aliqui de iis , qui eum præcesserunt , testes adessent , scilicet *Moyfes* , & *Elias* , & aliqui , qui cum Christo adhuc vivebant , nimirum , *Petrus* , *Ioannes* , & *Iacobus* , ut indè notum esset, fore ut non solum homines, qui post ipsum fuerunt , sed etiam, qui eum præcesserunt, ad gloriam æternæ beatitudinis adducerentur per Christum , qui est omnium mediator , ac Redemptor . Secundò, apparuerunt in transfiguratione Christi *Moyfes* , & *Elias* , ille , cui Lex à Deo data est per Angelos , iste, pro gloria Domini æmulator , & Legis zelator ardentissimus , ut Christum Legem implere , non violare, testimonio suo comprobarent contrà calumnias Phariseorum, Christum accusantium tanquam Legis transgressorem , & blasphemum usurpantem Dei gloriam . Tertiò , quia turbæ falsò putabant, Christum esse *Eliam* , vel *Hieremiam* , aut unum ex Prophetis , ut hæc revelleretur opinio , quæ multorum pervaserat animos , Christus in sua transfiguratione capita Prophetarum secum adduxit , ut hinc appareret differentia servorum , & supremi omnium Domini . Denique, *Moyfes* Legistypus , & *Elias* , omnium Prophetarum personam gerens, transfigurationis Christi testes fuerunt , ut Mysteriis Christi , & potissimum Incarnationis ac Passionis, quæ antehac prænunciaverant, testimonium perhiberent , loquentes cum ipso in monte de acerba morte, quam propediem subire debebat , loquebantur cum ipso de excessu , quem complecturus erat in Hierusalem : ait *S. Lucas* cap. 9. Hanc autem in Christi transfiguratione apparitionem *Moyfis* , & *Eliæ* docet *Sanctus Thomas* non fuisse imaginariam (sicut habetur in quadam glossa desumptà ex libro, qui inscribitur de *Mirabilibus Sacræ Scripturæ* , qui liber falsò tribuitur *S. Augustino*) sed fuisse veram , & realem , ita ut anima *Moyfis* in corpore assumpto apparuerit, & *Elias* adhuc superstes , è Paradiso terrestri, vel ex aliquo eminenti loco , quò curru igneo raptus etiamnum vivit secundi adventus Christi Præcursor , & felicitis æternitatis candidatus , in montem Sacrum miraculo fuerit advectus . Ea quippè pervulgata est , ut videre est apud nostrum *Malvendam* libro 10. de Antichristo cap. 15. omnium

Sanctorum Patrum traditio, *Eliam* in translatione sua non esse mortuum, sed adhuc vivere, futurum secundi adventus Christi Præcursores, quæ Sanctorum Patrum traditio dissonat, nititur Scripturæ Sacræ testimonio *Malachia* cap. 4. ubi Propheta sic Deum inducit loquentem: *Ecce ego mittam vobis Eliam Prophetam, antequam veniat dies Domini magnus, & horribilis. Et convertet cor patrum ad filios, & cor filiorum ad patres eorum: ne forte veniam, & percutiam terram anathemate. Hunc autem Eliam, de quo ibi Malachias sermonem habet, esse Eliam Thesbitem, Prophetam, aperte declarant antiquæ Scripturæ Sacræ versiones, sic enim habet versio LXX. Interpr. Ecce ego mittam vobis Eliam Thesbitem, antequam veniat dies Domini magna & illustris. Cui versioni consonant paraphrasis Chaldaica, & versiones Arabica, & Syriaca. Cum igitur vivat adhuc *Elias*, futurus Christi ad Judicium venturi Præcursor, recte docet Sanctus Thomas, *Eliam* in Christi transfiguratione apparuisse in corpore. Ex dictis Lector colligere debet, quod sicut futura Christi gloria tres è Cælo testes habuit, totidemque de terra, ut dicitur 1. Ioannis cap. 5. *Tres sunt, qui testimonium dant in Cælo: Pater, Verbum, & Spiritus Sanctus. . . . Et tres sunt, qui testimonium dant in terra, Spiritus, Aqua, & Sanguis*; ita & transfiguratio, quæ Christi gloriæ specimen fuit, tres quasi è Cælo testes habuit, Patrem Æternum, cuius vox audita est, *Mossem, & Eliam*; tres etiam de terra testes habuit, *Petrum, Ioannem, & Iacobum*. *Petrum* quidem, quia Collegii Apostolici caput erat, & Princeps; *Ioannem* verò, tum ob privilegium amoris, quo à Christo propter suam virginitatem plus ceteris diligebatur, tum quia etiam post omnes Apostolos superstes, hoc testimonium ad sequentem ætatem vivā voce erat transmissurus; *Iacobum* denique, propter prærogativam martyrii, fuit enim primus, qui ex Apostolis hoc Patris Æterni, & Prophetarum de Christo testimonium suo sanguine obfirmavit.*

Ad ultimum Dubium respondeo: Conveniens fuisse, ut in Christi transfiguratione audiretur hæc vox Patris Æterni: *Hic est filius meus dilectus, in quo mihi complacui, ipsum audite*. Primò, quia per hanc vocem clarissimè ostendit Pater Æternus, Christum esse Filium suum non adoptivum, sed naturalem: *Non Mossem filius, non Elias filius, sed hic filius*; inquit Sanctus Ambrosius lib. 1. de Fide cap. 12. *Mossem enim & Elias filii sunt adoptione, Christus autem filius est naturā*. Secundò, dum dixit Pater Æternus: *ipsum audite*, doctrinam Christi suo testimonio comprobavit, eamque non aliundè, quàm è sinu suo hausitam declaravit; Undè S. Petrus Epist. 2. cap. 1. ex hac paterna voce, quæ in transfiguratione audita est, doctrinam Christi potissimum commendat his verbis: *Non enim doctas fabula secuti, notam fecimus vobis Domini Nostri Jesu Christi virtutem, & præsentiam, sed speculatores facti illius magnitudinis. Accipiens enim à Deo Patre honorem, & gloriam, voce delapsa ad eum*
bu-

*hujusmodi à magnifica gloria : hic est filius meus dilectus, in quo mihi complacui, ipsum audite. Et hanc vocem nos audivimus de Cælo allatam, cùm essemus cum illo in Monte Sancto. Tertiò, quemadmodùm in Baptismo Christi audita est vox Patris, hic est filius meus dilectus, ad significandum, nos per gratiam vitæ, quam recipimus in Baptismo, incipere Filios Dei esse adoptivos, ità convenienter in transfiguratione, audita est eadem paterna vox, ut intelligeremus, per gratiam consummatam patriæ, seu per gloriam, quam transfigurationis gloria adumbrabat, nos fore perfectos adoptionis filios. Denique, ut utraque filiatio adoptiva, sive imperfecta viz, quæ habetur per Baptismum, sive perfecta patriæ, quæ erit in gloria, toti Trinitati accepta referretur, congruebat ut tam in Baptismo, quàm in transfiguratione Christi audiretur Pater in voce, Filius verò præfens esset in carne, & Spiritus Sanctus appareret, in Baptismo quidèm sub specie columbæ, quia in Baptismo dat innocentiam, quæ per simplicitatem columbæ monstratur, & in transfiguratione Christi videretur in nube lucida, quia in resurrectione dabit electis suis gloriam & refrigerium ab omni malo, quæ per nubem lucidam designantur, ut ait Sanctus Thomas 3. part. quæst. 45. art. 4. ad 4. ubi etiam in responsione ad 3. observat, discipulos, auditâ paternâ voce territos, & tantùm non exanimis, fuisse prostratos, ut ostenderetur, quòd excellentia futuræ gloriæ, cujus transfiguratio levis fuit adumbratio, omnem excedit sensum, & facultatem mortali um, quam humana fragilitas ferre non sustinet, à qua tamen fragilitate sanantur homines per Christum, eos adducendo in gloriam : quod significatur per hoc, quod Christus jacentibus, ac trepidantibus discipulis suis dixit: *Surgite nolite timere.**

Sed satis hastenùs de Christi Domini Transfiguratione dictum sit. Nunc præstat ut cum Sancto Thoma parumpèr excurramus per singulas species miraculorum, quæ Christus Dominus edidit.

In primis *Angelicus Præceptor* 3. part. quæst. 44. art. 1. probat conveniens fuisse, ut Christus circa creaturas spirituales ederet miracula, exerendo videlicet eam, quâ pollebat, virtutem conterendi potestatem Dæmonum, eosque ejiciendi à corporibus obsessorum, juxta illud *Zachariæ* cap. 13. *Spiritum immundum auferam de Mundo. Et Joannis* cap. 12. *Nunc Princeps hujus Mundi ejicietur foras.* Verùm, quia Christus miracula in expulsiōe Dæmonum non patrabat propter utilitatem Dæmonum, sed propter utilitatem hominum, ut ipsi eum glorificarent; idèò, inquit Sanctus Thomas, prohibuit Christus Dæmones loqui eam, quæ ad ipsius laudes pertinebant, tùm ut nos suo exemplo edoceret, non esse præbendas aures Dæmoni, qui falsa veris sæpè permiscet, ut speciei veritatis testimonium fraudis obtexat, sicut ait Sanctus Ambrosius lib. 6. in *Lucam*; tùm quia etiam, non oportebat Dæmones surripere officii Apostolici gloriam, nec decebat Christi mysterium lingua fetida publicari, in-

quit *Sanctus Chrysostomus* Homilia 2. de *Lazaro*. Merito igitur Christus prohibuit Dæmonibus, quos expellebat, ne bonum testimonium de ipso ferrent, ut legitur *Marci* cap. 1. & *Lucæ* cap. 4. eosque obmutescere cōegit, quando ejus divinitatem, quam ex metu, ex adulatione, ex odio, & invidia confitebantur, prædicare voluerunt.

Ob eandem causam, inquit *Angelicus Doctor*, hoc est, propter salutem & instructionem hominum, permisit Christus, ut Dæmones, quos ejiciebat, aliquod nocumentum inferrent hominibus, vel in corpore, sicut legitur *Marci* cap. 9. & *Matth.* cap. 17. vel in rebus, ut v. g. quando Christus stans in Regione Gerasenorum permisit ut Dæmones abirent in porcos, qui in mari submersi sunt, *Matth.* cap. 8. Ut enim Christus ostenderet, quòd sæpè, dum ad Deum converti post peccata enititur, majoribus antiqui hostis pulsamur insidiis, permisit ut ille, quem Dæmonio liberaverat, gravius à Dæmone ad horam torqueretur, *Marci* cap. 9. similiter etiam Christus permisit, ut Dæmones irent in porcos, eisque nocumentum inferrent, hoc exemplo significare volens, quòd Dæmones in eos homines, quos ab his vexatos in Regione Gerasenorum liberaverat, graviora mala exercuissent quàm in porcos, nisi divinà providentiâ fuissent adjuti.

A miraculis, quæ Christus Dominus edidit circà substantias spirituales, transitum facit *Doctor Angelicus* ad illa miracula, quæ Christus fecit circa corpora cœlestia, quando videlicet tempore Passionis, Sol obscuratus est, & tenebræ factæ sunt in universa terra, sicut ait *S. Lucas* cap. 23. Sed de hoc miraculo opportuniùs disseram in Dissertatione de Circumstantiis Passionis Christi.

Denique, *Sanctus Thomas* Articulis 3. & 4. Quæst. 44. probat conveniens fuisse, ut Christus patraret miraculatam circà homines, quàm circà creaturas rationis expertes. Primò, circà homines, ut demonstraret, se in Mundum venisse ad eorum promovendam salutem, non solum corda victrici gratiâ suâ immutando, justificando, & sapientiam infundendo, quod pertinet ad miraculorum fidem, sed etiam exterius alliciendo, terrendo, ac integram corporis, & animæ incolumitatem restituendo. Secundò, congruebat, ut Christus circa creaturas ratione destitutas miracula ederet, ut ostenderet, se esse omnium Creatorem, cujus virtuti, & divinitati obsequi, & obtemperare debebat omnis creatura. Sic Christus miraculum fecit circa pisces, *Luce* cap. 5. & *Ioannis* cap. ult. circà arbores, *Matth.* cap. 21. Imperavit ventis & mari, *Matth.* cap. 8. multiplicavit panes in Deserto, *Matth.* cap. 14. & tempore Passionis divinâ ipsius virtute scissum est velum Templi, terra mota est, aperta sunt monumenta, petræ scissæ sunt, omniaque insensibilia elementa Mundi in execrationem Judaici sceleris unam protulerunt Sententiam.

DICEs: Legitur *Matth.* cap. 21. quòd Christus, cùm esuriret, &

vi-

vidisset fici arborem secus viam, venit ad eam, cūque nihil in ea invenisset nisi folia, imprecatus est illi, dicendo: *Nunquā ex te fructus nascatur in sempiternum, & confestim arborem sterilem & aridam reddidit.* Observat autem *Sanctus Marcus* cap. 11. *Quod tunc non erat tempus ficorum.* Quare igitur Christus maledixit huic arbori, eò quòd fructus non haberet, si necdūm advenisset tempus fructuum? habent enim arbores stara tempora, quibus edant fætus suos, ut iniquus videatur, qui sterilem reddit arborem, quæ non ante tempus fuctus produxit. Quare etiam Christus accurrit ad ficum, & excussit si quid esset fructuum, cū tamen probè sciret nihil omninò esse præter folia? Non videtur igitur fuisse conveniens ut Christus malediceret huic arbori, eamque, edito miraculo, sterilem, & aridam redderet.

Respondeo: hoc miraculum, quod Christus exsiccando ficulneam edidit, si littera tantum, sive id quod gestum est, spectetur, Christo videri indignum, at, si attendatur mystica ratio ob quam Christus ejusmodi patravit miraculum, summā esse admiratione dignum. Voluit enim Christus per hanc maledictam ficum, veluti per parabolam, significare, se in Sacerdotibus, Scribis, & Phariseis, qui dulcissimi fructus Evangelici maximam de se spem præbebant, nihil omninò fructus reperisse. Scribæ siquidem, & Pharisei prolixè orabant, largiebantur elemosynam, quin & lata phylacteria, mirum quoddam pietatis studium, præferebant; pompā ceremoniarum, legisque observandæ zelo gloriabantur. Hæc nimirum erant folia, vel ante tempus fructum pollicentia, quæ tamen fructibus fidei, humilitatis, & sinceræ pœnitentiæ vacua erant; quia hæc omnia Scribæ, & Pharisei factitabant ut sanctitatis famam, apud homines captarent, & suæ, quam jactabant, justitiæ falso honore capti, imperata ad salutem pœnitentiam & humilitatem spernebant. Christus ergo eo miraculo, quo ficulneam exsiccavit, docere voluit: nihil esse deploratius impietate, falsâ religionis specie fucatâ. Hæc ficus promerita est execrationem Christi, ne quis foliorum pompâ deceptus, ex hoc hominum genere posthâc speret ullum suavissimæ charitatis Evangelicæ fructum. In hanc rem appositè ait *S. Ambrosius* Enarratione in Psalm. 1. *Virtutes sine Fide folia sunt: videntur vivere, sed prodesse non possunt. Agitantur vento, quia non habent fundamentum. Quanti gentiles habent misericordiam, habent sobrietatem, sed fructum non habent, quia Fidem non habent? labuntur citò folia, ubi ventus flaverit. Et aliqui Judæi habent castimoniam, sedulitatem in lectione multam, & diligentiam: sed sine fructu sunt, & versantur ut folia. Hæc fortè sunt folia quæ Salvator in illa ficu reperit, sed fructum non invenit.* Idem docet *Sanctus Gregorius Papa*, seu potius alius Auctor *Comment. in librum 1. Regum*, libro 6. ad cap. 15. vers. 30. ubi hæc habet: *In fructu, non in foliis, aut ramis pœnitentia cognoscenda est. Quasi arbor quippè bona voluntas est. Confessionis ergo verba quid sunt aliud nisi folia? Non ergo nobis*

*bis folia propter se ipsa, sed propter fructum expetenda sunt, quia idcirco
omnis confessio peccatorum recipitur, ut fructus pœnitentiæ subsequatur.
Unde & Dominus arborem foliis decoram, fructu sterilem, maledixit, quia
Confessionis ornatum non recipit sine fructu afflictionis.*

H Y M N U S.

De Transfiguratione Christi.

HOc, jussa quondam rumpimus,
Festo die, silentia;
Celata dudum jam decet
Vulgare nos mysteria.

Montis sub alto vertice,
Tribus vocatis testibus,
O Christe, visus hæcenus.
Terris homo, pates Deus.

Tuæ latens lucis jubar
Sacros in artus effluit,
Vestis tuo te numine,
Tibique totus redderis.

Cælo tonante, protinus
Audita summi vox Patris.
Te nube ruptâ Filium,
Quo gloriatur, asserit.

Hic est Magister omnium,
Quem pronus orbis audiat:
Silete mortales; Deus,
Qui nos docet, fatur Deus.

Fons lucis æternæ, Deus,
Qui nube nostri corporis
Das temperati numinis
Blandâ frui præsentia

Cessante jam miraculo,
Quo te premebas hæcenus,
Mortale quidquid sumpseras,
Splendore circumfunditur,

Rei gerendæ conscius
Fidos sodales eligis;
Ut qui tuæ testes necis,
Testes tuæ sint gloriæ,

Ad astra curru flammeo
Qui raptus olim tranſiit,
Sub mole lucis obrutus,
Vix te tuendo ſuſtinet.

E fronte qui lucem vibrat,
Cedit tuis fulgoribus,
Vetusta lex jam ſe pavet
Legi novæ componere.

Quàm nos potenter allicis!
Te Chriſte quando detegis,
Te quando celas, providus
Nobis peræquè conſulis,

Hic nos adoptat filios
Qui te vocavit Filium:
Sponſor futuræ gloriæ
Dat certa nobis pignora.

E nube quid Pater probat?
De monte quid Fili doces?
Umbris procul cedentibus,
Reſtabat una Veritas.

Ut juſſa Patris impleas,
Maſtanda mundo viſtima;
Formam reſumens priſtinam
Mortalitati redderis.

Fac, Chriſte, qui nobis lates,
Obſcura dum regit Fides,
Fractis ſolutos corpore,
Nos te videre, te frui.

DISSERTATIO DECIMAQUINTA

*De anno, die, hora, & loco passionis, seu mortis
Christi Domini.*

DUO dubia, quæ Theologi movere solent, in hac Dissertatione discutienda, ac dirimenda suscipio. Primum dubium est de initio, & fine LXX. Danielis Hebdomadam. Nam, cum juxta celeberrimum Danielis vaticinium, quod in ore omnium Christianorum est, Messias, idest, Christus, occidendus sit in medio hebdomadis septuagesimæ, gravis inter viros eruditos de exordio, & fine LXX. Danielis hebdomadam suboritur disceptatio. Alterum dubium est, quoto ætatis suæ anno Christus mortem obierit? Quæ duo dubia totidem paragraphis dissolvam.

PARAGRAPHUS PRIMUS

De initio, & fine LXX. Danielis Hebdomadam.

QUONIAM ex LXX. Danielis hebdomadibus in sequenti paragrapho investigaturi sumus annum, quo Christus Dominus mortuus est, operæ pretium est ut hic exponamus celeberrimum illius Prophetæ oraculum, quod eo majori attentione, animique curâ dignum esse videtur, quod in eo de adventu, & morte Servatoris fides maximè stabilietur, & Judæorum incredulitas, Messiam suum adhuc expectantium, ita refellatur, ut ex pertinacioribus vix quisquam hiscere audeat. Sic autem habet Danielis vaticinium, quod legitur c. 9. *Septuaginta hebdomades abbreviatæ sunt super populum tuum, & super Urbem sanctam tuam, ut consummetur prævaricatio, & finem accipiat peccatum, & deleatur iniquitas, & adducatur justitia sempiterna, & impleatur visio, & Prophetia, & ungatur sanctus sanctorum. Scito ergo & animadvertite: ab exitu sermonis ut iterum ædificetur Hierusalem, usque ad Christum ducem, hebdomades septem, & hebdomades sexaginta duæ erunt; & rursum ædificabitur platea, & muri in angustia temporum, Confirmabit autem, pactum multis hebdomada una, & in dimidio hebdomadis deficiet hostia, & sacrificium, & erit in Templo abominatio desolationis, & usque in consummationem, & finem perseverabit desolatio. In hoc Danielis Vaticinio circumstantiæ notantur, quæ soli Jesu Christo competere possunt. Is etenim venturus prænnunciatur, in cujus adventu celsabunt visiones & Prophetiæ; certum autem est, Prophetas à tempore adventus Christi omnino in Synagoga celsasse, sicut Judæi ipsi vel inviti fatentur. Is*

rursus

rursus prænnunciatur venturus, quo occiso, Civitas Hierusalem, & San-
ctuarium dissipari debebat. At utrumque dissipatum esse sub Imp. *Ves-
pasiano* & *Tito* negare haud possunt Judæi. Is venturus prænnunciatur,
in cujus adventu deficiet hostia & sacrificium. At utrumque jam defe-
cisse experiuntur Judæi, qui, everso Templo Salomonico, nullum sa-
crificium jam offerre possunt. Is demum prædicitur venturus, quo tan-
dem mortuo, futura erat in Templo abominatio desolationis usque ad
consummationem & finem duratura: At, id Judæi nunc oculis usurpant,
sunt enim omnibus exosi, dispersi, abjecti, miseri, extorres, sine pa-
tricia, sine Principe, sine Sacerdote, sine Sacrificio, sine Templo. Vè-
rùm, quamvis hoc Danielis Vaticinium in solum Jesum Christum qua-
drare satis pateat, attamen, ut clariùs explanetur, duo præstanda sunt.
Primò, ostendendum est, quid, sint Danielis hebdomades? Secundò, præ-
figendum est initium LXX. Danielis hebdomadam, quo semel constituto,
manifestò patebit, Christum, juxtà Danielis prædictionem, in medio
hebdomadis septuagesimæ fuisse mactatum, & omnibus veteris legis sa-
crificiis, ac cæremoniis finem impositum. Circà primam difficultatem
convenit inter omnes Chronologos, hebdomades, de quibus sermonem
habet Daniel cap. 9. non esse hebdomades dierum, aut mensium, aut
decenniorum, aut jubilariorum, aut sæculorum, sed esse hebdomades
annorum, juxtà morem numerandi Hebræorum. Dicitur enim *Leviti-
ci* cap. 25. *Numerabis quoque tibi septem hebdomades annorum, id est, se-
ptidè septem, quæ simul faciunt quadraginta novem*. Tales etiam anno-
rum hebdomades in usu fuerunt extra Hebræos, potissimum apud
Astrologos, Medicos, ac Philosophos, qui, teste *Censorino* cap. 14.
libri de die natali, hebdomadibus humanam vitam emensi sunt. Hinc
apud *Macrobius* lib. 1. in somnium Scipionis cap. 6. *Post ter septenos
annos quarta annorum hebdomas* ponitur pro quarta hominis æta-
te. Et *Varro* apud *Aulum Gellium* lib. 3. noctium Atticarum cap. 10.
Se duodecimam annorum hebdomadam ingressum esse affirmat, hoc est,
se octogenarium esse dicit. Undè perspicuum est, LXX. hebdomades, de
quibus cap. 9. loquitur Propheta Daniel, esse annorum hebdomades,
quæ simul collectæ efficiunt numerum quadringentorum, & nonaginta
annorum. In hoc consentiunt omnes Chronologi, & inter Judæos R.
Abarbanel, R. *Aben Esra*, alique Rabbini hunc Danielis locum expli-
cantes, qui subindè rejiciunt vana illa commenta Judæorum, quorum
alii, ut tempus venturi Messæ in longum ævum protrahere possint, as-
serunt, septuaginta Danielis hebdomades, non annorum simpliciter,
sed decenniorum esse, adeò ut unaquæque hebdomada septem annorum
decades, hoc est, annos septuaginta conficeret, ac proindè septuaginta
hebdomades complecterentur annos quater mille nongentos. Alii verò
Judæi dicunt, hebdomades Danielis non esse hebdomades annorum, vel
decenniorum, sed esse hebdomades jubilariorum, adeò ut hebdomada

una septem Jubilæos, hoc est, trecentos quinquaginta annos comprehenderet: est enim Judaicus Jubilæus annorum quinquaginta periodus, ac subindè septuaginta hebdomades referunt annos quadringentos quinquaginta supra vicies centena millia. Alii denique Judæi pertendunt, hebdomades *Danielis* non esse annorum, nec decenniorum, nec Jubilæorum, sed sæculorum, quarum scilicet quælibet hebdomada complectatur septem sæcula, sicque septuaginta hebdomades sæculorum referant annos nongentos supra quadragesies centena millia. Hæc, inquam, vana Judæorum commenta explodunt periti Rabbini, & ultrò consentiunt, hebdomades, quarum meminit Propheta *Daniel*, esse hebdomades annorum, adeoque septuaginta hebdomades simul collectas efficere numerum quadringentorum & nonaginta annorum. At, de initio *LXX.* illarum *Danielis* hebdomadam, non una omnium est sententia, sed incredibilis potiùs opinionum conflictus. *Sanctus Hieronymus* jam tum suo sæculo octo recensuit opiniones, *Benedictus* verò *Pererius* quindecim enumerat, eisque confutandis decimam sextam adjicit tanquam probabiliorum. Quò fit, ut meritò dici possit cum *Isaaco Vossio* cap. 10. Chronologiæ sacræ, quòd nulla pars Chronologiæ à multis sæculis tam vexavit humana ingenia, quàm quæ de annis Persarum, & de *Danielis* hebdomadibus agit. Tot diversus, in quas abeunt Chronologi, opiniones, ne in immensum diffundar, aliis discutiendas lubens permitto, hic dumtaxat breviter proponam eam, quæ mihi magis probatur, sententiam, & quæ ad istum nodum gordium secundum temper visa est. expeditissimi.

DICO. ITAQUE: *Exordium LXX. Danielis hebdomadam assignendum esse anno septimo Artaxerxis Longimani, Persarum Regis.*

Ut faciliùs intelligatur hæc assertio, duo sunt prænotanda. Primum prænotandum est, quatuor à Regibus Persarum data esse in gratiam Judæorum Edicta. Primum Edictum Judæis datum est à *Cyro*, sicut legitur cap. 1. lib. 1. *Esdræ*. Alterum datum est à *Dario Hytaspæ*, ut dicitur cap. 6. lib. 1. *Esdræ*. Tertium Edictum Judæis concessum est ab *Artaxerxe Longimano* anno ipsius Regni septimo, ut refert *Esdras* cap. 7. lib. 1. Postremum Edictum in gratiam Judæorum dedit idem *Artaxerxes Longimanus* anno vigesimo Regni sui, sicut scriptum legimus cap. 2. lib. 2. *Esdræ*. Cum igitur *Daniel* asserat, initium *LXX.* hebdomadam, ducendum esse ab exitu *sermonis*, hoc est, ab Edicto, quo Judæis permittenda erat potestas iterum adificandi Hierusalem, hinc quærun Chronologi, à quo Edicto, ex his quatuor in gratiam Judæorum à Regibus Persarum concessis, septuaginta *Danielis* hebdomades auspiciari debeant. Recentiores benè multi initium *LXX.* *Danielis* hebdomadam arcessendum esse putant ab illo Edicto, quod *Artaxerxes* in gratiam Judæorum concessit anno vigesimo Regni sui. Sed ipse cum aliis viris eruditis probabilius cenfeo: *LXX.* *Danielis* hebdomades initium habuisse

se à promulgatione hujus Edicti, quod Artaxerxes Longimanus in gratiam Judæorum dedit anno septimo Regni sui.

Secundò, prænotandum est, annum septimum Artaxerxis Longimani concurrere cum anno tertio Olympiadis octuagesimæ, periodi veterò Julianæ 4256. ante Æram vulgarem 457. Qua in re consentiunt tam antiqui, quàm moderni Historici. *Eusebius* quippè in Chronico asserit, Artaxerxem Longimanum iniisse Regnum anno primo Olympiadis septuagesimæ nonæ, seu anno periodi Julianæ 4250. ante Æram vulgarem 463. Quam quidem Chronologiæ rationem longè antè *Eusebium* traderat accuratissimus temporum explanator *Julius Africanus* (cujus quinque Chronographiæ libros laudat *Eusebius* lib. 6. Hist. Eccles. cap. 31. eosque fermè integros in Chronicon suum convasavit) Nàm juxtà *Julii Africani* calculum, quando Artaxerxes vicessimum Regni sui habebat annum, erat octogesima tertiæ Olympiadis annus quartus, ut ex ejus quinto volumine refert *Sanctus Hieronymus* in cap. 9. *Danielis*. Hic autem *Julii Africani* calculus apertè supponit, annum primum Regni Artaxerxis Longimani copulari debere cum anno primo Olympiadis septuagesimæ nonæ, seu cum anno periodi Julianæ 4250. ante Æram vulgarem 463. Nàm quinque Olympiades, ut notum est omnibus, efficiunt annos viginti. Accedit etiam *Diodorus*, qui lib. 11. Bibliot. refert Xerxem, patrem Artaxerxis, occisum fuisse anno quarto Olympiadis septuagesimæ octavæ, ipsumque Artaxerxem, Artabano regicidâ interfecto, rerum potitum esse, & Imperii Persici gubernacula tenuisse. Statuamus ergò, quod extra omnem dubitationis aleam positum esse debet, Artaxerxem Longimanum regnare cœpisse anno primo Olympiadis septuagesimæ nonæ, seu anno periodi Julianæ 4250. ante Æram vulgarem 463. Ex quo palàm sequitur, annum septimum Regni Artaxerxis concurrere cum anno tertio Olympiadis octogesimo, seu cum anno periodi Julianæ 4256. ante Æram vulgarem 457. Fatentur quippè omnes Chronologi, annum primum æræ vulgaris cœpisse anno primo Olymp. 195. seu anno periodi Julianæ 4714. His semel suppositis.

Probatur, initium LXX. Danielis hebdomadam putandum esse ab anno septimo Artaxerxis Longimani, hac ratione. Christus occidi debuit, juxtà vaticinium Danielis, in medio hebdomadis septuagesimæ, hoc est, anno quadringentesimo octogesimo sexto ab exordio LXX. Danielis hebdomadam, atqui ab anno septimo Artaxerxis Longimani usque ad mortem Christi effluerunt anni 486. Ergò ab anno septimo Regni Artaxerxis Longimani putari debet initium LXX. Danielis hebdomadam. Probatum. annus septimus Regni Artaxerxis Longimani concurrat, sicut mox diximus, cum anno tertio Olympiadis octuagesimæ, seu cum anno periodi Julianæ 4256. ante Æram vulgarem 457. Ab hoc igitur septimo Regni Artaxerxis Longimani usque ad annum primum Æræ vulgaris, hoc est, usque ad annum periodi Julianæ 4714. effluerunt

anni 457. quibus annis si addas annos viginti novem *Æræ* vulgaris (Christus enim, ut in sequenti paragrapho ostendam, mortuus est anno vigesimo nono *Æræ* vulgaris) comperies ab anno septimo Regni Artaxerxis Longimani ad obitum usque Christi Domini interfuxisse annos 486. Adeoque Christum mortuum esse in medio hebdomadis septuagesimæ, sicut prædictum est à Daniele Propheta. Porro, fixo semel, ac constituto LXX. Danielis hebdomadam initio, facili negotio intelligitur, quandonam finem exitumque habuerint. Nam LXX. Danielis hebdomades, ut mox dictum est, efficiunt annos 490. Cum ergo ab anno septimo Artaxerxis Longimani usque ad obitum Christi effluerint anni 486. sequitur, LXX. Danielis hebdomades finem, exitumque habuisse quadriennio integro post Passionem Christi.

In hac sententia, de exordio, & fine LXX. Danielis hebdomadam, omnia sibi optimè coherent. At in sententia eorum, qui ab anno vigesimo Regni Artaxerxis LXX. Danielis hebdomadam ducunt initium, ingens occurrit & insuperabilis difficultas. Annus siquidem vigesimus Regni Artaxerxis Longimani, juxta calculum *Julii Africani, Eusebii, & Diodori*, connecti debet cum anno quarto Olympiadis octogesiæ tertiz, seu cum anno periodi Julianæ quater millesimo ducentesimo sexagesimo nono, antè *Æram* vulgarem quadringentesimo quadragesimo quarto. Undè sequitur, ab anno vigesimo Regni Artaxerxis Longimani usque ad annum primum *Æræ* vulgaris, idest, usque ad annum periodi Julianæ quater millesimum septingentesimum decimum quartum, effluxisse dumtaxat annos 444. quibus si adjicias *Æræ* vulgaris annos triginta tres (anno siquidem trigésimo tertio *Æræ* vulgaris mortem, Christi illigare solent isti Chronologi) invenies ab anno vigesimo Regni Artaxerxis Longimani usque ad mortem Christi fluxisse tantummodò annos 477. Quod quidem temporis intervallum, ut nemo non videt, nimis exiguum est ad implendum vaticinium Danielis de LXX. hebdomadibus. Daniel namque disertè prædixit, Christum in medio hebdomadis septuagesimæ occisum iri, anni autem 476. conficiunt dumtaxat sexaginta & octo hebdomades completas. Quapropter, si initium LXX. Danielis hebdomadam ab anno vigesimo Regni Artaxerxis duceretur, Christus fuisset occisus anno primo hebdomadis sexagesimæ nonæ, cum tamen juxta Daniele debuerit occidi in medio hebdomadis septuagesimæ. Hæc est implexa, ac salebrosa difficultas, in qua enodanda diu multumque insu larant illi Chronologi, qui initium LXX. Danielis hebdomadam desumendum putant ab anno vigesimo Regni Artaxerxis Longimani. Sed ut illis Chronologis omnis omnino præcludatur aditus, rationes, quibus ab ea difficultate sese expedire conantur, hic breviter expendere, ac confutare non erit inutile.

In primis, nonnulli tempus, quod ab anno vigesimo Regni Artaxerxis Longimani ad mortem usque Christi Servatoris nostri colligendum

dum venit, laxant, altiusque reperunt initium Regni Artaxerxis. Ea in sententia versantur *Percrinus*, & *Petavius*, qui Epocham Regni Artaxerxis Longimani conjiciunt in annum duodecimum Xerxis, patris ejus, quo anno suspicantur, Artaxerxem, ejus filium, in Imperii communionem fuisse assumptum. Hanc conjecturam istis, quæ subijciam, momentis se adstruere posse autumant prædicti Scriptores. Primò, quia, inquit, mos ille apud Persarum Reges inoleverat, ut, dum ad bella extra Persidem gerenda proficiscebantur, Regni hæredem designarent, sicut non semel testatur *Herodotus*. Cum igitur *Xerxes*, Persarum Rex, anno primo Olympiadis septuagesimæ quintæ, seu anno Regni sui duodecimo, ferale bellum adversus Græciam moveret, *Artaxerxem*, filium suum, Regni sui socium, confortem, atque participem eodem anno instituit ac declaravit. Præterea, inquit, *Thucydides*, *Charon Lampfacenus*, alii-que probatissimæ fidei Historici tradunt, *Themistoclem*, Græciâ profugum, Epistolam ad *Artaxerxem*, filium *Xerxis*, recens regnantem dedisse, sed, versâ vice, *Diodorum Siculum* scribere, *Themistoclem* anno secundo Olympiadis septuagesimæ septimæ adisse ad *Xerxem*, non ad *Artaxerxem*, idemque à claris Historiarum Scriptoribus, *Ephoro*, *Dinone*, *Clitarcho*, & *Heraclide* litteris mandatum esse *Plutarchus* docet, & apud *Strabonem*, atque *Eusebium* legitur. Porro, hæc diversorum Scriptorum discrepantia & repugnantia testimonia facili negotio conciliari posse dicunt isti Chronologi, si *Xerxem*, ejusque filium *Artaxerxem*, simul regnasse dicatur, hoc est, si semel admittatur, *Artaxerxem* anno Regni duodecimo Patris sui *Xerxis*, ab eo ad Regni consortium fuisse adscitum. Sed facile refelluntur hæc duæ conjecturæ, quibus prædicti Chronologi fulciuntur. Et primò quidè, quamvis non inficias eam, si lelemne olim fuisse Persarum Regibus aliquem Regni sui socium adsciscere, dum ad gerenda bella proficiscebantur, nullibi tamen legitur, Persarum Reges solitos esse, dum viverent, aliquem sibi designare socium, qui ejusdem Regni particeps esset. De eâ quippè ad Regni societatem vigente apud Persas consuetudine ne minimum quidem verbum fecerunt veteres Historici, qui de Persarum Regibus scripserunt. Secundò, falsò supponunt isti Chronologi, annum duodecimum Regni *Xerxis* incidisse in annum primum Olympiadis septuagesimæ quintæ, cum certum sit, juxta accuratissimum, quem mox exhibuimus, calculum, *Iulii Africani*, *Eusebii*, & *Diodori*, *Xerxem*, Patrem *Artaxerxis*, cepisse in Perside regnare anno tertio Olympiadis septuagesimæ tertiz, ac subindè annum eius Regni duodecimum incidisse in annum tertium Olympiadis septuagesimæ sextæ, & annum ejus mortis connectendum esse cum anno quarto Olympiadis septuagesimæ nonæ. Tertio, *Plutarchus*, sicut iam observavimus, ex *Thucydide*, *Charonte Lampfaceno*, & vetustis quibusdam Chronicis, scribit, *Themistoclem*, jam defuncto *Xerxe*, Persarum Rege, venisse ad *Artaxerxem*, ejus filium, post patris sui

sui *Xerxis* obitum, in Perside regnantem. Quo testimonio manifestè constat; simul non regnasse *Xerxem*, & *Artaxerxem*, quandò in Persidem *Themistocles* secessit. Quartò, si *Artaxerxes* anno duodecimo Regni patris sui *Xerxis* confors Regni factus fuisset, puer admodum extitisset, cum ad eum *Themistocles* venisset. Testatur siquidem *Iustinus* lib. 3. Hist. *Artaxerxem*, quandò, post obitum patris sui *Xerxis* in Perside regnare cæpit, adhuc puerum fuisse. Vivente igitur adhuc patre suo longè magis puer esse debuit, & præsertim anno duodecimo Regni Patris sui *Xerxis*, quo anno supponunt Chronologi, quos impugno, fuisse *Artaxerxem* à patre suo *Xerxe* in Regni communionem assumptum: Atqui tamen *Thucydides*, & *Plutarchus* narrant, adveniente *Themistocle* in Persidem, ea ab *Artaxerxe* gesta dictavè fuisse, quæ nonnisi ab homine virili jam & maturâ prudentiâ prædito, dici ac peragi poterant. Denique, etiamsi liberalitèr darem (quod tamen constanter pernego) *Artaxerxem* anno duodecimo Regni patris suis *Xerxis* in societatem Regni adscitum esse, indè nihiloseciùs colligi minimè deberet, initium computandi annos Regni *Artaxerxis* ducendum esse ab anno duodecimo Regni *Xerxis*, quo in Regni societatem ab ipso adscitus supponitur. Id enim penitèus abhorret à consuetudine Historicorum, qui initium putandi annos Regni *Artaxerxis* ab eo dumtaxat anno accersere solent, quo, post defunctum patrem *Xerxem*, plenam & integram in Perside potestatem adeptus est, solusque regnavit. Fictitia itaque est, & infirmo tìbicine nixa hæc *Artaxerxis* cum patre suo *Xerxe*, adhuc vivente, Regni societas, quam idèò commenti sunt laudati Chronologi, quia, subducto annorum calculo, animadverterunt, initium lxx. Danielis hebdomadam, quæ spatium annorum 490. complectuntur, duci non posse ab anno vigesimo Regni *Artaxerxis*, si semel anni Regni *Artaxerxis* putentur (sicut reverà putari debent) ab obitu patris sui *Xerxis*.

Alii Chronologi, cum doctissimo *Jacobo Vsserio*, licet improbent tanquàm omninò fictitiam hanc Regni *Artaxerxis* Longimani cum patre communionem, attamen, ut à proposita difficultate sese extricare possint, aliquot ex Regno *Xerxis* eximunt annos, voluntque, *Xerxem* successisse *Dario*, patri suo, anno periodi Julianæ quater millesimo ducentesimo vigesimo nono, antè Æram vulgarem quadringentesimo octogesimo quintò, *Artaxerxem* verò Longimanum, *Xerxis* filium, patre jam defuncto, Regnum iniisse anno periodi Julianæ quater millesimo ducentesimo quadragésimo primo, antè Æram vulgarem quadringentesimo septuagesimo tertio.

Sed hæc *Vsserii*, & aliorum conjectura falsi convincitur. Primò, quia *Artaxerxes* Longimanus, juxta calculum *Iulii Africani*, *Eusebii*, & *Diodori*, regnare cæpit anno primo Olympiadis 79. seu anno periodi Julianæ quater millesimo ducentesimo quinquagesimo, perperam igitur

tur supponit *Dfferius*, Artaxerxem Longimanum Regnum iniisse anno periodi Julianæ quater millesimo ducentesimo quadagesimo primo. Prætereà, juxtà calculum *Dfferii*, Xerxes, pater Artaxerxis Longimani, regnasset tantum annis duodecim, asserit quippè *Dfferius*, Xerxem successisse Dario patri suo anno periodi Julianæ quater millesimo ducentesimo vigesimo nono, & Artaxerxem Longimanum, ejus filium, patre jam defuncto, Regnum iniisse anno periodi Julianæ quater millesimo ducentesimo quadagesimo primo, undè manifestò sequitur, Xerxis Regni Epocham, juxtà calculum *Dfferii*, altiore esse Epochâ Regni Artaxerxis annis duodecim, quos Xerxes tantum regnaverit, quod tamen est contra fidem antiquorum, qui scribunt, Xerxem regnasse vel annos viginti, ut ait *Eusebius* in Chronico, vel annos viginti & unum, ut scribit *Ptolæus* in Mathematico Babyloniorum, Persarumque Regum Canone.

Alii denique Chronologi, cum probè perspectum habeant, temporis intervallum, quod ab anno vigesimo Regni Artaxerxis usque ad obitum Christi colligitur, paulò brevius esse, contrahunt hebdomades Danielis in annos Solaribus breviores, quales sunt anni Lunares, in quibus nullus reperitur mensis embolimus, seu intercalaris. Quippè ne vel pueros, qui necdum ære lavantur, latet, annum Solarem Julianum, seu popularem, constare diebus 365. & horis circiter sex, annum verò Lunarem civilem dies continere 354. Quò fit, ut sexaginta septem hebdomades annorum Solarium, quæ simul collectæ efficiunt annos Solares 469. adæquent sexaginta novem hebdomadas annorum Lunarium, quæ simul collectæ dant annos Lunares 483. Posito autem ejusmodi hebdomadam annorum Lunarium exordio in anno vigesimo Regni Artaxerxis Longimani, facillè reperitur, sexaginta novem hebdomadas annorum Lunarium expletas esse antè Baptismum, & prædicationem Christi, ac subindè ipsius mortem ad sequentem hebdomadam, seu septuagesimam, pertinere. Auctor hujus sententiæ fuit *Julius Africanus*, qui benè multos sequaces habuit, præcipuè *Theodoretum*, *Bedam*, *Zonaram*, *Rupertum*, *Dionysium Carthusianum*, *Pererium*, *Torniellum*, *Danielem Huetium*, *Abrincensem Episcopum*, in *Demonstrat. sua Evangelica*, Proposit. 9. *Samuelem Bafnazium* Dissertat. 8. Tom. 3. *Annal. politico Ecclesiast.* & alios.

Verùm, hæc sententia nihilò præcedentibus verior est; tum quia hujusmodi hebdomades annorum Lunarium, quales sunt apud Arabes, sine mense embolinio, seu intercalari, nunquam fuerunt in usu apud Hebræos. Tum quia etiam certissimè constat, solenne semper fuisse Hebræis ad Lunarem annum civilem, quo utebantur, Solari anno coequandum, more Græcorum, quolibet biennio, vel triennio mensem intercalare, aut quolibet octennio tres menses embolimos adiicere, ut fatetur *Julius Africanus* tum apud *Eusebium* lib. 8. de *Demonstrat. Evan-*
gel.

gel. tùm apud S. *Hieronymum* in cap. 9. *Danielis*, & apud *Georgium Syncellum* in *Chronographia*, idque à Moysis temporibus apud Hebræos usitatum fuisse tradit *Aben Esra*. Tantùm igitur abest, ut Lunarìs Hebræorum supputatio, ad quam confugiunt moderni quidam Chronologi, nobis persuadeat admittendos esse in calculo LXX. *Danielis* hebdomadam annos purè Lunares, idest, absque mense embolimo, ut planè nos contrarium edoceat. Neque etiam annos purè Lunares intelligere cogit Angelica, & Prophetica locutio, quàm LXX. hebdomades abbreviatæ dicuntur; & enim abbreviatæ, idem est ac *decisse*, seu *definite*, aut *decretæ*, ut explicat *Thodoretus*; vel, ut ait doctissimus *Tetartius* lib. 12. de doctrinatemporum cap. 35. LXX. hebdomades abbreviatæ dicuntur quia ex incerto, & infinito tempore, ad certum & constitutum spatium Prophetico vaticinio, ac divinà ordinatione contractus est adventus Messia, sive quòd ex longiore intervallo, quod ab Orbis initio fluxit usque ad Danielem, brevissimum ad ortum Messia restabat, non secus ac ex.gr. in senectute vita hominis abbreviata dicitur. Idem docet *Zyranus*, origine Hebræus, & in rebus Hebraicis versatissimus. Quapropter immeritò moderni illi Chronologi in hac Angelica, & Prophetica locutione expiscantur annos purè Lunares.

DILUUNTUR OBJECTIONES

Arguitur primò: In Edicto, quod Artaxerxes Longimanus anno septimo Regni sui Judæis concessit, ne ullum quidem verbum est de potestate ædificandi Hierusalem, seu fossam, plateas, & muros Urbis, publicaquæ ædificia instaurandi, sed in eo mentio dumtaxat fit de potestate Judæis datà Templum reparandi, & in patrium Solum revertendi; atqui LXX. *Danielis* hebdomadam exordium duci debet ab exitu *Sermonis* ut iterùm ædificetur Hierusalem, idest, à promulgatione illius Edicti, quo Judæis instaurandæ Urbis data est potestas; ejusmodi autem Edictum Judæis tantummodò concessum est anno vigesimo Artaxerxis Longimani, ergò non ab anno septimo, sed potiùs ab anno vigesimo Regni Artaxerxis Longimani duci debet exordium LXX. *Danielis* hebdomadam.

Respondeo: Quòd, licèt in hoc Edicto Judæis concessio anno septimo Artaxerxis Longimani, non fiat diserta, seu expressa, & explicita mentio de instaurandis mænibus Hierusalem, implicite tamen facultas cingendi mænibus Urbem in eo Edicto satis superque continetur. Legimus quippè libri 1. *Esdrae* cap. 7. Artaxerxem Longimanum anno septimo Regni sui dedisse Esdræ omnem petitionem ejus: Ipse Esdras: *ascendit de Babylone . . . & dedit ei Rex secundum manum Domini Dei ejus super eum, omnem petitionem ejus*. Porro, quis credat Esdræ ab illo Rege, seu Artaxerxe Longimano, de Judæis tam benemerito, & cui ipsemet

met Esdras gratissimus erat, mœnium Urbis Hierusalem instaurationem non postulasse? Vero igitur quàm simillimum est, Esdras anno septimo Regni Artaxerxis postulasse muros Urbis ædificandi potestatem, eamque ab illo Persarum Rege impetrasse, quamvis de ea in præsentī Edictō diserta non habeatur mentio.

Arguitur secundò: Antè annum vigesimum Artaxerxis Longimani Urbis Sacra, seu Hierusalem, in ruderibus, cineribusque sepulta fuis jacebat, ergo Iudæi anno septimo Regni Artaxerxis Longimani non obtinuerunt Edictum de instaurandis mœnibus Urbis Hierusalem: si enim tale Decretum obtinuissent Iudæi, illud procul dubio executioni mandassent. Prob. ant. ex lachrymis Nehemiæ, paternæ Urbis cladem lugentis, cap. 1. l. 1. *Esdræ: Et dixi Regi, quare non mareat vultus meus, quia Civitas domus sepulchrorum patris mei deserta est, & portæ ejus combustæ sunt igni? Hinc idem Nehemias, aspirante Deo, has preces Artaxerxi Longimano fudit: Si videtur Regi bonum, & si placeat servus antè faciem tuam, ut mittas me ad Iudæam, sepulchrum patris mei, & ædificabo eam.* Precibus Nehemiæ de renovanda Urbe, cùm Artaxerxes Longimani anno vigesimo Regni sui annuisset, ille profectus Hierosolymam, popularibus suis ea locutus est: *Vos vobis afflictionem, in qua sumus, quia Hierusalem deserta est, & portæ ejus consumptæ sunt igni: venite, & ædificemus muros Hierusalem, & non simus ultra opprobrium.* Ex quibus verbis liquidò patet, antè annum vigesimum Regni Artaxerxis Longimani Urbem Sacram necdum mœnibus cinctam, ac renovatam fuisse.

Respondeo: Hanc facultatem reparandi muros Hierusalem, quam Iudæi anno septimo Regni Artaxerxis obtinuerunt, non fuisse executioni mandatam, quia Samaritani, alique insensibilissimi eorum hostes armatâ manu, & clandestinis molitionibus Judæos ad mœnium Urbis reparationem sese accingentes inturbabant, quò factum est, ut Iudæi ob tumultus, & hostium insidias cōacti fuerint aliud Edictum ab Artaxerxe Longimano (anno videlicet vigesimo Regni ejus) postulare, quò ille Rex expressis, ac disertis verbis confirmaret potestatem ædificandi mœnia Hierusalem, quam ipsis jam anno septimo Regni sui concesserat. Nec mirum, si primum Edictum anno septimo Regni Artaxerxis Longimani Iudæis concessum, quod implicite facultatem construendi muros Hierusalem continebat, non fuerit à Iudæis executioni mandatam, quandoquidē in executione postremi Decreti dati anno vigesimo Regni Artaxerxis Longimani, quod diserte, & expresse potestatem muros Hierusalem reparandi permittebat, tot, & tanta Iudæi passi sunt incommoda, ut parum abfuerit quin ab incepta murorum extructione desisterent. Nam Sanaballat, & Tobias Ammonites, Arabes, Ammanitæ, & Azoti zgrè ferentes, & gravissimâ irâ succensi, quòd Iudæi Hierosolyma muris cingerent, conglomerato agmine, factaque conspiratione in arma ruerunt, ne inceptum à Iudæis opus ad umbilicum perduceretur,

illudque reapse impediissent, nisi Iudæi armis muniti, & diurnam, nocturnamque custodiam agentes, hostium, mœnia subvertere molientium, impetum repulissent:

Arguitur tertio: Lxx. Danielis hebdomades completæ solùm fuerunt tempore excidii Hierosolymitani, ergo initium Lxx. Danielis hebdomadam affigi nequit anno septimo Artaxerxis Longimani. Consequens est evidens, nam ab anno septimo Artaxerxis usque ad excidium Hierosolymitanum, quod contigit sub Tito Imperatore interfluxerunt anni pluriusquam 490. quo annorum spatio Lxx. Danielis continentur hebdomades. Prob. ant. ex verbis Angeli Daniele m alloquentis: *Septuaginta hebdomades abbreviatæ sunt super populum tuum, & super Urbem Sanctam tuam Et erit in Templo abominatio desolationis &c.* Quibus verbis Angelus in Lxx. hebdomadam spatio excidium Hierosolymitanum includit, adeò ut sensus sit, semel finitâ septuagesimâ hebdomadâ, Templum Hierosolymitanum excisum iri, ergo Lxx. Danielis hebdomades fuerunt tantummodò. completæ in excidio Hierosolymitano.

Respondeo neg. ant. ad cuius prob. distinguo ant. septuaginta hebdomades abbreviatæ sunt super populum, & super Urbem Sanctam, ut veniat Messias, & ungatur Sanctus Sanctorum, & ut expietur peccatum, concedo, septuaginta hebdomades abbreviatæ sunt super populum, & super Urbem Sanctam, ut vastentur Hierosolyma, & Templum excindantur, nego. Sensus ergo Angelici oraculi est, Lxx. hebdomades abbreviatas esse super populum, & super Urbem Sanctam, idest, Hierusalem, ut veniat Messias tamdiù desideratus, & ungatur Sanctus Sanctorum, quod reverà contigit, quandò Christus Servator noster in medio hebdomadis septuagesimæ ad redimendos homines, eosque in libertatem filiorum Dei asserendos mortuus est. Dùm verò Angelus, Daniele m alloquens, subdit: *Et erit in Templo abominatio desolationis &c.* his verbis prædicit quidem Angelus Hierosolymorum devastationem, Templique excidium, non quòd hæc immediatè post finem hebdomadis septuagesimæ contingere deberent, sed quia non multò post finem hebdomadis septuagesimæ eventura erant, tanquàm pœna irroganda fontibus Iudæis, qui repudiata Numinis indulgentiâ, neglectâ pœnitentiâ, atque Prophetarum oraculis pedibus conculcatis, Redemptorem suum occiderunt.

Arguitur ultimò: *Nehemias*, sicut legitur cap. 2. lib. 2. *Esdræ*, post impetratas à Rege Persarum Litteras; instauravit muros Hierusalem, atqui ejusmodi Litteras ab *Artaxerxe Longimano*, Persarum Rege, *Nehemias* non obtinuit: exordium itaque Lxx. Danielis hebdomadam, non ab *Artaxerxe Longimano*, sed ab alio Persarum Rege peti debet. Probatur minor Propositio: *Nehemias*, qui, ad reedificandos Hierosolymorum muros, à Rege Persarum litteras obtinuit, vixit usque ad tempora

pore *Alexandri Magni*, qui *Darium Codomanum*, ultimum Persarum, Regem, ad Arbella, seu Gaugamala, tum Persici Imperii finem, devicit. Ergo ille Persarum Rex, à quo *Nehemias* impetravit Litteras ad instaurandos Hierosolymorum muros, non potuit esse *Artaxerxes Longimanus*; alioqui *Nehemias* sub *Alexandro Magno*, ad cuius tempora pervenit, habuisset ad minus centum & sexaginta annos, sicut manifestè patet ex isto calculo Chronologico annorum Regni Persarum ducto ab initio Regni *Artaxerxis Longimani* usque ad exordium *Alexandri Magni*. At enim, *Artaxerxes Longimanus* regnavit annis 40. *Darius Nothus* regnavit annis viginti. *Artaxerxes Mneumon*, seu Memoriosus, regnavit annis 43. *Darius Ochus* regnavit annis 23. *Arses* regnavit annis 2. & *Darius Codomanus*, ultimus Persarum Rex, regnavit annis 7. eoque devicto, *Alexander Magnus* in Babylone, tanquam Supremus Monarcha, regnare cæpit, & ab eo auspicator Imperium Græcorum. Facta igitur hac supputatione annorum Regni Persarum, videlicet ab initio Regni *Artaxerxis Longimani* usque ad exordium Imperii *Alexandri Magni*, liquidò constat, ab exordio Regni *Artaxerxis Longimani* usque ad initium *Alexandri Magni* interfluxisse annos centum triginta quinque. Credibile autem est, *Nehemiam*, dum Litteras, ad restaurandos Hierosolymorum muros, ab *Artaxerxe Longimano* obtinuit, attigisse ad minus annum ætatis suæ trigessimum quintum, ac subindè, si ad tempora *Alexandri Magni* pervenit, necessariò dicendum est, *Nehemiam*, imperante *Alexandro Magno*, habuisse annos plusquam centum & sexaginta. Quod quidem ab omni veri specie abhorreere videtur, cum nulla tunc temporis tantæ longævitatatis suppetant exempla. Porro, *Nehemiam*, qui litteras ad reedificandos Hierosolymorum muros à Rege Persarum impetravit, superstitem adhuc fuisse imperante *Alexandro Magno*, duobus momentis evinci potest. Primò, quia *Nehemias* lib. 2. Esdræ cap. 12. v. 22. recensendo nomina Sacerdotum, qui ascenderunt in Hierusalem ad celebrandam dedicationem muri ejusdem Urbis, nominat *Jeddoæ*, quem *Josephus* lib. 11. Antiq. Jud. capp. 7. & 8. eundem facit ac *Jaddum*, Summum Pontificem, qui *Alexandro Magno*, dum Hierosolymorum Urbem ingressus est, occurrit. Cum igitur *Nehemias*, qui Litteras à Persarum Rege impetravit ad instaurandos muros Hierusalem, coævus fuerit *Jaddo*, Summo Pontifici, qui *Alexandro M.* occurrit, manifestum est, *Nehemiam* vixisse usque ad tempora *Alexandri M.* Præterea, *Josephus* loco, mox laudato, ait, hunc *Sanaballetem*, Cutæum, seu natione Samaritanum, qui opibus potens *Nehemiam* turbaverat Hierosolymorum mœnia rescipientem, *Josephus*, inquam, ait, eundem *Sanaballetem* secutum fuisse Castra *Alexandri Magni*, eique Urbem *Gazam* oppugnanti suppetias tulisse cum auxiliari manu octo millium militum. Testatur insuper idem *Josephus*, eundem *Sanaballetem* dedisse *Manassi*, fratri *Jaddi*, Pontificis Maximi, in Matrimonium filiam suam nomine *Nicaso*. Ex qua *Josephi* narratione evidentè col-

ligitur, *Nehemiam*, qui Litteras ad instaurandos muros Hierusalem à Persarum Rege impetravit, unà cum *Sanaballetē*, & *Taddo*, Pontifice Maximo, vixisse usque ad tempora *Alexandri Magni*.

Respondeo primò, *Taddum*, & *Sanaballetem*, quos nominat *Nehemias*, diversos planè esse à *Taddo*, & *Sanaballetē*, quos memorat *Iosephus*, Hebræus, quosque ait in vivis fuisse tempore *Alexandri Magni*. Verùm enim verò, si *Iaddus*, cuius meminit *Nehemias*, idem esset ac *Iaddus*, qui, teste *Iosepho*, obviam ivit *Alexandro Magno*, Hierosolyma venienti, habuisset *Iaddus*, cuius mentionem facit *Nehemias*, annos plulquàm centum & sexaginta, quandò *Alexander Magnus* venit in Orientem. Similiter, si *Sanaballetes*, natione Samaritanus, quem *Nehemias* dicit, muro- rum Urbis Hierusalem instauratori obstitisse, idem esset ac ille *Sanaballetes*, qui ut scribit *Iosephus*, suppetias tulit *Alexandro Magno*, Urbem Gazam oppugnanti, necesse esset, ut hic *Sanaballetes*, quem nominat *Nehemias*, attigisset tempore *Alexandri Magni* annum ætatis suæ centesimū & fermè septuagesimū, & nihiloscilicet adhuc vegetus, fortis, robustus, & ad subeundos omnes militiæ labores strenuus: Credat hoc *Iudeus Apella*; non ego. Ut igitur tam *Nehemiæ*, quàm *Iosepho* fides constare possit, dicendum est, *Iaddum*, & *Sanaballetem*, quorum meminit *Nehemias*, esse omninò diversos à *Iaddo*, & *Sanaballetē*, qui, teste *Iosepho*, vixerunt tempore *Alexandri Magni*.

Respondeo secundò cum doctissimo P. Bernardo Lamy, Congregationis Oratorii Presbytero, in suo *Apparatu Chronologico*: errasse *Iosephum*, Hebræum, aut ab alio deceptum fuisse, dum *Iaddum*, Summum Pontificem, & *Sanaballetem*, quorum meminit *Nehemiæ*, detruxit ad tempora *Alexandri Magni*. Constat enim, ait eruditus ille Scriptor, de Persarum Regum serie imperitè scripsisse *Iosephum*, quippè qui, aut alius, quem sequitur, cùm Historiam Persicam non alibi, quàm apud *Ezaram*, & *Nehemiam* legisset, prætermittit quæ sibi ignota erant; aliquos tantùm, non omnes Persarum Reges enumerat, sic conjungens tempora longo intervallo disita. Primò enim *Iosephus* memorat *Cyrum*, qui Judæos in libertatem asseruit; Secundò *Cambysem*, qui prohibuit, ne Templum ædificaretur; deindè *Darium Histaspem*, qui id permisit; postea *Xerxem*, faventem Judæis, quem tamen non distinguit ab *Artaxerxe Longiman*; postea per censet *Artaxerxem*, quem etiam non distinguit ab *Artaxerxe Mnemone*, seu memorioso; denique, omissis *Xerxe* secundo, *Dario Notho*, & *Ocho*, Persarum Regibus, protinus disserit de *Alexandro Magno*, quasi isti Persarum Reges nunquàm fuissent in rerum natura. Quapropter, jure optimo concludit jam laudatus *Bernardus Lamy*, ea, quæ apud *Iosephum*, Hebræum, narrantur de *Sanaballetē*, & de *Iaddo*, Summi Pontificis, occurfu cum *Alexandro Magno*, conficta fuisse ad commendationem Judaicæ gentis à viro quodam Judaico, exoticæ, seu Persarum Regum Historiæ, ignaro, qui, cùm non haberet, quos exscriberet, præ-
ter

ter *Eſdras*, & *Nehemiam*, qui Hiſtoriam ſuam non perduxerunt uſque ad *Alexandrum Magnum*, cùm, inquam, non poſſet verà narratione ex-
plere illum hiatus Hiſtoriæ Judaicæ ab *Artaxerxe Longimano* uſque ad
Alexandrum Magnum, quali ſaltu pertranſiuit; accommodans temporibus
Alexandri Magni, quæ multos antè annos obtigerant ſub antiquioribus
Perſarum Regibus. Alios errores, circa Hiſtoriam Regum Perſarum
in Operibus *Iosephi*, Hebræi, detexit doctiſſimus *Ferrandus*, in Supremo
Parieſi Senatu Cauſidicus, Tom. 1. libri, quem Gallicè edidit, cuique
Titulus eſt: *Reſſions ſur la Religion Chreſtienne*, ubi, pag. 199. obſervat primò,
Iosephum in ſua Hiſtoria narrare, *Nehemiam* Hieroſolymorum Urbem
veniſſe, regnante *Xerxe*, cùm tamen Scriptura Sacra diſertè doceat,
Nehemiam, regnante *Artaxerxe Longimano*, veniſſe Hieroſolyma.
Secundò obſervat idem clariſſimus Auctoꝝ, *Iosephum* aſſerere,
Xerxem regnaſſe annos 28. cùm tamen omnes Hiſtorici prophani, qui
Hiſtoriam Regum Perſarum litteris conſignarunt, Regno *Xerxis* tribu-
ant tantùm annos 20. vel ad ſummum annos 21. Cùm igitur ſub tot
mendis cubet Regum Perſarum Hiſtoria à *Iosepho* deſcripta, vel ab aliquo
Judæo corrupta, nemini mirum videri debet, ſi ipſe, cum peritis huius
temporis Criticis ac Chronologis, narrationi *Iosephi* de *Sanaballetis*,
& *Iaddi*, Summi Pontificis, cum *Alexandro Magno* occuꝝu aſſenſum non
præbeam.

Advertat primò Lectoꝝ in fine huiusce Paragraphi, ferendam non
eſſe temeritatem *Ioannis Marſhami* in ſuo Chronico Canone *Ægyptiaco*,
Hebræico, *Græco*, pag. 562. 563. 568. & ſeqq. uſque ad pag. 576. & *P. Ioannis*
Harduini, qui tam inſigne Danielis de Chriſto vaticinium auſi ſunt
Chriſtianis penitus auferre, aſſerentes, LXX. Danielis hebdomades longè
antè Chriſti adventum fuiſſe completas, eaſque in Antiocho Epiphane,
à quo Templum Hieroſolymitanum pollutum eſt, finem, exitumque ha-
buiſſe: Sed illorum multis momentis redarguit temeritas. Primò,
quia SS. Patres ad probandum Chriſtum eſſe verum Meſſiam, ſemper uſi
ſunt hoc vaticinio Danielis, qui, ut inquit *Theodoretus* in ſuorum Com-
mentar. Præfatione, multò apertius, quàm alii omnes, magni Dei, & Sal-
vatoris noſtri Jeſu Chriſti prædixit adventum, neque ſolùm ea, quæ factu-
rus eſſet, ante commemoravit, ſed etiam tempus præſignavit, numerumque
adſcripſit annorum, qui uſque ad illius adventum interceſſerunt.

Secundò, ipſemet Chriſtus *Matth. cap. 24.* loquitur de abomi-
natione deſolationis in Templo prædictà à Daniele Propheta in vatici-
nio de LXX. hebdomadibus, tanquàm de re futura, dicens Judæis: Cùm
ergo videritis abominationem deſolationis, quæ dicta eſt à Daniele Pro-
pheta, ſtante in loco ſancto, qui legit, intelligat. Quibus verbis aper-
tè oſtendit Chriſtus Dominus, abominationem deſolationis, quæ præ-
dicta eſt à Daniele Propheta, necdùm factam eſſe, ſed propedièm exe-
cutioni mandandam, tempore videlicèt Titi Imperatoris, qui Hiero-
ſoly-

Ierusalem, Templumque vastavit. Perperam ergo *Marshamus & Harduinus* desolationem, & vastationem Templi, prædictam à Daniele Prophetâ, referunt ad tempora Antiochi Epiphanis, qui iuge sacrificium abstulit, Templique sanctitatem violavit. Tertiò, character desolationis, quæ à Daniele prædicitur, trahi minimè potest ad Antiochi Epiphanis tempora, nam desolatio à Daniele prædicta usque ad consummationem, & finem perseverabit, hoc est, ad finem usque sæculorum, at Antiochica desolationis abominatio, ut legitur lib. 1. *Mach.* cap. 4. per tres dumtaxat annos duravit; Judas enim Machabæus triennio post Templum repurgavit, novum Judæi altare erexerunt, interiores Templi partes repararunt, sacrificium obtulerunt. Nullum ergo Hierosolymis, nullum Templo, nullum oblationibus finem Antiochus Epiphanes imposuit, sed ipsarum dumtaxat ordinem per triennium inturbavit, ac subindè Templi desolatio, quæ facta est ab Antiocho Epiphane, non ea est, quæ à Daniele prædicitur, in qua sacrificia omnino, & semper cessare debent. Quartò, quo pacto Antiocho Epiphani convenire possunt hæc Danielis Prophetiæ verba: *Confirmabit pactum multis hebdomadâ unâ*: cum ex duobus Machabæorum libris certissimè constet, tantum abesse, ut Antiochus Epiphanes, Syriæ Rex, pactum aliquod inierit aut confirmaverit cum Judæis, ut potius semper fuerit eorum insensissimus hostis, & acerrimus persecutor. Denique, Daniel in hocce vaticinio insignibus Notis indigitat Christum, quem justitiam sempiternam appellat, Messiam, Sacerdotem, unctum, Sanctum Sanctorum, qui pactum, seu legem suam, multis confirmabit hebdomadâ unâ, & in dimidio hebdomadis excindetur, ac cessare faciet sacrificium, & oblationem; quæ omnia in solo Christo Domino fuerunt impleta, cujus cruentâ morte finem accepit peccatum, deleta est iniquitas, adducta justitia sempiterna, veteris legis figuræ completæ, omnesque cæremoniæ Moisaicæ prorsus enervatæ vires amiserunt. Ferenda igitur non est temeritas *Marshami*, & *P. Harduini*, qui novis, contortis, & peregrinis interpretationibus hoc Danielis vaticinium longè ante Christi adventum, hoc est, tempore Antiochi Epiphanis, fuisse completum, totâ reclamante Sanctorum Patrum traditione, asseverare ausi sunt.

Advertat secundò Lector, extitisse olim nonnullos, qui, teste *Sancto Augustino* Epist. 199. aliàs 80. ad *Hesychium*, existimabant, Prophetiam Danielis de 11. hebdomadibus esse complendam non in primò, sed solum in secundo Christi adventu. Qui error, ut ait ibidem Sanctus Doctor, adversatur expositoribus divinorum eloquiorum, qui hanc Prophetiam non solum computatione temporum, verum etiam rebus ipsis completam fuisse demonstrant, maxime quod ibi scriptum est, & ungetur Sanctus Sanctorum: vel propter quod in eadem Prophetia Hebræi Codices expressius habent, *occidetur Christus, & non erit ejus*, idest, non erit ejus Civitatis; quoniam sic alienatus est à Judæis, qui eum propter-

pterea Salvatorem , Redemptoremque suum non esse crediderunt , quia occidere potuerunt . Neque enim in fine sæculi ungendus , aut occidendus est Christus , ut ista Prophetia Danielis tunc expectetur implenda , quæ nondum credatur impleta . *Tertullianus* etiam , in Libro , quem edidit contra Judæos , aperte ostendit , hanc *Danielis* Prophetiam fuisse in primo adventu Christi Domini omnino completam . Sic enim , explicans hæc *Danielis* Verba : ut impleatur visio & Prophetia , alloquitur Judæos : *Quid est , quod dicit (Daniel) signari visum & Prophetiam , quoniam omnes Prophetæ nuntiabant de ipso (seu de Christo) quoddam esset venturus , & pati haberet : igitur quoniam adimpleta est Prophetia per adventum ejus , propterea signari visionem & Prophetiam dicebat , quoniam ipse est signaculum omnium Prophetarum adimplens omnia , quæ retrò Prophetæ de eo nunciaverant . Post enim adventum & Passionem Christi jam nec visio , nec Prophetia est , qui Christum nunciet , venturum . Denique , hoc si non ita est , exhibeant Judæi Prophetarum post Christum aliqua Volumina .*

PARAGRAPHUS SECUNDUS.

Quoto anno ætatis sue Christus mortuus sit ? & de die , hora , & loco ipsius mortis .

Observandum primò : Deceptos olim fuisse antiquiores quosdam . Scriptores Ecclesiasticos , qui existimarunt Christum Dominum , post susceptum baptisma , uno dumtaxat anno superstitem fuisse , eumque mortem oppetiisse anno ætatis suæ trigesimo primo . Ità censent *Origenes* tractatu 35. in *Matth. Philastrinus* lib. de Hæresibus cap. 58. *Cyrillus Alexandrinus* in cap. 32. *Isaïæ* , & *Clemens Alexandrinus* lib. 1. *Stromatum* , ubi , postquam adduxit hæc *Lucæ* verba : *Et erat Jesus veniens ad baptisma quasi triginta annorum ;* continuo subjungit : *Et quod anno solo oporteret eum prædicare , hoc quoque sic scriptum est : annum acceptabilem Domini prædicatum me misit ,* *Isaïæ* cap. 61. Eundem errorem hæretici *Valentiniani* pervicaciter defenderunt , quippe qui fictitium triginta æonum suorum numerum eo potissimum argumento probare nitebantur , quod Christus triginta annos natus ad baptismum venerit , & duodecimo post mense cruci fuerit affixus . Verùm , hic error è diametro opponitur Scripturæ Sacræ , ex qua , ut mox evincam , facile colligitur Christum , post susceptum Baptisma , quatuor peregrisse Paschata , ac subindè illum post annos tres , totidemque circiter menses , à suscepto Baptismate in crucem actum fuisse .

Observandum secundò , *Sanctum Irenæum* , Episcopum Lugdunensem , lib. 2. adversus hæreses cap. 39. ubi calamum in errorem *Valentinianorum* stringit , in alium errorem huic è fronte oppositum impegisse .

Alse-

Afferit quippè, Christum, post susceptum baptismum, multis annis prædicasse, illumque dumtaxat obiisse intra quadragesimum, & quinquagesimum ætatis annum: hoc est, quando jam declinabat in senium, juxta illud à Judæis dictum *Joannis* cap. 8. *Quinquaginta annos nondum habes, & Abraham vidisti?* Non me latet, Cardinalem *Baronium* ad annum Christi 34. num. 141. & doctissimum *Antonium Pagium* in sua *Critica Historico-Chronologica* in *Annales Baronii* ad annum Christi XXXII. affirmare, *Sanctum Irenæum* in hunc errorem non fuisse lapsum, eaque verba, quæ in laudato *S. Irenæi* loco leguntur, à Sancto illo Doctore non fuisse scripta. Quod quidem ex eo maximè probare nituntur laudati Scriptores, quia prius dixerat *Irenæus*, Christum, post baptismum anno ætatis suæ trigésimo susceptum, tribus peractis Paschatibus, mortem obiisse. Nulli autem, inquirunt *Baronius*, & *Pagius*, in illo modo credibile fiet, *Sanctum Irenæum* sibi tam absurdè contradixisse, ut eundem Christum anno ætatis suæ circiter quinquagesimo mortuum esse dixerit. Quapropter, quæcumque ea de re memorato in loco apud *Sanctum Irenæum* verba leguntur, ea ab imperito aliquo Scriptore in illius textum intrusa esse sibi persuadent Eminent. *Annalium Parens*, & *Antonius Pagius*. Verùm, ut ingenuè fatear, hæc conjectura non omnino certa videtur. Nam primò, omnium Codicum cum editorum, tum manuscriptorum, qui hunc integrum *Sancti Irenæi* locum exhibent, auctoritate convellitur. Secundò, incredibile non est, *S. Irenæum* quædam de ætate Christi tradidisse contraria his, quæ superiùs de illius baptismo scripserat: nam non raro accidit, ut Scriptor aliqui, etsi peritissimus, in adversarios suos, præsertim hæreticos, invehens, nonnulla, quæ secum aliquando pugnant, congerat argumenta. Potuit ergo *Sanctus Irenæus*, nimio in *Valentinianos* animi ardore succensus, aut æstu disputationis abreptus, suam de Christi Domini ætate longiùs, & ultra, quàm par erat, dilatare argumentationem. Sed ut ut sit de mente *Sancti Irenæi* circa ætatem Christi, quam impræsentiarum excutere animus non est; maximè, cum Eminentissimus *Annalium Parens Baronius* *Sanctum* illum Doctorem ab hoc errore vindicet: nemo saltem negare potest, hanc sententiam, quæ mortem Christi ad annum ejus ætatis quinquagesimum, refert, non solum Scripturæ, & traditioni adversari, sed ab historiarum veritate prorsus alienam esse. Enimverò, Christus, ut testatur Scriptura Sacra, passus est sub Pontio Pilato, Judææ Procuratore, at, si Christus mortuus fuisset anno ætatis suæ quinquagesimo, sub Pontio Pilato passus non esset, quia Pilatus, teste *Josepho*, suâ Procuratoris Judææ dignitate fuit abdicatus, antequàm vitæ excederet Tiberius, hoc est, ante annum trigésimum septimum *Æræ Christianæ*, ac subiadè longè ante annum quinquagesimum ætatis Christi. Narrat quippè *Josephus* lib. 18. antiq. cap. 5. quòd postquàm Pilatus præcipuos ac potentiores ex Samaritanis capite mulctasset, suspicatus eos meditari defectionem, eò quòd non-

nonnulli ex illis, decepti promissis cujusdam impostoris, confluxissent in montem Garizim: tunc primates adieunt Vitellium, virum Consulare, & Syriæ Præsidentem, Pilatumque cedis accusant, negantes defensionem fuisse à Romanis illum concursum in tirathaba, sed refugium contra Pilati violentiam. At Vitellius, Marcello amico ad procurationem Judæe misso, Pilatum jussit Romam proficisci, responsurum apud Cæsarem ad obiecta per Judæos crimina. Ille decem annis in sua Provincia exactis, cum necesse haberet parere Vitellio, ad Urbem iter suscepit: quod priusquam pervenisset, vita excessit Tiberius. Ex quo Josephi testimonio liquet, Pilatum procurationem Judææ ante obitum Imper. Tiberii amisisse, cum igitur Tiberius mortuus sit die XVII. Kal. Aprilis, seu die XVI. Martii juxta Tacitum, & Suetonium, vel juxta Dionem, die VIII. Kal. Aprilis, seu die XXV. Martii, anni Urbis Romæ conditæ 790. Æræ Christianæ 37. Consulibus Cu. Acceronio Proculo, & Pontio Nigrino, sequitur evidentissimè (nisi quis in lumine Solis majorem requirat claritatem) Pilatum, suâ procurationis Judææ dignitate fuisse privatum ante annum trigessimum septimum Æræ Christianæ, ac proinde multò ante annum Christi quinquagesimum. Alia argumenta legi possunt apud Sanctum Augustinum lib. 2. de Doctrina Christiana cap. 28. ubi improbat, & refellit sententiam eorum, qui Christum vixisse dicunt annos 46. atque, eos ex ignorantia historiarum esse deceptos. Nam & per Olympiades & per Consulum nomina, multa sæpè quæruntur à nobis, & ignoratio Consulatus, quo natus est Dominus, & quo passus est, non nullos coegit errare, inquit Aquilinus ille Doctor. His itaque observatis.

DICO: Christum mortuum fuisse anno ætatis suæ trigésimo tertio ineunte, anno decimo nono Imperii Proconsularis Tiberii, anno septuagesimo quarto Juliano, anno primo Olympiadis ducentesimo secundæ, hebdomadam Danielis quadringentesimo octogesimo sexto, periodi Julianæ quater millesimo septingentesimo quadragésimo secundo. Æræ vulgaris vigésimo nono, Consulibus Cajo Rubellio Gemino & Cajo Fusio Gemino.

Probatum primò: Christus baptizatus est anno ætatis suæ ineunte, trigésimo, Æræ vulgaris vigésimo sexto, Imperii Proconsularis Tiberii decimo sexto, ergo Christus mortuus est anno ætatis suæ ineunte trigésimo tertio, Æræ vulgaris vigésimo nono, Imperii Proconsularis Tiberii decimo nono. Antecedens ex his, quæ in Dissertatione decima dicta sunt, satis superque probatum manet. Prob. consequ. Christus post susceptum baptismum, quatuor peregit Paschata, primum videlicet paulò post susceptionem baptismi anno ætatis suæ trigésimo, Æræ vulgaris vigésimo sexto. Alterum Pascha celebravit Christus anno ætatis suæ trigésimo primo, & Æræ vulgaris vigésimo septimo; tertium Pascha egit anno ætatis suæ trigésimo secundo, & Æræ vulgaris vigésimo octavo; ultimum, denique Pascha fecit Christus anno ætatis suæ ineunte trigésimo tertio, & Æræ vulgaris vigésimo nono; ergo cum Christus baptizatus fuerit anno

ineunte ætatis suæ trigesimo, ærę vulgaris vigesimo sexto, Imperii Proconsularis decimo sexto, palàm sequitur eum fuisse Cruci affixum anno ætatis suę trigesimo tertio ineunte, ærę vulgaris vigesimo nono, Imperii Proconsularis Tiberii decimo nono. Quòd autem Christus à suscepto baptismo quatuor celebraverit Paschata, satis apertè ex Scriptura Sacra colligi potest. Nam de primo Paschate mentionem facit *Sanctus Joannes* cap. 2. sui Evangelii, dum dicit: Christum tempore Paschatis ementes, & vendentes ejecisse è Templo. Alterum Pascha à Christo peractum refert idem Evangelista cap. 5. & illud est, in quo Christus languidum triginta octo annorum sanavit: *Post hæc erat dies festus Judæorum, & ascendit Jesus Jerusalem, nam per diem festum, hic Pascha intelligi debere asserunt Sanctus Irenęus lib. 2. adversus hæreses. cap. 29. Eusebius lib. 8. demonstr. Evang. Hieronymus, & Theodoretus in cap. 9. Danielis.* Nomine etiam *diei festi* simpliciter intelligi festum Paschatis liquet ex cap. 14. & 15. *Marci*, ex cap. 23. *Lucę*, & ex *Joannis* cap. 5.

Dies ergo festus, de quo *S. Joannes* cap. 5. sermonem habet, & in quo Christus languidum sanavit, erat dies festus Paschę, non verò Pentecostes, aut Tabernaculorum, ut quidam falsò opinantur Scripturę Sacrę Interpretes, quibus assentitur *P. Bernardus Lamy* in sua Harmonia Evangelica pag. 168: Tertium Christi Pascha commemorat idem Evangelista Joannes cap. 6. & est illud, in quo Christus ex quinque panibus quinque millia hominum satiavit. Ultimum denique Pascha celebravit Christus pridè quàm pateretur, ut legitur apud *Matthæum* cap. 26. apud *Marcum* cap. 14. & apud *Lucam* cap. 22. idque, auxiliante Deo, copiosius infrà commonstrabo, refellendo novum Systema *P. Bernardi Lamy* Congreg. Oratorii Presbyteri, qui in sua Concordia Evangelica contendit, Christum, eo anno, quo mortuus est, nullum peregrisse Pascha, sed sacrosanctum dumtaxat instituisse. Eucharistię Sacramentum.

Probatur secundò: Christus, juxtà *Danielis* vaticinium, occidi debuit in medio hebdomadis Septuagesimę, idest, anno quadringentesimo octogesimo sexto ab initio Lxx. hebdomadum, atqui in superiori Paragrapho ostendimus, annum quadringentesimum octogesium sextum ab exordio Lxx. *Danielis* hebdomadum concurrere cum anno ærę vulgaris vigesimo nono, qui connectitur cum anno ætatis Christi trigesimo tertio ineunte, ergo Christus mortuus est anno ærę vulgaris vigesimo. nono, ætatis suę trigesimo tertio ineunte.

Probatur tertio: ex constanti traditione omnium antiquorum Patrum, & Scriptorum Ecclesiasticorum, qui docent Christum mortuum fuisse anno vigesimo nono ærę vulgaris, sub Consulatu duorum Gemini-
norum. Sic censent *Tertullianus* lib. contra Judæos cap. 8. *Lactantius* lib. 4. Instit. cap. 10. & lib. de mortibus Persecutorum, *Severus Sulpicius*

*cins lib. 1. Historiæ sacræ cap. 27. Augustinus lib. 18. de Civit. Dei cap. ult. Hieronymus in cap. 9. Danielis, Victor Aquitanus, Fasti sub nomine Idatii, à Sirmundo, & Labbæo editi, antiquissimus Catalogus Romanorum Pontificum tempore Liberii Papæ, idest, quarto sæculo exaratus, innumera Martyrologia, uno verbo, omnes fermè antiqui Scriptores, quos citat Bollandus in Diatriba præliminari ad mensem Aprilem, affirmant Christum in Crucem actum fuisse anno vigesimo nono æræ vulgaris, Consulibus duobus Geminis. Porro fatentur peritiores hujus temporis Chronologi, annum vigesimum nonum æræ vulgaris concurrere cum anno trigesimo tertio ætatis Christi, idque etiam clarè deducitur ex his, quæ diximus in Dissertatione sexta, commonstrando Natale proprium Christi consignari debere anno quadragesimo Imperii Augusti, quadriennio solido ante æram vulgarem; cum igitur juxta avitam Sanctorum Patrum traditionem, Christus mortuus sit anno vigesimo nono æræ vulgaris, planum ac expeditum est, Christum mortuum esse anno ætatis suæ trigesimo tertio, periodi Julianæ quater millesimo septingentesimo quadragesimo secundo, Olympiadis ducentesimæ secundæ anno primo, Imperii Proconsularis Tiberii decimo nono, ab obitu Imper. Augusti decimo sexto. Huic veterum opinioni de Christo, Geminis Consulibus, moriente, doctissimi Chronologi adhæserunt, *Petitus, Vossius, Schelstratus, Pagius, Paulus Baudry, Professor Ultrajectinus*, in suis eruditis ad Lactantium de morte Persecutorum, Notis, & multi alii hujus ætatis doctissimi Scriptores. Nec valet, si quis dicat, Antiquos illos Scriptores, quos mox laudavi, Solis Lunæque rationcinia minus comperta habuisse, ideòque Feriarum potiùs, quàm Lunarum rationes ineuntes, contulisse Passionem Christi Domini in annum Æræ Vulgaris vigesimum nonum, quòd in eo anno tantùm Feriæ sextam & diem Martii vigesimam quintam concurrere comperissent. Id, inquam, si quis dicat, facile refelli potest. Tot enim in prioribus Ecclesiæ sæculis de die, quâ Pascha celebrari debebat, enatæ Controversiæ, tanti Nationum inter se acerrimi conspectus, tam gravia Orientis Occidentisque dissidia, tot super eâ quæstione celebrati toto Orbe Conventus Præsulum, Sanctissimæ illud Nicenæ Synodi Decretum, cæterorum deinde Conciliorum suffragio comprobatum, innumeri denique Paschales Cycli ad Lunæ Solisque vicissitudines moderandas adhibiti, sat superque evincunt, sufficientem per priora Ecclesiæ sæcula fuisse in eâ rerum Astronomicarum scientiam, quam aliundè Patres ac Scriptores illorum temporum ab Alexandrinis Præsulibus, in rebus Astronomicis id ætatis versatissimis, nullo negotio discere potuissent, nisi persuasum habuissent, quæstionem hanc de die, quâ Christus Dominus passus est, non ex astronomicis Dissertationibus ac Lunæ rationibus, sed antiquâ traditione per manus acceptâ, & Veterum testimonio dirimendam esse.*

Probatur ultimò, impugnando sententiam eorum, qui docent Christum mortuum esse anno ætatis suæ trigésimo septimo, qui concurret cum anno trigésimo tertio *Æræ vulgaris*, Consulibus *L. Sulpitio Galba*, & *L. Cornelio Sylla Felice*. Nam primò, hæc sententia apertè pugnat cum Scriptura Sacra, quæ Christum anno ætatis suæ circiter trigésimo baptizatum fuisse perhibet, eumque à suscepto Baptismate, quatuor dumtaxat peregrisse Paschata innuit. Secundò, pugnat etiam cum Ecclesiæ Fide, quæ profitetur Christum Dominum in carne triginta tribus annis usque ad suæ tempora Passionis vixisse, sicut testatur Venerabilis *Beda* Lib. de Ratione Temp. cap. 45. Tertio, omnes Patres mòx à me laudati tradunt: Christum mortuum fuisse 8. Kal. Aprilis, idest, die 25. Martii. Testatur etiam *Henschenius*, se, præter multa Martyrologia typis edita, vidisse viginti manuscripta Martyrologia in variis Europæ Archivis asservata, quæ mortem Christi assignant diei 25. Martii. At si mors Christi consignanda esset anno *Æræ vulgaris* trigésimo tertio, Christus mortuus esset, non die 25. Martii, sed die tertiâ mensis Aprilis, quod adversatur perpetuæ, sibi que semper constanti traditioni Ecclesiæ, quæ mortem Christi assignat diei 21. Martii, cui traditioni, cùm sæculo decimo tertio *Rogerus Baconus*, Ord. S. Francisci, rerum Mathematicarum peritissimus, refragari ausus fuisset, asserens Christum die tertia Aprilis anni *Æræ vulgaris* trigésimi tertii passum fuisse, confestim de errore suspectus malè audit, ut refert *Peadingus* tam in lib. de Scriptoribus Minorum, quàm in secundo Tomo Annalium. Immò sequenti Sæculo cùm *Tostatus* eandem Rogeri sententiam inter alia capita Thesium Senis in Etruria, ubi Eugenii IV. Summi Pontificis Curia tùm temporis erat, propugnasset; in eum acriter invehctus est noster *Joannes à Turrecremata Cardinalis*, nec priùs *Tostati* sententiam impugnare destitit, quàm, datis à Summo Pontifice Judicibus, *Tostatus* erroris postulatus sit, atque damnatus. Denique, Christum mortuum esse ante annum trigésimum tertium *Æræ vulgaris* non obscurè colligitur ex his, quæ habet *Orosius* lib. 7. cap. 4. Refert quippè ille Auctor, quod Tiberius Imperator, postquam à Pilato de Vita, Morte, & Miraculis Salvatoris nostri, cujus per universam Palæstinam celebris erat fama, certior factus esset, remque ad Senatum detulisset; Senatus indignatione motus, quòd non sibi priùs secundum morem delatum esset, ut de suscipiendo cultu priùs ipse decerneret, consecrationem Christi recusavit, Edicto que constituit, exterminandos esse ex Urbe Christianos, præcipuè cum *Sejanus* Tiberii *Præfectus suscipiende Religioni obstinatissime contradiceret*. *Sejanus* itaque, teste *Orosio*, obstitit ne Tiberii suffragium de Christo inter Deos referendo à Senatu reciperetur, atqui *Sejanus* mortuus est anno trigésimo primo *Æræ vulgaris*, Tiberio Cæsare V. & Lælio Sejano Consulibus, ut contra *Possinum* evincunt *Pagius* in sua Critica ad annum *Æræ vulgaris* trigésimum primum, & *Schæstratus* lib. 1. de Antiq. Eccl. ergò Christus mor-

tuus

tuus est ante annum *Æræ* vulgaris trigésimum primum, alioquin si Christus mortuus fuisset anno trigésimo tertio *Æræ* vulgaris, haud dubie *Sejanus*, qui anno *Æræ* vulgaris trigésimo primo in vivis esse desuit, ejus consecrationi non intercellisset.

Scio, quosdam etiamnum reperiri Criticos, qui inter aniles fabulas referunt ea, quæ de Actis Christi à Pilato ad Tiberium, & à Tiberio ad Senatum relatis memoriæ prodita sunt; ajunt enim, credibile non esse Senatum respuisse, quod Tiberio placuerat. Verum, non est dubium quin fallantur illi Critici, nam licet non inficias eam, quædam Acta Pilato fuisse à Gentilibus assicta, teste *Eusebio* lib. 1. Hist. Ecclesiast. cap. 9. attamen vera & genuina extitisse Acta Pilati nullus dubito, præsertim cum antiqui Patres de illis Actis disertam mentionem faciant, *Tertullianus*, Romanarum Legum peritissimus, in Apologetico adversus Gentes cap. 5. *Tiberius*, inquit, *cujus tempore nomen Christianum in sæculum introiit, annunciatum sibi ex Syria Palestina, quæ illic veritatem ipsius Divinitatis revelaverat, detulit ad Senatum cum prærogativa suffragii sui. Senatus, quia non ipse probaverat, respuit. Cæsar in sententia mansit, comminatus periculum accusatoribus Christianorum, & cap. 21. præmissâ mirabilium Christi Gestorum compendiosâ narratione, ita subdit: Ea omnia super Christo Pilatus & ipse jam pro sua conscientia Christianus, Cæsari tunc Tiberio nunciavit: Sed & Cæsares credidissent super Christo, si aut Cæsares non essent sæculo necessarii, aut si & Christiani potuissent esse Cæsares. Justinus, Martyr, in Apologia secunda pro Christianis ad Antoninum, Imperatorem, hæc habet: Hæc ita gesta esse, cognoscere ex Actis, quæ sub Pilato sunt scripta, potestis. Et, nonnullis interjectis, ait: Et quod ista fecerit Christus, ex eis, quæ sub Pilato conscripta sunt, Commentariis, cognoscere potestis. Eusebius lib. 2. Hist. Ecclesiast. cap. 2. rem totam his verbis prolequitur: Cum per omnem jam locum de Resurrectione, & mirabilibus Domini Jesu Christi, & de Ascensione ejus ad Cælum felix fama loqueretur; ac per omnium aures, beati hujus rumoris volveretur opinio: quoniam antiqui moris erat apud Romanos, ut Provinciarum judices, si quid fortè novi in his, quas regebant, Provinciis accidisset, vel Principi, vel Senatui nunciarent; ut ne ex his, quæ gerebantur, ignorare aliquid viderentur: de Resurrectione à mortuis Domini, & Salvatoris nostri Jesu Christi, quæ jam in omnem locum fuerat promulgata, Pilatus Tiberio Principi refert. Sed & de cæteris mirabilibus ejus, & ut post mortem, cum resurrexisset, à quâ plurimis jam Deus esse crederetur. Tiberius, quæ compererat, retulit ad Senatum. Senatus autem sprevisse dicitur, pro eo quod non sibi prius hujus rei judicium fuerit delatum. Sed auctoritatem suam prævenit vulgi sententia; lex etenim erat antiquitus designata, ne quis apud Romanos Deus haberetur, nisi Senatus Decreto, atque sententia confirmatus. Porro autem pro vero hoc erat, quod gerebatur, ne divina virtus humanis putaretur assertionibus indigere; cumque secundum*

ea, quæ supra diximus, rennisset Senatus; Tiberius tamen tenuit sententiam suam, ut ne quid adversus doctrinam Christi moliretur. His similia referunt Orosius, loco mox citato, Epiphanius hæresi 50. Sanctus Gregorius, Turonensis, qui lib. 1. cap. 24. hæc habet: Pilatus autem gesta ad Tiberium mittit, & ei tam de virtutibus Christi, quam de Passione, vel Resurrectione ejus insinuat, quæ gesta apud nos retinentur scripta, denique, Nicephorus Callixtus lib. 2. Historiæ Ecclesiasticæ cap. 8. ejusdem Facti Historici veritatem his verbis dilucidè confirmat: Consuetudo jam inde à plurimis annis obtinuerat, ut qui Præfecturas, ac Provincias sortiti essent, res novas, quæ sub eis accidissent, singulas summum Imperium habenti Cæsari significarent, ut illum nihil prorsus rerum laceret. Itaque de Resurrectione ex mortuis, aliisque prodigiis Iesu Christi Tiberio Cæsari scribens Pilatus, cum res ejus plerasque; tum, quod ex mortuis redi-vivus, sibi quæ ipsi superstes, Deus jam à multis, & quidem præcipuus esse crederetur, renunciavit. Quam rem Tiberius ad Senatum retulit. Senatus autem non esse deliberandum de ea censuit, sub illo prætextu, quod ille non prius veteri more, ipsius Senatus sententiâ in Deos esset relatæ: res autem ipsâ, quod divine doctrinæ disciplina humano prorsus non indigeret auxilio. Sed enim, etiam si Senatus ad eum modum verbum de Servatore rejecisset, Cæsar tamen in sua sententia perstitit, salutarique prædicationi impedimento non fuit. Non est autem incredibile, Senatum respuisse, quod Tiberio placuerat; nam certum est Tiberium sic artem dissimulandi calluisse, ut non agrè ferret quando Senatus quidpiam adversus voluntatem, aut sententiam ejus decerneret, sicut testatur Suetonius, qui de Tiberio, Imperatore, hæc scribit: Quædam adversus sententiam suam, ne questus quidem est.

DILUUNTUR OBJECTIONES.

ARguitur primò: Apostoli, & Discipuli Christi, maxime illi, qui versati sunt in Asia, tradiderunt Christum, quando mortuus est, jam declinasse in senium. Hujus traditionis meminit S. Irenæus lib. 2. adversus Hæreses cap. 39. his verbis: Quia autem triginta annorum ætas primæ indolis est juvenis, & extenditur usque ad quadragesimum annum, omnis quilibet confitebitur; à quadragesimo, & quinquagesimo anno declinat jam in ætatem seniolem, quam habens Dominus noster docebat, sicut Evangelium, & omnes seniores testantur, qui in Asia apud Ioannem discipulum Domini convenerunt, id ipsum tradidisse eis Ioannem.... quidam autem eorum non solum Ioannem, sed & alios Discipulos viderunt, & hæc eadem ab ipsis audierunt, & testantur de hujusmodi relatione. Christus ergo jam declinabat in senium, quando in Crucem actus est, ac subinde in juvenili ætate non est mortuus, anno videlicet trigésimo tertio ineunte ætatis suæ, sed potius anno trigésimo septimo, vel in ætate magis provectâ. Re-

Respondeo: *Sanctum Irenæum*, dum asserit, non solum Seniores, sed etiam Evangelium testari Christum, quando Cruci affixus est, in senium jam declinasse, alludere voluisse ad hæc verba à Judæis de Christo dicta, & à Joanne Evangelistâ relata, *quinguenta annos nondum habes, & Abraham vidisti?* Ex quo Iudæorum testimonio, quod ab aliis Apostolis, sicut à Joanne non semel repetitum audierant Christiani, inductus est *Sanctus Irenæus* ad credendum, id Seniores, qui erant in Asia, à Joanne accepisse, quod postea de senili ætate Christi tradiderunt. Sed in hoc, ut supra observavimus, deceptus est *S. Irenæus*, nulla quippè à Sancto Joanne de senili ætate Christi profecta est traditio. Credibile tamen est hujus traditionis Auctorem fuisse *Papianum*, virum, ut prodit *Eusebius*, pertenuis ingenii, cuique, ut norunt omnes, non raro accidit, ut fabulosas traditiones tanquam ab Apostolis profectas in suis scriptis insereret, quæ etiam quosdam veteres Patres in errorem induxerunt. Hæc autem traditio de senili ætate Christi eo potissimum nomine fabulæ loco haberi debet, quod, sicut superius dictum est, nullo pacto coherere possit cum his, quæ habet Scriptura Sacra de Pilato Procuratore Judææ tempore Passionis Christi. Rejeda igitur spuria illa traditio, dicendum est cum *Sancto Thoma* 3.p. q.46. art.9.ad 4. Christum non in senili, sed potius in juvenili ætate mori voluisse propter tria: *Primò quidem, ut ex hoc magis suam dilectionem commendaret, quod vitam suam pro nobis dedit, quando erat in perfectissimo statu. Secundò, quia non conveniebat, ut in eo appareret naturæ diminutio, sicut nec morbus. Tertiò, ut in juvenili ætate moriens & resurgens, futuram resurrectionis quantitatem in seipso Christus præmonstraret: nude dicitur ad Ephesios cap.4. donec occurramus omnes in unitatem Fidei & agnitionis Filii Dei in virum perfectum in mensuram ætatis plenitudinis Christi.*

Arguitur secundò: Mors Christi huic anno consignari debet, quo contigit celeberrima illa eclipsis apud antiquos celebrata, maxime apud *Tertullianum* in Apolog. cap.21. *Origenem* lib.2. contra *Celsum*, *Sanctum Augustinum* Epist.199. aliàs 80. ad *Hefychium*, & quæ apud Evangelistas *Matthæum* cap.27. & *Lucam* cap.23. his verbis designatur, *ab hora sexta facte sunt tenebræ per universam terram usque ad horam nonam.* Atqui hæc Solis eclipsis incidit in annum *Æræ* vulgaris trigésimum, secundum, qui concurret cum anno ætatis Christi trigésimo sexto, & cum anno Imperii Tiberii ab obitu Augusti decimo octavo, ergo huic anno Passio Christi consignari debet. Prob. min. ex testimonio *Phlegontis*, *Hadriani* Imperatoris *Liberti*, qui apud *Eusebium* in *Chronico* hæc habet: *Quarto autem anno Olympiadis ducentesimæ secundæ magna & excellens inter omnes, quæ ante eam acciderant, defectio Solis est facta: dies hora sexta ita in tenebrosam noctem versa, ut stellæ in Cælo visæ sint, terræque motus per Bithyniam magnam partem Nicææ Urbis evertit. Atqui annus quartus Olymp. ducentesimæ secundæ concurret cum anno* *Æræ*

Æræ vulgaris trigesimo secundo, seu cum anno ætatis Christi trigesimo sexto, & Imperii Tiberii ab obitu Augusti decimo octavo, ergo reverà in hunc annum incidit Solis eclipsis, quæ à *Phlegonte*, & à Sacris Evangelistis tempore Passionis Christi contigisse dicitur.

Respondeo cum peritissimis hujus temporis Chronologis: mendum reperiri circa annum Olympiadis, quo, teste *Phlegonte*, accidit Eclipsis Solis. Ea si quidem Eclipsis non contigit anno quarto Olympiadis ducentessimæ secundæ, sicut per errorem in Textum irrepsit, sed accidit anno primo Olympiadis ducentessimæ secundæ, qui annus, juxta supputationem communem, concurret cum anno, vigesimo nono *Æræ* vulgaris, ætatis Christi trigesimo tertio, & Imperii Proconsularis Tiberii decimo nono, quo anno reverà mortuus est Christus Dominus. Errorem circa annum Olympiadis, quo, teste *Phlegonte*, accidit Eclipsis Solis reperiri, velint nolint, fateri coguntur etiam illi Chronologi, qui mortem Christi illigant anno *Æræ* vulgaris trigesimo tertio, qui concurret cum anno trigesimo septimo ætatis Christi, & cum anno Imperii Tiberii ab obitu Augusti decimo nono: certum quippè est, annum quartum Olympiadis ducentessimæ secundæ non concurrere cum anno trigesimo tertio *Æræ* vulgaris, sed cum anno ejusdem *Æræ* vulgaris trigesimo secundo, seu cum anno ætatis Christi trigesimo sexto, & Imperii Tiberii ab obitu Augusti decimo octavo. Quapropter, moderni illi Chronologi, qui mortem Christi consignant anno trigesimo tertio *Æræ* vulgaris, si sibi constare velint, necesse est ut dicant Eclipsim illam Solis accidisse anno primo Olympiadis ducentessimæ tertiz, ac subindè errasse *Phlegontem* non solum in anno, sed etiam in designanda Olympiade. Nos verò, qui cum peritissimis hujus temporis Chronologis mortem Christi præfigimus anno *Æræ* vulgaris vigesimo nono, licet fateamur, in textum *Phlegontis* irrepsisse mendum circa annum Olympiadis, nulum tamen in designatâ à *Phlegonte* Olympiade ducentesima secundâ errorem agnoscimus. Plura hac de re legi possunt apud doctissimum *Pagium* in Critica Baronii ad annum 32. *Æræ* vulgaris, ubi etiam ex testimonio Iulii Africani, qui uno tantum sæculo post *Phlegontem*, vixit, Opusque ab illo editum de Olympiadibus libris 16. ut ait *Suidas*, comprehensum, videre potuit, probat, *Phlegontem* eodem anno Eclipsim collocasse, quo Christus Dominus Cruci affixus est, hoc est, anno *Æræ* vulgaris vigesimo nono, sub Consulatu duorum Geminorum.

Porro, ex sententia antiquorum Patrum, & Scriptorum Ecclesiasticorum, qui, ut superius diximus, docent, Christum Dominum mortuum esse anno vigesimo nono *Æræ* vulgaris, sub Consulatu duorum Geminorum, facile colligitur, eos itidem existimasse, Eclipsim Solis, quam memorat *Phlegon*, eodem anno, sub Consulatu duorum Geminorum, contigisse. Probant siquidem illi Scriptores autoritate *Phlegontis* Eclipsim Solis accidisse anno, quo Christus mortuus est, ac subindè eodem anno

anno consignant Passionem Christi, quo Phlegon illud Solis deliquium. Si enim Christi Passionem altero, quàm Phlegon, Eclipsim collocasset anno, non mortem Christi miraculosam, quod intendebant, Gentilibus persuasissent, sed se ipsos potius ludibrio exposuissent. Cum igitur antiqui illi Scriptores mortem Christi illigarint anno vigesimo nono *Æræ* vulgaris, sub Consulatu duorum Geminorum, manifestum est, Eclipsim Solis, cujus meminit Phlegon, accidisse eodem anno.

Arguitur tertio: Christus mortuus est, iuxta antiquam, & constantem Ecclesiæ Fidem, Luna decimâ quintâ, & feriâ sextâ, atqui ex omnibus annis, qui de obitu Christi in controversiam venire possunt, nullus reperitur, cuius prima, vel secunda Luna plena esse potuerit feriâ quintâ, vel sextâ, nisi annus trigesimus tertius *Æræ* vulgaris; Huic igitur anno illiganda est mors Christi, non verò anno *Æræ* vulgaris vigesimo nono. Probant minorem moderni Chronologi ex Tabulis Astronomicis, ex quibus, iuxta rigorem Astronomicum, colligunt Lunam decimam quintam incidisse dumtaxat in feriam sextam anni *Æræ* vulgaris trigesimi tertii.

Respondeo: Judæos, ante Urbis Hierosolymitanæ Cladem, nullis Cyclis, nullique Tabulis Astronomicis in stabilienda anni sui forma usos fuisse, sed ἀπὸ τοῦ φαινομένου, seu ab aspectu Lunæ, Neomenias, seu initia mensium suorum Lunarium ordinasse, ut tradunt vetustiores Rabbini apud Langium lib. 1. de Annis Christi cap. 6. idemque docent Petavius lib. 2. de Doctrina temporum, Onuphrius Panutius in Fastis ad annum Urbis Romæ conditæ 789. Joannes Seldenus in Dissertatione de anno civili veteris Reipublicæ, seu Judaicæ, P. Bernardus Lamy in suo Tractatu Historico Paschatis Judæorum, & vetus Auctor apud Clementem Alexandrinum lib. 6. Stromatum, sic scribens de Judæis: *Et nisi Luna apparuerit non agunt Sabbatum, quod dicitur primum, neque agunt Neomeniam, neque azima, neque Festum, neque magnum diem.* Cum igitur Judæi non computarent iuxta rigorem Astronomicum, hoc est, à conjunctione Lunæ cum Sole, sed tantum ab aspectu, seu ab apparitione Lunæ, quæ uno, aut altero die posterior est conjunctione Lunæ cum Sole, oleæ & operam perdunt periti quidam huius temporis Astronomi, dum putant se antiqua Judæorum Festa investigare, & cognoscere posse, computando novilunia iuxta rigorem Astronomicum, idest, ab una Lunæ conjunctione cum Sole ad alteram, quod sanè nusquam Judæi (saltem quandiu Hierosolymis extitit Syne-drium, cui Neomenias iuxta apparitionem Lunæ constituendi ius assertum erat) observarunt. Quam verò anni formam Judæi post Urbis Hierosolymitanæ cladem, & extinctum Syne-drium sequuti fuerint? planè incertum est. Nam cum Judæi sub Trajano Imperatore gravissimis persecutionibus iactati, & ad extrema redacti fuerint, atque sub Adriano Imperatore hæc illuc fugati, & dissipati: verosimile non est, eos sub his Imperatoribus in unum corpus coalescere

potuisse ad certam quamdam, & ad Leges Astronomiæ exactam præscribendam anni formam. Facile tamen crediderim, Judæos sub aliis Imperatoribus melius habitos excogitasse illum Cyclum annorum 84. cuius meminit *Sanctus Epiphanius* hæresi 70. quem tamen Cyclum, utpotè vitiosum, & cum motibus corporum cælestium non consentientem, reiecerunt deinde Judæi ætate scilicet Rabbiorum, *Abbæi*, & *Rabbæ*, idest, circa annum *Æræ Christianæ* 358. Tunc enim, ut testatur *Maimonides* in suo Tractatu *Kiddoschakodesh*, seu de consecratione mensis cap. 5. n. 3. Judæi uti cæperunt Cyclis, & Tabulis Astronomicis, annumque suum civilem ad medios motus, seu ad rationes cursus Lunæ Astronomicas per Cyclum Enneadecaëtericum, idest, Decennovennalem, exegerunt, quo Cyclo etiamnum utuntur Judæi. Quocirca haud parum, meâ quidem sententiâ, decipiuntur nuperi quidam Chronologi, qui ex hoc recenti Iudæorum Cyclo vetera Iudæorum Festa se indagare posse confidunt, multaque ariolando de præteritis Iudæorum temporibus statuunt, quæ novissimi illius Cycli ratione sunt longè antiquiora. Addo etiam, cum difficillimum sit inire mensium Lunarium computum, ac fermè nihil certi ex prædictâ computatione colligi possit, multò consultius esse, reiectis obscuris, incertis & implexis Mathematicorum Astronomicis observationibus, antiquæ adhærere traditioni Patrum, qui Christum Dominum mortuum esse tradunt anno vigesimo nono *Æræ vulgaris* sub Consulatu duorum Geminorum. Si plura super hac re Lector scire desideret, adeat *Keplerum* in *Eclogis Chronicis*, & *Bollandum* in *Exercit. 1. ad Proœmium prioris Catalogi Romanorum Pontif. Tom. 1. de Actis Sanctorum mensis Aprilis*.

ARGUITUR ULTIMO: Petrus, & Paulus, juxta pervulgatam traditionem, martyrio fuere coronati anno decimo quarto Imperii Neronis, hoc est, anno *Æræ vulgaris* sexagesimo septimo, à morte Christi trigésimo quarto, ergò Christus mortuus est, anno trigésimo tertio *Æræ vulgaris*. Consequentia videtur certa, nam ab anno *Æræ vulgaris* trigésimo tertio, qui concurret cum anno Imperii Tiberii ab obitu Augusti decimo anno, usque ad annum decimum quartum Neronis, triginta quatuor effluerunt anni, quos si addideris annis 33. *Æræ vulgaris*, habebis annum *Æræ vulgaris* sexagesimum septimum, quo Petrus & Paulus Romæ martyrii coronam sunt adepti. Passus est igitur Christus anno *Æræ vulgaris* trigésimo tertio.

Respondeo primò: Petrum & Paulum martyrio non fuisse coronatos anno decimo quarto exeunte Neronis, seu anno *Æræ vulgaris* sexagesimo octavo, ut censet *Eusebius*, nec anno decimo tertio exeunte Neronis, seu anno sexagesimo septimo *Æræ vulgaris*, ut putat *Baronius*. Utrumque hic breviter demonstro. Primò, martyrium Petri & Pauli contingere non potuit anno decimo quarto exeunte Neronis, seu anno sexagesimo octavo *Æræ vulgaris*, quia annus decimus quartus Neronis, ut

ut fatentur Chronologi, cæpit à die 13. Octobris anni sexagesimi septimi *Æræ* vulgaris, Consulibus *L. Fontejo*, & *Cajo Julio Rufo*, finemque accepit die nona mensis Junii *Æræ* vulgaris sexagesimi octavi, Consulibus *C. Silio Italico*, & *M. Galerio Turpiliano*; hac enim die nona Junii mortuus est Nero. Cùm itaque constet ex perpetua Ecclesiæ Romanæ traditione, ex omnibus Calendariis tam manuscriptis, quàm typis editis, ex omnibus Patribus tam antiquis, quàm recentioribus, Petrum & Paulum martyriq; fuisse coronatos sub Nerone die 29. mensis Junii, nullo pacto dici potest, Petrum & Paulum occisos fuisse anno decimo quarto exeunte Neronis, seu anno sexagesimo octavo *Æræ* vulgaris. Secundò, martyrium Apostolorum Petri & Pauli contingere etiam non potuit anno decimo tertio exeunte Neronis, seu anno sexagesimo septimo *Æræ* vulgaris, quia Nero toto hoc anno Imperii sui decimo tertio in Græcia permansit, Romamque dumtaxat reversus est anno *Æræ* vulgaris sexagesimo octavo, Consulibus *C. Silio Italico*, & *Galerio Turpiliano*, quos ipse Consulatu abdicavit, seque Consulem creavit, immò omnem Senatum veneno tollere in animum induxit, sed desperans de successu, & ab omnibus desertum se videns, fugam arripuit, sibique mortem conscivit die 9. Junii ejusdem anni *Æræ* vulgaris 68. sicut ex Dione, & ex Joanne Xiphilino luculenter probant *Pagius* in Critica Baronii ad annum *Æræ* vulgaris 67. & *Bollandus* Tom. 1. Aprilis pag. 16. Quapropter ipse longè probabilius esse cenfeo: Petrum & Paulum martyrio fuisse coronatos anno duodecimo exeunte Neronis, seu anno *Æræ* vulgaris sexagesimo sexto, Consulibus *C. Luccio Telefino*, & *C. Suetonio Paulino*, hoc si quidem anno Romæ præsensaderet Nero, quandò illius jussu Petrus & Paulus die 29. ejusdem anni occisi sunt.

Scio, clarissimos Authores *Pagium*, *Bollandum*, & *Schellstratum*, Apostolorum Petri & Pauli martyrium consignare anno undecimo exeunte Neronis, seu anno sexagesimo quinto *Æræ* vulgaris, Consulibus *Nerva*, & *Vestino*. Verùm, ut optimè observat doctissimus *Tillemontius* in Notis in Histor. Eccles. sex priorum sæculorum Tom. 1. pag. 557. nulla est necessitas martyrium Petri & Pauli retrahendi ad annum 65. *Æræ* vulgaris, nec ad annum ejusdem *Æræ* 64. ut visum est, *Cl. Eliæ du Pin* Doctori Sorbonico.

Respondeo secundò: A passione Christi Domini usque ad martyrium Apostolorum Petri, & Pauli non solum effluxisse annos triginta quatuor, ut falsò supponunt moderni Chronologi, sed potiùs interfuxisse annos triginta septem. Nàm primò, ita docent Sancti Patres *Hieronymus*, *Chrysostomus*, *Beda*, *Rabanus*, *Nicephorus*, alique benè multi apud *Baronium* ad annum Christi 67. Deindè, Christus, ut suprà ostendimus, passus est anno *Æræ* vulgaris vigesimo nono, Petrus verò, & Paulus occisi sunt die 29. Junii anni ejusdem *Æræ* sexagesimi sexti, ex quo sequitur, à passione Christi usque ad martyrium Apostolorum Petri,

& Pauli intercessisse spatium 37. annorum. Denique, *Apollonius*, qui sub Commodò Imperatore Urbis Romæ Senator fuit, refert, teste *Eusebio* lib. 5. *Histor. Eccles.* cap. 18. *tanquam ex veterum traditione, Dominum Apostolis suis præcepisse, ne intra duodecim annos Hierosolymis excederent.* Quàm *Apollonii* traditionem laudat *Clemens Alexandrinus* lib. 6. *Stromatum*, eamque suo calculo approbat *Baronius* ad calcem anni Christi 34. Permanisit ergo Sanctus Petrus, juxta hanc *Apollonii* traditionem, post mortem Christi, per spatium duodecim annorum Hierosolymis, idest, in Syria, aut in Palæstina, aut in aliis vicinis Regionibus, ita ut per quinque annos hæc illac Evangelium prædicaverit, & per septem annos Ecclesiæ Antiochenæ præfuerit: quo spatio 12. annorum exacto, Romam venit anno secundo ineunte Claudii Imperatoris, seu anno 42. *Æræ* vulgaris, & Ecclesiæ Romanæ præfuit viginti quinque annis, juxta antiquorum, & Sanctorum Patrum traditionem. Si ergo 12. annis, per quos Petrus unâ cum cæteris Apostolis permansit ab obitu Christi in Syria, & Palæstina, vel in aliis vicinis Regionibus, addas viginti quinque annos, per quos Petrus præfuit Ecclesiæ Romanæ, comperies ab obitu Christi usque ad martyrium Sancti Petri effluxisse annos triginta septem. Quod sanè optimè cohæret cum sententia nostra, nam si anno vigesimo nono *Æræ* vulgaris, cui mortem Christi illigavimus, adicias annos triginta septem, incidēs in annum *Æræ* vulgaris sexagesimum sextum, quo, juxta sententiam nostram, Petrus unâ cum Paulo Romæ martyrio fuit coronatus.

QUÆRES PRIMÒ: *Qua hora crucifixus sit Christus Dominus, & quo pacto conciliari possint Evangelistæ Marcus, & Joannes, quorum primus cap. 15. ait Christum fuisse crucifixum hora tertia, alter verò cap. 19. hora quasi sexta?*

Respondeo: Ad conciliandum utrumque Evangelistam circa horam crucifixionis Christi, hoc unum breviter observandum esse, quòd quemadmodum nox apud Judæos in 4. vigilias, ita & dies in 4. stationes, & partes erat divisa. Prima diei pars à diluculo auspicabatur, & durabat usque ad horam diei tertiam, idest, usque ad nonam horam matutinam juxta morem, quem Galli in numerandis horis observare solent. Hæc autem hora vocabatur *prima*, eò quòd ab hora prima initium sumeret. Secunda pars, seu statio diei incipiebat ab hora tertia, idest, juxta morem Gallorum, ab hora nona matutina, & protrahabatur usque ad horam sextam, hoc est, usque ad meridiem Gallorum; vocabaturque *hora tertia*, quòd ab hora tertia haberet exordium. Tertia diei pars inibat ab hora sexta, idest, à meridie Gallorum, & perdurabat usque ad horam nonam, seu usque ad horam tertiam pomeridianam Gallorum, appellabaturque similiter ab hora undè principium acceperat, *hora sexta*. Quarta demùm statio, seu pars diei incipiebat ab hora nona, videlicet ab hora tertia pomeridiana Gallorum, & durabat usque ad occasum Solis,

lis, & dicebatur, vel hora nona, vel vespera. Hac autem semel præmissa observatione, nullo negotio ostenditur, pulchrè inter se consentire ambos Evangelistas, qui primâ fronte dissidere videntur. Nam, quando *Marcus* ait, Christum crucifixum esse *hora tertia*, vult dumtaxat Christum fuisse crucifixum horâ tertiâ jam vergente ad finem, idest, nondum quidem elapsâ, sed proximè accedente ad horam sextam, seu ad meridiem Gallorum. Christus quippè, ut referunt Sacri Evangelistæ, ductus fuit è domo Caiphæ ad Pilati Prætorium mane factò, & jam albescente Cœlo, ductio autem illa Christi ad Pilatum cum turbis, & militibus, interrogationes Pilati toties repetitæ, testium auditio, sessiones pro Tribunali, illusiones Christo factæ, coronæ spinæ impositio, flagellatio, vestium mutatio, ductio ad Herodem, & reductio ad Pilatum, ductio ad supplicium extra Civitatem, apparatus supplicii, crucifixio: hæc, inquam, omnia brevissimo trium horarum spatio fieri non potuerunt, maximè cum Pilatus frequentes neëteret moras, & sententiam de morte Christi de industria ferre cunctaretur, necesse ergo est, ut Christi crucifixio facta fuerit non sub initium, sed sub finem horæ tertiæ, & sic intelligendus est *Sanctus Marcus* quando ait, Christum crucifixum esse, *hora tertia*. Similiter, dum ait *Sanctus Ioannes Evangelista*, Christum esse crucifixum *hora quasi sexta*, vult tantummodò indicare Christum crucifixum esse horâ sextâ nondum quidem inceptâ, sed jam appetente, idest, proximè accedente. Ratio est, quia, teste *Sancto Marco*, ab inceptâ hora sexta tenebræ factæ sunt per totam terram usque ad horam nonam, si ergo Christus fuisset crucifixus horâ sextâ jam inceptâ, nullum fuisset temporis intervallum crucifixionem Christi inter & tenebras factas per totam terram, quod tamen apertè falsi convincitur ex sacris Evangelistis, à quibus benè multa ad crucifixionem Christi spectantia referuntur, quæ antè Eclipsim Solis, idest, antequàm tenebræ horâ sextâ fierent per totam terram, fuerunt absoluta, nimirum Pilati tergiversatio, Iudæorum expositulatio, Salvatoris innocentissimi condemnatio, & ad locum supplicii ductio, titulorum consignatio, eorumdem affixio, Sacerdotum protestatio contrâ titulum Crucis, Pilati resolutio, Crucis in *Simonem Cyrenæum* translatio, Mulierum concomitantium lamentationes, Salvatoris responsiones, binorum Latronum crucifixiones, vestimentorum Christi divisio, vinum & acerrimum felle propinatio, prætereuntium Christo crucifixo insultantium cavillationes, & blasphemiarum, Salvatoris pro persecutoribus ad Patrem intercessio, Latronis unius convictio, alterius Latronis pietas, & socii reprehensio, Paradisi bono Latroni à Christo facta promissio; hæc, inquam, omnia ad crucifixionem Christi pertinentia à Sacris Evangelistis facta perhibentur antequàm horâ sextâ inceptâ fierent tenebræ per totam terram, non fuit ergo Christus crucifixus horâ sextâ, quia, eâ semel inceptâ, nihil omnino operis Iudæi propter densissimas tenebras moliri potuerunt. Quando itaque *S. Ioannes* ait

ait

ait, Christum esse crucifixum *hora quasi sexta*, idem est, ac si diceret, Christum fuisse cruci affixum *horâ sextâ*, non quidem inceptâ, sed jam appetente, idest, proximè accedente, in quo nullâ antilogiâ pugnat cum *S. Marco*.

Duplicem alium modum conciliandi utrumque Evangelistam supeditat *Doct̃or Angelicus* 3. p. q. 46. art. 9. ad 2. & primò ait cum *Sancto Augustino* lib. 3. de consensu Evangelistarum cap. 13. Christum *horâ tertiâ*, juxtà *Sanctum Marcum*, fuisse crucifixum clamoribus Judæorum, *horâ verò sextâ* Christum manibus militum, juxtà *Sanctum Joannem*, fuisse crucifixum. Deindè dicit, notam numeri depravatam esse vitio indocti, & oscitantis cujusdam Scriptoris, quæ depravatio eò faciliùs contingere potuit, quòd inter litteram græcam, quâ signatur numerus ternarius, & litteram græcam, quâ notatur numerus senarius, maxima sit affinitas. Græcis quippè solemne est numeros suos litteris designare. Potuit ergo *Marcus* cum *Joanne* dicere Crucifixionem Domini coeptam *hora quasi sexta*, quam numeri designationem sciolus, aut imprudens aliquis Scriptor proprio Marte interpolavit. Huic expositioni favent *S. Hieronymus* in Psalm. 77. multique moderni Theologi, & doctissimi Scripturæ Sacre interpretes, asserentes hoc pacto multò faciliùs explicari posse apparentem illam antilogiam, in qua eludicanda mirè hæcenus sese torserunt viri eruditi.

QUÆRES SECUNDÒ: *Cur Christus non sit mortuus in Nazareth, ubi fuit conceptus? neque in Bethleem, ubi natus? neque in Hebron, ubi mortuus, & sepultus est Adamus, cujus peccatum motivum fuit incarnationis, & mortis Christi? neque intra muros Hierusalem, ubi sacrificia veteris legis sacrificium crucis adumbrantia offerebantur? sed in Calvarie loco extra mœnia Hierusalem crucifigi, & mori voluerit?*

Respondeo cum *Sancto Thoma* 3. p. q. 46. art. 10., quòd quemadmodum Christus in parvis, & ignobilibus oppidis concipi, & nasci voluit ad confutandam inanem ostentationem hominum, qui ut plurimum æstu ambitionis abrepti vanam gloriam aucupantur, sibi que honoris loco ducunt, quòd ex nobilibus Civitatibus oriundi sint, ità in exemplum humilitatis, & contemptus gloriæ, Christus Mundi opprobrium pati voluit in celeberrima, hominibusque refertissimâ Civitate Hierusalem, scd potius propè illam. Secundò, Christus moriendo propè Hierusalem adimplevit illud vatis Regii oraculum Psalm. 75. *Deus autem Rex noster ante secula, operatus est salutem in medio terræ*, Hierusalem siquidem dicitur à Sanctis Patribus, & à Geographis umbilicus, & medium terræ. Tertiò, Christus crucifixus, & mortuus propè Hierusalem, perfecte adimplevit figuras veteris legis, quia hostiæ, quæ ipsum prænunciabant, Hierosolymis immolabantur, præsertim vitulus & hircus, qui, sicut præcipitur cap. 16. *Levitici*, solemniissimo sacrificio ad expiationem totius multitudinis offerebantur, & extrâ castra comburebantur:

tur : undè & ipse Christus extra portam passus est, ut crux ejus, sicut ait *Sanctus Leo*, non sicut Templi esset Ara, sed Mundi, & ut nos, mundanam conversationem fugientes, *excamus ad eum extra castra*, *improperium ejus portantes*, ut loquitur *Apostolus ad Hebræos* cap. 13. Denique, Christus in loco Calvariz, seu in publico damnatorum, & decolatorum loco, crucifigi, & mori voluit, potius quàm in Hebron, ubi sepultus est Adam, ut ostenderet, mortem suam non solum fore in remedium personale ipsius Adæ, sed omnium totius Mundi delictorum, & ut ibi erigerentur vexilla martyrii, ubi prius erat arca damnatorum, inquit *Sanctus Hieronymus* in cap. 27. *Matth.* Scio, multos Ss. Patres, quos citat *Jacobus Gretserus* lib. 1. de Cruce cap. 18. existimasse, Adamum in eodem ipso loco, ubi crux fixa fuit, sepultum esse, eamque traditionem antiquitùs invaluisse; verùm *Sanctus Hieronymus*, vir naris emundæ, acerrimique judicii, huic traditioni pluribus in locis fidem negat, docetque, Adamum sepultum esse in Civitate *Arbec*, quæ est Hebron, ubi *Abraham*, & *Sara*, *Isaac*, & *Rebecca*, *Jacob*, & *Lia* conditi sunt; cui *S. Hieronymi* sententiæ subscribit *S. Thomas*.

Advertat obiter Lector, Christum circà Equinoctium vernum, quandò dies increscere incipiunt, mori voluisse, ut monstraret quòd nos per passionem suam à tenebris peccatorum ad lucem gratiæ esset perducturus, & ut in se adimpleret figuram agni Paschalis, qui juxtà Legem circà Equinoctium vernum immolabatur, quicquid Christum verum agnum in Cruce pro peccatis totius mundi immolandum similitudine adumbrabat.

Series annorum Imperii Tiberii, & Consulum Romanorum ab anno vigesimo sexto Æræ Christianæ, seu Dionysianæ, quo Christus Dominus baptisatus est, usque ad annum ejusdem Æræ Christianæ vigesimum nonum, seu ad annum usque decimum nonum Imperii Proconsularis Tiberii, quo Christus Dominus Cruci suffixus, mortem pro salute omnium oppetiit.

A Nno Urbis conditæ 779. Anno secundo Olympiadis 201. Anno Juliano septuagesimo primo, Anno periodi Julianæ 4739. Anno decimo tertio Augustei Imperii Tiberii. Anno Æræ Christianæ vigesimo sexto. Consules fuerunt *Lentulus Gesticus*, & *C. Calvisius*. Hoc anno Tiberius, ex quo Consors, & Collega Imperii factus fuerat ab Imperatore Augusto, decurrebat annum decimum sextum Imperii sui Proconsularis, quem complevit die 28. Mensis Augusti ejusdem anni, & inchoavit

vit decimum septimum, sicut fusè in Dissertatione decima ostendimus. Christus verò Dominus die VI. mensis Januarii eiusdem anni, iuxta, verum & proprium Natale suum, incipiens annum ætatis suæ trigessimum, fuit à Joanne baptisatus, eodemque anno primum Pascha, post baptismum suum, peregit.

Anno Urbis conditæ 780. Anno tertio Olympiadis 201. Anno Juliano septuagesimo secundo. Anno periodì Julianæ 4740. Anno decimo quarto Augusti Imperii Tiberii. Anno Æræ Christianæ vigesimo septimo. Consules fuerunt M. Licinius Crassus, & L. Calpurnius Piso. Die 28. Mensis Augusti eiusdem anni Tiberius complevit annum decimum septimum Imperii sui Proconsularis, & inchoavit annum decimum octavum. Christus verò, juxtà suum proprium & verum Natale, decurrebat annum ætatis suæ trigessimum primum, eodemque anno secundum Pascha, post baptismum suum, confecit.

Anno Urbis conditæ 781. Anno quarto Olympiadis 201. Anno Juliano septuagesimo tertio. Anno periodì Julianæ 4741. Anno decimo quinto Augusti Imperii Tiberii. Anno Æræ Christianæ vigesimo octavo. Consules fuerunt Ap. Junius Silanus, & P. Silius Nerva. Die 28. Mensis Augusti eiusdem anni Tiberius complevit annum decimum octavum Imperii sui Proconsularis, & incepit annum decimum nonum. Christus verò, juxtà suum verum & proprium Natale, decurrebat annum ætatis suæ trigessimum secundum, cumque complevit die 25. Mensis Decembris eiusdem anni. Peregit etiam Christus Dominus eodem anno tertium Pascha post baptismum susceptum.

Anno Urbis conditæ 782. Anno I. Olympiadis 202. Anno Juliano septuagesimo quarto. Anno periodì Julianæ 4742. Anno decimo sexto Augusti Imperii Tiberii. Anno Æræ Christianæ vigesimo nono. Consules fuerunt Fufius Geminus, & L. Rubellius Geminus. Christus Dominus eodem anno supremum Paschæ, quod fuit quartum, post susceptum Baptisma, peregit cum Discipulis suis pridie quàm pateretur, & die 25. Mensis Martii eiusdem anni mortuus est in Cruce anno ætatis suæ, juxta suum verum & proprium Natale, trigesimo tertio ineunte, ut potè quì jam decurrebat à die XXV. Mensis Decembris anni præcedentis, & anno Proconsularis Imperii Tiberii decimo nono, qui à die 28. Mensis Augusti præcedentis anni itidè m labeatur.

DISSERTATIO DECIMA SEXTA

*De Morte Christi, seu utrùm Christus Dominus
mortuus sit pro omnibus omninò
hominibus?*

Observandum primò, Semipelagianos olim autumasse Christum æqualiter pro omnibus omninò hominibus mortuum esse, hoc est, promiscuè, & indifferenter tam pro reprobis, quàm pro electis & prædestinatis orasse & sanguinem suum fudisse. Id apertè colligitur ex ipsa *S. Prosperi* Epist. ad *S. Augustinum*, ubi refert docere Masilienses, quòd Christus indifferenter, & citrà ul- lum delectum universos velit salvos fieri, & ad agnitionem veritatis venire. Idem de Semipelagianis disertè asserit *S. Fulgentius*, qui in libro de Incarnatione & Gratia cap. 29. ostendit in eo potissimum situm esse Semipelagianorum errorem, quòd putarent Christum ex æquo, & eodem planè sensu & modo pro reprobis mortem oppetiisse, ac pro electis seu prædestinatis, eademque voluntate velle reproborum & prædestinatorum salutem. Ex quo primo capitali Semipelagianorum errore alius nascebatur, què pari studio propugnabant; contendebant si quidem, supposità illà indiscretà, & indifferenti voluntate Christi de salute omnium hominum, salutem prædestinatorum ex sola ipsorum voluntate pendere, ac subindè Deum velle omnes homines salvos fieri, hac solà posità conditione, *si ipsi vellent*, ut videre est passim apud *Santum Augustinum*, & apud *Santum Prosperum* loco mox laudato, & in Carmine de *ingratis* cap. 8.

Observandum secundò, *Calvinum* lib. 3. Institutionum cap. 24. N. 16. & libro de *eterna Dei prædestinatione*, docere Christum mortuum esse pro solis prædestinatis, ita ut reprobi à redemptionis beneficio penitus excludantur. Quod quidem impium dogma sancitum est in Dordrechtana Synodo, Calvinistarum Diabolica Synagoga, cap. 2. art. 6. illudque etià nùdè mordicùs tuentur de Calvinistarum grege Pseudo-Theologi, qui Pseudo-Magistri sui vestigia sequuntur. In eundem errorem impetit *Janſenius* lib. 3. de Gratia Salvatoris cap. 21. ubi licèt fateatur, Christum mortuum esse pro omnibus sufficientià pretii, quod in ara Crucis æterno Patri obtulit, quodque infiniti erat valoris, negat tamen Christum pro omnibus, nullo excepto, se dedisse Redemptionem, vel Crucifixum, vel mortuum esse. Hæc enim sunt ipsius verba: *Denique, quia Prospero antiquior & Doctior Augustinus nunquam in scriptis suis fatetur, Christum pro omnibus, nullo excepto, se dedisse Redemptionem*.

Tom. I.

Qq 9

Hcm,

*nem, vel Crucifixum esse, vel mortuum, sed tantummodò pro illis quibus mors ejus profuit, qui certo modo multi & omnes sunt: hinc genuiniùs, & veriùs respondemus; Christum dici se dedisse Redemptionem pro omnibus, hoc est, pro universa sua Ecclesia toto Orbe dispersa, & consequentèr pro omnibus hominum generibus, Regibus, privatìs, nobilibus, & ignobilibus &c. Et tandem in fine ejusdem capitis ita concludit: Quæ sanè cum in Augustini doctrina perspicua certaue sint, nullo modo principiis ejus consentaneum est ut Christus Dominus, vel pro infidelium in infidelitate morientium, vel pro justorum non perseverantium salute mortuus esse, sanguinem fudisse, semetipsum Redemptionem dedisse, Patrem orasse sentiat ex quo factum est, ut juxta Sanctissimum Doctorem, non magis Patrem pro aeterna liberatione ipsorum, quam pro Diaboli deprecatus sit. Quibus verbis rotundè negat Jansenius, Christum mortuum esse pro impiis, & infidelibus, eisque morte sua contulisse, aut saltem obtulisse, seu præparasse auxilia sufficientia, quæ ad æternam eorum salutem, ordinentur. Verùm, hanc virulentam doctrinam, quæ à communi pietatis sensu abhorret, omnes ad unum detestantur Catholici, qui disertis Scripturæ Sacræ testimoniis, Conciliorum definitionibus, & Sanctorum Patrum autoritatibus sole clariùs demonstrant, Christum pro omnibus, & singulis hominibus mortuum esse. Hinc optimo jure proscripta est Jansenii propositio, quæ ordine quinta est inter eas, quæ damnatæ sunt Innocentii X. Constitutione datà Romæ anno Æræ vulgaris 1653. pridie Kal. Junii: *Semipelagianum est dicere, Christum pro omnibus omnino hominibus mortuum fuisse, aut sanguinem fudisse.* Quæ propositio, ut ait idem Summus Pontifex, intellecta eo sensu, ut Christus pro salute, dumtaxat prædestinatorum mortuus sit, est impia, blasphema, contumeliosa, divinæ pietati derogans, & hæretica. Huic autem Pontificiæ Constitutioni, ab Alexandro deinde septimo confirmatæ, omnes Orbis Ecclesiæ Catholicæ subscripserunt.*

Observandum tertio: duplicem esse Gratiae *sufficientis* notionem. Primò, Molinistæ sufficientem gratiam interpretantur eam, quæ completur omnia, quæ ad actum agendum sunt necessaria, idest, præter quàm ad prorumpendum in actum nihil aliud necessarium est, & quæ sine ullo alio auxilio suum aliquando sortitur effectum, sive, ut clariùs dicam, Molinistæ, gratiæ sufficientis nomine, eam intelligunt, quæ sufficit, quæque id habet omne, quod ad effectum suum edendum necesse est, hoc est, ad actum bonum exerendum, ad quem hominem movet, tamen si eum reipsà non eliciat. Secundò, Thomistæ nomine gratiæ *sufficientis* eam intelligunt gratiam, non quæ nihil aliud ad actum agendum requirat, non quæ in actum prodeat sola, sed quæ in voluntate imperfectos actus excitet, eam constituat proximè potentem, & expeditam ad profiliendum in actum, alliciatque ad bonum, nec tamen flectat, nisi præstò sit gratia seipsà efficax. Sive Thomistæ, nomine gratiæ sufficientis,

tis, intelligunt gratiam possibilitatis, non actionis, quæ intellectum, illustrat, & voluntatem excitat, quæ dat homini posse bonum operari, quæ suadet pietatis opus, non persuadet, invitat voluntatem humanam, non trahit, inspirat velle, sed non impartitur. Hæc est gratiæ sufficientis genuina notio, quæ toti probatur Scholæ Thomisticæ. Non me latet, Ludovicum Montaltium in Epistola 2. ad amicum Provincialem, ita ad vivum vocabula refecare, ut hanc gratiæ sufficientis notionem, quam, usurpat Schola Thomistica, tanquam peregrinam, & insolentem exfusiliari, sibiloque explodi debere affirmet, maximè quia ut dicitur, omnis populus, vocum & nominum arbiter, id sufficiens vulgò appellat, in quo omnia insunt necessaria ad agendum. Verùm, ut ingenue fatear, hæc mera nominis quæstio est, græculâ levitate, quàm Theologicâ gravitate dignor. Nec video quid novi in hac gratiæ sufficientis notionem, quam Thomistæ usurpant, quidvè periculi sub ea latere possit. Primò enim, nihil in ea gratiæ sufficientis notionem esse quod novitatem sapiat, patet ex illa pervulgata apud Theologos Ecclesiæ Catholicæ Doctrina, quâ post *S. Thomam* 3. part. quæst. 61. art. 1. profitentur, Passionem Christi esse causam sufficientem, quæ in actu primo, & vi sua, humanam salutem possit operari, quamvis tamen ut re ipsâ, & ut ajunt, in actu secundo humanam salutem operetur, hominemque sanctificet & emundet, necessaria sit illius applicatio, quæ fit per Sacramenta, ut convenit inter omnes Theologos. Quid ni igitur à pari poterunt Thomistæ eam gratiam appellare *sufficientem*, quæ verè in ordine suo, hoc est, in actu primo sufficit ut voluntatem in ratione potentiæ proximæ, & expeditæ compleat, ac perficiat, quamvis ut actum reapse efficiat, necessarium sit ut gratiâ se ipsâ efficaci applicetur? Secundò, sub hac gratiæ sufficientis notionem, quâ utuntur Thomistæ, nihil omnino periculi impræsentiarum subesse potest, tum quia Thomistæ eam quâ scriptis, quâ disputationibus omni Molinistica-significatione exuerunt; tum quia etiam Thomistæ, ne illud gratiæ sufficientis nomen apud imperitam multitudinem promiscuè jactatum popularem errorem foveat, vel ad sensum Molinisticum præposterè detorqueatur, semper cum maxima cautione dicere solent: dari gratiam sufficientem *in sensu Thomistico intellectam*, quâ, instar antidoti, adhibita restrictione, excluditur omnis sensus Molinisticus, qui Auditoribus alium sensum affricare posset. Quapropter, singularitatis alicujus vitio, ne quid gravius dicam, carere non videntur moderni quidam Theologi, qui terminos in Scholis consecratos, & quibus alii Theologi citrà ullum erroris periculum utuntur, usurpare detrectant.

Observandum denique, omnes Thomistas, unâ cum *S. Thoma*, constanter docere, Christum mortuum esse efficienter, seu voluntate, consequente pro solis electis, & prædestinatis, quatenus videlicet Christus voluit ipsi electis, & prædestinatis conferre auxilia ab intrinseco

efficacia ad salutem æternam consequendam necessaria, quibus certissime liberantur quicumque liberantur; pro reprobis verò mortuum esse voluntate antecedenti, seu, ut ajunt, *sufficienter*, quia reprobis voluit solum conferre, aut saltem offerre, seu præparare gratias sufficientes ad salutem æternam assequendam, præter quas tamen gratias sufficientes, cum aliæ ex parte Dei gratiæ, quæ sint suapte naturâ efficaces ad salutem æternam comparandam requirantur; sequitur reprobos, quibus Deus justo suo judicio gratias illas ab intrinseco efficaces denegat, salutem æternam nunquam consecuturos, quamvis ex Passione Christi Domini percipiant illas gratias sufficientes in sensu Thomistico intellectas, quæ dant quidem *posse*, vel, ut loquitur *S. Augustinus*, bonam, sed parvam, & invalidam voluntatem, nunquam tamen conferunt actum, perfectum, seu velle & perficere, nisi auxiliis ab intrinseco efficacibus applicentur. Hujus gratiæ se ipsâ efficacia, præter auxilium sufficiens, necessitatem ad omnes, & singulos pietatis actus invictè ex Concil. Trident. probat eruditissimus noster *Antonius Reginaldus* in præclarissimo suo Opere nuper edito *De mente Conc. Trident. circa Gratiam seipsa efficacem*. Hic est Thomistarum explicandi modus, qui Scripturæ Sacræ, perpetuæ SS. PP. traditioni consentaneus est, ac longè latèque discrepat ab eo, quem excogitavit *Ludovicus Molina*, Soc. Jesu; Nam primò *Molina* docet, voluntatem antecedentem, quâ Deus vult omnes salvos fieri, dici conditionatam eò quòd pendeat à consensu liberi arbitrii, tanquam à conditione, quam expectat, & ex cujus defectu redditur inefficax, suoque frustratur effectu. Id autem è regione opponitur doctrinæ Thomistarum, qui post Sanctos Patres, potissimum *Augustinum*, & *Thomam*, docent, voluntatem Dei nullo pacto pendere ex consensu, & determinatione liberi arbitrii, quamvis non negent, voluntatem Dei antecedentem eo in sensu conditionatam dici posse, quòd Deus omnes homines vult salvos fieri, si salus omnium hominum non officiat ordini divinæ illius providentiæ, vel si per illam non impediatur tam bonum universale ipsius Justitiæ, quàm manifestatio ejus attributorum. Secundò *Molina* asserit, Christum mortuum esse sufficientem pro reprobis, quia per mortem suam suppeditavit illis auxilia sufficientia ad salutem adipiscendam necessaria, præter quæ, nulla alia ex parte Dei auxilia ad salutem requiruntur, ita ut reprobi Ideò damnentur, quia illis auxiliis sufficientibus, quæ Christus per mortem suam eis promeritus est, non bene utuntur, eaque proprio vitio vacua & inutilia reddunt; quibus è contrâ electi, ac prædestinati ad electionem, & perseverantiam bene utuntur, atque salutem æternam consequuntur. Ast Thomistæ, gratuitæ prædestinationis, ac gratiæ ab intrinseco efficacia, & ad omnia pietatis opera, juxtà avitam Sanctorum Patrum doctrinam, prorsus necessariæ, acerrimi defensores, constanter quidem docent, omnibus hominibus merito mortis Christi gratiam sufficientem esse præparatam, nunquam tamen dicunt

dicunt, gratiam sufficientem talem esse, quæ voluntati humanæ falces submittat, seu cuius efficacia libero hominis sit permixta arbitrio, & præter quam alia gratia se ipsa efficax non requiratur, ut homo gratiæ sufficienti cooperetur, eique obicem non ponat. Sed potius concors est omnium Thomistarum sententia, reprobos ob sua demerita æternam incurrere damnationem; Electos verò, & prædestinatos gratiis ab intrinseco efficacibus, quas Christus morte sua absoluit, & efficaciter ipsis promereri voluit, liberè assentientes, & magno præsertim perseverantiæ dono adjuutos æternâ beatitudine donari; quos sibi a Patre dados, & de manu suâ à nemine raptum iri conceptis verbis in Evangelio dicit. Hac germanâ doctrinæ Thomisticæ expositione invictè stabilitur inconcussum Ecclesiæ Catholicæ dogma de morte Christi pro omnibus omnino hominibus, & ea tantùm Christi mortis omnibus impense generalitas excluditur, quâ indiscriminatim collatæ omnibus hominibus asseruntur gratiæ ita sufficientes, ut gratiam se ipsâ efficacem ad volendum, & operandum non requirant. Huic igitur doctrinæ Thomisticæ expositioni, hæc in Dissertatione mordicus adhærebo, sicque, benè fortunante Deo, regiam viâ incedam, ut, impugnando errorem Jansenii asserentis, gratias sufficientes omnibus hominibus per mortem Christi non fuisse præparatas, me tamen omnino alienum profitear à sententia illorum Theologorum, qui eia sensu Christum pro omnibus sufficienter mortuum esse, contendunt, quòd Christus mortis suæ beneficio omnibus promiscuè hominibus conferat gratias sufficientes versatiles, & libero subditæ arbitrio, præter quas ad salutem æternam consequendam, nulla alia ex parte Dei requiratur gratia, quæ sit suapte naturâ efficax. Cæterum, quamvis ab hac Theologorum sententiâ, utpote principiis doctrinæ Thomisticæ è diametro oppositâ, quàm longissimè discedam, eò tamen collimat votorum meorum Summa, ut Sanctorum Patrum, præsertim Augustini, & Thomæ vestigiis insistentes: *Idipsum*, juxta Monitum Apostoli Pauli ad Rom. cap. 15. ad Ephes. cap. 4. ad Philipp. cap. 1. dicunt: *omnes & singuli perfecti in eodem sensu, & in eadem sententia; cum omni humilitate, & mansuetudine, cum patientia supportantes invicem in charitate, solliciti servare unitatem spiritus in vinculo pacis, & unanimes in uno spiritu collaborantes Fidei Evangelii.*

DICO: Dogma fidei esse Christum pro omnibus & singulis hominibus mortuum esse, ac sanguinem suum fudisse.

Probatur hæc assertio: Illud est Fidei dogma, quod apertè ex Scriptura Sacra, ex definitionibus Conciliorum, ac Summorum Pontificum, & ex testimoniis SS. Patrum, præsertim Augustini, & Thomæ, colligitur, atqui Christum mortuum esse pro omnibus, & singulis hominibus apertè colligitur ex Scriptura Sacra, ex definitionibus Conciliorum, ex Decretis Summorum Pontificum, & denique ex testimoniis SS. Patrum, præcipuè Augustini.

Augustini, & Thomæ, ergo Fidei dogma est Christum mortuum esse pro omnibus omninò hominibus. Prob. min. quantum ad singula capita, & primò, ex locupletissimis Scripturæ testimoniis, quorum primum petitur ex cap. 53. Isaïæ: Vulneratus est, inquit Propheta loquendo de Christo, propter iniquitates nostras, attritus est propter scelera nostra, disciplina pacis super eum, & livore ejus sanati sumus, omnes nos quasi oves erravimus, & posuit Dominus in eo iniquitates omnium nostrum. Alterum testimonium desumitur ex cap. 1. Evangelii Joannis, ubi de Christo hæc verba leguntur: Ecce Agnus Dei, ecce qui tollit peccatum Mundi. Non dicit Evangelista: Qui tollit peccata aliquorum de Mundo, sed Mundi peccatum indefinitè. Quæ verba S. Hieronymus Epist. 83. ad Oceanum interpretans ait: Mentitur Ioannes Baptista, & digito Christum & voce demonstrans, Ecce qui tollit peccata Mundi: Si sunt adhuc in sæculo, quorum Christus peccata non tulerit. Tertium testimonium suppeditat Apostolus 2. ad Cor. cap. 5. sic loquens: Caritas enim Christi urget nos: aestimantes hoc, quoniam si unus pro omnibus mortuus est, ergo omnes mortui sunt. Quibus verbis palàm innuit Apostolus, Christum mortuum esse pro his, qui in Adamo mortui sunt, atqui Fides Catholica docet omnes & singulos homines mortuos esse in Adamo, idest, peccatum originale ad omnes omninò Adami posteros viâ ordinariâ esse propagatum, vult igitur Apostolus Christum pro omnibus omninò hominibus, nemine excepto, mortuum esse, suumque pro eorum salute sanguinem fudisse. Id confirmat Apostolus cap. 2. Epist. 1. ad Timoth. ubi, postquam præmisit, orationes pro omnibus esse faciendas, quia bonum est, & acceptum, coram Salvatore nostro Deo, qui vult omnes salvos fieri, & ad agnitionem veritatis venire, confestim subdit: Unus enim Deus, unus & Mediator Dei & hominum homo Christus Jesus; qui dedit redemptionem semetipsum pro omnibus, &c. Quo ex loco sic elicio argumentum. Eodem modo Christus dedit semetipsum redemptionem pro omnibus, quo modò orare debemus pro omnibus, atqui non tantùm pro generibus singulorum, sed etiam pro singulis generum, hoc est, pro omnibus omninò hominibus orare debemus; ergo Christus pro singulis generum, idest pro universis in individuo hominibus mortuus est. Hanc doctrinam idem Apostolus cap. 4. ejusdem Epistolæ vult, ut Timotheus suus discipulus præcipiat & doceat: In hoc enim, inquit, laboramus, & maledicimur, quia speramus in Deum vivum, qui est Salvator omnium, maxime fidelium. Præcipe hæc, & doce. Et ad Hebræos cap. 2. ait: Videmus Jesum per passionem mortis, gloria & honore coronatum: ut gratia Dei, pro omnibus gustaret mortem. Denique, ut sexcenta hujusmodi, quæ passim in Scriptura Sacra tam veteris, quàm novi Testamenti occurrunt, missa faciam testimonia, hoc unum addam depromptum ex cap. 2. Epist. 1. Joannis: Filii mei hæc scribo vobis, ut non peccetis, sed et si quis peccaverit, advocatum habemus apud Patrem, Jesum Christum justum: &

ipse est propitiatio pro peccatis nostris, non pro nostris autem tantum, sed etiam pro totius Mundi.

In hac retinenda, ac sartâ teclâque contra hæreticos conservandâ Scripturæ Sacre doctrinâ omnem operam adhibuerunt Concilia, & Summi Pontifices. Concilium Nicenum in Fidei Symbolo, quod condidit, Christum propter hominum salutem è cælo in terram delapsum esse declarat his verbis : *Qui propter nos homines, & propter nostram salutem, descendit de Cælis.* Non dicit Concilium : Propter nos Fideles, vel propter nos electos ; sed propter nos homines : ut significet Christum ad singulos homines redimendos venisse, & pro eorum salute mortem subisse. Idem sanxit Synodus Trident. sess. 6. cap. 2. & 3. ubi de Christi morte loquens, ita statuit : *Hunc proposuit Deus propitiatorem per Fidem in sanguine ipsius pro peccatis nostris, non solum autem pro peccatis nostris, sed etiam pro totius Mundi. Verum, etsi ille pro omnibus mortuus est, non omnes tamen mortis eius beneficium recipiunt, sed ii dumtaxat, quibus meritum Passionis ejus communicatur.* Hoc autem Synodi Trident. Decretum eludi non potest, dicendo prædictam Synodum non hic agere de voluntate Christi salvandi omnes & singulos homines, sed dumtaxat de sufficientia pretii Sanguinis Christi. Non, inquam, hac responsione eludi potest hæc Concilii Trident. Sæctio, quia si Concilium eò loci ageret tantummodo de sufficientia pretii Sanguinis Christi, non verò de sincera illius voluntate salvandi omnes & singulos homines, bruto fulmine Calvinum, cæterosque heterodoxos percussisset, contra quos hocce Decretum edidit, certum quippè est Calvinum, aliosque hujus furfuris hæreticos, sufficientiam Sanguinis Christi, utpotè infiniti, ad singulorum hominum salutem, nunquam inficiatos fuisse. Nec etiam dici potest, Concilium Trident. eò loci definire tantum voluisse Christum mortuum esse pro omnibus, idest, pro generibus singulorum, sed non pro singulis generum, seu pro omnibus omnino hominibus. Non illud, inquam dici potest, nam, hac semel factâ hypothesi, Concilii Tridentini definitio ne leviter quidem feriret Calvinistas, quorum nullus est, qui neget, aut in dubium revocet, Christum pro generibus singulorum sanguinem suum fudisse. Præter quàm quòd etiam Sacra Synodus conceptis verbis ibidem asserit, Christum Dominum, pro his sanguinem fudisse, qui mortis ejus beneficium non recipiunt ; igitur ex mente Concilii Tridentini Christus non pro solis Fidelibus, electis, & prædestinatis mortuus est, sed etiam pro his, qui illius Passionis beneficium non percipiunt, sanguinem fudit. His Conciliorum definitionibus addi merito debent publicæ orationes Ecclesiæ, in quibus Christum Dominum omnium, & singulorum hominum Salvatorem, & Redemptorem esse agnoscit, ac profitetur Ecclesia Catholica. Addi itidem debent Decreta, & Constitutiones Summorum Pontificum Innocentii X. Alexandri VII. Innocentii XII. & Clementis XI. qui hanc famo-

fan osam Propositionem: *Semipelagianum est dicere Christum pro omnibus omnino hominibus mortuum esse, aut sanguinem fudisse, tanquam hæreticam confixerunt, & ut talem ab omnibus Catholicis habendam esse pronunciarunt.*

Hæc, quæ hæctenus adduximus, momenta abundè sufficere possent ad stabilendum inconcussum istud Fidei Catholicæ dogma, quod perpetuâ, sibique semper constanti omnium Sanctorum Patrum, cum Græcorum, tum Latinorum traditione munitum omni ævo fuit in Ecclesiâ conservatum. Verùm, quia hæretici patrociniis S. Augustini perperam gloriantur, eumque, obtorto, ut ajunt, collo, in suum errorem pertrahere moluntur, idèò necesse est ad retundendam hæreticorum audaciam, ut hic breviter ostendam, *S. Augustinum*, ejusque fidelissimum discipulum *S. Thomam Aquinatem*, constanter docere Christum esse mortuum pro omnibus, & singulis hominibus. A duabus illis Ecclesiæ columnis, *Augustino*, & *Thoma*, avelli non possum, quod tenent teneo, quod docent doceo, quod prædicant prædico.

In primis, *S. Augustinum* lib. 6. contra Iulianum cap. 4. ex hoc Apostoli testimonio 2. ad Cor. cap. 5. *Si unus pro omnibus mortuus est, ergo omnes mortui sunt*, invictè contra Pelagianos probat, parvulos omnes peccato originali obstrictos esse, quia nimirum Christus pro ipsis singulis mortuus est: *Nega igitur*, inquit Aquilinus ille Doctor, *Christum pro parvulis mortuum esse, ut eximas eos de numero mortuorum, hoc est, de contagio peccatorum.* Idem argumentum S. Doctor in Pelagianos, peccatum originale ab Adam in omnes transfusum esse negantes, intorquet lib. 2. de nuptiis, & concupiscentia cap. 33. lib. 20. de Civit. Dei cap. 6. & pluribus aliis in locis, sed præsertim libro 3. Operis imperfecti, ubi *Iulianum*, Hæreticum Pelagianum, his verbis insectatur: *Hinc te exue, si potes, quòd unus pro omnibus mortuus est, & aude dicere non omnes mortuos, pro quibus mortuus est Christus, cum tibi statim Apostolus fauces premat, & opprimat audacissimam vocem, quod sequitur ostendens & dicens, ergò omnes mortui sunt. Noli sic laudare Apostolum, noli sic exponere, ut nolis audire. In hos omnes cum peccato mors pertransiit, per illum in quo omnes moriuntur; ibi sunt parvuli, quia & pro ipsis Christus mortuus est, qui propter ead pro omnibus mortuus est, quia omnes mortui sunt. Cum igitur, S. Augustinus adversus Pelagianos probet, omnes omnino homines, etiam parvulos, peccato originali idèò obstrictos esse, quia Christus pro illis mortuus est, necesse est, ut Sanctus ille Doctor crediderit Christum esse mortuum pro omnibus, & singulis hominibus, alioquin non solum frigida, sed prorsus inepta esset ea, quæ utitur, ratiocinatio, si pro iis omnibus, & singulis, qui in Adamo mortui sunt, Christus mortuus haud fuisset.*

Secundò, *S. Augustinus* lib. 2. de Symbolo ad Cathecumenos sic loquitur de Christo Domino: *Inimicis suis vulnera demonstraturus est, pro-*

propter quod dictum est per Prophetam . videbunt in quem pupugerunt , non ut eis dicat sicut Thomæ : Quia vidisti , credidisti ; sed ut convincens eos veritas dicat : Ecce hominem , quem crucifixistis : ecce Deum , & hominem , in quem credere nolulistis , videtis vulnera , quæ inflixistis : agnoscitis latus , quod pupugistis , quoniam & per vos , & propter vos apertum est , nec tamen intrare voluistis . Quibus verbis apertè significat Sanctus Doctor , Christi latus apertum , ejusque sanguinem effusum fuisse etiam pro salute eorum , qui illum crucifixerunt .

Tertiò , Sanctus Augustinus Tractatu 4. in Joannem , hæc habet : Populi spernentes , propter superbiam suam , humilitatem Dei ; crucifixerunt Salvatorem suum , & fecerunt damnatorem suum . Igitur ex Sancto Augustino Christus dicitur , & reverà est Salvator eorum , qui ipsum crucifixerunt .

Quartò idem Sanctus Doctor Tractatu 12. in Joannem , explicans illa verba Joannis cap.3. Non enim misit Deus filium suum in Mundum , ut judicet Mundum , sed ut salvetur Mundus per ipsum , ait : Ergo quantum est in Medico sanare venit egrotum , ipse se interimit , qui præcepta Medici servare non vult , venit Salvator in Mundum ; quare Salvator dictus est Mundi , nisi ut salvet Mundum , non ut judicet Mundum ? Salvati non vis ab ipso ? ex te judicaberis . Idem docet Sanctus Doctor Tractatu 36. in Joannem . Et Serm.2. in Psalm.68. loquendo de Iuda , proditore , hæc habet : Projecit pretium argenti , quo ab illo Dominus venditus erat , nec agnovit pretium , quo ipse à Domino redemptus erat . Et in Psalmum 108. ait : Quemadmodum in Iuda , sic in isto Populo (seu Iudaico) intelligendum est , qui , repulso à se Christo , factus est subditus Diabolo , cujus persuasiones in omnibus pravis & terrenis cupiditatibus præposuit æternæ salutis .

Quintò , in expositione Psalmi 104. mentem suam luculenter aperit Sanctus Augustinus : Attendamus , inquit , ad judicium dilectionis , & promissionis Dei , tales arrhas tenemus , mortem Christi tenemus , sanguinem Christi tenemus . . . erigat ergo se humana fragilitas , non desperet , non se collidat , qui promisit Deus est , & venit ut promitteret , & apparuit hominibus , venit suscipere mortem nostram , promittere vitam suam . . . Quid tibi promisit Deus , ò homo mortalis ? quia victurus es in æternum . Non credis ? crede ; plus enim est quod fecit , mortuus est pro te . Quid promisit , ut vivas cum illo ? Incredibilis est , quòd mortuus est æternus , quàm ut in æternum vivat mortalis . Jam quod incredibile est tenemus , si propter homines mortuus est Deus , non est victurus homo cum Deo ? nunc est victurus mortalis in æternum , propter quem mortuus est , qui vivit in æternum . Porro , si Sanctus Augustinus existimasset , Christum non esse mortuum pro omnibus , & singulis hominibus , non potuisset ex morte , quam Christus pertulit , hominum animos erigere in spem æternæ , & immortalis vitæ consequendæ , quam ipsis promisit Christus . Hanc Fidei Catholicæ veritatem docet S. Augustinus Enarratione in jam citatum

Psalmum 68. Christus, inquit, factus est spes nostra. Unde factus est spes nostra? Ecce sic quomodo audistis, quia tentatus est, quia passus est, quia resurrexit, factus est spes nostra: quid enim nobis dicimus, quando hæc legimus? Non enim perdet nos Deus, propter quos misit filium suum tentari, crucifigi, mori, resurgere. Non enim verè nos despicit Deus, propter quos Filio proprio non pepercit; sed pro nobis omnibus tradidit eum. Sic ergo factus est spes nostra. Censet igitur S. Augustinus, spem Christianam, quæ omnium Fidelium cordibus infixæ esse debet, hoc uno niti fundamento, quòd credimus, Christum pro nobis mortuum esse. Legatur idem S. Doctor in Expositione in Psalmum 148. & in Sermone 155.

Sextò, mens Sancti Augustini magis perspecta, ac explorata redditur ex his, quæ habet Sanctus Doctor in expositione Psalmi 95. ubi hæc verba Vatis Regii: Judicabit orbem terræ, sic interpretatur: Non judicabit partem, quia partem non emit, totum judicare debet, quia pro toto pretium dedit. Et paucis interjectis, explicat quid per orbem terræ intellexerit Propheta: judicabit orbem terræ in æquitate, & populos in veritate sua. Quæ est veritas, & æquitas? Congregabit secum electos ad judicandum, ceteros autem separabit ab invicem; positurus est enim alios ad dexteram, & alios ad sinistram. Quibus verbis clarè innuit Sanctus Augustinus, Christum judicaturum electos, simul ac reprobos, quia pro ipsis pretium sui Sanguinis in ara Crucis impendit. Id confirmat Aquilinus ille Doctor Tractatu 36. in Joannem, dicens: Venit Christus, sed primò salvare, postea judicare, eos judicando in pœnam, qui salvari noluerunt, eos perducendo ad vitam, qui, credendo, salutem non respue- runt. Et in lib. De Spiritu & littera ait, quòd reprobi judicabuntur, experturi in suppliciis potestatem ejus, cuius in donis misericordiam contempserunt.

Infinitus essem, si vellem sigillatim laudare, & expendere omnia. Sancti Augustini testimonia, quibus hæreticorum configitur error. Consultius est, ut remittam Lectorem ad expositiones Sancti illius Doctoris in Psalmos 59. 68. & 102. ad Præfationem Sancti Prosperi ad objectiones Vincentianas, ubi doctissimus ille Sancti Augustini discipulus impias, profanas, & blasphemias opiniones, quas divinæ gratiæ hostes Sancto Augustino affingebant, recensens; istam profert: Quod Dominus noster Jesus Christus non pro omnium salute, & redemptione sit passus. Eandem calumniam à Sancto Augustino amolitur Sanctus Prosper in Præfatione ad Capitula Gallorum. Quapropter Clemens XI. qui universalis Ecclesiæ clavum nuperrimè rexit, ut avitam Sancti Augustini doctrinam, ad nos usque inviolabili temporum serie propagatam, prædecessorum suorum exemplo commendaret, optimo jure diris devovit, atque natalitiis tenebris damnavit malè natum, ac temerè in vulgus sparsum libellum, qui sub nomine Joannis Launoii, Doctoris Sorbonici, circumferebatur, in quo Auctor eò vefaniæ prorupit, ut Semipela-
giano.

gianorum errorem, tanto olim molimine ab Ecclesia damnatum, acriter defendat, asseratque, *Sanctum Augustinum* docuisse, quòd Christus pro solis electis mortem subierit, eumque in materia de gratia, & prædestinatione ignotos antiquis Ecclesiæ Patribus calles aperuisse, Fidelium animos turbasse, motus totà passim Africà, Gallià, Italià concivisse, *Vicleffo*, *Zuinglio*, *Luthero*, *Calvino*, *Iansenio*, virulentis dogmatibus prælusisse: *Prosperum*, *Hilarium*, *Fulgentium*, *Cesarium*, *Prudentium*, *Remigium*, aliosque *Sancti Augustini* discipulos à vetusta Sanctorum Patrum traditione descivisse. His, & aliis id genus atrocibus calumniis *Sanctum Augustinum*, ejusque discipulos onerat malè feriatu ille Auditor, quem suo æquissimo Decreto, dato die 28. Januarii anni 1704. obrivit Summus Pontifex Clemens XI. Hunc etiam malè consarcinatum libellum egregiè, ac eleganter confutavit noster doctissimus *Hycinthus Serry*, Doctor Sorbonicus, in libro, cui titulus est: *Augustinus vindicatus*.

Venio nunc ad *Sanctum Thomam*, qui *Sancti Augustini* doctrinam ex assidua lectione in purum, putumque, quod dici solet, succum vertit, ac jure merito *Augustinus contractus* appellari potest. Ne autem varia *Sancti Thomæ* congerendo testimonia Lectori fastidium ingeram, illustriora seligam, quæ rem planè faciant.

Primum, illudque palmare Angelici Doctoris testimonium colligo ex 1. p. qu. 19. art. 6. ubi quærit: *Utrum voluntas Dei semper impleatur?* Et postquam sibi primo loco objecit: Deum velle omnes salvos fieri, nec tamen ita evenire; trifariam respondet exponendo verbum illud Apostoli: *Deus vult omnes homines salvos fieri*. Primò, dicit illud dictum Apostoli intelligendum esse secundum distributionem accommodam. Secundò, ait: idem Apostoli dictum accipiendum esse de generibus singulorum. Tertiò respondet secundum *Sanctum Damascenum* lib. 2. Fidei Orthodoxæ cap. 29. Deum velle omnes, & singulos homines salvos fieri voluntate antecedenti, sed non voluntate consequente, quâ vult dumtaxat Electorum, ac Prædestinatorum salutem. Docet ergo *Sanctus Thomas*: Deum voluntate antecedente velle omnium, & singulorum hominum salutem, ac subindè Christum ex voluntate antecedente pro singulis generum, idest, pro omnibus omnino hominibus sanguinem fudisse, quamvis secundum efficacem, seu consequentem voluntatem pro Electis tantum, & Prædestinatis mortem subierit. Sic *Sanctum Damascenum* interpretatur *Divus Thomas*, cujus interpretatio procul omni dubio præferenda est interpretationi, quam adhibet *Jansenius* lib. 3. de gratia Christi cap. 20. ubi totus est, ut probet voluntatem antecedentem, quâ Deus vult omnes homines salvos fieri, esse voluntatem Creatoris, ac propterea respicere hominem in statu naturæ innocentis constitutum; consequentem verò Dei voluntatem supponere peccatum originale, ac respicere hominem in statu naturæ lapsæ positum, in

quo statu Deus non vult omnes, & singulos homines salvos fieri, sed tantum Electos, & Prædestinatos. Quæ Jansenii interpretatio oppidè falsa est, & à genuino *Sancti Damasceni* sensu penitus aliena. Enim verò *Sanctus Damascenus* eò loci appellat illam voluntatem antecedentem, quâ Deus vult salutem omnium hominum, de qua loquitur Apostolus 1. ad Timoth. cap. 2. atqui certò certius est Apostolum hîc agere non de voluntate Creatoris, sed de voluntate Salvatoris, ait enim: *Hoc bonum est, & acceptum coram Deo Salvatore nostro, qui omnes homines vult salvos fieri*. Voluntas igitur antecedens, quâ Deus vult omnes homines salvos fieri, non est voluntas Creatoris respiciens hominem in statu innocentiz constitutum, sed est voluntas Salvatoris respiciens hominem in statu naturæ lapsæ positum. Præterea, Apostolus ibidem Fideles adhortatur, ut orent pro omnibus, idque ideò bonum, & acceptum esse coram Deo probat, quia nimirum *vult Deus omnes homines salvos fieri*, at per absurda esset ratio hæc, si putasset Apostolus voluntatem Dei de salute omnium non respicere homines in statu naturæ lapsæ constitutos, hortabatur quippè fideles, ut orarent pro singulis præsentis status naturæ lapsæ hominibus. Repudiata itaque tanquam omnino falsâ Jansenii interpretatione, dicendum est cum *Sancto Damasceno*, juxta germanam *Sancti Thomæ* interpretationem, Deum etiam in statu naturæ lapsæ velle voluntate antecedente salutem omnium, & singulorum hominum. Quod tamen, ut supra observavimus, eo in sensu intelligi non debet, ut voluntas, quam Deus habet, etiam in statu naturæ lapsæ, de salute omnium hominum, pendeat ab hac conditione, *si ipsi velint*, ut falsò olim contendeant Pelagiani, & Semipelagiani, nam quamvis voluntas Dei antecedens salutis omnium hominum sit conditionata in doctrina *Sancti Thomæ*, tamen conditionem illam, *si ipsi velint*, non involvit, sed aliam importat conditionem, videlicet, quòd Deus voluntate antecedenti vult omnes salvos fieri, si major non exoriat pulchritudo, & manifestatio ipsius justitiæ aliquos reprobantis, quàm ex sola manifestatione misericordiæ singulos homines ad gloriam eligentis. Hæc est vera doctrina *Sancti Thomæ*, qui, etsi interdum asserat Deum velle omnes homines salvos fieri, *si obicem non ponant*, aut, *si ipsi velint*, non tamen Hæreticorum interpretationi favet, quia jisdem in locis è vestigio subiungit, ex gratia Dei esse, quòd aliquis non ponat obicem gratiæ, & ex Dei adiutorio ab intrinseco efficaci pendere, quòd gratiæ, & divinx voluntati consensum præbeat. Pelagiani autem volebant eam conditionem ex libero arbitrio duntaxat pendere. Hinc *S. Augustinus* lib. 1. Retract. cap. 10. ipsum sensum sic castigat: *Non existiment novi Hæretici Pelagiani, secundum eos hoc esse dictum; verum est enim omnino omnes homines hoc posse, si velint, sed preparatur voluntas à Domino, & tantum augetur munere cbaritatis, ut possint*.

Alterum *S. Thomæ* testimonium habetur in 3. part. quæst. 49. art. 3. ad 2.

ad 2. ubi S. Præceptor sic loquitur: *Dicendum, quod Deus permittit Diabolo posse decipere homines in certis personis, temporibus, & locis, secundum occultam rationem iudiciorum suorum. Semper tamen per Passionem Christi, est paratum hominibus remedium se tuendi contra nequitias Dæmonum, etiam tempore Antichristi: sed si aliqui hoc remedio uti negligant, nihil deperit efficacie Passionis Christi.* Supponit igitur S. Thomas, hominibus per Passionem Christi semper paratum esse remedium, quo se se tueantur contra nequitias Dæmonum, quod tamen falsum esset, si Christus pro omnibus omnino hominibus non fuisset mortuus.

Tertium S. Thomæ testimonium legitur in art. 3. eiusdem quæstionis mox citatæ, ubi S. Doctor quærit: *Utrum per Passionem Christi homines sint liberati à pœna peccati?* & respondet dicendo: *Quod per Passionem Christi liberati sumus à reatu pœnæ dupliciter: uno modo directe, in quantum scilicet Passio Christi fuit sufficiens, & superabundans satisfactio pro peccatis totius humani generis; habita autem satisfactioe sufficienti tollitur reatus pœnæ: alio modo indirecte, in quantum scilicet Passio Christi est causa remissionis peccati, in quo fundatur reatus pœnæ.* Vult igitur S. Thomas, Passionem Christi esse sufficientem, & superabundantem satisfactionem pro peccatis totius generis humani, ac proinde Christum mortuum esse pro omnibus, & singulis hominibus.

Præter ista hæcenus adducta S. Thomæ testimonia, si quis alia longè plura scire desideret, legat huius Doctoris Angelici Commentarios in Epistolas Pauli ad omnia eiusdem Apostoli loca, quæ inter probandam assertionem supra laudavimus. Legat etiam articulum tertium quæst. 8. tertiæ partis, ubi S. Thomas docet, Christum esse caput omnium hominum secundum diversos gradus; Primò, & principaliter caput esse eorum, qui ipsi actu uniuntur in gloria. Secundò, eorum qui actu ipsi uniuntur per charitatem. Tertiò, eorum qui actu ei uniuntur per Fidem. Quartò, eorum qui ei uniuntur in potentia necdum reducta in actum, reducenda tamen secundum Divinam Prædestinationem. Quintò, eorum, qui in potentia sunt ei uniti nunquam reducenda ad actum. Ex qua S. Thomæ doctrina palam sequitur, Christum caput esse etiam eorum, qui ei uniti sunt in potentia nunquam licet reducenda ad actum, ac proinde illum pro eis mortuum fuisse, qui nunquam hanc felicitatem obtinebunt, ut sint actu membra ipsius. Hæc est S. Thomæ, & totius Scholæ Thomisticæ de morte Christi pro omnibus omnino hominibus constans, & perpetua doctrina, quam qui carpere, aut ei consensionem errorum Jansenii impingere audent, hi sanè facilius poterunt soli caliginem, mari siccitatem, lilis nigredinem, & balsamo factorem exprobrare. Adire potest Lector, si discrimina Thomisticam doctrinam inter & Jansenianam scire abeat, Auctores tam domesticos, quam extraneos, qui, editis, quæ Apologiis, quæ inivistis adductis momentis, Thomistarum doctrinam à Jansenismi labe vindicarunt. Inter domesticos consuli possunt Patres

Joan.

Joannes Nicolai, Bernardus Guiart, Gonetus, Contensonus, Piccinardi, Massoulie, & Serry. Inter extraneos verò egregiè hac provincia defuncti sunt Patres *Annatus, Deschamps, Martinonus, & Martinez de Ripalda* Societatis Iesu Scriptores. Quapropter, ridendi sunt potiùs quàm refellendi illi, qui Thomistas tenaces antiquæ de gratia seipsâ efficaci, & de Prædestinatione gratuita doctrinæ, quam Scriptura, & Patres, omnesque antiquiores tradunt Scholastici, famosis libellis apud imperitos Iansenismi insimulare præsumunt. Poterunt quidem nonnulli Scholæ Thomisticæ insensî, ignaræ plebi fumos vendere, & ad populum phaleras iactare atque ostentare, at, mediùs fidiùs, viris doctis, & in traditione Ecclesiæ exercitatis nemo unquàm persuadere poterit, Thomistarum de gratia seipsâ efficaci, & de prædestinatione gratuita doctrinam quidquam affinitatis habere cum erroribus Hæreticorum, à quibus cerrè multis Parasangis distat.

At enim, ut obiter dicam, quandò nam *Jansenius*, eiusque Discipuli facti sunt, reprobos in statu naturæ lapsæ percipere ex voluntate Dei antecedenti Gratias sufficientes, quæ ex sua entitate à Gratiis per se & ab intrinseco efficacibus sint distinctæ, sicut docet Schola Thomistica? quandònam *Iansenius*, ejusque discipuli confessi sunt, Christum Dominum verâ ac sincerâ voluntate antecedente mortuum esse ac sanguinem fudisse pro salute reproborum, sicut tota Schola Thomistica constanter propugnat? Quandònam *Iansenius*, ejusque discipuli agnoverunt in statu naturæ innocentis necessitatem Gratiæ seipsâ & ab intrinseco efficacis, atque prædestinationem gratuitam bonorum Angelorum ad gloriam, sicut agnoscit & strenuè defendit universa Schola Thomistica? Quandònam *Iansenius*, ejusque discipuli Gratiæ per se efficaci ad omnes & singulos actus necessitatem repetierunt non solum ex infirmitate naturæ per primigeniam Protoparentis labem sauciata, sed etiam ex supremo Dominio, seu omnipotentia Dei, ex indifferentia seu flexibilitate voluntatis humanæ ad bonum & malum, atque è subordinatione & dependentia causarum secundarum à prima, sicut, post Sanctum Thomam, eam reperit & adstruit Schola Thomistica? Quandònam *Iansenius*, ejusque discipuli admiserunt in statu naturæ lapsæ Gratias eo insensu sufficientes, ut dent voluntati potestatem proximam & expeditam operandi, præter quas tamen aliæ Gratiæ per se & ab intrinseco efficaces requirantur ad actû agendum, sicut admittit & tuetur Schola Thomistica? Quandònam denique *Iansenius*, ejusque discipuli duos Gratiæ sufficientis in statu naturæ lapsæ distinxerunt effectus, primum unum, ad quem ordinatur à voluntate Dei consequenti, quemque semper in voluntate producit, ei videlicet conferendo potestatem proximam operandi, illamque excitando ad exerendos actus imperfectos; & alterum Gratiæ sufficientis effectum secundarium, seu actum perfectum volendi, & operandi, ad quem ordinatur à voluntate Dei antecedenti, quem tamen

tamen reapse non producit, nisi præstò adsit Gratia se ipsà efficax, quæ facit ut voluntas prorumpat in actum perfectum. Certus sum, nullum in toto, quà latè patet, Orbè repertum iri *Iansenii* discipulum, qui, si constare sibi, suisque principiis stare velit, cum Schola Thomistica in hac doctrina consentiat. Non clam me est, *Iansenii* discipulos ultrò fateri, dari in statu naturæ lapsæ quasdam Gratias, quæ non sunt victrices, idest, quæ non vincunt ac superant omnem rebellem concupiscentiam, sed aliquos dumtaxat illius gradus imminuunt. Sed quem mihi dabis *Iansenii* discipulum, qui dicat, ejusmodi Gratias, quæ in statu naturæ lapsæ non omnem reprimunt effrænam concupiscentiam, sed aliquos tantum ejus gradus minuunt, esse in eo sensu sufficientes, ut ulterius à sincera voluntate Dei antecedenti salvandi omnes homines in statu naturæ lapsæ ordinentur ad actum perfectum, seu ad vincendam & compeſcendam omnem concupiscentiam, tamen si eum effectum non consequantur, nisi in subsidium veniat Gratia se ipsà efficax. In hoc quippè stat *Iansenii* & ejus discipulorum palmaris error, totiusque eorum doctrinæ prora puppisque, quòd velint, Deum non habere in statu naturæ lapsæ veram & sinceram voluntatem antecedentem salvandi omnes omnino homines, sed tantummodò voluntatem consequentem salvandi Electos ac Prædestinatos, quòd fit, ut, jacto semel eo principio, ex quo, tanquam è virulento fonte scaturiunt quinque famosæ *Iansenii* Propositiones Vaticanis protritæ fulminibus, nullas *Iansenii* discipuli in statu naturæ lapsæ agnoscant Gratias, præter eas, quæ sunt per se & ab intrinseco efficaces, quæque dantur & ordinantur à voluntate Dei consequente, quæ semper impletur, sive ad reprimendam omnem concupiscentiam, sive ad aliquos ejus gradus imminuendos. Cæterum, negant *Iansenii* discipuli, illas Gratias, quas Deus per voluntatem consequentem dat in statu naturæ lapsæ ad minuendos in voluntate aliquos cupiditatis gradus, ulterius à voluntate Dei antecedenti ordinari ad secundarium effectum, seu ad actum perfectum, & ad reprimendam omnem perduellem concupiscentiam. Id, inquam, *Iansenii* discipuli præfractè negant, quia, juxta Doctrinæ suæ principia, pertendunt, voluntatem Dei antecedentem in statu naturæ lapsæ non esse veram & sinceram voluntatem salvandi omnes homines, sed solum esse voluntatem signi, eamque esse planè sterilem, nullasque hominibus Gratias suppeditare, aut præparare ad salutem. Concors est etiam omnium *Iansenii* discipulorum sententia, solam Gratiã, quæ sita est in *Victatrici delectatione* appellari posse *Verè sufficientem*, quia, inquit, hæc sola Gratia *Victrix* complectitur omnia, quæ sunt necessaria ad actum agendum, & ad omnes vincendos concupiscentiæ gradus; cæteras verò Gratias, quæ à Deo in statu naturæ lapsæ dantur ad minuendos concupiscentiæ gradus, negant *Iansenii* discipuli conferre voluntati potestatem proximam & expeditam operandi, tum quia, ut aiunt, ejusmodi Gratia non sunt *Verè sufficientes*, utpotè que non comple-

plectuntur omnia, quæ sunt necessaria ad actum operandum, & ad vincendam omnem obsolescentem cupiditatem; tùm quia etiam illæ Gratiæ, juxta eorum systema, licet ordinentur ex voluntate Dei consequenti ad minuendos aliquos concupiscentiæ gradus (quem effectum semper produciunt in voluntate humana) ad ulteriorem tamen effectum, seu ad actum perfectum, & ad vincendam omnem concupiscentiam non ordinantur ex voluntate Dei antecedenti, quam *Iansenii* discipuli, sicut mox diximus, in statu naturæ lapsæ planè sterilem esse, nullamque hominibus ad æternam salutem Gratiæ suppeditare aut præparare distitant. Hæc discrimina, quæ Iansenianam doctrinam inter & doctrinam Thomisticam assignavimus, si quis expendere haud gravetur, facilè intelliget, Doctrinam *Iansenii* jure optimo fuisse proscriptam, nihilque commercii ac negotii cum illa habere Scholæ Thomisticæ Doctrinam, quæ etiamnum, post confixas *Iansenii*, & *Quesnelli*, Propositiones, in Ecclesia Catholica, tanquàm principiis germanæ Sanctorum Patrum *Augustini* & *Thomæ* doctrinæ apprimè consentanea, defenditur ac propugnatur. Plura in hanc rem legi possunt in Epistola Apologetica, quam contra quosdam Trevoltinos in Galliis Scripturarios, & doctrinæ Scholæ Thomisticæ osiores, scripsi ad Dominum *Antonium Girardum*, Sacræ Theologiæ Doctorem, quæque in Galliis (me penitus inscio, ac nihil minùs cogitante) publicè fuit luce donata.

DILUUNTUR OBJECTIONES

ARGUITUR PRIMÒ: Christus in Scriptura Sacramortis suæ beneficium restringit ad solos electos & prædestinatos, ergo non est mortuus pro omnium in individuo hominum salute. Probant. *Joannis* cap. 10. sic loquitur Christus: *animam meam pono pro ovibus meis*, nomine autem ovium intelliguntur electi & prædestinati, ut liquet ex his, quæ eodem in capite subnectit Christus: *oves meæ vocem meam audiunt, & ego cognosco eas, & sequuntur me; & ego vitam æternam do eis*. Præterea, *Matth. cap. 26*. Christus dixit discipulis suis: *Hic est sanguis meus qui pro vobis, & pro multis effundetur in remissionem peccatorum, &c.* ergo Christus non est mortuus pro omnibus, & singulis hominibus, sed solùm pro multis, idest, prædestinatis & electis.

Respondet: hæc duo Scripturæ Sacræ testimonia in objectionem adducta, ne tantillum quidem adversari Fidei dogmati de morte Christi pro omnium hominum salute. Ad primum siquidem dico: Christum pro solis ovibus suis, idest, pro electis & prædestinatis mortuum esse, voluntate absolutà & consequente, quatenùs confert illis beneficio mortis suæ auxilia ab intrinseco efficacia ad salutem, & præcipuè magnum, ut loquitur Synodus Tridentina, *perseverantiæ donum*, ulque in finem. Verùm, etsi Christus pro solis electis & prædestinatis mortuus sit volun-

luntate efficaci & consequente, hoc tamen non impedit quominus voluntate antecedenti sanguinem suum fuderit pro reprobis, qui salutem æternam nunquam consequentur. Id patet primò, quia multi reprobi ex morte Christi aliquem fructum percipiunt, jñimirum, qui in Baptismo, aut in pœnitentiæ Sacramento justificationem consequuntur, quamvis in ea ad finem usque non perseverent. Secundò, Christus omnibus reprobis etiã infidelibus quandòque confert, & semper offert auxilia sufficientia ad salutem, in sensu tamen Thomistico intellecta, quibus nullus, nisi suâ culpâ, privatur. Desique, voluit Christus voluntate antecedente quidquid, in se spectatum, bonũ est; objectum autem divinæ voluntatis antecedentis, ut, post *Sanctum Thomam*, uno ore docent omnes Thomistæ, est salus omnium hominum in se præcisè considerata, & abstracta à circumstantiis particularibus, sicut salus hominum spectata cum circumstantiis, quæ illam comitantur, est objectum voluntatis consequentis. Porro, salus omnium hominum præcisè in se considerata, & abstracta à particularibus circumstantiis, putà à splendore universi, ratione provisoris universalis, & manifestatione justitiæ divinæ, &c. est ali-quod bonum, ergò Christus voluntate antecedenti reverà vult omnium hominum in individuo salutem, licèt voluntate consequente, attentis videlicet omnibus circumstantiis, velit quosdam damnari *secundum exigentiam suæ justitiæ*, inquit *S. Thomas* 1. part. quæst. 19. art. 6. ad 1.

Ad alterum Scripturæ Sacræ testimonium dico: ex eo potius colligi, Christum etiam pro reprobis Sanguinem fudisse. Christus enim Corpus, & Sanguinem suum etiam Iudæ proditori tradidit in ultima Cœna, sicut docent *S. Augustinus* in Plam. 10. & *Sanctus Leo* Serm. 3. de *Passione Domini*, alique Patres; Iudæ verò non secus ac aliis Apostolis porrigendo sanguinem suum dixit: *Hic est Sanguis meus, qui pro vobis, & pro multis effundetur in remissionem peccatorum*. Igitur pro Iudæ, reproborum omnium nequissimo, Sanguis Christi fuit effusus. *Ecce timuit Iudas, traditor Christi, sed non speravit in misericordia ipsius. Postea penituit eum, quod tradiderit Dominum, & dixit: Peccavi, quod tradidi sanguinem justum. Bene quidẽm timuisti, sed si sperares in misericordia ejus, quem timuisti. Ille desperando obiit & laqueo se suspendit, hæc sunt in Psalmum 146. verba S. Augustini, cui succinit fidelissimus ejus interpretes S. Fulgentius Epist. 7. ad Venantiam cap. 5. ubi hæc habet: Dignè quidem penitentiam gessit (Iudas) tradens sanguinem justum; sed ideo sibi fructum penitentiæ denegavit, quia peccatum traditionis suæ, ipso, quem tradidit, diluendum sanguine non speravit. Dùm ergo dixit Christus: Hic est sanguis, qui pro multis effundetur, multorum nomine omnes intelligit, perindè ac dùm *Lucæ* cap. 7. dicitur: remittuntur ei peccata multa, idest, omnia, & ad *Rom.* cap. 5. per inobedientiam unius hominis peccatores constituti sunt multi, hoc est, omnes. Hinc *S. Chrysostomus* explicans hunc locum *S. Matth.* in objectionem laudatum, ait, san-*

guinem Christi fuisse effusum in remissionem totius Orbis peccatorum. Addo etiam, quòd si Christus suum dumtaxat sanguinem effudisset pro electis & prædestinatis, non debuisset in ultima cœna dicere: *Hic est sanguis, qui pro multis effundetur*, sed potius, *hic est sanguis, qui pro paucis effundetur*, cum certum sit, prædestinatos cum reprobis comparatos paucos admodum esse, juxtà illud *Matth. cap. 20. Multi sunt vocati, pauci verò electi*.

ARGUITUR SECUNDÒ: si ex aliquo Scripturæ Sacræ loco evinci posset Christum mortuum esse pro omnibus omninò hominibus, maximè ex illo Apostoli: *Deus vult omnes homines salvos fieri*, atqui ille locus non intelligitur de omnibus hominibus, sed de solis electis, & prædestinatis, ergò Christus non est mortuus pro omnibus omninò hominibus. Prob. min. ex *S. Augustino*, qui pluribus in locis tres in illum Apostoli locum affert expositiones, quæ singulæ probant Christum dumtaxat mortuum esse pro electis & prædestinatis. Prima *S. Augustini* expositio extat in *Enchirid. cap. 103.* ubi ait: *Ita intelligere debemus quod scriptum est: qui vult omnes homines salvos fieri, tanquam diceretur, nullum hominem fieri salvum nisi quem salvum fieri voluerit ipsemet, non quod nullus sit hominum, nisi quem salvum fieri velit, sed quod nullus fiat salvus nisi velit Deus.* Eamdem expositionem tradit *S. Augustinus* libri de Præd. Sanctorum cap. 8. libri 4. contra Julianum cap. 8. & *Epist. 217. aliàs 107. ad Vitalem*. Altera *S. Augustini* expositio habetur loco laudato *Enchiridii cap. 103.* Aut certè, inquit, sic dictum est, omnes homines vult salvos fieri, non quod nullus hominum esset, quem salvum fieri nollet, sed ut per omnes, omne hominum genus intelligamus per quas-cumque differentias distributum, Reges, privatos, ignobiles, doctos, indoctos. Tertia denique expositio legitur in libro de Corrept. & Gratia cap. 15, ubi hæc habet *Sanctus Augustinus*: *Potest etiam sic intelligi, quod omnes homines Deus vult salvos fieri, quoniam nos facit velle, sicut misit Spiritum filii sui clamantem Abba Pater, idest, nos clamare facientem. De illo quippè Spiritu alio loco dicit, accepimus Spiritum adoptionis filiorum, in quo clamamus Abba Pater, nos igitur clamamus, sed ille clamare dictus est, qui efficit ut clamemus, si ergo clamantem Spiritum rectè dicit Scriptura, rectè etiam Deum volentem dicit à quo efficitur ut velimus.* Hæ sunt tres *S. Augustini* in hunc Apostoli locum expositiones, quæ ad solos prædestinatos beneficium mortis Christi restringunt, ergo ex illo Apostolico testimonio probari haud potest Christum pro omnibus in individuo hominibus mortuum esse. Hoc est Achilleum Iansenii argumentum.

Respondeo: tres illas adductas *S. Augustini* expositiones spectare absolutam & consequentem Dei voluntatem, quæ solos prædestinatos salvos fieri vult, ac propterea mirum non esse, si *S. Augustinus* solos prædestinatos ex Apostoli sententiâ intelligendos esse significet. At nihil obest

obest quominus præter tres allatas *S. Augustini* expositiones, quæ pertinent ad voluntatem Dei consequentem, & quas non solum *S. Thomas*, sed plures alii Sancti Patres, & Ecclesiæ Doctores laudant & approbant, alia hujus loci Apostolici dari possit interpretatio, quæ sit menti *S. Augustini* consentanea, dicendo nimirum, Deum voluntate antecedenti velle salutem omnium hominum, quamvis voluntate consequenti velit tantummodò salutem prædestinatorum. Hanc, inquam, hujus loci Apostolici interpretationem implicite saltem tanquam genuinam agnovit *S. Augustinus* jis in locis inter probationes citatis, in quibus mortem Christi, illiusque voluntatem de salute hominum, ad reprobos etiam, & infideles extendit. Cur autem Aquilinus ille Doctor hunc celebrem Apostoli locum de voluntate potius consequente, quàm de voluntate antecedente exposuerit? Hæc ratio afferri potest. Propugnabant Semipelagiani, sicut in limine hujusce Dissertationis observatum est, Deum velle omnium hominum salutem generali tantum voluntate, ità ut salutem prædestinatorum nullo modo in peculiarem Dei voluntatem, sed in naturæ humanæ initiales quosdam conatus esset refundenda, quam ob rem ut hanc machinam, quæ eorum suffulciebatur error, funditus everteret *S. Augustinus*, noluit hoc Apostoli testimonium, quod Semipelagiani in sui erroris præsidium trahebant, & crambis instar recoctæ indefinenter decantabant, explicare de voluntate Dei generali, seu antecedente, quæ salutem omnium hominum spectat, sed potius illud explicandum duxit de voluntate Dei consequente, seu de Decreto absoluto, & ab intrinseco efficaci, quo Deus vult salutem prædestinatorum; hoc enim decretum absolutum, & ab intrinseco efficax cum Semipelagiani pervicaciter admittere detrectarent, totus erat *Augustinus*, ut illud adstrueret, non negando tamen generalem, seu antecedentem voluntatem, quam Deus habet, salvandi etiam in statu naturæ lapsæ omnes omnino homines Catholico sensu, non Semipelagiano, expositam. Totà ergo vià à doctrina Sancti *Augustini* aberrat Iansenius, qui lib. 3. de gratia Salvatoris cap. 20. contendit voluntatem Dei antecedentem de salute omnium hominum ad statum dumtaxat naturæ innocentis referendam esse, voluntatem verò consequentem, quæ tantum spectat salutem prædestinatorum, ad statum naturæ lapsæ pertinere, itaut in hoc præfenti statu voluntas Dei antecedens de salute omnium hominum in sola præcisione, mentis, seu in nuda, & sterili Dei velleitate nihil gratiæ causante, posita sit; quæ voluntatis Divinæ factà semel divisione, ita auxilia dividit Iansenius, ut ad naturam innocentem, cui voluntas Dei antecedens prospiciebat, sufficientia duntaxat auxilia pertinerent; ad naturam verò lapsam, cui consulit voluntas Dei consequens, auxilia tantummodò efficacia pertineant. Hæc, inquam, Iansenii sententia toto cœlo distat à doctrina *S. Augustini*, qui non solum agnoscit in statu naturæ lapsæ veram, & sinceram Dei voluntatem salvandi omnes homines, sed etiam,

disertè docet, Deum per illam voluntatem sinceram, quam habet, salvandi omnes homines, singulis offerre, seu præparare auxilia sufficientia, eaque nemini denegare, nisi homo ipse objecto obice aditum occludat. Ita expressè docet Sanctus ille Doctor Tractatu 1. in Joannem ad eam Evangelistæ verba: *Lux in tenebris lucet, & tenebræ eam non comprehenderunt. Ergo, inquit Sanctus ille Doctor, quomodo homo positus in Sole cæcus, præsens est illi Sol; sed ipse Soli absens est. Sic omnis stultus, omnis iniquus, sic omnis impius cæcus est in corde, præsens est illi sapientia, sed cum cæco præsens est, oculis ejus absens est. Quibus verbis ostendit Sanctus Doctor, Deum, instar Solis, omnibus promiscuè divinæ gratiæ suæ radios affundere, sed eâ privari homines, qui vel saucios, vel impios cordis oculos habent. His gemina habet Sanctus Augustinus Tractatu 2. in Joannem in hæc verba: *Illuminat omnem hominem venientem in hunc Mundum. Opus est, inquit, ut tu non recedas, & non desereris. Noli cadere, & non tibi occidet. Si tu feceris casum, ille tibi faciet occasum; situ autem stas, præsens est tibi. . . . si malo non consentire, stares, illuminatus maneres.* Rursus Enarratione in Psalmum 102. exponens hæc verba Vatis Regii, Miserator, & misericors Dominus, longanimis, & multæ misericordiæ, hæc habet: *Quid tam longanimum? quid tam multum in misericordia? Peccatur, & vivitur; accedunt peccata, augetur vita; blasphematur quotidie, & facit solem suum oriri super bonos & malos. Vocat undique ad correctionem, vocat undique ad penitentiam, vocat beneficium creaturæ, vocat impetrens tempus vivendi, vocat perlectorem, vocat per tractatorem, vocat per intimam cogitationem, vocat per flagellum correptionis, vocat per misericordiam consolationis. Longanimis, & multæ misericordiæ. Sed observa, ne longitudine misericordiæ Dei malè utendo, tu tibi thesaurizes, quod ait Apostolus: An divitias benignitatis & longanimitatis ejus contemnis? Denique, Sanctus Augustinus cap. 64. lib. de Natura, & Gratia ait: Rectè fortasse quererentur (peccatores) si erroris, & libidinis nullus hominum victor existeret; cum verò ubique sit præsens, qui multis modis per creaturam sibi Domino servientem aversum vocet, doceat credentem, consoletur sperantem, diligentem adhortetur, cunctantem adjuvet, exaudiat deprecantem; non tibi deputatur ad culpam, quod iuvitus ignoras, neque illud, quod vulnerata membra non colligis, sed quod volentem sanare contemnis. Ex quibus Sancti Augustini testimoniis constat primò, errasse Iansenium in hoc, quod voluntatem antecedentem, quâ Deus vult salutem omnium hominum, ad statum dumtaxat naturæ innocentis pertinere velit. Secundò, errasse itidem Iansenium in hoc, quod à statu naturæ lapsæ auxilia sufficientia penitus ablegat, & sola efficacia admittat, quæ duo rectâ fronte cum doctrina Sancti Augustini pugnant.**

Radix illorum errorum, in quos impegit Iansenius, nulla, meâ quidem sententiâ asserri potest, nisi prava, & sinistra interpretatio dis-

scri

seriminis gratiæ utriusque status hominis sani, & lapsi, à *S. Augustino* à cap. 10. usque ad 13. lib. de corrept. & gratia adducti. Nam, cum *Sanctus Augustinus* ibidem asserat, datum fuisse Adamo in statu innocentie adiutorium sine quo, seu auxilium sufficiens ad perseverandum, homini verò lapso dari adiutorium quo, seu auxilium efficax ad perseverandum, ex hoc famoso utriusque status discrimine gratiæ, à *S. Augustino* stabilito, sibi perperam persuasit *Janfenius*, *Sanctum Augustinum* in statu naturæ integræ, seu innocentis, gratias dumtaxat sufficientes admisisse, nullas verò efficaces, & versâ vice Sanctum illum Doctorem in statu naturæ lapsæ gratias tantummodò efficaces agnovisse, gratias autem sufficientes ab eo statu procul eliminasse. Sic enim *Janfenius*, lib. 2. *De Gratia Christi Salvatoris* c. 27. postquam sibi proposuisset hanc Objectionem his verbis conceptam: *Respondebit*, inquit, fortassis aliquis, magis in *Scholasticorum scriptis*, quàm *Augustini* evoluendis exercitatus, hæc omnia, que produximus, eum (seu *S. Augustinum*) de gratia tantum efficaci tradidisse, nihil verò impedire, quin aliæ nonnullæ gratiæ (in statu naturæ lapsæ) per hominis voluntatem effectui carent: Huic, inquam, sibi propositæ objectioni hanc Responsionem ibidem adhibet *Janfenius*: *Respondeo*, inquit, quòd nullam, in statu naturæ lapsæ, agnovit aliam. *Augustinus*, actualem Christi gratiam, idest, nisi efficacem, nec agnoscere potuerit, nisi regulas omnes fundamentales, quibus innixus, naturam gratiæ medicinalis tradidit & explicuit, vellet interimere. Idem, inculcat *Janfenius* lib. 3. *De gratia Salvatoris* cap. 4. Ex quo, ut sibi constaret *Janfenius*, còactus est asserere, voluntatem Dei antecedentem salvandi omnes homines pertinuisse tantum ad statum naturæ innocentis, voluntatem verò Dei consequentem salvandi solum electos, & prædestinatos spectare ad statum naturæ lapsæ. In qua hallucinatione, quam tamen, si Superis placet, clavim regiam, filum Ariadneum, basim, ac fundamentum *Augustini* doctrinæ appellat, totum suum systema procudit *Janfenius*. Verum, hanc peregrinam, & sinistram *Janfenii* interpretationem omnes averfantur veri *SS. Augustini*, & *Thomæ* discipuli, quippè qui docent, totum discrimen gratiæ utriusque status hominis videlicet sani, & lapsi, à *Sancto Augustino* loco mox laudato stabilitum, in hoc dumtaxat situm esse, quòd homo in statu naturæ innocentis, utpotè concupiscentiæ expers, perfectè sanus, & iustitiâ originali donatus, non egeret ad perseverandum auxilio quo, sed auxilio efficaci medicinali Christi Salvatoris sanante infirmitatem, difficultatem, emolliente, & cupiditatem refrænante; quamvis ad perseverandum, opus haberet homo innocens auxillio efficaci titulo subordinationis, & dependentiæ, quod nostrates Thomistæ prædeterminationem physicam meritò appellant. At verò, homo in statu naturæ lapsæ peccato infirmatus, multis vulneribus sauciatus, & vi concupiscentiæ corruptæ illensq, indiget, juxta *Sanctum Augustinum*, ad perseverandum, & ad

omnes

omnes singulos pietatis actus auxilio efficaci non solum titulo subordinationis, & dependentiæ, sed etiam titulo infirmitatis, seu naturæ læsæ per peccatum originale; & quia *S. Augustinus* in hoc auxilio efficaci medicinali Christi Servatoris nostri, homini prorsus necessario in statu naturæ lapsæ adstruendo potissimum incumbere adversus Pelagianos, qui asserentes peccatum originale ad omnes homines non fuisse transfusum, naturam humanam per illud fuisse infirmatam pernegabant, adeoque gratiam medicinalem necessariam esse inficiabantur; ideo Sanctus Doctor in lib. de corrept. & gratia, ut hunc Pelagianorum errorem convellat, docet homini in statu naturæ lapsæ dari gratiam efficacem medicinalem, seu *adjutorium quo* ratione infirmitatis; Adamo vero innocenti ejusmodi auxilium datum non fuisse. Ne autem Sanctus Augustinus disputando contra Pelagianos à scopo suo deflecteret, vel frustra geminaret difficultates, nullam in lib. de corrept. & gratia consultò mentionem fecit de *adjutorio quo*, seu de auxilio efficaci, quo Adamus in statu innocentie ratione subordinationis, & dependentiæ opus habebat; illud siquidem auxilium efficacem Adamo innocenti necessarium jam satis superque in aliis suis Operibus stabilierat Sanctus Augustinus, ut ex illius Sancti Doctoris multis, ac locupletissimis testimoniis evincunt nostri Thomistæ, quæ hæc adducere supervacaneum esset. Hoc pacto omnes ad unum Thomistæ post Sanctum Thomam 1. 2. qu. 109. art. 9. interpretantur discrimen gratiæ utriusque status à Sancto Augustino in lib. de corrept. & gratia adductum, eorumque interpretatio apprimè consona est menti Aquilini illius Doctoris, qui cap. 11. mox citati libri hæc habet: *Ille, scilicet Adamus, non opus habebat eo adjutorio, quod implorant isti, idest, homines in statu naturæ lapsæ, cum dicunt: Video aliam legem in membris meis repugnantem legi mentis meæ, & captivantem me in lege peccati, quæ est in membris meis. Infelix ego homo, quis me liberabit de corpore mortis hujus? Gratia Dei per Jesum Christum Dominum nostrum. Quoniam in eis caro concupiscit adversus spiritum, & spiritus adversus carnem: atque in tali certamine laborantes, ac periclitantes, dari sibi pugnandi, vincendique virtutem per Christi gratiam possunt. Ille vero nulla tali re ipsa à se ipso adversus se ipsum tentatus, atque turbatus, in illo beatitudinis loco sua secum pace fruebatur. Proinde etsi non interim latiore nunc, verumtamen potentior gratia indigent isti. Quæ Sancti Augustini verba, si quis nullo partium studio occupatus tantisper expendere non gravetur, confestim intelliget, Sanctum illum Doctorem utriusque status gratiæ discrimen in hoc dumtaxat posuisse, quod homo in statu innocentie constitutus, non opus haberet adjutorio quo, seu auxilio efficaci medicinali, quo nunc indiget homo lapsus, ac subinde tosto ostio à doctrina S. Augustini aberrasse Jansenium, dum eam gratiæ utriusque status differentiâ, ab Augustino stabilitâ, plus æquò delectatus, illam contra mentem Sancti Doctoris intellexit, statuitque,*
quod;

quodd, sicut in statu naturæ integræ nulla, juxta *S. Augustinum*, à se male intellectum, dabatur gratia se ipsa efficax, ita in statu naturæ lapsæ, juxta ejusdem *S. Augustini*, à se itidem falso intellecti, principia, nulla esset admittenda sufficiens veri nominis gratia. Quà de re si plura scire desideres, legis Opusculû, cui titulus est: *DIVUS AUGUSTINUS DE VO THOMÆ, ATQUE ANGELICÆ SCHOLÆ CONCILIATUS, in Quæstione de Gratia primi hominis & Angelorum*, quodque nuperrimè, seu anno MDCCXXIII. Patavii publicâ luce donavit noster *Hyacinthus Serry*, Doctor Sorbonicus, & in Academia Patavina primarius Theologiæ Professor, qui palàm demonstrat, Vulgatam diù à *Jansenio*, ejusque discipulis humanæ naturæ, innocentis nimirum & lapsæ, statuum differentiam, qualis ab ipsis exponitur, binaque adjutoria, *Quo fit, & sine quo non fit opus*, qualia illi interpretantur, aded non esse Augustinianæ Doctrinæ basim, ut dicunt, cui tota incumbit ac nititur; non clavim, quâ solâ in Gratia Sacrarium aperiendus est aditus, non annulum, qui cæterorum catenam dogmatum secum trahit, non filum demum, ut vocant, Ariadneum, quo nisi regamur, tota Sancti Augustini summa librorum nobis est Labyrinthus: ut potius Augustinianæ Doctrinæ fundamenta ab imo *Jansenius*, ejusque Discipuli iustodiant, præcipuorum dogmatum colligationem, nexumque dissolvant, ac denique permulta Aquilini illius Doctoris de Scientia Dei, de Voluntate, de Decretis, de Prædestinatione gratuita ad gloriam, demonstrata Theoremata, cimieris tenebris involvant, & incredibili ac plus quàm Babelicâ confusione, perturbent. Ad hoc Opusculum digitum intendisse sufficiat.

Vano itaque labore se se torquet *Jansenius*, dum, ut probet Christum non esse mortuum pro omnibus omnino hominibus, benè multa congerit loca, in quibus Sanctus *Augustinus* asserit, quod *Christus rogavit pro solis prædestinatis*, quod Pater tradidit filium suum pro nobis omnibus præscitis, prædestinatis, justificatis, glorificatis. Tractatu 45. in Joannem, quod non perit unus ex illis, pro quibus mortuus est *Christus*. Epist. 169. aliàs 102. quod omnis, qui *Christi sanguine redemptus est, homo est; non tamen omnis, qui homo est, sanguine Christi redemptus est*, lib. 2. de adulterinis conjugis cap. 13. quod denique *Deus eos, quos sanguine mediationis redemit, facit deinceps ex malis in æternum bonos*. Hæc, inquam, & alia hujus generis *S. Augustini* testimonia frustra congerit & obtrudit *Jansenius*, quia nihil aliud ex his evincitur, quàm Christum rogasse, & mortuum esse pro solis prædestinatis voluntate absolutâ, & consequente, seu decreto efficaci, in quo stabiliendo, ut mox diximus, potissimum incumberebat *Augustinus*; de illo quippè decreto Dei absoluto, & efficaci de salute prædestinatorum litem præcipuè movebant Semipelagiani. Cæterum, quamvis Sanctus ille Doctor ad Semipelagianorum errorem efficacius oppugnandum frequentissimè inculcet, Christum mortuum esse voluntate consequente, seu decreto absoluto, & ef-

ficaci

ficaci pro solis electis, & prædestinatis, nunquàm tamen negat, Christum mortuum esse pro omnibus omninò hominibus voluntate antecedente, Catholico, non Semipelagiano sensu, explicatà.

Arguitur tertio: *Sanctus Augustinus* lib. 21. de Civit. Dei cap. 24. ait, quod si de aliquibus Ecclesia ita certa esset, ut qui sunt illi etiam nosset, qui licet adhuc in hac vita constituti sunt, tamen prædestinati sunt in æternum ignem ire cum diabolo, tam pro eis non oraret, quam nec pro ipso; atqui Christus pro illis non est mortuus, pro quibus non oraret Ecclesia; ergo pro reprobis, quorum futuram damnationem certò noscebat, mortuus non est.

Respondeo: quòd Ecclesia pro eis, quorum futuram damnationem certò cognosceret, non oraret oratione, quæ procederet ex voluntate absoluta, & efficaci salutis illorum: oraret tamen pro eis oratione, quæ consequeretur ex voluntate imperfecta, & generali salutis illorum. Hanc responsionem *Sancti Augustini* menti consentaneam esse breviter sic demonstro. Disputat eò loci *Sanctus Doctor* adversus illos, qui in judicio Dei omnibus reis propter Sanctorum preces putant esse parcendum, hunc autem errorem indè refellit *S. Augustinus*, quòd, si ita esset, nulla subesset causa cur non etiam Ecclesia nunc pro diabolo, & Angelis ejus oret, quod ut absurdum esse evincat, asserit Ecclesiam, si modo sciret quinam ex hominibus adhuc viventibus prædestinati sunt in æternum ignem ire, pro illis non oraturam oratione nimirum illà, quæ prodiret ex absoluta, & efficaci voluntate, quā Sanctos in judicio Dei pro impiis oraturis contendebant illi, quos ibidem impugnât *Sanctus Augustinus*. Cur ergò, inquit *S. ille Doctor*, eadem perfectissimā sanctitate. . . . etiam pro Angelis non orabunt, quibus paratus est ignis æternus, ut Deus Sententiam suam mitiget, & resiliat in melius, eosque ab illo igne faciat alienos? Quod nemo sanæ fidei dixit, nemo dilutus est; alioqui nulla causa est cur non etiam nunc pro Diabolo & Angelis ejus oret Ecclesia. . . . Eadem ipsa causa est, quā fiet ut in illo tunc judicio etiam pro hominibus æterno igne cruciandis, quamvis perfectā sit sanctitate, non oret. Nunc enim propter eā pro eis orat, quos in genere humano habet inimicos, quia tempus est penitentiae fructuose. Ecclesia ergo, juxta illum Sanctum Doctorem, si sciret futuram alicujus damnationem, sciret quoque Deum absolutè non velle illius salutem, unde quia Ecclesia se se ad nutum Dei semper accommodat, salutem ejus, cujus futuram sciret damnationem, nollet absolutà, & efficaci voluntate, eam tamen vellet voluntate generali, & quantum in se est, gratiasque à Deo huic homini precaretur. Idem de oratione Christi dicendum occurrit, licet enim Christus pro reprobis, quorum futuram damnationem noverat, non oraverit oratione perfecta ex voluntate absoluta, efficaci, & consequente (quæ enim eā voluntate petiit Christus, obtinuit semper, juxta illud Scripturæ: *Sciebam quia semper me audis; & ad Hebr. cap. 5. Exauditus est*

est pro sua reverentia .) Oravit tamen Christus pro illis oratione , quæ procedebat ex voluntate antecedenti , & generali salutis eorum , sicut rectè explicat *Sanctus Thomas* 3. p. q. 31. art. 4. & *Leclt.* 2. in cap. 17. *Joannis* , ubi exponens hunc locum : *Non pro mundo rogo , sed pro his , quos dedisti mihi , hæc habet : Christus , quantum est de se , pro omnibus oravit , quia oratio sua , quantum est de se , efficax est ut valeat toti mundo , sed tamen non in omnibus sortitur effectum , nisi in Sanctis , & Electis Dei , & hoc propter impedimentum mundanorum .* Idem apertè innuit *S. Augustinus* *Sermone* 382. dicens : *Quando ergò , Christus , in Cruce pendens orabat , videbat & prævidebat omnes inimicos , sed multos ex illis futuros amicos prævidebat , & idè omnibus veniam postulabat . Illi sciebant , & ille orabat , Illi dicebant Pilato : Crucifige , ille clamabat : Pater ignosce . . . Illis petebat veniam , à quibus tantum accipiebat injuriam .*

Arguitur quartò : Si Christus verà , ac sincerà voluntate pro salute omnium hominum esset mortuus , omnibus indiscriminatim conferret nunc auxilia saltem ad salutem sufficientia ; atqui in doctrina Thomist. Christus non confert omnibus auxilia ad salutem sufficientia ; denegat enim illa , primò , parvulis , qui in utero materno extinguuntur , vel qui ex materno egressi utero confestim absque baptismo præmaturà morte ex hac vita rapiuntur . Baptismus siquidem in nova lege unicum est medium , seu remedium ad salutem parvulorum sufficiens , ut docent Theologi post *S. Thomam* 3. p. q. 63. Secundò , auxilia ad salutem sufficientia denegat itidem Christus iis , qui infideles negativè dicuntur ; seu qui nihil unquam de Evangelio audierunt . Tertiò denique , Christus ea auxilia sufficientia denegat quibusdam peccatoribus , quos Scriptura Sacra , & Sancti Patres appellant *occæcatos* , & *obduratos* , eò quòd ipsis non amplius affulgeat divinæ gratiæ lumen , ergo Christus verà , & sincerà voluntate non est mortuus pro omnibus , & singulis hominibus .

Respondeo neg. maj. Nec enim necesse est ut Christus omnibus promiscuè conferat auxilia ad salutem sufficientia , quamvis pro omnibus , & singulis hominibus mortuus sit , sed abundè sufficit , ut prædicta auxilia , quantum est de se , offerat omnibus , quorum si aliqui illa non recipiant , ex culpa illorum est , quippè qui auxiliis illis sufficientibus , vitiis , & carnis passionibus dediti obicem ponunt , sicut , heu nimium ! funestâ experientiâ constat infidelium , & peccatorum obduratorum , qui in pœnam præcedentium peccatorum nullis cogitationibus bonis illustrantur , nullis affectionibus piis percelluntur ; nec ullis conscientiæ morsibus , ac stimulis excitantur , immò potiùs delectantur in rebus pessimis , atque vulneribus suis , quæ intensissimè diligunt , gloriantur . Et autem innotescat , quod latebat , & suave fiat , quod non delectabatur , gratia Dei est , quæ hominum adjuvat voluntates : qua ut non adjuventur , in ipsis itidem causa est , non in Deo , ait *Augustinus* lib. 2. de peccatorum meritis , & remission. cap. 17. Idem docet *Sanctus Thomas*

in 1. Sent. Distinct. 40. q. 4. art. 2. ubi inquit, *utrum Deus sit causa obdurationis? Et argumento, sed contra, ita respondet: Contra est, quod dicunt Sancti communitur, Dionysius, Augustinus, & Anselmus, scilicet quod causa quare iste non habeat gratiam, est quia noluit accipere, & non quia Deus non vult dare, quia lumen suum omnibus offert, quod lumen ab omnibus non percipitur, sicut nec lumen Solis d. cæco. Idem repetit, sæpiusque inculcat Angelicus Doctor, qui hanc doctrinam etiam hausit è S. Ambrosio, qui in Psalmum 118. hæc habet: Sol ille iustitiæ omnibus ortus est, omnibus venit, omnibus passus est, & omnibus resurrexit. Si quis autem, clausis fenestris, solis radios excludit, non ideo sol ortus est omnibus, quia calore ejus se ipse fraudavit. Quamobrem, sibi vitio vertere debent infideles, & peccatores obdurati, quod gratis ad salutem sufficientibus priventur, non secus ac merito culpantur illi, qui, dum Sol per totum Orbem radios suos spargit, lucemque affundit, oculos de industria occludunt, vel velum ob oculos ponunt ne videant, & illi sunt, qui, teste Scripturâ Sacrà, rebelles sunt lumini, & qui domino ad cordis ostium pulsanti dicunt: Recede à nobis, scientiam viarum tuarum nolumus. Quod autem spectat parvulos, qui vel in utero materno moriuntur, vel vix in lucem editi ex hac vita sine Baptismo excedunt; respondent Thomistæ: verâ, & sincerâ voluntate antecedente Christum mortuum esse pro illis, quatenus videlicet præparavit, & instituit generale remedium, seu Baptismum, ad delendum peccatum originale, quod remedium si parvulis quandoque non applicetur, hoc pertinet ad voluntatem Dei consequentem, quâ Deus, habitâ ratione peccati originalis, vel suæ justitiæ manifestandæ causâ, non vult ut illis applicetur, & ut inquit S. Augustinus Epist. 217. aliàs 107. ad Vitalem, & lib. de Dono persev. cap. 12. Aliquando cupientibus, festinantibusque parentibus, Ministris quoque volentibus, & paratis, Deo nolente non datur Baptismus. Stat ergo vera, & sincera voluntas, quam Deus habet salvandi omnes omnino homines, quia omnibus, & singulis hominibus gratias ad salutem sufficientes (non Molinistico, sed Thomistico sensu intellectas) offert, & præparat, licet eas non omnibus largiatur. Unde Concilium Tridentinum loco suprâ laudato ait: *Etsi ille, seu Christus, pro omnibus mortuus sit, non tamen omnes mortis ejus beneficium suscipiunt, sed hi dumtaxat, quibus meritum passionis ejus communicatur. Nec obstat divinæ voluntatis de omnium hominum salute sinceritatis gratiæ sufficientis subtractio, quia Deus eam intuitu gravissimorum peccatorum subtrahit, quibus homines ejus demeritum incurrunt; non secus, ac Judex, nondum probato homicidio, de quo aliquis homo accusatur, censetur habere voluntatem sinceram ipsum à morte liberandi, quam ipsum postea morti tradi jubeat, dum reus convictus est. Mercator etiam procelloso expositus mari sinceram habet voluntatem salvandi merces suas, non spectato vitæ periculo, quamvis cognito proximo vitæ**

vitz suæ discrimine eas in mare projiciat. Sic Deus, habitâ dumtaxât ratione bonitatis suæ, & effusionis Sanguinis Christi, vult sincerè largiri gratias sufficientes, quanquàm postmodùm habitâ ratione gravissimorum peccatorum, aut etiam solius culpæ originalis, aut justitiæ suæ manifestandæ causâ, eas jussu suo judicio subtrahit excœcatis, & obduratis in flagitiis, nec non infidelibus, & parvulis absque Baptismo decentibus. Plura hac de re legi possunt apud *Bellarminum* lib. 2. De Gratia & lib. arb. cap. 6. & seq. Addam hic dumtaxât testimonium *P. Becheferii*, Societ. Jesu, qui die 3. Aprilis anni 1700. publico instrumento, jubente Eminentiss. Cardinali *Noallio*, Archiep. Parisiensi, declarare compulsus est, nec paucos, nec infimi nominis esse Theologos, qui docent induratos, & obœcatos, omni, ad certum saltèm tempus, interiori gratiâ destitui. Quâ de re, si plura scire aveas, leges Historiam Congregationum de auxiliis, à nostro *Jacobo Hyacintho Serry* editam, à pag. 455. usque ad pag. 475. postremæ editionis, ubi cl. ille Auctor impotentiam moralem, seu voluntariam, & propriâ iniquitate contractam, obduratos, & excœcatos à peccato non excusare omni argumentorum genere demonstrat.

Arguitur quintò: Ille non censetur habere veram, & sinceram voluntatem moriendi pro salute omnium hominum, qui benè multis hominibus confert auxilium dumtaxât sufficiens, cum quo tamen, ob defectum alterius auxilii, seu efficacis, ad salutem omninò necessarij, nunquàm salutem æternam consequentur, atqui Christus impiis, & infidelibus in sua impietate, vel infidelitate morituris, confert, vel præparat dumtaxât auxilium sufficiens, cum quo tamen ob defectum alterius majoris auxilii, quod ipsis absolutè denegat, salutem æternam nunquàm consequentur, ergò Christus veram, & sinceram non habuit voluntatem salvandi omnes homines. Prob. min. docent communiter Thomistæ, ad æternam salutem consequendam præter auxilium sufficiens, aliud ex parte Dei requiri auxilium, quod est per se, & ab intrinseco efficax, quodque ex entitate, seu ex natura suâ distinguitur ab auxilio sufficiens, ita ut auxilium sufficiens nunquàm evadere possit efficax, ex qua Thomistarum doctrina palàm sequitur, impios, & infideles, quibus Christus per mortem suam confert dumtaxât, aut præparat auxilia sufficiens ad salutem, ipsisque denegat auxilium efficax, salutem æternam nunquàm consequuturos ob defectum auxilii efficacis, quod Christus ipsis impartiri non vult.

Respondeo primò: Retorquendo illud argumentum in Molinistas, illi quippè, etsi doceant, præter auxilium sufficiens ad salutem æternam consequendam omnibus indiscriminatim concessum, nullum aliud ex parte Dei esse expectandum, fatentur attamen, illud auxilium, ut fiat efficax, & ad salutem infallibiliter perducatur, pendere non solum ex consensu liberi arbitrii, sed ex opportunitate quarundam circumstantiarum, in quibus Deus hominem constituit, & in quibus, cum consensum cer-

tò per scientiam mediam prænoscit; quò fit, ut ejusmodi gratiam, genio, indoli, temperamento, aliisque circumstantiis loci, & temporis accommodatam, soleant appellare *Congruam*. Hac autem semel constitutà sententià, quam constat communioem esse inter Societatis Theologos, sic argumentum conficio: ille non est mortuus pro omnibus omninò hominibus, qui noluit omnibus dare gratiam congruam, quæ major est saltèm in ratione beneficii gratià purè sufficienti, & quæ ad salutem æternam consequendam prorsùs necessaria est, atqui Societatis Theologi ultrò fateantur, Christum noluisse omnibus dare gratiam congruam, ergo Christus, in illorum sententià, verà, & sincerà voluntate non est mortuus pro omnibus omninò hominibus. Viden, eamdem difficultatem, idemque argumentum etiam in adversariorum sententia recurrere?

Respondeo secundò: Quòd siue gratia efficax distinguatur ex entitate, i test, ex natura suà, à gratia sufficienti, adeò ut gratia sufficiens nunquam possit evadere efficax, sicut sentiunt omnes fermè antiqui Thomistæ, siue etiam gratia efficax non distinguatur ex entitate, seu ex natura suà, à gratia sufficienti, sed solùm penès intensionem graduum efficaciar, quibus suapte vi superat gradus obstinationis, & malitiæ voluntatis creatæ, sicut post *Gonzalem* docet *Pater Antonius Massoulie* Art. 1. q. 6. To. 2. libri, cui titulus est: *D. Thomas sui interpret*, semper tamen verum erit dicere, Christum mortuum esse pro omnibus omninò hominibus, etiamsi impiis, & Infidelibus in sua impietate, & infidelitate morituris gratias per se, & ab intrinseco efficaces non conferat. Nam primò, antiqui Thomistæ, qui asserunt gratiam efficacem distingui ex entitate, seu ex natura suà, à gratia sufficienti, docent, non Deo, sed soli homini imputari debere, quod careat gratià se ipsa efficaci; Deus siquidem titulo benevolentia, & amicitia, quâ prosequitur homines, gratiam efficacem, ad quam disponit, viamque sternit gratia sufficiens, omnibus offert, & ex se reverà conferre paratus est; nec enim alio fine Deus auxilium sufficiens homini confert, quàm ut hominem ulteriùs promoveat, & disponat ad alterum majus auxilium, seu efficax ab ipso Deo obtinendum; quod procul omni dubio Deus confetret homini, nisi hunc divinum influxum homo malitià suà sisteret, & gratia efficaci aditum præcluderet, non secùs, ac ex. gr. cum agens naturale dispositiones ad formam producendam inducit in subjectum, nisi hic dispositionum cursus intercipiatur, seu impediatur, tamdiù agens influit, donec ea ultima dispositio, ad quam forma consequitur, producta fuerit. Hinc *Sanctus Thomas* in cap. 6. *Joannis*, & pluribus aliis in locis ait: *Ex quo Deus paratus est dare gratiam omnibus, & ad se trahere, non imputatur ei si aliquis non accipiat, sed ei qui non accipit, & 3. contra Gentes cap. 159. Deus quantum est in se, paratus est omnibus dare gratiam; vult enim omnes homines salvos fieri. Cum igitur Deus ex se sit paratus conferre omnibus gratias efficaces, & in culpa hominum sit, quòd illas non recipiant, rectè sequitur, Deum vel-*

velle salutem omnium hominum, quamvis benè multis non suppeditet auxilia efficacia, quæ ex entitate, & naturâ suâ ab auxiliis sufficientibus distinguuntur. Secundò, alii Thomistæ, qui volunt, gratiam efficacem non distingui ex entitate, seu ex naturâ suâ, à gratia sufficienti, sed tantùm penès intensionem graduum efficaciz, quibus superat gradus malitiz voluntatis creatæ, eamque convertit; docent, inquam, illi Thomistæ, in solius hominis culpa esse, quod gratiâ seipsâ efficaci privetur. Idque illustrant hoc clarissimo exemplo. Supponunt quippè, voluntatem alicujus hominis ex pravis habitibus, ac diuturnâ peccandi assuetudine ad octo, vel decem gradus obstinationis pervenisse; si itaque Deus huic homini malè affecto gratiam conferat, quæ plures, & majores efficaciz gradus habeat, quàm sint gradus obstinationis, & malitiz in voluntate, tunc illa gratia suapte vi superabit obstinationem voluntatis, & erit re ipsâ efficax. At, si Deus, ità exigentibus illius hominis demeritis, gratiam minus validam conferat, & quæ in gradibus efficaciz superior, major, ac fortior non sit gradibus obstinationis, seu malitiz voluntatis, tunc illa gratia voluntatem quidem commovebit, sed illam non convertet, nec illius obstinationis gradus superabit, eritque tùm temporis gratia tantùm sufficiens, & inefficax, non quidem ex defectu sui, cum re ipsa, & vi sua converteret voluntatem si minor esset voluntatis resistentia, sed ex defectu voluntatis, quæ obstinatione suâ magis obstitit. Perindè ac si admotum lignum ignis non comburat, id non oritur ex parte ignis, qui agit, & cui non deest vis agendi, sed ex parte ligni, quod humiditate & aquâ cum sit oppletum, efficaciz, & vi ignis magis obstitit, eamque extinguit. Sic etiam Sacramenta novæ Legis si aliquandò gratiam non producant; id non oritur ex defectu Sacramentorum, quæ potiùs, ut docent omnes Thomistæ, vim habent veram, & physicam, gratiam producendi, sed id proficiscitur ex vicio suscipientis, qui gratiz susceptioni obicem, & impedimentum ponit. Similiter igitur, si voluntas hominis pluribus implicita malitiz, & obstinationis gradibus divina motione non convertatur, & aliâ gratiâ majori, ac potentiori ad actualem conversionem, & ad salutem consequendam opus habeat, id non motioni divinæ, sed resistentiæ, & malitiz voluntatis adscribi debet. Patet itaque, quod sive gratia efficax ex entitate, seu ex naturâ suâ, distinguatur à gratia sufficienti, sive ab ea tantummodò penès intensionem graduum efficaciz distinguatur, semper verum est dicere, hominem suâ culpâ carere gratiâ efficaci, ac subindè Christum verâ, ac sincerâ voluntate mortuum esse pro omnibus omninò hominibus, quamvis non omnibus gratias efficaces largiatur.

Arguitur sextò: Voluntas excludendi aliquos à gloria, eisque absolute denegandi auxilia efficacia ad salutem consequendam omninò necessaria, stare, & cohærere minimè potest cum sincera voluntate salvandi omnes homines, atqui in sententia Thomistarum Deus vult aliquos exclu-

cludere à gloria, ipsisque denegare auxilia efficacia ad salutem consequendam necessaria, ergò in sententia Thomistarum nequit esse in Deo sincera voluntas salvandi omnes homines, ac proinde Christus non est mortuus pro omnibus omnino hominibus.

Respondeo neg. maj. Voluntas quippè in Deo sincera salvandi omnes in individuo homines optimè cohæret cum voluntate excludendi aliquos à gloria, eisque denegandi auxilia efficacia. Ratio est, quia voluntas Dei antecedens habet pro suo objecto salutem omnium hominum præcisè in se consideratam, & avulsam ab omnibus circumstantiis, voluntas verò consequens habet pro suo objecto salutem hominum suis omnibus indutam circumstantiis, aliquid autem, inquit *Sanctus Thomas* 1. p. q. 19. ad 1. potest esse in prima sui consideratione, secundum quod absolute consideratur, bonum, vel malum, quod tamen prout cum aliquo adjuncto consideratur, è contrario se habet. Sicut hominem vivere est bonum, & hominem occidi est malum, secundum absolutam considerationem: sed si addatur circa aliquem hominem, quod sit homicida, vel vivens in periculum multitudinis; sic bonum est eum occidi, & malum est eum vivere: undè potest dici, quod Judex justus antecederet vult omnem hominem vivere, sed consequenter vult homicidam suspendi. Similiter Deus antecederet vult omnem hominem salvari, sed consequenter vult quosdam damnari, secundum exigentiam justitiæ suæ. Quibus verbis Doctor Angelicus optimè conciliat voluntatem sinceram, quæ Deus vult salutem omnium hominum, cum voluntate, quæ vult aliquos excludere à gloria, ipsisque denegare auxilia efficacia; nam sicut Judex potest antecederet sincerè velle salutem hominis, quem tamen, attentis circumstantiis illius vitæ, judicat, & vult consequenter de medio tolli; ita non absimili ratione Deus voluntate antecedente sincerè vult salutem omnium hominum in se præcisè, & absolute consideratam, sed voluntate consequente, idest, attentis circumstantiis defectibilitatis humanæ, pulchritudinis universi, ordinis justitiæ suæ, & manifestationis suorum attributorum, vult aliquos excludere à gloria, ipsisque auxilia efficacia denegare. Addo etiam, quòd, cum Deus sit provisor universalis, ad quem spectat consulere bono universi, oportet, ut stante sincerà illa voluntate, quæ vult omnes salvos fieri, permittat tamen aliquos excidere à gloria, & cadere in peccatum, non impartiendo malitiam, sed subtrahendo gratiam suam, ut hinc liberi arbitrii ad bonum æquè ac malum flexibiles contingentia elucescat. Vult Deus, inquit, *S. Augustinus* lib. de Spiritu, & Littera cap. 33. omnes homines salvos fieri, & in agnitionem veritatis venire, non sic tamen ut eis adimat liberum arbitrium, quo vel benè, vel malè utentes justissimè judicentur. Quod cum fit, infideles quidem contra voluntatem Dei faciunt, cum ejus Evangelio non credunt, nec idèò tamen vincunt, verum seipsos fraudant magno, & summo bono, malisque paucis libus implicant, experturi in suppliciis potestatem ejus, cujus in donis misericordiam contempserunt.

Ar-

Arguitur septimò : Deus non magis dici potest Salvator Infidelium, Judæorum, & iniquorum Christianorum, quàm eorum Pater, atqui Deus appellari non potest Pater Infidelium, Judæorum, & iniquorum Christianorum; sed solum dicitur Pater eorum, qui per spiritum adoptionis, seu per gratiam, justitiam, & charitatem fiunt filii Dei, sicut docent Sancti Patres, *Cyprianus* in Tract. de Orat. Dominica, *Gregorius Nissenus* orat. 2. in Orat. Dominic. *Chrysostomus* Homil. 20. in Matth. *Augustinus* Epist. 153. aliàs 54. ad Macedonium, *Isidorus Pelusiota* lib. 4. Epist. 24. *S. Thomas* in cap. 6. Matthæi, & alii, ergò similiter Deus dici non potest Salvator Infidelium, Judæorum, & iniquorum Christianorum, sed solum Electorum, ac Prædestinatorum, ac subindè Christus non est mortuus pro omnibus omninò hominibus.

Respondeo neg. min. ad cujus probationem dico : Patres in objectione citatos non negare, Deum esse Patrem omnium hominum etiam Judæorum, Gentilium, & impiorum Christianorum; sed solum velle, Deum speciali quâdam ratione esse Patrem justorum, quâ nequaquam dici potest Pater Judæorum, Gentilium, & impiorum Christianorum, quod est inconfesso apud omnes. Nam primò, Deus est Pater Judæorum atque Gentilium, non solum quia ipsi impertiit naturam spiritualem, liberam, immortalem, ratione præditam, sapientiæ, justitiæ, & beatitudinis capacem; vitam intellectiōne, liberâque volitione constantem, sed etiam quia verâ, & sincera voluntate, licet antecedente, misit Filium suum unigenitum in Mundum, ut in assumpta communi omnibus humana natura pro omnibus etiam Judæis, & Infidelibus Sanguinem suum funderet, & pretium redemptionis omnibus commune dependeret. Secundò, Deus est Pater malorum Christianorum in quantum per januam Baptismi eos in Ecclesiam suam introduxit, illosque ad conversionem sæpissimè excitat per gratias internas, per conscientiarum remorsus, per illuminationes, quibus intellectum, per pias motiones, quibus voluntatem eorum identidem prævenit, & ad salutaria impellit, quâ de causa Deus malis, & impiis Christianis longè specialius se Patrem exhibet, quam Judæis, & Infidelibus. Denique, Deus est Pater justorum modo quodam speciali, superexcellenti, & ipsi. solis eximio, quia nempe assumit illos in filios adoptivos, futuros hæredes suos, cohæredes autem Christi; largitur illis esse quoddam divinum, & supernaturale, vitam gratiæ, justitiæ, & charitatis, quâ Judæi, Infideles, & iniqui Christiani privantur. Quamvis ergò Deus sit Pater omnium hominum, etiam Infidelium, Judæorum, & iniquorum Christianorum, modo tamen quodam speciali, ratione videlicet adoptionis, est Pater justorum, perindè ac Christus, ut docet *S. Thomas*, est caput omnium hominum, præcipuè tamen justorum, qui per gratiam, & charitatem tanquàm membra viva cum ipso connectuntur. Undè, sicut negari non potest, Deum esse Patrem omnium hominum, præcipuè tamen justorum, ita etiam

etiam certum apud omnes esse debet, Deum esse Salvatorem omnium hominum, maximè tamen Fidelium, seu Electorum, ac Prædestinatorum. Hinc, jure optimo *Alexander VIII.* Pontifex Maximus, hanc Propositionem confixit: *Pagani, Judæi, Hæretici, alique hujus generis, nullum omninò accipiunt à Jesu Christo influxum, adeòque rectè inferes, in illis esse voluntatem nudam & incremem sine omni gratia sufficienti.*

Arguitur ultimò: Anno Christi octingentesimo quinquagesimo tertio habita est Synodus Carisiaca, in qua Episcopi ad dirimendas Controversias, quæ jam totam Ecclesiam Gallicanam perturbabant, congregati; quatuor ediderunt Capitula, in quorum tertio definiunt, quod *Deus Omnipotens sine exceptione vult omnes salvos fieri, licet non omnes salventur.* Et in Capitulo quarto statuunt, quod *Christus Dominus noster, sicut nullus homo est, fuit, vel erit, cujus natura in illo assumpta non fuerit: ita nullus est, fuit, vel erit homo, pro quo passus non fuerit, licet non omnes Passionis ejus Mysterio redimantur.* In his duobus Concilii Carisiaci Capitulis clarissimè exprimitur voluntas Dei salvandi omnes omninò homines, atqui tamen hæc duo Capitula fuere reprobata à celeberrima Lugdunensi Ecclesiâ, & à Concilio Valentino tertio, non ergo dogma Fidei est Christum mortuum esse pro omnibus, & singulis hominibus. Prob. min. Ecclesia Lugdunensis in libro *De tenenda veritate Scripture*, edito ab Archipræsule suo Remigio, viro sanctitate, atque doctrinâ conspicuo, acriter invehit in Capitulum quartum Carisiacum, in quo dicitur, quod *nullus homo fuit, est, vel erit, pro quo Christus passus non fuerit, mentemque suam disertè aperit prædicta Ecclesia cap. 15. ejusdem libri, ubi ait, absurdum, ac planè erroneum esse, ut pro iis, qui in sua impietate mortui æterno jam judicio condemnati erant, Christus passus sit; alioquin & pro diabolo, & Angelis ejus Christum passum dici posse: Sicut ergo, sunt celeberrimæ illius Ecclesiæ verba, pro illis impiis, & damnatis Angelis nullatenus Dominus Jesus Christus dicendus est passus: ita pro istis impiis, & damnatis hominibus absit omninò ut passus esse credatur.* Et in libro *De tribus Epistolis* cap. 15. distinguit eadem Ecclesia quatuor ordines hominum in redemptionis, & reconciliationis gratia. Primus est electorum, & prædestinatorum ad vitam æternam, de quibus nullus perire potest. Secundus ordo est Fidelium, qui rectâ Fide, & pietate accedunt ad gratiam Baptismi, & per eam accipiunt indulgentiam peccatorum; sed postea diversis tentationibus, & iniquitatibus gratiam ipsius Fidei, & redemptionis amittunt, & usque ad exitum perseverant in malis suis. Tertius ordo eorum est, qui adhuc in infidelitate positi ad Christi tamen Ecclesiam aliquandò vocandi sunt per Dei misericordiam. Quartus denique ordo illorum est, qui manifestò extrâ Fidelium numerum jacent, seu nunquam Fidelium cœtui associari debent, sed æternæ damnationi sunt destinati. Posito illo quadruplici hominum ordine, asserit Ecclesia Lugdunensis cap. 16. pro trium priorum ordinum homi-

hominibus mortuum esse Christum Dominum, sed pro quarti ordinis hominibus, impiis scilicet ante Passionem Christi Domini in impietate, aut pro Infidelibus in infidelitate mortuis, nullo modo passum, aut crucifixum esse: *Unum tamen est, quod nos & fidelissime credimus, & verissime novimus, quia pro illa innumerabili, & infinita multitudine impiorum, qui ab exordio Mundi usque ad Passionem Domini per quatuor ferme annorum millia in sua impietate sunt mortui, & apud Inferos æterna perditione damnati; nunquam Dominus passus, nunquam mortuus est, nec ad eos salvandos ullatenus venit, nec pro eis pretiosum Sanguinem sudavit.* Hæc habet Ecclesia Lugdunensis cap. 18. cujus doctrinam Episcopi trium Provinciae Lugdunensis, Viennensis, & Arelatensis in Synodo Valentina congregati anno Christi octingentesimo quinquagesimo quinto approbarunt Canone quarto, qui est de redemptione Sanguinis Christi, ibidemque reprobant doctrinam contentam in Capitulis Carisiacis de voluntate Christi salvandi impios, qui à Mundi exordio usque ad Passionem Domini in sua impietate mortui, & æternis flammis addicti sunt; tanquam doctrinam inutilem, noxiam, & contrariam veritati; sic enim loquuntur: *Porro capitula quatuor, quæ à Concilio Fratrum nostrorum minus perspectè suscepta sunt, propter inutilitatem, vel etiam noxietatem, & errorem contrarium veritati; sed & alia novemdecim syllogismis ineptissime conclusa, & licet jactetur, nulla seculari literatura nitentia, in quibus commentum diaboli, potius quam aliquod augmentum Fidei deprehenditur, à pio auditu Fidelium penitus explodimus, & ut talia, & similia caveantur per omnia auctoritate Spiritus Sancti interdicimus.* Ex quibus verbis manifestum est, Patres Synodi Valentinx, & Ecclesiam Lugdunensem negasse Christum esse mortuum pro omnibus omnino hominibus.

Respondeo: Ecclesiam Lugdunensem, & Synodi Valentinx Patres idè Capitula Carisiaca damnassee, quia errore facti putarunt, Carisiacorum Auctores Capitulorum eadem prorsus ratione, & eodem planè sensu definisse Christum esse mortuum pro his, qui in infidelitate, vel impietate sua mortui, aut morituri sunt, ac pro illis, qui per gratiam Christi sanctificati in ea perseverant, & salvantur. Hunc esse sensum Capitulorum Carisiacorum existimavit Ecclesia Lugdunensis, & Synodi Valentinx Patres. Verùm, in hoc errarunt errore facti. Nam Patres Concilii Carisiaci in his condendis Capitulis proponere dumtaxat voluerunt avitam doctrinam Ecclesiæ, videlicet Christum sufficienter mortuum esse pro impiis, & infidelibus, licet efficaciter tantum pro illis mortuus sit, qui salutem æternam consequuntur. Quam doctrinam, utpotè Catholicam, nunquam Ecclesia Lugdunensis, & Synodi Valentinx Patres improbarunt; sed id unum tantummodò definire voluerunt, Christum non efficaciter pro illis mortuum esse, qui à Mundi exordio usque ad Passionem Domini, in sua impietate, vel infidelitate mortui æterni sunt

damnatione puniti, ut scilicet eos ex Inferno eriperet, sicut Patres liberavit ex Limbo. Hanc genuinam esse Ecclesię Lugdunensis, & Patrum Synodi Valentinię mentem, patet primò, quia ad suę doctrinę probationem hanc Prophetę Osę Sententiam usurparunt: *Ero mors tua ó mors, ero morsus tuus inferne*, sive, ut explicat S. Gregorius lib. 12. Moral. cap. 8. & Homil. 22. in Evangelia, *ex eo, quod mordemus, partem abstrahimus, partem relinquimus; quia ergo in electis suis, Christus funditus occidit mortem, mors mortis extitit: quia verò ex Inferno partem abstulit, & partem reliquit, non occidit funditus, sed momordit Infernum*. Christus ergo, juxta mentem Ecclesię Lugdunensis, & Patrum Synodi Valentinię, non est mortuus efficaciter pro impiis, & infidelibus, qui ab exordio Mundi usque ad Passionem Christi in sua impietate, vel infidelitate mortui sunt, quia Christus eos ab Inferno non liberavit: sed potius illos æternum puniendos reliquit. Secundò, Ecclesia Lugdunensis mentem suam clarissimè promit in libro de tribus Epistolis, ubi, postquam cap. 11. tres supra allatas S. Augustini expositiones, ad voluntatem Dei consequentem de salute Electorum pertinentes, adhibuit huic testimonio Apostoli: *Qui vult omnes homines salvos fieri, & ad agnitionem veritatis venire*; postea cap. 12. quartam addit illius Apostolici testimonii expositionem, quę spectat ad voluntatem Dei antecedentem de salute omnium hominum, ait enim, quòd Deus vult omnes homines salvos fieri bonitate Creatoris, & tamen eos, quos indignos salute judicaverit, justā Judicis severitate non salvat. Quam expositionem denudò approbat Ecclesia Lugdunensis cap. 13. his verbis: *Quod autem ibi simpliciter intelligitur Deum velle omnes homines salvos fieri, bonitate scilicet Creatoris, ita (ut putamus) fideliter potest recipi, si hanc voluntatem bonitatis suę erga salutem hominum non credatur humana obfistente voluntate non posse implere, sed obfistente humana iniquitate implere nolle*. Undè liquet, Ecclesiam Lugdunensem non negasse Christum mortuum, esse pro omnibus omnino hominibus sufficienter, hoc est, voluntate antecedente, Catholico sensu intellectā, sed solū negasse Christum mortuum esse efficaciter, seu voluntate consequente pro impiis, qui in sua impietate, vel infidelitate mortui æternis flammis sunt addicti, ut eos ex Inferno per mortem suam liberaret. Idem judicium ferendum est de Synodi Valentinię Episcopis, qui, licet Capitula Concilii Carisiaci, necdum satis perspecto, & explorato eorum germano sensu, censurā confixerint; attamen postquam, re maturius expensā, intellexerunt, in illis Capitulis definitum tantummodò fuisse Christum mortuum esse sufficienter pro impiis, aliisque, qui pereunt, efficaciter verò pro electis, & prædestinatis, censuram, quam illis capitulis Carisiacis inusserant, expunxerunt in Synodo Lingonensi, celebratā anno Christi octingentesimo quinquagesimo nono, & in Synodo Tullensi, quindecim diebus post Synodum Lingonensem apud Saponarias habitā, in hac siquidem Tullensi

Sy-

Synodo Canones Concilii Valentini relecti, ac omnium calculo approbati sunt, omiſſa prædicta cenſurâ, quæ ſic incipit: *Porrò quatuor Capitula, quæ d Concilio Fratrum noſtrorum &c.*

Advertat primò Lector in fine huiusce Diſſertationis, paucos extitiſſe in quinto Eccleſiæ Sæculo obſcuro nominis viros, vulgò *Prædeſtinianos* appellatos, qui negarunt Chriſtum mortuum eſſe pro omnibus omninò hominibus, aliæque prava dogmata circâ prædeſtinationem, & gratiam propugnarunt, qui tamen in Sæctam non coaluerunt. Id probari poſteſt ex pluribus momentis. Primò, *Fauſtus*, Rejenſis Epiſc. & *Semipelagianorum* Coriphæus, qui ſub ſpecioſo obtentu conſutandæ *Prædeſtinationis* hæreſeos duos de gratia, & libero arbitrio ad doctrinam *S. Auguſtini* impugnandam libros ſcripturavit, unicum dumtaxat indigitavit *Prædeſtinianum*, videlicet *Lucidum*, qui, poſt ſuſceptam ab eodem *Fauſto* Epiſtolam, ad meliorem frugem revocatus, palinodiæ libellum, contexuit, quem tranſmiſit ad Epiſcopos Gallicanos, ſeu ad Patres Conciliorum Arelatenſis, & Lugdunenſis, quæ id ætatis ad exterminandos paucos illos *Prædeſtinianos* celebrata fuerunt. Secundò, inter errores *Prædeſtinianorum* hic unus erat, quo affirmabant: *Aliquos homines ad malum divina poteſtate prædeſtinatos eſſe*, atqui conſtat ex Synodo Arauſicana paucos admodum & viles fuiſſe illos, qui hoc virulentum dogma defendebant; legimus quippè in Synodo Arauſicana ſic Patres definiſſe: *Aliquos verò ad malum divina poteſtate prædeſtinatos eſſe non ſolum non credimus, ſed etiam, ſi ſunt, qui tantum malum credere velint, cum omni deteſtatione illis anathema dicimus.* Porro, ſi plures hoc in errore verſati fuiſſent, Sæctamque conſiſſent, de illis Patres Synodi Arauſicanæ non ſic dubitanter fuiſſent locuti, ſed eos potiùs abſolutè damnatos anathemate percuſiſſent. Tertiò, Sancti Patres, qui nono Eccleſiæ Sæculo floruerunt, *Prudentius* ſcilicet & *Remigius*, negarunt extitiſſe aliquandò hæreſim *Prædeſtinianam*, ſic enim loquitur *S. Prudentius* in libro contrâ *Joannem Scotum Erigenam* cap. 4. *Tertiam verò hæreſim, quam Pelagianis contrariam aſſeris, qua ita donum gratiæ prædicetur, ut libertas arbitrii funditus auferatur, nec legimus, nec audivimus.* Sanctus verò *Remigius* in libro contrâ eundem *Joannem Scotum Erigenam* cap. 4. ait: *Quæ eſt iſta ſecunda hæreſis tam incognita, tam inaudita, quæ libero arbitrio denegato ſolius gratiæ ſit prædicatrix? niſi quia, ut nobis videtur, diſputator iſte vel Beatum Auguſtinum latenter quaſi hæreticum accuſat.* Sanè credibile non eſt, Sanctos illos Patres potuiſſe nono Eccleſiæ ſæculo negare, extitiſſe aliquandò *Prædeſtinianam* hæreſim, ſi *Prædeſtiniani* aliquam Sæctam reapſe conſiſſent. Quin, quod ſingulari obſervatione dignum eſt, Sancti Patres, qui quintum ſæculum illuſtrarunt, & hæreſim, quæ variis temporibus Eccleſiam infeſtarunt, Catalogum datâ operâ texuerunt, ne per umbram quidem illius *Prædeſtinationis* hæreſeos meminerunt. De illa quippè nullam planè mentionem fecit *S. Auguſtinus*

stinus sive in libro de Hæresibus, sive in tam multis, quos edidit, de Gratia libris. Illius itidem Hæreseos ne vola, ne vestigium quidem extat apud Sanctos Prosperum, Fulgentium, Hilarium, Petrum Diaconum, & alios Sanctos Patres, strenuos Ecclesiæ doctrinæ defensores, & omnis prorsus erroris impatientes. Ex illo itaque SS. Patrum silentio probabilius, ni mea me fallat mens, colligitur extitisse quidem, quosdam in quinto sæculo obscuri nominis viros, qui negabant Christum pro omnibus mortuum esse, aliaque id genus circa Gratiam, & prædestinationem prava, & exitiosa imbiberant dogmata, eos tamen adeò viles, ac paucos fuisse, ut ne extare quidem in Orbe judicarentur. Quapropter, falsi vincitur *Sirmondus*, qui in libro, quem edidit de Hæresi Prædestiniana cap. 1. asserit, Prædestinatarum Sectam apud Monachos Adrumetinos primùm pululare cæpisse. Deindè, cap. 2. addit, Prosperum, & Hilarium adversus eandem Sectam in Galliis enatam, Augustini opem implorasse, eorumque votis annuisse Augustinum conscribendo contrà Prædestinianos libros de Prædestinatione Sanctorum, & de *Dono Perseverantiæ*. Denique, cap. 3. scribit, mortuo Sancto Augustino, Prosperum, & Hilarium ad profligandam Prædestinatarum Sectam, quæ, instar canceri, longè latèque in Galliis serpebat, Romam ad Cælestinum Papam confugisse, à quo Rescriptum contrà Prædestinianos ad Galliz Episcopos directum impetrarunt. In his, inquam, quæ in tribus illis capitulis scribit *Sirmondus*, falsi vincitur: nam primò, ut ait Card. Norisius cap. 13. lib. 2. Hist. Pelag. falsum est, Monachos Adrumetinos Prædestinantiæ hæresi initium dedisse, immò potius constat, Semipelagianismum apud illos exortum esse, quem S. Augustinus, edito libro de Gratia, & libero arbitrio, in cunis suffocavit, ut testatur idem S. Doctor lib. 2. Retractat. cap. 66. ubi hæc habet: *Propter eos, qui cùm defenditur gratia putantes negari liberum arbitrium, sicut ipsi defendunt liberum arbitrium, ut negent Dei gratiam, assentes eam secundum merita nostra dari, scripsi librum, cujus titulus est: De Gratia, & libero arbitrio. Ad eos autem scripsi Monachos Adrumetinos, in quorum Monasterio de hac re caperat esse contentio. Adrumetini ergo Monachi, teste S. Augustino, non erant Prædestiniani, sed potius Semipelagiani, quippè qui asserabant liberum auferri arbitrium, si nulla hominis merita gratiam divinam antevertant. Secundò, oppidò fallitur *Sirmondus*, dùm jejune, & circa ullam probationem asserit, Prosperum, & Hilarium adversus emergentes Prædestinianos opem Augustini implorasse, cùm potius legenti Epistolas Sanctorum Prosperi, & Hilarii perspicuum sit, geminum Augustini discipulum opem Aquilini Doctoris petiisse adversus Semipelagianos, qui passim doctrinam Sancti Augustini de Proposito Dei, seu Decreto absoluto, & de prædestinatione gratuita impetebant, dictitantes: *removeri omnem industriam, tollique omnes virtutes, si Dei constitutio humanas præveniat voluntates, & sub hoc prædestinationis nomine**


ne fatalem induci necessitatem. Quibus verbis Sanctorum Prosperi, & Hilarii graphicè describuntur Semipelagiani. Nec denique majorem fidem meretur Sirmondus, dùm ait, mortuo Sancto Augustino, Prosperum, & Hilarium Romam apud Cælestinum, Papam, de Prædestinarianis conquestos fuisse; non majorem, inquam, in hoc fidem meretur Sirmondus: Luce liquidem clarius est, Hilarium, & Prosperum, de illis apud Cælestinum conquestos fuisse, qui *san. mem. Augustini doctrinam reprehendunt*, quales profectò fuisse Semipelagianos, qui adversus Sancti Augustini Scripta insolenter insurgabant, eaque erroris insimulabant, nemo inficias ibit. Quapropter, rejectis illis vanis Sirmondi conjecturis, longè probabilius esse censeo cum Card. Norisio loco mox laudato, extitisse quidem in quinto sæculo paucos rudioris intelligentiæ, & pinguioris Minervæ homines, dictos *Prædestinianos*, qui de morte Christi, de gratia, & prædestinatione catholicè non sentiebant, eos tamen in Sectam minimè coaluisse; Semipelagianos verò, ut collatam in se à discipulis Sancti Augustini novæ hæreseos suspicionem graviori, & horribiliori accusatione propellerent, inde occasionem perperam arripuisse omnes promiscuè Augustini doctrinæ defensores sub invidioso Prædestinatariorum nomine denigrandi, & hoc pacto clavum clavo trudendi. Sed tam atrocem calumniam falsò discipulis Sancti Augustini impactam, à Sancto Augustino, ejusque discipulis omni argumentorum genere amolitur *Sanctus Prosper* in Resp. ad objectiones Gallorum.

Advertat secundò Lector, *Gotteschalchum*, Monachum Ordinis Sancti Benedicti in Cœnobio Orbacensi, paucorum illorum Prædestinatariorum, qui in quinto Ecclesiæ extiterunt Sæculo, perversa dogmata, circà mortem Christi, prædestinationem, & gratiam (si fides habeatur Hincmaro Remensi in Galliis Episcopo) nono sæculo recoxisse, eumque à Rabano, Præside in Moguntina Synodo anno 848. convictum, damnatumque esse, ac tandem eodem anno apud Remos ab Hincmaro pari sententiâ perculsum, virgisque cæsum, librum suum in ignem còactum esse projicere, & in carcerem detrusum, in suo errore pervicaciter obfisse. Sic de Gotteschalco sentiunt multi. Verùm, *Florus*, Lugdunensis Diaconus, sub Lugdunensis Ecclesiæ nomine eruditum edidit librum, qui extat To. 3. Conc. Gall. pag. 352. in quo Hincmarum, ejusque contra Gotteschalcum actionem, & judicium confutavit. Plurimi etiam noni Sæculi Catholici viri, & de Ecclesiâ benemeriti patrocinium Gotteschalci magno animorum æstu susceperunt, quos inter sunt *Ratramnus*, Corbejensis Monachus, *Prudentius*, *Tricassinus*, *Lupus Servatus*, Presbyter Moguntinus, *Lupus*, Abbas Ferrariensis, & Ecclesiâ Lugdunensis. Immò non desunt etiamnùm Catholici Auctores, ut videre est apud *Gilbertum Manguinum*, Galliarum Regi à Consiliis, & in Historia tam Sacra, quàm prophana apprimè eruditum, qui Gotteschalchum ab hæresi vindicant.

Sed

Sed de Gottschalco, hæc historicè retulisse pro Operis suscepti brevitate abundè impræsentiarum sufficiat, nec enim juvat in hac quæstione facti, de qua necdùm convenit inter eruditos, meum hîc interponere judicium. Si autem plura de Gottschalco scire desideres, Leges jam citatum Gilbertum Mauguinum in libro, quem edidit, *Vindiciarum Prædestinationis & Gratiæ*. Vide etiam Historiam Ecclesiasticam, quam nuper Romæ edidimus, Tom.3. Colloquio 3. in Historiam noni Ecclesiæ Sæculi, ubi de Gottschalco, ejusque doctrinâ, fortunâ, & morte, à pag.356.usque ad pag.365. sât copiosè disseruimus.

Finis Tomi Primi.



M E N D A , quæ irreperunt in Editionem hujusce
primi Tomi .

In Dissertationibus Prolusoriis .

Pag.	Lin.	M E N D A .	C O R R I G E .
IV.	13.	conscripta .	conscriptas .
XXXVI.	23.	nulla .	adde signa .
XCIH.	28.	tër millesimo .	quatèr millesimo .
XCV.	3.	quinquennio .	quadriennio .

In Dissertationibus Tractatus De Myſter iis Chriſti .

Pag.	Lin.	M E N D A .	C O R R I G E .
10.	25.	meriti .	mariti .
15.	7.	part.2.	art.2.
25.	ult.	Maria .	Mariam .
85.	24.	nondum .	nodum .
145.	36.	teſtantur .	teſtatur .
247.	1.	Æræ .	Æra .
289.	33.	fuiffent .	fuiffet .
291.	31.	triumparunt .	triumpharunt .
292.	38.	non non	dele unum non .
326.	28.	docent .	docet .

Alia, ſi quæ occurrent, leviora Typorum menda, facili negotio corriget
Lector, atque pro ſua humanitate condonabit .



